



Esuquidistu Chuiquin Tantiamente

Matsés New Testament

Contents

Mateyon Dada uaid	1
Madcosën Dada Uaid	78
Ducasën Dada uaid	123
Uanën Dada uaid	198
Esus Chuibenequidon Naid	253
Doma yacnocquidon Iste	318
Codinto yacnocquidon Iste 1	353
Codinto yacnocquidon Iste 2	382
Cadasia yacnocquidon Iste	399
Epeso yacnocquidon Iste	412
Pidipos yacnocquidon Iste	423
Codosas yacnocquidon Iste	431
Tesadonica yacnocquidon Iste 1	439
Tesadonica yacnocquidon Iste 2	446
Timoteyon Iste 1	450
Timoteyon Iste 2	460
Titon Iste	467
Pidemonën Iste	472
Ebedeyon Isadaidbon Iste	474
Santiacon Dada Uaid	495
Petedon Dada uaid 1	503
Petedon Dada uaid 2	513
Uanën Dada uaidëmpi 1	518
Uanën Dada uaidëmpi 2	526
Uanën Dada uaidëmpi 3	527
Udasën Dada uaid	529
Esusën Uan Ismiaid	532



Esuquidistu Chuiquin Tantiamente

New Testament in Matsés (PE:mcf:Matsés)

Language: Matsés

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2008 Wycliffe Bible Translators, Inc.

Copyright © 2008 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

f0bbb15d-59e6-51b6-8a4c-5729604952e2

ISBN: 978-1-5313-0403-4

MATEYON DADA UAID

Esuquidistun tsusedpabotedi chiaid

(Duc 3.23-38)

1 Esuquidistu chuiquin dada uanu. Aidèn tsusedpa Abadauan nec. Aidèn tsusedpabidi Abadauanèn tsyuecquid Dabid nec. Abadauanèn tsyuecquido chuiquinc aidèn tsyuecquid Dabidèn tsyuecquido chuiquinc caquin Esusèn tsusedpabotedi chuinu. Tantia.

² Abadauanquiobi bedanquin chuinu. Abadauanèn mado Isac cuëmèdpampic. Isaquèn madobic Acobo cuëmèdquid. Acobon mado dadpen icpampic. Abentsèc Uda cuëmèdnuc aton buchiado utsi-utsiec cuëmèdpampic. ³ Adnubien Acobon mado Uda caidèn Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsèc Pades cuëntanquin utsi Sada cuëmèdpampic. Padesèn mado Eston cuëmèdpampic. Estonèn madobic Adan cuëmèdquid. ⁴ Adanèn madobic Aminidad cuëmèdquid. Aminidadèn madobic Nason cuëmèdquid. Nasonèn madobic Sadmon cuëmèdquid icpampic. ⁵ Adshumbic Sadmonèn aton chido Daba bedshun aton mado Bos tishmepampic. Adoac canishumbi Bosèn aton chido Dud bedshun aton mado Obed tishmepampic. Obedèn mado Isai cuëmèdquid icpampic. ⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidèn dada utsi Udias caid cuesunetanquin aton chido bedshun aton mado Sadomon tishmepampic.

⁷ Sadomonèn mado Doboan nepampic. Doboanèn madobic Abias cuëmèdquid. Abiasèn madobic Asa cuëmèdquid. ⁸ Asan madobic Osapad cuëmèdquid. Osapadèn madobic Odan cuëmèdquid. Odanèn madobic Usias cuëmèdquid. ⁹ Usiasèn madobic Otan cuëmèdquid. Otanèn madobic Acas cuëmèdquid. Acasèn madobic Esequias cuëmèdquid. ¹⁰ Esequiasèn madobic Manases cuëmèdquid. Manasesèn madobic Amon cuëmèdquid. Amonèn madobic Osias cuëmèdquid. ¹¹ Osiasèn madobic Econias cuëmèdquid. Aid Econias caid aton matsesadobèdtabi yuanuen Babidonia yacnocquidon aton nidaidèn buampampic.

¹² Buanac shubu dadpen icquid Babidonia caid yacnoshon Econiasèn aton mado Sadatied tishmepampic. Sadatiedèn mado Sodobabed cuëmèdpampic. ¹³ Sodobabedèn madobic Abiud cuëmèdquid. Abiudèn madobic Ediaquin cuëmèdquid. Ediaquinèn madobic Asod cuëmèdquid. ¹⁴ Asodèn madobic Sadoc cuëmèdquid. Sadoquèn madobic Aquin cuëmèdquid. Aquinèn madobic Ediud cuëmèdquid. ¹⁵ Ediudèn madobic Ediasad cuëmèdquid. Ediasadèn madobic Matan cuëmèdquid. Matanèn madobic Acobo cuëmèdquid. ¹⁶ Acobon madobic Ose cuëmèdpac caondash. Aidquio Madian bënë nepac caondash. Aidèn inabi Madian Esus usundoshon tishpac caondash. Esus Nuquin Papan chomiaid yec matses bédambo icmequidquio nec. Isadaidbon cainaidquio nec.

¹⁷ Aidtedi Esusèn tsusedpabo icpampic. Abadauamba bedanquin aton matses 14tedi chuiquin Dabid ènquin chiombi. Adoshombic Dabid ènquin chui-boed chuioaquin padpiden bedanquin aidèn matses 14tedbidi chuiquin Econias aton matsesbèdta buanaid ènquin chiombi. Adoshombic Econias ènquin chui-boed

chuiuoquin padpiden bedanquin aton matses 14tedbidi chuiquin Esusquiobi ënquin chiombi.

Esuquidistu tishaid

(Duc 2.1-7)

¹⁸ Nëbi aid tishaidquo chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash. ¹⁹ Usundoacsho isun abi inuequidën Osen dada utsin chudaïd danec: —“Nëbi mibi bedtiapimbo iquebi,” quequin bedenquo icnuen dada uashun Madia menenu —queuidpac caondash. Nuquin Papan chiacpadquo bëdambo icquid icquin naden chiambo icpac caondash. —Bedabi bacuë usundoaque. Cuidquimbien ictiad —quequin aton matses chienquo yequi: —Bedenquo icnuen dada uaid menenu —queuidpac caondash.

²⁰ Adnubien Nuquin Papan abi yacnoshon uaidën mayan bëdan Ose ushquin ismepac caondash. —Dabid yampidën tsyuecquid icsho mibi chuinu, Ose. Tantia. Chudenquo icquin Nuquin Papan Mayanën Madia bacuë usundomiaye. Dacuëdenda. Dacuëdenquo icquin Madia min shubuno buanta. ²¹ Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquo iquendac,” quequin Esus cuënta —quequin mayan bëdan Ose ushquin ismepac caondash.

²² Aden mayan bëdan Esus tishte chiacpadomboen Nuquin Papan ambi chiaïd naden dada uamepampic.

²³ “Dadan inacmaidëmbi bacuë usundoshon dada bacuë tishendac.

Aidi Imanued cuënendac.

‘Nuquin Papapadquidquibidi matsesbëd tabadnuec choash nec,’ quequin Imanued cuënendac,”

quequin Esus tishte Nuquin Papan dada uamepampic.

²⁴ Aden mayan bëdan chiac isucunshumbien aidën chiacpadomboen Osen aton shubuno Madia buampac caondash. ²⁵ Buanshun Osen chudenquo icnubi dada bacuë tishpac caondash. Tishacsho Esus cuëmpac caondash.

Uispa isquido Esus isec choaid

2 Nidaid Udeya caïd yacno tabadquin shubu daëdpactsëcquid Beden caïd yacnoshon Esus tishpac caondash. Adnubien shubu dadpen icquid Edusaden caïd yacno isadaïdbo matses ancaquid Edodes cuëmëdquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin ² anocquido chuituidpac caondash. —Min matses isadaïdbo chuiquid dapa ictequidquo nëbi tishsaidëmpi ¿midambo ictseque? Isnu. Aid tishaid tantiamete uispa isombique. ¿Mitsimbo ictseque? Isnu. “Chuiquid dapa bëdamboshë ictequid nec,” quïash aid isnuec chopobi —quetuidpac caondash.

³ Adsho tantïash dacuëdcuededpac caondash abitedimbo. —Padtec. ¿Mïdapadquid bacuë nependabac? —quecuededpac caondash Edodes isadaïdbo ancaquid ambi ancaïdobëdi. ⁴ Adshumbien Edodesën abi yacno tsusiobo cho-chomepac caondash. —¿Mitsicquid caique? Tantuan —qeshun abi yacno Moïsesën dada uampid chuibanquido abi chuiquid dapabobëdta cho-chomepac caondash. Cho-chomeshumbic: —¿Mitsishunquo Nuquin Papan chomïaid min matses chuiquid

dapa ictequid tishpash? ¿Ada Nuquin Papan chiaid isbanquin tantio? —caquien: ⁵ — Ai, tantiemi. “Nidaid Udeya caid yacno tabadquin shubu daëdpectsëcquid Beden caid yacnoshon aid bacuë tishendac,” quiampicpademi tantiemi. Nuquin Papan ambi chiaid nuquin tsusedpa dada uamepampic naden. ⁶ Shubu daëdpectsëcquid Beden caid yacnocquido chiec:

“Beden yacno tabadec nidaid Udeya caidën tabadquido mibi nec.

‘Chuiquid dapa nibëdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidëmbi isadaidbo matses chuiquid dapa icquin bëdamboen tabadmendac,”

—quequin Nuquin Papan Esus tishte chiaid chuipac caondash tsusiobon Edodes caid chuiquin.

⁷ Adoquien Edodesën ambi ancaido isadaidbo ismenquio icquin matses utsibo uispa isquido chomeshun chuimepac caondash. —¿Nëbida tishaid tantiamete uispa isquin tauao? ¿Nëid inchëshën ushëmbida isbeno? ¿Ëndenda isbenonda? En chui. Tantuanu —cac chuisho ⁸ tantiashun: —Beden yacno istan. Ano nidshun mimi chiacpadquid bacuë istan. Aid bacuë istanec cuenquin ëbi chuibenta. Ëmbitsen istanu. “Nuquin Papan chomiaid chuiquid dapa ictequid bëdambo iquec,” quequin ëmbitsen istanu —capac caondash Edodesën muaquimbi. —Cuesunenu —quequimbi adopac caondash.

⁹ Adoquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: —Bacuë ictsaid shubu nëid iquec —quec. ¹⁰ Adsho isashien cuishonquepac caondash uispa isquido. ¹¹ Adash shubun puduedshun isquien aton tita Madiabëd bacuë ictsec. Aid isashic: —Matses chuiquid dapa ictequid nec. Matses bëdambo icmetequid nec —quequin aton matsesën nacpadomboen ismequin danëshën sebudpac caondash. Adshumbic ambi bëboed aton na bëdambo icquid chicshun menepac caondash nëidtedi. Nëidic shocosh piu. Nëidic bëdambo nuadnuc tauitequid. Nëidic bëdambo noadec danoshquete. Aidtedi menepac caondash. Adoash ushtopac caondash. ¹² Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedën nidenquio yec podqued utsin nidpac caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidën mayan bëdan Ose ushquin ismepac caondash. —Isucunanec cuenta. Bacuëmpi aton titabëdta buanec nidaid utsi Equipito caid yacno cuenta. Ëmbi chiabi choenda. Anobi tabadta. Edodesën: “Bacuëmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bëdan.

¹⁴ Aden ushquin ismiac isucuntantsequi inchëshëmbi puduanec aton bacuë anibëdta buanec nidaid utsi Equipito caid yacno Ose nidpac caondash. ¹⁵ Equipito yacno nidash ambobi tabadpac caondash. Isadaidbo ancaquid Edodes unësbabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaid chuibanquidën Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio

cho, Mado, caindami,' quiosh Nuquin Papa," quequin Nuquin Papan chiaid dada uapampic.

Bacuëbo dadpen cuesun siatanaid

¹⁶ Adnubien isadaidbo ancaquid Edodes: —Uispa isquidon cacuidposhi —quiahs comapenec nëishun aton yuabo sondado chuipac caondash. —Uispa isquidon chuibopadtsëcquid comapenec onquecuenabi ictsëcquidotedi dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbot-sen cuesun siatan —cac cuesun siatampac caondash. ¹⁷ Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

¹⁸ "Abi yacnuësh aton bacuëbo nibëdansho isash isadaidbon chidobo sedenquecuededendac.

Unësaid tantiec baded ënëdenquio yec sedenquebudnendac,"

quequin chiampicpadomboen aton bacuëbo nibëdamepac caondash.

¹⁹ Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash. ²⁰ —"Bacuëbo cuesun siatan," quiondaid unësaccoshe. Min chido min bacuëbëdta buanec min nidaid Isadaid caidën nidoata —caquien ²¹ isucunanec aidën chuibocno buanuec nidpac caondash.

²² Aton nidaidën nidshun aton matsesën chiaid tantiapac caondash. —¿Ada tantio? Udeya yacnocquido ancadened unësaidën mado Adquedayo caid ancانquidquibidien nechitec —quesho tantiashien dacuëdtampac caondash Ose. Adshobien Nuquin Papan Ose ushquin ismeoapac caondash. —Cuesunenushë. Min nidaid Udeya caidën nidenda —quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquio yec uquëmbo nidpac caondash. ²³ Uquëmbo nidec shubu dadpen icquid Nasaded caid yacno choash ambo tabadtuidpac caondash. "Nasaded yacnocquid nendac," quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

Uan acten mentoanquidën chuibeniaid

(*Mad 1.1-8; Duc 3.1-9, 15-17; Uan 1.19-28*)

3 Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capuenequin Nuquin Papan chiaid chuibenequid nepac caondash. ² Adquid icquin Esus chote chuibampac caondash naden. —Mibi icsaid ënash bëdamboec tabadta. Nuquin Icbombo choeque —quequin chuipac caondash. ³ Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden. "Masiuidpambo yacno shubu nibëdacno capuquin ëcac matses chosho chuibenendac.

'Chuiquid dapa choeque. Podqued andëdbanshunta,' quiacbimboen:

'Nuquin Icbombo choeque.

Icsaid ënash bëdamboec tabadta,' quequin chuibenendac,"

quequin Isayasën Uanën chuite chuipampic.

⁴Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tspiantebic nidaidën capuquid yua bitsi nacnenaïd tsi-upondash. Aton pete bacumbëd shioshbimboecquid icpondash. ⁵Aidën Nuquin Papan chiaïd chuibenesho tantianuec nëidtedi matses cho-chopac caondash. Nëidic shubu dadpen icquid Edusaden caïd yacnocquido. Nëidic nidaid Udeya caïd yacnocquido. Nëidic acte Odan caïd cuëman tabadquido. Aidtedi cho-chopac caondash. ⁶Cho-choshon Uanën chuïsho tantiash: —Nuquin Papan chiaïd niac-niaquec icsapobi. Icsaboedi aid tantiec bëdamboec tabadtiadquïo iquebi —quesho: —“Nëïd Nuquin Papa tantianu,” quequid nec —quequin acte Odan caïdën mentopac caondash Uanën.

⁷Adnubien padiseyobobëd saduseyobo Uan isec cho-chopac caondash. Padiseyobo isadaïdbo tsusedpabon chiaïd namequido nec. Saduseyobobic: —Matses unë-saïd uincuenenquïo iquendac —quequido nec. Aïdo cho-chosho isun Uanën: —Nisibimboecquido mibi nec. Adquidën icsa uacbimboen matses icsa uaquido mibi nec. Bëdambo icquid damianquiec mibi iquec. “Nuquin Papan mibi cuidnushe. Tantiatan,” quequin çtsuntsin chiac cho? ⁸Mentomete bunec Nuquin Papan chiaïd niac-niacboedi ënash bëdamboec tabadta. ⁹“Ëbïpadquid Abadauanën tsyuecquïdoudit-sëqui Nuquin Papan bëdamboen isec,” quequin tantienda. çAdquïdta Nuquin Papan bëdamboen ispec? Abadauampadquid abi tantiaquïdien Nuquin Papan bëdamboen isec. Mïmbi bëdamboen tantiatiapimbo icsho isun nëïd cuënotebi matses uashun Nuquin Papan Abadauampadquid abi tantiaquïdombo icmetsïash icnushe. Nuquin Papambo tantiata. ¹⁰“Icsambo icquid nec,” qeshun ambi nitsinaïd cuëte bacuëesa dëdshun nëdëncacbimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chïec.

¹¹Adshumbic padpiden chuiquin Esusën nate chuïpac caondash. —Nuquin Papa tantianuequïd acten mentobanquin chuïbanquïd nebi. Padnuen con tsyuecquïd choshon aïdënsen chuïbanendac. Ëbi bëdiactsëc tantiaquïd ictsëcnuc aïdquïen comapenen tantiaquïdquïo yec bëdamboshë iquendac. “Aïdquïo bëdamboshë icquïd icnuc çatotsïeshun icsaquïdquïobi: ‘Aïd choec,’ quequin chuïquïdquïo Nuquin Papan ëbi icmeposh?” quec tsadebi. Ëmbi chuïboed choshon: “Ëbi tantiaquïd nec,” qeshun aton Mayan menequin bëdamboec tabadte mibi tantiamendac. Abi tantiesaboen cuidendac. ¹²Piacbo choeshashun putu bushcaquin secacbimboen abi tantiesabo chïan anëdënquïacno nësecaindac. Adshumbic abi tantiaquïdo abëdi tabadmendac —quepac caondash Uan acten mentoanquïd.

Uanën Esus mentoaid

(*Mad 1.9-11; Duc 3.21-22; Uan 1.32-34*)

¹³Acte Odan caïdën matses mentoec adpac caondash Uan. Adnubien Uan yacno Esusquïo chopac caondash. Aton nidaid Cadidia caïd yacnuësh tauamboen matses ismenuec choec: —Ëbitsen mento —quetuidpac caondash. ¹⁴Adshobien Uanën: —Padenquïo iquembi. Nuquin Papan chomiaïd icquin mïmbibi ëbi naquïen bëdambo ictsïash. çAtotsïeshun ëbi aden chïe? Padi —qeshobien: ¹⁵—En na. Bëdambo iquec. Ëbi mentoquin mïmbi Nuquin Papan chiacpadomboen natsïaque. Ëbi acten mento —quesho tantiashun Esus acten mentopac caondash Uanën.

¹⁶Adoac Esus pudundonobien canchedacbimboec abu shëcuë yampac caondash. Adsho isaquïen aïd shëcuë yacnuëshquïo dëbïmbimboec budec Nuquin Papan

Mayan Esusquo matsadtopac caondash abëd icnuec. ¹⁷ Adnubien abucuëshquio Nuquin Papa onquiampac caondash. —Nëid ëmbi tantiaidquio con Mado nec. Ëmbi chiacpadomboen nasho isash bëdambo iquebi —quepac caondash Esus caic.

Satanasën Esus icsamenuequin tanuidaid

(Mad 1.12-13; Duc 4.1-13)

4 Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënquid Satanasën Esus icsamenuequin ma tanu —quequin ambo nidmepac caondash.

² Adoquien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntsëcncuc 40tedec ushquin penquio yec comapenec bumpac caondash. ³ Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata —caquien ⁴ Esus: —Padi. Nuquin Papan chiaid dada uapampid nad iquec. “¿Petuïdi tantiecta matses bëdamboec tabadpec? Nuquin Papan chiacpadomboenuïdi naiquien matses bëdamboec tabadtsiash,” quequin dada uapampid iquec —quepac caondash Esus.

⁵ Adsho tantiaishumbien shubu dadpen icquid Edusaden caïd yacno buanshun Nuquin Papa tabadte shubu uashunaid macano Satanasën Esus manidtomepac caondash abucquio. ⁶ Adotanquimbien padpiden chuiuoquin: —¿Nuquin Papa caïdën Madombobida mibi neque? Aidën Mado yec nëuëshquio pudunta. Nuquin Papan mibi paëdmenquio ictsiashe. Nadentsen Nuquin Papan chiaid dada uapampic.

“‘Uïdën uata,’ quequin ambi abi yacnoshon uaido mayan bëdabo Nuquin Papan chiac mibi uïdën uaindac paëdenquio icnuc.

‘Cuënoten tadquëdnushe,’ qeshun adoendac,”

quequin Nuquin Papan chiaid dada uapampique. Pudunta —caquien ⁷ Esus: —Padi. Nuquin Papan chiaid dada uapampid nad iquec. “‘¿Icsamboen tantiaquin ëmbe-mbi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

⁸ Adoquien Satanasën padpiden buanquin macuësh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash. ⁹ Adoshombic: —Nëïdtedi mibi menetsiambique. Ëbi con icbo cata. Ëbi aden chuiquin ismenuen danëshën sebudta. Adsho isun ëmbi ismiactedi mibi menembi. Aidën icbo mibi icmembi —caquien ¹⁰ Esusën: —Padi. Baded cuenta. Nuquin Papan chiaidquio chuiquin naden dada uapampique. “Nuquin Papa abentsëcquiobi mimbi tantiaïduïdtsëqui min Icbombo neque. Aidën namiaïdquio icta,” quequin dada uapampique. Cuenta —capac caondash Esusën. ¹¹ Adoquien Satanas cuempac caondash. Cuenubien Nuquin Papan abi yacnoshon uaido mayan bëdabo choshon abëdi tabadquin Esus bëdambo icmepac caondash.

Cadidia yacnoshon Esusën chuïbeniaïd

(Mad 1.14-15; Duc 4.14-15)

¹² Adashic aton nidaid Cadidia caïdën Esus nidpac caondash. —Mibi acten menton-daid Uan bedshun quënën nauedac caosh —quesho tantiaish nidpac caondash.

¹³ Nïdashic shubu dadpen icquid Nasaded caïd yacno tabadash nïdec chian dapa

cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. ¹⁴ Esus ambo tabadte chuiquin Nuquin Papan con tsusedpa Isayas cuëmëdquid dada uamiampicpadec ambo tabadpac caondash Esus. Naden dada uapampic.

¹⁵ “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpembo dadpen tabadacno Cadidia caidën tabadquidon.

¹⁶ Aidtedishun Nuquin Papan chomiaid tantiendac.

Pabiate cuënëdacbimboec icsamboec tabadquin Nuquin Papa tantienquo icboe-
dombi tantiabenendac.

Nuquin Papa tantiamenuen chuibansho tantiashun matsesën paposhquiacbimboen
Nuquin Papa tantiabenendac.

Abi tantienquo icsho Nuquin Papan cuidtsenaaidombi Nuquin Papa tantiabenendac
ushash isucunacbimboen,”

quequin Isayas Esus choash tabadte dada uamepampic Nuquin Papan.

¹⁷ Ashunquiobi Nuquin Papan chiaid chuiquin tauamboen Esusën matses abited-
imbo chuibenepac caondash. —Icsaid ënash Nuquin Papa tantiec ambi chiacpadec
bëdamboec tabadta. Nëbi Nuquin Papan abëd tabadtequido icmequin matses bë-
damboen tabadmendac —quepac caondash Esus ambibi naid chiequi.

Nuëcquid bedquido Esusën: Cho, caid

(Mad 1.16-20; Duc 5.1-11)

¹⁸ Aden chuibenec chian dapa Cadidia caid cuëman nidquin isquien dadan aton
utsibëdtambi nëshaid dapambo acte nënepec. Aid Simombidi Petedo capec. Aton
utsi Andedes nec. Aid daëdshun nuëcquid bedquidombo icquin aton nëshaid acte
nënesho istuidpac caondash Esusën. ¹⁹ Adshumbien Esusën: —Nuquiibi icnu. Cho.
Nuëcquid bedquid icboedi nëbi ëbi chuibanquid mibi icmenu ²⁰—caquien aton
nëshaid nianec nidquimbi Esus tsibanampac caondash.

²¹ Udictsëc nidquin isquien dada daëd cano antabëdpec. Acobo aton utsi Uambëd
icpac caondash. Aton papa Sebedeyo caidbëdi cano antabëdquin nuëcquid bednun
aton nëshaid dapa nacnempac caondash. Adsho istuidshun Esusën: —Nuquiibi icnu.
Cho —caquien ²² aton papabëdta cano nianec Esusbëd icnuec nidpac caondash.

Matses dadpen Esusën chuibeniaid

(Duc 6.17-19)

²³ Adashic aton nidaid Cadidia caid yacnobi capucuenec Nuquin Papan chi-
aid chuibante shubun-shubunquieac puduedcuenequin Esusën Nuquin Papan chi-
aid chuibenepac caondash. Abi yacno tabadmenun Nuquin Papan bëdamboen
iste matses chuibeniatic caondash. Adshumbic daicsaidotedi bëdamebampac caon-
dash. ²⁴ Adosho istanquin: —Bëdamequidquio nec —quequin isboedon Esusën naid
chuibenepac caondash. Ënapen nidec nidaid utsi Sidia caidën nidshun chuibeniatic
caondash. Aden chiac daicsaidotedi bë-bëpac caondash. Dada paëmboshë icquido

yec podobitsi icsa dapuduedaido yec unēsanequido yec dada shēquēquenquio icquido yec quenuc bē-bēacsho aitedi bēdamepac caondash Esusēn. ²⁵ Aden: — Bēdamiosh —quequin chiac isec cho-choash dadpenquio tsucus-tsucustsēcquio yec tsidadash niqianquin Esus tsibanampac caondash. Nēidtedshun tsibananac caondash. Nēidic nidaid Cadidia caidēn tabadquidon. Nēidic shubu dadpen icquid Decapodis caid yacno tabadquidon. Nēidic shubu dadpen icquid Edusaden caid yacnocquidon. Nēidic nidaid Udeya caidēn tabadquidon. Nēidic acte Odan caid uquē cuēma utsiuc tabadquidon. Aitededshun Esus tsibanampac caondash.

Nadquido bēdambo iquendac, quequin Esusēn chiaid

(Duc 6.20-23)

5 Matses dadpeshun tsibananac macuēsh dapa cuēte nibēdpamboecquid pudundoec poctsebi Esus tsadtuidpondash. Abi tsibananash matses dadpen abi datsidadnubien abēd icquido Esusēn dayunquio tabadpondash. ² Adshobien Nuquin Papan matses bēdamboen isquin bēdambo icmete Esusēn matses abitedi chuibampondash.

³ —¿Mitsipadquid Nuquin Papan bēdambo icmepec? Nadquid caimbique. Tantia. Mibitedi chuinu. “Ēbēmbi bēdamboec tabadtiapimbo iquebi. Bēdapenquio iquebi. Nuquin Papan bēdamboen tabadmiaquini bēdamboec tabadtsiac,” quequid Nuquin Papan: “Ēbēd tabadtequid nec,” quequin bēdambo icmendac.

⁴ “Matses abitedi icsamboec tabadnuc ēbitsen icsamboec tabadquid nebi,” quec shubiquimbi abi tantiasho Nuquin Papan bēdamboen isquin bēdambo icmendac.

⁵ Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bēdambo icmendac. Yuecshun ambi nidaid chuca uaidēn tabadmendac.

⁶ Pete bunacimboec ambi chiacpadec bēdamboec tabadte bunquid Nuquin Papan bēdamboen tabadmendac.

⁷ Abi chieshēnquidi chieshēnenquio icquin bēdamboen isquid Nuquin Papan bēdamboen isendac.

⁸ Ambi chiacpadomboenuidi nate bunquid Nuquin Papan bēdambo icmequin abibi bēismendac.

⁹ Aton matses chieshēnansho isash: “Padi. Chēn. Bēdamboequien tabadtiad,” quequid Nuquin Papan bēdambo icmequin con mado caindac. Adquidbidi adembidi con champi caindac.

¹⁰ Nuquin Papa tantiec bēdamboec tabadsho utsin chieshēnaid Nuquin Papan bēdambo icmequin unēsacsho abēdi tabadmendac. ¹¹ “Esus tantiaquid nec,” queshun utsin mibi chieshēnquin chiacsho Nuquin Papan abēd tabadmenuen mibi bēdambo icmendac. Mibi cueso adembidi mibi bēdambo icmendac. Adembidi mibi muauasho Nuquin Papan mibi bēdambo icmendac. ¹² Aden utsibon: “Esus tantiaquid nec,” queshun chieshēnaqui cuishonqueta. “Ēnden tsusedpabon Nuquin Papan chiaid chuisho chieshēnquin cuesunepampic. Adoacsho Nuquin Papan bēdamboen isquin abēdi tabadmec. Adembidi utsibon chieshēnacsho ēbi bēdamboen isquin unēsacsho abēdi tabadmendac,” quiash cuishonqueta —quequin chuipondash Esusēn.

Abi tantiaquido bēdamboec tabadte chiaid

(Mad 9.50; Duc 14.34-35)

¹³ Abi macuēsh dapa poctse tsadquin Esusēn chuibampondash. —“Ma utsibontsen Nuquin Papa tantianu,” quec sa pambid casecac batambo yec petiadquio yacimboc icta. Aden Nuquin Papan chiacpadec bēdamboec tabadquin mimbi utsibo bēdamboec tabadte bumetsiac. Sa batambo icquid bēdambo iquec. Sa batambo icboedi batapenquio yec icsasho ʒmitsipadentsi batambo icmeoapec? Adotiapimbo iquec. Sa icsambo yanacsho penquio icquin secatequid nec. Adem-bidi matses bēdamboec tabadenquio yec icsambo icsho Nuquin Papan chian anēdēnquiacno nēsecatequid nendac —quepondash Esus.

¹⁴ Adashic padpidec onquec: —Nuquin Papan chiacpadec bēdamboec tabadte utsibo tantiamequido mibi neque. Aden tantiamenuc bēdamboec tabadta. ʒNuntan-shunda ēpadic? Padenquio. Umanucshumbien ma tantianueshun ēaquid. Adem-bidi: “Ma Nuquin Papan chiacpadec tabadte tantianu,” quiash ēnēdenquio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo. ¹⁵ ʒUtsibo chuinucta abentsēqui uano icpadic? Padenquio. “Ma nēidēn tantianu,” quec aidbēdi bēdamboec tabadquin chuibanquid. ¹⁶ Adem-bidi ēbi tantiesabobēd tabadquin: “Ma Nuquin Papa tantianu,” quequin ēnenquio icquin Nuquin Papan chiacpadomboen nata. “Nuquin Papa bēdambo iquec,’ ma utsibotsen quenu,” qeshun adota —quequin Esusēn chuipondash.

Nuquin Papan Moises chuimiaid chiaid

¹⁷ Nadentsen Esusēn chuipondash. —Ēmbi chuibansho tantiashun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbēdta con tsusedpabo utsibo dada uamiampid chienquio icquin utsi uapēc,” mimbi ēbi capec. Mambi utsi uainquio yoc. Nuquin Papan chiaid utsi uainquio icquin ambi chiatedimbo namenuc nebique. ¹⁸ Abimbo chuinu. Tantia. Abubēdta nidaid nibēdamiabi icnuc Nuquin Papan chiaid bēnudtiapimbo iquendac. Ambi chiatedimbo naquin Nuquin Papan nainendac.

¹⁹ Padnubic Nuquin Papan: “Nadomboen nata,” quequin chiaid abentsēqui niacquin aid chiaidbidi adomboembidi niacmequid Nuquin Papan: “Bēdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdambošhē icquid nec,” caindac. ²⁰ Moisesēn dada uampid chuibanquido padiseyobobēd Nuquin Papa yacno puduedtequidoen mimbi dampec. Aido bēdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adem-bidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash —quequin chuipondash Esusēn.

Chieshēmēnquido nēish bēdante chiaid

(Duc 12.57-59)

²¹ Adshumbic Esusēn padpiden chuioapondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidēn cuesunemequin cuidquid,” quequin chuiampid

mimbi tantiec. ²²“Nadquidotsen cuidtequido nec,” quequin chuinu. Tantia. Aton matses nëishënash aton nëish bëdanenquio icsho Nuquin Papan cuidtequido nendac. Utsibic chieshëmë nec icsamboec cuëmënquido isadaidbo tsusiobon cuidacsho isun: “Bëdamboen naic,” catsiambi. Nëidic aton matses chieshënquin shëpiquid Nuquin Papan icsano nësecaquin cuidtequido nendac. ²³“Chieshëmënquid Nuquin Papan cuidtequid nendac,” quequin ëmbi chuisho tantiaashun bëdamboen nata. Nuquin Papa tabadte shubu uashunaidën puduedash: “Ambi chiacpadomboen musuc menenu,” mibi quepec. Aden musuc menenumbi mimbi naid tantiata. “¿Ada ëbi chieshënquid icpec? ¿Ëmbi chieshëmeboedta icpec?” quequin tantiata. ²⁴Adshun: “Ai, ëmbi chieshëmeboed iquec,” qeshun Nuquin Papa tantiaquin mimbi bëboed meniabi mibëd chieshënamboed yacno nidash aidbëd bëdamboec onqueta. Adec bëdamboec onquiash padpidec choashun Nuquin Papa tantiaquin meneta. Adec mibëd chieshënamboedbëdi bëdamboec onqueta.

²⁵Mibëd chieshënamboed utsimbic: “Nëid chidmenuen cuidte chuiquid yacno buanchitembimbi iquec,” qeshun: “Baded nid,” cac podquedën nidec aidbëd bëdamboec onquenidta: “Ma nëish bëdanu,” quiash. “Matses cuidte chuiquidën cuidchitoshe,” quiash badedquio mibëd chieshënamboedbëd bëdamboec isnanta. Abi yacno buanacsho cuidte chuiquidën: “Icsambo iqueque. Quënën nauedta. Ëmbi chiacsted piucquid ëmbi bedabi icnuc ma tsadpanu,” mibi catsiash. Quënën nauedshun ²⁶ambi chiacsted piucquid nibëdnuc mibi cuemenquio ictsiashe. Mibëd chieshënamboedbëdi bëdamboec onqueta. “Nuquin Papan adembidi cuidnushe,” quiash adta —quequin Esusën chuipondash.

Icsaquin chudaid chiaid

²⁷Adshumbic naden Esusën chuipondash. —Chiaid utsitsen mimbi tantiec. “Min chidopenquio chudenda. Min bënëpenquio chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic. ²⁸Aden chiaid niac-niaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquio tantiequi matses icsapec. ²⁹Ëshën isec mibi min chidopenquio bunec icsaic. Ëshë chicshuniacimboec icsainquio yec ënëdash mibi bëdambo ictsiaic. Icsaid ënenquio icquid Nuquin Papan chian anëdënquiaco nësecaquin cuidendac. ³⁰Min chidopenquio chudte bunquin mëismec mibi icsaic. Mëteshuniac bedtiapimbo yacimboen mibi icsaid ënta. Ënenquio icquid Nuquin Papan cuidendac —quequin Esusën chuipondash.

Aton chidobëd cuëshëdte chiaid

(Mat 19.3-9; Mad 10.11-12; Duc 16.18)

³¹Nadentsen Esusën chuipondash. —Nuquin Papan Moises chuimaid utsitsen mimbi tantiec. “Aton chido bunenquio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. ³²Utsitsen chuinu. Aton chidon bënëpenquio chudmesho istuidshun Moisesën chiacpadomboen nac bëdambo ictsiashe. Aton chido dada utsi chudmesa icshobi dadan ambembi dada uaid menequin nidmiac icsambo ictsiashe. Aden nidmequin chido icsametsiashe. Chido nidmiacsho bedquidtsen icsatsiashe —quepondash Esus.

Abimbo chiacimboen chienda, quequin Esusën chiaid

³³ Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “Nuquin Papa utsi uatiapimbo yacimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesën chuiampic. ³⁴⁻³⁶ Aidën chiacpadec muainquo ictiadquidi mimbi abimbo chiacimboen utsi uain icsamboen chiec. “Abi cuëmëdquid cuënc muasho ëbi cuidtsiash. Nuquin Papa cuëmëdquid cuëncquo yec muasho Nuquin Papan ëbi cuidenquo ictsias,” qeshun mimbi utsi chiec. “Abu utsi uatiapimbo yacimboen ëmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yacimboen ëmbi chiacpadomboen naimbi,” mibi queopec. Adembidi chiec mibi Edusaden queopec. Adembidi con mapi quequin mimbi chieque. Aden abimbo chiacimboen chienda. “Nuquin Papa cuëmëdquid cuëncquo iccombi,” mibi quenubi abu abi tabadaid icnuc ashunquo Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidën bëdamboen namendac yuecshun. ¿Min mapin icboda mibi nedi? Padenquo. ¿Mimbida min mapi masedcamedi? Padenquo. Aton Icbombien Nuquin Papan naique. Abimbo chiacimboen icsamboen chienda. ³⁷ Adec muainquo icquin abimbo chuita. “Ai, adembi naimbi,” quequin mimbi chiacpadomboen nata muainquo icquin. Adembidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidën Satanasën tantiamiacpadec mibi muapeque. Adenda —quepondash Esus.

Chieshënc cuidnanenda, quiaid

(Duc 6.29-30)

³⁸ Adashic padpidec Esus onquec: —Nuquin Papan Moises chuiquin dada uamiampid mimbi tantiaboed nad iquec. “Chieshënquin ëshë ansiac adecbidi cuidnanec ëshë ansenanquid. Chieshënquin sëcsiac adecbidi cuidnanec sëcsenanquid,” quequin chiaid icnuc ³⁹ utsitsen chuinu. Tanta. Mibi cuesquid cuidenda. Chieshënaqui cuidnanenquo icquin adembi bëdamboen ista. ⁴⁰ Min matses: “Ëbi cuidquin mimbi ëbi meniambo iqueque. Min dashcute beccho,” qesho mimbi menenquo icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bëdamboec tabadta. ⁴¹ Utsibic: “Nëbi nidtuidquin con na buanec nid,” quequin ancabudac nëbi nidtuidenquo icquin udimbo buanshunta. ⁴² Aton na nibëdquid: “Mitsana beccho,” qesho meneta. Utsibic: “Mitsana buanshun bëuaindambi,” qesho: “Padi,” cainda. Meneta. Aden bëdamboen nata —quepondash Esus.

Chieshëncquidobi bëdamboen iste chiaid

(Duc 6.27-28, 32-36)

⁴³ Adshumbic abi macuësh dapa poctse tsadquin bëdamboec tabadte Esusën chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshëncquido chieshënta,” quequin chuiampic. ⁴⁴ Utsi mibi chuinu. Tanta. Mibi chieshëncquidobi bëdamboen isquin tantiata. Chieshënaqui: “Ëbi chieshëncquid bëdamboen ista, Papa,” quequin Nuquin Papa chianeta. ⁴⁵ Aden chianec Nuquin Papabimboec mibi ictsias. Mibi ut-

sibo bēdamboen nashunquid ictsiac. ¿Bēdambo icquido yacnouidida Nuquin Papan ushē chēncamepadic? Padenquio. Icsaido yacnotsen ushē chēncamec. ¿Bēdambo icquido yacnouidida ue chomepadic? Padenquio. Icsaido yacnotsen ue chomec. Bēdambo icquidobēdtabi icsambo icquido Nuquin Papan bēdamboen nashunec. ⁴⁶ ¿Mibēd tantiananquido min shubun icquidoudi mimi bēdamboen nashunsho isunda Nuquin Papan mibi: “Bēdambo iquec,” capec? Padenquio. Mimi icsambo iquec caidontsen ambi tantiaido nashuntsiash. Aidombien piucquid bedshumēnquido icquimbi aton shubun icquidoudi nashuntsiashe. Aden nainda. Utsibotsen bēdamboen nashunta. ⁴⁷ ¿Min shubun icquidobēduidida mibi onquec tabadpe? Nuquin Papa tantiesaboen adpec. Utsibotsen bēdamboen ista. ⁴⁸ Nuquin Papabimboec icta. Bēdambo icquid icta. Bēdambo icquidobēdta icsambo icquidobi Nuquin Papan bēdamboen tantiacpadomboen utsibotsen bēdamboen tantiata —quepondash Esus.

Utsibo bēdamboen nashunte chiaid

6 Adshumbic abi macuēsh dapa poctse tsadquin Esusēn chuipondash. —Nadquid icsambo iquec. Nuquin Papa tantienquio icquimbi aton matses ismenuenuidi naic icsambo iquec. Adquid Nuquin Papan bēdamboen istiapimbo iqueque. “Utsibo nashunu,” quequin utsibo ismenquio icquin nata. ² “Aton na nibēdquido menenu,” qeshun utsibo ismequin menenda. Ismenquio icquin meniac bēdambo ictsiash. “Nuquin Papa tantiaquid nebi,” quec muaquidēn nacpaden nainda. Nuquin Papa tantiaquid damenuembien muaquidēn matses dadpen yacnoshonuidi menedenepec. Adosho isun aton matsesēnuidi bēdamboen isnubi Nuquin Papan bēdamboen istiapimbo iquec. ³ Aton na nibēdquido menequin utsibo ismenda. Meneshun: “Menebanombi,” quequin utsibo chienda. ⁴ Adsho isun mimi utsibo ismenquio icquin naid tantiaquid icquin Nuquin Papan bēdamboen isquin abēdi mibi tabadmendac —quequin Esusēn chuipondash.

Nuquin Papa chianete Esusēn chiaid

(Duc 11.2-4)

⁵ Adshumbic Nuquin Papa chianetetsen Esusēn chuipondash naden. —Bēdambo icquid damianquidēn nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidtoshon comapenec onquequin Nuquin Papa chianepec. Adash umanuc puduēshun matses dadpen ismenuenuidi padpiden adembidi chianec. Adquid aton matsesēn: “Bēdambo iquec,” canubi Nuquin Papan padenquio iquec. Bēdamboen istiapimbo iquendac. ⁶ Mibi adenda. Utsibo ismenuenuidi nainquio icquin matsesēn isacmaidquio Nuquin Papambo tantiaquidquin chianeta. Aden chianequid mibi icsho Nuquin Papan mimi utsibo ismenquio icquin naidtedi tantiaquid icquin mibi bēdamboen isquin abēdi tabadmendac.

⁷ Nuquin Papa chuiquin bēdamboen chianeta. Nuquin Papa tantiesabon ambi tantiaid chuibudacimboen Nuquin Papa chuibudenda. “Yuenquio chuibudac nuqui tantiaboedēn nuqui nashuntsiash. Padenquio icac nuqui nashunenquio ictsiash,” qeshun Nuquin Papa tantiesabon yuen chuibudacimboen nainda. ⁸ Adoenquio icquin Nuquin Papa chianeta. Mimi chiabi: “Adopashuni. Aid nibēdnuc unēsebi. Utsi icnuc bēdambo ictsiabi,” quequin mimi otacquo tantiaid Nuquin Papan tantieque. ⁹ Naden Nuquin Papa chuita.

“Bēdamboshē icquid icsho matses abitedishunquio mibi tantiapashun, Papa.

¹⁰Mates abitedishunquo mibi con Icbo capashun. Mibi yacnoshon mimbi uaido mayan bédabon mimbi chiacpadomboenuidi naic.

Adomboembidi mimbi chiacpadomboen mates abitedishunquo napashun.

¹¹Bumianenda, Papa. Badiadquidën badiadquidënquien con pete icmeta.

¹²Utsibon chieshënaqui ëbi cuidnanenquo icsho isun ëbi icsashobi cuidenquo icquin ëbi bédamboen ista, Papa.

¹³Mimbi chiaid ëbi niacmenda, Papa.

‘Icsamenushe,’ qeshun Satanas ëbi yuamenda, Papa.

Abitedishun Icbombo yec abitedimbo namequidquo mibi nec, Papa.

Ëmbi mibi chuisho tantiata, Papa.

Ënenquo icquin abitedishunquo: ‘Bédambo iquec,’ mibi capashun. Padi,”

quequin Nuquin Papa chianeta —quequin Esusën chuipondash.

¹⁴Adashic nadpondash: —Utsibo bédamboen ista. Cuidnanec chieshënanenda. Cuidnanec chieshënanenquo icsho isun Nuquin Papan mibi cuidenquo icquin bédamboen istsiash. ¹⁵Cuidnanec chieshënancho isun Nuquin Papan mibi bédamboen istiapimbo ictsiash —uequin Esusën chuipondash.

Buna mëmunte chiaid

¹⁶Adshumbic utsibo ismenquo icte utsi Esusën naden chuipondash. —Tantia. Nuquin Papauidi tantianuequin buna mëmunquid chuinu. Muaquidën nacbimboen ismenda. Muaquido: “Buna mëmunquid nec,” aton mates camenuc abibi maniumédash nënquidbitsëcquiec mamënenquo iquec. Adec buna mëmunquid tanec muaic. Adsho isun matesën bédambo icquid danubi Nuquin Papan: “Icsambo icquid nec,” qeshun bédamboen istiapimbo iquec. ¹⁷“Nuquin Papauidi tantiaquin nëidtedec ushquin buna mëmuni,” qeshun Nuquin Papambo tantiaquin nata. “Utsibon tantianushe,” qeshun bédamboen min manëdaid shueshcata. Adash bédamboec mamënta. Aden utsibo ismenuenuidi nainda. ¹⁸Aden bédamboen manëdaid shueshcaid isun: “Buna mëmunec nec,” cainquo ictsiash utsibon mibi chuiquin. Nuquin Papambien: “Ëbiuidtsëqui tantianuen naic,” quequin tantiatsiash. Adshun mimbi utsibo ismenquo icquin naidtedi tantiaquid icquin abëdi mibi tabadmendac —quequin chuipondash Esusën.

Nuquin Papa yacno tabadte bunta, quiaid

(Duc 12.34)

¹⁹Adshumbic padpiden Esusën chuipondash. —Ëmbi chuiboedquo tantiashun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matesën ampeshuntequid yec quec icsabudtequid nec. Adquiduidi tantienda. ²⁰Icsabudesambo tantiata. Nuquin Papambo tantiec aidbéd tabadte bunquin ambi chiacpadomboen nata. Chodquetiapimbo icquid yec shëniбудtiapimbo icquid yec ampeshuntiapimbo icquid yec quec Nuquin Papa yacno iqueque. Aidquo tantiata. ²¹Mibi bunaidquo ënenquo icquin tantiec mibi tabadtsiac. Nuquin Papabéd tabadte bunquin aid tantiata —quepondash Esus.

Pabiate shëcuë cuembo icquid chiaid

(Duc 11.34-36)

²² Adshumbic abi macuësh dapa poctse tsadquin utsitsen Esusën chuipondash. — Pabiate shëcuë cuembo icquin Nuquin Papa tantiaquiec mitsanauidi tantienquoio yec mibi bëdamboec tabadtsiac. ²³ Pabiate cuënëdacbimboec yec Nuquin Papa tantienquoio yec mitsanauidi tantiec ¿bëdamboecta tabadtsia? Padenquoio. Adec mibi icsamboec tabadtsiaque. Adenda —quequin chuipondash Esusën.

Bedteuidi tantienda, quiaid

(Duc 16.13)

²⁴ Adshumbic naden Esusën chuipondash. —Mitsanauidi tantiec mibi icsamboec tabadtsiac. ¿“Naic cho,” quequin daëdshun chiacta aid daëdi mimbi nashumpatsia? Padenquoio mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidsëqui tantiata —quequin Esusën chuipondash.

Nuquin Papan abi tantiaquido dayun uaid

(Duc 12.22-31)

²⁵ Adshumbic Esusën padpiden chuipondash. —Ëmbi aden chuisho tantiash dacuëndenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. Nuquin Papan nac unësabi mibi tabadeque. Aidëmbien petebëdta dasiuidte icmeque. “Con na nibëdtsiash,” quiash dacuëdec tabadenda. ²⁶ ¿Uicchunënda ambibi cuëte ëshë siac bacuëacsho chepadic? Padenquoio. Adecbidi ambi pete dayun uatequid shubumpi nibëdec. Adquid icsho Nuquin Papan aton pete bedmec. Uicchun abipadquidpenquoio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuëndenda. ²⁷ ¿“Unëstiapimbo iquebi. Dacuëdebi,” quequidta unësenquoio icpadic? Adequi dacuëdquid unëstiashe. Unësteuidi dacuëdënenda.

²⁸ “¿Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte bacuëec bëdamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bëdamboshë isadpadic? Padenquoio. Nuquin Papan uacpadquiobi iquec. ²⁹ ¿Cuëte bacuëec bëdamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquoio. Adpenquien icpampic. ³⁰ Cuëte bacuëec bëdamboshë isadboed abadiadtsëcshumbi isac ënden chodquiac. Aid badedquoio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquoio. Mibi dasiuidte icmeque. Dacuëndenda. Mitsana nibëdquio icte dacuëdënquimbi mimbi Nuquin Papa bëdiactsëc tantiatseque. ³¹ Dacuëdec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. ³² Nuquin Papa tantiesaboen adquid bedteuidi bunqueique. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëdec tabadenda. ³³ Adenquoio yec: “Con Icbo mibi nec, Papa,” quequin ambi tantiacpadec bëdamboec tabadte bunta. Adec tabadec: “Aid nibëdnuc unësebi,” quequin mimbi

tantiaidtedi Nuquin Papan mitsana icmetsiashe. ³⁴ Ĕbi adsho tantiash badiad utsi caic: “Aid badiadĕn ĵatotsimbi nape?” quec dacuĕdenda. Aid badiadĕn Nuquin Papan ambi tantiacpadomboen mibi nametsiashe. Nĕid ushĕmbi: “Naden naimbi,” quequin tantiec tabadnuna dacuĕdenquoio yec —quequin chuipondash Esusĕn.

Utsibo icsaid chienda, quiaid

(Duc 6.37-38, 41-42)

7 Naden Esusĕn Nuquin Papan chiacpadec tabadte chuipondash. —Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. ² “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. ³⁻⁴ ĵAbi bĕtsiadaid bĕchish nua bĕuequid bĕbedadabi icquidĕnda: “Mibi bĕtsiadaque. Bĕbednu,” capatsiashe utsi chuiquin? Padenquoio. ⁵ Abi bĕtsiadaid abia bĕbedadashien: “Mibitsen bĕbednu,” quetsiashe. Adembidi mimbia mibi icsaid ĕnshun: “Icsaid ĕnash bĕdamboequien tabadtiad,” quequin utsibo bĕdamboen chuita. Bĕdambo icquid damianquidĕn abi icsaid ĕnabi: “Aid icsambo iquec,” quequin utsibo icsaid chuibanec. Adquid tanenda. ⁶ Mimbi bĕdamboen chiacqui tantienquoio icsho chuidonenda. Nuquin Papan chiaid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacximboen mibi chieshĕntsiashe. Chanchon icbon dashcute nebudshun bĕchish uaquin tin-tincacximboen Nuquin Papan chiaid niac-niaetsiashe. Adquid chuidonenda —quepondash Esus.

Ĕnenquoio icquin Nuquin Papa chianete chiaid

(Duc 11.9-13)

⁷⁻⁸ Nadembidi Esusĕn chuipondash. —Nuquin Papa ĕnenquoio icquin chuidoneta. Bacuĕbon: “En na,” cadoniacximboen chuidoniac Nuquin Papan mibi tantiatsiashe. Adembidi: “Ĕbi bĕdamboen name, Papa,” mimbi cacpadomboen bĕdamboen mibi nametsiashe. Adembidi: “Ĕbi nashunquin ĕbi bĕdambo icmeta, Papa,” quequin chuidoniac Nuquin Papan mibi bĕdambo icmendac.

⁹ ĵIcsambo icquidta Nuquin Papa icpadic? Padenquoio. Bĕdambo icquidquoio nec. Bacuĕmpi: “Bundobique. Penu. Beccho, papa,” ĵqueshoda amĕn cudasĕnquin cuĕnotebi menepadic? Padenquoio. ¹⁰ ĵAdembidi aton bacuĕn: “Nuĕcquid chenu. Beccho, papa,” cacta cudasquin nisimbo menepadic? Padenquoio. ¹¹ Matses yec ic-saquido icquimbi min bacuĕbo abimbo mimbi menenubien Nuquin Papan ambi uaido matses: “Ĕbi nashunta, Papa,” queshe tantiashun bĕdamboen nashuntsiashe. Nuquin Papa chianeta.

(Duc 6.31)

¹² Nuquin Papan tantiaido icquin utsibo bĕdamboen isquin bĕdamboen nashunta. Utsibo caic: “Aidon nashumpashuni,” quequin mimbi otacquoio tantiacpadomboembidi utsibotsen nashunta. Aden Nuquin Papan chiaid Moisesbĕdtan nuquin tsusedpabo utsibon dada uaquin chiampicpadomboen mimbi natsiaque. Aden utsibo nashunta —quequin chuipondash Esusĕn.

Daëdpactsëcshun Esus tantiabente chiaid

(Duc 13.24)

¹³⁻¹⁴ Adshumbic Esusën naden chuipondash. —Nuquin Papabëd tabadnuec aid tantiec bëdamboec tabadta. Shëcuë aniambo icquidën matses abentse-abentsec puduedacimboec abentse-abentsec Nuquin Papa yacno puduednuec aid tantiec bëdamboec tabadec. Padnuen antied dapan abi maisi nidacimboec matses dadpenquo abi tantiesabo yec Nuquin Papan icsaido nësecacno nidendac —quepondash Esus.

Icsambo icquid nec, quequin tantiante chiaid

(Duc 6.43-44)

¹⁵ Abi macuësh dapa poctse tsadquin naden Esusën chuipondash. —Utsibo: “Nuquin Papan chiaidquo chuiquid nebi,” quec bëdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bëdi dapa nëish yua pete bunquiacimboec mibi icsamete bunquieque. Adquidën chuisho tantienda. ¹⁶ “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icsho tantiashun: “Utsi uain chiec,” mimbi catsiac. Chetequid isun cuëte dada matsesën tantiec. Aden tantiec nisanquidën bacuë bësho isash: “Dadainën bacuë nec,” quesa matses nec. Adecbidi echo bacuë bësho isash: “Bata nec,” quesa matses neoaic. ¹⁷ Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic. ¹⁸ ¿Cuëte bëdan bacuë chetemaidta nepec? Padenquo. ¿Cuëte icsan bacuë chetequidta icpec? Padenquo. ¹⁹⁻²⁰ Chetemaidbimboec muaquid bëdambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquo chienquo icsho: “Muaquid nec,” quequimbidi mimbi tantiatsiaque. Adquidën chuisho tantienda. Cuëte bacuëesa dëdshun nëdëncacimboen: “Nuquin Papan chiaid chiembi,” quec muaquid Nuquin Papan icsaido cuidacno nësecaindac —quepondash Esus.

Nuquin Papa yacno puduednu, queuidte chiaid

(Duc 13.25-27)

²¹ Utsitsen Esusën chuipondash. —Ëbi caic: “Con Icbo mibi nec. Mibi tantiembique. Mibi yacno ëbi puduedme,” ¿quequidtedida Nuquin Papa yacno puduedpatsiash? Padenquo. Nuquin Papan chiacpadomben naquidquien abi yacno puduedtsiash. ²² Nuquin Papa yacno ëmbi yuedte ushën matses dadpenshun ëbi chuiuidendac. “Con Icbo mibi nec. Mibi caic: ‘Aidën namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ëbi puduedme,” ²³ quesho ëbimbo tantiec Nuquin Papan chiacpadec bëdamboec tabadabi icsho: “Ëmbi tantiacmaidquo mibi neque. Baded cuenta. Icsamboec tabadquid mibi neque,” caindambi. Ëbi adsho tantiash muainquo yec bëdamboec tabadta —quepondash Esus.

Shubu uaquidbimboecquid chiaid

(Duc 6.47-49)

²⁴ Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bëdamboen natsiaque. Shubu uaquin bëdamboen tantiaquidbimboec mibi ictsiaque. Tantia. Chuinu. Bëdamboen tantiaquidën mananëquio shubu uaquin buintad nitsinquad. ²⁵ Aden shubu uan ue dapa conquiquid-bëdi chonoc shubu chimeshadenquio icquid. Shubu nuntan anchiuidenquio icquid. ²⁶ Aden ëmbi chiacpadomboen naquid icnubi utsibo ëbi tantiesa iquendac. Aido shubu uaquin tantienquio icquidbimboec iquec. Tantienquio icquidën nadoquid. Acte cuidi cuëmanquiobi shubu uaquin badedi unëstsëcquidquio cuate nitsinquad. ²⁷ Adquid nitsinaid ue dapabëd conquiquid choquin shubu chimeshquid. Adecbidi acte cubudtoquidën shubu nuntan mauanquid. Aden tantesa uatsëcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata —quequin chuipondash Esusën.

(Mad 1.22)

²⁸⁻²⁹ Adsho tantiaash: —Ma comapenen tantiaquidquio Esus neyoc. Nuquin matses tusiobon Moisesën chiampid bëdiactsëc tantiatsëcquin chuitsëccosh. Padnuen Esusënquio comapenen tantiaquin chuiposh —quecuededpondash matses dadpenquio.

Esusën daicsaid bëdamiaid

(Mad 1.40-45; Duc 5.12-16)

8 Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpenshun tsibanampondash.

² Adnubien dada ushumbo yec daicsaidquio choshon Esus ismenuen danëshën sebudpondash. —Ëbi bëdamete bunquin mimbi ëbi bëdametsiaque. Ëbi bëdame, Icbo —caquien Esus: ³—Ai, mibi bëdamete bunebi. Mibi bëdanendac —quequin mishtemaidquiobi mishnubi badedquio bëdampondash daicsaid nibëdquiec. ⁴ Adsho Esusën: —Utsibo chienquio yec nëish yua abided unës uaquido ismenuec nidta. Mibi isash: “Bëdamiaid nec,” quequin ma aidon tantianu. Moisesën chuipampicpadomboen nanuen: “Nuquin Papan bëdamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

Sondado chuiquid dapan yua Esusën bëdamiaid

(Duc 7.1-10)

⁵ Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. ⁶—Tantia. Chuinu, Icbo. Con shubun icquid con yua shëquëquenquio iccosh. Natiambo yec unëstiadtsëcquio iccoshe. Bëdameta ⁷—quesho tantiaashun: —Ai, bëdamec nidnu. Nid —caquien: ⁸—Padi. Mibi bëdamboshë icquidquio nec. Ëbibi icsactsëcquid icquin mibi con shubun puduedmetiapimbo iquebique. Nëshunquiobi bëdameta. Nidenquio icquin nëshunquiobi mimbi: “Bëdanta,” cac con yua bëdantsiashe. Mimbi tantiacpadomboen namequidquio mibi nec. ⁹ Ëbibilic chuiquid dapan namiac sondado utsibo namequid nebi. Ëmbi: “Nid,” cac badedi nidec. Ëmbi: “Baded cho,” cac badedquio choec. Con

yuan ëmbi: “Nata,” cac ëmbi chiacpadomboen naic. Mibi adquidquibidi neque. Con yua bëdameta —quepondash sondado chuiquid dapa.

¹⁰ Adsho tantiashun Esusën abi tsibambëquido chuipondash. —Bëdamboen nëidën chuipec. “Comapenen tantiaquin chuiquinuidi con yua bëdametsiash,” quequin ëbi bëdamboen tantiaquid nec. Isadaidbo adquid nibëdec. Isadaidbon ëbi bëdiactsëc tantiabededtsec. ¹¹ Tantia. Chuinu. Matses utsi icquimbi sondado chuiquid dapan ëbi bëdamboen tantiec. Adec nidaid utsi-utsiec yacnoquido isadaidpemo ëbi tantiaquido yanash Nuquin Papa yacno puduedendac. Ambo puduedash isadaidbo tsusedpabobëd tabadendac. Abadauan caid yec Acobo caid yec Isac caid yec quequidobëd tabadendac. ¹² Padnuen Nuquin Papan con matses caido isadaidbo dadpenquo Nuquin Papa yacno puduedenquo iquendac. Abi tantiesabo icsho Nuquin Papan cacumequin icsaido nësecacno mibi nidmendac. Adoac mibi tënquebudquiendac —quequin abi tsibambëquido isadaidbo chuipondash Esusën. ¹³ Adshumbic sondado chuiquid dapa chuiquin: —Nidec nid. Mimbi tantiapadec min yua bëdaneque —cac nidshun isquien bëdanac Esusën chuibocpadequi.

Petedon nachi Esusën bëdamiaid

(Mad 1.29-31; Duc 4.38-39)

¹⁴ Adash yuec-yuecpactsëc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. ¹⁵ Uesho istuidshun mëdinquin Esusën bëdamepondash. Aden bëdamiac Esus pemepondash.

Esusën matses dadpen bëdamiaid

(Mad 1.32-34; Duc 4.40-41)

¹⁶ Petedon nachi bëdamiaid inchëshbudtsëqui Esus ismenuequin matses daicsaido dadpen bë-bëpondash. Bë-bëshobien podobitsi icsa dapuduedaido comapenec cuëdquin cuemeshumbic daicsaidotsen Esusën bëdamebampondash. ¹⁷ “Nuqui ic-said ucquin nuqui daicsaidobi bëdamiac,” quequin ëndenquo Nuquin Papan Esusën nate Isayas dada uamepampicpadomboen nanuen adopondash Esusën.

Abëd icte bunquido Esusën chiaid

(Duc 9.57-62)

¹⁸ Adashic abi isnuec matses dadpenquo datsidadsho isash abëd icquido chiec: —Chian potec nidnu. Nid —quianec chian yacno nidec puduampondash Esus. ¹⁹ Pudianec nidaneshobien Moisesën dada uampid chuibanquidën Esus chinuntuidpondash. —Con Icbo mibi caindami. Mibëd nidendabi —caquien: ²⁰ —¿Ëbëdta nide? Tantia. Mibi chuinu. Bëdi chëshë shëcuën ushquid. Uicchun shubu uash abuc ushquid. Padnueni con shubu nibëdnuc Nuquin Papan matsesmiaid yec quenenenquo yec capucuenendac. ¿Ada mibi adpatsia? —capondash Esusën Moisesën chiampid chuibanquid chuiquin.

²¹ Adnubien abëd capucuneboed utsin: —Chiata, Icbo. Con pa unësoshe. Chococatambono —caquien: ²² —Padi. Cho. Ma unësaidën tantienquo yacbimboen ëbi tantienquo icquidon ma papa chococanu. Ëbëdtan bëdamboen naic cho —capondash Esusën amë unësaid chuiquin. Adobidanec nidanepondash chian yacno.

Natiambo cunquenuc acte tèccuasquiaid Esusën ënëdmiaid

(Mad 4.35-41; Duc 8.22-25)

²³ Chian budash Esus chedo cano antabëdtopondash. Adashic potenuec puduampondash. ²⁴ Aden potenubi nënantanquo icnuc cunquetuidpondash. Adnubien acte comapenec tèccuasquiampondash. Adec acte tèccuasquenuc cano acte ancushadancushadquieq yampondash cano mentoadtiadtsëcquio yec. Adsho isun abëd icquidon: —Dacuëdampambo iquec —quetanquin isquien Esus ushpec.

²⁵ Adshobien tinquin: —Nuqui mentoadequ. Isucun, Icbo. Baded ëbi nashun —caquien: ²⁶ —¿Atotsi quiash dacuëde? Èbi bëdiactsëc tantiatsec dacuëdquidquio mibi neque. Istac —quetanec nidtoshon actebëdtabi cunquequid chuipondash. —Padi. Ènëdta —caquien natiambo cunqueboedi badedquio ënëdpondash cano mentoadtsenquionobi. Actetsen tèccuasquenquo yampondash. ²⁷ Adsho isashien: —¿Mitsipadquidënquio actebëdta cunquequid ënëdmepashba? —quecuededpondash Esusbëd icquido.

Dada daëd dapuedaido podobitsi icsabo Esusën cuemiaid

(Mad 5.1-20; Duc 8.26-39)

²⁸ Aden chian potiash pudundonobien Cadada yacnocquid podobitsi icsa dadpen dapuedaid dada daëd choshon Esus chuituidpondash. Aid daëd unësaido chococaid shëcuëmbi tabadpondash. Matses cuesunete bunquieq dacuëdampambo icsho isash aid yacno matses nidenquio icpondash. ²⁹ Aidon podobitsi icsabon oncamiacpadomboen comapenec cuëdquin Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

³⁰ Uano chancho dadpenshun natiacquin udquin pebededpondash. ³¹ Adnubien podobitsi icsabon aid dada daëd oncameoac: —Èbitedi cuemiach chancho icbo-icboec dapuedetsiabi —quecuededpondash podobitsi icsabo. ³² Adsho tantiashun Esusën: —Ai, mimbti tantiacpadec nid —cac nidash chancho icbo-icboec dapuedenubi chancho abitedi macuësh budec acte nësebudec mentoadbudnepondash nibëdquieq yec. Adec podobitsi icsabo dapuduenanec nidnubi dada daëd bëdambo yampondash.

³³ Adsho istanequien chancho pemequido aton matses chiec niqianec shubu dadpen yacno nidanepondash. Chancho mentoadbudneboedbëdta podobitsi icsabo dapuemeboed uesquin chuituidpac caondash. —Nuqui dacuëdëmboedobi bëdambo yanosh —quequin ³⁴ chuituidaquien anocquido abitedi Esus isec cho-chopondash. Adec cho-choshombien: —Dacuëdampambo mibi iqueque. Èbi yacno choenda. Nidec nid —cabededpondash. Adoac Esus nidpondash.

Shëquëquenquo icquid Esusën bëdamiaid

(Mad 2.1-12; Duc 5.17-26)

9 —Nid —cac nidanec chian budash cano antabëdtoshon chian potiash abi iccondacnobidi Esus choapondash. ² Adnubien utsibon dada shëquëquenquo icquid Esus ismenuen aton uetechobi bëpondash. Bësho isumbien Esusën: —Èbi caic: “Aidën bëdametsiash,” queshun bëac —quequin daicsaid chuipondash naden. —

Dacuëndenda, madosio. Ambi chiaid niac-niaquec icsaboedi cuidmenquio icquin Nuquin Papa mibi bédamboen ismembique —capondash Esusën.

³ Adsho tantiash aid datsidadash tabadquido Moisesën dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.

⁴ Uanuësh adsho ambemi tantiashumbien Esusën aido chuipondash. —¿Atotsi quequin mimbi ëbi chieshëmpe? ⁵ Ambi namiaid icquin ëmbi: “Nuquin Papa cuidmenquio icquin mibi bédamboen ismembi” cac Nuquin Papan nëid cuidenquio iquendac. Adembidi ambi namiaid icquin ëmbi: “Caputa,” cac nëid capuendac. ⁶ Istac. Mibi ismembique. “Nuquin Papan chomiaid nec. Icsaidobi Nuquin Papa bédamboen ismequid nec,’ mabi canu,” qeshun naimbique. Istac —quetanquin dada shëquëquenquio icquid chuiquin: —Caputa —capondash Esusën. ⁷ Adoac bédanash aton shubuno nidpondash. ⁸ Adsho isashien: —Adquidshenda nepc. Nuquin Papan namiaid icquimbien adochitec. Abi namequid Nuquin Papa bédambo iquec —quecuededpondash isquido.

Ëbéd iquec cho, quequin Esusën Mateyo chiaid

(Mad 2.13-17; Duc 5.27-32)

⁹ Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na ëmbi chiactedi piucquid bedshun ëbi meneta —cac niondabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibanane ¹⁰ nidequi con shubun Esusbéd puduedpondabi.

Adec puduedsho isashien matses dadpen pudued-puduedpondash. Esusbéd pec tabadnuec ëbédtan piucquid bedshunquidobëdi con matsesën: “Icsaido nec,” caidombo pudued-puduedpondash. ¹¹ Adsho isumbien Esus chieshënquido Padiseyobo caidon Esusbéd icquido chuituidpondash. —¿Atotsi quiaish mibi chuiquid Esus caid icsaquidobëdi pec tabadpec? Icsambo iquec —capondash Esus chieshënquidon.

¹² Adsho tantiash Esus nadpondash. —¿Bédambo icquidta dauëchoquidën dauë menepadic? Padenquio. Ma daicsaidi dauëchoquidën menepaid yoc. Adembidi icsaidobi abi icsaid ucquin bédambo icmenuec nebi. ¹³ Nuquin Papan naden dada uamiampid pausudshun bédamboen naic nid. “Ëmbi chiacpadomboen abentse-abentsen mimbi naic. Adoquimbi ëmbi chiaid utsi niaquec mimbi icsaido caido mimbi bédamboen istiapimbo iquec. Adsho isun: ‘Mibi bédambo iquec,’ catiapimbo iquebi” quequin Nuquin Papan dada uamiampid pausudta. Ëbibi matses bédamboen ismequid nebi. Muaquido: “Bédambo icquid nebi,” qesho bédambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquio yec ënëdta,” canuec nebi —quepondash Esus abi chieshënquido chiec.

Esusën buna mëmunquido chiaid

(Mad 2.18-22; Duc 5.33-39)

¹⁴ Adnubien Uan acten mentoanquidbéd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mëmunquidquid nebi. Padiseyobo adembidi naquidquido nec. ¿Atotsieshun mibéd icquidon aden nainquio icpec? ¿Natiapimboda iquec? —caquien ¹⁵ Esus nadpondash. —¿Icbon: “Pec cho,” cacta aid tantiec sedenquecuededquin buna mëmumpadic?

Padenquoio. Adquidbëdtan pec cuishonquec tabadquid. Icbo nibëdanan sedenquecuededquin buna mëmunquid. Èbi nibëdanan ëbëd icquidon ëbiuidi tantianuen buna mëmunendac —quepondash Esus.

¹⁶ Adshumbic Esusën naden chuipondash. —Dashcute chuca cuëshun dashcute shëni nedesquiaidbëdta tuscaisa. Aden tuscashun panac shëni badedquoio nedesquequid. ¹⁷ —¿“Machi sandono,” qeshun tsitsan shënimbida sandopadic? Padenquoio. “Machi sebudnushe,” qeshun tsitsan shënin sandoenquoio icquid. Tsitsan chuca daëdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquoio icquin ambi bëdamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbëd icquido chiec.

Champi uincuemiaidbëdta chido bëdamiaid

(Mad 5.21-43; Duc 8.40-56)

¹⁸ Aden chuishobien Nuquin Papan chiaid chuibante shubun tabadsho isquid dap chuituidpondash. —Con champi unëstiadtsëcquoio iccoshe. Mishec cho. Mimbi mishac bëdantsiashe —capondash. —Mibi con Icbo canu —quequin danëshën sebudquin ismepondash. ¹⁹ Adoquien Esus aidbëdi nidpondash.

²⁰⁻²¹ Nidnubien chido intac budted-budtedec seta 12tedi matamec bëdanenquoio yec nacchoadbudquidën Esusën cachoctsëqui choquin: —Bëdamanquidën dashcute mishec bëdampatsiashe icmanendac —qeshun ismenquoio icquin dashcute cuëmano mishtac caondash. ²² Adoquien bidiadquin isun Esusën chuipondash. —Dacuëdenda. Mibi: “Aidën nac bëdantsiabi,” quiacpadec mibi bëdanendac —Esus quenubi bëdampondash.

²³ Aid bëdamebidanec nidequi chuibante shubun tabadsho isquidën shubun puduedshun isquien matses dadpen tabadec. Champi unësacsho isash sedenquecuededec tabadec. Nëidic matses unësan con matsesën nacpadomboen shoncate shoncaquido. Nëidic comapenec sedenquecuededquido dadpen. Aidedi icpondash. ²⁴ Adshobien Esusën abitedi chuiquin: —Baded umanuc niecun. Champi unësabi iqueque —capondash. Adoac: —“Champi unësabi iquec,” quepequien iquec —qeshun Esus mamëshumbedepondash. ²⁵ Niecunan Esusën champi uiacno quënën puduedtanquin mëdinac champi uincuenash bëdambo yec capupondash. ²⁶ Adsho isun champi unësaid uincuemiaid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniach caondash.

Bëshuaid daëd Esusën bëdamiaid

(Duc 18.35-43)

²⁷ Auëshquoio puduanec nidshobien bëshuaid daëdshun chinunshun comapenec cuëdquin Esus chuituidpondash. —Dabidën tsyuecquid Nuquin Papan chomiaid icquin bëdamboen isquin ëbi bëdame —quebud-quebudpondash. ²⁸ Shubu utsin puduedash abëdi tabadshobien Esusën: —“Èbi bëdametsiashe,” ¿caindabi ique? —caquien: —Ai, adebi —quepondash.

²⁹ Adshobien aid daëdi bëmishquin: —Mimbi tantiacpadec bëdanta —cac ³⁰ bëdampondash. Adsho isun Esusën: —“Bëdamioshi,” quequin utsibo chienda —capondash. ³¹ Adobiqui anocquidotedi chuiben-chuibempac caondash.

Esusën onquesa bédamiai

³² Bëshuai bédamiai puduenubien podobitsi icsa dapuduedaid onquesa dada Esus ismenuen bëpondash. ³³ Bëacsho isun Esusën podobitsi icsa dapuduemiac bëdanash onquiampondash. Aden bédamesho isash: —Nuquin nidaid Isadaid caidëshun adoen ictenec —quecuededpondash isquido.

³⁴ Adnubien Esus chieshënquido Padiseyobo: —Podobitsi icsan icbon namiai icquin podobitsi icsa cuemequidien nechitec —quecuededpondash Esus caic.

Esusën matses tantiaquai

³⁵ Aden onquesa bédamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bédamboen iste chuipondash. Adshumbic anocquido daicsaidotedi bédamebampondash. Adenuidi shubu dadpen yacno-yacnomboen chuibanquimbi matses bédamebampondash. ³⁶ Abi tantienquio icquido dadpen cho-chosho isash unësquio icnuc shubiantiadquio icpondash Esus. —Abi isquid nibëdnuc bacuëbo ic-samboec tabadacimboec icsambo iquec. Nuquin Papa bédamboen ismete chiabi yac tantienquio yec natia chieshëmë nec bédamboec tabadtiapimbo iquec —quiash shubiantiadquio icpondash Esus.

³⁷ Adshumbic abëd icquido chuipondash. —Pete dadpen nitsinaid caniacsho bedtanenquio icnuc sinash chodquebudnequid. Adecbidi Nuquin Papan chiaid chuibanquid nibëdnuc matses icsamboec tabadec. Aden chuibanquid nuquipadquid daëdpactsëcquio iqueque. ³⁸ Nuquin Papa chianeta. “Matses dadpenshunquio mimbi bédamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusën abëd icquido chuiquin.

Esusbëd icquido 12tedi chiaid

(*Mad 3.13-19; Duc 6.12-16*)

10 Adshumbic Esusën abëd icquido 12tedi chuipondash. —Ëmbi naid chuibeneta. Ëmbi namiai icquin ëmbi nabocpadomboen podobitsi icsa matses dapuduedaid mimbi cuemendac. Adembidi daicsaido abitedi mimbi bédamendac —quequin chuipondashi nëidtedi. ² Nëidic Petedo caidbidi Simon cuëmëdquid. Nëidic abëdta tishaid Andedes cuëmëdquid. Nëidic Sebedeyon mado abi daëdi. Abentsëc Acobo icnuc utsi Uan icpondash. ³ Nëidic Uedipe. Nëidic Badtodome cuëmëdquid. Nëidic Tomas. Nëidic ëbibi Mateyo con matses piucquid bedshundenedi. Nëidic Acobo cuëmëdquid utsi Adpeon mado. Nëidic Debeyo caidbidi Tadeyo cuëmëdquid. ⁴ Nëidic Simon cuëmëdquid utsi con matses yuaquido cuemete bunquid. Nëidic Iscadote caidbidi Udas cuëmëdquid abi chieshënquido Esus bedmequid. Aidedi abëd icquido icsho chuipondashi.

Abëd icquido: Chuibeneta, caid

(*Mad 6.7-13; Duc 9.1-6*)

⁵ Adshumbic: —Ëmbi chiacpadomboen chuibenenuc nidshun isadaidpembro chienda. Aido yacno nidenda. Nidaid cuëshë Samadia caid yacnocquidon shubu datambidanta. ⁶ Nuquin matses isadaidbouidi chuibeneta. Bënudshun podqued

tantienquio yacbimboen nuquin matsesën Nuquin Papambo tantienquio iqueque. ⁷“Mibi icsaid ênash bédamboec tabadta. Nēbi abēd tabadtequido icmequin Nuquin Papan matses bédamboen tabadmendac,” quequin chuibeneta. ⁸Adembidi daicsaido bédamequinc unēsaido uincuemequinc dada ushumbo yec daicsaido bédamequinc podobitsi icsa dapuedaido cuemeshunquinc cabeneta. Adoshon: “Piucquid beccho,” cainda. Ēmbi nabocpadomboembidi mibi namembique. “Piucquid beccho,” quequin nainquio iccombique. Adembidi nashumbanta. ⁹Aden chuibenec nidquin min piucquid buanenda. ¹⁰Adembidi pete sandoaide buanenda. Dashcute utsibēdta tapucudte utsi sandoshon buanenda. Mibi tidinqueteste cueste abentsēqui buanta. Adec mēdadauidquio chosho isun mimbi bēdamiaidon: “Mibi bēdambo iquec. Ēbi yacno ushec cho,” mibi cac bēdambo ictsiash. Adembidi: “Mitsana nibēdsho isun mibi menenu,” mibi cac bēdambo ictsiash.

¹¹Aden chuibenec shubu dadpen icquid yacno nidshun bēdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiashtaidēn shubun ushta. Auēshquio nidabi yec aidēn shubunuidi ushta. ¹²Aidēn shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bēdambo icmepashun,” quequin aido bēdamboen ista. ¹³Adoac anocquidon mibi bēdamboen iso: “Nuquin Papan bēdambo icmepashun,” mimbi canubi Nuquin Papan aido bēdambo icmendac. Anocquidon mibi chieshēnsho Nuquin Papan aido bēdamboen istiapimbo iquec. ¹⁴Shubu dadpen icquid utsi yacno mibi nidacsho anocquidon cuemiac naden ismeta. Auēshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. ¹⁵Mimbi adosho isun matses cuidte ushēmbi Nuquin Papan aido comapenen cuidendac. Ēndenquimbo shubu dadpen yacnocquidotedi cuidquin Nuquin Papan uesquin unēs uapampic. Aid shubu dadpen icquid abentsēc Sodoma canubi shubu dadpen icquid utsi Comoda capampic. Aid daēd yacnocquido bēdiactsēc cuidshun mimbi chiaid tantienquio icquido comapenen cuidendac —quepondash Esus abēd icquido chiech.

Esus tantiaquido chieshēnte chiaid

¹⁶Adashic padpiden chuioaic: —Ēmbi naid chuibenequido icsho utsin-utsinquien mibi chieshēnendac. Bēdi nēish yua acte bunacbimboec chieshēmēnquido mibi cueste bunendac. Aidobēd chieshēnanenda. “¿Mitsipadomboen chiac Nuquin Papan chiaid tantiabempatsiash?” qeshun bēdamboen tantiaquin bēdamboen chuita. ¹⁷Mibi chieshēnquin cuesunetiadquio iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquio mibi cueshcaten cueshcaindac. ¹⁸Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ěbi chuiquidon chuiquid dapabēdta isadaidpembo ěmbi naid chuibanu,” ěbi quenuc mibi aden buanendac. ¹⁹Adoac dacuēdenda. “Chuiquid dapa yacnoshon ¿atotsimbi chuiPATSIABA? ¿Adambi bēdamboen chuiPATSIABA?” quec dacuēdenda. Chuiquid dapa mimbi bēisnubi Nuquin Papan ambi tantiacpadomboen mibi oncamendac. ²⁰Aden aton Mayanēn ambi tantiacpadomboen mibi oncamendac —quepondash Esus.

²¹Adashic padpidec onquec: —Ēbi chieshēnquidon ěbi tantiaquidotsen comapenen chieshēnendac. “Esus tantiaquid nec,” qeshun aton buchimbi aton utsi cue-

sunemendac. Amëmbi ambi tishmiaid cuesunemendac. Aton bacuëbombi chieshtoshon anibëdta amë cuesunemendac. ²²“Esus tantiaquid nec,” qeshun matses dadpeshun aden chieshënaqui chieshtoenquo icquin ëbi tantiaho Nuquin Papan abi yacno mibi puduedmendac. ²³Shubu dadpen yacno nidacsho chieshënac shubu dadpen icquid utsi yacno cuenta. Anoshontsen ëmbi naid chuisho chieshënoac shubu dadpen icquid utsi yacnotsen cuenoata. Adecuidi cuendeneta. Nëid nidaid Isadaid caidën shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuësh choaindabi.

²⁴Mibi tantiaquid nebi. Ëmbi tantiamiaido icsho ëbi icbocpadomboembidi mibi chieshëmendac. Abi chuiquid dapa chieshënacpadembidi ambi namiaidot-sen chieshënuqid. Icbo chieshënuqimbi yuabotsen chieshënuqid. ²⁵Adembidi ëmbi chiacpadomboen natiadquo icsho mibitsen chieshëmendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshëmendac —quequin chuipondash Esusën abëd icquido chuiquin.

Dacuëdenquo icquin chui, quequin chiaid

(Duc 12.2-7)

²⁶Adshumbic padpiden chuiquin: —Mibi chieshënuquido dacuëdënenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsëcquin chiaid Nuquin Papan utsibo tantiamendac. Adembidi mimbi bëdamboen naidtedi Nuquin Papan utsibo tantiamendac. ²⁷Nëbi ëmbi mibitedictsëqui chuiboed dacuëdenquo icquin utsibo chuibeneta. ²⁸Chuibenesho min dadauidsëqui cuesunetequid dacuëdënenda. Min tantiate unëstiapimbo icquid icsho nibëdametiapimbo iquec. Min dada unësan min tantiate abi icsho cuidnuequin chian anëdënquequid nëscanquid tantiata. Adquid Nuquin Papa icsho dacuëdënta.

²⁹Utsibon chieshënaqui dacuëdënta. Nuquin Papan mibi tantieque. ¿Padichucu cuesaid isashta unësquo icti? Padenquo. Padnuen ambi tantiacpadomboembi padichucu dadpen icquid abentsëc cuesac paëdsho Nuquin Papan tantieque. ³⁰Adembidi min manëdaid Nuquin Papan tambanaidquo nec. Aden min manëdaid abentsëc paëdsho aidën tantieque. ³¹Aden min manëdaid tambanquid icquin padichucu bëdiactsëc tantiatsëcquin mibien comapenen tantieque. Mibi chieshënuquido dacuëdënenda —quequin chuipondashi Esusën.

Esus con Icbo nec, quequido chiaid

(Duc 12.8-9)

³²Adshumbic padpiden chuiquin: —Utsibo chuiquin: “Con Icbo Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi. ³³Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” qesho: “Padi. Ëbi tantiaquidpenquo neque. Puduedmenda,” quequin Nuquin Papa chiendambi —quequin Esusën chuipondashi.

Esus tantiaquidobēdi cuēshēdte chiaid

(Duc 12.51-53; 14.26-27)

³⁴ Adshumbic padpiden chuiquin: —Ēmbi chuiboed tantiashun: “Nuquin Papa yacnuēsh choquid icquin abitedimbo bēdamboen tabadmetsiash,” ¿caquindabi ique? Padenquo ictsiambi. Ēbi tantiaquidobēd ēbi tantiesabo cuēshēdenquo icte danenda. Ēbi tantiaquidobēdi ēbi tantiesabo cuēshēdendac. ³⁵ Amēbēd aton mado cuēshēdendac. Adecbidi anibēd aton champi cuēshēdendac. Adecbidi aton chayabēd aton babanēn cuēshēdendac. ³⁶ Aden aton shubun icquidombi ēbi tantiaquid chieshēnendac.

³⁷ Padnubic aton matesuidi tantiaquidēn ēbi bēdiactsēc tantiatsēctsiash. Aton tita tantiaquinc aton papa tantiaquinc cain aidēn chiapadomboenuidtsēqui naquidēn ēbi bēdiactsēc tantiatsēcquin ēmbi chiapadomboen natiapimbo ictsiash. Adembidi aton mado tantiaquinc aton champi tantiaquinc cain aid bēdambo icmeteuidtsēqui bunquin ēbi bēdiactsēc tantiatsēcquin ēmbi chiapadomboen natiapimbo ictsiash. Adquido bēdamboen istiapimbo iquebi. Ēbi tantiesabo nec. ³⁸ Utsibon chieshēnac ēbi tantiatsēcboedi badedi chieshtoshon ēmbi chiapadomboen natiapimbo yantsiash. Adquidotsen ēbi tantiaquidpenquo iquendac. ³⁹ Matese ambi naiduidi naquid Nuquin Papa yacno puduedtiapimbo iquendac. Padnuen ēbi tantiaquin ēmbi chiapadomboen naquid Nuquin Papa yacno puduedendac. Adquid chieshēnaqui chieshtoenquo ictsiash —quequin Esusēn chuipondashi.

Nuquin Papan bēdambo icmete chiaid

(Mad 9.41)

⁴⁰ Adshumbic Esusēn ēbi chedo padpiden chuipondash. —Mibi chieshēnquido icnubi mibi bēdamboen isquid iquendac. Ēmbi naid mimbi chuisho tantiash: “Ai, abimbo caic,” qeshun ēbi tantiabenquin ēbi chomequidtsen tantiabenendac. ⁴¹ “Naden naindami,” quequin ambi chiaid chuibenequid Nuquin Papan bēdamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bēdamboen chuisho tantianu,” quequid icsho Nuquin Papan bēdamboen isendac. Adembidi abi tantiec ambi chiapadec bēdamboec tabadquid Nuquin Papan bēdamboen isaidobidi nec. Adquid shubu utsi yacno nidacsho isun: “Nuquin Papan chiapadec tabadquid nec,” qeshun bēdamboen isquidotsen Nuquin Papan bēdamboen isendac. ⁴² Adembidi ēbi tantiaquid yec acte bundoacsho acte menequid Nuquin Papan cuidnanquin bēdambo icmendac. Adembidi utsibon Esus tantiaquido bēdamboen nashunsho Nuquin Papan bēdambo icmendac —quequin Esusēn chuipondashi. Adshun: —Chuibenetan —cac nidshumbimbi chuibenepondac.

Uan acten mentoanquidēn chuimiai

(Duc 7.18-23)

11 Esusēn: —Chuibenetan —cac abēd icquido nidanenubi auēshquiobi puduanec nidquin shubu dadpen icquid shubu dadpen icquidquien Esusēn Nuquin Papan chiaid chuibeniac caondash. Aid nidaid cuēshē Cadidia caidēn capucuenequin adoac caondash. Adnubini yuec-yuecpambo ictanec Esusbēd icoaic chochpondac.

² Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abëd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambëd icquidon Esus chuituidpondash. ³—Uanën: “Chuitan,” cac chobi. ¿Ëmbi cainaid Nuquin Papan chomiaidquioda mibi nepe? Mibi adquidpenquoio icnuc ¿ada utsi chopatsiash? —caquien ⁴Esusën: —Ëmbi nadatiambo icquin nabamboedbëdta ëmbi chuiboed Uan chiec nid. ⁵“Bëshuacboedën isbenosh. Canite icsaidi capucuenosh. Daushumbo icquid nami mishadenquoio icquid bëdanosh. Pashuacboedën tantiabenosh. Adoshombic unësaidi uincuemiosh. Adoshombic Nuquin Papa tantienquoio icquido Nuquin Papan bëdamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquoio nec,” quequin ëbi tantien-dac. ⁶ Adshumbic nadentsen chuita. “Muambo nec, ëbi cainquoio icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bëdambo icmendac,’ quiosh,” quequin chiec nid —cac nidanepondash Uambëd icquido.

Uan acten mentoanquid chiaid

(Duc 7.24-35)

⁷ Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibëdacno ¿atotsi quenuec nidonda? ¿Cunquequidën ishacunaid isnuecta nidtionda? Padenquoio. ⁸ ¿Dashcute bëdaidquoio dasiuidaid isnuecta nidtionda? Padenquoio. Icsactsëcquid Uan dasiuidpondash. Dashcute bëdamboshë icquid dasiuidquido ancanquidën shubu dapan tabadquido nec. ⁹ Ad icnuc ¿atotsi quenuec nidonda? “Naden naindambi,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncami-aidquoio Uan nec. ¹⁰ Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bëdambo icquid choeque. Icsainquoio yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic. ¹¹ “Nuquin Papan chomiaidquoio choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi nabansho isabi yequi bëdapabi Uan ict-sec. Padnuen ëmbi Nuquin Papan chiacpadomboen nabansho isash ëbi tantiaquido bëdamboshë iquendac. ¹² Uanën chuisho Nuquin Papa tantiabenacpadomboen ëmbitsen Nuquin Papan bëdamboen iste chuisho tantiashun adembidi abi icsaid ënshun icsaboedon dadpenshun Nuquin Papa tantiendac. ¹³ Nëbi Uanën: “Nuquin Papan abi yacnoshon bëdambo icquid chomendac,” quequin chuipondash. ¿Ambi-ada adopondash? Padenquoio. Ëndenquimboshë tauamboen nuquin tsusedpa Moisesën chuibempampic. Adshumbic utsintsen. Adshumbic utsintsen. Aden Nuquin Papan ambi bëdambo icquid chomete chuiquin dada uamianepampic. ¹⁴ Adembidi Uan chote chuiquin dada uamepampic. “Nuquin Papan ambi tantiacpadomboen oncami-aidquoio Edias cuëmëdquid choendac,” quequin Ediasbimboecquid Uan chote chui-pampic. Bëdamboen tantiaquin: “Nuquin tsusedpa Ediasbimboecquid Uan nec,” mimi catsiac. ¹⁵ Bëdamboen tantiaquidën adembidi tantiatsiash —quepondash Esus abi datsidadquido chiec.

¹⁶ Aden chuisho tantiash chieshtoshobien Esusën chuipondash naden. —Nuquin Papan chiaid tantienquo icquido yec nēmbo icquido ¿midapadquidoen nec? Bacuēbo nēishnanacbičtsēcquieč mibi iquec. Bacuēbo: “Ĕmbi chiacpadomboen nana,” queuidash ambi chiacpadomboen aton utsibon nainquo icsho isash nēishash chushcananquid. ¹⁷ “‘Cuēdēnuna,’ queuidbosh ēbi cuēdēnubi ma mibi cuēdēnenquo icboc. ‘Sedenquenuna,’ queuidbosh ēbi sedenquenubi ma mibi sedenquenquo icboc,” quetsash bacuēbo nēishnanacbičtsēcquieč ma mibi iqueyoc. Adec nēishēmēnquido yec icsambo ma mibi iqueyoc. ¹⁸ Uan pete utsi-utsien pesa iccosh. Adečbidi acte paēmbo icquid aquesambo nioš. Adquid icsho isash nēishash: “Ĕmbi nacpadomboen naisa nec. Podobitsi icsa dapudedashien nechitec,” mibi quepondac. ¹⁹ Ĕbien nuquin matsesēn piacimboben pequid nec. Adembidi actequid acquid nebi. Adsho isash nēishun ēbitsen icsamboen chuishunquin: “Petuēdi tantiaquin nua pequid nec. Tantiadenuen acte paēmbo icquid acquid nec. Adečbidi nuquin matses piucquid bedshunquidobēd onquec icsambo icquid caidobēd onquec ququid ma aidobēdi icsambo icquid nepayoc,” mimbi ēbi capec. Padnuen bēdamboen tantiaquidēn Nuquin Papan chiacpadomboen nasho isun Uambēdta ēbi: “Bēdambo iquec,” caindac —quepondash Esus abi chieshēnquido chieč.

Shubu dadpen icquidēn tabadquido cuidte chiaid

(Duc 10.13-15)

²⁰ Adshumbic Esusën padpiden chuipondash. —Nēbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bēdamboec tabadtiadquio iquebi,” quetiadquidi chieshec adenquo iquec —qeshun Esusën naden chushcapondash. ²¹ —Shubu dadpen icquid Codasin caid yacnocquidobēdi shubu dadpen icquid utsi Betsaida caid yacnocquido Nuquin Papan cuidtequido nec. Ĕmbi aido ismebocpadomboen ismiac isadaidpembo cuidadenquo ictsempampic. Aden ismiaqui: “Ai, icsapobi,” quiash shubibudequi icsainquo yec ēnēdtsempampic. Shubu dadpen icquid Tido caid yacnocquidobēdi shubu dadpen icquid utsi Sidon caid yacnocquido adtsempampic. ²² Nuquin Papan matses abitedi cuidte ushēn: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobēdta bēdiactsēc cuidendac. Adoshombic: “Comapenen tantiaquin ismiaqui tantienquo icquido nec,” qeshun Codasin caid yacnocquidobēdta Betsaida caid yacnocquido comapenec sidquenec cuidendac. ²³ Adembidi nēmbo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshēnquido cuidacno nidmetequido ma mibi nepayoc. Ĕndenquimboshē yampido shubu dadpen icquid Sodoma caid yacnocquido cuidquin Nuquin Papan nibēdamepampic. Ĕmbi mibi ismebocpadomboen ismiac aidon abi icsaid ēntsempampic. Abi icsaid ēnsho Nuquin Papan cuidenquo ictsempampic. Cuidenquo yac nēbi aton matses abi ictsiash. ²⁴ Nuquin Papan matses abitedi cuidte ushēn: “Comapenen tantiaquin ismiacmaido nec,” qeshun Sodoma caid yacnocquido bēdiactsēc cuidendac. Nuquin Papan chomiaid icquin Ĕmbi ismeboedo Capednaun caid yacnocquidoen comapenec sidquenec cuidendac —quequin abi tantiesabo Esusën chushcapondash.

Esusèn dayacquiobimboecnuc icmete chiaid

(Duc 10.21-22)

²⁵ Adshumbic Esusèn Nuquin Papa chuipondash. —Mibi bédamboshè iquec, Papa. Mibi yacnocquidotedishun Icbombo yec nidaidèn tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi ëbi tantiabi iquec. Mimbi tantiamiac nëidon ëbi tantiec. Aden mimbi bédamboen naic. ²⁶ Mimbi tantiacpadomben mimbi bédamboen naic. Mibi bédamboshè iquec, Papa —quequin Esusèn Nuquin Papa chuipondash.

²⁷ Adshumbic abi datsidadquido chuipondash. —Nuquin Papan ambi tantiaidtedi ëbi chuimec. Ëmbi naboedbèdta ëmbi nate abitedi con Pan ambentsèqui tantiec utsibon tantienquo icnuc. Adembidi Nuquin Papan natebèdta ambi naboed abitedi ëmbentsèqui tantiemi. Aden Nuquin Papa tantiaquin: “Nëidtedi matses bédamboen tantiamembi,” qeshun: “Nuquin Papa nadquo iquec,” quequin tantiamembi. ²⁸ Ëbi tantiata. Dayacquo yacbimboecnuc mibi bédambo icmembique. “¿Mitsipadequibi Nuquin Papa yacno puduedpe?” quec ¿uimambo yacbimboecta mibi icpe? Adquidèn ëbi tantiasho Nuquin Papa yacno puduedtequid mibi icmembique. Ëbi tantiata. ²⁹ Con Icbo ëbi cata. Con yuambo icquin ëmbi chiacpadomben nasho mibi bédamboen isquin dayacquo yacbimboecnuc mibi bédambo icmembique. Ancanesambo yec bédambo icquidini neque. Con Icbo ëbi cata. Adsho mibi bédambo icmembique. ³⁰ Mibi ancainquo icquin dayacquo yacbimboecnuc bédamboen mibi tabadmembique. Con Icbo ëbi cata —quequin chuipondash Esusèn.

Esusbèd icquidon petsècsho istuidshun chushcaid

(Mad 2.23-28; Duc 6.1-5)

12 Adshumbic chonoadtemaid ushèn Esusbèd capucuenequin tied matanquin bundotsècshun tiedèn caniquid èshchicshun petempi petsècondambi. ² Pesho istuidshumbini con tsusedpabon chiampid namequido padiseyobon: —Is. Mibèd icquido chonoadtemaid ushèmbi chonoadeque —capondash Esus chuiquin.

³ Adoquien Esus: —Ma icsapenquo icpayoc. ¿Nuquin tsusedpa Dabidèn bundoshon ambi petemaidquo pepampid chuiquin dada uapampid isamboda ictio? ⁴ Aidèn Nuquin Papa tabadte shubu uashunaid abi puduedtemaidèn puduedshun ambi petemaid pan sanaid istuidpampic. Aid panèmpi nëish yua abided unès uaquidon petequid nepampic. Aid panèmpi bedshun abèd icquidobèdta Dabidèn pepampic. Aden nuqui bédambo icquid caidèn ambi natemaidi napampic. ⁵ Adembidi chonoadtemaid ushèn natemaid chiaid niacquimbi nëish yua abided unès uaquidon aid ushèmbi Nuquin Papa tabadte shubu uashunaidèn puduedshun nacenenepec. Nuquin Papan chiacpadomben naiqui icsainquo icpec. ⁶ Nuquin Papa tabadte shubu uashunaid tantiaquin adopec. Aid shubu bédapabi icnuc bédamboshè icquid nebi. ⁷ Nuquin Papan naden chiaid mimbi bédamboen tantienquo iquec. “Ëmbi chiacpadomben abentse-abentsen mimbi naic. Adoquimbi ëmbi chiaid utsi niaquec mimbi icsaido caido mimbi bédamboen isti-apimbo iquec.

Adsho isun: ‘Mibi bédambo iquec,’ catiapimbo iquebi.”

quequin Nuquin Papan chiaid bédamboen tantiashun èbèd icquidon bédamboen nasho mimbi chushcainquo ictsenoc. ⁸ Tanta. Nuquin Papan chomiaid icquin

chonoadtemaid ushë ëmbibi chiampid icnuc ëmbi tantiacpadomboen aid ushëmbi ëbi tantiaquido namembique —quepondash Esus ëmbi petsëcscho istuidquido chiec.

Mëicsatsaid bédamiad

(Mad 3.1-6; Duc 6.6-11)

⁹ Adanec nidec Nuquin Papan chiaid chuibante shubun puduedshun ¹⁰ isaquien mëicsatsaid icpondash. Adnubien padiseyobon: —Chonoadtemaid ushëmbi bédamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —queshun Esus chuituidpondash. —¿Nadquid chonoadtemaid ushëmbi matses bédamequinda Nuquin Papan chiaid niacpec? —caquien ¹¹ Esusën: —¿Ada min nëish yua obeca caid icpec? Adquid chonoadtemaid ushën shëcuë uquëduc ampaëdacsho istuidshun ¿chiquenquioda mimbi icpatsia? Ai, mimbi chictsiac. Chonoadtemaid ushëmbi mimbi chonoadquin chicpatsiac. ¹² Aden min obeca bédiactsëc tantiec mibi bédapabi icnuc matses tantiaquiquin nashunquid bédamboshë ictsiash. Nadquid chonoadtemaid ushëmbi matses aden bédamboen nashunquidën Nuquin Papan chiaid niaquenquio ictsiash —quequin Esusën abi icsamenu caquido chuipondash.

¹³ Adotanquimbien Esusën mëicsatsaid chuiquin: —Mëcueta —cac mëcuc bédampondash aton mëdante abiuc daëdi bédambo yec. ¹⁴ Adsho isashien abi chieshënquido padiseyobo nëishquiopac caondash. Adec nëishanec nidash aton matses utsibobëd: —Cuesunequimbien Esus ictiad —quecuededpac caondash.

Esusën nate ëndenquimboshë chiampid

¹⁵ Adnubien Esus: —Ëbi cuesunetiadquio iquec —quianec auëshquiobi puduanec nidpondash. Nidsho isumbien matses dadpenshun tsibanampondash. Adshumbic aidon bëaid daicsaidotedi bédamebampondash. ¹⁶ Adshumbic ambi bédamiado chuiquin: —“Bédamioshi,” quenda —quequin chuipondash Esusën: —Ëbi abi chuiquid dapa icmenushe —quiash adpondash Esus. ¹⁷ Aden Esusën nate chuiquin Nuquin Papan isadaidbo tsusedpa Isayas dada uamepampic naden chuiquin.

¹⁸ “Ëmbi chomiaid ëmbi chiacpadomboen naquidquio nec.

Aid tantiaquiec bédambo iquebi.

Con Mayan bédambo icquid abëdi tabadmemb.

Adoac ëmbi bédamboen iste isadaidbobëdta matses utsibo abitedi bédamboen chiendac.

¹⁹ Chushcanante bunenquio yec ancanenquio iquendac.

Chuiquid dapa ictiapimbo iquendac.

²⁰ Icsambo icquido yec shubiquido yec natiaic tabadquido yec daicsaido yec quequidon abi bédiactsëc tantiabentsëcscho bédamboen isquin bédamboen tantiamendac.

Nuquin Papan chiacpadec cuidte ushë choabi icnuc adoendac.

²¹ ‘Nuquin Papan tantiacpadomboen matses bédamboen namendac,’ qeshun nidaid utsi-utsiec yacnocquidon matses dadpenshun aidi tantiendac,”

quequin Esusën bédamboen nate chuiampic Isayasën.

Podobitsi icsan namiaidi Esus nec, quiaid

(*Mad 3.20-30; Duc 11.14-23; 12.10*)

²² Adnubien Esus ismenuen daicsaid bëpondash. Dapuduedshun podobitsi icsan bëshu uain eme uaidi onquesa nepondash. Isenquio yec onquenquio icshobien Esusën bëdamepondash. Adoac isbenequi onquiampondash. ²³ Adsho isashien Esus datsidadquido: —Is. Comapenen tantiaquin nabanquidquio nëid neque. ¿Nuquin tsusedpa Dabidën tsyuecquidta nepec? Adquid yec nuqui cainaidquio Nuquin Papan chomiaidien nechitec —quecuededpondash.

²⁴ Adsho tantiash Esus chieshënquido padiseyobo: —¿Aidta nedic? Ma aidpenquio neyoc. Betsibu caidën podobitsi icsan icbon namiaid icquimbien Esusën podobitsi icsa cuemehitec —quequin otacquio tantiapënëdash.

²⁵ Adshobien Esusën aidon otacquio tantiaid ambembi tantiashun naden chuipondash. —¿Adquidënda aton yuabi cuemepatsiash? Padenquio. Chuiquid dapan aton yuabo nëishtanquin chushcac cuësh-cuëshëdec aton yuabo uesadec nietsiash. Aido nibëdnuc chuiquid dapa ictiapimbo ictsias. Adecbidi shubu dadpen icquidën tabadquido chushcananash cuësh-cuëshëdec niquian shubu dadpen icboedi daëdpactsäc yanec. ²⁶ “Betsibu caidbidi Satanas caidëmbi namiaquien podobitsi icsa cuemehitec,” mimi ëbi capoc. ¿Ambi naid nashobida Satanasën aton yuabo podobitsi icsabo cuemepatsiash? Padenquio ictsias. Satanasën cuemiatic aibdëdi aton yuabo cuësh-cuëshëdtsias. Adnuc Satanas aton icbopenquio yantsias. ²⁷ Mibëd icquidon podobitsi icsa dapuduedaid cuemiatic caosh. ¿Cuemesho isun mimi ëbi chiacpadomboen: “Betsibu caidën namiaquien nachitec,” cainda ictio? Ma mimi padenquio icpaboc. Mimi adoac: “Mimi icsamboen chiec,” quetsenosh podobitsi icsa dapuduedaid cuemequido mibëd icquido. ²⁸ Nuquin Papan Mayanën namiaquimbi podobitsi icsa cuemiatic. Èmbi adosho isash: “Nëbi matsesbëd icquin Nuquin Papan namiaidën naosh,” quetiadquidi mibi nec —quepondash Esus.

²⁹ Adashic abi onquec: —Tantia. Mibi chuinu. Ampenuesho icbon istuidac ampequidën icbo uidën uabi ampeshuntiapimbo iquec. Icbo uidënquio icquid bucun cataneshun ampeshunquid. Adecbidi Satanas bëdiactsëc tantiaquid icnuc ëbien comapenen tantiaquidquio nec. Uidën uacbimboen nadatiambo icquin nabanquin aton yua cuemepombi. ³⁰ Èbi con icbo cainquio icquido Satanasën yuabo nec. Adquid icquin ëbi chieshënquin ëbi tantiatsëcquido cuëshëdmendac. Adquidbidi mibi nec —quequin Esusën abi chieshënquido chuipondash.

³¹ Adshumbic nadentsen chuipondash. —Nuquin Papan chiaid niac-niacboedëmbi ënacsho Nuquin Papan bëdamboen isec. Nuquin Papan icsamboen chuishunquidëmbi abi icsaid ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin bëdamboen tantienquio icsho Nuquin Papan bëdamboen istiapimbo iquec. ³² Èbi chieshënquin icsamboen chuishunquidëmbi ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bëdamboen istiapimbo iquec. Aden ënenquio icquin icsamboen tantiasho adembidi ënenquio icquin bëdamboen istiapimbo iquendac —quequin abi chieshënquido Esusën chuipondash.

Bëdambo icquid nec, quequin tantiate chiaid

(Mat 7.15-20; Duc 6.43-45)

³³ Adshumbic naden bëdamboec tabadte Esusën chuipondash. —Cuète bëdan bacuë bëdambo iquec. Cuète icsan bacuë icsambo iquec. Chetequid isun cuète dada matsesën tantiec. Adembidi matses bëdambo icquid bëdamboec onquec bëdamboec tabadsho isun: “Aid bëdambo icquid nec,” quequin matsesën tantiatsiash. ³⁴ Ma mibi adquidpenquio neyoc. Nisibimboec icsa uanquido mibi nec. ¿Icsambo icquinda mimi bëdamboen chuidio?. Ma mimi padenquio icboc. Mimi icsamboen tantiaid ma mimi utsibo icsamboen chuiboc. ³⁵ Bëdambo icquidën ambi bëdamboen tantiaid bëdamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimi icsamboen chuipoc. ³⁶ Ambi cuidte ushën Nuquin Papan: “¿Ada bëdamboen tantiaquin chuidenio?” quequin matses abitedi chuimendac. ³⁷ Adoac abimbo chiec: “Ai, bëdamboen nadeniombi,” qesho icsano nidmenquio iquec. Padnuen utsi: “Padenquio. Icsamboembimi chuidenechitoc,” qesho icsano nidmequin cuideque. Icsamboec onqueboedi ënëdta —quequin Esusën abi chieshënquido chuipondash.

Padiseyobon: Èbi isme, quequin Esus chiaid

(Mad 8.12; Duc 11.29-32)

³⁸ Aden chuisho tantiashumbien abi chieshënquido utsibon Esus chuituidpondash. —“Nuquin Papan chomiaidini nec,” quequin ëbi ismequin nadatiambo icquin nabanta. Isnu —quepondash padiseyobo Moisesën dada uapampid chuibanquidobëdi.

³⁹ Adoaquien Esus: —Padi. Nuquin Papan chiaid niac-niaquec mibi icsamboshë iquec. Èbi tantiate bunenquio icquimbi mimi: “Èbi isme,” ëbi capec. Adsho nëbi mibi ismenquio iquembi. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi. ⁴⁰ Chishcambiecquid dapanchebudac aidën pucun uec daëdec ushacsho ucbudac Onas padpidec nidpampic. Adecbidi unësacsho chococac Onas yampicpadec daëdec ushash uincuenendabi. Aden ismendambi. ⁴¹ Èbi tantienquio yec mibi icsambo iquec. Padnuen Nuquin Papan chiaid Onasën chuibanac shubu dadpenquio icquid Ninibe caid yacnocquido badedi icsainquio yec ënëdpampic. Nuquin Papan chiaid chuibanquid Onas bëdambo icpampic. Èbien bëdamboshë icquidquid nec. Adquid icquin nadatiambo icquin dadpen ismiaqui mimi ëbi tantienquio iquec. Aden ëbi tantienquio icquido icsho Nuquin Papan matses abitedi cuidte ushën Ninibe caid yacnocquidon: “Icsambo iquec,” mibi caindac. ⁴² Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantiec chopampidëntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuëmëdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamiaidënquio Sadomonën bëdamboen chuipoc,” quepampic. Èmbien abitedi tantiaquid icquin nadatiambo icquin ismeuidpoc. Adoaqui mimi tantienquio icpec —quepondash Esus abi chieshënquido chiec.

Abi nianaid podobitsi icsa dapuedoaid

(Duc 11.24-26)

⁴³ Adshumbic naden Esusën chuipondash. —Icsaquido mibi nec. Podobitsi icsa dapuedaidbimboecquid mibi nec. Tantia. Mibi chuinu. Abi dapuedaid matses nianashi podobitsi icsa abi dapuedtequid nibëdacno yuec capucuen-capucuenec. Adtanequi: “Ëbi icbocnobidi dapuedoaid nidebi,” quianec choec. ⁴⁴ Chonobi ambi niamboed matses: “Ëbi dapuedaid podobitsi icsa nibëdnuc bëdambo iquebi. Adquid chomeoatiapimbo iquebi. Ëmbimbo naic bëdamboec tabadquidquo nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuedtequidquo nëid nec,” quianec ⁴⁵ abipadquid utsi bedec nidoaic. Nidshumbic 7tedi icsamboshë icquido istuidshun bëash aidobëdi dapuedec. Adnuc podobitsi icsa abentsëc dapuedaid yec ënden icsambo icboedi aido dadpen dapuedaid yec buëdanquieic aid matses icsamboshë yanec. Adquid mibi iquec. “Bëdambo iquebi,” queboedi nëbi mibi icsamboshë yanec —quequin Esusën chuipondash.

Anibëdi Esusën utsibo choaid

(Mad 3.31-35; Duc 8.19-21)

⁴⁶ Adanec shubun puduedshun Esusën abëd puduedquido dadpen chuinubi aton utsibo aton titabëdi Esus isnuec chopac caondash. Umanuc tabadnubi ⁴⁷ utsin puduedshun Esus chuituidpondash. —Mibi isec tita min utsibobëdi choaccosh. Umanuc tabadec —caquien badedi nidenquo yec ⁴⁸ Esus: —Utsitsen con ta caimbi. Adembidi utsitsen con utsi caimbi —quetanquin ⁴⁹ abëd icquido mëdquin ismepondash. —Nëid ëbëd icquido con utsibo caimbi. ⁵⁰ Nuquin Papan chiacpadomboen naquidquo icsho con matses caimbi. Con utsi caquinc con chibi caquinc con ta caquinc caimbi —quepondash Esus.

Piacbo ëshë siaid chiaid

(Mad 4.1-9; Duc 8.4-8)

13 Adtanec nidec chian budash cuëmano tabadtuidpondash. ² Tabadtuidsho isash matses dadpenquo cho-choash tsucus-tsucustsëcquid yec Esus datsidapondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

³ Adshumbic abi tantiate chuinen naden ompoacbimboen chuipondash. —Piacbo ëshë siaid utsi-utsiec bëdamboec caniec. Utsi-utsiec padenquo. ⁴ “Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uicchunën chequid. ⁵ Ëshë utsibic nidaid tsasimbo yacno siac badedi dëyucuidash ⁶ aton tapun nidaidën puduedenquo icnuc ushë chënquequidën badedi unësquid. ⁷ Ëshë utsibic nisanquid diadacno siaid dëyucash canidouidtsëcsho nisanquidën dayunac unësquid. ⁸ Padnuen ëshë utsi-utsiec nidaid bëdanquo siac dëyucash caniasht dadpenquo ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

⁹ Adashic: —¿Min pabiate shëcuë nibëdquiecta iquec? Ëmbi chuiboed bëdamboec pausudta —quepondash Esus.

Ompoacbimboen chiec nebi, quiaid

(Mad 4.10-12; Duc 8.9-10)

¹⁰ Adsho tantiashun abëd icquidon Esus chuipondash. —¿Atotsieshun ompoacbimboen nëid matses dadpen chie? —caquien ¹¹ Esus nadpondash. — Utsibo tantiamenquo icquin Nuquin Papabëd tabadte chuiquin nëbi mibiuidt-sëqui tantiamembi. ¹² Nuquin Papa tantiatadquo icquidën ëbi tantiasho bëdamboen tantiamendambi. Nuquin Papa tantiauidtsëcquidën ëbi tantienquo icsho ëmbi ompoacbimboen chiac tantienquo ictsiash. ¹³ Ompoacbimboen aido dadpen chuibanembi. Ëmbi naid isun ëbi tantienquo iquec. Ëmbi chuisho pamumëdacbimboen tantienquo iquec. Adsho aidon tantiatipimbo icnuc chiembi. ¹⁴ Nëidon tantienquo icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquo iquendac.

Ismiac isquiboshombi: ‘Ai, aidi nec,’ cainquo iquendac.

¹⁵ Ai, ëmbi chiaid tantiatipimbo iquec.

Ushacbimboen tantienquo yec pamumëdacbimboec chieshëmëncquidombo iquec.

Ëbi tantiate bunenquo iquec.

Ëmbi chiaid tantiaquidombien paposhquiacbimboen bëdamboen tantiabentsiash.

Pausunacbimboen tantiashun ëmbi chiacpadomboen natiadquo yansho aton chiesh bëdametsiambi. Aton chiesh bëdamete bunenquo iquec,”

quequin Nuquin Papan dada uamepampic —quepondash Esus abëd icquido chiec.

¹⁶ Adashic aidobidi chiec: —Isayasën chiacpadomboen utsibon ëbi tantienquo icnubi mimbien ëbi tantiec. Ëbi isec mibi tabadec. Ëmbi chuibansho tantiash: “Ai, abimbo caic,” quec mibi bëdambo iquec. ¹⁷ Ëbi chote chuipampidobëdtan bëdamboec tabadquido dadpenshun mimbi ëbi isacpadomboen ëbi iste bunequi ëbi isambobi unëspampic. Mimbi ëmbi chuisho tantiacpadomboen tantiatadquo yequi tantiambobi unëspampic —quepondash Esus.

Piacbo siaid sebadënquo chiaid

(Mad 4.13-20; Duc 8.11-15)

¹⁸ Adashic abi onquec: —Tantia. Ëmbi piacbo ëshë siaid quequin chuiboed sebadënquo mibi chuinu. ¹⁹ Nuquin Papabëd tabadte chiaid piacbo ëshë siaid-bimboecquid nec. Nuquin Papan chiaid chiaqui tantiadenquo icsho Satanasën nac badedi bëshumpec. Uicchunën piacbo ëshë paëdaid badedi chiacbimboen adopec. ²⁰ Utsibic Nuquin Papan chiaid chiaqui bëdiactsëc tantiauidtsash: “Bëdambo iquec,” quec cuishonqueuidtsec. ²¹ Adsho: “Nuquin Papan chiaid tantiaquid nec,” qeshun utsibon chieshënac badedi chieshtoshon tantienquo yanendac. Piacbo ëshë tapunuidtsash unësacbimboen adoendac. ²² Utsibic Nuquin Papan chiaid tantiatsashi ambi dacuëdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Isitodon dayunac unësacbimboen adoendac. ²³ Padnuen utsibon tantiate nidaid bëdan siaidbimboecquid nec. Nuquin Papan chiaid chuisho tantiaquioshon ambi tantiaid bënuainquo icquin tantiabudec bëdamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi

tantiaquid yanendac. Utsin chiac daëdpactsëc adquidbidi yanendac —quequin abi tantiate chuipondash Esusën.

Ëshë icsambo icquid seuanaid chiaid

²⁴ Adshumbic Esusën naden chuipondash. —Tantia. Nuquin Papan namiaid tantiamenuen utsi chiacbimboen chuinu. Tiedën caniquid pete adosbiecquid icbon siac caondash. ²⁵ Adanec nidambic inchëshëmbi choshon chieshëmënkuidën ëshë icsambo icquidtsen daëd uain seuanac caondash. ²⁶ Adoac adosbiecquid canidotsëc-nubi abëdi tancandaëdpamboec icsambo icquid canidotsac caondash. ²⁷ Adsho istanquin yuabon aton icbo chuituidpac caondash. “¿Pete ëshëda sio?” cac: “Ai,” qesho tantiaquid: “Icsambo icquidbëd tancandaëdec canidopacvoc. ¿Mitsipaden sio?” quequin yuabon icbo chuipac caondash. ²⁸ Adoquien: “Chieshëmënkuidëmbien seuanchitash,” cac: “¿Chicshunetanquindambi icpe?” yua qesho: ²⁹ “Padi. Petebëdi chiquidtsiash. ³⁰ Aidbëdi ma canipanuna. Ëshëacsho tacuesquimbi teshun sianun nanuna. Adoshombic icsambo icquid tsindobanshun nëdëncanun nanuna. Icsambo icquid nëdëncatanquimbic pete bedshun sandoshon shubun dectandonon nanuna,” quepac caondash tied icbo —quequin Esusën chuipondash.

Esus tantiaquido dadpen yante chiaid

(Mad 4.30-32; Duc 13.18-19)

³¹ Adshumbic abi tantiaquido dadpen yante tantiamenuen Esusën naden chuipondash. —Cuëte bacuë ëshëmpi ³² pistsëcquidi nuamboshë caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquo yanendac —quepondash Esus.

Abi bëdamboen tantiate Esusën chiaid

(Mad 4.33-34; Duc 13.20-21)

³³ Adshumbic Esusën abi bëdamboen tantiate chuipondash. —¿Mitsipad nami uaid icpec? Aniactsëc nami uashun utsibëdta daëd uain cabiunac abichobi batambo yanec. Adembidi ëbi bëdiactsëc tantiatsëcboedi ëmbi chiaid tantiaquid ëbi bëdamboen tantiaquid yanendac ³⁴ —quequin Esusën chuipondash. Sebadënquo chienquo icquin ompoacbimboenuidi Esusën chuipondash. ³⁵ Aden Esusën chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec. “Sebadënquo chienquo icquin ompoacbimboenuidi chuibanendambi. Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec. Nëbimbi chuibanendac,” quequin nuquin tsusedpan Esusën chuite dada uapampic.

Ëshë icsambo icquid seuanaid sebadënquo chiaid

³⁶ Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. —“Chieshëmënkuidën ëshë icsambo icquid siaid nec,” quequin mimbi chuiboed en sebadënquo chui, Icbo. Tantanu. ¿Atotsi chuitiadquo icquin aden chio? ³⁷ —caquien Esusën chuipondash naden. —Tantia. Mibi chuinu. Pete ëshë bëdambo icquid sequidbimboecquid nebi. Nuquin

Papan chiaidquio tantiamequin matses bēdambo icmequid nebi. ³⁸ Padnuc tied dapabimboecquid nidaidēn tabadquidtedi nec. Padnuc pete ēshēbimboecquid ēbi tantiaquid nec. Nidaid utsi-utsiec yacno tabadquido utsi-utsien ēbi tantiaquid icmendambi. Padnuc ēbi chieshēnquid Satanasēn yuaido icsambo icquid siaidbimboecquid nec. ³⁹ Padnuc ēshē icsambo icquid sequidbimboecquid Satanas nec. Aidēn yuaido matses icsambo icquidon ēbi tantiaquidobēd tabadquin icsametiadquio iquec. Adsho badedi cuidenquio icquin Nuquin Papan cuidte ushē choabi icnuc matses icsambo icquidobēd bēdambo icquido tabadmendambi. Padnucn ambi chiapadēn Nuquin Papan abi yacnoshon uaido mayan bēdabon ēmbi chiacpadomboen naindac. ⁴⁰ Icsambo icquid tsindoshon nēdēncacbimboen Nuquin Papan cuidte ushēmbi icsambo icquido cuidendac. ⁴¹ Ēmbimboen mayan bēdabo namendac. “Icsamianquidobēdta icsaidotedi bedshun chian anēdēnquiacno nēseca,” quequin ēmbi chiac ⁴² bedshun chian anēdēnquiacno nēsecaindac. Adoac natiaic mēyadbudec sidquequiendac. ⁴³ Padnucn ēbi tantiec bēdamboec tabadquido Nuquin Papa yacno nidash icsatiapimbo icquid iquendac. Ēmbi aden chuiboed tantiashun ēmbi chiacpadomboen nata —quepondash Esus.

Nuquin Papabēd tabadte bunquiota, quiaid

⁴⁴ Adshumbic padpiden Esusēn chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan ēndenquimbo ompoampid piucquid dadpenquio icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nēbi con tied nec,” qeshun piucquid ompoampid bedpac caondash. Adomboen matsesēn Nuquin Papabēd tabadte bunquin aton nauidi nainquio icquin Nuquin Papan chiacpadomboenuidi nac bēdambo ictsiash.

⁴⁵ Tantia. Casēdu bēdaidquio bunaidtsen mibi chuinu. Dadan casēdu bēdaidquio bunquin bednucn nibēnbenepac caondash. ⁴⁶ Adshun bēdaidquio istuidash: “Nadquid utsi nibēdec,” quiaish comapenec bunquiac caondash. Adshun aton na abitedimbo menequin piucquid bedshun casēdu icbo menequin aid casēdu bedac caondash. Adomboen Nuquin Papabēd tabadte bunquin matsesēn ēbi tantiaquiac bēdambo ictsiash —quepondash Esus.

Nuquin Papan cuidte ushē Esusēn chiaid

⁴⁷ Adshumbic Esusēn naden chuipondash. —Tantia. Mibi chuinu. Nuēcquid nibedacbimboen naindambi. Isadaidbon nuēcquid dadpenquio bedte nēshaid dapa acte nēnequin ⁴⁸ nēshaid cubu-cubuctsēcquio icnuc nuēcquid bedshun acte cuēman tabadquin nuēcquid nibedquid. Nuacquid sandobanquin pistsēcquid acte nēsecaquid. Aden Isadaidbon nuēcquid bedquid. ⁴⁹ Adomboembidi namendambi. Nuquin Papan cuidte ushē chonoc ambi abi yacnoshon uaido mayan bēdabo namendambi. Adoac choshon nibedacbimboen matses bēdambo icquido Nuquin Papa yacno nidmequimbi ⁵⁰ icsambo icquido chian anēdēnquiacno nēsecaindac. Adoac natiaic shubiquiendac —quequin Esusēn Nuquin Papan cuidte chuipondash.

⁵¹ Adshumbic: —¿Ada ēmbi chuiboedtedi tantie? —caquini: —Ai, tantiembi —quepondac. ⁵² Adsho tantiashun Esusēn chuipondashi. —Nuquin Papan chiaid chuibanquid mibi iquendac. Matsesēn aton na ēndenquimbo dayun uanēdaidbēdta

aton na chuca ismequin chiacimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuibodquo mimbi chiendac —quepondash Esus.

Nasaded yacno Esus nidaid

(*Mad 6.1-6; Duc 4.16-30; Uan 4.44*)

⁵³ Adanec auëshquiobi nidequi ⁵⁴ abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuibondash. Adoaquien: —¿Mitsipaden comapenen tantiabempash neba? ¿Mitsipadec comapenen tantiaquin bédamequid yampash? ⁵⁵ ¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidtedi aton utsibo iccosh. ⁵⁶ Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquo neyoc —quequin ⁵⁷ Esus chieshënquin tantienquo icpondash.

Adsho tantiaashun Esusën nadopondash: —Nuquin Papan: “Ëmbi tantiamiacpaden chuibanta,” caidën chiac utsibon tantiaquid. Adquidën abi caniacnoshon chuibansho tantienquo icquid —quepondash Esus. ⁵⁸ Adshun nadatiambo icquin nabanquin daëdpectsëc ismetsëccondash: —“Nuquin Papan chomiaidquo nec,” quetiapimbo iquec —qeshun.

Uan acten mentoanquid

unës uaid

(*Mad 6.14-29; Duc 9.7-9*)

14 Adnubien ancaquidën Edodes caidën Esusën comapenen tantiaquin nabanaid chuisho tantiapac caondash. ² Adshumbic aton yuabo chuipac caondash. —Uan pado acten mentoanded nepash icnui. Ëmbi mapi butemiondaiddi uincuempash icnui. Adquid icquin comapenen tantiaquin nabampash icnui —quepac caondash Edodes.

³⁻⁴ Edodesën Uan cuesuniac caondaidd chuinu. Tantia. Uanën: —Mimbi bedaid Edodias caid min chidopenquo nec. Min utsi Uedipe caidën chido bedshun Nuquin Papan chiaid mimbi niaquec —cadoniaquien Edodesën chieshtoshon uidën uameshun Uan quënënauedmepac caondash.

⁵ Adshumbic Uan cuesunetiadquo icquimbi aton matses: —Nuquin Papan chiaid chuibanquidquo nec —qesho tantiaashun aido dacuëdënquin Uan badedi cuesunenko icpac caondash.

⁶ Adshumbic Edodesën: —Ëbi tishaid ushë nec —qeshun matses dadpen aton shubun puduedmeshun pemepac caondash. Adnubien ambi inaidën champin Edodesën pemiaido baidaquin ismepac caondash. Adsho isumbic Edodesën: —Bëdamboenshë mimbi naic —qeshun ⁷ naden chuipac caondash. —Tantia, champi. ¿Atotsi buneque? Mibi bunaidquo mibi menenu. “Nuquin Papan cuidnushe,” quiash muatiapimbo iquebique. En ëbi chui —capac caondash Edodesën. ⁸ Adoaquien champin aton tita chuitampac caondash. Chuitanec choshon anin chiaid chuituidpac caondash. —Uan acten mentoanquidën mapi butetanquin pada-padaidd dapan ananshun baded ëbi mene —capac caondash champin Edodes chuiquin. Uanën —

Min bënë nianshun utsi bedmec mibi icsaic —cac champin tita Uan cuesunemete bumpac caondash.

⁹Adoaquien Edodesën: —¿Atotsi quepequini ado? ¿Adoenquo ictiadtsimbi icpoba? —quequin ambi chuiboed niactiadquo icpac caondash. —Ëbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

¹⁰Adoac quënë tsadacnobi Uan mapi buteshun ¹¹mapi pada-padaid ananshun buanshun champi menepac caondash yuabon. Adoaquien champin ani menenun buampac caondash.

¹²Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

Comapenen tantiaquin 5000tedi pemiaid

(Mad 6.30-44; Duc 9.10-17; Uan 6.1-14)

¹³Nidshumbic: —Mibi acten mentondaid mapi butiaccosh —catuidpondash. Adsho tantianec cano antabëdtoshon chian potiash pudundoanec matses nibëdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanepac caondash.

¹⁴Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquo icquin daicsaidotedi bédamebampondash.

¹⁵Ushë budambi Esusbëd icquidon: —Inchësheque. Pete nibëdacno nuqui tabadec. Nidaneme, Icho. Shubu dadpen icquid utsi-utsiec yacno nidshun ma piucquid menequin ma pete bednu —caquien ¹⁶Esusën: —Padi. Ma tabadnu. Mimbibi peme —capondashi.

¹⁷Adoaquini: —Ma panëmpi 5tedpactsëc icpayoc. Nuëcquidëmpi daëdquiobi ictsec —quepondac. ¹⁸Adsho: —Aidtedtsëqui beccho —cac meniondambi.

¹⁹Adoaquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bédambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

²⁰Adoaquien nua cubudcuededquin pebededpondash abitedishumbi. Piacsho isun napi uaid bedtanquin tsitsan dapan sandotanquin isquien tsitsan dapa 12tedi cubucubuctsëcquo iquec pete cuësh-cuëshaid napi uaid. ²¹Aden matses dadpenquo pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

Acte bëntse Esus choaid

(Mad 6.45-52; Uan 6.16-21)

²²Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanepac caondash. ²³Adec nidanebon Nuquin Papa chuinuec macuësh dectatoash abentsëqui Esus inchëshpac caondash.

²⁴ Adnubien chian dapa potequi abëd icquidotsen inchëshpondash. Chian nënantanquio yanubi cunquetuidpondash. Adnuc acte comapenec tëccuasquiampondash uncadenquio yec. Comapenec acte ishcudnuc cano mentoadtiadpambo icpondash.

²⁵ Adnubien badiatte anoentsëqui acte bëntse Esus chopondash. ²⁶ Acte bëntse chosho isashini: —Podobitsi nec —quiash dacuëdtanec sidqueuededpondac. ²⁷ Adshobini Esusën: —Ëbien neque. Dacuëdenda —capondash. ²⁸ Adoquien Petedon: —¿Con Icbombobida ne? Con Icbo icquin: “Acte bëntse cho,” ëbi ca —capondash.

²⁹ Adsho tantiashun Esusën: —En cho —caquien Petedo canoësh budanec acte bëntse Esus bëquedbanec niduidtsëcondash. ³⁰ Esusuidi isec bëdamboec niduidtse-qui acte comapenec tëccuasquesho isash dacuëdtanec acte bëntse niduidtsëcboedi mentoadtsempondash. —Ëbi bed, Icbo. Mentoadebique —caquien ³¹ Esusën badedquo bedtanquin indopondash. Aden indoequi: —“Con icbon ëbi bëdamboen nametsiash,” queboedi ¿atotsi quiash dacuëdtano? Ëbi bëdiactsëc tantiatsëcquid mibi nec —quepondash Esus Petedo caic.

³² Adtanec Petedobëdi cano antsadtonobien cunqueboedi cunquenquio yampondash. Actetsen tëccuasquenquio yanondash. ³³ Adsho isun cano antabëdquidon: —Mibi bëdambohë iquec. Comapenen tantiaquidquo yec Nuquin Papan Madombo mibi nec —quequin Esus tantiabededpondash.

Quenesaded yacnoshon Esusën bëdamiaid

(Mad 6.53-56)

³⁴ Adashic chian potiash Quenesaded yacno pudundopondash. ³⁵ Pudundoshon isun anocquidon: —Esus chosh —quequin uanocquido abitedi chuibeniac daicsaido abitedi bë-bëpondash. ³⁶ Bë-bëshumbic: —Dashcuteuidtsëqui mishashi bëdantsiash —qeshun Esus chuituidquin: —Min dashcute cuëmano daicsaido mishme —cac mishmiaqui bëdampondash abitedi.

Padiseyobo icsaid Esusën chiaid

(Mad 7.1-13)

15 Adnubien padiseyobo Moisesën dada uampid chuibanquidobëdi shubu dadpen icquid Edusaden caid yacnuësh cho-choquin Esus istuidpondash. ² Istuidashic: —¿Atotsieshun mibëd icquidon nuquin tsusedpabon chiaid niac-niacposh? Penush mëpamëdenquio icquin nuquin tsusedpabon chiaid ma niac-niacpaboc —quepondash Esus chieshënquido.

³ Adsho tantiashun Esusën: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiacpadomboen naquin ma mimbi Nuquin Papan chiaidquo niac-niacpayoc. ⁴ Tanta. Mibi chuinu. “Titabëdta papa chieshënenquio icquin bëdamboen tantiata,” quequin Nuquin Papan chiampidquo ma mimbi niacpaboc. Adembidi: “Con pa unëshashun,’ quec chieshëmënquid icsho unës uaquid. Adembidi ani icsamboen chuishunsho unës uaquid,” quequin Nuquin Papan chiampid utsi mimbi niacpec. ⁵ Aid niacquin nuquin tsusedpabon ambembi chiaidien mimbi chiec. “Anibëdta amë naden cudasënac bëdambo ictsias,” mibi quepec. “Nuquin Papa menetequid nëidted con piucquid iquec. Mitsana nibëdsho menetiadquidi mibi menenquio iquembi. Nuquin Papa menetequid nec,’ quequidën ⁶ cudasënac bëdambo ictsias,” mibi quepec. Aden nuquin matsesën chiaid naquin Nuquin Papan chiaidquo ma mimbi niac-niacpayoc. ⁷ “Nuquin Papa tantiaquidquo

nebi,” quec muaquid mibi nec. Ęndenquimboshē Nuquin Papan chuimiac nuquin tsusedpa Isayas caidēn mimbi icsamboen tantiate chuiquin dada uapampic naden.

⁸“Isadaidbo: ‘Nuquin Papambo tantiemi,’ quepec.

Adboedēmbi ēmbi chiaid niacquin ēbi tantienquo iquec.

⁹‘Ma Nuquin Papan ēbi bēdamboen isnu,’ queboedēmbi ēbi bēdamboen tantienquo iquec.

Ęmbi chiaidquo namenquo icquin aton matsesēn chiaiduidi namepec,”

quequin Isayasēn Nuquin Papan chiaid dada uapampic —quequin Esusēn abi chieshēnquido chushcapondash.

Ana shēcūēnuēsh choaid chiaid

(Mad 7.14-23)

¹⁰Adshumbic abi isec datsidadquido ompoacimboen chuipondash. —Tantia. Mibitedi chuinu. ¹¹Ana shēcūēn puduedaidēn matses icsaten mimbi dampec. ¿Adquidēnda matses icsape? Padenquo. Ana shēcūēnuēsh choaidēmbien matses icsatsiash —quequin Esusēn chuipondash. ¹²Adnubien abēd icquidon: —Mimbi aden chuiboed tantiashun padiseyobon mibi chieshēnosh, Icbo —caquien: ¹³—Dacuēdenda. Icsa bescatanquin tsindoshon nēdēncacimboen ambi tantiamiabi yaido ambembi chuiquido Nuquin Papan cuideque. ¹⁴Dacuēdenda. Padiseyobo bēshuaidbimboec icquido neque. Bēshuaidēn aton matses bēshuaid utsi bēdamboen buantiapimbo iquec. Buanuec abi shēcūē ampaēdtsiash. Adembidi Nuquin Papan chiaidpenquo namequin aton matses bēdamboen tantiametiapimbo iquec —quepondash Esus abēd icquido chiec.

¹⁵Adshobien Petedon: —Mimbi ana shēcūēnuēsh choaid quequin chuiboed tantiambo iccombique. Aid sebadēnquo chui. Tantianu, Icbo —caquien: ¹⁶—¿Tantiamboda icco? ¹⁷Chuinu. Tantia. Ana shēcūēn puduedaid mimbi peboed min pucun uedoash chimute shēcūēnuēsh choec. Adquidēn Nuquin Papan chiaid niacmenquo iquec. ¹⁸Matses onquiaidimbi ana shēcūēnuēsh choaid caoc. Abibi uquēducuēsh onquec: “Adoembi,” quequin otacquio tantiaquin naic matses icsatsiash. ¹⁹Icsambo icquido yec: “Ai, adoembi,” quequin otacquio tantiashun Nuquin Papan chiaid niactsiash nadquidēn. Nēidic unēs uanquid. Nēidic aton chidopenquo chudquid. Nēidic aton bēnēpenquo chudmequid. Nēidic aben uequid. Nēidic ampequid. Nēidic muaquid. Nēidic icsamboec chuishumēnquid. ²⁰Adquidtedi: “Ai, adote bunebi” quequin otacquio tantiash icsaquid nec. Padnuen penush mēpamēdenquo icquin Nuquin Papan chiaid niaquenquo ictsiash —quepondash Esus abēd icquido chiec.

Isadaidpembo chidon Esus tantiaid

(Mad 7.24-30)

²¹Adanec auēshquiobi Esus nidpondash. Shubu dadpen icquid Tido caid anoentsēqui datambidanec choec shubu dadpen icquid utsi Sidon caid anoentsēqui chopondash.

²²Adnubien anocquid cananeyabo chidon Esus cuētuidpondash. —Tsusedpa Dabidēn tsyuecquid Nuquin Papan namiaid icquin ēbi bēdamboen ista. Con champi podobitsi icsa dapuduedaid yec natiambo iqueque. Con champi bēdameta —caquien

²³Esusēn ēcbedenquo icpondash. Ęcbedenquo yaqui chidon tsibanbanquin cuēn-

bampondash. Adsho tantiashun Esusbëd icquidon: —Chieshanquiec cuëdpeque. Cuemepa —caquien ²⁴ Esusën cuemenquo icquimbi aid chuiquin: —Nuquin Papan chiacpaden Isadaidbo matsesba Nuquin Papa bëdamboen ismete tantiamenuc nebi. Bënudacimboec icquin Nuquin Papa tantienquo icsho aidoba tantiamenuc nebi —quepondash Esus.

²⁵ Adsho tantiash nidenquo yec chido cuëdboed Esus ismequin danëshën sebudtsec: —Ëbi nashunta, Icbo. Con champi bëdameta —queshobien Esusën: ²⁶ —¿Aton bacuëbo pemenquo icquimbi aton opa pemiacta bëdambo icpatsiash? Padenquo. Adembidi Nuquin Papan con matses caidotedi tantamiabi utsibo ëmbi nashunac ic-sambo ictsiash. Isadaidboba tantiamenuc nebi —quepondash Esus.

²⁷ Adsho tantiashun chidon: —Ai, abimbo mimi caic. Padnuen bacuëbon pequin paëdmiaid opashëmpin petsëcquid. Adembidi mimi comapenen tantiaquin nabanaqui isadaidbo dadpen bëdanubi isadaidpembo abentsëc tantiaquid icsho ëbi nashunquin con champi bëdameta ²⁸ —caquien Esusën: —Ai. Ëbi tantiaquidquo mibi nec. Mimi chiacpadec min champi bëdanendac —quesho tantianec aton shubuno nidshun isquien aton champi bëdanac Esusën chuinubi.

Daicsaido dadpen Esusën bëdamiaid

²⁹ Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

³⁰ Tabadtuidsho isun matses dadpenquo cho-choquin daicsaido dadpen Esus ismenuen bë-bëpondash. Tidinequido yec bëshuaido yec shëquëquenquo icquido yec onquesabo yec daicsaido utsibotedi yec quenuc bë-bëpondash. Adsho Esusën bëdamebampondash. ³¹ Bëdamiac onquenquo icboedi onquianondash. Bëshuacboedëmbi isbenondash. Capuenquo icboedi capucuenondash. Daicsaido utsibo adecbidi bëdanondash. Adsho isquido nadpondash. —¿Adquidta ictenec? Nuquin matses isadaidbon tantiaidën Nuquin Papan namiaid icquin bëdamepash icnui. Nuquin Papa bëdambo iquec —quepondash Esusën bëdamiaid tantiash.

Matses 4000tedi pemiaid

(Mad 8.1-10)

³² Adec tabadsho isashien Esus: —Nëido tantiac unësquido iquec. Ëmbi nabansho isnuec choash 3tedec ushquin piac ambi bëboed pete naimëdaccosh. Ëmbi: “Nid,” cac nidnuequi bunambi padishtiash. Pemiabi nidmetiapimbo iquebi —quepondash.

³³ Adsho tantiashun abëd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

³⁴ Adoquien Esusën: —¿Tedtsi panëmpi iquec? —cac: —Sieteted ictsec. Nuëcquidëmpi daëdpactsëc ictsec —quesho ³⁵ tantiashumbien abi datsidadquido chuiquin: —Nëmba tabadbud —capondash. Adoac tabadbudpondash abitedi.

³⁶ Adshumbic panëmpibëdta nuëcquidëmpi bedshun Nuquin Papa chuipondash. —Nëid mimi uaid bëdambo iquec, Papa —queshun pete cuësh-cuëshbantsëcshun abëd icquido menebampondash: —Pemban —quequin. Adoac abitedimbo pemebampondash. ³⁷ Aden pemiab abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsëcquido icnuc sandobampondambi. ³⁸ Esusën pemiaido dadpenquo icpondash. Tambanac 4000tedi dada icpondash. Chido bacuëbobëdta tambanambo iccondambi. ³⁹ Adashic: —

Nidanec nid —quepondash Esus ambi pemeboedo caic. Aido nidanenubi chian budash cano antabëdtoshon Esusën chian potepondash. Chian potiash nidaid Mactada caid yacno pudundopondash.

Saduseyobon: Èbi isme, quiaid

(Mad 8.11-13; Duc 12.54-56)

16 Pudundoanec nidshobi anocquidon abi chieshënquidon Esus chuituidpondash. —“Nuquin Papan chomiaid nebi,” quequin comapenen tantiaquin nanbanquin èbi isme —cabededpondash padiseyobobëdtan saduseyobon.

² Adshobien Esusën: —Nuquin matsesën chiaid mimbi tantiec. “Inchëshbudtsëqui abu piumbo icsho isash: ‘Tanunquio badiadec,’ quequid. ³ Badiadnubi abu inchëshpambo icsho isash: ‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiacbimboen bëdamboen tantiatiadquidi Nuquin Papan nëbimbobi naid mimbi tantienquio iquec. ⁴ Icsambo icquid icquimbi mimbi: “Èbi isme,” cadednepec. Nëbi mibi ismenquio iquembi. Nuquin Papan nuquin tsusedpa Onas chishcambieccquid dapan chebudacsho daëdec ushun ucbudmiacbimboec unës uacsho chococac daëdec ushash uincuenendabi. Aden èbi tantiesabo ismendambi —quianec nidpondash Esus.

Padiseyobon chiaid tantienda, quiaid

(Mad 8.14-21)

⁵ Adanec nidec chian budash cano antabëdtoshon chian poteoapondash. Chian potequien Esusbëd icquido: —Pete nianchitombi. Bëtiadquidi nepobi —quepondash.

⁶ Adshobien Esusën abëd icquido chuiquin: —Padiseyobëdtan saduseyobon naid pan bidiscamete bimboecquid iqueque. Ista —caquien ⁷ tantienquio yec abëd icquido nadec onquecuededpondash. —Nuqui niamboed pete chiequi nepanui —quepondash. ⁸ Adsho ambembi tantiash Esus: —Èbi bëdiactsëc tantiatsëcquid mibi nec. ¿Mimbi pete niamboed chiectabi nedi? Padenquio. ⁹ ¿Bëshunashta mibi nepe? Pete 5tedtsëcboedi ëmbi 5000tedi pemiaidën napi uaid dadpen iccondaid ¿tantienquioda yano? ¹⁰ ¿Adembidi pete 7tedi ictsëcboedi ëmbi 4000tedi pemiaidën napi uaid dadpen tsitsanën sandoboed tantienquioda yano? ¹¹ ¿Aden comapenen tantiaquid icquimbidambi pete niamboed chuipadi? Padenquio. Pan bidiscamete pictsëc cabiunac pan abichobi nua bidisquiacbimboecquid padiseyobobëdtan saduseyobon chiaid iquec —quepondash Esus.

¹² Aden chuisho tantiash abëd icquido nadpondash. —Pan chienquio icquimbi nuquin matses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbëdta saduseyobon chiaid tantienda,” quepecshenda niosh —quepondash Esusbëd icquido.

Nuquin Papan Mado mibi nec, quiaid

(Mad 8.27-30; Duc 9.18-21)

¹³ Adash yuectaniash puduanec nidequien Esus nidaid utsi Sesadeya Uedipo caidën nidanepondash. Adshumbic abëd icquido chuimepondash. —Utsibon ¿tsutsi èbi caosh? —caquien: ¹⁴ —“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuëmëdquid Nuquin Papan oncamepampid

nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abëd icquidon. ¹⁵ Adsho tantiashun Esusën: —Ma mimbibi. ¿tsutsi ëbi mimbi cao? —caquien ¹⁶ Petedo Simon caidën: —“Quidistu caid Nuquin Papan chomiaidquio nec,” caombi mibi. Aton Madombo mibi nec —capondash.

¹⁷ Adsho tantiashun Esusën: —Nuquin Papan aden tantiamiac mimbi bëdamboen chioc, Petedo. Onasën mado Simon caid yec matsesien mibi nec. Adquid icquimbi matsesën tantiaid chienquio icquin Nuquin Papan tantiamiaidquio mimbi abimbo chioc. ¹⁸ Tantia. Ëmbitsen mibi chuinu. “Cuënotebimboecquid nec,” quequin mibi Petedo cuë nondambi. “Cuënote dapa utsi ictiapimbo yacimboec chieshtoenquio icquid iquendac,” qeshun mibia ëbi tantiaquido chuiquid dapambo icmendambi. Adec mimbi namiaido ëbi tantiaquido iquendac. Satanasën aido: “Nëid yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac. ¹⁹ Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidtsen mimbi chiendac —quepondash Esus Petedo chiec.

²⁰ Adashic abëd icquido abitedi chuioaic: —“Nuquin Papan chomiaidquio nec,” quequin utsibo ëbi chienda —quepondash Esus.

Abi unës uate Esusën chiaid

(Mad 8.31–9.1; Duc 9.22–27)

²¹ Adshumbic tauaquin abi unës uate chuidondash. —Shubu dadpen icquid Edu-saden caid yacno nidendabi. Anoshon nuquin matsesën ëbi chieshënquiendac nëidtedshun. Nëidic tsusiobon. Nëidic nëish yua abided unës uaquido chuiquid dapabon. Nëidic Moisesën dada uampid chuibanquidon. Aidedishun mëyanquioquin ëbi unës uamendac. Adoacsho chococac daëdec ushash uincuenendabi —quequin chuisho ²² tantiashun Petedon uanotantsëcquin tsadumbudshun Esus chuipondash. —Unësquio icnuc mimbi chieque. Aden chienda. Ma mibi unës uatiapimbo icpayoc —capondash Petedon. ²³ Adoquien Esusën: —Satanasën oncamiac Petedo adec onquec —qeshun Petedo isquin Satanas chushcapondash naden. —Cuen, Satanas. Nuquin Papan chiaid mimbi ëbi niacmetiadquio iqueque. Cuen —quetanec Petedobi chiec: —Matsesën tantiaid chuiquimbi Nuquin Papan tantiaidquio mimbi chienquio iccoc —capondash.

²⁴ Adashic abëd icquidotedi chuioaic: —Ëbi tantiaquidon aton nauidi nainquio icquin ëmbi chiacpadomboen natsiash. Adsho chieshëmënquidon: “Unës uachitomanë,” cac chieshtoenquio icquin ëbi tantiatsiash. Adquid ëbi tantiaquidquio nec. ²⁵ Padnuen ëbi tantiatsëcquid: “Esus tantiasho unës uachitoshe,” quiash ëbi tantienquio yanec unësash Nuquin Papan cuidaidobëd nidendac. Padnuen chieshtoenquio icquin ëbi tantiaquid Nuquin Papa yacno tabadendac. ²⁶ ¿Nuquin Papa tantienquio yec tabadecta matses bëdambo icpatsiash? Abi bunaidtedi bedquin Nuquin Papa tantienquio yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Piucquid meniashta Nuquin Papa yacno tabadpatsiash? Padenquio. Adotiapimbo iquec. ¿Atoda meniantiapimbo iquec? ²⁷ Ëmbien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bëdamboec tabadquid Nuquin Papabëd tabadquequin Nuquin Papa tantienquio yec icsaquido icsano nidmendambi. ²⁸ Tantia.

Chuinu. Utsi-utsiec unēsabi icquin ëbi tantiaquido dadpen yansho mimbi isendac —quepondash Esus.

Esus bëchamauanquiecscho isaid

(*Mad 9.2-13; Duc 9.28-36*)

17 Aden chiasb 6tedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchi Uan yec quetsëcnuc buanash macuësh dapa dectatoash mananënquoio tabadtuidpac caondash. ²Tabadtuidshun isquien Esus utsiacimboec isadpec. Aton dashcutebëdi aton bëtantete ushëbimboec bëchamauanquiec yanac caondash.

³Esus bëchamauanquiec icnubien dada utsi daëd isadcuenash Esusbëd onquiampac caondash. Abentsëc Moises yampid icnubi utsi Edias Nuquin Papan ambi tantiaid oncamiampid icpac caondash. ⁴Adsho isashien Petedo: —Mibi adec tabadsho isash bëdambo iquebi. Mibi nëmbobi tabadmenun abentsëc chotsecnuc shubumpi uatsëcnuna, Icbo. Mitsana natsëcquinc Moisesën na natsëcquinc Ediasën na natsëcquinc canuna. ¿Ada bëda icpec? —quenubi ⁵abu ushu bëchamauanquiec icquidën isadenquoio icnuc bëtimpac caondash. Adnubien abu ushu nënantanuëshquoio Nuquin Papan onquiampac caondash. —Nëid con Madombo nec. Èmbi tantiaidquoio yec ëmbi bëdamboen isaidquoio neque. Nëidquoio tantiata —quec dacuëdampamboec onquenubien ⁶uinte paëdtampamboec dacuëdtanec uebudcuededpac caondash Petedo chedo.

⁷Adshobien Esusën camishquin: —Dacuëdenda. Nidto —cac ⁸nidtoquin isquien Esus abentsëqui iquec.

⁹Adtanec macuësh budequi Esus: —Mimbi isboed nëbi utsibo chienda. Unës uac ëbi uincuenacsho isun chianta —quepac caondash abëd icquido chiec.

¹⁰Adsho tantiash Petedo chedo: —“Nuquin Papan chomiaidquoio nec,” quequin nëbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —queshobien ¹¹Esusën: —Abimbo chiosh. “Edias yampid bëyuc choshon: ‘Nuquin Papan chomiac bëdambo icquid choeque. Bëdamboec tabadta,’ quequin chiendac,” quequin abimbo chiosh. ¹²Adquid Ediasbimboecquid chondash. Choacsho tantienquoio icquin matsesën abi bunacpaden unës uapac caondash. Adembidi Nuquin Papan chomiaid icsho ëbitsen chieshënquin unës uaindac —quesho tantiashien: ¹³—“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

Madompi dapuduedaid podobitsi icsa cuemiaid

(*Mad 9.14-29; Duc 9.37-43*)

¹⁴Bëchamauanquiec ictanec choequi abëd icquido utsibo yacno choquin matses dadpen aido datsidadacsho Esusën istuidpondash. Adec Esus chosho isumbien unësanetsëcquidën papan Esus ismequin danëshën sebudshun chuipondash. ¹⁵—Con mado bëdamboen isquin bëdameta, Icbo. Baded-badedquiec unësanec cuëten pichiquianec. Adecbidi unësanec acten mentoadtsenaccosh. ¹⁶Mibëd icquidon bëdamete danquin bëuidombi. “Në bëdame,” cac bëdamenuen tanuidosh. Bëdamenquoio iccoshe. Mimbinbo bëdameta —caquien ¹⁷Esusën ambo icquidotedi chuipon-

dash. —Ëmbi nadatiambo icquin nabanquin ismiaqui mimbi ëbi tantienquoio iquec. Adsho isash chieshtoash cuentiadquoio icchitebi. Adtiadquoio yequi padenquoio iquec nebique. Min mado beccho —cac ¹⁸ bësho istanquin Esusën podobitsi icsa chushcapondash. —Padi. Daicsa uainda —cac podobitsi icsa cuenubi madompi bédampondash.

¹⁹ Adsho isun abéd icquidon Esus chuipondash utsibo tantiamenquoio icquin. —Ëmbi: “Cuemenu,” cac ¿atotsi quiash podobitsi icsa cuenenquoio icposh? —caquien: ²⁰—Nuquin Papa bédamboen tantiaquin mimbi bédamboen natsenoc. Mimbi bédiactséc tantiatsec. Pete ëshëmpi mostasa caid pistsécquidi siac nua yec canitsiash. Adecbidi Nuquin Papa tantiatsëcboedi: “Ambi natiapimbo ictequid nibëdec,” quequin abimbo tantiaquidquoio yanshun comapenen tantiaquidbimboec mibi ictsiac. Adquidën nëid macuëshquiobi cain: “Uquë manëd,” cac manëdtsiash. Aden mimbi: “Ëbi bédamboen nameta, Papa,” quequin Nuquin Papa chianiac aidëmbi mimbi: “Ëmbi natiapimbo ictequid nec,” caid mibi bédamboen nametsiash. ²¹ Nëbi ëmbi cuemeboed abembi cuentiapimbo icquid nec. Nuquin Papauidi tantianuen buna mëmunquin Nuquin Papa chianeshun adquid cuemequid —quequin Esusën chuipondashi.

Abi unëste Esusën chuioaid

(Mad 9.30-32; Duc 9.43-45)

²² Adanec aton nidaid Cadidia yacnobi capucuenequimbi Esusën abéd icquido chuipondash. —Ëbëd icquid abentsëcshun ëbi chieshënuquido ëbi bedmendac. ²³ Bedshun ëbi unës uamendac. Aden unës uamiacsho chococaquini daëdec ushash uincuenendac —quesho tantiatanequien abéd icquido: —Unësquoio icnuc chiec —quiash shubiantiadtsëcquoio icpondash.

Chuiquid dapa menetequid piucquid Petedon istuidaid

²⁴ Aden chianec nidequi shubu dadpen icquid Capednaun caid yacno Esus chopardash. Adnubien Nuquin Papa tabadte shubu uashunaid nacnemenuquin piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen ¿ada min icbon dos dada uatsaid piucquid shocoshëmpi abentsëc menepatsiash? —cac ²⁵ Petedo: —Ai, menetsiash —quepac caondash. Adanec nidec shubun puduedshobien Esusën ambia Petedo chuipondash. —¿Atotsi mimbi chie, Simon? Aton matsesën na nacnemenuen ¿tsutsi chuiquid dapabon piucquid bedshumpec? ¿Ada aton matses piucquid bedshumpec? Aido bedshunenquoio icquin ¿ada ambi bedaido aton yuabo piucquid bedshumpec? —caquien ²⁶ Petedo: —Ma aton yuabo bedshumpaid yoc. Aton matses piucquid bedshunenquoio iquec —quesho tantiasien: —Adembidi aton Mado icsho aton shubu nacnemenuen Nuquin Papan ëbi bedshuntiapimbo iquec. ²⁷ Aden tantiaquimbi: “Nëishnushe,” queshun mennenun nanuna. Chianën ansemetan. Taaquin ansemiaidi ancanshun anisquin 4 dada uatsaid piucquid shocoshëmpi abentsëc mimbi istuidendac. Aid bedshun piucquid bedshumënuquido menetanta. “Në con icbon nabëdi con na nec,” quequin menetanta —capondash Esusën. Adoac Petedon Esusën chiacpadomboen menetampac caondash.

¿Mitsicquid chuiquid dapa mimbi icmepatsia?

quequin chiaid

(Mad 9.33-37; Duc 9.46-48)

18 Adshumbic abéd icquidon Esus chuipondash. —Abitedishun Icho icquin matses mimbi namendac. Èbi chedo caic ¿mitsicquid mibèditan chuiquid dapa mimbi icmepatsia? —quesho ² tantiashun abi tabadacno nënantanquio bacuè tsaduntsécshun Esusèn chuipondash. ³—Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuèn amèn chiacpadomboen nacbimboen èbi tantiaquiota. Adash ambi namiaid yanash Nuquin Papa yacno mibi puduedendac. ⁴Aden èmbi chiacpadomboen naquidquo icsho mibi Nuquin Papan: “Bèdambohè iquec,” caindac. ⁵Nadquid bacuèbèdta èbi tantiabentsécquid bèdamboen tantiaquidèn èbitsen bèdamboen tantiendac —quepondash Esus.

Tantiabentsécquido icsamete chiaid

(Mad 9.42-48; Duc 17.1-2)

⁶Adshumbic padpiden chiec: —Èbi tantiabentsécquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unèsacsho isun: “Bèdambo iquec,” catsiambi. “Cuènote yuèmboshè icquid tèdectanshun acte nënepatecnèdan,” caimbi icsamiente bunquidquo. ⁷Aden èbi tantiatsécquid utsibon icsamendac. Adec icsamianquid Nuquin Papan cuidendac.

⁸Aden Nuquin Papan cuidte chuisho tantiequi icsainda. Mèdanten naic mibi icsaic. Mèteshuniac bedtiapimbo yac bimboec icsainquio yec ènèdta. Taèn capuec mibi icsaic. Tateshuniac caputiapimbo yac bimboec icsainquio yec ènèdta. Ènèdenquo icsho Nuquin Papan mibi cuidendac. ⁹Adecbidi èshèn isec mibi icsate bunquiec. Èshè chicshuniac bimboec icsainquio yec ènèdacsho: “Bèdambo iquec,” catsiambi. Ènèdenquo icsho Nuquin Papan chian anèdènquiacno nèsecaindac —quequin Esusèn chuipondash.

Matses èbi tantiamete Nuquin Papa bunaid

(Duc 15.3-7)

¹⁰Adashic padpidec: —Nadquid bacuèmpin èbi tantiatsécsho isun: “¿Adtsécquidèmpinquinobida bèdamboen tantiapec?” cainda. Nuquin Papan abi yacnoshon uaid mayan bèda aid bacuèbo dayun uaquid icquin Nuquin Papa yacno puduedshun mimbi mamènshumboed Nuquin Papa chuinushe. Adtsécquidèmpi mamènshunenda. Èbi tantiabentsécquido con Pan tantiaquieque. ¹¹Èmbitsen aido tantiambi. “Bènudaid istuidac bimboen èbi tantienquo icquidobi èbi tantiaquido icmenu,” quiash matsesondabi —quepondash Esus.

¹²Adashic padpidec: —¿Mitsipadquo nuquin matses icpec? Nèish yua obeca dadpen 100ted dayun uaquidèn aton yua tambanac abentséc nibèdsho istanquin utsitedi nianshun aid abentséc nibènbenequin istuidquid. ¹³Aden istuidash comapenec cuishtonquequid: “Con yua nibèdantsenquiac,” quiash. Aton yua utsi yacno bèash abi icboctedi icsho isash bèdambo icquid. Adecbidi matsesèn èbi tantiabensho isash Nuquin Papabèd cuishonquebi bènudaid istuidac bimboec. ¹⁴Icsaido cuidacno mat-

ses nidmete Nuquin Papa bunenquoio iquec. Matses bēdamboen isquin abēd tabadmete Nuquin Papa bunquieac —quepondash Esus.

Chieshēnquidobēdi onquete chiaid

(Duc 17.3)

¹⁵ Adashic padpidec: —¿Ada ēbi tantiaquid utsin mibi icsa uaosh? “Ai, icsa uaoshi. Chieshēmiantiadquio icchitosh,” qeshun nadoac bēdambo ictsias. Aid abentsēqui chuiquin aidbēd bēdamboec onquequin: “Ēbi icsa uaquin Nuquin Papan chiaid mibi niac-niacoc. Adec icsainquoio yec ēnēdta,” mibi cac: “Ai, adebi,” quiash mibēdi bēdamboec tabadtsias Nuquin Papa tantiesabimboec icuidboedi. ¹⁶ Mimi: “Icsainquoio yec ēnēdta,” caqui: “Padi. Adequi icsaibi,” qesho tantiashun ēbi tantiaquid utsi beduanshun aidbēdtan chuitanta. “Nuquin Papan chiaid niac-niacsho isun daēdshun chiaid abimbo chiaid nec,” quequin chiaid tantiaquin adota. ¹⁷ Mimi buanidēntsen: “Adec icsainda,” caqui: “Adequi icsaibi,” qesho tantiatanec choashun mibēdtan ēbi tantiec iccuededquido chuiquido chuituidta. “Mimbitsen chuitanta,” cac aidontsen chiaqui tantienquoio icsho isun: “Nuquin Papan chiaid niac-niacquid yec Esus tantiesabimboecquid nec,” qeshun ēbi tantiaquido cuēdēnacno chomennda. ¹⁸ Aden mimi: “Esus tantiesabimboecquid neque. Cuēdēnacno chomenquoio ictiad,” casho Nuquin Papan: “Bēdamboen naic,” mibi catsias. Adembidi mimi: “Adec icsaboedi icsainquoio yec ēnēdsho isun cuēdēnacno chomeoanuna,” qeshun chomeoasho Nuquin Papan: “Bēdamboen naic,” catsias.

¹⁹ Padpiden chuinu. Tanta. Mimi: “Nuquin Papa chuinuna,” cac: “Ai, adonona,” qesho tantiashun aidbēdtan mimi Nuquin Papa chianiac mimi chiacpadomboen Nuquin Papan natsias. ²⁰ Ēbi tantiec daēd tabadnuc aidbēd con Mayan yec ēbēd yacimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

Yuan bēdamboen istiapimbo yaid

²¹ Adec: —Icsa uanec chieshtomiantiadquio iquec —Esus qesho tantiashumbien Petedon Esus chuipondash. —¿Icsa uanec chieshtomianquid tedentsimbi chieshenquoio icquin bēdamboen ispe? Chieshēnquin padpiden icsa uac ¿padpidendambi bēdamboen isoape? ¿Mēdante utsiuc daēd tauadoquin sietetedembi nashun padpiden bēdamboen isenquoio icquin ēnacta bēdambo icpatsias? —caquien ²² Esusēn: —“Mēdante utsiuc daēd tauadoec sietetedi” quequin daēdpactsēcquio mimi chuipec. 70 por 7 caid ¿tedtsi icpec? Aidteden 490tedembi ēnenquoio icquin bēdamboen isoadoniac bēdambo ictsias —quepondash Esus.

²³ Adashic abi onquec: —Nuquin Papan chiacpadomboen matses bēdamboen iste mibi chuinu. Tanta. Tsusion yuabo dadpen icpac caondash. “Ma bēnu,” quequin ambi meniactedi piucquid bednuen aton yuabo aton shubuno chomepac caondash. ²⁴ Abia chomiaidēn piucquid dadpenquioshē bedshun aton icbo meniambo icpac caondash. ²⁵ Adsho icbon: “Mimi bedactedi beccho,” cac: “Nibēdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Mīn chido mīn bacuēbobēdtabi cuēsh-cuēshēdmeshun aidtedi piucquid bednu. Mibi icsambo iqueque,” cac ²⁶ yua abi yuaquid ismequin danēshēn seabudash: “Padi. Ēbi yuamenuen cuēsh-cuēshēdmenda. Chiata. Yuecshun aidtedi bedshun mibi menenun nanu,” capac caondash. ²⁷ Adoquien icbon bēdamboen isquin: “Padi. Ēbi

menenda. Mibi utsibo yuamenquo iquembique. Dacuëndenda. Nidec nid,” quequin icbon aton yua bédamboen nidmepac caondash.

²⁸ Adoac nidquimbien aid yuan icbon bédamboen isboedën ambi: “Ma bënu,” quequin piucquid daëdpactsëc meniaid yua utsi istuidpac caondash. Istuidshumbic bedtanquin têtëdinquin: “Mimbi bedactedi piucquid beccho. Unës uachitomane,” caquien ²⁹ aidtsen ambi piucquid bedshunonaid ismenuen danëshën sebudtsec: “Chiata. Èbi unës uainda. Yuecshun bedshun mibi menenun nanu. Chiata,” quepac caondash yua utsi. ³⁰ Adsho tantiashun icbon bédamboen isboedëmbi chieshënquin: “Padi. Mibi cuidmèmbi,” qeshun quënën nauedmepac caondash. “Piucquid aided abi menianenquo yacpadequi ma quënënuësh mëyadbudchitono,” qeshun nauedmiac caondash.

³¹ Aden chieshënquin quënën nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bédamboen isboedëmbi min yua utsi quënën nauedmiac: ‘Piucquid menianenquo iquec,’ qeshun,” quequin icbo chuipac caondash. ³² Adsho tantiashun icbon ambi cuidenquo icquin bédamboen isboed chomeshun chushcapac caondash. “Icsambo icquidquo mibi nec. ‘Chiata. Mibi menenun nanu,’ mibi qesho: ‘Padi. Èbi menenda,’ quequin mibi bédamboen isombi. ³³ ¿Èmbi mibi adobocpadomboen utsi bédamboen istiapimboda icco? ‘Ma bënu,’ qeshun mimbi meniactedi bëabi icsho bédamboen isec mibitsen bédambo ictsenac. Mibi yacpadeq nëshun mibi cuidembi,” quepac caondash icbo. ³⁴ Adshun quënën nauedmepac caondash. “Ambi bedactedi piucquid dadpenquo meniash ma puduèmpanu,” qeshun quënën nauedmiac caondash. ³⁵ Aden matses yuan icbon nacpadomboen Nuquin Papan naindac. Utsibon chieshënaqui chieshënansho Nuquin Papan mibi bédamboen istiapimbo iqueque. Chieshënanenda. Mibi chieshënuquidobi bédamboen ista —quepondash Esus.

Chidobëd cuëshëdte Esusën chiaid

(*Mad 10.1-12; Duc 16.18*)

19 Adanec nidaid cuëshë Cadidia caid yacnuësh puduanec nidec nidaid cuëshë utsi Udeya caidën nidquin acte Odan caid potebidanec Esus nidpondash. ² Adec nidshobien matses dadpenshun tsibanampondash. Abi tsibanansho isun nidtuidshun daicsaidtedi Esusën bédamepondash.

³ Adnubien tsusedpabon chiampid namequido padiseyobon chieshënquin: —Nuquin Papan chiaid niacmenu —quequin Esus chuituidpondash. —¿Atotsi mimbi chuipe? Dada uashun aton chidobi nidmete ¿mitsipaden mimbi chuipe? En chui. Tantuanu —capondash.

⁴ Adoaquien Esus: —¿Nuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc. ⁵ Adem-bidi: “Dadan canite chido uaid icsho dadan aton chido bedquid. Amë chedobëd icboedi aton chido bedash aid nianenquo yec aibdëd tantiananquiec dada aton chidobëd abentsëc yacbimboec tabadquid,” quequin dada uaid ma mimbi ispaboc.

⁶ Aden Nuquin Papan tantiacpadomboen aton chido nianenquo yec aibdëdi tantiananquiec abentsëc yacbimboec tabadac bédambo ictsiash. Padnuen aton chido nianec aibdëdi cuëshëdquin Nuquin Papan chiaid niactsiash. Adecbidi chido aton bënë nianec icsaquid —Esus qesho ⁷ tantiashumbien abi chieshënuquidon: —¿Abimboda mimbi capadi? Nuquin Papan chiaid dada uaquin ¿atotsieshun Moisesën naden

chuiampic? “Aton chido bunenquo yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampid ma icpayoc —quequin chuipondash Esus chieshënuquid.

⁸ Adsho tantiashun Esusën chuipondash. —Ai, Nuquin Papan chiacpadec aton chidobëd bëdamboec tabadiapimbo icsho isun Nuquin Papan Moises aden dada uamepampic. Tauamboen matses uaqin Nuquin Papan aden chiamo icpampic. ⁹ Tanta. Mibi chuinu. Aton chidobëd cuëshëdshun chido utsi bedquin Nuquin Papan chiaid niactsiash. Padnuen aton chidon bënëpenquo chudmesho istuidash aidbëd cuëshëdquin Nuquin Papan chiaid niaquenquo ictsiash —quepondash Esus.

¹⁰ Adnubien abëd icquidon: —Adotiapimbo icte mimbi chuipec. Aton chidobëd cuëshëdenquo icte mimbi chuisho tantiashun: “Aton chido bedesambo dada bëdambo ictsiash,” caimbi —quepondash abëd icquido. ¹¹ Adsho tantiash Esus: —Ai, utsi-utsiec pabiate shëcuë nibëdacimboen ëmbi chiaid tantiatiapimbo iquec. Ut-siboen aton chido bedash Nuquin Papan chiacpadec bëdamboec tabadquid nec. ¹² Utsibic mimbi chiacpadquid chido bedesa iquec. Nëidtedi chido bedesa iquec. Nëidic aton padibi impadishtsaid. Nëidic matsesën inicsa uaid. Nëidic: “Nuquin Papan yuambo icquin aidën chiacpadomboenuidi naquin chido bedtiapimbo iquebi,” qeshun chido bedesa. Adquidtedi chido bedesa nec. Ëmbi chuiboed tantiashun ëmbi chiacpadomboen nac bëdambo ictsiash —quepondash Esus.

Esusën bacuëbo chiaid

(Mad 10.13-16; Duc 18.15-17)

¹³ Adnubien Esus ismenuen bacuëbo bë-bëpondash. —Mamishquin ma Nuquin Papa Esusën chuinu —quequin bë-bësho isumbimbi: —Padi. Bëenda —cauidpondac. ¹⁴ Adshobini Esusën: —Chën. Ma bënu. Cuemenda. Bacuëbimboecquid Nuquin Papa yacno puduedtequid nec. Amën chuisho tantiash bacuë badedi: “Abimbo caic,” quiacimboen ëbi tantiaquid Nuquin Papa yacno puduedtequid nec. Bacuëbo bëdambo iqueque. Beccho —cac bë-bëpondash. ¹⁵ Adshobien mamishbanquin Nuquin Papa chuipondash. Adobidanec nidondash Esus.

Cania aton na dadpenquo dayun uaquid Esusbëd onquiaid

(Mad 10.17-31; Duc 18.18-30)

¹⁶ Adnubien dada caniampinquo Esus chuituidpondash. —Mibi bëdambo iquec. Bëdamboen chuiquidquo mibi neque. Ëbi chui. Padpidec unëstiapimbo icquid icmenun bëdambo icquid Nuquin Papan abi yacno puduedmetsiash. ¿Atotsi nasho Nuquin Papan ëbi bëdambo capatsiash? —caquien ¹⁷ Esusën: —¿Mitsipadquid bëdambo icquid cai? Nuquin Papauidsëqui bëdambo icquid nec. Aidbëd tabadnuen ambi Moises dada uamiampictedi nata —capondash. ¹⁸ Adoquien cania: —Nuquin Papan chiaid ¿mitsipadquid cai? —quesho tantiashumbien: —Naden chiaid caimbi. “Cuesunenda. Min chidopenquo chudenda. Min bënëpenquo chudmenda. Ampenda. Muainda. ¹⁹ Titabëdta papa chieshënenquo icquin bëdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi —capondash Esusën. ²⁰ Adsho tantiash cania: —Aidtedi niaquenquo icquin nabanquidquo nebi. Bacuëtsëc icquimbi tauaondambi. “Nuquin Papabëd tabadnuen ¿atotsimbi utsi nape?” caimbi —quepondash.

²¹ Adsho tantiashumbien Esusën: —Nuquin Papan chiaid niaquesambo ictiadquio icquin mimbi dayun uaidtedi uesquin menequin piucquid bedta. Piucquid bedshun piucquid nibëdquido min piucquid uesquin menebanta. Adsho abëd tabadmenun Nuquin Papan mibi bëdamboen istsiashe. Adota. Adotanequic ëbëd iquec cho —caquien ²² cania: —Con na dadpenquio icsho uesquin menetiapimbo iquebi —quiash shubiantiadtsëcquio ictanec nidpondash Esusën chiacpadomboen natiapimbo yec.

²³ Adsho isun Esusën abëd icquido chuipondash. —Chuinu. Tania. Aton na dadpen dayun uaid quid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidsëqui tantiec. ²⁴ ¿Ada nëishamën pinchuc chichte ancumpadic? Padenquio. Adecbidi aton na dadpenquio dayun uaidquidën aton nauidsëqui tantiaquin ëmbi chiacpadomboen natiapimbo yec Nuquin Papa yacno tabadtiapimbo iquendac —quequin Esusën chuipondash.

²⁵ Adec: —¿Ada nëishamën pinchuc chichte ancumpadic? —quesho tantiashien abëd icquido nadpondash. —¿Tsdain Nuquin Papa yacno puduedtequid icchitotsiashe? Nibëdchitequien iquec —quesho tantiashumbien ²⁶ Esusën abëd icquido bëisquin naden chuipondash. —Mates namiantiapimbo icnuc Nuquin Papain nami-anquidquio nec. Ambi natiapimbo ictequid nibëdec —quepondash.

²⁷ Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibëd icnuc chopondabi. ¿Mitsimbo tabadtequidini nepe? ¿Atotsimbi nape? —caquien ²⁸ Esusën: —Tania. Mibi chuinu. Nuquin Papan ambi uaid abitedi chuca uabocnoëshquio ëbëdtan chuiquid mibitedi iquendac ëmbi abitedi namiacnuëshquio. Eëbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidedi 12tedshun tsyuecquidon shubu 12tedi shubun-shubunquiech chuiquid dapabo mibitedi iquendac. ²⁹ Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadac bimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquio icnuc. ³⁰ Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquio iquendac. Utsibic nëuëshquio chuiquidpenquio icboedi Nuquin Papa yacnoshon: “Bëdambo icquid nec,” quequin chuiquid dapa icmendac —quepondash Esus.

Chonoadquido chiaid

20 Adshumbic abëd icquido Esusën ompoac bimboen chuipondash. —Tania. Eëbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen mates istuidpac caondash. ² Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. ³ Ushë abucquio yanubi tied icbon pete meniacno nidshun utsibo nainquio yec samëdsho istuidpac caondash. ⁴ Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac ⁵ tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen. ⁶ Inchëshbudtsëqui nidoaquin utsibo nainquio yec samëdsho istuidoashun: “¿Atotsi quiash samëduidequi ique?” cac ⁷ samëdquido: “Chonoa uanquid nibëdosh,” quesho tantiashun

tied icbon: “Mimbitsen con tied neshcaic cho. Mibi menenu,” cac tied neshcaic nida-neoapac caondash inchëshbudtsëqui neshcaquin tauaic.

⁸Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushë budambi choboedotsen meneta. Adoshombic ushë cuembo icnuc choboedotsen. Adoshombic ushë abuctoan choboedotsen. Adoshombic badiadnubi abia chobedo enquimbi meneta,” cac menequin tauapac caondash. ⁹Inchëshbudtsëqui chonoadec choboedoba menequin badiadnuc chonoadec taëboed tied icbon: “Menenu,” cact-edquid piucquid menepac caondash.

¹⁰Adosho isashien badiadnubi chobedo: “Aido aden meneshun nuqui chonoad-quiboed yuapambo nuqui menec,” qeshobi aidtedtsëcbidi piucquid menepac caondash. ¹¹Aidtedtsëcbidi meniaquien tied icbo chushcapac caondash. ¹²“Tsyuec chonoadboed meniactedsëcbidi menioshi. Icsambo iquec. Inchëshbudtsëqui chot-sash daëdpactsëc chonoadtsëcquid meniactedsëc yuec chonoadquid piucquid meniac icsambo iquec. Chun mëyadec yuecquio chonoadobi. Aidtedtsëc menianec mibi chieshanquieq iquec. Èbi dadpen meniac bëdambo ictsiash,” quequin chushcapac caondash.

¹³Adoaquien tied icbon: “¿Chieshanquiectabi ique? Èmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidtedquio menepaboc. ¹⁴Mimbi bedboed buanec nid. Èbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? ¹⁵¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi èbi nëishëmpe? Aden nëishënac ¿ada bëdambo iquec?” quequin tied icbon chuipac caondash —quequin ompoacbimboen chuipondash Esusën. ¹⁶Adashic: —Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquio icmendac —quequin chuipondash Esusën.

Abi unëste Esusën padpiden chuioaid

(Mad 10.32-34; Duc 18.31-34)

¹⁷Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquio icquin abëd icquido 12tedi icquid chuinuen uan-otantsëcquin buampondashi. ¹⁸Buanshun chuipondashi naden: —Edusaden yacno nidacsho Nuquin Papan matesmiaid icsho èbi chieshënquido èbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidon èbi bedshun: “Ma unës uamenu,” qeshun ¹⁹mates utsibo isadaidpempo èbi bedmendac. Aden bedmiac mates utsibon mamëshunquin èbi cueshcaten comapenen cueshcaindac. Adshumbic èbi unës uanuen cuesten dectanendac. Aden unës uaqui daëdec ushash uincuenendabi —quequin Esusën abi unës uate padpiden chuioapondashi.

Uanën titan chiaid

(Mad 10.35-45)

²⁰Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Èmbi chiacpadomboen èbi nashunta, Icbo —caquien: ²¹—¿Atotsi cai? —capondash Esusën. Adoaquien: —Nëid con mado daëdi nec. Abitedishun icbo icquin mibëdtan

chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën: ²²—Ëmbi naid tantienquo icquin mimbi chuipec —quequin ani chuishumbic Uanbêdta Acobo Esusën chuipondash. —¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? —caquien Uan: —Ai, chieshtoenquo ictsiabi. Mibêd mëyadtsiabi —quepondash.

²³ Adsho tantiashien: —Ai, ëbi tantiaquid yec mibi mëyadendac. Padnuembi ëbêd-tan chuiquid dapa icmequin mibi ëbi datsadmetiapimbo iquec. Nuquin Papambien ambi tantiacpadomboen ëbêd-tan chuiquid dapa icmendac —quequin Esusën chuipondash.

²⁴ Adnubimbi: —Chuiquid dapa ëbi icme —Esus casho tantiashun Uan chedo nëishëmpondac. ²⁵ Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuêdquin aton yuabon badedi naic. ²⁶ Ëbi tantiaquido icquin mimbi adoenuquo iquendac. “Bêdambo mibi iquec,” Nuquin Papa cametiadquido icquin utsibo tantiaquin mimbi utsibo nashuntsiac. ²⁷ Bêdambo icquid ictiadquido icquin yuan aton icbo nashunacimboen mimbi utsibo nashuntsiac. ²⁸ Adembidi Nuquin Papan matsesmiaid icquin matses nashunquid nebi. Ancainquo icquin matses tantiaquin Nuquin Papa icsaquidobi cuidmenquo icnuec ëbided ciudadec unësendabi —quequin Esusën abêd icquido chuipondash.

Bêshuaid daëd Esusën bêdamiaid

(Mad 10.46-52; Duc 18.35-43)

²⁹ Adashic yuecquido ictanec shubu dadpen icquid Edico caid yacno tabadash auêshquiobi Esus nidpondash. Adsho isanec nidquin matses dadpenshun Esus tsibanampondash. ³⁰ Adnubien aid podqued cuëman bêshuaid dada daëd tsadpondash. —Esus cuenec —quesho tantiashien aid daëdi comapenec cuêdpondash. —Tsusedpa Dabidën tsyuecquid Nuquin Papan namiaidquido icquin ëbi bêdamboen ista, Icbo —quepondash Esus caic.

³¹ Adsho tantiashun matses dadpenshun chushcapondash. —Padi. Chën. Adec cuêdec chieshanquieci mibi iqueque —caquien abi niacbidanec buêdanquieci cuêdpondash. —Tsusedpa Dabidën tsyuecquid Nuquin Papan namiaidquido icquin ëbi bêdamboen ista, Icbo —queopondash.

³² Adoquien Esusën nidtuidshun êcbedpondash. —¿Atotsi chuinec ne? —caquien: ³³ —Isbente bunquiebi, Icbo —quepondash. ³⁴ Adsho tantiash: —Unësquido iquec —quetanquin Esusën bêshuaid daëdi bêmishpondash. Adoac abi daëdi bêdampondash. Bêdanshun aidëntsen Esus tsibanampondash bêshuacboedëmbi.

Edusaden yacnoshon chuiquid dapabimboecnuc Esus bêdamboen isaid

Edusaden yacnoshon chuiquid dapabimboecnuc Esus bêdamboen isaid

(Mad 11.1-11; Duc 19.28-40; Uan 12.12-19)

21 Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daêdpactsëcquid Bedpaque caid yacno Esus nidpondash. Adshumbic anoentsëqui choshon abêd icquido daëd chuipondash. ² —Nëid podquedën nidquin shubu daêdpactsëc yacno nidshun cabayobitsecquid aton

bacuë caniatsebëdta mimbi badedquio istuidendac. Istuidshun tènëshaid tëdiadsho tëchicta. ³Mimbi tëchicsho isquidën: —¿Atotsi acnun nai? —cac: —Nuquin Ico: “Bedtan, quiosh,” mimbi cac: “Ai, buantan,” quendac —quequin Esusën chuipondash. ⁴Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

⁵“Shubu dadpen icquid Sion caidën tabadquido chui. Edusaden cain Sion capec. ‘Is. Mibi chuiquid dapa cabayobitsecquidën bacuë caniatsec catsadtoash choeque.

Ancanenquio yec bédamboshë icquidquio neque. Is, quequin chui,” quequin dada uapampic. ⁶Aden dada uampicpadomboen ambi: —Bedtan —caidon bedtampondash.

⁷Adotanquin cabayobitsecquid anibëdta caniatsec bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatseqüen Esus catsadtopondash.

⁸Adanec nidsho istanquin matses dadpenshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —queshun. ⁹Matses dadpen bëyuc nidnubi aidedbidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid Nuquin Papan namiaid yec mibi bédamboshë iquec.

Nuquin Papan chomiaid yec mibi bédamboshë iquec.

Mibi chomequid Nuquin Papatsen bédamboshë iquec. Adeduya,”

quec cuëdëncuededpondash.

¹⁰Adec Edusaden yacno matses dadpenquio cuëdëniddec nidsho isashien Edusaden yacnocquido: —¿Tsuetsi tantiec cuëdëncuededpec? —quepondash. ¹¹Adsho tantiashun Esusbëd nidquido: —Esusquio tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquio chuiquid Esus tantiec nec —quepondash.

Esusën chushcaquin cuemiaid

(*Mad 11.15-19; Duc 19.45-48; Uan 2.13-22*)

¹²Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquio puduedenquio yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bédamboen isnu,” queshun picicametsiash —quequin aton nëish yua menequin piucquid dadpenquio bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. ¹³—¿Adenda mimbi Nuquin Papan chiaid bédamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,”

quequin Nuquin Papan chiacpadomboen aton shubun puduedshun aid chianeti-adquidi mimbi adoenuio iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴ Adnubien Nuquin Papa tabadte shubu uashunaid yacno bëshuaid yec daicsaid yec quenuc bë-bëpondash. Aden bë-bëshobien Esusën bédamepondash.

¹⁵ Adsho isashien Esus chieshënquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bédamboshë iquec —quec Esus caic cuëdëncuededsho tantiasch nëishquiopondash. ¹⁶ Adshumbic: —Icsambo iquec —qeshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuipampic.

“Nuquin Papan oncamiac bacuëmpin aton bacuë utsibëdtan:

‘Nuquin Papa bédambo iquec,’ caindac.”

quequin chuipampic —quepondash Esus. ¹⁷ Adanec nidec shubu dadpen icquid Betania yacno nidash ushtuidpondash.

Esusën cuëte unës uaid

(Mad 11.12-14, 20-26)

¹⁸ Badiadnubi ënden aubidi nidoaic Edusaden yacnobidi nidoapondash. Piabi nidec bundoshon ¹⁹ podqued cuëman nidquid cuëtempi icueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibëdec. Podouidquio icpec. Adsho isumbien Esusën: —Adequi bacuëesambo yec unësta —capondash. Adoac badedquio unëspondash.

²⁰ Adosho isun abëd icquidon: —¿Atotsi quiash badedquio unësposh? —caquien ²¹ Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquio icquin: “Nuquin Papan ambi chiacpadomboen naquidquio nec,” qeshun mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiasch. Aden tantiaquin mimbi nëid macuësh cain: “Mananuc tabadboedi adqueicbidi acte nantan tabadoata,” mimbi cac nëid macuësh acte nantan tabadoatsiasch. ²² “Ambi chiacpadomboen naquidquio Nuquin Papa nec,” qeshun mimbi aid chianiac mimbi chiaid Nuquin Papan mibi nashuntsiasch —quequin Esusën abëd icquido chuipondash.

¿Tsuntsin: Naic nid, cac nai? quequin Esus chuimiaid

(Mad 11.27-33; Duc 20.1-8)

²³ Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiaschun con matses tsusiobon Esus chieshënquidon chuituidpondash. —¿Tsuntsin: “Naic nid,” cac nai? En chui. Tantianu —caquien ²⁴ Esusën: —En mimbia chui. Ëmbia tantianu. Mimbi chuisho tantiaschun ëbi namequidtsen chuinu. ²⁵ ¿Tsuntsin namiac Uan padon acten mentopadenec? ¿Ambembida napedenec? —capondash Esusën. Adoquien badedquio chienquio yec uanotantsec tabadec onquecuededpondash Esus chieshënquido. —¿Atotsi nuqui chuipeba? “Nuquin Papan namiaidquio Uan pado nepadenec,” cac Esusën: “¿Atotsieshun aidën chiacpadomboen nainquio iquec?” canushe. Aden chienquien ictiad. ²⁶ Nuqui: “Ambembi napondash,” qesho tantiaschun nëmbo icquidon nëishënushe: “Nuquin Papan namiaid Uan pado niondash,” qeshun. Aden chienquien ictiad —quepac caondash

Esus chieshënquido. Isadaidbo tsusiobobëdi nëish abided unës uaquido chuiquid dapabo adpac caondash. ²⁷ Adashien Esus padpiden chuiuoic: —Tsaudi. ¿Tsundan chiquien nachitondash? —queshobien: —Mimbi chienquio icsho tantiashun ëmbitsen ëbi namequid chienquio iquembi —capondash Esusën abi chieshënquido cuidquin chuiquin.

Mado daëdshun nacbimboecquido chiaid

²⁸ Adshumbic Esusën padpiden chuipondash. —Tantia. Mibi chuinu. Ëmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac: ²⁹ “Padi,” quec chieshuidboedi yuec-yuecpactsëctanec: “Tiedimbi neshcatanchitec,” quiash neshcaic nidac caondash.

³⁰ Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash. ³¹ ¿Mitsicquidën aton papan chiacpadomboen napac caondash? En chui. Tantianu —caquien Esus chieshënquido: —Abia chiac chieshuidboedën —quesho tantiashumbien Esusën: —Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidac bimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abëd tabadtequido yanendac. Mibien padenquio iquec. ³² Uan pado acten mentoandenedën Nuquin Papan chiaid chuiquin bëdamboec tabadte chuipadenec. Adsho mimbi tantienquio icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ëntiadquidi mimbi ënenquio iccondac. Aton papan chiaid niacquid bimboecquid mibi nec —quepondash Esus abi chieshënquido chiech.

Abi chieshënquido icsaid Esusën chuioid

(Mad 12.1-12; Duc 20.9-19)

³³ Adshumbic Esusën abi chieshënquido ompoac bimboen chuipondash naden. —Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacenmpac caondash. Adoshombic: “Ampequid chosho isnu,” queshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash. ³⁴ Adash yuectaneshumbien abëd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. ³⁵ Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash. ³⁶ Aden cuemiaid choshon chuituidaquien icbon nidboedtedpenquio dadpenquio aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash.

³⁷ Adoacsho tantiash aton madombo caic: “Bedtan,” quepac caondash. “Con mado cuesunenquio icquin ëmbi chetequid menetsiash,” queshun aton madotsen nidmepac caondash ³⁸ Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiashe,” queshun ³⁹ tied tsitsuno buanshun cuesunepac caondash —quequin Esusën chuipondash.

⁴⁰ Adshumbic ambi chuiboedquio abi datsidadquido chuimenuen chuipondash. —Ëmbi chuiboed tantiash ¿atotsi mibi quepatsia? “Min mado cuesuniaccosh,” cac ¿atotsi tied icbon napatsiash? —quesho ⁴¹ tantiash datsidadquido: —Aido icsamboshë icsho comapenen cuidtsiash. Adshumbic ambi chetequid sinacsho abi cud-asënesambo utsibo aton tied neshcametsiash —quecuededpondash datsidadquido.

⁴² Adsho tantiashun Esusën: —Ai, abimbo caic. Adembidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bédambo icquid istuidashi: ‘Nëidquio shubu uanun nitsinembi,’ queti-adquidi isuidacimboen Nuquin Papan namiaid chieshënac.

Aden buintad isuidaid utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh.

Adsho isun: ‘Nuquin Papan namiaid bédambo iquec,’ caimbi,”

quequin dada uapampic. ⁴³ Aden ambi namiaid ëbi chieshënsho isash mibi caic Nuquin Papa nadpec. “Ëmbi con matses caid isadaidbo ëbi bédamboen tantiametiadquidi chuiquid dapabon namenquio icsho isun utsibotsen: ‘Ëbi chuiquid icta,’ caindami,” quepec Nuquin Papa. Aden ambi chiacpadquidën bédamboen chuibanac abi tantiaquido dadpen yanendac. ⁴⁴ Mibien Nuquin Papan cuidtequido nec. Cuëte uebudquin catashac canite uesadec podquëd-podquëdacimboecnuc mibi comapenen cuidendac —quepondash Esus abi chieshënquido chiech.

⁴⁵ Adsho tantiashun padiseyobobëdtan nëish abided unës uaquido chuiquid dapabon: —Nuquien cachitec —quequin tantiabempanëdash. ⁴⁶ Adshumbic Esus cuesunemenuen bedtiadquio icquimbi bedenquio icpanëdash. —Abi datsidadquidon: “Nuquin Papan chiaid chuibanquidquio Esus nec,” qeshun Esus bedsho isun nuqui cuesnushe —qeshun aton matses dacuëdënquin bedenquio icpanëdash.

Cacuidanaid chiaid

(Duc 14.15-24)

22 Adshumbic Esusën padpiden ompoacbimboembidi chuipondash naden. ²—Tantia. Isadaidbon nacpadomboen aton mado chido bednuesho tantiashun amën matses dadpen: “Pec cho,” cauidaid mibi chuinu. ³ Chuiquid dapan aton yuabo chuiquin: “Con icbon madon chido bedequé. Aidbëd cuishonquenuen pec cho,’ quequin ëmbi tantiaidotedi chuitan,” cac yuabon chuitanaqui choenquio icpac caondash.

⁴ Adsho isumbien chuiquid dapan aton yua utsibo chuiquin: “Nëish nua bëchi-choquidquio dadpen codoquiaccoshe. Padpiden chuitan,” cac chuitanoaqui ⁵ choenquibidi icpac caondash. Adec cacuidanquiech abentsëc aton tied nantan nidnubi utsi piucquid bednuequin ambi aton na menebante shubuno nidpac caondash. ⁶ Utsimbic abi: “Pec cho,” cashobi yuabo mëyanquin cuesun secapac caondash.

⁷ Adoshobien chuiquid dapan nëishtanquin shëpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nëdëncapac caondash. ⁸ Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan. ⁹ Ëmbi: ‘Pec cho,’ cacmaidobi chuibenetan. Podquedën nidquin mimbi istuidaidtedi: ‘Pec cho,’ cabenetan,” cac nidshun ¹⁰ ambi istuidaidtedi chuibenetanac matses dadpenquio pec cho-chopac caondash. Icsambo icquidobëdi bédambo

icquido cho-choash chuiquid dapan shubun puduedash pec tabadte quënë dapan tabadcuededpac caondash tsucus-tsucustsēcquoio yec.

¹¹ Adshun chuiquid dapantsen puduedshun isquien dashcute bēdaidquio dasiuid-abi icquid abentsēc tsadtsec. ¹² Adshobien chuiquid dapan: “¿Atotsi quiash dashcute bēdaidquio dasiuidambobi cho, buchi?” caqui ēcbedenquio yec tsadec. ¹³ Adshobien chuiquid dapan: “Chido bedacno isnuec dashcute bēdaidquio dasiuidquid, quepadenec. Mibi icsambo iqueque. Mibi cuidnu,” queshun aton yuabo chiec: “Shēbunshun buanshun icsano netan,” capac caondash. Adoac taneshun netanac mēyadquieq natiac shubiquiopac caondash.

¹⁴ Adembi Nuquin Papan ambi matses bēdamboen iste dadpen tantiamiaquiu utsin-utsinquien tantienquio iquendac. “Abi yacno puduednu,” queuidboedi bēdambo icte bunenquio yec abi tantiatipimbo icsho Nuquin Papan comapenen cuidendac. Utsi daēdpacksēquien Nuquin Papan tantiacpadec abēd tabadtequid iquendac —quequin Esusēn chuipondash.

Chuiquid dapa piucquid menete chiaid

(Mad 12.13-17; Duc 20.20-26)

¹⁵ Adsho tantianec nidash abi chieshēnquido padiseyobo: —Esus icsamboen chuimenuna. Icsamboen chuisho tantiasun bedshun unēs uamechitono —queshun ambi chuibanquin tantiamiaido chuipac caondash. ¹⁶ —Icsamboen chuimetan —caquien chuiquid dapa Edodes caid tantiaquidobēdtan icsamboen chuimenuc chochoshon chuituidpondash. —Bēdamboen chuiquid mibi neque. En ēbi chui. Tiantianu. Muesambo icquin Nuquin Papan chiacpadec bēdamboec tabadte mimbi abimbo chuipoc. Matses dacuēdēnenquio icquin Nuquin Papan chiaidquio mimbi chuipoc. ¹⁷ Adquid icquin ¿atotsi mimbi chuipe? Tiantianu. Chui. Nuquin matses yuaquid chuiquid dapa Sesad caidēn: “Piucquid shocoshēmpi dadpen beccho,” cac nuqui meniac ¿ada bēdambo icpatsiash? —capondash. ¹⁸ Adoquien Esusēn ambe-mbi tantiasun: —Bēdambo icquid damianquieq mibi muambo nec. ¿Atotsieshun ēbi icsamboen chuimetiadquio ique? —quetanquin: ¹⁹ —Chuiquid dapa menetequid piucquid shocoshēmpi beccho —ambi cac ²⁰ bēsho bedshun Esusēn chuipondash. —¿Nē tsutsibimboecnuc dada uaid nē iquec? ¿Tsutsi cuēmēdquidbēdta dada uac? En chui. Tiantianu —caquien: ²¹ —Ma nuqui yuaquid chuiquid dapambo Sesad neyoc —quepondash. Adsho tantiasumbien Esusēn: —Abibimboecnuc dada uaid abi cuēmēdquid dada uaid bedtequid shocosh icnuc Sesadēn na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidēn chiacpadomboen nabanta —quequin Esusēn bēdamboen chuipondash. ²² Adsho tantiasun icsamboen chuimetiadquio icboedi: —Bēdamboen chuipoc —quetanec nidanepondash.

Matses uincuemete chiaid

(Mad 12.18-27; Duc 20.27-40)

²³ Adnubien aid ushēmbi Saduseyobo: —Matses unēsaid uincuenesambo nec —quequidotsen: —Esus icsamboen chuimenu —quec cho-chopondash. ²⁴ —Bēdamboen chuiquidquio mibi neque. Mimbi chuisho tiantianu. ¿Mitsipaden mimbi chuipatsia? Nuquin tsusedpa Moisesēn naden chuiquin dada uapampic. “Aton chido bedash bacuē tishmiabi unēsacsho aton utsin aid chido bedshun: ‘Con buchin bacuēbo nibēdeque. Con buchin madobimboecnuc tishmenu,’ quequin tishmequid,”

quequin Moisesën dada uapampic. ²⁵ Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash ²⁶ bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënnuquien aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash. ²⁷ Adashic bacuë tishambobi aid chidotsen unëspac caondash. ²⁸ Aid abitedi uincuemiatic ¿mitsicquidën chido icpatsiash? —caquien ²⁹ Esusën: —Nuquin Papan chiaidquio tantienquio icquin Nuquin Papan nadatiambo icquin nabanquiu uincuemet mimbi tantienquio iqueque. Chuinu. Tantia.

³⁰ Uincuemiatic dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bëdabobimboec matses uincuemiatio iquendac. Aden uincuemiadën chido bedesa —quepondash Esus. ³¹ Adshumbic padpiden chuipondash. —Ambi unësaid uincuemet chuiquin Nuquin Papan dada uamepampid ¿isbanabida ictio? Ma mimbi aid isbampaboc. ³² Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unëssh aton dada chodquiambic aton tantiate unësambo icnuc abi Nuquin Papa tantiatsiash —quepondash Esus. ³³ Adsho tantiash abi datsidadquido: —¿Mitsipadquid nepec? Bëdamboenshëen chuipec —quepondash.

Moisesën dada uampid chiaid

(Mad 12.28-34)

³⁴ Aden unësaid uincuemet chuisho tantiashumbien Saduseyobon padpiden: —En chui —cainquio icpondash. Adsho isashien Esus chieshënquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec chochopondash. ³⁵ Cho-choquin abentsëcshun Nuquin Papan Moises dada uamiampid tantiaquidquio icquin chuimetuidpondash. ³⁶ —Chuiquidquio mibi neque. En ëbi chui. Tantianu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bëdamboshë iquec,” capatsiash? —caquien ³⁷ Esus: —“Nuquin Papa tantiaquieci ambi chiacpadec tabadte bunquiota,” quequin ³⁸ chiampidba naic Nuquin Papan chiacpadec mibi bëdamboec tabadtsiadac. ³⁹ Adembidi Moisesën chiampid utsitsen naic matses bëdamboec tabadtsiash. “Min dada mibibi datantiadacimboen utsibotsen tantiaquiota,” quequin chiampicpadomboen nasho Nuquin Papan bëdambo catsiash. ⁴⁰ Aden matses bëdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusën bëdamboen chuipondash abi chieshënquido chuiquin.

Nuquin Papan chomiaidquio chiaid

(Mad 12.35-37; Duc 20.41-44)

⁴¹ Adshumbic Esusëtsen abi icsamboen chuimete bunquido Padiseyobo chuipondash. ⁴² —Ëmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesën madouidida nepec? —capondash Esusën abibi cadquimbi.

Adoaquien badedi: —Nuquin tsusedpa yampid Dabidën tsyuecquid icsho Dabidën mado caimbi —quepondash Padiseyobo.

⁴³ Adsho tantiashumbien Esusën: —¿Bëdamboenda chuidio? Mimbi chiacpadquid aton mado icsho ¿atotsieshun Nuquin Papan Mayanën tantiamiacpadomboen Dabidën con Icbo capampic? Naden Dabidën dada uapampic.

⁴⁴ “Nuquin Papan con Icbo naden chiendac.

‘Con abiuc tsadash abitedishun Icbombo icnush nëmbo cho.

Mibi chieshëncquidobi con Icbo mibi camenu,’ quequin Nuquin Papan con Icbo chiendac.”

quequin Dabidën dada uapampic. ⁴⁵ Con mado cainquio icquin con Icbo capampic Dabidën. ¿Atotsieshun mimbi: “Dabidën mado nec,” quequin tantiapè? —caquien

⁴⁶ ëcbedenquio yec otacquio tabadpondash. Esusën bëdamboen chuisho tantiash: —Icsamboen chienquien icchitec. Èmbi padpiden: “Icsamboen chuimenu,” cac bëdamboembidi chuioatsiash —qeshun abi chieshëncquido abitedishun Esus padpiden chuimenquio icquin ënaccondash.

Bëdambo icquid damianquido tanenda, quiaid

(Mad 12.38-39; Duc 11.43, 46; 20.46)

23 Adshumbic Esusën abëd icquidobëdta abi datsidadquido tantiamequin chuipondash. ²—Tantia. Moisesën dada uampid chuibanquidobëditan tsusedpabon chiampid namequido Padiseyobon naid mibi chuinu. Aidon: “Moisesën chiampicpadomboen nata,” quequin nuquin matses isadaidbo chuidenepec. ³ Aden Moisesën dada uampid abimbo chiac adenuidi mimbi nac bëdambo ictsias. Aden naquin padiseyobon nacpadomboen nainda. Aidon Moisesën chiampid chuiquimbi ambibi aidën chiaid niac-niaquec. ⁴ Chieshëmëncquido nec. Nuquin Papan chiaid nametiadquidëmbi tsusedpabon ambembi chiaid dadpenquio namepec chushcanquin. “Matsesën aitedi natiapimbo iquec. Padi icnuna. Nuquin matsesën chiampidtedi nainda,” catiadquidi adoenquio iquec.

⁵ Aden padiseyobon Nuquin Papa tantiaquidquido damequin matses ismenuenuidi naic. Nuquin Papan chiaid dada uaidëmpi sauedtsash bëdectamëdec abiuc daëdi pëdectamëdec qeshun matses ismenuenuidi naic. Adembidi aton dashcute tëdiadte nacnenuequin: “Nuquin Papa chianequidquido nec,’ ma ëbi canu,” qeshun sedquid shoyonaid ënapenpactsëcnuic cuididicash matses ismenuec matses tabadacno capucenepec. Adec Nuquin Papa chianequid damianquiec. ⁶ “Chuiquid dapa nec,” cameteuidi bunec. Isedec puduedash: “Chuiquid dapa icsho icbon abëdi tsadmequid,” quish icbobëdi tsadte bunquiec. Nuquin Papan chiaid chuibante shubun puduedash: “Tsusio dapambo nec,” camenuc utsibobëd tabadenquio yec tsusibobëduidi tabadquid nec. ⁷ “Chuiquidquido yec mibi bëdambo iquec,” camete bunquiec matses dadpen tabadacno nidtenepec.

⁸ Mibitsen adenda. Utsibo: “Mibiuidtsëqui bëdambo iquec, Icbo,” camenuc adenda. Min Icbo abentsëcquiobi ëbi iquec. Èbi abentsëqui con Icbo cata. Con uyabo yec con utsibo mibi neque. Bëdamboec isnanta. ⁹ Adembidi mibi chuibanquid chuiquimbi: “Mibiuidtsëqui bëdambo iquec, Papa,” cainda. Nuquin Papauidtsëqui aden chuita. ¹⁰ Adembidi: “Chuiquid dapa yec mibiuidtsëqui bëdambo iquec,” utsibo camenuenuidi nainda. Èbiuidtsëqui mibi chuiquid dapa nec. Nuquin Papa yacnuëshquio choquid ëbipadquidquido utsi nibëdec.

¹¹ Padnuen ambi chiacpadomboen utsibo nashunquidquio utsibo dēniacte bunenquio icquid Nuquin Papan bēdambohē catsiash. ¹² Utsien abibi cadequi: “Ēbiuidt-sēqui bēdambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenquio icsho Nuquin Papan bēdambo caindac — quepondash Esus abi datsidadaido chiec.

Abi chieshēnquido Esusēn chushcaid

(Mad 12.40; Duc 11.39-45, 52; 20.47)

¹³ Adshumbic abi chieshēnquidotsen chuipondash. —Tantia. Moisesēn chiampid chuibanquidobēdta Padiseyobo mibi chuinu. Nuquin Papan cuidtequidombo mibi nec. Bēdambo icquid damianquieci mibi icsambo iquec. Nuquin matses: “Nuquin Papabēd tabadte tantianu,” qeshobi mimbi bēdamboen chienquio iquec. Ēmbi Nuquin Papabēd tabadte bēdamboen chuisho mimbi tantienquio iquec. Aden tantienquio icquin: “Aidēn chiaid tantienda,” quequin mimbi utsibotsen Nuquin Papabēd tabadte tantiametiapimbo iquec.

¹⁴ Nuquin Papan cuidtequido mibi nec. Muaquin unēsboedēn niantē piucquid bedshunquido mibi nec. Nuquin Papa tantiaquidquio damenuen utsibo tantiamequinuidi buēdpambo cuēdquin Nuquin Papa chiacbimboen mimbi chianepec. Aid abimbo mimbi chienquio iquec. Adec chieshanquiecscho isun Nuquin Papan mibi comapenen cuidendac.

¹⁵ Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquio yanash Satanasēn yuambo yanec Nuquin Papan cuidtequidombo iquendac.

¹⁶ Nuquin Papan cuidtequido mibi nec. Isadaidbo chuiquid icquin bēdamboen tantiamenquien mimbi icchitec. “Nuquin Papa utsi uatiapimbo yacpaden abimbo caimbi,’ quequid muaisa nec. Muaquidēn Nuquin Papan chiaid niacquid,” quetiadquidi mibi adenquio iccoc. “Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquio iccoc. Padenquio yec: “Nuquin Papa tabadte shubu uashunaid dapan icquid shocosh piu nacnenaidquio utsi uatiapimbo yacpaden abimbo chiombi,’ quequid muesa nec,” quechitequien mibi iquec. ¹⁷ Aden tantienquio icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bēdapenquioda icpec? “Aid bēdambohē icnubi aid nuntan icquid bēdiactsēc bēdambo iquec,” caimbi. Mimbien icsamboen tantiec. ¹⁸ Nadentsen mimbi icsamboen chiec. “Nuquin Papa tabadte shubu uashunaid dapa yacnoshon: Mabi Nuquin Papan bēdamboen isnu, quequin nēish pichicate nacnenaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquio iccoc. “Nuquin Papa mabi bēdamboen isnuequin pichicatequid nēish utsi uatiapimbo yacpaden abimbo caimbi,’ quequid muesa nec,” mibi quepec. ¹⁹ ¿Adenda mimbi bēdamboen chuipe? Pashuacimboen mimbi bēdamboen tantienquio iquec. ¿Mitsicquid bēdambo iquec? “Mabi Nuquin Papan bēdamboen isnu,” quequin nēish pichicate nacnenaid dapa bēdambo icnuc aidēn pichicatequidi nēishquio bēdapabi icsec. Nuquin Papamboen bēdambohē iquec. ²⁰ Nēish pichicate nacnenaid caic: “Aid utsi uatiapimbo yacpaden abimbo caimbi,” quequin aid nantequid nēish abitedi

chiaidbidi nec. Adembidi ambi: “Mabi bēdamboen isnu,” caid Nuquin Papatsen chuipec. ²¹ Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiec. ²² Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidēn chiaidquio tantiec: “Abimbo cacbimboen chuiquid icsaquid nec,” que-tiadquidi mibi adenquio iccoc.

²³ Bēdambo icquid damianquid yec Nuquin Papan cuidtequido mibi nec. Nuquin Papan chiaid abentsēqui tantiatsēcquin min tiedēn canitsēcquid musuquēmpi bedshun Nuquin Papa mimbi menepec. Aden menequid icquimbi mimbi Nuquin Papan chiaid utsi dadpen niac-niacpec. Chieshēmianquid icboedi: “Ēbi bēdamboen ista,” qesho bēdamboen istiapimbo mibi iquec. Adembidi bēdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquio iquec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma mimbi nainquio icpaboc. ²⁴ Tantesa uatsēcquimbi mimbi utsibo icsamboen chiec. Manuampi nibedbantsēcquimbi utsi nuacquid nibedquiabi abi nēsamēdpanumbobi acacbimboembien mimbi nachitec. “Nuquin Papa meneta,” quequin chiaiduidtsēqui natsēcshun adenuidtsēqui mimbi utsibo namepec. Adenuidtsēqui namequimbi Nuquin Papan chiaid utsien mimbi niac-niacchitec.

²⁵ Nuquin Papan cuidtequido mibi nec. Padiseyobo yec Moisesēn dada uapampid chuibanquido yec quequimbi mimbi icsamboen naic. Pada-padaidbēdta dēshote chieshquin cachocuidtsēqui dapanshun anauc ampanambo icquidi ampanaid damianacimboc mibi bēdamboec tabadquid damianquiec. Nuquin Papan chiaid dadpen nainquio icquin mitsanauidi bednuen mibi bunaiduidi mimbi napec. ²⁶ Pamumēdacimboc tantiatiapimbo mibi iquec. Dēshote abichobi bēdamboen ampanacimboc icsaid ucudash bēdambo icta. Adec icsainquio yec ēnēdash Nuquin Papan chiacpadec mibi bēdamboec tabadtsiac.

²⁷ Bēdamboec tabadquido mimbi damesho isun Nuquin Papan mibi cuidendac. Unēsaid chococacno bēdamboen nacenac bēdambo isadec ēnden pisenambi. ²⁸ Adembidi bēdamboec tabadquid mimbi damec. Matses ismec bēdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

Padiseyobo chedo cuidte chiaid

(Duc 11.47-51)

²⁹ Nuquin Papan cuidtequidombo mibi nec. Nuquin Papan oncamiaidobēdta bēdamboec tabadquido nuquin tsusedpabon unēs uampido tantiaquin aido chococampicno shubu uaquin mimbi nacnempec. ³⁰ Adoshombic: “Nēmbo con tsusedpabon chieshēnquin unēs uampid chococac. Aidbēd tabadquin ěmbi unēs uainquio ictsenēdac. Ěmbien bēdamboen itsenēdac,” qeshun mimbi aido chococacno nacnempec. ³¹ Adoboedēmbi nuquin tsusedpabon bēdambo icquid unēs uampicpadomboen adoante bunquin mimbitsen chieshtoshon adoaindac. ³² Ai, nuquin tsusedpabon Nuquin Papan oncamiaupid unēs uacpadombota —quepondash Esus abi unēs uate chiec.

³³ Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nësecaquin mibi cuidendac. ³⁴ Icsaido icsho isun: “Ma Nuquin Papan bēdamboen iste tantiamenu,” qeshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno chochoacsho mimbi dadpen unēs uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquin mimbi cuemetanendac. ³⁵ Adosho isun Nuquin Papan mibi cuidendac. Nuquin Papan chiacpadece bēdamboec tabadsho tsusedpan chieshēnquin tauamboen cuesuniampid Abed nepampic. Adoshombic adecbidi bēdamboec tabadsho tsusedpa utsibon utsi-utsien unēs uapampic. Adoshombic ēnquin Bedequias caidēn mado Sacadias caid unēs uapampic. Aidi Nuquin Papa tabadte shubu uashunaid dayunshunquio cuesunepampic. Aidedi unēs uampido tantiaquin aido unēs uaquido cuidac bimboen Nuquin Papan mibitsen cuidquiendac. ³⁶ “Yuecshun min tsyuecquido cuidendac,” quec nenquio iquebi. Nēbi caimbi —capondash Esusēn abi chieshēnquido chuiquin.

Edusaden yacnoquido Esusēn shubi uaid

(Duc 13.34-35)

³⁷ Adshombic Esusēn chuiopondash. —Tantia, Edusaden yacnoquido. Mibitsen chuinu. Mibi tantiac unēsquio iquec. Mibi yacnobidi tabadquin Nuquin Papan oncamiaidon chuisho nuquin tsusedpabon unēs uapampic. Adembidi Nuquin Papan: “Isadaidbo chiec nid,” caido chosho utsi-utsien cuēnoten seshunequiopampic. Adembidi mimbi nēbi naindac. Adquidombo icsho mibi tantiaquiemi. ¿Mitsipadec cachina aton bacuē cudaspec? “Penushe,” quiash aton bacuēmpi nua shocoshon madadec cudasquid. Adecbidi: “Satanasēn yuanushe,” quiash cudasquieci mibi Nuquin Papa bēdamboen ismete tantiametiadquio iccobi. “Tantiamenu,” cac tantiate bunenquio mibi icchitoc. ³⁸ Ēbi nidambic ēbi tantiatiapimbo icsho Nuquin Papan namiac min shububēdtabi mibi nibēdamendac. ³⁹ Nēbi mimbi ēbi isenquio yanendac. Padnuen min matsesēn yuecash chosho ēbi isendac. Aden isash: “Nuquin Papa yacnuēsh choquid bēdambo iquec,” min matses quendac —quequin Edusaden yacnoquido Esusēn chuiopondash.

Nuquin Papa tabadte shubu uashunaid nibēdante chiaid

(Mad 13.1-2; Duc 21.5-6)

24 Adash Nuquin Papa tabadte shubu uashunaid daquēnē uacno tabadanec nidēqui Esusbēd icquido Nuquin Papa tabadte shubu uashunaid caic: —En is, Icbo. Nēid shubu bēdamboen nacnenaidquio neque —quepondash. ² Adsho tantiaashun Esusēn: —Mimbi isboedquio cuēnote bēdamboen nacnenaid matses utsibon cuēnote chic-chiquendac nibēdquiecnuc —capondash.

Nuquin Papan cuidte ushē chiaid

(Mad 13.3-13; Duc 21.7-19)

³ Adanec nidequi macuēsh dapa Odibos caidēn pudundoec poctsebi tabadtuidshun abēd icquidon utsibo tantiamenquio icquin Esus chuipondash. —En mibi chote chui. Tantanu. “Nēbi choec,” quequin mibi chote ¿mitsipadembimbi tantiape? Adecbidi ¿atotsi isashini: “Nuquin Papan cuidte nēbi nec,” quepe? —capondash

abëd icquidon. ⁴Adoaquien Esusën naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda. ⁵Adquido choshon: “Nuquin Papan chomiaidquio Quidistu caid nebi,” quequin muaquin chiaqui dadpeshun: “Ai, abimboen mimbi caic,” capendac.

⁶Ëbi choabi icnuc: “Matses dadpenquio cuesnan-cuesnanac caosh,” quecuedendac. Adsho tantiash dacuëndenda. Nuquin Papan matses abitedi cuidte ushë choabi icnuc ambi tantiapadec matses adonanendac. ⁷Adec matses utsi dadpen icquido matses utsibobëd cuesnanendac. Nidaid utsi-utsiec yacno pete nibëdquieic icted-ictedendac. Nidaid utsi-utsiec yacno nidaidquiobi comapenec uëdëquedenendac. ⁸Adsho isash chido bacuë nëncuenacsho isun: “Nëbien tishchitec,” quequin tantiabimboen tantiata. “Nuquin Papan abitedi cuidte nëbi nec,” quequin tantiata — quepondash Esus.

⁹Adashic abi onquec: —Ëmbi chiacpadquio icnuc chieshëmëncquidon ëbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun ëbi tantiaquido chieshënquiendac. ¹⁰Adoac ëbi tantiatsëcboedëmbi chieshtoshon ëbi tantienquio yanendac. Aidëmbi ëbi tantiaquid ompodacsho istuidmeshun mëyamendac. Adashic abipadquid utsibobëd chieshënanendac.

¹¹Padnuen muaquido: “Nuquin Papan chuiboedquio chuinu. Tantia,” quependac dadpen. Adsho tantiashun dadpeshun: “Ai, abimboen mimbi chiec,” caindac. ¹²Matses dadpenquio icsamboecshë tabadsho isun ëbi tantiatsëcboedëmbi ëbi tantienquio yanendac. ¹³Padnuembi ëbi choabi icshobi ënenquio icquin ëbi tantiaquido Nuquin Papa yacno tabadmendac.

¹⁴Ëbi choabi icnuc: “Ma matses abitedishun Nuquin Papabëd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

Matses icsamboshë icquid chote chiaid

(Mad 13.14-20; Duc 21.20-24; 17.22-24)

¹⁵Adashic abi onquec: —Ëbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiacpadomboenuidi nata,” quequin Nuquin Papa chieshënquin chiendac. Ëndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquio nec. ¹⁶Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuësh dapa yacno ompodec cuenac bëdambo ictsias.

¹⁷Adec cuenec shubu dayun icquido puduedenquio yec: “Con na bednu,” quenquio yec umanucuëshi cuenac bëdambo ictsias. ¹⁸Adecbidi badedquio cuenuen tied nantan icquidon aton dashcute utsi aton shubuno beduanenquio yac bëdambo ictsias. ¹⁹Nidequi bacuë usunquid yec bacuë chishmequid yec quec badedquio cuentiapimbo yec mëyadquiendac. ²⁰Adec cuente tantiec: “Ue sequenumbo cuemenquio icpashuni,” queta. “Pete bedmianenquio icnushe,” quiash “Chonoadenquio icte ushënquio cuemenquio icpashuni,” queoata. ²¹Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquio natiambo chieshëmëncquieic tabadendac. Nuquin Papan tauamboen matses

uac adec tabadenquoio ictenec. Nēbi adec tabadenquoio iquec. Aido icsamboecshē tabadquido nibēdanambic utsibo adquidpenquoio yanoaindac. ²² Adec icsamboecshē tabadte tantiaquin Nuquin Papan: “Ĕmbi Esus tantiaquid icmiaido uesquin cuesun sianushe. Matses abitedi nibēdanushe,” qeshun yuenquoio icsamboen tabadmenquoio icquin ěnēdmendac —quepondash Esus.

²³ Nuquin Papan aden ěnēdmiabi yac icsamboecshē tabadec utsibo: “Is. Nēid Nuquin Papan chomiaidquio Quidistu neque,” quependac. Utsibic: “Is. Nēidquien Nuquin Papan chomiaidquio Quidistu caid neque,” quequin icsamboen chuiuoaindac. Adsho tantiaquin: “Nuquin Icbo Esus choashien nec,” cainda.

²⁴ Adec muaquidoba choendac. “Nuquin Papan chomiaidquio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiaid nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ěbi tantiaquidontsen: “Ai, abimbo caic,” catsempendac. Nuquin Papan bēdamboen tantiamiaido yec adtiapimbo iquendac. ²⁵ “Chieshēmēnquido iquendac,” quequin tantienquoio icquidēn ěbi tantienquoio yanushe,” qeshun: “Aden ěbi tantiaquido chieshēnquiendac,” quequin chiombi —quepondash Esus.

²⁶ Adashic padpidec onquec: —Ĕmbi aden chuiboed tantiaquin utsibo muasho tantienda. Ĕbi caic: “Utsibo ismenquoio yec matses nibēdacno choac caoshe. Isnu. Nid,” cac istanenda. Adembidi: “Choash nēid shubun puduedac caoshe. Isnu. Nid,” cac adembidi istanenda. Muambo neque. ²⁷ Ĕbimbo padpidec choquimbimbi abitedimbo ismendac. Abu ushēmbō yec bed-bedquetanesho ĵada matsesēn abitedishunquoio isenquoio icpadic? Ai, isec. Adembidi ěbi choasho matses abitedishunquoio isendac. ²⁸ Adec choendabi. ĵAda edeste pisen chec budenquoio icpadic? Ai, budec. Adecbidi Nuquin Papan cuidte ushē chonoc choendabi —quepondash Esus.

Abi chote Esusēn chiaid

(Mad 13.24-37; Duc 21.25-33)

²⁹ Adashic padpiden chiec: —Aden matses icsamboshē icquidon ěbi tantiaquido natiamenubi ushē chēnquenquoio yanendac. Inchēshēn ushētsen chēnquenquoio yanendac. Uispa chedo paēdbudnendac. Uispabimboecquid abitedimbo uēdēquendac. ³⁰ Adnubini abitedishun Icbo yec dacuēdampambo yec abucūēsh choendac. Ĕbi nadatiambo icquin nabanquidquio yec chosho isash cuidadtequido abitedimbo dacuēdec natiaic shubiquiendac. ³¹ Adnuc nua shoncanubimbi Nuquin Papan abi yacnoshon uaido mayan bēdabo: “Bedtan,” caindac. Adoac nidaid utsi-utsiec yacno nidshun ěbi tantiaquido abitedimbo bedtanendac.

³² Ĕmbi chuibocpadquiec yansho isun: “Esus chote nēbi nec,” quequin tantiata. ĵMitsipaden: “Seta taēec,” quequin tantiapec? Suc seccuduquiaid isun: “Nēbi seta taēec,” quequin tantiaquid. ³³ Adembidi ěmbi chuiboed isun: “Nēbimbobi Esus choec,” quequin tantiata. ³⁴ ĵMuectabi nedi? Ĕmbi chuibocpadquio iquendac. Ĕmbi chiacpadec yanabi matses abitedi nibēdantiapimbo iquendac. ³⁵ Abimbo caimbi. Abu nibēdanendac. Nidaidsen nibēdanendac. Padnuen ěmbi chuiboedquio nibēdantiapimbo iquendac. Bēnudenquoio iquendac. Ucuttiapimbo iquendac. Ĕmbi chuibocpadquio iquendac —quepondash Esus abēd icquido chiec.

Esus chote ushë tantienquo icte chiaid

(Mad 13.32-33; Duc 17.26-35)

³⁶ Adashic abi onquec Esus: —Ëbi chote tantienquo iquemi. “Aid ushënquo choendabi,” quetiapimbo iquebi. Adembidi mayan bédabon tantienquo iquec. Ëmbibi Nuquin Papan Madonquiobi tantienquo iquemi. Nuquin Papanuidtsëquien tantiec. ³⁷ Matses ëbi caic: “Nëbi choec,” quetiapimbo icnuc choendabi. Noen cano nacnenubi ¿mitsipaden aton matses icsambo icquidon tantiapampic? ³⁸ Nidaid abichobi mauanabi icnuc: “Nuquin Papan nuqui cuidendac,” quequin tantienquo icquin peshun acquin aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash puduedpampic. ³⁹ Aton matses: “Nëbimbobini Nuquin Papan cuidchitec,” quenquo icnubi ue dapambo choec mauanquidën matses abitedimbo unësbudnepampic Noe ambi cano anshubu uaidën nuadtonobi. Adecbidi Nuquin Papan cuidtequido ëbi caic: “Choec,” quenquo icnubini choendac.

⁴⁰ Choquin Nuquin Papa yacno tabadmenuen beduamendambi. Ëmbi: “Bedtan,” cac tied nantan dada daëd icsho istuidshun ëbi tantiaquid abentsëc icsho beduanendac. Utsibic ëbi tantiesa icsho nianendac. ⁴¹ Adembidi Nuquin Papa yacno tabadmenuen chido daëdshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesa icsho nianendac.

⁴² Aden ëmbi chuiboed tantiashun: “¿Nëbida con Icbo chopeba?” quequin ënenquo icquin tantiata. Ëbi chote mimbi tantienquo iquec. ⁴³ ¿“Nëbi ampequidën ampec,” quequina tantiapadic? Padenquo. Tantiaquidënquien aid ushënquo aton na bédamboen isquin ampemenquo icsiash. Aden tantienquo icquin: “Ampesho isnu,” quequin ënenquo icquin isquid. ⁴⁴ Adembidi ëbi chote ushë mimbi tantienquo ye. ¿“Nëbida nuquin Icbo chopeba?” quec Nuquin Papabëd tabadte bunec bédamboec tabadta. Matses dadpen: “Nëbien chochitec,” quenquo icnubini choendac —quepondash Esus abëd icquido chiec.

Esus bédamboen cainte chiaid

(Duc 12.41-48)

⁴⁵ Adshumbic abi bédamboen cainte Esusën chuipondash. —Tantia. Aton icbo tantiaquin yua bédambo icquidën naid mibi chuinu. Icbon: “Ëbi nidan mibëdta yuaido pete sandoaid musuchshun ëmbi chiacpadën ëmbi chiacpadënquien menianeta,” cac yua bédambo icquidën adotsiash. ⁴⁶ Adnubien icbon choshon ambi chiacpadomboen yuan nasho isun bédamboen istsiash. ⁴⁷ Adshumbic aton yua chuitsiash. “Bédamboen tantiaquid mibi neque. Con yua utsibo namequin con natedi dayun uata,” catsiash icbon yua bédambo icquid caquin. ⁴⁸ Padnuen yua icsambo icquid: “Ëndenquimbo con icbo nidondash. Choenquien icchitec. Con nauidi nanu,” ⁴⁹ quiampatsiash. Adshumbic chieshtoshon abëdta yuaido cuesanetsiash. Adashic icsambo icquidobëdi icsamboec tabadtsiash. ⁵⁰ Adec: “¿Nëbida con icbo chopeba?” quenquo icnubien aton icbo chotsiash. ⁵¹ Choshon ambi chiacpadomboen nainquo icsho istuidshumbic: “Icsambo iquec,” queshun comapenen cuesquin cuesunetsiash. Adembidi Nuquin Papan icsambo icquido cuidendac. Bédambo icquid damianquido cuidacno icsamboshë yacno nidmendac. Adoac natiaic shubiquiendac —quequin abi bédamboen cainte Esusën chuipondash.

Chido 10tedshun cainaid

chiaid

25 Adshumbic Esusën ompoacbimboen chuiquin abi chote ushë tantienquo icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton mat-sesën bëquedtanquid. Bëquedtanec choec shubun puduedash cuishonquec aibdëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icbo-icboen buanuen sanambededpac caondash. ²Aid chido 5tedi tantienquo icquido icnubi 5tedbidi bëdamboen tantiaquido icpac caondash. ³Tantienquo icquidon: “Tabote bëchi naimëdsho cushtonon buanu,” quenquo icquin bëchi uesadbudtsaid taboteuidt-sëqui sananquin caimpac caondash. ⁴Padnuen bëdamboen tantiaquidon naimëdsho cushtonoequin tabotebëdta sedunten cushtoaid bëchi sananquin caimpac caondash. ⁵Aden cainaqui: “Chido bedtanu,” quianec nidboed choenquo icsho isash abitedi ushcastoash ushcuededpac caondash. ⁶Inchësh poctsemboen: “Choeque. Bëquednu. Nid,” cac ⁷isucunshun chidobon tabonoen tabote dëbedpac caondash. Adoshon bëdamboen tantiaquidon ambi bëboed bëchi cushtonobien ⁸icsamboen tantiaquidon: “Bëchi beccho. Con na naimëdeque,” caquien bëchi bëboedën ⁹bëdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchështsiac. Piucquid menequin bëchi cushtoquid baded cushtometan,” capac caondash. ¹⁰Adoac bëchi bedec nidnubien chido bedtanec dada chopac caondash. Chosho bëdamboen tantiaquidon aton tabote taboshon chido bedtanec choquid bëquedampac caondash. Adtanec abëdi choash puduedshun bëtashte puduedtiapimbo icnuc bëdamboen bëtashpac caondash. ¹¹Adnubien bëdamboen tantienquo icquido bëchi bedtanec chopac caondash. Choshon shëcuë bëtashacsho isun: “Shëcuë shëcne, buchi. Èbitsen puduednu,” ¹²caquien chido bedquid: “Padi. Èmbi tantiacmaido mibi nec,” quepac caondash.

¹³Èmbi chuiboed tantiaashun chido icsamboen tantiaquido tanenda. Bëdamboen nabi icsho: “Èmbi tantiacmaid mibi neque. Puduedenda,” aido cacbimboen èmbitsen Nuquin Papa yacno puduedmenquo icquin cacumechitomane. Èbi chote ushë tantiaquenquo icnuc: “¿Nëbida con Icbo chopeba?” quequin èbi bëdamboen tantiec èmbi chiacpadec bëdamboec tabadta —quepondash Esus abëd icquido chiec.

Icbon piucquid daëd uaid chiaid

(Duc 19.11-27)

¹⁴Adshumbic abi tantiaquidon ambi chiacpadomboen nate Esusën ompoacbimboen chuioapondash. Ènapen nidnun aton piucquid dadpen dayun uaquidën aton yuabo: “Èbi piucquid daëd uashunta,” quequin chuipac caondash. ¹⁵“Nëidën bëdamboen tantiaquidquid icquin con piucquid èbi daëd uashuntsiash,” qeshun aton yua piucquid 5tedi meniac caondash. Adshumbic: “Nëidëntsen bëdamboen tantiaquin adembidi con piucquid èbi daëd uashuntsiash,” qeshun utsitsen 2tedi menepac caondash. Adshumbic: “Nëidëntsen bëdiactsëc tantiatsëcquin adembidi èbi con piucquid daëd uashuntsëcshiash,” qeshun utsitsen piucquid abentsëcquiobi menetsac caondash. Adanec nidpac caondash icbo. ¹⁶Adnubien piucquid

5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed udictsëc dëniacquin bedoapac caondash. Sin-coted icboedi 5tedbidi bedoapac caondash 10ted icnuc. ¹⁷ Adembidi piucquid 2ted meneboedën 2bidi daëd uapac caondash 4tedi icnuc. ¹⁸ Padnuen abentsëc meneboedën chieshquin aid daëd uainquo icquin ambi uëdëshcaboed shëcuë anantsëcquin piucquid abentsëqui ompopac caondash.

¹⁹ Yuecquo ictaneshumbien icbon choshon ambi piucquid meniondaido chuituid-pac caondash. “¿Atotsi nao?” cac ²⁰ sincoted meniondaidën: “Is, icbo. Mimbi ëbi meniondaidtedbidi daëd uaombi. Nëbi mitsana 10tedi iquec,” caquien ²¹ icbon: “Ai, con na daëdpectsëc icboedi daëd uaquin mimbi bëdamboen nac. Nëbi ëbëdtan chuiquid dapa icta. Èbëd cuishonquec tabadec cho,” capac caondash. ²² Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien ²³ icbon: “Ai, ëmbi chiacpadomboen mimbi con na daëd uac. Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

²⁴ Adnubien piucquid abentsëcquiobi meniondaidën chieshquidëntsen: “Mimbi ancaidon midtsinaid peteuidi bedquid mibi nec, icbo. Mimbi chiacpadomboen nainquo icsho isash chushcanquidquo mibi nec. ²⁵ Adec dacuëdampambo icquid icsho mibi dacuëdënquin mimbi meniondaid piucquid ompoquin chococaondambi. Në mimbi meniondaiduidtsëqui ictsec,” caquien ²⁶ icbon: “Chieshquiec mibi icsac. Èmbi chiacpadomboen nambo mimbi iquec. Èbi caic: ‘Ancanquid icquin ëbi chushcanushe,’ qeshun ²⁷ nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,” ²⁸ quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëcboed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash. ²⁹ Adembidi naindambi. Èbi tantiaquin ëmbi chiacpadomboen naquid adembidi namequin bëdamboen tantiamendambi. Èbi tantiesabo ëmbi chiaid niacquid bëdamboen tantiamenquo iquendambi. ³⁰ Aid yua icsambo icquid cuidacimboben Nuquin Papan ëbi tantiesabo cuidquiendac. Ambi icsaido cuidquiacno nësecac natiaic shubiquiendac —quepondash Esus abëd icquido chiec.

Matses nashunesa cuidte chiaid

³¹ Adshumbic Esusën padpiden chuipondash. —Nuquin Papan abi yacnoshon uaido mayan bëdabobëd choec: “Abitedishun Icbomboeni nec,” quiaish bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. ³² Adshumbic matses abitedimbo cho-chomequin tsidadmendambi. Adshumbic icbon aton nauidquo tsinacacimboben ëbi tantiaquido naden chiendambi. ³³ “Èbëd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Èbi tantiesabo cuidadtequido mibi neque. Con copioc tabadec cho,” caindambi. ³⁴ Adshumbic ëbi tantiaquido padpiden chuioaindambi. “Èbëdi tabadec cho. Matses uaquin tauabi ëndenquimboshë mibi caic: ‘Aido ëbi tantiaquido icmeshun ëbëdi tabadmendambi,’ quequin Nuquin Papan tantiaidombo yec ëbëdi bëdamboec tabadec cho. ³⁵ Mimbi ëbi nashundenec. Bundoacsho mimbi ëbi pemedenedec. Acte bundoacsho adembidi mimbi ëbi acmedenedec. Mimbi isacmaidquo icsho

mimbi ëbi yuedtenec. ³⁶Con dashcute nibëdsho mimbi ëbi dashcute menedenec. Daicsabudtsash unëstiadtsëcquio icsho ëbi tantiec mibi datsatenec. Quënën nauedacsho mimbi ëbi isuan-isuandenec,” caindambi. ³⁷Adoaquien bëdamboec tabadquido: “Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. ³⁸¿Ëmbi isacmaidquio icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. ³⁹Mibi daicsacsho datsadambo iquebi. Quënën nauedacsho mibi istaniambo iquemb. Mimbi tantiadenquio icnuc chuipec,” ëbi caindac. ⁴⁰Adoac naden chiendambi. “Tantia. Mibi chuinu. Ëmbi chiacpadomboen ëbi tantiaquido utsibo bëdamboen isquin mimbi nashundenec. Aden ëbibi nashunacbimboen mimbi utsibo nashundeneque. Èbëdi tabadec cho,” caindambi.

⁴¹Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobëdta ënenquio icquin cuidacno nid. ⁴²Ëmbi chiacpadomboen ëbi tantiaquido nashunesambo mibi icteneque. Bundoacsho mimbi ëbi pemenquio ictenec. Acte bundoacsho mimbi ëbi acmenquio ictenec. ⁴³Mimbi isacmaid icsho mimbi ëbi cacumedenec. Dashcute nibëdsho mimbi ëbi menenquio ictenec. Daicsacsho isash mibi ëbi datsadenquio ictenec. Quënën nauedacsho mimbi ëbi istanenquio ictenec,” caindambi. ⁴⁴Aden chiaquien: “Tantiadenquio icnuc mimbi chiec. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Ëmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tantiambo iccondambi. Tantiadenquio icnuc mimbi chuipec,” caindabi ëmbi chiacpadomboen naisabon. ⁴⁵Adoac naden chiendambi. “Èbi tantiaquido nashunenquio icquin ëbibi nashunenquio yacbimboen ëmbi chiacpadomboen naisabo mibi neque. Nuquin Papan cuidacno nid,” caindambi. ⁴⁶Adoac icsamboec tabadquido ënenquio icquin cuidacnombo nidnubi bëdamboec tabadquido Nuquin Papa yacno ënëdenquio yec tabadendac —quequin Esusën chuipondash.

Esus bedshun unës uanuequin chiaid

(*Mad 14.1-2; Duc 22.1-2; Uan 11.45-53*)

26 Aden abi chote ënquin chuitanquimbic abi unës uatetsen abëd icquido Esusën chuipondash. ²—Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquio icnu,” qeshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac —quepondash Esus.

³Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash. ⁴Adashic: —Nëbien Esus unës uametiad utsibo ismenquio icquin bedshun. ⁵Nuquin matses obeca pec tabadnuc bedenquien ictiad. “Esus bëdambo icquidi cuesunec,” qeshun obeca penuec cho-choquidon nuqui cuesnushe —quepac caondash.

Chidon Esus machiuinaid

(*Mad 14.3-9; Uan 12.1-8*)

⁶ Adnubien Esus shubu dadpen icquid Betania caid yacno choash ambi daushumbo yec daicsaid bēdamiondaid Simon caidēn shubun puduedpondash. ⁷ Puduedshun pec samēdshobien chidon puduedshun ambi piucquid dadpenquo menequin bedaid tēchumpin icquid bēdambo nuadquid Esus machiuimpondash: —Esus bēdamboshē icquid nec —queshun. ⁸ Adsho isumbien Esusbēd icquidon: —¿Adenda bēdamboen nai? Ma icsambo yoc. ⁹ Utsibo menequin dadpen piucquid bedshun piucquid nibēdquido aid piucquid menetiadquidi mibi nec —quequin chido chushcapondash.

¹⁰ Adsho tantiashumbien Esusēn: —¿Atotsieshun chido chushcai? Ēbi bēdamboen tantiaquin ēbi ismequin bēdamboen nashunebique. Chushcainda. ¹¹ Mimbi chuiboed piucquid nibēdquido ēnēdenquo yec mibēdi tabadendac. Ēbien mibēdi tabadenquo yanendac. ¹² Ēbi unēs uashun chococate tantiacimboen machiuinoshibique. Chushcainda. ¹³ Ēmbi chiaid chuibeniacnoshon nēid chidon ēbi machiuimboed chiendac —quepondash Esus abēd icquido chiec.

Udasēn Esus bedmenun piucquid bedaid

(*Mad 14.10-11; Duc 22.3-6*)

¹⁴ Adnubien Udas Iscadiote caid Esusbēd icboedi Esus chieshēnquido chuiquid dapabo chiec nidpac caondash. ¹⁵ Nidshumbic chuituidpac caondash. —Utsibo ismenquo icquin mibiuidtsēqui Esus bedmenu. ¿Tedtsi piucquid ēbi menetsia? —caquien badedi pudunquin piucquid shocoshēmpi 30ted icnuc tambantanquin menepac caondash: —Baded ēbi bedme —quequin. ¹⁶ Meniac bedanec nidec: —¿Mitsishunquiemi utsibo ismenquo icquin Esus bedmepeba? —quepanēdash Udas. Adashic Esusbēdi tabadoaic chopondash.

Unēs nush abēd icquidobēd Esus pec tabadaid

(*ICod 11.23-26*)

¹⁷ Adnubien Esusbēd icquidon: —Equipito yacnuēsh cuenun pan bidiscamiabi yampid 7tedec ushquin tantiaquin tauaid ushē nēid nec —queshun Esus chuipondash. —Nuquin Papan nuquin tsusedpabo unēs uamenquo icquin matamiampid inchēsh tantiaquin obeca bacuē penuen ¿mitsishunquiemi mibi codocashumpe? —caquien Esusēn: ¹⁸ —Edusaden yacno nidshun ēmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nēbi Nuquin Papan chiacpadomben uesquin nabanembi,’ quiosh. Min shubumbo caic: ‘Aidēn shubun puduedshun Nuquin Papan nampid tantiaquin obeca bacuē pec tabadcuedednu,’ quiosh,” quequin chiec nid ¹⁹ —cac nidquimbi shubu icbo chuituidac caondash. Adoac: —Ai, ma chobono —quesho tantiashumbien abia nidboedon aidēn shubun puduedshun penuen nēish yua obeca codocapaccondash. Adnubien Esus chedo puduedpondash.

²⁰ Inchēshēmbi abēd icquido 12tedbēd samēdquin Esusēn pepondash. ²¹ Pec samēdquin Esusēn chuipondash. —Tantia. Mibi chuinu. Ēbi chieshēnquido ēbi bedmequid abentsēc nēmbobi iquec —quesho tantiashun ²² unēsquo yanshun abentsēcshun abentsēcshunquien Esus chuipondash abēd icquidon. —¿Ēbida cai, Icbo? —quequin abi chuishobien ²³ Esusēn: —Ēbēdtan pete codocaid ēnē punquid ēbi bedmequid nendac. ²⁴ Ēbi Nuquin Papan chiaid dada uamepampicpadquid matsesmiaid

yec unësendabi. Padnuen ëbi bedmequid comapenen cuidtequidquo nec. Anin aid tishenquo icpatecnëdan. Cuidac natiacquendac —quepondash Udas caic.

²⁵ Adoaquien Udasën abi bedmequidënquo: —¿Ëbida cai, Icbo? —caquien: —Ai, mibibimbi caic —capondash. Adoac Udas puduenanec nidpondash.

²⁶ Adshumbic Esusën pete sananquin: —Mimbi pete uaid nëid nec. Mibi bëdambo iquec, Papa —quequin Nuquin Papa chuitanquin cuësh-cuëshbanshun abëd icquido menebampondash. —Nëid cuësh-cuëshquin nibëdamiacbimboen ëbi mëyanquin unës uaindac. Ëbi unës uate tantiaquin nëid peta —cac pebededtsëccondambi.

²⁷ Adshumbien Esusën dëshoten actequid cushtoshon sananquin: —Mimbi uaid nëid nec. Mibi bëdambo iquec, Papa —quequin Nuquin Papa chuishun: —Nëid abitedishun acbeded —cac dëshoten abentsen cushtoaid pictsë-pictsen acbampondambi.

²⁸ Aid actequid acshobien Esusën: —Nuquin Papan chiaid nuquin tsusedpan dada uapampicpadec ëbided cuidadec unësposh. Aton Madoded cuidshun Nuquin Papan ëbi padenquo iquec,” quequin nëid acquin tantiata —capondashi.

²⁹ Adashic: —Nadquid actequid padpiden aquec cuishonquec mibëd tabadenquo iquendabi. Nuquin Papan abitedishun Icbombo icmiac abi yacnombo mibëdi cuis-honquec tabadendabi —quepondash Esus ëbi chedo chiec. ³⁰ Adashic cuëdënten abentsec cuëdënash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

Petedo chieshuidte Esusën chiaid

(Mad 14.26-31; Duc 22.31-34; Uan 13.36-38)

³¹ Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiapadec ëbi nianec mibitedi niquendac. Nuquin Papan naden chuiampic. “Icbo cuesnu,’ canubi aton yuabo niquendac,” quequin Nuquin Papan dada uamepampicpadec mibitedi adec niquendac. ³² Padnueni unësash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi —quepondash Esus abëd icquido chiec.

³³ Adoaquien Petedo: —Mibi cuesnuec cho-chosho isash utsibo dacuëdec niquenuec ëbimboen cuenenquimbo ictsianac —queshobien ³⁴ Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Ëmbi isacmaidquo aidi nec,” mimbi ëbi caindac. Cachina bënë cuëdanabi icnuc 3tedec mibi adendac —caquien ³⁵ Petedo: —Pada. Adtiapimboeni iquec. Chieshëmënquidon: “Esusbëd icquid mibi neque. Mibi cuesunenu,” caqui: “Ëmbi isacmaid neque. Padi,” quenquo iquendabi. Mibëdquobi unëtsianac —Petedo quenubini: —Ai, ëbibic adecbidi ictsiac —quecuededpondabi Esusbëd icquidotedi.

Quetsemani caid yacnoshon Esusën Nuquin Papa chiaid

(Mad 14.32-42; Duc 22.39-46)

³⁶ Adanec nidequi cuëte dadpen nitsinacno Quetsemani yacno nidpondash. Auëshquo Esus nadpondash. —Ambobi tabadta. Udictsëc nidshun Nuquin Papa chuitanu —quepondash.

³⁷ Adashic Petedobëdta Sebedeyon mado daëd buanec nidpondash. Udictsëc nidequi unësquo yanec shubiantiadtsëcquo yampac caondash. ³⁸ Adshumbic Petedo chiec: —“Matsestedi icsaid ëmbi bedshunsho isun Nuquin Papan ëbi istiapimbo ya-

nendac,” quiash unësquio iquebi. Ëbi yacpadec ushenquio yec nëmbobi isec tabadta —quianec ³⁹ udictsëc nidash nidaidën uebudshun Nuquin Papa chuipac caondash. —¿Ada mimbi ëbi unës uamenquio icpatsia, Papa? Mimbi: “Ai, mibi unës uamenquio iquembi,” cac bëdambo ictsiabi. Mimbi: “Nëbi mibi unës uamenu,” cac mimbi tantiacpadequi unësëndabi —quepac caondash Esus Nuquin Papa chiec.

⁴⁰ Adtanec choshon isquien Petedo chedo ushpec: —Ushenquio yec isequi tabadta —caboqui. —¿Yuec-yuecpactsec ushenquio icquin istiapimboda icco? ⁴¹ “Satanasën icsamenushe,” qeshun ushenquio icquin Nuquin Papa chuita. “Ushenquio iquebi,” queboedobi ushcas mëmunenquio yec mibi ushpec —capac caondash Esusën Petedo chedo chuiquin.

⁴² Adtanec padpidec nidoashun Nuquin Papa chuioaic: —Ëbi unës uametiadquio icquin ëbi unës uameta, Papa. Ëbi unës uametiapimbo icquin mimbi ëbi unës uamenquio ictsiac. Mimbi tantiacpadomboen nata, Papa —quetanec ⁴³ choaquin isquien Petedo chedo ushoaic ushcas mëmuntiapimbo yec.

⁴⁴ Adsho istanec nidoashun ambi chuibocpadomboembidi Esusën Nuquin Papa chuitanepac caondash tedesteden.

⁴⁵ Adtanec choaquin ushash uesho istuidoashun: —¿Ushecta ue? Nëbimbobi ëbi unës uamenuen ëbëd icboedëmbi icsambo icquido ëbi bedmeque. ⁴⁶ Nidnu nid. Is. Ëbi bedmenuec ëbi bedmequid choeque —quepondash Esus Udas chosho isash.

Abi chieshënuquidon Esus bedaid

(*Mad 14.43-50; Duc 22.47-53; Uan 18.2-11*)

⁴⁷ Adnubien Udasën Esusbëd icboedën bedtanac matses dadpen cuesantiadpambo yec chështebëdta cuate sanambededtsëcquieic cho-chopondash. Nëish yua abided unës uaquido chuiquid dapabobëdta con matses tsusiobon: —Bedtan —cac cho-chopondash. ⁴⁸ Ambi bedtanaidobëd cho-choquimbien Udasën: —“Nëid Esus nec,” quequin adoendambi —abi quiacpadembi ⁴⁹ Esus tansudcatuidpondash: —Chobi, Icbo —quequin. ⁵⁰ Adoaquien Esusën: —Ëmbi tantiaboedquio mibi nec. Ëmbi adoboedënquiobi mimbi tantiacpadomboen nata —qeshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

⁵¹ Aden Esus bedshobien abëd icquidën abi tsiusudaïd chështe chictanquin chuiquid dapan yua pateshunepondash. ⁵² Adoshobien Esusën: —Padi. Chën. Min chështe tsiusudoata. Cuesanquid icsho adembidi cuidnushe. ⁵³ ¿Tantienquioda ique? Ëmbi chiac con Pan ambi abi yacnoshon uaido mayan bëdabo dadpenquioshë ëbi cudasmenuen chometsiash. ⁵⁴ Nuquin Papan aden ëbi cudasmiac bedadtiapimbo icsho ¿mitsipaden Nuquin Papan chuiquin dada uamiampicpadomboen ëbi naden bedpatsiash? —capondash pateshunianquid chuiquin.

⁵⁵ Adashic abi bedquido chiec: —¿Atotsi quenuc chështebëdta cuate sanambededtsëcquieic ëbi bednuec cho? ¿Nuqui chuiquid dapan chiaïd niac-niacquin matses cuesanquido chuiquid dapadabi nedi? Mabi mimbi isboedquiobi neyoc. Badiadquidën badiadquidënuquien Nuquin Papa tabadte shubu uashunaid daquënë uaidën puduedshun chuideneshobi ma mimbi ëbi bedenquio icboc. ⁵⁶ Padenuquio icboedombi Nuquin Papan tantiacpadënuquiobi mimbi ëbi bedec. Ëbi bedte chuiquin Nuquin Papan nuquin tsusedpa dada uamiampicpadomboen mimbi ëbi bedec —quequin Esusën chuïnubini niquepondac: —Cuenenquio ictsiabi —queboedi.

Caipas caid yacno Esus buanaid

(*Mad 14.53-65; Duc 22.54-55, 63-71; Uan 18.12-14, 19-24*)

⁵⁷ Adnubien chuiquid dapambo Caipas cuëmëdquid yacno Moisesën dada uampid chuibanquidobëdi tsusio utsibo cho-chopac caondash. Adnubien ambobi Esus bëpac caondash. ⁵⁸ Adnubien Petedo uanoshon isbëec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuec puduedash chuiquid dapan namiaido sondadobëdi tsadtuidpac caondash Petedo.

⁵⁹ Adnubien cho-choboedo tsusio dapabo: —Esus unës uamenuen: “Esus icsasho isombi,” quequin muaquidon chuisho tantianuna —queshun chomiac muaquido dadpenshun: —Esusën icsamboen nasho isombi —quequin chuipac caondash. ⁶⁰ Aden Esusën naid muaquin chuiquin Esus unës uatiadquio icquid chiambo icpac caondash. Adnubien muaquid daëdshun chuituidpac caondash. ⁶¹ —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushquin nainendambi,” ma Esus quepondac —quepac caondash.

⁶² Adshobien chuiquid dapabo chuiquidën Esus chuiquin: —¿Atotsi quenuc ado? ¿Atotsi nëidën chiec? —caquien ⁶³ Esusën ëcbedenquio icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” qeshun abimbo cata. ¿Nuquin Papan chomiaidquio aton Madombobida mibi nepe? —caquien ⁶⁴ Esusën: —Ai, mimbi chiaidquio nebi. Tantia. Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuësh padpidec choec abu ushu yacnuësh choshobini mimbi isendac —quepac caondash Esus.

⁶⁵ Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun ⁶⁶ ¿Atotsi natiadquio ique? —caquien abëdtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

⁶⁷ Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapimbo icnuc Esus dashcuten bëpuctanquin mëdanten bëcues-bëcuespac caondash. ⁶⁸ Bëcues-tanquin: —“Nuquin Papan madombobien nec,” canu. En chui. Tantanu. ¿Tсандan mibi naoshe? —cabededsëcquien mamëshshumpac caondash Esus.

Esus caic: Ëmbi isacmaid nec, quequin Petedon chiaid

(*Mad 14.66-72; Duc 22.56-62; Uan 18.15-18, 25-27*)

⁶⁹ Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbëd ma mibi icpaboc —caquien: ⁷⁰ —Tantiadenquio icnuc mimbi chiec. Ëmbi isacmaidquio mimbi chiec —quec Petedo muaic taëpac caondash.

⁷¹ Adanec daquënë uaidën puduedte shëcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien ⁷² Petedo: —Ma ëmbi isacmaidquio Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³ Adash yuec-yuecpactsëcshumbien ambo tabadquidontsen Petedo chuipac caondash. —Aidbëd icquidien mibi nec. Cadidia yacnocquid onquiacbimboec ma mibi onquepayoc —quesho tantiash ⁷⁴ Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquio neyoc —queoapac caondash.

Adec 3tedec Petedo muanubien cachina bënë cuëdampac caondash. ⁷⁵ Adsho tantiashun Petedon Esusën chuiboedquio tantiactampac caondash. —Cachina bënë cuëdanabi icnuc mimbi ëbi caic: “Ëmbi isacmaid nec,” capendac tedesteden —quequin Esusën chuiboedquio tantiactanec umanuc puduenanec nidec Esus muauabosh naitaic shubinidpac caondash.

Pidato caid yacno

Esus buanaid

(*Mad 15.1; Duc 23.1-2; Uan 18.28-32*)

27 Adnubien chuiquid dapabo aton tsusio utsibobëdi Esus isec ushenquio badiadpondash. Badiadshun Esus chieshënquin: —Nuqui yuaquid ancanquid Esus unës uamec nidnu. Nid —queshun ² podo cataneshun ancanquid Pidato cuëmëdquid ismenuen Esus buampac caondash.

Esus bedmequid Udas têtaniadaid

³ Adnubien Udas Esus bedmeboed: —Unës uamechitembien iquec. Unës uametiapimbo iquebi. Ëmbi bedboed piucquid shocoshëmpi 30ted meneoatanu —quianec abi meneboed tsusiobo menenuec nidpac caondash. ⁴ Nidshun tsusiobo chuituidpac caondash. —Icsachitobi. Unës uanuequido bëdambo icquidi bedmechitombi. Nëid mimbi meneboed mibi menenuec chobi. Në bed —caquien tsusiobo: —Padi. ¿Atot-sieshun nai? Ma mimbi bedmepaboc —quepac caondash Udas caic. ⁵ Adoaquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash têtaniadpac caondash Udas.

⁶ Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatemaïd quedeneque. ⁷ Matsu nacnenquidën tied bedquin nëid menenuna. Nuquin matsespenquio isedquido unësacsho ambo chococanun aid tied bednuna —queshun piucquid meniac caondash. ⁸ Aidon bedacsho isun nëbi aid tied cuënquin nadopec. —Unës uamequidën bedaïd tied nec —capec. ⁹ Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “Aid bednuen Isadaïdbon piucquid shocoshëmpi 30ted meneuidaïd bedoashun ¹⁰ matsu nacnenquidën tied bedquin meneoapondash,” quequin Nuquin Papan chiaïd dada uaombi,” quepampic Edemias.

Pidato caidën Esus chuimiaïd

(*Mad 15.2-5; Duc 23.3-5; Uan 18.33-38*)

¹¹ Adnubien isadaïdbo yuaquid ancanquid Pidaton Esus bëacsho chuipac caondash. —¿Min matses isadaïdbo chuiquid dapamboda mibi nepe? —caquien Esusën: —Ai, aid nebi —capac caondash. ¹² Adnubien abi chieshënquidon muaquin Es-

usën naid Pidato chuipac caondash. Adsho tantiashun Esusën ëcbedenquo icpac caondash.

¹³ Adshobien Pidaton Esus padpiden chuiuoquin: —Mibi icsaid dadpen chuipec. ¿Tantienquioda ique? ¿Ëcbedantiapimboda ique? —caquien ¹⁴ ëcbedenquo icpac caondash Esusën. —Nëidon muauac nebi —quequin chienquo icsho tantiash: —Adquid tantiambo iquemi —quepac caondash Pidato.

Esus unës ua, quequin chiaid

(*Mad 15.6-15; Duc 23.13-25; Uan 18.38–19.16*)

¹⁵ Nuquin Papan isadaidbo unës uainquo icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemedenedec. Pidaton: —¿Tsutsi abentsëquimbi cuemepe? —cac isadaidbon chiacpadquid abentsëc cuemedenedec. ¹⁶ Esus bëabi icnuc uimanëmënquidquo Badabas cuëmëdquid nauedpac caondash.

¹⁷ Adnubien Esus cuidte chuisho tantianuec cho-choash dadpenquo tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash. ¹⁸ —Esus chieshënquidon: “Nuqui padenquo yanuc nuqui dëniaquec Esus chuiquid dapa yanushe,” qeshun Esus bëaccosh. Nëmbo tabadquidon: “Esusquo cueme,” capashuni —quequin tantiaquin aden chuipanëdash Pidaton.

¹⁹ Adashic matses icsaido cuidte chuinec tsadte dapan abucquo tsadtopondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “Aid dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

²⁰ Adnubien Esus chieshënquido tsusiobon ambo tabadquido chuibudpondash. —Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

²¹ Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash. ²² Adoaquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

²³ Adoaquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buëdanquiec cuëdec: —Cuesten dectanquin unës ua —quecuededpondash.

²⁴ Adsho —Padi icnuna —caqui niacbidanquiec adequi unës uate bunquiec cuesantiadpambo yansho isash: —Acte beccho —quepondash Pidato. Bëacsho tasun dapan cushtotaneç mëpamëdquin abitedi ismepondash. Adashic Esus caic: —Nëid unës uametiapimbo iquebi. Nëid unës uamete bunec mibien cuidadtequidombo nendac. Ëmbien adotiapimbo iquec. Mëpamëdec bëchish ucudac bimboec mimbi icsamiai ucudebi —quiash mëpamëdquin ismepondash Pidaton. ²⁵ Adsho tantiashien: —Con nabobëdtsëqui adequi cuidadtequidombo icnuna —quecuededpondash abitedimbo.

²⁶ Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

Esus mamëshunaid

(*Mad 15.16-20; Uan 19.2-3*)

²⁷ Adoaquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamëshumbedepac caondash unës uanumbi. ²⁸ Abi dasiuidaid ënapen icquid chicshun: —¿Chuiquid dapada nedi? —quequin dashcute piumbo icquid dasiuintanquin ²⁹ mauete pinchuc-pinchucpambo icnu nacnenaïd mauemepac caondash. Adshumbic aton matses chuiquid dapan sananacbimboen sananuc abiuçshun cueste sanamepac caondash. Adshumbic aton matses chuiquid dapa ismiacbimboen mamëshunquin: —Is. Isadaïdbo chuiquid dapambo neque —qeshun danëshën sebudquin Esus ismepac caondash. ³⁰ Adshumbic dacuishtucatanquin ambi cueste sanameboed bedshuntanquin aidëmbi matombudnepac caondash. ³¹ Aden mamëshuntanquin ambi dasiumboed chictanquin aton dashcutebidi dasiunoapac caondash. Adoshon: —Ma unëshnuequin cuesten dectanec nidnu. Nid —quequin Esus buampac caondash.

Esus cuesten dectanaid

(*Mad 15.21-32; Duc 23.26-43; Uan 19.17-27*)

³² Buanquin Esus abi dectante cueste yuëmemebanquimbi dada nidaïd Sidene caïd yacnuësh choquid Simon cuëmëdquid Esusën yuëmiaïd sondadon chiadtomebidampondash. ³³ Adobidanec nidec macuësh dapa yacno matses mapi canitebimboec isadquid Codocota caïd yacno chopondash.

³⁴ Choshombien sondadon uba chinaïd actequid pãembo dauë nēcushaid Esus meneuidpondash. —Në. Ac —cac pictsäc tantanec: —Padi —quepondash aquenquio yec. ³⁵ Adshobien cueste napotiaïd bëboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmëdquidtedi dada uabanshun tēchun sandoshon cadotanequin dada uatempï puduemiaïd isbanquin Esusën dashcute bedbampondash. ³⁶ Adash: —Esus unëso isnu —quec sondado tabadcuededpondash.

³⁷ Adshumbic: —“Nadquid icsho cuidquin unës uac,” quequin ma isquidon tantianu —qeshun cueste cuëshën naden dada uapaccondash. —Nëïdquio Esus nec. Isadaïdbo chuiquid dapambo nec —quequin dada uaid Esusën mapino dectampondash. ³⁸ Ampequid daëd cuesten ëquë dectambudcuenquin dectantanquin nënantanquio Esus dectampondash.

³⁹ Adshobien podqued cuëmanquio Esus diadsho isbidanequin chieshënquin chuipondash. ⁴⁰ —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaïd yec bud. Nuquin Papan madombo yec unëshenquio yec auëshquiobi bud —cabidanepondash. ⁴¹ Adecbidi chuiquid dapabo yec Moisesën dada uampid chuibanquido yec tsusiobo yec quequido Esus ic-samboen mamëshunec nadpondash. ⁴² —Utsibo ismenuembien comapenen tantiaquin matses bëdamechitosh. Adembidi comapenen tantiaquin nacnenash budsho isnuqui. “Isadaïdbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaïd yec Nuquin Papan Madombo nec,” quetsiabi. ⁴³ “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu.

Unësenquo icsho isnu —quepondash tsusiobo. ⁴⁴ Adnubien abëdta cuesten dectamboedon ampequidontsen Esus mamënshumpondash.

Esus unësaid

(*Mad 15.33-41; Duc 23.44-49; Uan 19.28-30*)

⁴⁵ Adnubien ushë cuembo icnuc inchëshbocpadquieç inchëshpondash. Ushë cuembo icnuc inchështanec ushë budambi ushëmbo yanoapondash. ⁴⁶ Ushëmbo yanubien Esus comapenec cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun ëbi bëdamboen isenquo yano, Papa Edoen? —quec adondash.

⁴⁷ Adec cuëdsho tantiaish isquido nadpondash. —Edias yampid cuënchitequien nec —quiampondash. ⁴⁸ Adnubien Esus isec tabadquid abentsëc titinquianec nidshun shapu-shapupactsëcquid bedtampondash. Bedtanshumbic actequid mucacquid anidsëcquidën shapu-shapupactsëcquid punshun cuate dëdectanshun abuc sananec: —Chishmenu —queuidpondash. ⁴⁹ Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

⁵⁰ Adnubien padpidec buëdanquieç cuëdtanec Esus unëspondash. ⁵¹ Esus unësnubi Nuquin Papa tabadte shubu uashunaid yacnuësh: —“Quënë uquëducquidën Nuquin Papa tabadtembo nec,” caidën utsi puduednushe —queshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bëdamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash. ⁵² Adec unësaid nauedaid shëcuë bëtashte cuënote dapambo cuëshëdnubien Nuquin Papa tantiaquido ënden unësaido abentse-abentsec uincuenanec chopac caondash. ⁵³ Esus uincuenanec adec uincuenaidon shubu dadpen icquid Edusaden caid yacno nidshun matses dadpen ismepac caondash.

⁵⁴ Nidaid uëdëquenec dacuëdampambo icsho isashien: —Esus unëso isnu —quiash tabadquido sondado chedo abi chuiquidbëdi dacuëdtanec: —Ma Nuquin Papan Madombobi nepayoc —quepac caondash.

⁵⁵ Adnubien chidobo Cadidia yacnuësh Esusbëd choquin abi codocashumboedo Esus unëso isnu ec ancuenshun isec tabadpac caondash. ⁵⁶ Nëidted icpac caondash. Nëidic Madia Mactada yacnuësh choquid. Nëidic Madia utsi Acobon tita. Aid Ose cuëmëdquidën titabidi niosh. Nëidic Sebedeyon chido Uanën tita. Aid Acobo cuëmëdquidën titabidi niosh. Aidtedi uanoshon isbededec tabadpac caondash.

Esus chococaid

(*Mad 15.42-47; Duc 23.50-56; Uan 19.38-42*)

⁵⁷ Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash. ⁵⁸ Choshombic chuiquid dapa Pidato caid chuituidpac caondash. —Esus bednec chobi —cac aton yua chuiquin: —Ma buanu. Bedmetan —capac caondash Pidaton. ⁵⁹ Aden bedtanshun Osen Esus dashcute bëchish nibëdquidënquo nuamboshë icnuc datanedonepac caondash. ⁶⁰ Adotanquimbic nidaid cuënotuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashte uaid bincumbëshun bëtimpac caondash. Adotanec nidpac caon-

dash Ose. ⁶¹ Adnubien Madia utsibëd Mactada yacnuësh choquid Osen Esus nauedsho isbosh ambobi tsadpac caondash.

Esus nauedaïd isec sondado tabadaïd

⁶² Isadaïdbon obeca bacuë unës uacpadën Esus unës uamiash abentsec ushashi chonoadtemaïd ushëmbi Esus chieshënquido Pidato caïd chiec nidpac caondash. Padiseyobobëdi nidshun chuiquid dapabon Pidato chuituidpac caondash. ⁶³ — Esus nadpadenec. “Unësash daëdec ushash uincuenendabi,” quec muapadeneque. ⁶⁴ Daëdec ushquin min sondado Esus nauedaïd cudasmeta. Esusbëd icboedon chichshun buanushë. Aden buanash: “Uincuenaccosh,” quec muanushë. Unësabi yec abi: “Nuquin Papan madombo nebi,” quec muac icsambo iccosh. Adembi: “Uincuenaccosh,” quequin muauac icsamboshë ictsiashe. Min sondado: “Cudasta,” quequin chuita —capac caondash Esus chieshënquidon. ⁶⁵ Adoquien Pidaton: —Ai, con sondado buantan. Aden buanshun: “Unësaid nauedaïd cudasec databëdta,” cata —capac caondash. ⁶⁶ Adoquien isadaïdbo tsusiobon sondado buanshun cuënöte dapa bëtashaid bucun bëbitaccapac caondash. —Bëbitaccaid isash: “Chuiquid dapan bëbitaccamiaïd nec. Cuidnushe. Esus chictiapimbo iquebi,” ma quenu —qeshun bucun bëbitaccapac caondash. Adoshon: —Beduanushë. Isquiec tabadta —capac caondash sondado chedo chuiquin.

Esus uincuenaid

(*Mad 16.1-8; Duc 24.1-12; Uan 20.1-10*)

28 Esus unësbon abentsec ushash abi chonoadtemaïdëntsen abentsecbidi ushash dominco badiadnuc chidobo Esus nauedshun bëtimboed isec tabadnuec padpidec choapac caondash. Mactada yacnuësh choquid Madia utsibëd isec choapac caondash. ² Choash isec tabadnubi nidaïd uëdëquiampac caondash. Adnubien Nuquin Papan abi yacnoshon uaid mayan bëda abucuësh budtanquin cuënöte dapa bëtashaid shëcbempac caondash. Adtanec cuënöten tsadtopac caondash. ³ Mayan bëda yec abu bed-bedquiacimboec ushëmboshë bëchamuanquiec icpac caondash. Aton dashcute adquiobidi bëchish nibëdquiec ushumboshë icpac caondash. ⁴ Adec dacuëdampambo icsho isashien unësaid cudasquido sondado dacuëdtanec uëdëquec tantiadempambo yec padishbudnuec caondash abitedi.

⁵ Adnubien mayan bëdan Madia chedo chuipac caondash. —Dacuëdenda. Cuesten detanquin unës uaboed Esus isnuec mibi tabadec. ⁶ Nibëdec. Nidosh. Ambi chuibopadequi uincuenash nidosh. Abi uebocno en isec cho —cac chidobon anisnubien padpidec onquequin chuiopac caondash. ⁷ —Mimbi isboed Esusbëd icboedo chiec nid. Badedquio nidshun naden chuita. “Unësboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien ⁸ auëshquiobi chidobo dacuëdboedi cuishonquec titinquianec nidanepac caondash.

⁹ Titinquianec nidaneshobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icbo nec —quequin ismenuen danëshën sebudquin taë uidën uapac caondash. ¹⁰ Adoquien Esusën: —Dacuëdenda. Con utsibo ëbëd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuensho isun sondadon muauaid

¹¹ Madia nidnubien Esus nauedaid isquido sondado abi chomeboedo isadaidbo chuiquido chiec chopac caondash. Mayan bëda chonoc Esus uincuemboed chuituidpac caondash.

¹² Adoquien isadaidbo chuiquidon aton chuiquid utsibobëd onqueshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —queshun piucquid dadpenquo menepac caondash. ¹³ —Mimbi isboedquo chienquo icquin naden chuita. “Ëbi chedo ushtoan abëd icboedon Esus ampequin beduanaccosh,” quequin utsibo chuita. ¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnush. Aid: “Chushcaquin cuidenda,” quequin chiendambi —queshun ¹⁵ piucquid meniac bedanec nidec isadaidbo chuiquidon chiacpadec muapac caondash sondado. Adem-bidi nëbi isadaidbo dadpeshun: “Esus ampiac,” quequin chiuoiaic.

Ëbi chuibeneta, quequin Esusën chiaid

(*Mad 16.14-18; Duc 24.36-49; Uan 20.19-23*)

¹⁶ Adnubini Esusbëd icboedo 11tedi yec Esusën chiacnombo Cadidia yacno nidec macuësh dapa yacno nidanepondac. ¹⁷ Macuësh dapa yacno nidquimbi Esus istuidpondambi. Istuidshumbic: —Con Icho neque. Ismenu —queshun danëshën sebudpondambi. Utsibombien: —¿Con Icbombobida nepeba? —capondash.

¹⁸ Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec. Abitedishun Icbombo icquin abitedimbo namequidquo nebique. Mibitsen namenu. ¹⁹ Nidaid utsi-utsiec yacno nidshun ëbi tantiaquido icmenuen matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatzen tantiaquid nec. Nëidbëd Nuquin Papan Mayan tabadeque. Utsibo ismenu,” quetanquin aden acten mentobeneta. ²⁰ Mimbi mentoaido chuiban. “Nuquin Icbon chiacpadec bëdamboec tabadnuna,” quequin ëmbi chuiboedtedi chuiban. Mimbi adosho isash mibëd iquendabi. Nidaid abitedi nibëdanabi icnuc mibi chedo nianenquo iquendambi. Adembidi ëbi tantiaquidotedi niantiapimbo iquebi —quepondash Esus ënquimbi chiec.

MADCOSËN DADA UAID

Bëyuc choshon Uanën Esus chote chiaid

(*Mat 3.1-12; Duc 3.1-18; Uan 1.19-28*)

1 Madcos nebi. Nuquin Papan tantiampicpadquieac aton madombo Esus abi yacno matses yuedquid chote tauamboen chiaid bëda chuinu. Tantia.

² Abi aton mado Esus chieac onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chomendambi.

Aidën chuibanac ambi tantiaid icsa ënshun mibi cainquidombo iquendac, mado.

³ Shubu nibëdacnoshon comapenec onquequin mibi chotequid aidën chuibanendac naden:

Nuquin Icbo choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chieac onquiaid Nuquin Papan Isayas dada uamiampid nec.

⁴ Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquo icsho mibi cuidenquo yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiacpadomboen naquid acten mentobampondash Uanën.

⁵ Aden Uanën chuibanubien matses dadpen tantianu quec chodedchodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chieac utsi-utsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash. ⁶ Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaid tsiuquid niondash. Shioshbimboecquid shuishun pequid niondash. Bacun chequid niondash. ⁷ Aidëmbi naden chuibampondash: —Con tsyuecquid choendac. Aidi natiambocquin naquidquo nendac. Aidi bëdamboshëcquid icnuc ëbi icsaquid icsho jatotsieshun aid choec quequin chuiquidquo Nuquin Papan icmioshi? quec tsadebi.

⁸ Mibi acten mentoquid nebi; aidien abipadquiocquid aton Mayan menianquidquo nendac —quepondash Uan.

Esus acten mentoaid

(*Mat 3.13-17; Duc 3.21-22*)

⁹ Adnubien ambi chian-chianaidquo Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. ¹⁰ Aden acten mentoac Esus pudundonobi abu bëcadoacnoëshquo dëbimbimboec isadquid abipadquiocquid aton Mayan bede-bedequemboec Esusbëd icnuec budpondash. ¹¹ Aden budmetanec ambi bëcadoacnoëshi: —Mibentsëcquiobi icsho ëmbi tantiaidquo mibi nec, mado. Ëmbi bëdamboen isaidquo mibi nec —quepondash aton Papa Esus chieac.

Esus Nuquin Papan chiaid niacmenuequin Satanasën tanaid

(Mat 4.1-11; Duc 4.1-13)

¹² Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. ¹³ Ambo tsadquimbi ushë abentsëc nidmec utsi choaid abutometsëcquieq tabadpondash. Ambo tabadshobi Nuquin Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëd-abon cho-choshon nashumbededpondash.

Cadidia yacnoshon tauamboen chuibanaid

(Mat 4.12-17; Duc 4.14-15)

¹⁴ Ambo yec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. ¹⁵ —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiata —quepondash Esus comapenec onquec.

Ëbëd iquec cho Esusën abia caido

(Mat 4.18-22; Duc 5.8-11)

¹⁶ Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. ¹⁷ Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus. ¹⁸ Adsho tantiash nëshaid abëd icquid menianec abi chuiquidbëd nidanepondash.

¹⁹ Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin. ²⁰ Aden nacenesho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemaiad

(Duc 4.33-37)

²¹ Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenquio yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. ²² Aden chuisho tantiashun: —Ambia tantiaquidën chiacpadomboen Esusën chuibanec. Utsimbien adomboen chienquio iccosh —quec onquec tabadcuededpondash. ²³ Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: ²⁴ —Esus Nasaded yacnoësh choquid mibëd icquidpenquio nebique. Nidec nid. ¿Chian anëdënquiacono ëbitedi nidmenuecta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuduedtsaid onquepondash. ²⁵ Adoquien: —Otaquio tabad —quetanquin: —Dapuduen —

capondash Esusën. ²⁶ Adoac comapenec abi dapuduedaid uëdëquenec sidquianec dapuduempondash.

²⁷ Adsho isash: —¿Abimbodambi ispo? ¿Mitsipadquidquo nepec? Ambi tanti-
amiaid utsien nechitec. Chuiquidën nacpadomboen naid nec. Dapuduen, ambi cac
ambi chiacpadomboen mayan icsan naic —quec onquecuededpondash Esusën naid
chiec. ²⁸ Adec onquecuededash auëshquio nidaneshun ambi isboed, Esusën naid,
chuibampondash. Aden chuibansho nidaid Cadidia caid yacnocquidtedishunten
tantiabededpondash.

Simonën nachi bédamiaid

(Mat 8.14-15; Duc 4.38-39)

²⁹ Ambi chuisho tantiaboedo nidanenubien Petedo Simon caidën shubu yacno
Esus Acobo Uan aidtedi nidpondash. Aidën shubun icquidbidi aton utsi Andedes
icpondash. ³⁰ Aidën shubun icquidbidi Simonën nachi icpondash. Ambo Simonën
nachi chumbo yec uepondash. Ambobi Esus chosho isun utsin chuipondash chumbo
iquec quequin. ³¹ Aden chiaquien Simonën nachi yacnombo choshon Esusën mäd-
inquin uëtsëndoac abi chumbo yaid badedquo bédampondash. Adec bédanash nid-
toshon codocashun abi choquidtedi pemebampondash Simonën nachin.

Esusën dadpen bédamiaid

(Mat 8.16-17; Duc 4.40-41)

³² Adnubien inchëshbudtsëqui Capednaun caid yacnocquidën daicsaidtedi bē-
bēpondash. Adembidi mayan icsa dapuduedaidtedi bē-bēpondash. ³³ Bē-bēash Si-
monën shubu shëcuë cuëmano puduedabi tabadcuededpondash. ³⁴ Adsho isun daic-
saidtedi Esusën bédamebampondash. Adembidi mayan icsa dapuduedaid dapudue-
mebampondash oncamenquiocquin. Nuquin Papan Madombo abi yacno yuedmian-
quid abentsëcquiobi mibi nec quequin chuinushe qeshun oncamenquiocpondash.

Shubu nibëdacno Nuquin Papabéd onque Esus onquiaid

(Duc 4.43-44)

³⁵ Adashic badiadte anoentsëqui yanubi isucunanec puduanec shubu nibëdacno
Esus nidpondash. Nidec tabadtuidshun Nuquin Papabéd onquequin chuibampon-
dash. ³⁶ Esus nidacshobi isucunshun Petedo Simombéd icquidën nibënampondash.
³⁷ Aden nibënquin istuidashi: —Mibi isec cho-choquidtedishun mibi nibëmbededec
—quepondash Esus caic.

³⁸ Adoaquien Esus: —Capucuenequin utsibotsen Nuquin Papan shubu
abentsëquën yuedanquid iquec quequin chuibenec chobique. Shubu utsi-utsiec
dadpen yacno nidnu. Nid —quepondash. ³⁹ Aden chuibidanec nidaid Cadidia caid
yacno capuequi shubu dadpen yacno choshon Nuquin Papan chiaid chuibante
shubun puduedshun Nuquin Papa yacno shubu abentsëquën yuedanquid iquec
quequin chuibampondash. Adembidi shubu dadpen icquid utsi-utsiec yacno
choash puduedshun adomboembidi chuiopondash. Adembidi mayan icsa
dapuduemeopondash.

Nami mishac tantiadenquiocquid bédamiaid

(Mat 8.2-4; Duc 5.12-13)

⁴⁰ Aden Esusën chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bédame —quequin Esus chiec comapenec cuëdpondash.

⁴¹ Adec cuëdshobi nëid isash unësquio iquebi quequin ëquëducshun tantiaquin mishec Esus: —Mibi bédamembique. Bédambo icta ⁴²—quenubi daicsaid nibëdquio yec bédampondash.

⁴³ Aden bédametanquin nidmepondash: —Nidec nid. ⁴⁴ Nidquimbi, Esusën bédamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bédambo icquin anocquid, Nuquin Papa matses chiec onquianequid, isme. Adoshon dëbimbiëcquid daëd meneta Moisesën chiäc padomboen ma anocquidën napanueshun. Aden meniac abentsëc cuesuneshun utsi cuesunenu quenquiocquin cuesuniaidën intac puntanequin intac mibi daseccashun dëbimbiëcquid utsi cuemeshun naden aidën mibi chuipec. Nuquin Papan mibi bédamboen istiapimboeboedi nëbi bédamboen mibi isendac. Aden chuiquin mibi bédamiaid Nuquin Papan naid nec quequin tantiatsiash —quepondash Esus ambi bédameboed chiec.

⁴⁵ Adsho tantiaboshombi niäc bidaanquin Esusën bédamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibëdacno capupondash. Adnubien Esus nibë nec nidaid utsi-utsiec yacnoësh dadpen cho-chopondash.

Cuembo yec uishquiaid Esusën bédamiaid

(Mat 9.2-8; Duc 5.18-26)

2 Adashic Capednaun yacno nidoash shubun puduedpondash Esus. Adnubien, Esus chosh qesho tantiash padpidec dadpen cho-choapondash. ² Dadpen cho-choash puduedash tsucus-tsucustsëcquio yec tabadnubi ädec bidi shëcuë cuëmano tabadpondash. Adec tabadsho isun Esusën Nuquin Papa yacno shubu abentsëquën tabadte iquec quequin chuibampondash. ³ Adnubien cuembo yec uishquiaid bëec dada daëd-daëdquieç 4ted cho-chopondash. ⁴ Cho-choshon matses tsucus-tsucustsëcquio yec tabadsho isun dectatoshon macano nacenaid chic-chictanquin Esusën dayunquio uishquiaid imbudpondash. ⁵ Aton dayunquio imbudsho isun Esusën bédamec quequin äbi imbudboedën tantiec quequin ämbibi tantiapondash Esusën. Adashic: —Mado, mibi cuidenquio yec mibi icsaid bëpiscudobi —quepondash Esus.

⁶ Adnubien isadaidbo tsusedpabon nadomboen nata quequin chiaid tantiamequidon ämbobi tabadquin naden onquenquiocquin icsamboen tantiapondash. ⁷ ¿Atotsi quia sh ädec Esus onquepeque? Tantiänu. Nuquin Papa icsamboen chuiquidien äid nechitec. Nuquin Papauidi matses cuidenquio yec äbi icsaid bëpiscudquid nec, quetsëcquieç tabadpondash.

⁸ Aidon tantiäid tantiec nadpondash Esus: —¿Atotsieshun äden mimbi icsamboen tantiäpe? ⁹ ¿Mibi cuidenquio yec mibi icsaid bëpiscudobi quequin ëmbi chüaidquio bédantequidpenda nedic? Ädec bidi, ¿Mibi icsamboeboedi mibi bédanoque. Nidtoshon mibi imbudboed chiädtoshon buä nec nid quequin ëmbi chiaid bédante-

quidpembidida neoadic? ¹⁰ Ai, adquidquiobidi nec. Mibi cuidenquo yec mibi ic-said bēpiscudobi queboed chidon tishac matses yanaid yequi chuiquidquo Esus nec quequin tantiesabo mibi nepec. Adquid icsho ëbi tantiamenuequin ¹¹ cuembo yec uishquiaid naden chiembique Tantia. Mibi icsambochoedi mibi bēdamiombique. Nidtoson mibi imbudboed chiadtoson buanec nid —capondash Esusën. ¹² Adoaquien nidtoson abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsēcquieq on-quiaish Nuquin Papan naid nec quec cuēdēncuededpondash.

Ĕbēd iquec cho Esusën Debi caid

(*Mat 9.9-13; Duc 5.27-32*)

¹³ Adashic padpidec chian Cadidia caid cuēmano nidoapondash Esus. Ambobi tabadnubien aidēn chiaid tantianuec matses dadpen cho-choapondash. Cho-choasho isun Nuquin Papan chiaid chuibanapondash Esusën. ¹⁴ Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuēnondash. Nidaid utsi yacno aton na utsibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoaquid Debi nepondash. Isadaidpembo ancaquidēn, Con matsespembon piucquid bedshunta, cac bedshunoaquid Debi nepondash. Adshobien: —Ĕbēd iquec cho —Esusën cac: —Ai, mibēd nidnu. Nid —quianec badedi Esus tsibananec Debi nidpondash.

¹⁵ Adshumbic Debin shubuno nidshun Esusbēd icquidon pepondash. Ashunquibidi aton na buansho isun piucquid bedshunquid Debipadquidēn utsin-utsinquien pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash. ¹⁶ Aden adquidbēdtan Esusën pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbēdtambi isadaidbon nadomboen nata quequin chiaid naisabēdtambi mibi chuiquidēn pepec? Tiantianu. Ĕbi chui —quepondash padiseyobo Esusbēd icquido chiec.

¹⁷ Adsho tantiasien Esus: —¿Dada bēdamboquidta dauēchoquidēn bēdametequid nedic? Padenquo. Daicsaidien dauēchoquidēn bēdamec. Adquiecbidi, icsaisa nebi quequin ambibi tantiaquid icsho mibi icsaid ĕnta. Aden ĕnash ĕbēd icquid mibi iquendac quequin chiesā nebi. Icsaquid nebi qeshun mibi icsaid ĕnta. Aden ĕnash, ĕbēd icquid mibi iquendac quequin chuiquid nebi —quepondash Esus.

¿Atotsi quiaish mibēd icquid buna mēmunesa nec? quiaid

(*Mat 9.14-17; Duc 5.33-39*)

¹⁸ Adnubien abi chuiquid quēnēn nauedan aid tantiec unēsquiocquin Uan acten mentoanquidbēd icquidēn buna mēmunubi padiseyobobēd icquidon unēsaid tantiec unēsquiocquin buna mēmunoapondash. Aden buna mēmunsho isanec nidequi Esus yacno nidash Esusbēd icquidon buna mēmunenquo icsho isash utsibo: —¿Atotsieshun Uambēd icquidon adembidi padiseyobobēd icquidon buna mēmunubi mibēd icquidon buna mēmunenquo icpec? Tiantianu. Chui —quepondash.

¹⁹⁻²⁰ Adoaquien Esus: —Aton chido bednun pambid meniac chidon codocacsho abi inquidēn abēd icquido menec. Aden meniac isuidesa abēd icquido nec. Adecbidi

ëbi abi chuiquid icnuc ëbëd icquidon buna mëmunenquiocquin isuidenquo iquec. Yuecash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquo yampec.

²¹ “Adembidi dashcute shë nibëdta chucambocquid bëtuscaisa matses nec. Shë nibëdta chucambocquid bëtuscatsaid amëec canchedoaic. Adecbidi abi icsaid ënesa tantiaid bëda pausudtiapimbo yec icsabudec. ²² Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bëenquiocquin. Adecbidi Nuquin Papan tantiacpadec pausudnu qeshun mibi icsaid ënacsho isun Nuquin Papan pausunendac —quepondash Esus.

Chonoadtemaid ushë icbo nebi quiaid

(Mat 12.1-8; Duc 6.1-5)

²³ Adnubien chonoadtemaid ushë utsi icnuc ënapen capuenquiocquin tied matanquin adosbiecquid trico caid ëshë bedshun Esusbëd icquidon pepondash. ²⁴ Adshobien: —Mibëd icquido is. Chonoadtemaid ushën chonoadeque. Abi chuiquid mibi iquec ¿atotsi quiash, Padi. Chën, quenquo ique? —quepondash padiseyobo Esus caic.

²⁵ Adoaquien Esus: —¿Chuiquid Dabidbëd icquidon natia bunquin ambi petemaid pepondash quequin dada uapampid tantiaimboda icconda? ²⁶ Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënë puduedshun Nuquin Papa tantianuequin pan meniac sanaid bedshun ambi petemaid abëd icquidobëd-tambi abi chuiquidën Dabidën pepampic. Puduedtemaid quënë puduedquid, Nuquin Papa matses chiec onquianequid, Abiatad abentsëqui icnubi aid quënë puduedshun bedshun Dabidën pepampic. Abiatadpadquidën peteuidtsëqui nec quenquiocquin abëd icquido tantiaquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

²⁷ Aden chuishumbic naden padiseyobo Esusën chuiopondash: —Nabanash ti-boedte matses bumpec quequin tantiaquin abitedi uabanquin ënashini con pabëdi ti-boquepampic. Adashic yuecash, Chonoadtemaid ushë nec, quepadenebi con pabëdi. Aden chiequi matses tiboedte ushë aton icbo ictiapimbo iquec. ²⁸ Aid ushë icbo icquin ëbëd icquidon bunquin pebededsho isash, Padi. Chonoadtemaid ushë neque. Aden penda, quenquioccobi —quepondash Esus abi chieshënkuido padiseyobo chiec.

Mëuesadaid Esusën bëdamaid

(Mat 12.9-14; Duc 6.6-11)

3 Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi ² Esus chieshënkuido padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bëdamepeque. Nëid badiadën bëdamesho isun bedmeshun quënë nauedmenu quetsëcquie padiseyobo tabadcuededpondash. ³ Aden tantiec padiseyobo tabadnubien mëuesadaid chuiquin Esusën: —Nënantanquo nidto —capondash.

⁴ Adoac nënantanquo nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoen-

quiocquin matses icsa uapendambi ique? ¿Nëid ushëndambi matses bédamepe? ¿Bë-damenquiocquindambi cuesunepe? —quepondash. Aden chiec Esus onquenubien onquenquo yec tabadpondash padiseyobo.

⁵Adoquien nëishtanquimbi abi chieshënquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquo iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bédampondash. ⁶Adosho isash puduenanec nidquin edodesbo padiseyobon badedquo istuidpondash. Aido istuidash: —Esus cuesunete mibi bunacpadquiec bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

Esus yacno matses dadpen choaid

⁷Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash. ⁸Adnubien Esusën nabansho isboedon chiac nidaid Udeya caid yacnoquido dadpen cho-chonobi adecbidi Edusaden yacnoquido cho-chonobi adecbidi Idumeya yacnoquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnoquido cho-chonobi adecbidi shubu dadpen icquid Sidon caid yacnoquido cho-chopondash. Esus yacno ambi nabanaid utsibon chuisho tantias cho-chopondash. ⁹Adec cho-choash tsucus-tsucustsëcquo yec tabadquin tsicatiac nënantanquo tsadacnoëshi catashnushe quiash Esus: —Cano bec cho —quiampondash abëd icquidquo caic. ¹⁰Dadpen bédamiosh cadoshe. Ëbitsen bédanu quequin ambibi tantiaquin Esus mishbededpondash. ¹¹Adembidi tantiaquin mishnuec mayan icsa dapuedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash. ¹²Adoquien: —Padi. Aden ëbi chienda —quepondash Esus.

Abëd 12ted icquid Esusën tantiamenu caid

(Mat 10.1-4; Duc 6.12-16)

¹³Adashic macuësh dapa yacno nidnushi abëd 12ted icquido chomeshun nadopondash: ¹⁴Ëmbi tantiacpadomboen mibitedi tantiamembi. Adquid icquin ëbëd tabadquin ëmbi chiacpadomboen mimbi tantiabenendac. Aden tantiabenacsho isun ëmbi chiacpadomboen chuimenuen mibitsen nidmembi. ¹⁵Adembidi mayan icsa dapuedaid dapuduequidbidi mibi icmembi quequin abëd icquido Esusën chuipondash. ¹⁶Ambi tantiamenu caid nëidtedi icpondash: Simon cashumbic Esusën Petedo capondash, ¹⁷utsibic Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash. ¹⁸Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. ¹⁹Utsibic Udas Iscadiote, aidi abi chieshënquido Esus bedmenush Esusbëd capuquid nepondash. Aidedi Esusën tantiamenuen chuiquin ismiaido niøndash.

Bedtsibu caidën dausunaid Esus nec quiaid

(Mat 12.22-32; Duc 11.14-23; 12.10)

²⁰ Aidedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquoio icpondash. ²¹ Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²² Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënquid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec —quepondash.

²³ Adoaquien Esus: —Mimbi icsamboen tantieque. Mibi chuibanu. Tantieq tabadta. ¿Mayan icsan icbo ambi dapuduedmiaid dapuduemequidta nepadic? Padenquoio. ²⁴ Adquiecbidi shubu icbo abëd icquido cuëshëdmesa nec. ²⁵ Icbon abëd icquido cuëshëdmiash shubu abentsëquën tabadtiapimbo iquendac. ²⁶ Adembidi ambi dapuduedmiaid dapuduemias adquidën icbo ictiapimbo Satanas iquéc. Icbo icnuequid abëd icquid puduemesa nec. ²⁷ Dadpeshun icbo Satanas nec. Adquid icquin ambi matses dapuduedmiaid dëniacanquidënuidquoio nadatiambocquin nabanquin cuemepec. Adquid icquin ëmbi nac mayan icsa dapuduedaid Satanasën yua icboedi icbombo tantiec bëdambo yanec ëbëd iquendac. ²⁸ Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboeidi, Icsaobi, Papa, qesho tantiaishun Nuquin Papan aid pauquendac. ²⁹ Utsien Nuquin Papan Mayan abipadquidën tantiamiac nasho isun Satanasën naid nec qesho pauquenquoio iquendac. Adquid ënëdenquoio yec icsaquid nendac —quepondash Esus ³⁰ Satanasën tantiamiac mayan icsa dapudemequid Esus nec abi caquido chieci.

Esus yacno aton utsibo anibëd choaid

(Mat 12.46-50; Duc 8.19-21)

³¹ Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chieci. ³² Adoac puduedshun Esus nënantan tsadsho isun: —Titabëd min utsibo choshon umanuschun mibi isnuen cainec —quequin chuituidpondash. ³³ Adoaquien Esus: —Adquid utsi chuinu. Tantiata. ³⁴ Në tabadquido ëbëd icquido neque. Is —quepondash Esus abëd iccuededquido chieci. ³⁵ Adashic: —Nuquin Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

Tantiamequin pete ëshë nësecain chiaid

(Mat 13.1-9, 18-23; Duc 8.4-15)

4 Adashic padpidec chian cuëmano nidshun Esusën tantiamequin chuibanoapondash. Aden chuibanuc cho-choquid dadpen icsho isash cano antabëdtopondash cho-choquid acte cuëmano tabadnubi. ² Adec tabadshobi, matses nadquoio iquéc que-

quin tantiaquin tiedën caniquid ëshë Esusën tantiamequin naden chuibampondash:
³—Tied icbo pete ëshë nësecanuec aton tied yacno nidquid. ⁴Adec nësecanuec
nidshun pete ëshë nësecac maisec pudun-pudunaid uicchunën chequid. ⁵Adnu-
bien nidaid cuënote dadpen samëdacno utsi-utsiec paëdash badedquio dëyucuidt-
sash ⁶tapunenquio iquec ushën shoedec. ⁷Adnubien pete ëshë utsi-utsiec nisanquid
dëyucacno paëdash dëyucash canidoudtsacsho nisanquidën bëtinac podo sinash
bacuëtiapimbo iquec. ⁸Adnubien nidaid bëdambo yacno paëdaid dëyucaid cania-
sh dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec
100ted iquec —quepondash Esus.

⁹Aden chiash: —Ëmbi chuiboed tantianu quiash bëdamboen tantiec papuedta
—quepondash Esus.

¹⁰Aden chuibanash udictsëc Esusbëdi nidshun utsibo choenquiocsho isun
databëdtuidquin abëd icquidon: —Mimbi chuibamboed tantianu. Ëbi chui —
capondash Esus chuiquin.

¹¹Adoaquien: —Nuquin Papan shubun tabadquid tantiamendambi utsiboembi,
Mibi nadquido iquec, quenquiocquin chuibanoc. ¹²Aden chiac:

“Nuquin Papan nabamboed isto-istoboedi ma padenquio tabadteneyoc.

Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid ëntsiandac. Aden abi icsaid ënsho isun cuiden-
quio yec Nuquin Papa abi icsaid bëpiscudtsiandac”

—quepondash Esus abëd icquido caic.

¹³Aden chiashic: —¿Mimbitsen ëmbi chuiboed tantienquioda ique? Aidi tantien-
quiocquin ¿mitsipadentsi adomboembidi chuibanasho mimbi tantiape? Ëmbi chui-
boed nad iqueque. Tantia. Chuinu. ¹⁴Pete ëshë sequidbimboecquid Nuquin Pa-
pan chiaid chuibanquidquio nec. Ëshë ambi siaidbimboecquid Nuquin Papan chiaid
nec. Abi paëdacno nidaidbimboecquid matsesën tantiante nec. ¹⁵Nidaidën paëdash
pete ëshë dëyuctiapimbocsho uicchunën chiaidbimboec matses utsi-utsiec iquec.
Adquid Nuquin Papan chiaid tantiash papuednu quesho Satanasën bëpiscud-
miac tantienquio yanec Nuquin Papa yacno puduedtiapimbo iquec. ¹⁶⁻¹⁷Nidaid
cuënote dadpen samëdacno pete ëshë paëdash badedquio dëyucuidtsash tapunen-
quio yec ushën shoedaidbimboec matses utsi-utsiec iquec. Adquid Nuquin Papan
chiaid tantiauidash bëdambo iquec queboedi ¿Esus tantiaquid nebi quecta icco?
quequin utsibon mamëshunac badedquio tantiesa nebi quendac. ¹⁸⁻¹⁹Nisanquid
dëyucacno pete ëshë paëdash dëyucash canidoudtsacsho nisanquidën bëtinac podo
sinash bacuësabimboec matses utsi-utsiec iquec. Adquid Nuquin Papan chiaid tan-
tiauidash abi bunaid, abi nënaid, abi icsaid aidtedi tantiaquin Nuquin Papan chiaid
tantiesa yanshun bëdamboec tabadaid ismesa yanec. Adquidën Nuquin Papan chiaid
tantiaquid utsi icmetiapimbo iquec. ²⁰Ëshë utsibic nidaid bëdambocquidën paëdash
dëyucash caniaash dadpen bacuë icquidbimboec matses utsi-utsiec iquendac. Adquid
Nuquin Papan chiaid tantiadonec bëdamboec tabadquin utsi ismequid nec. Aden
ismiac Nuquin Papan chiaid tantiaquid daëdpactsëc yanubi utsin ismiac Nuquin Pa-
pan chiaid tantiaquid dadpen yanubi utsin ismiac Nuquin Papan chiaid tantiaquid
dadpenquioshë yanendac —quepondash Esus abëd icquido tantiamenuc.

Tabote nēnantan nanac chēnquiacbimboec ictiad quiaid

(Duc 8.16-18)

²¹ Aden chuishumbic abēd icquido naden Esusēn chuipondash: —¿Tabote icbon ambi dayun uaboed taboshon tsadte tēdion nanshun isaidta nedic? Adembidi ¿Tabote matsun bētashun isaidta neoadic? Padenquio. Nēnantan tabote nanac chēnquiacbimboec ismenu quec ictiad. ²² Adquiobidi abi yacno yuedanquid ambi dayun uapampidi nēbi Nuquin Papan dayun uainquiocquin ēbi chomeshun ismec. Adem-bidi con mado chuiban quenquiochoedēmbi nēbi ēbi ismec ma con mado chuibanu quequid con Pa nec. ²³ Ambi chiaid tantianu queshun tantiaquiec papudedta — quepondash Esus.

²⁴ Aden chias Esus: —Chiaid bēda tantiatequidquio iquec queshun tantiaquiec papudedquid icta. Aden chiaiduidi tantiec papudedquid abipadquid bēdambocquid ambia tantiaquidēn Nuquin Papan mibi icmendac. ²⁵ Adquid ambi tantia- adoniaidquio iquendac. Aden tantienquioctšēcquidēn tantiaid bēda uesadendac nibēdquiec —quepondash.

Ambi siaboed icbon isenquiocnoc bacuēec quiaid

²⁶ Adec onquequin abēd icquidquio chuishumbic cho-choquidtsen naden Esusēn chuipondash: —Nuquin Papan shubu abentsēquēn tabadec caidaidquio chuibanu. Tantiata. Nidaid bēdan tiedēn caniquid pete ēshē siash ²⁷ tabadquin cainquidquio icbo nec. Dadpen ushquin ambi seboed isenquio yec icbo tabadnubi ²⁸ ambi seboed dēyucash caniec tauitanec bacuēec. ²⁹ Ambi siaid isenquiocnoc canitanec bacuēacsho badedquio bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidēn isenquiocnobi. Papudedquioshon tantiabenec. Adquid isash con shubun puduedquido neque. Bednu quependac Nuquin Papa —quepondash Esus.

Mostasa caid ēshē chiaid

(Mat 13.31-35; Duc 13.18-19)

³⁰⁻³² Adec onquequin chuibanashic Esus: —Nadquio Nuquin Papan shubun icquido iqueque. Chuinu. Tantia. Mostasa caid pistšēc ēshēmpi ictšēcquid nēsecaid dēyucash nuamboshē caniec cuidi-cuidipambo iquec shubu-shubupambo yec po- doec. Ambo uicchunēn shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

³³ Aden chuibanashumbic adomboembidi Esusēn chuibampondash. Aden chuibanash, aidtedquio tantiapec abibi queshumbic aden chiaid chuiquin ēmpondash Esusēn. ³⁴ Aden abited chuibanashumbic abēd icquiduidtsēqui bēdamboen tantiaequin chuipondash.

Acte tēccoasquiaid ēnēd cac ēnēdaid

(Mat 8.23-27; Duc 8.22-25)

³⁵ Adashic abi ushēmbi inchēshbudtsēc cano antabēdtoanec Esus: —Chian uquē cuēma utsiuc nuquiuuidtsēqui nidnu. Nid —quiampondash abēd icquido caic. ³⁶ Aden chiac chian cuēman tabadcuededquido niananec badedquio nidquin canon Esus buampondash. Abēd icquidon potenubien cano antabēdtoanquin utsin-utsinquien

potepondash. ³⁷ Aden potenubien cunquequid dapan acte tëccoasquequin cano acte uemiaidën mentoadtsempondash Esus tëotadec ushnuhi. ³⁸ Adec uec usho: —Cunquequid dapan acte tëccoascaidën nuqui mentoeque. Isucunta, icbo —quequin Esus timpondash.

³⁹ Aden tinac uëtsëdtoshon Esusën: —Mibi comapenec cunqueque. Ënëd —cac badedquio ënëdpondash. Adembidi: —Mibi comapenec tëccoasqueque. Ënëd —cac badedquio ënëdoapondash acte.

⁴⁰ Aden ënëdmetanec Esus: —¿Atotsi quiash ëbi tantienquio yec dacuëdcuedede? Ëbi tantiesa mibi nepec —quepondash abëd icquido caic. ⁴¹ Adec Esus cuënuhi badedquio cunquequid dapa ënëdposh. Adecbidi acte tëccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecuededequi uëdëquianquiopondash abëd icquido.

Mayan icsa dadpen dapuduedaid bëdamaiaid

(*Mat 8.28-34; Duc 8.26-39*)

5 Adshumbic acte tëccoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash. ² Ambobi choash pudundosh mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. ³ Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid icboedi nadatiambo yanshobi mëtanetiapimbo yampac caondash. ⁴ Abi mëtaniaid shocosh bucu seccuduatanquin tës-tëstenepac caondash. Adosho isac abi tanebocpadquid utsi nibëdpac caondash. ⁵ Aidi inchëshën capucuenequi mëyanacimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶ Aidi abi yacno Esus canon chosho isanec titinquianec choash: —¿Tsusio, ada cho? —quiashic: ⁷ —¿Mibëd icquidtabi nedi? Mimbibi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita —quepondash mayan icsa dapuduedaid Esus chiec. ⁸ Adec mayan icsa dapuduedaid abi onqueshobien Esusën: —Dapuduen —cashic: ⁹ —¿Tsutsi cuëmëdquid mibi ne? —quepondash Esus.

Adoaquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yacimboec onquec.

¹⁰ Adashic: —Mibi nadatiambocquid cadoque. Ëbitedi chian anëdënquiacno nidmenquiocnuequin ¿nëid nidaidën adabi tabadmetsia? —quepondash mayan icsatedi.

¹¹ Adnubien macuësh potseshun chanchi dadpenshun pec tabadpondash. ¹² Aden pec tabadsho isashien: —¿Ada mimbibi ëbitedi chanchi dapuduedmetsia? —quepondash mayan icsa Esus caic.

¹³ Adoaquien: —Dada dapuduencuededash chanchi dapuduedcuededta —Esusën cac dapuduencuededash acte dapa quiusudacnombo comapenec niquec pudunpudunec mentoadbudnepondash chanchi nibëdquiec.

¹⁴ Adsho isash chanchi pemequin isquido chiec nidanepondash. Adec nidquimbi shubu dadpen icquid uano-uanoec tabadquido chuituidac aidotsen isec chochopondash. ¹⁵ Esus yacno cho-choshon mayan icsa dapuduedaid bëdamiosh quequin chuituidac mayan icsa dapuduedaid icboed naden isbededpondash. Dash-

cute dasiuidesa icboedi dasiuidash tsadsho abimbo iquec quequin isbededpondash. Aidën tantienquiochoedi tantiec tsadsho adembidi isbededoapondash. Adec tsadsho comapenen isbededequi nadatiambocquin naid nepec quetsëcquiec tabadcuededpondash. ¹⁶Adec tabadsho isun mayan icsa dapuduedaid bédamequin chancho dapuduedmesho isboedon cho-choquido tantiamenuen chuibampondash. ¹⁷Aden chuisho tantiashun cho-choboedon: —Nëmbo tabadenquo yec nidec nid. Mibëd tabadtiapimbo iquebique —capondash comapenen Esus chushcaquin.

¹⁸Adsho tantiasho cano yacno nidequi cano Esus antabëdtonobien mayan icsa dadpen dapuduemoed choash: —Mibëd icte bunebi. ¿Adabi buane? —quepondash. ¹⁹Adoquien: —Padi. Min shubuno nidtan. Ambo nidshun mibi bédamequin mayan icsa dadpen dapuduemeboed Nuquin Papa tantiaquin chuiban. Nuquin Papan ëbi ad icsho unësquioquin dapuduemiac quequin chuiban —quepondash Esus. ²⁰Aden Esusën chiaquien nidpondash. Nidequi shubu dadpen icquid yacno yacnomboec nidanec nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bédamiash, quec abibi onquec tabadcuededpondash.

Nua intac budaid bédameshun champi unësaid bédamiaid

(Mat 9.18-26; Duc 8.40-56)

²¹Adshumbic canon Esusbëd icquidon padpiden abi chobocmibidi chian poteapondash. Adec chosho isash matses dadpen chian cuëmmano padpidec choashun mananuc Esus pudundotsëcshobi badedquo tsucus-tsucustsëcquo yec datsidadpondash. ²²Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adec choquimbi Esus istuidash mibi bédambocquid nec quequin ismenuc Esus tauebudshun: ²³—Con champi unëseque. Aid mishquin bédamec cho —cac ²⁴Aidobëdi Esus nidpondash.

Adec nidshobi matses dadpeshun tsibanampondash. Tsucus-tsucustsëcquo yec nidquin Esus tsibanampondash. ²⁵Esus tsibanquidquo chido utsi icpondash. Aid chido seta 12ted matamec intac budash bédanenquioquid icpac caondash. ²⁶Dauë meniaqui bédanenquio icpac caondash. Dauëchoquid utsi-utsien piucquid menequin dauë bedshun chequi bédanenquio yec intac nuambo yampac caondash aton piucquid naimëdnubi. ²⁷Adec intac icnubi capuquin Esusën nabanaid chuisho tantianec nidquimbi matses dadpeshun tsibananubi aidëntsen tsibanampondash. Aden matses dadpeshun tsibananubi ismenquioquin cachoc choshon Esusën dashcute mishpac caondash. ²⁸Aden aton dashcuteuidtsëqui mishec bédampatsiash icmane qeshun mishtsequi bédampac caondash. ²⁹Intac bédanenquioquid Esus mishec bédampac caondash. Ëmbi tantiacpadquiequi bédanobi quequin ambibi tantiapondash.

³⁰Adec chido bédanubien ëmbi nadatiambocquin naoc quequin tantiec amibidi biadiadquin isec Esus: —¿Tsuntsimbini mishposh? —quepondash.

³¹Aden chuisho tantiashun abëd icquidënquo: —Tsucus-tsucustsëcquo matses dadpen iquec, ¿tsuntsimbini mishosh, quecta ique? —capondash.

³²Adec abëd icquid cuëdnubi onquenquioquin, ¿Midaquidënquo mishoshi bique? Isnu, abibi quequin matses utsi-utsien bëispondash Esusën.

³³Aden bëisbanubi, ëmbi mishoc quenquo yec bédamboed uëdëquec choequi mibi nadatiambocquin naquid nec quequin tantiequi Esusën taëno uebudshun

abi mishec bēdanaid chuibampondash. ³⁴Adoquien Esusën: —Champi, mimi tantiapadquiequi mibi bēdanoc. Dada icsambo icboedi nēbi dada bēdambo mibi iqueque. Bēdambo yec nid —capondash chido chuiquin.

³⁵Aden nidmenubien Aidon shubun icquid cho-choshon: —Min champi unēsoshe. Tsusio chomenda —capondash Aido chuiquin.

³⁶Adnubien Aido Nuquin Papan chiaid chuibante shubun tabadquido isquid caic: —Dacuēdenquiocquin ēbi tantiata —quepondash Esus.

³⁷Aden Aido chuishun Esusën: —Cho-choenda —capondash abi tsibanuequido chuiquin. Aden chianec Petedobēdta Acobo Uan, Acobon utsimbo aitedi buanec Esus nidpondash. ³⁸Adec nidequi Aidon shubuno choquin comapenec shubicuededsho tantiatuidpondash. ³⁹Aden tantiequi puduedash Esus: —¿Atotsi quec comapenec shubicuedede? Champi unēsenuio yec ushacbimboec uec nec —quepondash.

⁴⁰Adshobien tantiesa icquin mamēnshumbededpondash. Adoquien aitedi puduemiasch champin tita aton papa chedo abēd icquidbēd champi yacno Esus puduedpondash. ⁴¹Ambo choshon mēdante mēdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash. ⁴²Adoac badedquio isucunash nidtoash capupondash. Champi seta 12ted icquid niondash. Aidi bēdansho isun abitedishun, Adopenshenda iquec quequin isbededpondash. ⁴³Aden champi bēdameshun Esusën: —Ēmbi naboed utsi chienda. Abimbo caimbi. Abentsēcquiobi chienda —capondash. Aden chuitanequi: —Champi peme —quepondash Esus.

Abi icnēdacnoshon Esus chieshēnquido

(Mat 13.53-58)

6 Auēshquio puduanec nidequi abi icnēdacno Nasaded caid yacno Esus choapondash. Abēdi abēd icquido chopondash. ²Ambo tabadashic chonoadtemaid ushēn Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden chuibansho tantienquiocquid abentsēc: —¿Mitsishun chuibansho tantiashun adomboen Esusën chuibampec? —quepondash.

Adnubien utsi: —¿Mitsicquidēn ismiac Esusën nadatiambocquin nabampec? —queoapondash.

³Adnubien utsi: —Nēmbocquid, cuēte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nēidtedi nēmba tabadquid nec. Nēidic Acobo, utsibic Ose, utsibic Udas, utsibic Simon. Nēmbobidi aton chibi chedo tabadoaic —quetsēcquiech tabadec onquecuededec chieshcuededpondash.

⁴Aden chieshēnaqui Esus nadpondash: —Utsi yacno nidshun Nuquin Papan chiaid chuibansho tantaquid dadpen icnubi abi yacno chuibansho chieshēnquid aton mat-ses iquendac. Aton shubun icquido adecbidi iquendac —quepondash Nasaded yacnocquido chiech. ⁵Aido abi chieshēnquid icsho isun nadatiambocquin nabantiapimbo icpondash. Ēbi bēdamepec quequin tantaquidquido daēdpactsēc icsho mishquin bēdamepondash. ⁶¿Atotsi quiash ēmbi chiaid tantiatiapimbo icpec? Adembidi nadatiambocquin nasho istiapimbo icpec quepondash Esus abibi onquec.

Abëd icquido Esusën nidmiaid

(Mat 10.5-42; Duc 9.1-6)

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash. ⁷Adec cuenadquin chuibanecui abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshun-daëdshunquien chuibanec nid. Chuibanquimbi mayan icsa dapuduedaid dapuduemeta. ⁸Nidquin dadpen mitsana sauedshun buanenda. ⁹Tapucudte sandadia caiduidtsëqui tapucudash nidaneta. Adecbidi utsi bedenquo yec mibi dasiuidaiduidtsëqui dasiuidec nidaneta. ¹⁰Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquo puduanec nidequi shubu dadpen yacnobidi nidshun adquiecbidi tabadquin chuibanooata. Adenuidi naquin chuibanta. ¹¹Mibi yuedquid nibëdsho isash nidaneta. Auëshquo nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta —capondash Esusën abëd icquido chuiquin.

¹²Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomboen nabanta quequin chuibampondash Esusën nidmiaidon. ¹³Adembidi mayan icsa dapuduedaid dadpen dapuduepondash aidëmbidi. Adembidi nënquid dadpen daicsaid chedo cuëte bacuë bëchichoquid ënë dachinquien bëdameopondash Esusën nidmiaidon.

Uan acten mentoanquid mapi butiaid

(Mat 14.1-12; Duc 9.7-9)

¹⁴Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpeshun Esusën nabanaid tantiapondash. Aden tantiaash: —Uan acten mentoanondaaid mapi butemeboed uincuempash icnui. Adec uincuenshun nadatiambocquin nabanec nepanui —quecuededpondash tantiaquido.

¹⁵Adnubien utsibo: —Ediasien nechitec. Nuquin Papan chiampicpadquiec choashien nec —quecuededpondash.

Adnubien utsibo: —Nuquin Papan chiaid chuipampidien Esus yanchitash —quecuededpondash.

¹⁶Adnubien Edodes: —Ëmbi mapi butemiondaaid, Uan pado, uincuempash icnui —quepac caondash.

¹⁷Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: ¹⁸—Min utsin chido mimbi bedaid natemaaid niosh —queshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpeshun tantianushe queshun Uan bedmeshun quënën nauedmepac caondash Edodesën. ¹⁹Adoquien Uan Edodiasën chieshënquin: —Uan cuesunemetiadquidi mibi nec —quepac caondash aton bënë Edodes caic. ²⁰Uan bëdambocquid Nuquin Papan chomiaidbidi nec queshun Edodesën Uan cuesunemetiapimbo iquec cudaspac caondash con chidon cuesunemenushe quiash. Aden tantiaquin Edodesën abi tsadacno Uan chuiba-menuen chomedenepac caondash. Uanën chuibansho tantiaash: ¿Atotsimbi nëid

napeba? Ambi chuibanaid bédambo iquec. Aidën chuisho tantiash bédambo iquebi, abibi qeshumbic Edodesën chomedednepac caondash chuisho tantianuen.

²¹ Adnubien aton chido bunacpadomboen Uan cuesunemete ushë chonobi naden napac caondash: Aton bënën abi tishte ushë tantiaquin abipadquid dadpen penuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuiquid dapabobidi chomeoapac caondash. ²² Aden aidtedi cho-chomiash tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bédamboen mimbi naoc —quecuededpac caondash Edodesën chomiaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Èbi chui. ²³ Abimbo caimbi. Mibi bunaid èbi chuita. Mitsanatedi bunebi èbi casho tantiashun dadpen mibi menembi —quepondash.

²⁴ Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Èbi chui,” Edodesën caoshi. ¿Atotsimbi chuipe, tita? —quepac caondash ani chieci.

Adsho tantiashun anin: —Uanën mapi bunebi quequin chuita —capac caondash aton champi chuiquin.

²⁵ Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon èbi mene —capac caondash anin chuibocpadomboen chuituidquin.

²⁶ Adsho tantiash Uan tantiec unësquio icpac caondash Edodes. Adec unësquioquin ambi champi chiacpadomboen natiapimbo iquec èmbi chomiaido quenushe qeshun adoembi abibi qeshun: ²⁷ —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin ²⁸ maspanën nandoshon bëshun champi meniac bedshun champin aton tita menetuidpac caondash. ²⁹ Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

Dada 5000ted Esusën pemiaid

(*Mat 14.13-21; Duc 9.10-17; Uan 6.1-14*)

³⁰ Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. ³¹ Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

³² Aden chiashic cano antabëdtoanec matses nibëdacno nidpondash aidtedtsëqui. ³³ Adec nidsho isash matses dadpen abi nidte yacno tantiec: —U nidanec —quiash titinque choec abia cho-chopondash. Abia titinquequid cuensho isash utsi-utsieci dadpen titinquec cho-choapondash. ³⁴ Adec aidtedi abia cho-choambien Esusbëd icquido choapondash. Pudundoquimbi matses dadpenshun abi cainec tabadsho isashien Esus, Abi tantinamequin Nuquin Papan chiaid chuiquid nibëdacbimboecnuc matses cho-choec quequin tantiec unësquio iquebi qeshun tauain chuibampondash Esusën. Yuen chuibampondash.

³⁵ Yuen Esusën chuibanubi ushë budpondash. Ushë budsho isun abëd icquidon: —Icbo, ushë budaque. Nëmbo tiedën caniquid nibëdec; adecbidi yuedanquid nibëdec.

Matses nidme. ³⁶Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

³⁷Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquo yoc —quepondash abëd icquido Esus caic.

³⁸Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sin-coted icnubi nuëcquid doted iquec —quepondash.

³⁹Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. ⁴⁰Adoac ambi chiacted-tedquiec tabadbudpondash. ⁴¹Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismembu —queshun cuësh-cuëshun: —Meneban —Esusën cac abëd icquidon menebampondash. ⁴²Menebanac piash: —Padi. Piombi —quecuededpondash pequido. ⁴³Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. ⁴⁴Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin dadatedictsëqui tambampondash 5000ted iquec quequin.

Acte bëntse Esus choaid

(*Mat 14.22-27, 34-36; Uan 6.16-21*)

⁴⁵Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedu nidmembu —quepondash Esus abëd icquido caic. ⁴⁶Adoac canon potenubi matsestedu nidmianec matses nibëdacno macuësh yacno Nuquin Papa chuinuec Esus nidpondash. ⁴⁷Adnubien inchëshbudtsëqui abëd icquido acte nënantanquo canon noadpondash. Ambobi noadnubi Esus abentsëqui mananuc tsadpondash. ⁴⁸Ashunquo Esusën isaquien abëd icquido bëdiactsëcquido nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadiapimboconoc acte bëntse choquin abëd icquido Esusën ismetuidpondash. ⁴⁹Datantsensho isash, Mayambien nechitec, quequin ambibi tantiec sidquecuededec ⁵⁰dacuëdcuededpondash.

Adsho isumbien: —Ëbibi nebique. Dacuëdenquo yec tabadta —capondash Esusën. ⁵¹Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepec —quepondash abëd icquido. ⁵²Panëmpi daëdpectsëc ictsëcquid matses dadpen menebamboedën naid nec quequin tantienquicopondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquo icoapondash pamunacimboecquin.

⁵³Ashunquo chian potiashic nidaid Quenesaded caid yacno choshon cano nëshpondash. ⁵⁴Aden nëshash mananuc pudundosho isec anocquido, Aidi bëdamianquid nec, quequin ambibi tantiaquimbi ⁵⁵daicsaid aton ueten nandoshon Esus yacno bë-bëpondash. ⁵⁶Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, quesahun daicsaido bë-bëpondash. Adoac —Min dashcute ëbi mishme —capondash bë-bëaidon. Aden ambi tantiacpaden Esusën dashcute mishash bëdancuededpondash.

Nuquin Papan paucaid

(Mat 15.1-20)

7 Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, ²Ëmbi mishboed mishtemaid ictsiash, quesa iquec tsusedpabon chuinëdacadpadquiec mëpanudabi Esusbëd icquidon pesho ispondash. ³Padiseyobo isadaidbobidi yec tsusedpabon chuinëdacadpadquiec penush mëpanudanequid nec. ⁴Tiedën caniquid ambi piucquid menequin bedacnoësh choec adecbidi penush tsusedpabon chuinëdacadpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsiutsec dadpen iquec. Ambibi chuinëdacadpadomboen dëshotetsen cachonouidi dapanquidquibidi nec. Adembidi matsu nacenaid cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinëdacadpadomboen naquidquio nec.

⁵Aden nabanquidquio padiseyobo nec. Adquibidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacadpadquiec Esusbëd icquido mëpanudenquiocsho isash padiseyobo: — Atotsieshun mibëd icquidon tsusedpabon chuinëdacadpadomboen nainquiocquin mëpanudabi pepec —quepondash Esus caic.

⁶Adoquien Esus: —Isayasën ëndenquio dada uaquin mibitedi bëdamboen chiampidpadquid mibi nec. Ambibi dada uampid nad iqueque. Tantia:

“Nuquin Papa bëdambocquid nec quequin chiacpadomboen tantiesa isadaidbo nec.

⁷Abia Yampidënquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquio nec.”

⁸Aden tsusedpabon chuinëdacadpadomboen nabanquin Abia Yampidënquio chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepampid tantiamenuc.

⁹Aden chuishumbic adomboembidi chuioaic: —Badedquio Nuquin Papan chiaid chieshënquin tsusedpabon nadomboen nata quequin chuinëdacadpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape?

¹⁰Nuquin Papan chiacpadomboen Moisesën dada uampid nad iquec: “Titan papabëdtan chiaid chieshenquiocquin naban.” Adquidën chiaid utsi nad iqueque.

Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec.

¹¹Mibien tsusedpabon chuinëdaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuioaic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec.

¹²Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic utsibo. Adecbidi, Tita, mibi nashunquin menetiapimbo iquebi, queoaic.

¹³Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacadpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec —quepondash Esus isadaidbo tsusiobo caic.

¹⁴ Aden Nuquin Papan chiacpadomboen niacquido chiashic: —Utsibo, tantiec cho. Mibi bēdamboen chuinu. Bēdamboec papuedta. ¹⁵ Tsusedpabon chuinëdac-padquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic. ¹⁶ Ēmbi chiaid tantiaquin utsi chuibanta —quepondash Esus.

¹⁷ Aden chiash iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantiamē —quepondash abēd icquido. ¹⁸ Adoaquien: —Utsitedishun tantienquo icbocpadquido mibitedi neque. Tanta. Mimbi piaidēn mimbi tantiaid icsabudtiapimbo iquec. ¹⁹ ¿Min tantiate yacnoda mimbi piaid nidpec? Padenquo. Mimbi piaid min pucu yacno bud-budec auēshquo chimu nëncuenash puduēc —quepondash abēd icquido caic.

²⁰ Aden chiec onquiashic: —Mimbi tantiacpadquiequi mibi icsabudec. ²¹ Chido mimbi inacmaid isash chudtiadquido iquec quequin mimbi tantiacpadomboen chido isuidtiapimboquin mimbi chudted-chudtedec. Utsin na bedtiadquido iquebi quequin mimbi tantiacpadomboen mimbi ampec. Cuesunetiadquido iquebi quequin mimbi tantiacpadomboen mimbi cuesunepec. Utsin chido chudtiadquido iquec quequin mimbi tantiacpadomboen aidi mimbi chudpec. Dada utsin ëbi bēdaidquiocsho ispec quequin mimbi tantiacpadomboen min bēnēpenquo chudmequid mibi nec. ²² Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu qeshun isuidesa iquec adomboen bedbanquidquido mibi yampec. Mibibi icsambocquid nec quiash chieshēmēnquid mibi nendac. Adquid abimbo chiacimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bēdambo icsho isash chieshēnquid mibi icpec. Utsi icsamboen chuiquid mibi nendac. Utsin chuisho, Ēbentsēqui tantiaquidquido nebi, quequin mamēnshunquid mibi nendac. Adembidi nasho mamēnshunoaquidbidi mibi nendac. Ēmbia tantiaquid nebi, quequin mimbibi nabanaid icsa isash bēdambo iquec quec mibi mamēnec tsadec. ²³ Ēmbi chuiboedtedi icsaquidēn naid nec. Aden tantiaquid icsabudte nec —quepondash Esus.

Sidopenisia caid yacnoēsh chido ambi tantiacpadquiec bēdanaid

(Mat 15.21-28)

²⁴ Aden chiashic isadaidbo yacnoēsh puduanec nidequi isadaidpembo yacno nidpondash. Shubu dadpen icquid Tido caid anoentsēqui yacno choash shubun puduedash: —Nēmbo ëbi choaid chienda —quepondash Esus. Ambi chiacpadpenquiocnoc chuisho tantiapondash anocquidon. ²⁵ Adoac: —Esus chosh —quesho tantiachien mayan icsa dapuedaidēn tita Esus tabadacno nidpondash. Adec nidec puduedequi Esus tauebudpondash chuiquid dapa nec quequin tantiec. ²⁶ Isadaidpembon chido nidaid Sidopenisia caid yacnocquid niondash. Aidi Esus tauebudash: —Con champi mayan icsa dapuedaid dapudueme, tsusio, —quepondash comapēnen chiec.

²⁷ Adoaquien Esus: —Mabi con matses isadaidboba bēdamenuēc choboc. ¿Bacuēbo cubudabicnubi opashēmpida pete menequin anin bēnepadic? Padenquo. Adembidi, ¿isadaidbotedi bēdamiabidambi matses utsibo, isadaidpembo, bēdamepadi? —quepondash Esus.

²⁸ Adsho tantiachien chido: —Icbo, mimbi bēdamboen chiec. Padnuen anin me-niac bacuēbon pete sananaid cuēshēmpi paēdtsacsho opashēmpin ambibi bed-

shun pec. Adembidi mimbi nadatiambocquin nabanac isadaidbo dadpen bēdanubi isadaidpempo abentsēc tantiaquid yec bēdanoapec —quepondash chido.

²⁹ Aden chidon chuishobien: —Bēdamboen mimbi chiec. Aden tantiaquid mibi neque. Nidec nid shubuno. Mayan icsa dapuedaid dapuduenaque. Isec nid —capondash Esusën isadaidpembon chido chuiquin.

³⁰ Adsho tantianec choec shubun puduedquin isaquien aton champi uebocno ënden mayan icsa niqúan bēdanash abi ushaidëmbi uec.

Pashu buëd onquenquiocquid Esusën bēdamiaid

³¹ Adashien Tido caid anoentsëcuësh nidequi Sidon caid matambidanec chian Caidia caid yacno choapondash Esus. Nidaid Decapodis caid shubu dadpen yacno yacnomboec capucueniash choapondash. ³² Ambo choash tsadnubien dada icsa, pashu buëd onquenquiocquid, Esus yacno bëash tsadquin: —Nëid mishquin bēdame —capondash.

³³ Adsho tantiashun iccuededquido ismenquiocnuen udictsēc dada icsa buanshun aton mēdante bushbi pashun pabiate pausuntanquin chicpondash Esusën. Adshun, min anatsen mishnu quetanquin ismequin uicchun mëpidadtanquin pashun ana mishpondash. ³⁴ Aden amishec abuc isec: —Epata —quepondash. Paucud, quec adpondash Esus. ³⁵ Adec Esus cuëdnubi pashu buëd onquenquiocboedi tantiadcuenash onquiampondash.

³⁶ Aden pashuaid bēdamiash: —Esusën naid nec quequin chienda —quepondash Esus. Adoboqui niacbidanquin chuibampondash. ³⁷ Aden chuisho tantiash: —Adquidshenda Esus nepec. Ambi naidtedi bēdambo iquec. Pashu paucquid nec. Adembidi ana onquesa oncamequid nec —quec onquecuededpondash.

4000ted matses Esusën pemiaid

(Mat 15.32-39)

8 Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpondash: ²—Matses bunec tabadsho isash unësquio iquebi. Daëdec ushec ëbëd tabadquin aton pete uesquin piac. ³ Aton pete nibëdsho isash, Pec nid, quetiapimbo iquebi padishnushe quiash. Ënapenuësh dadpen cho-choash nec —quepondash Esus abëd icquido chiec.

⁴ Adoaquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abëd icquido.

⁵ Adsho tantiashien: —¿Tedtsi panëmpi mitsana iquec? —quepondash Esus.

Adoaquien: —Siete iquec —quepondash abëd icquido.

⁶ Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash. ⁷ Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiembi, Papa —qeshun: —Nëidtsen meneban —Esusën cac menebanoapondash. ⁸ Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. ⁹ Pebedo dada caniaid dadpen 4000ted icpondash. Chidon aton bacuëböbëdtambi pepondash.

¹⁰ Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

Nadatiambocquin nata. Isnu, padiseyobo quiaid

(Mat 16.1-4; Duc 12.54-56)

¹¹ Aden potiaash tabadnubien cho-choshon padiseyobon: —¿Nuquin Papan chomi-aid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹² Adsho tantiaash, Ëbi tantiesa nec, quec unësquio yec tsadequi —Ëmbi naid dadpen mimi ispaboc. ¿Adosho isboshida, Ëbi isme, queoape? Nadatiambocquin nabanquin ëbi isme caqui ismenquio iquemi. Abimbo caimbi —quepondash Esus.

¹³ Aden chianec nidec cano antabëdtoanquin uquë cuëma utsiuc poteoapondash.

Nuquin Papan chiaidbëdta ambi chiaid daëd uaquin chuiquid padiseyobo

(Mat 16.5-12)

¹⁴ Badedquio Esus nidnuesho tantiaash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnu.

¹⁵ Aden potequimbi Esusën nadopondash: —Pan uanuequidën trico caid putubëdta bidiscamete acte pistsëc cacushaqui nua yec bidisque. Adembidi padiseyobon Nuquin Papan chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd icquido nec quequin tantiaata. Aden tantiaquin padiseyobopadquid adecbidi Edodesbopadquid icmane qeshun ambi tantiacpadomboen nabanenda —capondash Esusën abëd icquido chuiquin.

¹⁶ Adsho Esusën chuibod icsamboen tantiec abëd icquido: —¿Ëmbi panëmpi bëambo yaidta icbon chuipec? —quec onquecuededpondash.

¹⁷ Aden chiec onquecuedednubien tantiaquidquio icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquio yec bëshu tsadacimboecta tsado? ¹⁸ Adecbidi ¿Ëmbi chuibanaid tantienquio yec pashuacimboecta tsadoapo? ¹⁹ ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Dosedet iccosh —quepondash abëd icquido.

²⁰ Adoaquien: —Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abëd icquido.

²¹ Adoaquien Esus: —¿Nadatiambocquid Esus nec quequin ëbi tantienquioda mimi icpe? —quepondash abëd icquido caic.

Betsaida caid yacnoshon bëshu bëdamiaid

²² Adshumbic Betsaida caid yacno poteoapondash Esusbëdtambidi. Aden potiaash chosho isun bëshuaid bëpondash anocquidon. Aden bëshun ismequin: —Nëid bëshumbo neque. Mibi bëdamianquidquio icquin mishquin bëdame —capondash Esus chuiquin. ²³ Adsho Esusën bëshu mëdianquin Betsaida caid anoentsëqui buan-shun uicchun bëcuishtuatanquin bëmishec: —¿Ada mimi iseqe? Ëbi chui —capondash Esusën.

²⁴ Adsho tantiash Esus isquin: —Bëdamboen isenquiocquin cuëte podò inchëshquio yac bimboecnuc mibi isembi —capondash bëshuaidën. ²⁵ Aden chuishobi Esusën bëshuaid padpiden bëmishoaquien bëucudquiondash bëdamboen isec. ²⁶ Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

Quidistu mibimbo neyoc, Petedo quiaid

(Mat 16.13-20; Duc 9.18-21)

²⁷ Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chiec.

²⁸ Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampidpadquidien Esus nechitec, quec —quepondash abëd icquido Esus caic.

²⁹ Adsho tantiashun: —Ma mibitedishun ¿atotsibi cai? —capondash Esusën.

Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid utsibo onquiac bimboen chuioaic.

³⁰ Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

Abi unës uate Esusën chiaid

(Mat 16.21-28; Duc 9.22-27)

³¹ Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqi daëdec ushash uincuenoaindabi, quequin Esusën chuipondash. ³² Abi unës uatequid chuipecshenda niondash. Aden Esusën chiaquien aidbëdtsëqui uano nidshun Petedon: —Aden tantiaquin chienda —capac caondash.

³³ Aden Petedon chuisho tantiash aucbidi bidadquin abëd icquid utsibo isec Esus nadpondash: —Nidec nid, Satanas. Nuquin Papan tantiapadpenquionoc ëbi nicmenuequin icsamboen chuiquid mibi neque. Satanasën mua uac matsesën tantiapaden mimbi tantiec —quepondash Esus Petedo comapenen chushcaic. Petedo Satanas bimboecquid nec quequin Satanas capondash Esusën Petedo chuiquin.

³⁴ Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu queshun mibi bunaid nainquiocquin ëmbi chiaid tantiaquin nabanta. Èbi mëyanacpadembidi mibi mëyante icnuc niaquenda. ³⁵ Esus tantiaquin ambi chiacpadomboen nanu queboedi unësmane quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmane quenquiocquin ëbi chuibanec tabadquid Nuquin Papa yacno tabadendac. ³⁶ Aden aton na dadpen bedbanashic Esus tantiesha yec unësash Nuquin Papa yacno puduedtiapimbo iquendac. ¿Adquidta bëdambo icpadic? ³⁷ ¿Nuquin Papa mitsana menecta abi yacno puduedpatsia? Padenquio. ³⁸ Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquid bimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesa caic, Con utsi nec, quequin Nuquin Papa chien-

quio iquendambi. Chuiquid dapa abipadquidquio con pan ëbi icmiac ëmbi abucshun uaido mayan bēdabobēdi nidaidēn choaindabi. Adec aidobēdi choashun ëbi chieshēnquid isec, Con utsi nec, queoatiapimbo iquendabi —quepondash Esus chochoquido caic.

9 Aden chiashic Esus: —Nēbimbobi tabadquid ëbi tantiaquid utsi-utsiec unēsabicquin nidaidēn tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

Esus bēdaidquio icmiaid

(*Mat 17.1-13; Duc 9.28-36*)

²Aden chuibanashic 5ted ushash: —Nidnu. Nid —quianec Esusbēd Petedo, Acobo, Uan, aidtedi ambi chiactedi macuēsh dapa yacno nidpondash. Ambo nidash tabadquimbi abi bēdambo isadaid aidon ispac caondash. ³Abi dasiuidaid dashcute icboedi nac-nacquio yampac caondash. ⁴Edias, Moises, aid daēd ěnden yampidi Esusbēd onquesho ispac caondash Esusbēd choboedon. ⁵Aden isequi: —Chuiquid Dapa, nuquibi nēmo choash tabadquin mibi isec bēdambo iquebi. Min shubumpi 3ted icnuc shubu uanuna mitsana, Moisesēn na, Ediasēn na, aidted icnuc —quepac caondash Petedo. ⁶¿Atotsimbi chuipe? quetiapimbo yec dacuēdcuededquin aden chuipac caondash Petedon.

⁷Adec tabadshobien abu ushu choquidēn ambo tabadquidtedi bētimpac caondash. Aden bētīnacnoēshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibancho bēdamboen tantiata —capac caondash Nuquin Papan.

⁸Adsho isbanquin isaquien Esusbēd choboeuidi icoapac caondash.

⁹Adanec macuēsh yacnoēsh budtanequi: —Mimbi isboed nēbi chienda. Ēbi Nuquin Papan mado matsesacsho unēsmiac ëbi uincuenan mimbi isboed chuita —capac caondash Esusēn. ¹⁰Adsho tantiash utsi chienquio yec abi uincuemete ¿mitsipadquio icpec? quec abibi onquecuededpac caondash Esusbēd choboedo.

¹¹Adec onquecuededash: —Nuquin Papan chomiaidquio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ěndenquimboshē chopampic —quepondash abēd icquido Esus caic.

¹²Adoaquien: —Ai, Ediasēn matses bēdamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquio yec matsesash nēbi tabadsho matsesēn chieshēnquin mēyanendac quequin chuipampid nec. ¹³Ediasēn chiampicpadquiec Uan acten mentoanquid chopondash. Aidi choacsho abi bunacpadomboen abi chieshēnquidēn mēyanac. Ēndenquimboshē Edias chiec onquequin dada uampicpadomboen Ediaspadquid chomiaid Uan choshon, Mibi icsaid ěnta, quequin chuisho abi chieshēnquidēn mēyanondash —quepondash Esus abēd icquido chiec.

Mayan icsan buēd onquetiapimbo icmiaid Esusēn bēdamiaid

(*Mat 17.14-21; Duc 9.37-43*)

¹⁴Adec onquetanec choquin isquien matses dadpenshun abēd icquid utsibo Esusēn niamboed tsusedpabon nadomboen nata quequin chiaid tantiamequidon comapenec onquecuededquin bētimpondash. ¹⁵Adnubien Esus chosho isash iccuededquido, Bē-

damianquid choec. ¿Atotsi aidën napatsiashe? Isnu, quetanec titinque choec: —¿Ada cho? —quepondash.

¹⁶ Adoaquien: —¿Atotsi quec ëbëd icquidbëd comapenec onquecuedede? —quepondash Esus.

¹⁷ Adshobien: —Chuiquid Dapa, mibi ismenuen con mado bëombi. Mayan icsan buëd oncamenquio yaid nec. ¹⁸ Aid Mayan icsan comapenen nebudteniac ëbcacush-ëbcacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquio iccosh —quepondash mayan icsan buëd onquetiapimbo icmi-aidën papa.

¹⁹ Aden chuisho tantiashe abëd icquido caic: —Esus nadatiambocquid nec quequin ëbi tantiesha mibi nepec. ¿Tedectsi icsahun ëmbi chiacpaden mimbi tantiabempe? Mibi tantiesha icsho ¿mitsipadembimbi tantiampe? —queshumbic: —Madompi bec cho —capondash Esusën.

²⁰ Adsho tantiasahun bëpondash. Bëshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ëbcacush-ëbcacushpambo yec cuididiquepondash.

²¹ Adsho isash: —¿Tedtsi seta matamec ad iccondashe? Chui. Tantianu —quepondash Esus madompin papa chiec.

Adoaquien: —Bacuë ictsequi ad iccondash. ²² Cuëte dëtsiadaid nënedeniosh abi dapuduedaidën. Actetsen nënedeniosh unësmenuequin. Mibi bëdamequidquio icquin ëbëdta tantiaquin ëbi con mado bëdameshun —quepondash madompin papa Esus caic.

²³ Adoaquien: —¿Mibi bëdamequidquio icquin ëbi con mado bëdameshun quecta ique? Nuquin Papa nadatiambocquin naquid nec quequin tantiaquidën tantiacpadomboen Nuquin Papan naindac —quepondash Esus.

²⁴ Adsho tantiashe: —Tantiembi. Èmbi abimbo tantienquiocsho isun ëbi tantiampe, Icbo —quepondash madompin papa Esus caic.

²⁵ Adsho tantiasahun matses dadpen titinquec chosho isun mayan icsa chuiquin: —Matses buëd oncamenquiocquid mibi nec. Adembidi tantiametiapimbo icmequidbidi mibi neque. Ambo tabadenquio yec dapuduen —capondash Esusën.

²⁶ Aden chiaquien sidquec madompi cuididiquenubi dapuduempondash. Adnubien unësabimboec madompi uesho isash: —Unësosh —quepondash isquido. ²⁷ Adnubien madompi mëdintanquin Esusën uëtsëndopondash. Adoac abembi nidtopondash.

²⁸ Adnubien shubun puduedacsho: —¿Atotsieshumbimbi mayan icsa dapuduemetiapimbo icpo? —quepondash abëd icquido Esus caic utsibon tantienquiocnobi.

²⁹ Adoaquien Esus: —Dapuduen quequinuidi chuibadaqui adquidquio dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

Abi unës uate chuioaid

(Mat 17.22-23; Duc 9.43-45)

³⁰⁻³¹ Aden chianec nidaid Cadidia caid matanec nidpondash. Nidquimbi, Èbëd icquid 12tedtsëqui chuibanu, quec utsibo ismenquio yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bed-

shun meniac cuesuniac uincuempendac —quepondash Esus. Abi uincuentequid chiecshenda adec Esus onquepondash. ³²Aden chuisho bédamboen tantienquo yequi dacuëdec ëbi bédamboen tantimequin chui quetiapimbo icpondash abèd icquido.

¿Mitsicquid chuiquid dapa icpec? quequin chiaid

(Mat 18.1-5; Duc 9.46-48)

³³Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedën choec atotsi chiec onquecuededo? —capondash Esusën abèd icquido chuiquin. ³⁴Adsho tantiash cuëdenquiocondash abèd icquido. ¿Esusbèd icquid mitsicquid chuiquid dapa icpeque? Tantianu, quec onquequin ambi chiaid chienquo yec tabadpondash. ³⁵Adec tabadnubi abi tsadacnoëshi: —Cho —quiampondash Esus abèd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

³⁶Adec onqueshumbic bacuëmpi abentsëc mëdintanquin abèd icquid tabadacno nënantanquo tsadumbudpondash. Aden tsadumbudshun bacuë icuquequi: ³⁷—Esus tantiaquid nebi quequin ismequin bacuë yuedquin nashunquid ëbi yuedquin nashu-nacbimboecquid nendac. Ëbi yuedquin nashunquid ëbi chomiondaid Nuquin Papa yacno yuedquin nashunoacbimboecquid neoaindac —quepondash Esus abèd icquido chiec.

Nuqui chieshënesa nuqui bédamboen chuibanquid nec quiaid

(Mat 10.42; Duc 9.49-50)

³⁸Adnubien utsin naid chiec Uan onquedopondash: —Icbo, mimbi chiacpadomboen utsin chuisho tantiapombi. Aidën: “Esus nadatiambocquin naquidquo nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbèd icquidpenquo mibi neque. Adenda quequin chuiapombi —quepondash Uan.

³⁹Adoquien Esus: —Padicnuna. Nadatiambocquin naquidquo Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec. ⁴⁰Nuqui chieshënesa nuqui bédamboen chuibanquid adquid nec. ⁴¹Abimbo chiembique. Tanta. Esus tantiaquid nec quequin mibi nashunquid Nuquin Papan cuidnanquin bédamboen naoaindac —quepondash Esus.

Icsa uanquin tantiabenabicquid ismequid cuidendac quiaid

(Mat 18.6-9; Duc 17.1-2)

⁴²Abi Esusën onquequin chuibanec: —Adembidi abi icsacpadomboen bédamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbèdta têtaneshun acte dapa nënepatecnëdan. ⁴³⁻⁴⁴Adembidi mimbi icsamboen tantiaquin mishaid ëntiapimbocquin ismedeniad adomboembidi utsin tantiec. Bednu quenquo yec mëtaniacbimboec tsad ënëdenquo yec chian anëdënquiacno nidmane quiash. ⁴⁵⁻⁴⁶Adecbidi capuquin mibi icsaid mimbi ismebeneque. Capunu quequin tantienquo yec tateshuniacbimboec tsadta ënëdenquo yec chian anëdënquiacno nidmane quiash. Adec mibi tsadnuc adquiecbidi mimbi ismiaid tantiec tsadendac. ⁴⁷Adecbidi ëshën isec mibi

icsaid ëntiapimbocquin mimbi ismedoniac adomboembidi utsin tantiec. Ëshë chic-shuniac bimboec tsad ënëdenquio yec chian anëdënquiacno nidmane quiash ma mibi tsadacpadec mimbi ismiaid tsadoapanu. ⁴⁸ Icsa uadenequin ënenquio yash unësash chian anëdënquiacno nidash unësenquiocshobi chodquiaid pequid macun mibi pendac. Ënëdenquio yec chian anëdënquiacno mibi tabadendac. Icsadenequin ënenquiocquid comapenen cuidtequid nendac. ⁴⁹ Sa casecac pambid batambo yac bimboec Esuspadquid icnu quiash mibi icsaid ënëdnuen mëmunec mibi bëdambo yampec. ⁵⁰ Sa batambocquid bëdambo iquec. Sa batambocboedi batapenquio yec icsasho ¿mitsipadentsi batambo icmeoapec? Sa batambocquid casecac daëdash batambo yacpadec utsibëd bëdamboec tabadta —quepondash Esus.

Aton chido bedshun nidmequid

(Mat 19.1-12; Duc 16.18)

10 Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen cho-choapondash. Adec cho-chosho isun Nuquin Papan chiaid chuibanoapondash Esusën.

² Adecbidi cho-choquid padiseyobon Esus Nuquin Papan chiaid icsamboen chuinu qeshun: —Aton chido bedash bunenquio yanshun cuemec. ¿Aden naicta bëdambo iqueque? Tantaranu. Chui —capondash Esus chuiquin.

³ Adoaquien: —¿Atotsi quequin Moisesën chuipampic? —queoapondash Esus.

⁴ Adoaquien: —Aton chido bedash bunenquio yanshun, Con chido icsambocquid nec, quequin ambi tantiacpaden aton bënën dada uashun nidmiacsho isash, Padi, quenquiocpampic Moises —quepondash padiseyobo.

⁵ Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic. ⁶ Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic. ⁷ Adomboembidi nanuec dada aton tita aton papabëd tabadenquio yec aton chido bedash abëdi ambi quënë uaidëmbi tabadec. ⁸ Aden aton chido bedash tabadequi matses abentsëc icboedi daëdec. Matses daëd icboedi abentsëc yac bimboec tabadec. ⁹ Aden dada aton chidobëdta Nuquin Papan daëd uacsho ma cuëshëdmenquio icpanuna —quepondash Esus.

¹⁰ Aden chiash shubun puduedacsho: —Mimbi chuiboed ëbitedi tantieme —capondash abëd icquidon.

¹¹ Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. ¹² Adembidi chido aton bënën bedac aton bënë nianshun dada utsi bedmequid Nuquin Papan menepampid niacquin tantiesa neoaic —quepondash Esus.

Esus yacno bacuëbo bë-beaid

(Mat 19.13-15; Duc 18.15-17)

¹³ Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon. ¹⁴ Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tanti-

aquidquo bacuëbo neque. Adomboembidi badedquo Nuquin Papan chiaid tantien-dac. Nuquin Papan shubu abentsëquën tabadquid aido nec. ¹⁵Abimbo chiembique. Tantia. Nuquin Papan chiaid bacuëbon badedquo tantiacpaden tantiesa Nuquin Papa yacno puduedtiapimbo iquendac —quepondash Esus. ¹⁶Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuipondash Esusën.

Na dadpen icquid chiaid

(*Mat 19.16-30; Duc 18.18-30*)

¹⁷ Aden bacuëbo chianec auëshquio puduanec nidshobien dada abentsëc titinquec choquin bëquedtanec danëshën sebudash tsadec: —Chuibanquin tantiamianquid, bëdambocquid mibi neque. ¿Nuquin Papan shubu abentsëquën tabadnuequin atosimbi napeba? —quepondash choboed Esus chiech.

¹⁸ Adoaquien Esus: —¿Nuquin Papabëdtabidabi mibi bëdambocquid nec, ëbi cape mimbi? Nuquin Papauidtsëqui bëdambocquidquo nec ¹⁹—quequin chiech abi onquec: —¿Nuquin Papan nadomboen nata quequin dada uamiampidtedi nabanquidta ne? Aidedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiech muainda; adecbidi, utsin na bedesabimboec muainda; adembidi papabëdtan titan chiaid chieshënenda.” ¿Aidedi Nuquin Papan dada uamiampid nabanquidta ne? —quepondash Esus choboed caic.

²⁰ Adoaquien: —Abimbo chiembique. Tantia, Icho. Aidedi nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

²¹ Adsho tantiaash, Aidbëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquio menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquo mibi iquendac. Adec Nuquin Papa tantiaquidquo yec ëbëd iquec cho —quepondash Esus.

²² Adsho tantiaash choboed mamënenquio yec unësquio yec nidpondash con na menebantiapimbo iquebi quiaish.

²³ Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiech.

²⁴ Aden Esusën chuisho tantiaash, ¿Abimboda capec? quequin ambibi tantiec abëd icquido otacquio tabadsho isec Esus: —Abuido, Nuquin Papan shubu abentsëquën matses badedquo puduedtiapimbo iquec. ²⁵Adembidi shëcuën puduedte nidaidën capuquid dapan badedquo tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquo tantiatiapimbo iquec. Ambi tantiacpadequi puduedte bunec —quepondash Esus.

²⁶ Adsho tantiaash abëd icquido, ¿Abimbobida capec? quetsëcquiech onquecued-edpondash. Adec tabadequi: —Ambi tantiacpadequi puduedtiapimboconoc ¿tsutsi puduedquid icpeba? —quepondash abëd icquido Esus chiech.

²⁷ Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi pudued-

tiapimbocon Nuquin Papambien abi yacno yuedanquid mibi tantiamendac — quepondash Esus.

²⁸ Aden chiaquien Petedo nadpondash: —Chuinu. Tanta, Icbo. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

²⁹ Adoaquien: —Abimbo chiembique. Tanta. Esusbëd icnu queshun Nuquin Papan shubu abentsëquën tabadte iquec quequin chuinuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimbocho ³⁰ daëd uaquin Nuquin Papan menendac. Nëbi shubu utsin-utsinquec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshëquidbidi iquendac. Yuecash ënëdenquio yec Nuquin Papan shubun mibi tabadendac mibi chieshëquid nibëdacno. ³¹ Nidaidëshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac — quepondash Esus.

Ëbi unës uaindac quequin Esusën chiaid

(Mat 20.17-19; Duc 18.31-34)

³² Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquiec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquidouditsëqui padpiden chuioanu —quiash Esus nidtuidshun cho-chosho isquin naden abi mëyante chuiquin tauapondash: ³³ —Chuinu. Bëdamboen tanta. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac ic-saquidbimboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac. ³⁴ Aden meniac bedshun aidon ëbi oncain mamëshumbedequimbi dacuishuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chiec.

Ëbi daëdi nashunta Acobo Uambëd quiaid

(Mat 20.20-28)

³⁵ Aden chiaquien Acobo Uambëd Esusën dayuntsëqui choash: —Mibi chuinu. Tanta. ¿Ëbi daëdshun chiacpadamboen ëbi daëdi nashunenquioda mimbi icpe? —quepondash.

³⁶ Adoaquien: —¿Atotsimbi mibi nashuneque? Ëbi chui. Tantanu —capondash Esusën.

³⁷ Adoaquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta —capondash Uanën Acobobëdtan Esus chuiquin.

³⁸ Aden aid daëdshun chiaquien: —Tantienquiocquin mimbi chioc. Icsaquid matsestedi nec, quequin Nuquin Papan aido cuidenquiocquin ëbi aton madombo bëdambocquidded cuidendac. ¿Ada ëbipadquid mibi icpatsia? —capondash Esusën.

³⁹ Adoaquien: —Ai, adquid tantiembi —quepondash.

Adoaquien: —Ai, adomboembidi mimbitsen tantiendac —quepondash Esus.

⁴⁰ Aden chiec abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiadquio aden chiendac. Ëmbi padenquio iquec —quepondash Esus Uambëdta Acobo chiec.

⁴¹ Aden Esusën chiaqui abëd icquidquio utsitedi Acobobëdtn Uanën chui-boed tantiash nëishcuededpondash. ⁴² Adec nëishash tabadsho isash: —Cho —quepondash Esus. Aden chomias: —Utsi namequid isadaidpembo nec quequin mimbi tantiec. Aidon matses utsi yuaquin mëyanquin namebanec. ⁴³ Aden namesa mibi nec. Chuiquid dapa icnu quiash utsi nashunquid icta. ⁴⁴ Adecbidi tsusio icnu quiash yuabimboe yec utsin namiaid icta. ⁴⁵ Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumënquidquio nebi. Adquid yec matses icsaid bedshunash ëbided cuidadec unësendabi —quepondash Esus.

Bëshuaid, Badtimeyo cuëmëdquid bëdamiaid

(Mat 20.29-34; Duc 18.35-43)

⁴⁶ Aden chiashic Edico caid yacno chonobi abi tsibanquid utsibo dadpen chochopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Pucquid bednu quequin cainec podqued cuëman tsadpondash. ⁴⁷ Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chiec cuëdpondash bëshuaid.

⁴⁸ Adec cuëdsho tantiashun: —Esus cuënenquio yec otacquo tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

⁴⁹ Adoac nidtuidshun Esusën: —Cuënquid chome —capondash.

Adoaquien: —“Chome,” queque. Nidtoash nid —capondash utsibon.

⁵⁰ Adsho tantiash bëshuaid aton dashcute bëntsecquid chicanec badedquio nidtoanec Esus yacno chopondash. ⁵¹ Adec chosho isun: —¿Atotsimbi mibi nashumpeba? —capondash Esusën.

Adoaquien: —Iste bunebi, Icbo —quepondash bëshuaid.

⁵² Adoaquien: —Esusën ëbi bëshuaid bëuquec quequin mimbi tantiacpadquiec mibi bëdanoque. Nidec nid —Esus quenubi isbenquiopondash bëshuaidën. Adec bëdandshun Esus nidsho isun tsibampondash.

Chuiquid dapabimboec yec Edusaden yacno Esus choaid

(Mat 21.1-11; Duc 19.28-40; Uan 12.12-19)

11 Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidedi macuësh Odibos caid potsembo icpondash. Ambo

choash ëbëd icquid daëd shubuno nidmenu quequin tantiec nadpondash Esus: ²—Në shubu dadpen yacno nidec nid. Ambo nidshun cabayobiecquidën bacuë caniabictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchicshun sananquin bëta. ³Aden bedsho isun, ¿Atotsi canun aid bede? cac, Bëoaimbi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

⁴Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tëchicpondash. ⁵Aden tënëshaid tëchicsho isun: —¿Mitsipaden tantiaquin ëmbi tënëshaid mimbi tëchiqueque? Tantianu. Chui —capondash anocquidën.

⁶Adoquien: —Tënëshaid tëchicshun bëta, con icbo quebocpaden naimbi —capondash tëchicquidën.

Adoquien: —Buanec nid —queoapondash.

⁷Adoac Esus yacno buampondash. Aden bëshun aton dashcute bëntsecquid chicshun cabayobiecquid capupondash ma chuiquid aidën catsadtonoeshun. Adoaidën Esus catsadtopondash. ⁸Adembidi chuiquid Esus nec quequin ismequin utsibontsen aton dashcute bëntsecquid chicbededshun podqued ansambampondash ma chuiquid dapa bëdamboquid capunueshun. Adembidi tantiaquin utsibon budëdbiecquid podo tebededshun podqued ansambanoapondash. ⁹Aden ansambanash matses dadpen bëyucanec nidanenubi Esus nënantanquio nidnuc aidtedbidi tsyuec choquin tsibambëpondash. Adec abitedi nidanec Esus tantiec nadec cuëdëncuededpondash: —¿Adeduya! Nuquin Papan bëdambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapambo choec nec. ¹⁰Ëbi chuiquid dapa Nuquin Papan abuc tabadquidën chomiaid Esus nec. Nuquin Papa bëdamboshë iquec. ¿Adeduya! —quec cuëdëncuededpondash Esusbëd nidquido.

¹¹Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nida-neoapondash Esus.

Cuëte bacuëesa chiaid

(Mat 21.18-19)

¹²Abadiadsashi Betania yacnoësh nidanec Esus bundopondash. ¹³Adec bundoshombi cuëte icueda caid podo buntac-buntacpambo ancuenquio nidsho istuidec Esus: —Icueda podo buntac-buntacpambo podoash nideque. Isbono. ¿Bacuëashida neque? —quianec nidpondash. Adec nidquimbi icueda podouidquido icsho ispondash. Ushë utsin bacuëtiadquidi bacuëabi podopac. ¹⁴Ad icsho isun Esusën: —Adequi bacuëesa icsho ma matsesën chenquio icpanuna —capondash. Aden chuisho tantiapondash abëd icquidon.

Nuquin Papa tabadte shubu uashunaid yacnoshon cuemiaid

(Mat 21.12-17; Duc 19.45-48; Uan 2.12-22)

¹⁵Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquinqiucquid sanaid cuestetedi bidiacbanquin piucquid bednun

nidaidën capuquidbëdta podochoquid chedo menebanquidën tsadtetsen nebudquin icbotedi puduemebampondash. ¹⁶ Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. ¹⁷ Aden chushcashic: —¿Ëbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. ¹⁸ Aden Esusën chuisho tantiash, Icsambocquid Esus neque. Unës uatiad, quequin ambibi tantiabedec isadaidbo tsusiobo tabadcuededpondash. Utsioben: —Chuiquid dapan chiapadomboen Esusën chiec —quepondash. Adsho tantiash, Esus bednu, quetiapimbo yec dacuëdcuededec tabadpondash isadaidbo tsusiobo. ¹⁹ Adnubien inchëshbudtsëqui Edusaden yacnoësh nidoapondash Esus.

Cuëte bidiquiaid

(Mat 21.20-22)

²⁰ Abadiadsashi Edusaden yacno nidoaquimbi cuëte icueda caid bidiquiascho istuidpondash. ²¹ Aden istuidash Esusën icueda bacuëesa chiaid tantiec Petedo: —Cuëte bacuëabicsho mimbi chuiboed bidiquiaye. Is, Icbo —quepondash.

²² Adoquien Esus: —Nuquin Papa nadatiambocquin nabanquid nec, quequin tantiaquiota. ²³ Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiapadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac. ²⁴ Ëmbi chiapadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. ²⁵ Aden Nuquin Papa chuinish mibi utsin ic-sambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac. ²⁶ Adenquo mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatiapimbo iquendac —quepondash Esus abëd icquido caic.

¿Mitsicquidën chuibanta caid mibi ne? quiaid

(Mat 21.23-27; Duc 20.1-8)

²⁷ Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: ²⁸ —¿Mitsicquidën chuibanta cac chuiquid dapabimboecquin mimbi chieque? Tantienu. Chui —capondash.

²⁹⁻³⁰ Adoquien: —Adembidi ¿Atotsi tantiaquin mimbi chuipe? Chui. Tantienu. ¿Matses mentondaidën, Uan padon Nuquin Papan chuimiapadomboen nabanquinda nadiondash? Padenquo, quequin, ¿Ambibi tantiapadomboen Uan padon naondash, quequinda mimbi tantiapeque? En chui. Tantienu. Aden mimbi chiac ëmbitsen mibi chiembi —capondash Esusën tsusiobo chuiquin.

³¹ Aden Esusën chuisho tantiash udictsëc nidash isadaidbo tsusiobo onquec nadcuededpondash: —Nuquin Papan tantiamiapadomboen Uan padon naondash, nuqui qesho tantiash, ¿Atotsieshun aidën chiaid tantienquo icconda? quetsiash Esus. ³² Naden Uan padon ambi tantiapadomboen naondash, nuqui qesho tantiashun, ¿atotsi napatsiash Uanën chuisho tantiondaidon? Aidon, Nuquin Pa-

pan chuimiaid Uan pado niondash, quequin tantiabededquin nuqui cuënoten se-shunetsiash —quecuededpondash. ³³Aden chiec onquecuededashic —¿Tsuntsin tantiamiacpadomboen Uan padon nabampondash? quequin tantienquio iquemi —quepondash isadaidbo tsusiobo Esus chiec.

Adoaquien: —¿Tsuntsin tantiamiacpadomboen Uan padon nabampondashba? quequin mimbi chienquio yacpadembi ëbi chuiquin tantiamequid mibi chienquio icoaimbi —quepondash Esus abi chieshënquido isadaidbo tsusiobo chiec.

Tied icbo nashunta quequin chiaid

(*Mat 21.33-46; Duc 20.9-19*)

12 Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tantia. Icbon aton tiedën uba caiduidquio nitsinshun cueste bënitsinaidën otadnidec cuidian-cuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nacnempsh. Aden nacneshun uba ampenushe qeshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

²“Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh. ³Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh. ⁴Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoaposh tied icbo nashunquidon.

⁵“Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

⁶“Adsho isash tied icbo nadposh: Nëid, con madombo abentsëqui nec. Ëbi cudasaid nec. Aidi tsyuec con tied yacno nidmembi. Aidi chosho isun, Tied icbon madombo nec, qeshun bëdamboen istsiash, qeshun aton madombo nidmeposh.

⁷“Aden nidmiac ancuenquio chosho isash, Tied icbon madombo choeque. Is. Aton papa unësan aton papa yacpadec icbo icoanushe qeshun tied icbo nuqui icnun aidi cuesunenuna, quecuededposh tied icbo nashunquido.

⁸“Adec onquetanquin aton icbon madombotsen bedshun cuesuneshun daquënë uaid mabudacquin nebudposh. ⁹Adoacsho tantiashun ¿atotsi tied icbon napec? Naden naindac. Utsibëd aton tied yacno nidshun abi nashunuidboed cuesuneshun utsibo abi nashunquido icmendac —quepondash Esus.

¹⁰Aden chuishumbic Esusën: —¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia.

“Shubu uanuequidën buintad isuidaids utsin abia nitsinaid icoaposh. Adquiobidi Nuquin Papan chuimiaid matsesën tantiauidaids iquendac.

¹¹Nuquin Papan naid bëdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidënquio tantiec”

—quepondash Esus Nuquin Papan chiampidquio chiec. Nuquin Papain shubu abentsëquën abi tantiaquido yuedanquid nendac, quequin utsi chiacbimboec abibi chiadquin Esusën chuibampondash.

¹² Adsho tantiash, Èbitedishun isuidaidbimboecnuc chuibanec quequin tantiec isadaidbo tsusiobo Esus bedtiadquo icpondash. Adnubien Esus onquesho dadpen-shun tantiabededpondash. Dadpen icsho isash dacuèdcuededec Esus bednu quenquo yec nidanepondash chieshëmëncquido isadaidbo tsusiobo.

Bec cho quequin bedshunquid nec, quequin chiaid

(Mat 22.15-22; Duc 20.20-26)

¹³ Isadaidbo tsusiobo nidshun padiseyobo edodesbobèdta istuidshun: —Nëidon Esus icsamboen chuimetsiash —queshun aido Esus yacno nidmepondash. ¹⁴ Aden nidmiac Esus yacno choshon abentsëcshun Esus nadopondash: —Ambia tantiaquid, matsesën tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin èbi chui. Tantianu. Shocosh piucquid bec cho quequin bedshunquid, isadaidpembo ancaquid, Sesad cuëmëdquid nec. ¿Aden meniaid bëdambo iquec, quequin Nuquin Papan chiaidta nepec? ¹⁵ ¿Adambi menepeba? —quepondash padiseyobobèd edodesbo Esus caic.

Adoaquien, Èbi icsamboen chuimenuc adec onquec, quequin ambibi tantiec: —Shocosh piucquid bec cho ma isnu —quepondash Esus.

¹⁶ Adsho tantiashun bëpondash. Adoaquien: —Sananquin isme. ¿Tsutsibimboecnuc dada uaid iqueque? Chui. Tantianu —capondash Esusën.

Adoaquien: —Isadaidpembo ancaquid, Sesadbimboecnuc dada uaid nec —quepondash.

¹⁷ Adoaquien: —Ai, aidën na nec. Aid bec cho, queshe meneta. Adembidi Nuquin Papa Nuquin Icbo icquin, Nata, cacpadomboen naban —capondash Esusën.

Aden bëdamboen chuisho tantiash, Bëdamboenshenda tantiapec, quequin ambibi tantiec Esus chieshëncquido tabadcuèdedpondash.

Abuc tabadequi, ¿mitsicquidën chido neque? chui quiaid

(Mat 22.23-33; Duc 20.27-40)

¹⁸ Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash: ¹⁹ —Moisesën dada uapampid nad iqueque. Tantia. chuinu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiadbimboec ma icpanuna, quequin chuipampid nec —quepondash saduseyobo. ²⁰ Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. ²¹ Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën ²² aton utsi unësan aid chidobidi bedshun tishmiambo yec unësoapondash bacuë nibëdquo yec. Adecbidi dadatedi unësbudnepondash. Adecbidi chidotsen unësoapondash. ²³ Adec unësash abuc tabadequi, ¿Mitsicquidën chido aid icpatsiashe? Chui. Tantianu —capondash saduseyobon Esus chuiquin.

²⁴ Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. ²⁵ Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec matses uincuenash unësesa iquec caidesa nendac. ²⁶ Adembidi unësash uincue-

naid tantianu qeshun ¿Moisesën dada uaid isenquioda ictionda? Aidën cuëtempì abibi nêdênqesho istanec midtuidquin nadec Nuquin Papa onqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën.²⁷ Nuquin Papan chiacpadpenquiocquin Moisesën dada uapampid nec quequin mimibi muaquin chienda. Chuinu. Tanta. Unësaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan tantiendac —quepondash Esus matses uincuenta iquec quequin saduseyobo tantiamenuec.

Naden nata quequin chiaid ¿mitsicquid adquidpadquid utsi nibêdpec? quiaid

(Mat 22.34-40)

²⁸ Adec Esusbêd saduseyobo onquecuedednubien tsusedpabon nadomboen nata quequin chiaid tantiamequid abentsêc chopondash. Bêdamboen Esusën saduseyobo chuisho tantiash Esus icsamboen chuimenuc aidtsen: —Ëmbitsen tantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibêdpec? —quepondash.

²⁹ Adoaquien Esus nadpondash: —Nêid chiaidpadquid utsi nibêdeque. Chuinu. Tanta. “Nuquin Icbo Nuquin Papa nec. Nuquin Icbo Abentsêcquiobi iquec.³⁰ Adquid icsho ëbi tantiaquid isash bêdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquio yec Nuquin Papa bunacpadquiec icnu quec bêdamboec tabadta. Adembidi ambi tantiacpaden tantianu quequin adombota. Adembidi aid tantiaquin bêdamboen nabanquiota.³¹ Aden nabanquin Nuquin Papa bêdambo icmequin utsibo adembidi bêdambo icmequin nabanta. Ëbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibêdec —quepondash Esus.

³² Adoaquien Esus icsamboen chuimenuc choboed nadpondash: —Mimbi chui-boed abimbo iquec. Nuquin Papa abentsêcquiobi iquec. Aidpadquid utsi nibêdec.

³³ Adembidi, ëbi tantiaquid isash bêdambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bêdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bêdamboen nabanquiota quequin chuitequidpadquid utsi nibêdec. Aden Nuquin Papa bêdambo icmequimbi utsibo adembidi bêdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibêdec. Aden naquid Nuquin Papan bêdamboen isendac. Aden naisa, Con na Nuquin Papa menenu, qesho Nuquin Papan bêdamboen istiapimbo iquendac —queoapondash choboed.

³⁴ Aden choboedën bêdamboen chuioasho tantiash: —Nuquin Papan shubu abentsêquën tabadaid mimbi bêdamboen tantiatsempoc —quepondash Esus.

Adoac Esus icsamboen chuimenu quetiapimbo icpondash utsibo.

¿Tsuntsin mado Quidistu nepec? quiaid

(Mat 22.42-46; Duc 20.41-44)

³⁵ Abi icsamboen chuimenuquid utsi nibêdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin

nadopondash: —Nuquin Papan chomiaidquio tsusedpa Dabidën mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu. ³⁶ Naden Nuquin Papan Mayanën Dabid chuimiampic:

“Icbo utsi icsho mibi chiembique. Tantia, mado, quequin chiec Icbo Dapa nadpampic:

Ëquë con dayun abiucquio cainec tsadec cho ma mibi chieshënquidtedi mimbi nami-aid ma icpanu,”

quequin chuipampic. ³⁷ Aden Nuquin Papa icbo dapanquio aton dayunquio chomiaid chiec Dabid pado, Con icbo nec, quiashic, ¿mitsipadquiec, Con mado nec, queopampic? Nuquin Papan chometequid, aton mado, Dabidën icbo yec ¿mitsipadectsi Dabidën tsyuecquid icoapec? —quepondash Esus abibi chiadequi.

Aden chiec onquesho tantiash badedquio tantiatiadquio yampondash utsibo. Bëdamboen chiec, quequin comapenen tantiapondash.

Nuquin Papan chiaid tantiamequidon chuisho tantienda quiaid

(Mat 23.1-36; Duc 11.37-54; 20.45-47)

³⁸ Aden tantiamequimbi Esusën nadopondash: —Tsusedpabon nadomboen nata quequin chiaid tantiamequidën chuibansho tantienda. Aido nadquid iqueque. Tantia. Tsusiobimboec isadnu quiash abi dasiuidaid ënapen icquid dasiuidtenequid aido nec. Adecbidi tantiaquidquio yec tsusiobimboec isadnu quiash aton mat-ses dadpen yacno capuquid nec. ³⁹ Adomboembidi ëbi isoanu quiash Nuquin Papan chiaid chuibante shubun puduedash tsusiobëd tsadec. Adomboembidi ismenu quiash isedquido dadpen yacno choash shubu icbon dayunquio tsadoaic. ⁴⁰ Aido bëdamboen nashumbimboen nianten na ampequid nec. Adembidi bëdambocquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

Nuquin Papa tantiaquin nianten meniaid

(Duc 21.1-4)

⁴¹ Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacnentsiash quequin aton na bedtequid bë-bëquin sandobansho isec tsadpondash. Adec tsadquin isquimbi aton na dadpen icquidën aton na bedtequid sando-sandonobi ⁴² aton na daëdpactsëcquidquio nianté choquimbi aton shocosh piucquid daëdquiobictsëcquid sandopondash aton na utsi nibëdquiocnoc.

⁴³ Adosho isun abëd icquido chomeshun Esusën nadopondash: —Abimbo chiembique. Tantia. Nianté aton na bedtequid dayun uanu quenquioctsëcquin Nuquin Papa tantiaquiquin sandoquidquio nec utsibon aden sandoenquiocnobi. ⁴⁴ Utsibon aton na bedtequid dadpen uesenquiocquin sandobededposh. Aido daëdpactsëc icquid sandoacbimboen sandoquido nec quequin tantiembi. Adquidpenquio nianté nec. ¿Bednun tedtsimbi dayunoape? quenquiocquin aton na daëdquiobictsëcquidi nibëdquiocnoc sandoposh nianten. Dadpen icquid sandoacbimboen sandosho aid isembi —quepondash Esus.

Nuquin Papa tabadte shubu uashunaid chic-chicte chiaid

(Mat 24.1-2; Duc 21.5-6)

13 Aden chianec Nuquin Papa tabadte shubu uashunaidën puduenubien: — Nuquin Papan shubu cuënote nacnenaid bëdaidquio iqueque. Is, Ico — quepondash abëd icquid abentsëc Esus caic.

² Adoaquien: — ¿Nëid shubu dapa isecta ne? Shubu uaquin cuënote dapa tsindonëdaid mimbi nëbi isaid chic-chicac nibëdquiendac —quepondash Esus.

Abitedi naimbudte tauanun ismete chiaid

(Mat 24.3-28; Duc 21.7-24; 17.22-24)

³ Aden chiashic auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aidted icpondash. Utsibon tantienquiocnoc aidon: ⁴—Cuënote nacnenaid nebudte mimbi chuiboed ¿mitsipadën nebudte icpeque? Tantianu. Èbi chui. Adembidi aidi tauanun ismete ¿atotsi icoapeque? Tantianu. Aid chuioa —capondash.

⁵ Adoaquien Esusën nadopondash: —Muaquin chiaid tantiamane qeshun Nuquin Papan chiaid isban-isbanquiota. ⁶ Nuquin Papan chomiaid nebi quec muaquid chochoendac. Aid chosh, quequin chiac utsin-utsinquien, Abimbo caic, quequin tantiabededendac. ⁷ Adecbidi cuesnancuededec quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëndenda. Ad icnuc abitedi naimbudte ushë choabi iquendac. ⁸ Ai, adquio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiec yacno nidaid ishcedendac canchednuec. Adecbidi bunquiotte iquendac. Aidedi ic-samboshëcquid taëyendac.

⁹ “Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac. ¹⁰ Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec. ¹¹ Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

¹² “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesia icquin aton papan chiaid niacquin adembidi aton titan chiaid niacoaquin cuesunemendac. ¹³ Esus tantiaquid chieshëquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaid mimbi iquendac.

¹⁴ “Adnubien Nuquin Papa chieshënte ushë choendac. Aid chonoc Edusaden yacno abi chieshëquid dapa choash, Nuquin Papa caid nebi, quiash Nuquin Papa tabadte

shubu uashunaidën tsadendac. Adsho isash cuesunenushe quiash anoentsëqui icquido cuenenquiocboedi ma cuempanuna. Abimbo chiembique. Bëdamboen tantiatia caimbi. ¹⁵ Adecbidi shubu macano pada-padapambo yacno tabadquido yec umanuc dectatote uaid dectandoaidën budanec con na bednu quenquio yec cuenta. ¹⁶ Adecbidi aton tied nantan tabadquid yec aton dashcute bëntsecquid chicshun dectanaid bednuec bidiadenquio yec badedquio cuenta. ¹⁷ Bacuë usunquid adecbidi bacuë chishmequin buanquid badedquio cuentiapimboesh mëyampec. Adquid tantiec utsibo unësquio icchitec. Nuquin Papa chieshënte ushë icsamboshë iquendac. Adnuc badedquio cuenta. ¹⁸ Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuided-chuidedta. Adoac ma badedquio cuempanu. ¹⁹ Comapenen Nuquin Papa chieshëntin abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac. ²⁰ Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedi nibëdtsiandac. Ëbi tantiaquid ambi cuënaido tantiec, Chën, quequin Nuquin Papan ëmendac. ²¹ Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquio icta. ²² Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshëntidombidi nadatiambocquin nabanendac. Adosho isun ëbi tantiaquidëmbi utsinutsinquien tantiauidtsendac adquid. Nuquin Papapenquio aid nec, quequin Nuquin Papambo tantiatia. ²³ Ad iquendac quequin chiombique. Ad icnuc chieshenquiocquin Nuquin Papan chiaid tantiaquiota —capondash Esusën.

Nuquin Papan madombo choaid

(Mat 24.29-35, 42-44; Duc 21.25-36)

²⁴ Aden chiash abi onquec: —Adnubien Nuquin Papa chieshënte ushë nidan inchëshquio yanendac. Badiadën ushëbëdtabi inchëshën chënquequid nibëdquiocnoc unës uaindac. ²⁵ Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanashbëd icquido ¿mitsimbo nuqui cuempeba? quendac.

²⁶ “Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquio iquequi ëbi choasho isendac matsesën. ²⁷ Adnubien Nuquin Papan uaido mayan bëdabo, Ëmbi nidan, cac nidanendac. Nuquin Papan cuënaido bednuec nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido —quepondash Esus.

²⁸ Aden chiashic: —Abi chiembique. Tanti. Suc seccuduquiac nëbi cunquecuenec, quequin matsesën tantiec. ²⁹ Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta. ³⁰ Abimbo chiembique. Tantiata. Ëmbi chuibamboed naimbudabicnuc ëmbi chuibamboed tantiaquidën tsyuecquido naimëdbudenquio iquendac. ³¹ Aden matsesën isnubien nidaidbëdi abu ënëdendac. Ëmbi chiaidtedi abimbo yec adquiouidi iquendac.

Nëid ushëntiquio tauadoendac, quetiapimbo matses iquec quiaid

³² “Adnuc nëid ushëntiquio Nuquin Papa chieshëntin tauaindac quetiapimbo matses iquec. Ambi uaido mayan bëdabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsëcquobien adquid tantiaquid nec.

³³Aid tauadote ushë choaid tantiatiapimbocquin Nuquin Papan chiaid niacmane qeshun isbanquin nabanta. ³⁴Nad iqueque. Tantia. Chuinu. Utsibo yacno nidnun abëd tabadquido naden chuiposh. Min utsibo chieshënenquiocquin shubu isquid icta quequin chianec nidposh. ³⁵Adec icbo nidan abi choate ushë mimbi tantienquio iqueque. Bëshunenquiocquin tantiaquiota. Inchëshbudtsëqui choapat-siash, quequin tantiata. Adembidi inchëshpotsembo chopatsiash qeshun adem-bidi tantiaquiota. Adembidi, cachina cuëdanubi chopatsiash, qeshun isucunshun tantiadenequiota ³⁶ëmbi tantienquiocnoc con icbo chochitondac, qeshun. ³⁷Adquiecbidi bëdamboec tabadquin Nuquin Papan chiaid isted-istedta Nuquin Papa chieshënuquidën niacmenushe qeshun —quepondash Esus.

Esus cuesunete bunaid chiaid

(*Mat 26.1-5; Duc 22.1-2; Uan 11.45-53*)

14 Adashic, bëyuc tishaid unësmenuequid aton shubu datamenuequin Isadaidbo tsusedpabon nidaidën capuquid yuaded cuesunepampic. Aid tantiaid ushëbëdtabi pan bidisquesa tantiaid ushë Pascuas caid daëdec ushash choendac. Aid chonoshe qeshun isadaidbo tsusiobon Esus nibëmbededpondash. ²Aden nibënc: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nëishun comapenen nuqui cuestsiashe —quepondash isadaidbo tsusiobo.

Esus unësec qeshun nacbimboen noadte machiunte chiaid

(*Mat 26.6-13; Uan 12.1-8*)

³Adnubien Betania caid yacno tabadquin Esusën Simonën shubun puduedshun pepondash. Simon daushacbimboecquid, nami mishac tantiadenquiocquid icsho Esusën bëdamiaid nepondash. Adec puduedshun pec tabadnubi comapenec noadquid bëec chido puduedpondash. Piucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

⁴Aden machiuinsho isash utsibo nëishun: —¿Atotsieshun machiuino? ⁵Noadte menequin piucquid dadpen bedshun aton na nibëdquid dadpen menetsiandac —quec onquecuededpanëdash Esus machiuimboed chido chushcaic. ⁶Aden chushcasha tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bëdaidquio nec. ⁷Badiadquidën-badiadquidënquiec ënëdenquio yec aton na nibëdquid ënabi iquec. Aidi menenu qeshun mimbi menepec. Èbien nashuntiapimbo iquendac. ⁸Èbi unësabincnuc nëid chidon tantiaquin chococanuequin nacbimboen noadte machiuimpaboc. ⁹Abimbo chiembique. Tantia. Nuquin Papan shubu abentsëquën tabadaid chuiquimbi ëbi machiuimboedën naidtsen tantiaquidon chuiben-chuibenendac —quepondash Esus.

Esus bedmembali, Udas quiaid

(*Mat 26.14-16; Duc 22.3-6*)

¹⁰Adnubien Udas Iscadiote, Esusbëd icquid abentsëc, Esus bedmenu, quianec isadaidbo tsusiobo yacno nidpondash. ¹¹Adec nidequi isadaidbo tsusiobo yacno choshon Esus mibi bedmembali quequin chuituidac bëdambo icpac caondash aido. Adembidi: —Esus ëbi bedmesho isun piucquid mibi menembi —quecuededpac caon-

dash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

Nidaidën capuquidded cuesuniaid abèd icquidobèdtan piaid

(*Mat 26.17-29; Duc 22.7-23; Uan 13.21-30; 1Cod 11.23-26*)

¹² Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiemi nacnempatsia? —quepondash Esusbèd icquido.

¹³ Adsho tantiash Esus abèd icquid daèd chiec nadpondash: —Edusaden yacno nidquimbi dadan acte bèsho istuidash tsibananec aidbèdi nidta. ¹⁴ Aden aid tsibanec puduedash, ¿Èbi tabadte quènè mitsimbo iquec? èbèd icquidobèdtan penu, quiosh chuiquid, quequin shubu icbo chuita. ¹⁵ Aden chiac buanshun dectatomesun abuc quènè dapa mibi ismendac. Ambo pete sante cuate iquendac. Ashunquio penun nacnenta —quepondash Esus ambi daèd chuimiad caic.

¹⁶ Aden chiac abèd icquid daèd Edusaden yacno nidquin Esusën chiacpadomboen bèquedshun tsibananash puduedshun penun nacnempondash.

¹⁷ Adnubien inchëshbudtsèqui aid daèdtsèqui yacno Esusbèd icquid utsibo chopardash. ¹⁸ Adec choash pec tabadnubien: —Abimbo chiembique. Tantia. Èbèdtan pequid abentsècshun isadaidbo tsusiobo èbi bedmendac —quepondash Esus.

¹⁹ Adsho tantiash, Icsambo iquec, quequin tantiec: —¿Èbida chienquio ique? —quepondash abèd icquidtedi.

²⁰ Adoaquien: —Mibèd icquid nebi, quec mibitedi. Padnuen abentsècshun èbèd-tambi pete cuëshën ènè punshun pequidën èbi chieshënquido bedmendac. ²¹ Nuquin Papan chuimiapadomboen aton madombo chidon tishac matsesaid èbi unès uate anoentsèqui yanec. Èbi bedmequid icsamboshë iquendac. Abi cuidte icsamboshë icnushè qeshun aidi tishenquiocpatecnèdan —quepondash Esus.

²² Adashic pebededquin pete bedshun Nuquin Papa chiec onquetanquin pete cuësh-cuëshun abèd icquido menebanquin: —Nèid pete cuëshë èmbi piaid con dad-abèd daèdacadquiec Esus unèsash abi tantiaquid èbi icnuc Esus èbèdi iquec quequin tantiata —capondash Esusën.

²³ Adembidi dèshote bedshun uba caid actequid icnuc Nuquin Papa padpiden chuishun abèd icquido menebanac apondash.

²⁴ —Nèid acquin Esusded Nuquin Papan cuidac aton intac siebudpamboec unèshposh. Aton madoded cuidshun Nuquin Papan èbi padenquio iquec quequin nèid acquin tantiata. ²⁵ Uba caid ènè nidaidëshun padpiden aquenquiocquimbi Nuquin Papan shubunshun actequid chuca mibèdtambi aquendambi —quepondash Esus abèd icquido caic.

²⁶ Aden chiash Nuquin Papan naid chiec cuèdènanec macuësh Odibos caid yacno nidoapondash.

Esus tantiesa nebi quequin Petedon chuite chiaid

(*Mat 26.30-35; Duc 22.31-34; Uan 13.36-38*)

²⁷ Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unès uaimbi. Adosho isash abèd icquido cuenec cuëshèd-cuëshèdendac,”

quequin Nuquin Papan chuipampid nec. ²⁸ Unës uac uincuenash Cadidia yacno ëbia nidoaindabi. Mibitsen ambo nidta —capondash Esusën abëd icquido chuiquin.

²⁹ Adoaquien: —Esus tantiaquid nebi quenquo utsitedi icnuc ëbien padenquo iquec —quepondash Petedo.

³⁰ Aden Petedon chuisho tantias: —Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac —quepondash Esus Petedo caic.

³¹ Adsho tantias: —Esus tantiaquid mibi icsho mibi aidbëdta unës uaimbi, cac, Esus tantiesa nebi, quenquo iquendabi —quepondash Petedo comapenec onquec. Adecbidi Esusbëd icquidtedi onquepondash.

Quetsemani caid yacno choash tabadaid chiaid

(*Mat 26.36-46; Duc 22.39-46*)

³² Adashic cuëte odibo caid dadpen icsho Quetsemani quequin cuënacno choash nidtuidash: —Nuquin Papa chuinuec udi nidebique. Nëmbobi tabad —quepac caondash Esus abëd icquido caic.

³³ Aden chianec Petedo, Acobo, Uan nëidted cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapiambo iquec, quequin tantiec unësquioshë yampondash. ³⁴ Adquo iquec: —Ëbibi unësquioshë yec udictsëc nidebi. Chieshtomane qeshun nëmbobi tabadquin Nuquin Papa chuiban —quepac caondash Esus ambi nëid 3ted, Cho, caboed chiec.

³⁵ Aden chianec udictsëc nidash Nuquin Papa chuinuec nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec. ³⁶ Aden chuishumbic: —Papa, mimbi natiapiambo ictequid nibëdec. Adquid icquin matses cuidtequid bedshunquid con mado icmenquo iquembi qeshun mimbi adoenuioctsiandac, Papa. Ëbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

³⁷ Aden chiash choquin abëd choboed 3ted icquid usho istuidec Petedo caic: —Simon, ¿ushecta ne? ¿Ëbibi chieshmane quiash yuecpectsëc iquec ushenquo yec tabadtiapimboda icco? ³⁸ Chieshmane qeshun Nuquin Papa chuita Nuquin Papan chiaid niacmenuequidën Satanacaidën chiaid tantiamane qeshun. Chieshenquo iquebi quiash dacuëdash badedquo mibi chieshendac —quepac caondash Esus.

³⁹ Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash. ⁴⁰ Adtanec choashumbic abëd chobedo adecbidi ushacsho istuidoapac caondash. Ushcasquieq tabadec, Ushenquioccobi, quequin chuitiapiambo yec otacquio tabadpac caondash.

⁴¹ Adnubien padpidec nidoashun Nuquin Papa chuioatanec choec: —¿Uimabudashta tiboquec ushec ne? Padi. Ushenquo yec isucun. Nuquin Papan madombo chidon tishac matsesaid ëbi icsho nëbimbobi ëbi chieshëndidon bedmeque. ⁴² Nidtoash ëbëdi nid. Ënden choaye. Is —quetuidpac caondash Esus abi bednuec choquido isec.

Esus bedshun buante chiaid

(*Mat 26.47-56; Duc 22.47-53; Uan 18.2-11*)

⁴³ Aden chuinubien Esusbëd icboedquiobi Udashbëd matses dadpen chochopondash. Cho-choquid utsi-utsiec chështe sanampamboec chonobi utsi cueste

sanampamboec chopondash. Aided Udasën chiac isadaidbo tsusiobon chomiaido nepondash.

⁴⁴ Esus bednuequid tantiamenuen ambiabi Udasën: —Ëmbi tanchoccaid mimbi bedtequid nendac. Aidquiobi bedshun buanta. Cuenushe qeshun bédamboen ista —capac caondash. ⁴⁵ Aden chiashic aidobëdi choquimbi: —Icbo —quequin Udasën Esus tanchoccatuidpondash.

⁴⁶ Aden Udasën tanchoccasho isun Esus bedpondash. ⁴⁷ Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

⁴⁸ Adnubien: —¿Cuesanquid Esus nec, qeshun utsin cueste sananubi utsibon chështe sananec ëbi bedecta cho-choec ne? ⁴⁹ Badiadquidën-badiadquidënquiec Nuquin Papa tabadte shubu uashunaid umanuc daquënë uaidën tabadquin matses tantiamenuen chuibanibombi mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic. ⁵⁰ Adec onquesho tantishun cuenquin abëd icquidtedishun Esus niampondash.

⁵¹ Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënquidon bedpondashi. ⁵² Aden bedac dasiuidte bédaidquio nianec dadauidquio cuempondabi.

Isadaidbo tsusiobo iccuededacno Esus buante chiaid

(Mat 26.57-68; Duc 22.54-55, 63-71; Uan 18.12-14, 19-24)

⁵³ Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash. ⁵⁴ Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuête cuëec tsadpondash Petedo. ⁵⁵ Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash. ⁵⁶ Abimbo chiacbimboen dadpenhshun chuibededpondash. Aden chuiquin abentsëcshun chiacpadomboen chienquiocquin utsin chuiopondash.

⁵⁷ Adnubien, Chuinu. Tanta, qeshun Esusën chiacbimboen utsi uain chuipondash utsibon. ⁵⁸ Aden chuinubien utsi onquec: —Naden Esusën chuisho tantiom-bique. Tanta. Chuinu. “Nëid, Nuquin Papa tabadte shubu uashunaid chicbanendambi. Aden chicbanshumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash —quepondash utsi. ⁵⁹ Aden abentsëcshun chuinubi utsin aden chienquiocquin chuipondash.

⁶⁰ Aden chuisho tantish isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tantuanu —capondash isadaidbo tsusio dapan Esus chuiquin.

⁶¹ Adsho tantish ëcbedenquio yec otacquio nidsho isash: —¿Nuquin Papan chomiaidquio, Quidistu caid, Bédambocquidën mado nebi, quecta mibi ique? —queoapondash isadaidbo tsusio dapa Esus caic.

⁶² Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiuquio tsadash abu ushun ëbi chosho matsesën isendac —quepondash Esus.

⁶³ Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui? ⁶⁴ Nuquin Papa icsamboen Esusën chuisho mimbi tantioc. ¿Mida-paden mimbi chieque? Tantaranu. Chui —capondash isadaidbo tsusio dapan tsusio utsibo chuiquin.

Adoaquien: —Icsambo iqueque. Unës uametiad —quecuededpondash.

⁶⁵ Adsho tantiashun Esus dacuishtuaquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquio mibi neque. Ëbi chui. Tantaranu —capondash Esus chuiquin.

Adnubien cuenushë quequin Esus bedshun sondadon comapenen cuesbededpondash.

Esus ëmbi tantiacmaidquio nec quiaid

(*Mat 26.69-75; Duc 22.56-62; Uan 18.15-18, 25-29*)

⁶⁶ Adnubien Petedo umanuc daquënë uaidën tsadnubi isadaidbo tsusio dapan yua chido chopondash. ⁶⁷ Choshon Petedo cuëte cuëec tsadsho isun: —Nasaded caid yacnocquid Esusbëd icquid mibi nec —capondash.

⁶⁸ Adoaquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuo yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

⁶⁹ Adec Petedo ambo tsadsho chido yuaidën istuidtanquin padpiden: —Esusbëd icquidquio nëid nec —quequin anocquido chuioapondash.

⁷⁰ Adoaquien: —¿Aidbëd icquidtabi nedi? —quepondash Petedo.

Adnubien yuecpectsëc yash: —Aidbëdi Cadidia yacnocquid mibi nec —quepondash ambobidi tabadquido.

⁷¹ Adoaquien: —Ëmbi tantiacmaidquio nec quequin abimbo chiemi. Ëmbi abimbo chienquio icsho ma ëbi chian anëdënquiacno Nuquin Papan nënepanuna —quepondash Petedo comapenen chiec.

⁷² Adnubien cachina padpidec cuëdpondash. Adsho tantiashun, “Cachina daëdec cuëdabicnuc ëmbi tantiacmaidquio Esus nec, quequin mimbi chiendac tedestedec onquequin,” quequin Esusën chioshi quequin tantiec unësquio yanec shubianquio-pondash Petedo.

Pidato yacno nidshun Esus meniaid

(*Mat 27.1-2, 15-31; Duc 23.1-5, 13-25; Uan 18.28-19.16*)

15 Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus mëtaneshun buanshun isadaidpembo ancaquid Pidato caid menepondash. ² Aden meniac Pidato: —¿Isadaidbo ancaquidta mibi neque? Ëbi chui. Tantaranu —capondash Pidaton Esus chuiquin.

Adoaquien: —Mimbibi aden chuipayoc —quepondash Esus.

³ Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquoio yec Esus tsadpondash. ⁴ Adec tsadsho isun: —¿Ëcbedanenquoio yec otacquioda tsade? Mibi icsaid dadpen nëidon chuibanec —Pidaton caqui ⁵ adquiecbidi Esus tsadpondash. Adec tsadsho isash ¿Mitsipadquidquoio Esus nepec? Utsimbien, Icsapenquiocquid nebi, quequin chuipec, Aden chienquoio Esusën iquec, quequin ambibi tantiec Pidato tsadpondash.

⁶ Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoaquien ismequin, Nëid nidme, cac nidmedenepadenec. ⁷ Aden chuidenequin ambi quënën nauedmiaid Badabas cuëmëdquid nepondash. Aidëmbi utsibobëdtan Domanobo bunenquiocquien cuesquin tauasho isun bedmeshun quënën nauedmepac caondash. ⁸ Adnubien Pidaton seta utsin quënën nauedmiaid abentsëc ambi nidmiondacadpaden nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën nauedmiaid abentsëcta mimbi nidmepatsia —quecuededpondash aido Pidato caic.

⁹ Adec onquesho tantiash Esus nidmetiadquiocquien Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash.

¹⁰ Esusbidi tsusio icpec matses quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash. ¹¹ Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen. ¹² Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

¹³ Adoaquien: —Cueste nitsinshun dectan —quec comapenec cuëdcuededpondash isadaidbo.

¹⁴ Adoaquien: —¿Atotsi icsa uaosh? —quepondash Pidato.

Adoaquien: —Cueste nitsinshun dectan —queoaic comapenec cuëdcuededpondash.

¹⁵ Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe qeshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

Sondadon Esus mamëshumbededaid chiaid

¹⁶ Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash.

¹⁷ Choshon dashcute abichobicquid bëdaidquio bedshun ancanquid dasiuidacimb-boecnuc dasiuinshun pinchuc-pinchucquid mauete uashun Esus matoncashun ¹⁸ ancanquid cuënacpaden cuënec: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. ¹⁹ Adoquimbi ancanquidën sanante cueste bëdaidquiobimboecnuc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash. ²⁰ Aden mamëshumbededquin mëyanshun dashcute bëdambocquid ambi dasiumboed dachicshun aton dashcutebi dasiuiinshun cuesten dectanuequin Esus buampondash.

Esus cuesten dectante chiaid

(*Mat 27.32-44; Duc 23.26-43; Uan 19.17-27*)

²¹ Aden abi dectante cueste Esusën buantiapimboconoc nidquimbi abi datanquid cueste chiadtometanquin buamepondash sondadon. Abi datanquid Sidene caid yacnocoquid nëbi Edusaden caid dëuequiacnoësh choquid nepondash. Adecandedo, Dupo chedon papa Simon cuëmëdquid niøndash. ²² Aden cueste Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. ²³ Ambo choshon uba sicaid paëacsho paëmbocquid dauë cacushtanquin meniäc aquenquiocondash Esusën. ²⁴ Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tëchun sandoshon cadotanequin dada uatsaidëmpi puduemiaid isbanquin Esusën dashcute bedbampondash.

²⁵ Ushë dectatoec 9 yanuc Esus cuesten dectampondash. ²⁶ Esus dectanaid mapino dada uaid cueste podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash. ²⁷ Cuesunetanquin ampequid daëd ëquë dectambudcuenshun nënantanquio Esus dectampondash. ²⁸ “Dectanquin icsaquidbëdta dectanendac,” quequin Nuquin Papan chuimiampicpadembi napondash. ²⁹ Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamënshumbedepondash. Adec cuenquin mamënshunquin: —Nuquin Papa tabadte shubu uashunaid chicbanshun daëdec ushquin chuca uaimbi, quequin chiec mibi onquiondaque. ³⁰ Abimbo chuiquid yec unëstiapimboconoc nebi quianec mibibi budta —cabidanepondash.

³¹ Aden cuenquidën chuinubi adembidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquecuedec: —Utsi-utsien bëdamequimbi utsi unëscasho uincuemeboed yec mëtoaccaid abembi chiquidtiapimboconoc nec —quepondash isadaidbo tsusiobo Esus caic. ³² —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidën mamënshunubi abëdta dectanaidën adembidi chuioapondash.

Esus unës uate chiaid

(*Mat 27.45-56; Duc 23.44-49; Uan 19.28-30*)

³³ Adnubien ushë cuembocnoc 12 yanan inchëshquio icboedi ushë budec 3 yanuc uëshëmbo yanoapondash. ³⁴ Ushë 3 yanuc: —Eloi, Eloi, çlama sabactani? —quequin aton papa chiec Esus comapenec cuëdpondash. Aton onqueten: Papa Edoen, çatotsieshumbini bidiadquin isenquio ique? quec adpondash Esus.

³⁵ Aden Nuquin Papa Esusën chuisho tantiaquido, Nuquin Papa cuënëc, quenquio yec: —Edias cuëneque. Tanta —quepondash.

³⁶ Aden tantianubi badedi titinqueshun sicaid mucambocquid nëcushtanquin puntanquin cueste dëdectanshun acmenuequin ëccuëscadonequi: —Chiata. Edias Esus bedec chonoshe caimbono —quepondash.

³⁷ Adnubien comapenec cuëdec Esus unësbudpondash.

³⁸ Esus unësbudnubi abi inchëshacimboecnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec. ³⁹ Adec Esus cuëdbud-cuëdbudec unëso isash: —Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

⁴⁰ Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuctsëcquidën tita, aidi Osen tita nepondash. Ut-sibic Sadome nepondash. Aidon Esus ancuenquio diadsho isbededpondash. ⁴¹ Aidon Esus Cadidia caid yacno capusho isun abi nashumboedo nepondash. Aidobëd-tan isquido chido utsibo Edusaden yacno choshon Esus buansho isun tsibanquido icpondash.

Esus chococate chiaid

(*Mat 27.57-61; Duc 23.50-56; Uan 19.38-42*)

⁴² Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus tantiaquid utsi nidpondash. ⁴³ Aidi, Ose Adimateya caid yacnoshon tishaid Pidato yacno nidpondash. ⁴⁴ Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unësaccosh? quequin tantiesa icquin sondado chuiquid Pidaton chomeshun: —¿Ada Esus unësosh? —capondash.

⁴⁵ Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

⁴⁶ Adoac nidshun unësaid dabidiate bedshun Esusën dada imbudshun dataneshun macuësh dapa cuënote shëcuë uaquin ambi nacnenaidën nauedshun cuënote dapan bëtashpondash. ⁴⁷ Aden Osen Esus chococasho Madia Mactada caid yacnocquidbëd-tambi Madia, Ose utsin titan ispondash.

Esus uincuente chiaid

(*Mat 28.1-10; Duc 24.1-12; Uan 20.1-10*)

16 Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin. ² Bedtsash badiadtsëcnubi dominco ushë caidën Esus chococano nidanequi: ³ —¿Tsuntsin cuënote shëcnepeba? —quec onquecuedepac caondash.

⁴ Adec onquequin ancuenquio isquien cuënote ënden shëcniac. Cuënote dapa yuëmbocquid nepondash. ⁵ Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiuquio tsadpondash. Aidi isash dacuëdcuededec tabadpac caondash chidobo.

⁶ Adec dacuëdec tabadsho isun: —Dacuëdenquio yec tabad. Esus cuesten dectanaid mimbi nibënaid tantiembi. Uincuenash nidac. Nëmbobi nanac ueuidoshe. Is. ⁷ Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquio utsibobëdta chuituidec nid —quepondash nëbi caniquid chidobo chiec.

⁸ Aden chuisho tantiash uëdëquequi chococaid shëcuënuësh puduenanec titinquec dacuëdec onquenquio yec nidanepac caondash chidobo.

Esus abuc indote chiaid

(*Mat 28.16-20; Duc 24.13-53; Uan 20.11-23*)

⁹ Adnubien abi nibëmboed uincuenshun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. ¹⁰ Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. ¹¹ Esus uincuenash capusho isombi, Madia qesho tantiaish, Aidquio mimbi isambo iquec, quec tantienquio yec tabadcuededpondash.

¹² Adashic tantienquio yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. ¹³ Aden ismiac aid daëdi aucbidi Edusaden yacno nidshun ambi isboed chuiopondash. Adembidi tantienquio icoapondash utsibon.

¹⁴ Adashic, abëd icquidquio 11ted pete sante cuesten tabadnubi Esus chopondash. Adeç choshon: —Uincuenac quequin ëbi isquidon chiaid tantienquio mimbi icpoc. Chobique. Is —capondash Esusën.

¹⁵ Adashic: —Nëbi nidaidtedi yacno nidaneta. Adeç nidshun Nuquin Papan shubu abentsëquën tabadtequid iquec, quequin matsestedi mimbitsen chuiban. ¹⁶ Aden chuisho tantiaquid, Èbi cuidenquiocquin Esuseded Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimboçnoc. ¹⁷ Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquiocboedëmbi tantiaquin ëbi chuibanendac. ¹⁸ Adeçbidi, nisinquio piaqui bidisquenquio iquendac. Adeçbidi, unësmenuequin acmiaqui unësenquio iquendac. Adembidi, utsi unëstsensho mishac bëdanendac. Nuquin Papan nadatiambocquin namiaidënquio adobanendac —quepondash Esus.

¹⁹ Aden chuiquin ënacsho Esus abuc buanaqui Nuquin Papan dayun abiucquio Esus tsadtuidpondash. ²⁰ Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Èmbi abimbo chuiobedquio mimbi isec aidquio tantianeta. Padi. Aidtedi dada uaombi.

DUCASËN DADA UAID

Mibi ismenuequin dada uaquid Ducas nebi.

1 Utsin-utsinquieren ambi naidbëdtabi Esuquidistu chuibanquin dada uaid dadpen iquec. ²Aidon Esuquidistun tauain naidbëdtabi ambi naid utsitedi istedstedquin chuibanquin chiacpaden dada uaidtedi nec. ³Esuquidistu chuibanquin dada uaid isbanquimbi Esuquidistu isnëdaidon chuibanaid tantiaishun aidtedi mibi chuibanquin dada uaimbi, chuiquid dapa, Teyopido. ⁴Abimbo iquec quequin ëmbi dada uaid ma tantianueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. ⁶Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. ⁷Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸Adashic, Nuquin Papa tabadte shubu uashunaid nuntanshun nabanuec padpitemboec Sacadias puduedpanëdash. ⁹Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi dada uatsaidëmpi abia puduenacsho isacpadece Sacadias puduedpanëdash. ¹⁰Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chieq onquecuededpanëdash.

¹¹Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. ¹²Adec tabadsho isash dacuëdampambo iquec, quetanec Sacadias uëdëquiampanëdash. ¹³Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëdenda, Sacadias. Min chido Edisabedën min mado tishendac. Min mado tishacsho Uan cuënta. ¹⁴Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiaish matsses dadpen bëdambo iquendac. ¹⁵Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. ¹⁶Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icbo Nuquin Papa nec, queoaindac. ¹⁷Min mado Nuquin Icbo bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icbo bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid

naquidquio iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

¹⁸ Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

¹⁹ Adoaquien: —Ëbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiacpadomboen mibi chuimenuen chomiaid nebique.

²⁰ Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

²¹ Adnubien noadte bëda tauite quënënuësh Sacadias baded puduenenquiocsho isash, Baded puduenenquiopec, quequin cainec tabadpanëdash utsibo. ²² Aden yuen caimbudnubien puduenash onquenequi buëd cuëdenquioapanëdash Sacadias. Adsho isun: —Ushquin isacimboen isbenac —cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

²³ Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. ²⁴ Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. ²⁵ Adec tabadec Nuquin Papan naid chiec nadec Edisabed onquepanëdash: —Bacuë usundoenquiopec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundomiaid nebi —quepanëdash Edisabed.

Esus tishendac, quequin chiaid

²⁶ Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. ²⁷ Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. ²⁸ Adec choshon: —Mibi tantiaquin Nuquin Papan bëdamboen icmiaidquio mibi nec. Nuquin Icho mibëdi tabadendac —capanëdash Cabadedën.

²⁹ Adoaquien Madia, ¿Atotsi quepeba? quequin otacquio tantiec tsadpanëdash. ³⁰ Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque. ³¹ Chuinu. Tantiata. Bacuë usundoshon min mado mimbi tishendac. Tishun, Ëmbi tishaid Nuquin Papa yacno yuedanquidquio nec, quequin Esus cuënta. ³² Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuededpendac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. ³³ Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

³⁴ Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵ Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënuquio Madia usundomiaid, icsa nibëdquid, Nuquin Papan madombobi nec, utsibon cabededendac. ³⁶ Min utsi Edisabed macho icquin bacuë

usundoenquiocboedëmbi nëbi bacuë usundoac. Usundoenquiocquid nec, cabeded-boedëmbi nëbi ushë 6ted nidan usundoac. ³⁷ Utsin natiapimbo yaid Nuquin Papan naidquio nec —quepanëdash Cabaded.

³⁸ Adoaquien Madia: —Ai, con Icbon namiaidquio nebi. Ma mimbi chiacpadquio icpanuna —quepanëdash. Aden chiaquien Cabaded nidpanëdash.

Madia Edisabed isedec nidaid

³⁹ Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash. ⁴⁰ Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. ⁴¹ Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed ⁴² Madia chiec nadec comapenec onquepanëdash: —Nuquin Papan bëdamboshë icmiaidquio mibi nec. Mimbi usundoaid adembidi bëdamboshë icmiaidquio nec. ⁴³ Nuquin Icbon tita mibi yec çatotsi quiash ëbi isnuec cho? ⁴⁴ Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. ⁴⁵ Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

Nuquin Papan naid chiec Madia cuëdënaid

⁴⁶ Adnubien Madia nadec onquec cuëdëmpañdash:

“Nuquin Papan naid chuibanu. Tantia.

⁴⁷ Èbi usundomiaid Nuquin Papa yacno Yuedanquid nec, quequin tantiec bëdambo iquebi.

^{48–49} Èbi ambi namiaid icsho bëdamboen isquin Nuquin Papan naosh.

Adoacsho, Nuquin Papan bëdamboshë icmiaid Madia nec, quequin abitedishunquio tantiabededendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

⁵⁰ Ambi chiaid tantiaquin naquid icsho,

Mimbi naid icsa cuidnu, quenquiocquin abëdi shubu abentsëquën tabadacbimboec-nuc adquid tabadmendac.

Adenuidi tantiaquin nampidquio abi iquec.

⁵¹ Nadatiambocquin naded-nadedquidquio Nuquin Papa nec.

Èmbibi tantiacpadomboen naimbi, quequid icsho isun Nuquin Papan cacumiac uano tabadendac.

⁵² Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

⁵³ Ambi chiaid tantiec bëdamboec tabadte comapenec bunquiacpaden naquidquio Nuquin Papan icmendac.

Con na ëmbi bedaiduidi tantiec bëdamboec tabadebi quequid unësacsho cacumiac uano tabadendac.

⁵⁴ Chuiquid Dapa Abentsëcquiobi chidon usundoendac, quequin ambi tsusedpabo chuimiampicpadomboen Nuquin Papan ëbi usundomiaic.

⁵⁵ Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiaic.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”
 quec comapenec cuëdënash Madia ënëdpanëdash. ⁵⁶ Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

Uan tishaid

⁵⁷ Adnubien Edisabedën bacuë tishthe ushë chonoc dada bacuë tishpanëdash.
⁵⁸ Bacuë tishenquiochoedëmbi nëbi aton bacuë tishosh, qesho tantiashton matses ado shubu utsinquidotedi Edisabedbëd bëdambo icpanëdash.

⁵⁹ Adashic, Stedec ushtanquin Edisabedën madon shui dëbid dëteshunu qesho tantiasht utsi cho-chopanëdash. Choash puduedash bacuëmpi aton papa cuëmëdquid cuënu quenubi ⁶⁰ Edisabed: —Padenquio. Abi cuëmëdquid Uan nec —quepanëdash.

⁶¹ Adoaquien utsibo: —Min matses utsi Uan cuëmëdquid nibëdec —qeshun
⁶² Sacdias ismenuequin mëdante uic-uiccaquin: —Abi cuëmëdquid chui. Tantiu —capanëdash utsibon.

⁶³ Adoaquien dada uate bedshun, Abi cuëmëdquid Uan nec, quequin dada uaqin Sacdiasën ismepanëdash.

Adoaquien: —¿Abimboda mimbi cape? —quecuededpanëdash utsibo.

⁶⁴ Adnubien Nuquin Papan oncameoac Nuquin Papan naid Sacdiasën chuibampanëdash. ⁶⁵ Aden chuibansho tantiasht: —Dacuëdampambo iquec. ¿Atotsiepashun onquenquiochoedëmbi nëbi onquequin Nuquin Papan naid chuibampec? —quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanëdash. ⁶⁶ Adoac: —¿Mitsipadquidquio aton mado nepec? —quecuededpanëdash Sacdiasën mado Nuquin Papan tantiamiaidquio isbededec.

Sacdias oncamiad

⁶⁷ Adnubien Uanën papa Sacdias Nuquin Papan Mayanën oncamiac nadec Esus chiech onquepanëdash:

⁶⁸ “Nuquin Papa isadaidbon Icbo nec, quequin chuibanuna.

Aidën isadaidbo icsaquid icsho cuidnushe quiash abided cuidaquid chomiac mayan icsan yuaid icboedi aidën mënchictequidquio isadaidbo iquendac.

⁶⁹ Abi mënchicquid nadatiamboquid nendac.

Tsusedpa Dabidën tsyuecquidquio aid nendac.

⁷⁰ Ambi chuimiaidon chiampicpadembi

Nuquin Papan adquidquio icmianac.

⁷¹⁻⁷³ Nuquin tsusedpa Abadauan tantiaquin

Nuquin Papan ambi chiampicpadembi nuquin tsusedpabo

aton tsyuecquidbëdtabi abi chiehëquido

nidiapimbo yacnombo abi yacno yuedanquid

Nuquin Icbo Abentsëcquiobi nec.

⁷⁴ Abi cudasquin mënchicaid yec dacuëdenquio yec

Nuquin Papan namiaidombo iquendac.

⁷⁵ Adquid yec icsaisa abipadquio bédamboec tabadquid icsho nuqui aidën isendac ënenquiocquin.”

Adec Esus chiec onquiashic naded aton mado chiec Sacadias onqueoapanëdash:

⁷⁶ “Adnubien nëbi Nuquin Papan chomiaid chuibanquidquio mibi nec, quequin utsibon mibi cuëndac, mado.

Nuquin Icbo choec, quequin utsibon tantiabicnuc bëyuc tantiashun abi chuiquidquio mibi iquendac.

⁷⁷ Adquid icquin mibi icsaquid icsho cuidnushe quiash

abided cuidadquid tantiasho isash Nuquin Papa mibi icsaid tantienquio yec bëpiscudendac,

quequin chuibanquid mibi iquendac, mado.

⁷⁸ Nuquin Papan matses tantiaquin naquidquio icquin

abipadquidquio icsaisa abi yacnoshon chomiaidquio iquendac.

⁷⁹ Aidën tantiamiac unësash abi iquendac.

Adquid shubu abentsëquën tabadacpadecec tabadendac,

quequin mimbi chiendac, mado,”

quec Uanën papa Sacadias Nuquin Papan Mayanën oncamiac onqueapanëdash.

Matses nibëdacno Uan tabadcueniaid

⁸⁰ Adashic, Sacadiasën bacuë Uan caniacsho Nuquin Papan tantiamiaid yequi matses nibëdacno tabadcuenepanëdash ambi Esus chuibante ushë choabicnuc.

Esus tishaid

(Mat 1.18-25)

2 Adnubien, Doma yacno tabadquid, isadaidbo ancaquid dapambo, empedadod caid, Aucusto cuëmëdquid icpanëdash. Aucuston, ¿Ëmbi ancaido isadaidbo aton nabëdta tedtsi iqueque? Isquin tantiata, quequin Sidenio cuëmëdquid chuibpanëdash.

² Sidenio nidaid Sidia caid yacnocquido chuiquid, cobednadod caid icpanëdash.

³ Min tsusedpa tishampid yacnoshon mibi cuëmëdquid mitsanabëdtabi dada uanuec nidtan, cac abëd icquido buanec isadaidbo nidanepanëdash.

⁴ Adec utsibo nidnubien Ose aton chido Madiabëdi nidaid Cadidia caid shubu dadpen icquid Nasaded caid yacnoësh puđuanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanëdash.

⁵ Aton chido Madia bacuë nua usunquidbëdi Ose abi cuëmëdquid aton nabëdtabi dada uanuec Beden yacno chopanëdash.

⁶ Ambo choquin aton bacuë nuambo usumpanëdash.

⁷ Ambo matses dadpen cho-choash shubu abitedi puduedash tsucus-tsucustsëcquio tabadnuc nidaidën capuquid tabadacno puduedshun ambi bëyuc usundoaid Madian tishpanëdash.

Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

Obeca pemebanquin buanquido Nuquin Papan uaidon chiaid

⁸ Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash.

⁹ Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chënquenuc obeca pemebanquin buanquido dacuëd-

cuededpanëdash. ¹⁰ Dacuëdsho isash: —Chiaid bëda chuinuec chobique. Dacuëdenquiocquin tantiata. Chuinu. Ëmbi chuitequid bëda mibi, Cuishon, quetequid nendac. ¹¹ Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. ¹² Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquieci uesho istuidash, Nuquin Papan chomiaid Quidistu nec, mibi quependac. ¹³ Aden chiec Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chiec naded cuëdëncuededpanëdash:

¹⁴ “Nuquin Papa abucquio tabadquid abitedi uaquidquio bëdamboshë iquec.

Nuquin Papan bëdamboen isaido ma abëdi tabadpanuna,”

quec cuëdëmpañëdash. ¹⁵ Adec cuëdënnash Nuquin Papan uaido mayan bëdabo abuc nidoapanëdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiameboed bacuëmpi isnuec Beden yacno nidnu. Nid —quianec nidpanëdash. ¹⁶ Adec nidshun nidaidën capuquidën pete santen bacuë nanacsho istuidpanëdash. ¹⁷ Isanec nidquimbi ambi isboedbëdta ambi tantiaboed chiac ¹⁸ tantiaquidtedi: —¿Midapadquidien capec? —quecuededpanëdash. ¹⁹ Aden obeca pemebanquin buanquidon chiaid tantiash bëpiscudenquio yec Esusën tita, Madia, ¿Mitsipadquid con bacuë nepec? quequin bëpiscudenquiocquin tantiadenepañëdash.

²⁰ Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ëmbi isboed ëmbi tantiaboed Nuquin Papan naidquio nec —quequin chiec onquecuededpanëdash.

Nuquin Papa tabadte shubu uashunaid yacno Esus buanaid

²¹ Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bëdan chiacpadomboen cuënaid Esus nec, quequin Madian aton mado cuëmpanëdash.

²² Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdtan Osen Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepañëdash. ²³ Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. ²⁴ Mimbic bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bëdamboequid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpanëdash.

²⁵ Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpanëdash. Aidi isadaidbo chuiquid dapa abentsëcquiobi cainquidquio icpanëdash. Aidi Nuquin Papan aton Mayan meniaidquio icpanëdash. ²⁶ Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bëdamboen isaidquio choacsho unësabiquin isendambi, quequin tantiapanëdash. ²⁷ Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio

nanuen aton bënëbëdtambi Madian Esus bëpanëdash. ²⁸ Esus bësho isun Simeyonën Esus bedshun icucquin Nuquin Papan naid naden chuibanpanëdash:

²⁹⁻³⁰ “Abitedishun Icho icquin mimbi ëndenquio chiampid nëbi nëid isembi.

Nëid isash unësmene quenquio yec, Cuishon, quec unësebi, Papa.

³¹ Mibi yacno yuedanquid nëbi isembi.

Nëid mimbi chomiaid icsho ma abitedishunquio ispanuna.

³² Nëidëmbi mimbi tantiapaden chuibanquin

isadaidbo bëdambo icmendac,”

quepanëdash Simeyon.

³³ Aden chuibanubi, ¿Midapadquidquien con mado capec? quequin Madian aton bënëbëdtambi tantiapanëdash. ³⁴ Esus chuibanquin naimbudshun Osebëdta Madia chiec Simeyon: —Bëdambo icmiaid mibi daëdi nec —quepanëdash. Aden chuishumbic Madiuidtsëqui naden Simeyonën chuiopanëdash: —Chuinu. Tantiata. Nëid bacuë tantiesadaidbo utsi-utsiec icsho Nuquin Papan uquë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bëdambo iquendac. Min bacuë, Esus, Nuquin Papa yacno puduedmianquid nec, qesho tantiashun matses dadpeshun icsamboen chuided-chuidedendac. ³⁵ Adsho ambi ompoquin naid icsabëdta ambi tantiaid icsa tantiaquid min mado iquendac. Adobanquin ismiac unës uasho isash mibibi unësquio yec, Con madon natiambo iquebi, mibi quendac —quepanëdash Simeyon Madia chiec.

³⁶ Aden Simeyonën chuinubi Nuquin Papan naden nanu quequin chiaid chuiquid chido Ana cuëmëdquid icpanëdash. Aidën papa Panued icpanëdash. Aidën tsusedpa Ashed icpampic. Aid aton bënënen bedac abëdi seta 7ted matamiash tabadnubi ³⁷ aton bënë unëspanëdash. Aton bënë unësan Nuquin Papa tabadte shubu uashunaid yacno nidshun Anan tabadec nidenquiocquin Nuquin Papauidi tantiaquin buna mëmumbudnequin Nuquin Papa chuidenapanëdash. ³⁸ Ambo icnubi Esus bësho isun Anan Nuquin Papan naden nanu quequin chiampicpaden chuipanëdash: —Isadaidbo ic-saquid icsho cuidnu caid mënchictequid nëid nec —quepanëdash Ana Esus chiec utsibon tantianubi.

³⁹ Adashic, Nuquin Papan naden nata quequin chiapaden nainash Osebëd Madia nidaid Cadidia caid yacno nidoash Nasaded caid yacno abi tabadacno choapanëdash. ⁴⁰ Ambo tabadnubi aton bacuë Esus dada bëdambo yec canicuepanëdash. Aidi comapenen tantiaquidquio Nuquin Papan bëdamboen isaidquio icpanëdash.

Canicuenash Nuquin Papa tabadte shubu uashunaidën Esus tabadaid

⁴¹ Adashic, Ëmbi bëyuc tishaid unës uamenushe qeshun intaquën aton shubu shëcuë ëcnoshcacsho isun aidon bëyuc tishaid unësmenquiocquin Nuquin Papan uaid mayan bëdan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiapadequi setan-setanquiecid nitnenapanëdash. ⁴² Adecbidi, Esus abi tishaid seta 12ted yanash canicuenash anibëd Edusaden yacno nidpanëdash. ⁴³ Adec ambo nidashic nami uabicquid petequid tantiaid ushëtedi tantiec tabadtenapanëdash. ⁴⁴ Adec ambo tabadquin nainash Esus ambobi icnubi tantienquio yec Madia Osebëd auëshquio nidoapanëdash. Adec nidash inchëshbudtsëqui abëd chobedo yacno capuquin Esus nibëmbenapanëdash. ⁴⁵ Aden nibënquin istuidabi yec Edusaden yacno padpidec nidoapanëdash. ⁴⁶ Daëdec ushquin nibëshun Nuquin Papa tabadte shubu uashunaid yacno pudued-

shun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onquecuededsho istuidpanëdash. ⁴⁷ Adec onquec tsadsho isquin, Bëdamboen tantiaquin chuibanquidquio nëid nec, quequin utsibon tantiabededpanëdash. ⁴⁸ Adnubien, ¿Mitsipadquid con mado nepec? quequin otacquo Madian tantiapänëdash. Aden tantiequi: —¿Atotsi quiash ëbi daëdi tantienquio yec nëmbo choash mibi tabade, mado? Unësqiocrin papabëdtambi mibi nibëmbeniombi — capanëdash anin.

⁴⁹ Adoquien Esus: —¿Atotsieshun ëbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe? ⁵⁰ Aden Esusën chuisho anibëdtan Osen tantienquiocpanëdash.

⁵¹ Adashien: —Nidnu. Nid, mado —anin cac cacuidenquio yec Nasaded yacno anibëdi choash tabadquin Madian chiaidbëdta Osen chiaid tantiaquin Esusën nadenepänëdash. Adec tabadnubi aton titan ambi isboedbëdta ambi tantienquio yaid bëpiscudenquiocquin tantiadenepänëdash.

⁵² Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matsesën isbededpanëdash.

Esus choec, quequin Uan mentoanquidën chiaid

(*Mat 3.1-12; Mad 1.1-8; Uan 1.19-28*)

3 Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnoquido ancaquid dapa icnubien Ponsio Pidato cuëmëdquid, nidaid Udeya caid yacnoquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnoquido ancaquid, cobednadod caidbidi icpanëdash. Ancanquid aitedi icnubien Edodesën utsi, Uedipe cuëmëdquid nidaid Itudeya caid yacnoquidobëdi nidaid Tëdaconite caid yacnoquido ancaquid, cobednadod caidbidi icpanëdash. Ancanquid aitedi icnubien Disanias cuëmëdquid nidaid Abidinia caid yacnoquido ancanquid cobednadod caid icpanëdash. ² Ancanquid aitedi icnubien Anasbëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacdiasën mado matses nibëdacnombo tabadshobi Nuquin Papan, Ëmbi chiaid chuibanta, capanëdash. ³ Adoac acte Odan caid cuëmano capuquimbi naden chuibampanëdash. Mimbi tantiaid icsa ënta. Aden ënsho isun mimbi icsamocquin naboed tantienquio yacbimboen Nuquin Papan mibi bëdamboen isendac. Ëmbi tantiaid icsa nainquiocquin ënu, mibi qesho tantishun mibi acten mentono, quequin cho-choquid cho-choquidquien Uanën chuidednepänëdash.

⁴ Èndenquimbo Nuquin Papan tantiamiac Isayasën Uan chuiquin dada uampicpadequi Uan icpanëdash. Naden Isayasën Uan chuiquin dada uapampic:

“Matses nibëdacnombo tabadquidën ëcauanshun naden chiendac:

Nuquin Icbombo choeque. Aid tantianu, quequin mimbi tantiaid icsa ëmbanta.

⁵ Umbo ancuenquio chosho isnu quequin cuembocnoc andëdshun

ambescabanacimboen abimbo chuiquidënuo chiaid tantianu, quequin mimbi tantiaid icsa ëmbanta.

⁶ Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,”

quequin Isayasën Uan tishabicnuc chuiquin dada uapampid nec.

⁷Aden ënden chiampicpadequi Esus bëyucanequin acten mentomenuec cho-choquid dadpen icsho Uanën nadopanëdash: —Nisin bacuë anipadquid nec. Aidbimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuidnushe qeshun ambi mënichtequid icta, quequin mibi chiosh? ¿Aidën chiaid tantiashta acten mentomenuec cho? ⁸Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquio icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquio nebi, quequin tantienda. Abadauampadquid ambi chiaid tantiaquid bunquin, Matses icta, Nuquin Papan cac cuënotebi matses iquendac —quepanëdash Uan. ⁹Adequi onquebudec: —Cuëte icsatedi matenu, quequin cuëte bacuëesa dëdshun mateshun icbon nëdëncuquin tauiec. Adquiecbidi tantiaid icsambocquid cuëshëdmenu, qeshun bëdamboec tabadaid ismesa cuëshëdmeshun chian anëdënquequid Nuquin Papan nënëndac —quepanëdash Uan.

¹⁰Adoaquien: —Chian anëdënquequid Nuquin Papan nësiate ictiapimbocquin ¿atotsimbi napeba? —quepanëdash iccuededquido.

¹¹Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

¹²Adecbidi ancanquid dapan matses utsin na bedtequid nëidted bedta caidot-sen acten mentomenuec cho-chopanëdash. Choshon Uanën chuibansho tantiasht: —Chian anëdënquequid nësiate ictiapimbocquin ¿atotsimbi napeba? —quepanëdash.

¹³Adoaquien: —Ancanquid dapan chiectedtsëqui bedta. Muaquin mitsana daëd uanuequin bedenda —capanëdash Uanën aido chuiquin.

¹⁴Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

¹⁵Aden Uanën chuibansho tantiasht: —¿Tsutsi nepec? ¿Nuquin Papan chomiaidta nepec? —quecuededpanëdash cho-choquido.

¹⁶Adsho tantiasht: —Mibi acten mentoquidquio nebi. Padnuen ëbipadquidpenquio nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan. ¹⁷Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesha cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. ¹⁸Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

¹⁹Adshumbic, ancanquid Edodesën tantiaid icsatsen Uanën chuibampanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuioapanëdash. ²⁰Aden ambi tantiaid icsa chuibansho

tantiasun Edodesën Uan bedmeshun quënën nauedmepanëdash abitedishun tantianushe queshun.

Esus acten mentoaid

(*Mat 3.13-17; Mad 1.9-11*)

²¹ Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcianec ²² dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec naded aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

Esuquidistun tsusedpabo chiaidtedi

(*Mat 1.1-17*)

²³ Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiasun aton matses nadpanëdash. Osen mado nec, quiash, Nuquin Papan mado nec, quenquio yec matses onquepanëdash. Esusën papapenquio Ose icnëdash. Madia aton tita icbo icnuc Esusën tsusedpabo nëidtedi iquec: aton buchido Edi cuëmëdquid icpanëdash. ²⁴ Aidën papabic Matak cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, ²⁵ aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, ²⁶ aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, ²⁷ aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, ²⁸ aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid, ²⁹ aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matak cuëmëdquid, ³⁰ aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid, ³¹ aidën papabic Medeya cuëmëdquid, aidën papabic Menan cuëmëdquid, aidën papabic Matata cuëmëdquid, aidën papabic Natan cuëmëdquid, ³² aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic Bos cuëmëdquid, aidën papabic Sadomon cuëmëdquid, aidën papabic Nason cuëmëdquid, ³³ aidën papabic Aminidad cuëmëdquid, aidën papabic Adan cuëmëdquid, aidën papabic Eston cuëmëdquid, aidën papabic Pades cuëmëdquid, aidën papabic Uda cuëmëdquid, ³⁴ aidën papabic Acobo cuëmëdquid, aidën papabic Isac cuëmëdquid, aidën papabic Abadauan cuëmëdquid, aidën papabic Tade cuëmëdquid, aidën papabic Nacod cuëmëdquid, ³⁵ aidën papabic Seduc cuëmëdquid, aidën papabic Dacau cuëmëdquid, aidën papabic Pedec cuëmëdquid, aidën papabic Ebed cuëmëdquid, aidën papabic Sada cuëmëdquid, ³⁶ aidën pa-

pabic Cainan cuëmédquid, aidèn papabic Adpashad cuëmédquid, aidèn papabic Sen cuëmédquid, aidèn papabic Noe cuëmédquid, aidèn papabic Damec cuëmédquid, ³⁷ aidèn papabic Matusaden cuëmédquid, aidèn papabic Enoc cuëmédquid, aidèn papabic Aded cuëmédquid, aidèn papabic Macadaded cuëmédquid, aidèn papabic Cainan cuëmédquid, ³⁸ aidèn papabic Enos cuëmédquid, aidèn papabic Sed cuëmédquid, aidèn papa abia uampid Adan cuëmédquid, aidèn papambo Nuquin Papa abia yanampidquio nec. Abi tabadec. Aidedi Esusën tsusedpabo nec.

Satanas Esus icsamete bunaid

(*Mat 4.1-11; Mad 1.12-13*)

4 Adshumbic, Matses nebi, quequin Nuquin Papan chiacpaden nanuen acten mentepanédash Esusën. Aden Uanèn acten mentoaquien Nuquin Papan Mayanèn chiacpadec acte Odan caid yacnoësh puduanec matses nibèdacnombo nidash tsadpanédash. ² Ushë utsi nidash utsi choaid abuctotsëcquiecnuc ambobi tsadpanédash. Aidedi ushquin penquio yash Esus bundopanédash.

³ Bundoacsho isash Nuquin Papa chieshënquid choash Satanás nadpanédash: —Nuquin Papan madombo icquin penun cuënotebi pete icta cata —capanédash Satanásën Esus chuiquin.

⁴ Adoaquien: —Padi: “Peteuidi pec bédamboec tabadtemaid nec,” quequin dada uapampic —quepanédash Esus Satanás caic.

⁵ Adoshombic, macuësh dapa abucquio yacno Esus buanshun Satanásën badedquio nidaidtedi ismebampanédash. ⁶ Ismiash: —Nidaidèn icquidtedishun icbo icmiaidquio nebi. Abitedi con na nec. Èmbi menenu cac aidedi mitsana iquendac. Nidaidèn tabadquidtedi chuiquid dapa mibi icmete bunebi. Adquid mibi icnuc mibi buntequid nibèdendac. ⁷ Nidaidèn tabadquidtedi chuiquid dapa icnu quequin, Con icbo mibi nec, èbi casho adquid mibi icmembi —quepanédash Satanás Esus caic.

⁸ Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min icbombo neque. Aidèn nami-aidquio icta” —quepanédash Esus Satanás caic.

⁹ Adoshombic Edusaden yacno Esus buanshun Satanásën Nuquin Papa tabadte shubu uashunaid macano abucquio tsadumpanédash. Aden tsadunshun: —Mibi Nuquin Papan madombo yec nëuëshquio dacuèdenquio yec pudunta. ¹⁰ Naden dada uapampid iqueque. Tantiá. Chuinu.

“Mibi pudunsho isun, Tscatequin bédamboen budmeta, quequin Nuquin Papan ambi uaido mayan bédabo chiendac.

¹¹ Aidombi min taèn tsasimbocquid tincanushe qeshun uidèn uaquin mibi bédamboen budmendac.”

Aden min Papan chiaid icnuc dacuèdenquio yec pudunta —capanédash Satanásën Esus chuiquin.

¹² Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanédash Esus Satanás caic.

¹³ Aden chiaquien Satanásën Esus icsamboen namenuen tanquin naimbudpanédash. Aden naimbudequi, Padpidemboen èmbi chiaid namenuquin Esus tanun nana, quequin ambibi tantianec Esus nianec Satanás nidpanédash.

Nasaded yacnoquido Esus bunesabo

(Mat 4.12-17; 13.53-58; Mad 1.14-15; 6.1-6)

¹⁴ Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantiapanëdash. ¹⁵ Adnubic, Nuquin Papan chiaid chuibante shubu utsin-utsinqueic puduedcuenequin Nuquin Papan chiaid Esusën chuibampanëdash. Aden chuisho tantiash, Nuquin Papan chiaid tantiaquidquio Esus nec, quec cuëdëncuededpanëdash.

¹⁶ Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanëdash. ¹⁷ Nidtoشو isun Nuquin Papan chiaid Isayas cuëmëdquidën dada uapampid anocquidën Esus menepanëdash. Aden aid meniäc sananquin seccudoabanquin isbanec nadec Esus onquepanëdash:

¹⁸ “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ëmenuen chuibanta caidquio nebi. Aidëmbidi Satanasën yuaid Nuquin Papan bacuë icmenuequin chuibanta caidquio nebi.

¹⁹ Aidën Nuquin Icbon bëdamboen iste chuibanta caidquio nebi.”

²⁰ Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash. ²¹ Adoac: —Nuquin Papan chiaid mimbi tantiaboed nëbimbobi tauadoec —quepanëdash Esus abibi chiadequi.

²² Adoaquien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ictic? —queoapanëdash.

²³ Adoaquien: —Bëdamequid yequi abibi daicsambo yanash bëdamiadacsho isash, Bëdamequidquio nec, quequin matsesën tantiapec, quequin chuiampid nec. Èmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec. ²⁴ Abimbo chiembique. Tantiata —quiaish Esus abi onquec: —Nuquin Papan ëmbi tantiamiacpaden chuibanta caidën abi caniacnoshon chuibansho tantienquiocquid icpec.

²⁵ Èndenquimboshë adomboembidi Nuquin Papan ëmbi tantiamiacpaden chuibanta caid Edias cuëmëdquidën chuibansho tantiesa icpampic. Aidi icnubien isadaidbon bënua chidobo dadpen icpampic. Aido adquid icnubien seta abentsëc chotsëcncu matamec aton pete nibëdquieic yanubi isadaidbon bënua bunc tabadpampic.

²⁶ Adec bunec tabadsho isun, Isadaidbon bënua yacno nidta, quenquiocquin isadaidpembon bënua yacno pemenuc nidta cac Edias nidshun ambi chiacpadomboen isadaidpembon bënua nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsëqui icpampic. ²⁷ Adashic, adecbidi isadaidbo abi daushumbo yacno mishac mishadenquio yacnimboecquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembon abentsëc Naman cuëmëdquid Ediseyon

bédamepampic. Ēbi bédamepec, quequin tantiec aton nidaid Sidia caid yacnoësh choacsho Ediseyon Naman bédamepampic —quepanédash Esus.

²⁸ Aden Esusën isadaidpembo nashumpampid chuisho tantiash iccuededquido isadaidbo comapenec nëishpanédash. Isadaidpembobéd isadaidbo ictiapimbo iquec, quec iccuededquido nëishpanédash. ²⁹ Adec nëishash nidanec nuntanuësh puduenanec shubu ènèdacno nidshun acte dapa quiusudacnombo nebudnuequin Esus buampanédash. ³⁰ Aden nidmiaquien matses dadpen icquid natsusash Esus nidpanédash.

Mayan icsa dapuduedaid cuemete

(*Mad 1.21-28*)

³¹ Adec abi caniacnoësh Nasaded caid yacno nidtanashi nidaid Cadidia yacno nid-
equi Capednaun caid yacno Esus choapanédash. Ambo choash chonoadtemaid ushë
icnuc Nuquin Papan chiaid chuibante shubun puduedshun Nuquin Papan chiaid
chuibampanédash. ³² Aden chuibansho tantiash: —Ambia tantiaquidèn chiacpaden
chuibanquidien Esus nechitec —quecuededpanédash anocquido.

³³ Aden Esusën chuibanubien Nuquin Papan chiaid chuibante shubu nuntan
mayan icsa dapuduedaid icpanédash. Aidi comapenec sidquetanec onquec: ³⁴ —
¿Nasaded yacnocquid Esus caid atotsi quec mibi cho? ¿Ēbipadquidtedi naimbud-
menuecta cho? Ēmbi isaid mibi nec. Nuquin Papan bédamboen isaidquio, icsapen-
quiocquidquio mibi nec —mayan icsan caquien: ³⁵ —Otaquio tabad. Adec tabadec
dapuduenta —Esusën cac mayan icsan abi dapuduedaid tacpanën nebudec icsa uain-
quio yec dapuduempanédash.

³⁶ Adosho isash tantiadempambo iquequi: —¿Chuiquid dapan chuitequidta
neque? Tantiabono. Nadatiambocquin chuibanac mayan icsabo dapuduenchite-
quien nec —quepanédash Capednaun yacnocquido. ³⁷ Aden tantiaquin Esusën
mayan icsa dapuduemiosh, quequin isquidon chuiban-chuibanac Capednaun yacno
dèuequidtedishuntsen tantiapanédash.

Daicsambocquid dadpen Esusën bédamiaid

(*Mat 8.14-17; Mad 1.29-34*)

³⁸ Mayan icsa dapuduemiashic Nuquin Papan chiaid chuibante shubu yacnoësh
puduenanec Simonën shubu yacno Esus nidpanédash. Ambo puduedacsho isun: —
Simonën nachi chumboshë iqueque. ¿Ada aid bédametsia? —caquien:

³⁹ Simonën nachi yacno choash dayunquio nidtuidec: —Chumbocquid daue-
budta —Esus quenubi badedquio dauebudpanédash. Adec dauebudash nidoshon
codocashun Esusbéd icquido pemepanédash Simonën nachin.

⁴⁰ Adshumbic, inchëshbudtsëqui daicsaid utsi-utsien bē-bēpanédash. Aden bē-
bēsho isun damishquin Esusën bédamepanédash. ⁴¹ Adembidi mayan icsa utsi-utsien
dapuduempanédash. Adoac, Nuquin Papan madombobi mibi nec, quec sidquesho
tantiashun: —Nuquin Papan chomiaid nec, quequin ěbi chiec adec onquenda —
Esusën cac mayan icsa ènèdpanédash.

⁴² Adashic, badiadnuc matses nibèdacno Esus nidpanédash. Esus nidacsho isun
matses dadpenshun nibënquin istuidshun: —Nidenquio yec èbēdi tabadta —
capanédash istuidquidon.

⁴³Adoaquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuec nidendabi. Nuquin Papan chomiaid icquin chuibanun nabono —quepanëdash Esus abi nibënquin istu-idquido chiec.

⁴⁴Aden chiashic Nuquin Papan chiaid chuibante shubu utsin-utsinquec pudued-cuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

Abëd tabadmenuen chomiaid

(Mat 4.18-22; Mad 1.16-20)

5 Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash. ²Adnubien masi yacno aton cano daëd nëshun icbon aton nëshaidtedi pambampanëdash. ³Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

⁴Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

⁵Adoaquien: —Icbo, inchëshëmbi nuëcquid bednuen nëshaid nënebenuquin ëbite-dishun bedamboccombi. Mimbi nëshaid nënetan cac nënetanembi —quepanëdash Simon.

⁶Adash shodombo yacno nidshun nëshaid nënetanquin nuëcquid dadpenquioshë bedac nëshaid tèsëdec taëpanëdash. ⁷Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubu-cubutsëcquiocnoc nuëcquid sandoac cano daëd mentoadtsempanëdash.

⁸Adoanec Esus yacno choequi danëshën sebudec shuebudash Simon Petedon: —Icbo, ëbëd iquenquo yec nidaneta. Icsambocquid nebique —capanëdash Esus chuiquin. ⁹Abëd icquidobëdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanëdash Petedo. ¹⁰Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëndenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuequin abuc tabadaid mimbi chuiban-chuibanendac —quepanëdash Esus Petedo caic. ¹¹Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

Daushumbocquid bëdamiaid

(Mat 8.1-4; Mad 1.40-45)

¹²Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

¹³ Adsho tantiashun adquid daushumbocquid mishtemaid nec, quenquiocquin damishec Esus: —Mibi bēdamete bunebique. Mibi bēdamenu —quenubi badedquio bēdampanēdash.

¹⁴ Aden bēdametanec Esus: —Ēmbi naid utsibo chienda. Adenquiocquin isadaidbo tsusiobo ismetanta ma bēdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bēdamo icmiaid cuidtequidquio meneta —capanēdash Esusën ambi bēdameboed chuiquin.

¹⁵ Adnubien Esusën bēdamesho isquidon Esusën bēdamiaid chuibanac matses dadpen Esusën chiaid tantianuec cho-chopanēdash. Adecbidi, daicsambocquido bēdanuec cho-choasho Esusën bēdamepanēdash. ¹⁶ Adashien matses nibēdacnombo nidash Nuquin Papa chiec onquepanēdash.

Dada shēquēquenquiocquid bēdamiaid

(*Mat 9.1-8; Mad 2.1-12*)

¹⁷ Adashic, ushē utsin Esusën chuibanuc padiseyobobēdi Nuquin Papan naden nata quequin chiaid tantiamequid dadpen tabadpanēdash. Utsi-utsiec nidaid Caididia yacnoēsh cho-chonobi utsi-utsiec nidaid Udeya caid yacnoēsh cho-chonobi utsi-utsiec Edusaden caid shubu dadpenquioshē yacnoēsh cho-chopanēdash. Adecaido cho-choash tabadnubien Nuquin Papan nadatiambocquin naquid icmiac matses bēdamenuc Esus icpanēdash. ¹⁸ Aid icnubien dada shēquēquenquiocquid aton din nandoshon aton utsibon bēpanēdash. Aden bēquin shubu nuntan nēnantanquio Esus icnubi ¹⁹ matses tsucus-tsucustsēcquiocsho isash puduedtiapimbo yec macano pada-padapambo yacno dada shēquēquenquiocquid buanec dectatoshon macano chic-chicshun dada shēquēquenquiocquid abi bēquidon imbudpanēdash.

²⁰ Dada shēquēquenquiocquid ěmbi bēaid Esusën bēdamec, quequin tantiaquin bēquidon ambi bēaid imbudsho isash dada shēquēquenquiocquid caic: —Mimbi tantiaid icsa cuidenquio yec bēpiscudtequidquio mibi nendac —quepanēdash Esus.

²¹ Aden chuisho tantiash padiseyobobēd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquio yec bēpiscudquidquio nec —quepanēdash ambibi tantiacpadece onquec.

²² Aidon tantiaid tantiec Esus: —¿Atotsi quiash mimbibi icsamboen tantiec onquepe? ²³ ¿Mimbi tantiaid icsa cuidenquio yec bēpiscudtequidquio nendac ěmbi chaidquio bēdantequidpenda nedic? Adecbidi, ¿Mibi icsamboeboedi mibi bēdanoque. Nidtoash nidta, quequin chiaid bēdantequidpenda nedic? ²⁴ Nuquin Papan chomiaid icquimbi mimbi tantiaid icsa cuidenquio yec bēpiscudtequidquio nendac ěmbi cac ad iquendac. Nuquin Papan chuimiaidquio nec mibitedi camenuen dada shēquēquenquiocquid naden chiembique Tantia. Nidtoash nidquin min di buanec nid —capanēdash Esusën dada shēquēquenquiocquid chuiquin. ²⁵ Adoac nidtoshon aton di bedanec Nuquin Papan naboe chuibanequi aton shubuno nidpanēdash.

²⁶ Adsho isash tantiadempambo yec Nuquin Papan naid chiec onquecuededec tabadpanēdash: —Aden bēdamiaid isenquioeboedēmbi nēbimbobi aid isbempombi —quecuededpanēdash.

Debi, ëbi tsibanec cho, quequin Esusën chiaid

(*Mat 9.9-13; Mad 2.13-17*)

²⁷ Adashic, capucuenequin Debi cuëmëdquid Esusën istuidpanëdash. Debi nec queshumbi Mateyo cuëmpanëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiacpaden Debin utsibon na bedtequid bedbansho isun: —Ëmbi chiaid tantianush ëbi tsibanec cho —Esusën cac

²⁸ Debi nidtoanec aton natedi nianec Esus tsibananec nidpanëdash.

²⁹ Adshun aton shubuno Esus buanshun Debin pemepanëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepanëdash. ³⁰ Aden adquidobëdtan Esusën pesho isash padiseyobo: —¿Atotsieshun mibi chuiquidbëdtan mibitedishun icsambocquidbëdtan pepeba? —quepanëdash Esusbëd icquido caic.

³¹ Aden chuisho tantiasho Esus nadpanëdash: —Ëbi bédamec cho, quenquio bédambocquid iquec. Daicsambocquidien, Ëbi bédamec cho, quendac. ³² Adecbidi, Nuquin Papan bédamboen isaidquio icsho, Mimbi tantiaid icsa ënta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuinuec chondabi —quepanëdash Esus padiseyobo caic.

Buna mëmunaid

(*Mat 9.14-17; Mad 2.18-22*)

³³ Aden Esusën chuibansho tantiashun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquio mibëd icquido iquec. Aidon buna mëmunenquiocquin peshun sicaid actenec —quepanëdash padiseyobo Esus chiec.

³⁴ Adoaquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquio iquec.

³⁵ Yucash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

³⁶ Aden chuibanequi abi Esus onquec: —Dashcute chuca cuëshun dashcute shënbëdta nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec. ³⁷ Adembidi dadpen icquid chodo uashun sandoc. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin. ³⁸ Adembidi, ëmbi ënden tantiaiduidi tantianu, quequin Nuquin Papan nëbi chiaid pausudtequid bëda tantiaiduidi yanec icsabudendac. Mibi adquid iquec, quequin tantiaquin utsi chiacimboen Esusën padiseyobo chuipanëdash. ³⁹ Adashic ambi ënden chiaid tantienquiocboedi nëbi Nuquin Papan chiaid utsi chuibanac tantiaquidquio iquendac —quepanëdash Esus.

Chonoadtemaid ushë tantiaquid

(*Mat 12.1-8; Mad 2.23-28*)

6 Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash.

²Aden pesho isquin padiseyobon: —¿Atotsieshun chonoadtemaid ushën chonoad-peque? Tantuanu. Ëbi chui —capanëdash Esusbëd icquido chuiquin.

³Adoquien: —¿Tsusedpa Dabid caidbëd icquidon piasquin pepampid tantiamboda ique? ⁴Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash: ⁵—Ëbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimi icsamboen naic, quetiapimbo iquebi.

Mëuesadaid bëdamiaid

(*Mat 12.9-14; Mad 3.1-6*)

⁶Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquo mëuesadaid dada icpanëdash. ⁷Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. ⁸Aden cainubien abi chieshënquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

⁹Adsho isashien: —Tantuanu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsiutsiec unëspec? —quepanëdash Esus.

¹⁰Aden chuishumbic iccuededquido isbanquin: —Ëbi mëd —cac Esus mëdequi mëuesadaid bëdampanëdash.

¹¹Adec mëuesadaid bëdansho isashien comapenec nëishash: —¿Mitsipadentsimbi Esus acpe? —quec onquecuededpanëdash abi chieshënquido.

Esusën, Ëbi chuibeneta, caido

(*Mat 10.1-4; Mad 3.13-19*)

¹²Adashic, ushë utsin macuësh yacno matses nibëdacno Nuquin Papa chiec onquenuc nidash inchëshën ushenquio yec Nuquin Papa chiec Esus onquepanëdash.

¹³Badiadshun abëd icquido dadpen chomeshun, Ëbi chuibeneta, quequin 12tedict-sëqui chuipanëdash. ¹⁴Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome; ¹⁵utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; ¹⁶utsibic, Udas, Acobon mado; utsibic, Udas Iscadiote, yuecshun Esus chieshënquido Esus bedmequid. Aitedi, Esusën, Ëbi chuibeneta, caido icpanëdash.

Nuquin Papan bëdamboen isaïdo icnuc ambi icsamboen isaïdo

(*Mat 4.23-25; 5.1-12*)

¹⁷Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho isash Esus nidtuidpanëdash. Nëitted icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen ic-

quid Tido caid yacnoësh choquido; utsibic, Sidon caid yacnoësh choquido. Aido Esusën chuibansho tantianuec cho-choash tabadnubi, Ēbi bēdamepec, quequin tantiec utsibo choash tabadpanēdash. ¹⁸ Adec choquido mayan icsa dapuduedaid icsho isun Esusën dapuduemepanēdash. ¹⁹ Adsho isun nadatiambocquid Esus neque. Mishnu, qeshun mishequi bēdancuededpanēdash.

²⁰ Adshumbic abēd icquidombo isbanquin naden Esusën chuibampanēdash:

—Nēmbo mibi icnuc mitsana nibēdtenesho isun Nuquin Papan bēdamboen isaido iquec abuc nidan con natedi mitsana nendac.

²¹ “Nēuëshquio bundodenesho isun Nuquin Papan bēdamboen isaido yec abuc ēbēd tabadec bundoesa iquendac.

“Nēuëshquio matses Nuquin Papan chiaid tantiesa icsho isash unēsquio yec shubidednequid Nuquin Papan bēdamboen isaid yec abuc nidash ēbēd tabadec bēdambo iquebi quependac adquido.

²² “Esus tantiaquid icsho chieshēnquin pudued cainquio yaid adembidi mua uaquin chuishunaid Nuquin Papan bēdamboen isaidquio nec.

²³ “Adomboembidi ěmbi ěndenquimbo chuimiaiĉ aton matsesēn icsamboen chuishundenetiash. Nidaidēnshun adoaid iquec Nuquin Papa yacno choacsho ambi bēdambo icmi-aid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

²⁴ “Padnuen, con na dadpen iquec, quequin tantiec bēdamboec tabadebi, qesho Nuquin Papan icsamboen isaido mibi nec. Nidaidēnshun mimbi bedteniaiduidi tantiec Nuquin Papa yacno puduedtiapimbocquid mibi iquendac. Nidaidēn bēdamboec tabadquin ěnden bedondaidi mibi nec.

²⁵ “Nidaidēnshun abi bunaidtedi bedquido Nuquin Papan icsamboen isaido nec. Abi bunaiduidi tantiaquin Nuquin Papan chiaid tantianu qeshun tantiatiapimbo iquendac.

“Mitsanauidi tantiec, Bēdambo iquebi, quec mamēnec tabadquido icsho Nuquin Papan icsamboen isaido mibi nec. Adquido Nuquin Papa yacno puduedte bunsho, Padi, cac shubiquiendac.

²⁶ “Bēdambocquid nec, quequin mibi dadpenshun chuisho tantienda. Adomboembidi mua uain Nuquin Papan ěndenquimbo chuimiaiĉpembon chuiampic. Aidon chiaid tantiashun tsusedpabon Nuquin Papan chiaid tantienquio yanampic. Adquido Nuquin Papan icsamboen isaido nec —quepanēdash Esus.

Mibi uimanēnquido tantiaquin nabanta, quiaid

(Mat 5.38-48; 7.12)

²⁷ Aden chiashic abi Esus onquec: —Ěmbi chiaid tantiaquidquio nad iqueque. Chuinu. Tantiata. Mibi chieshēnquido bēdamboen tantiaquin nabanta. ²⁸ Adembidi mibi icsamboen chuiquid bēdamboen chuita. Adembidi, ěbi icsamboen naquido bēdamboen tantiaquin cuidenda, Papa, quequin Nuquin Papa chuita. ²⁹ Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bēdamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata. ³⁰ Utsibic, aton na nibēdquid, Bec cho, qesho meneta. Adembidi utsin mitsana ampesho isun cuidenquiocquin bēdamboen naoata.

³¹ Adembidi ëbi bēdamboen nashuntiadquidi nepec quequin mimbi tantiacpadomboen utsi tantiaquin nashunta.

³² “Ēbēd tantiananquiduidi tantianu, quec ¿bēdamboda mibi icpe? Padenquoio. Adembidi Esus tantiesan abipadquiocquido tantiec. ³³ Adecbidi, Ēbi bēdamboen tantiaquin nashunquiduidi tantiaquin nashunoanu quec ¿bēdamboda mibi icpe? Padenquoio. Esus tantiesan adembidi nashunquidquo nec. ³⁴ Adecbidi, Ēbi menequiduidi menenu, quec ¿bēdamboda mibi icpe? Padenquoio. Esus tantiesan adenuidi menec. ³⁵ Naden nata, quequin chuinu. Tantia. Mibi chieshēnquid icsho aid tantiaquin bēdamboen nabanta. Adembidi mibi meniantiapimbocquid, Bec cho, qesho, Yuecash cuidnanun nanuna, quenquiocquin meneta. Mimbi adosho isun Nuquin Papan mibi bēdamboen isendac. Adobanec bēdambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac. ³⁶ Nuquin Papan abi chieshēnquido nashundeniacpadomboen mibi chieshēnquido nashundeneta —quepanēdash Esus.

Icsambocquid nec, quequin chienda, quiaid

(Mat 7.1-5)

³⁷ Aden chuibanashic Esus abi onquec: —Ēmbi tantiacpadomboen naisa icsambocquid nec, quenda. Adesa abi yacno choacsho Bēdamboquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquoio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquoio yec bēpiscudta. Adquid, Cuidnu, quenquoio yec mimbi icsamboen tantiaquin naid Nuquin Papa bēpiscudendac. ³⁸ Aton na nibēdquid bēdamboen tantiaquin meneta. Adembidi, mibi tantiaquin abi utsibēd bēdamboec tabadtequid Nuquin Papan mibi menendac. Utsi tantiaquin mimbi meniactpadomboen mibi tantiaquin bēdamboen tabadmetequid daēd uashun Nuquin Papan mibi meneoaindac —quepanēdash Esus.

³⁹ Aden chuishumbic utsin tantienquoio ictequid abēd icquido naden Esusēn chuipanēdash: —¿Podquedēn nidnu quec bēshuaid utsi bēyucampecta nidtic? Nidnu, quianec nidec abi daēdi nidaid shēcuē ampaēdpatsiash. ⁴⁰ Adembidi tantianuequidēn abi tantiamequid dēniactiapimbo iquec. Tantiamiac abi tantiamequidpadquid iquendac —quepanēdash Esus.

⁴¹ Adoshombic adembi tantiamequin naden Esusēn chuipanēdash: —¿Atotsi quiaish utsi bētsiadaid pistšecquid isequi mibi bētsiadaid dapa isadtiapimbo icpec? ¿Mibibi bētsiadaid dapa bēbedadabicquin mitsipadentsi mimbi utsi bētsiadaid pistšecquid bedshunuen ispe? ⁴² Adembidi, utsin tantiaid icsa abentsēc icnubien mimbi tantiaid icsa utsi-utsiec icnuc ¿atotsieshun, Mimbi tantiaid icsa ėnta, quequin utsi chuipe? Mimbi tantiaid icsa nibēdacbimboen mimbi chuipeque. Adoenda. Mimbi tantiaid icsa ėnshun utsin tantiaid icsa icsho isun ėmenuequin chui —capanēdash Esusēn.

Cuēte abipadquid aton bacuē nec, quequin chiaid

(Mat 7.17-20; 12.34-35)

⁴³ Adoshombic, adembidi Esusēn chuipanēdash: —Cuēte bēdan bacuē adquiobidi bacuēec. Cuēte icsan bacuē adquiobidi bacuēoaic. ⁴⁴ Chetequid isun cuēte dada matsesēn tantiec. Aden tantiec nisanquidēn bacuē isash, Dadain bacuē nec, quen-

quio matses iquec. Adecbidi, echo bacuë isash, Bata nec, quenquio matses icoaic. ⁴⁵ Adembidi bédamboen tantiaquidën ambi tantiacpadomboen utsi bédamboen tantiaquin nabanendac. Adecbidi ambi tantiacpadec bédamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanëdash Esus.

Tantiaquidquio icnuc tantiauidquid nec, quequin chiaid

(Mat 7.24-27)

⁴⁶ Adoshombic: —¿Atotsieshun, Con Icbo mibi nec, qeshumbi ëmbi chiacpadomboen naisa mibi ne? ⁴⁷ Èbi yacno choshon ëmbi chuibansho tantiaquiashtidshun nadomboen naquidquio iqueque. Chuinu. Tantiata. ⁴⁸ Cunquequid dapan chimeshnushe qeshun shubu uaquidën shëcuë èquëduc uëdëshcashun buintad nitsinquid. Adembidi, natiamianquiecametequid yanabincuc tantesa uainquiocnuec èbi tantiaquidquio icquin ëmbi chiaid papuduedshun adomboembidi nabanquid nec. Adquidën tantesa uainquio iquendac. ⁴⁹ Utsibic nad iqueque. Tantiata. Èquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papudueduidtsacpadomboen nabanenquio yec natiamianquid chonoc abi papudueduidtsaid bëpiscudendac. Adquid uquë nësecatequid nendac —quepanëdash Esus.

Sondado chuiquidën tantiaid

(Mat 8.5-13)

7 Aden iccuededquido chuiquin nainash Capednaun caid yacno Esus nidoapanëdash. ² Capednaun caid yacno choash Esus tabadnubien isadaidpembon sondado chuiquidën yua abi cudasaid unëstiadsëcquio icpanëdash. ³ Aton yua unëstiadsëcquio icnubien, Nënquid bédamequid Esus nëmbobi iquec, quequin utsibon chiac:

—Aidën con yua bédametsiashtidshun —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

⁴⁻⁵ Adoquien: —Ai —quianec Esus yacno isadaidbo tsusiobo nidshun chuituidec: —Sondado chuiquidën chuitan caido nebi. Con yua unëstiadsëcquio iqueque. Esus bédamequid neque. Chuitan, cac mibi chiec chobi. Sondado chuiquid bédambocquid nec. Nuquin Papan chiaid chuibante shubu uamiondaidquio nioshe. Ambi chiacpadomboen aton yua bédametiadquidi mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash. ⁶ Adec aidobëd Esus nidshobi sondado chuiquidën chomiaid utsibo choquin bëquedtuiddash nadpanëdash: —Sondado chuiquidën chomiaid nebi. Aidën chiaid chuinec chopobi. Naden chuita, caposhi: “Padicnuna, Icbo. Icsambocquid nebi que. Mibi bédambocquid iquec con shubun puduedenquioctiadquidi mibi nec. ⁷ Èbi icsambocquid iquec mibi bëquedec nidenquioccobi. Mibi bédamequid yec con shubun puduedenquiocquid mibi yacnoshombi, Bëdanta, mimbi cac con yua bédampec. ⁸ Èbien sondado chuiquid nec. Èmbi nidta cacpadquiequi sondado nidec. Adecbidi, Cho, ëmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi mibi chuiquid —quepanëdash sondado chuiquidën chuitan caido Esus caic.

⁹Adoaquien: —¿Abimbobida cai? —queshun ambi chiaid tantiamenuequin ic-cuededquido Esusën bëisbanquin nadopanëdash: —Chuinu. Tantiata. Sondado chuiquid isadaidpembo ëbi tantiaquidpadquid isadaidbo nibëdec —quepanëdash Esus. ¹⁰Aden chiaquien sondado chuiquidën chuitan caido aucbidi nidoash shubun puduedshun sondado chuiquidën yua bëdamiaid istuidpanëdash.

Nianten mado uincuen uaid

¹¹Adashic, ushë utsin shubu dadpen icquid Nain caid yacno Esus nidpanëdash. Aidbëdi abëd icquido nidpanëdash. Adecbidi matses utsibo dadpen nidpanëdash. ¹²Adec nidequi Nain tsasi uaid quënë shëcuë anoentsëqui choquimbi unësaid bëquido bëquedtuidpanëdash. Unësaid epa icnubi ani niante icpanëdash. Niantebëd Nain yacnoquido dadpen cho-chopanëdash. ¹³Adec cho-choec niante shubisho isash Esus unësquio yec: —Shubienquio yec ënëd —quepanëdash. ¹⁴Adec, Ënëd, quetanec udictsëc nidshun unësaid nanaid Esusën mishnubi abi bëquido nidtuidpanëdash. Nidtuidsho isun: —Abuido, uëtsëdtota —cac ¹⁵uëdsëdtoash tsadec unësboed onquepanëdash. Adsho isash ani caic: —Në, unësboedi min mado uincuenoshe. Abëdi nidec nid —capanëdash Esusën.

¹⁶Aden unësaid uincuemesho isash cho-choquido: —Adopenshenda uincuemec —queshun Nuquin Papan naid chuibampanëdash. Aden chuibanec: —Nuquin Papan matses bëdamboen isnuen ambi chomiaidquio nuquibëd icmiosh —quec isquido onquecuededpanëdash.

¹⁷Aden isash nidshun unësaid uincuemiaid isquidon chuibansho isadaidbon nidaid Udeya caid yacnoquidon tantiabempanëdash. Adembidi chiac dëuequidontsen tantiapanëdash.

Ëbitedishun cainaid mibi nec, quequin Uanën chiaid

(Mat 11.2-19)

¹⁸Adnubien, acten mentoanondaid Uan cuëmëdquid quënë nauedaid icsho abëd icquidon Esusën nabanaid chuibampanëdash. Adoaquien abëd icquido daëd chomeshun Uanën nadopanëdash: ¹⁹—Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

²⁰Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanëdash Uanën chomiaido Esus caic.

²¹Aden chiaquien icsambocquid bëdamequinc, mayan icsa dapuduedaid dapuemequinc, bëshuaid bëdamequinc caquin Esusën ismebampanëdash. ²²Aden nabanquin nainashic: —Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bëdanosh. Adembidi pashun tantiabenos. Adembidi unësaid uincuemiosh. Adembidi aton na nibëdquido tantiamenuequin Nuquin Papan chiaid Esusën chuibanos, quequin Uan chuitanta. ²³Ëmbi aden nabansho isun tantesa uainquiocquin Nuquin Papan bëdamboen isaidquio nen-

dac, Esus quiosh quequin Uan chuitanta —quepanëdash Esus Uanën chomiaid daëd chiec.

²⁴ Adashic, Uanën chomiaido nidambi iccuededquido tantamebanuec Uan chiec Esus nadpanëdash: —¿Atotsi isnuec matses nibëdacno nidonda? ¿Cunquequidën ish-cunaid isnuecta nidtionda? ²⁵ ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta nidtionda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec. ²⁶ Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. ²⁷ Ëbi cain naden Uan Nuquin Papan chuimiampid nec:

“Mibi choec quequin chuibanquidba chomembi.

Mibi choec quequin chuibanac ambi tantiaid icsa ënshun mibi cainquidombo iquendac.”

Aden ëbi cain Uan chuiquin dada uapampid nec.

²⁸ “Adembi Uan chuibanu. Tantiata. Nuquin Papan chuimiaid Uampadquid mat-sesën tishaid utsi nibëdec. Aidën ëbi chotequid chuibanac choshon ëmbi nabansho isenquio icposh. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec —quepanëdash Esus.

²⁹ Aden Esusën chuibansho tantiash: —Nuquin Papan naid bëdambo iquec —quepanëdash Uanën mentobanondaido. ³⁰ Utsiboen ambi tantiaid icsa ënenquio ic-quin Uan Esusën chuisho tantiash, Nuquin Papan naid bëdambo iquec, quetiapimbo aido icpanëdash. Aido padiseyobobëd matsesën naden nata quequin chiaid tantamequido icpanëdash.

³¹ Aden Uan chiash Esus: —¿Nuquin Papan chiaid nëbi chuisho tantiesa mitsi-padquid nepeque? ³² Adquid chuinu. Tantia. Ambi tantiacpaden naisa icsho isash bacuëbo yac bimboec nëishun mimbi icsamboen tantiec. Adembidi ambi tantiac-paden naisa icsho isun Nuquin Papan chiaid tantienquio iquec. Adquidën Nuquin Pa-pan chuimiaidën nabansho icsamboen ispec. ³³ Nua cubudquin pesa Uan icsho isash, Mayan icsa dapuedaid nec, queposh Uanën chuisho tantiesa. ³⁴ Ëmbi peshun ac-sho isec, Nua peshun tantienquiocquin acquid nepec. Aidbidi icsambocquidobëd icquid nec, ëbi caposh. ³⁵ Aden tantienquiocquid, Bëdamboen tantianu, queshun bë-damboen tantiaquidënquio chuibansho tantiash abi tantamequidpadquid iquendac —quepanëdash Esus.

Chidon Esus tanoshcaid

³⁶ Adashic, Ëbi yacno pec cho, padiseyobo abentsëcshun cac aibbëd nidash shubun puduedash pete santen cuëshnudash Esus uepanëdash. ³⁷ Adec Esus puduedash uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash. ³⁸ Aden bëequi Esus yuedacno choash puduedshun abi bëdamequid Esus istuidash, Ëbi bëdamequid bëdambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaidën taucshun taë tachoccabanshun noadte bëdan chidon tanoshcapanëdash. Chidon aton na bedte-

quid dadpen menequin comapenec noadte bëda bedshun Esusën taë tanoshcapanëdash chidon.

³⁹ Chidon adosho isash Esus yuedquid, Simon caid, abibi onquec: “Ëmbi yuedaid Nuquin Papan chuimiad iquec, Ëbi mishquid icsambocquid nec,” quequin chido mishmenquio icpec, quepanëdash Simon.

⁴⁰ Adoaquien, tantiaquidquio icquin Esusën: —Mibi tantiamequin chuinu. Tantiata, Simon —capanëdash.

Adoaquien: —Aden chuiban. Tiantianu —quepanëdash Simon.

⁴¹ Aden tantiashun Esusën Simon ambi tantiaid icsa tantiamenuen utsi chuiquin nadopanëdash: —Bec cho. Yuecshun menenun nanuna, quepondash daëd. Abentsëcshun dadpen bedshunubi utsin daëdpactsëc bedshumpondash. ⁴² Aden bedshunshun yuecshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquiocquin tantiec bëpiscudenquio icpec? —quepanëdash Esus Simon caic.

⁴³ Adoaquien: —Ambi dadpen meneshun cuidenda caidien nechitec —quepanëdash Simon.

Aden chiaquien: —Ai, bëdamboen tantiaquin mimbi chioc —quiash ⁴⁴ Simon ismenuec Esus chido yacmi bidiadshun naden chuipanëdash: —Min shubun puduedacsho mimbi taë pante ëbi menenquioccoc. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. ⁴⁵ Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh. ⁴⁶ Bëchin manoshcanesa mibi iccoc. Padnueni nëid chidombi noadte bëdan tanoshcaniosh. ⁴⁷ Adembidi mibi chiembique. Tantiata. Mayan icsa dadpenshun tantiamiaid icsho nëid chido bëdamepombi. Aden bëdamiashic abi icsaid tantienquio yec bëpiscudpobi. Ëmbi aden nac ëbi comapenen tantiaquioquin ëbi nashunquidquio nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiaactsëc tantiatsec mibi nashumënecc —quepanëdash Esus Simon caic.

⁴⁸ Aden Simon chiashic chido caic: —Icsaquid nec, quenquiocquin icsainquio yac bimboecquid mibi isembi —quepanëdash Esus chido chuioaic.

⁴⁹ Adsho tantiash: —Icsainquio yac bimboecquid mibi isembi, quec ¿mitsipadquid Esus nepec? —quepanëdash iccuededquido. ⁵⁰ Aden iccuededquidon tantianubi chido caic Esus: —Ëbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquio yec nidta —quepanëdash chido caic.

Chidobo abi nashunquido

8 Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yac bimboec nidaidën tabadaid chuibenepanëdash. Abi bëdamequid tsibananecc chidobo nidpanëdash. ² Ambi mayan icsa dapuduemiadobëdtan ambi bëdamiadon Esus tsibanampanëdash. Madia, Macada yacnoshon tishaid chedon Esus tsibanampanëdash. Mayan icsa 7ted dapuduemiad Madia icpanëdash. ³ Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash.

Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(*Mat 13.1-23; Mad 4.1-20*)

⁴ Aden chuibenias tabadtuidtsëcnubi ambi chuiquin tantameboedo cho-choquin tsibanampanëdash. Cho-chosho isun, Mibibimboecnuc chiemi, quenquiocquin Esusen nadopanëdash: ⁵—Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec. ⁶ Utsibic, cuënote dadpen samëdacno secac badedquio dëyucuidtsash nidaid ëquëduc tapun nidenquio iquec bidiquequid. ⁷ Utsibic, nisanquid dëyucacno secac aidbëdi dëyucash canidouidsacsho nisanquidën bëtinnac unësquid. ⁸ Utsibic, nidaid bëdan secac dëyucash canias dadpen ëshëendac —quepanëdash Esus.

Aden chuibanashic: —Tantiate bëdambocquidën ëmbi chuiboed tantiapec —quepanëdash.

⁹ Adoaquien: —¿Mitsipadquid tantiaid mimbi chuiboed icpec? Èbitedi tantiaequin chuiua —capanëdash abëd icquidon.

¹⁰ Adoaquien: —¿Mitsipadequini Nuquin Papa yacno tabadpe? queboedëmbi nëbi mimbi tantiabene. Padnuen utsibon tantienquio yaid aid iquec. Aden chiac:

“Èshë bëdambocquid icquimbi tantiesa icquin ma Nuquin Papa yacno isenquiocpanuna.

Adembidi tantiate bëdambocquid icquimbi tantiesa icquin ma abimbo chiaid tantienquiocpanuna”

—quepanëdash Esus.

¹¹ Aden chiashic: —Èmbi chuiboed nad iqueque. Tantia. Chuinu. Tiedën caniquid pete ëshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec. ¹² Podquedën nidaid tsasimbocquidbimboecquid nad iquec. Nuquin Papan chiaid tantias papuduedtiapimboesho Satansën bëpiscudmiaid adquid nec. ¹³ Cuënote dadpen samëdacno nidaidbimboecquid nadquid iquendac. Nuquin Papan chiaid tantias, Bëdambo iquebi, quiashic natiamianquie cametequid icnuc aid tantiec Nuquin Papan chiaid papuduedquid iquendac.

¹⁴ Nisanquid dëyucacno dadpen yacno nidaidbimboecquid nad iquec. Nuquin Papan chiaid tantias abi bunaid, abi nënaid, ambi natequid adquid tantiaquin Nuquin Papan chiaid bëtashac bimboec icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantiatipimbo iquendac. ¹⁵ Nidaid bëdabimboecquidien nad iquec. Nuquin Papan chiaid tantiadonec bëdamboec tabadquin utsi ismequidquio nec. Adquid natiamianquid chonoc tantesa uainquiocquin ënenquiocquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenuec.

Tabote nënantan nanac chënquiacbimboecquid

(*Mad 4.21-25*)

¹⁶ Aden chuishumbic naden Esusen chuioapanëdash: —Tabote taboshon matsun bëtashesa. Adembidi tsadte tédion tabote nanesa icbo nec. Ma ëmbi yuedaidon is-

nueshun nënantan tabote nanquid. ¹⁷ Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquio yaid aidëmbi chuibanendac. ¹⁸ Ad icnuc ëmbi chiaid bëdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadec tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bëdamboen tantiemi, qeshun papuduedmenquiocquin bëdamboen ismesa nec. Aden ambi tantiauidaid uesadendac —quepanëdash Esus.

Aton utsibo aton titabëd choaid

(Mat 12.46-50; Mad 3.31-35)

¹⁹ Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Ëbi choaid chuita, cac ²⁰ shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

²¹ Adoaquien: —Adquid chuinu. Tantia. Nuquin Papan chiaid tantiaishun nabanquido ëbëd icquid nec. Adquid buchi caindambi. Adquid utsi chido chuchu caindambi. Utsibic tita caindambi —quepanëdash Esus.

Acte tëccoasquesho ënëdmiaid

(Mat 8.23-27; Mad 4.35-41)

²² Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash. ²³ Adec nidec cano anuequi Esus ushtopanëdash. Adec ushnuvien cunquequid dapa comapenec cunqueubi acte tëccoasquequidën acte uemiac cano mentoadtsempanëdash. Adsho isash dacuëdec ²⁴ Esus ushacno nidshun tinec abëd icquido: —Nuqui mentoadeque. Isucun, Icbo —quec comapenec cuëdpanëdash abëd icquido. Adsho tantiaish isucunash nidtoshon: —Mibi comapenec cunqueque. Ënëd —Esusën cac cunquequid badedquio ënëdpanëdash. Adembidi: —Mibi comapenec tëccoasqueque. Ënëd —Esusën cac badedquio acte tëccoasquequid ënëdoapanëdash. ²⁵ Aden ënëdmetanec: —¿Atotsi quiash ëbi tantienquio yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tëccoasquequid ënëd cacpadequi ënëdchitosh, quec abëd icquido abibi onquecuededpanëdash.

Mayan icsa dapuduedaid dapudueququin bëdamiaid

(Mat 8.28-34; Mad 5.1-20)

²⁶ Adshumbic, acte tëccoasquec ënëdan nidaid Cadidia yacno chian cuëma utsiuc Esusbëd icquidon poteoic nidaidëmpi Cadada caid yacno aido nidpanëdash.

²⁷ Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. ²⁸ Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubien ²⁹ mayan icsa chuiquin: —Dapudenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Më-

tanenu, cainquio yampanëdash. Adoac mayan icsan matses nibëdacno nidmiaid icpanëdash.

³⁰ Adquid nec, quequin tantiaquin Esusën: —¿Tsutsi cuëmëdquid mibi ne? — capanëdash.

Adoaquien: —Sinco midted dapuduedonaid nebi —quepanëdash mayan icsa dapuduedaid onquec. ³¹ Aden chiashic: —Mibi bëdambocquid cadoque. Ënenquiocquin mëyanacno cuidnuequin ëbitedi nidmenda —quiashic ³² chanco dadpeshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoaquien: —Aido dapuduedtan —Esusën cac ³³ dapuduenequi chanco mayan icsa dadpen dapuduedash acte quiusudacno chanco comapenec niquec chian pudun-pudunec mentoadbudnec nibëdquiec unësbunepanëdash.

³⁴ Adsho isash chanco pemequin isquido titinquianec shubu dadpen yacno choshon ambi isboed chuituidac ³⁵ anocquido istanu quianec Esus yacno chochopanëdash. Adec choshon mayan icsa dapuduemequin bëdamiaid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. ³⁶ Dacuëdsho isun mayan icsa dapuduemequin bëdamiaid isquidon ambi isboed dacuëdquido chuipanëdash. ³⁷ Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

³⁸ Adsho isun: —Mibëd nidtiadquio iquebi —quepanëdash ambi mayan icsa dapuduemequin bëdamiaid Esus chiec.

³⁹ Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanëdash. Aid nidnubien mayan icsa dapuduemequin bëdamiaid nidanec aton shubu yacno choshon anocquidtedi Esusën naid abi mayan icsa dapuduemequin bëdamiaid chuibanoapanëdash.

Chido intac budaid bëdanaid icnuc champi uincuemiaid

(Mat 9.18-26; Mad 5.21-43)

⁴⁰ Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. ⁴¹ Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: ⁴² —Con champi abentsëc tishaid unësanequidquio iccosh. Aton seta 12ted icquid niosh. Ëbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. ⁴³ Adnubien, chido seta 12ted matamec intac budaid chopanëdash. Aidi dauëchoquid dadpeshun bëdametiapimbo icpanëdash. ⁴⁴ Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

⁴⁵ Aden mishac: —¿Tsuntsimbini mishosh? —quepanëdash Esus. Aden chuisho tantias abi datsidash capuquido mishambo yec otacquio tabadcuëdedpanëdash.

Adec tabadnubien: —Matses dadpeshun tsucus-tsucustsëcquiocquin mibi cuëscabededec —capanëdash Petedon.

⁴⁶ Adoaquien: —Matses abentsëcshun ëbi mishosh. Ëmbi nadatiambocquin natequid bëuesadtsac —quepanëdash Esus.

⁴⁷ Adec Esus onquesho tantiash chido, Ambi tantiacpadomboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

⁴⁸ Adoaquien: —Mimbi tantiacpadquiec mibi bëdanaye. Dacuëdenquo yec bëdamboec tabadec nid, champi —capanëdash Esusën.

⁴⁹ Aden Esusën chuinubien Aidon shubun icquid utsibo Esus yacno chochopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

⁵⁰ Aden chuisho tantiash: —Dacuëdenda. Aden tantiequi nid. Mimbi tantiacpadquiec min champi bëdaneque —quepanëdash Esus Aido caic.

⁵¹ Aden chianec Aidon shubuno nidash cho-choquidotedi, Ëbëd puduedenda, quequin chianec Petedo, Uan, Acobo aidted buanec Aido cuëmëdquidën champi yacno Esus puduedpanëdash. ⁵² Ambo puduedshun anocquido unësquo yec shubisho tantiashun: —Mibi shubieque. Ënëdta. Champi unësenquo yec usheque —capanëdash Esusën.

⁵³ Adsho tantiashun, Champi unësacsho isombi, quequin Esus tantienquiocquin shubiquidon mamënshumbededpanëdash. ⁵⁴ Mamënshumbedednubi Esusën Aido cuëmëdquidën champin mëdante mëdinquin: —Nidto, champi —comapenen cac ⁵⁵ aton tiboedte unësabi yec champi badedquo nidtopanëdash. Champi nidtosh isash: —Peme —quepanëdash Esus. ⁵⁶ Aton champi nidtosh isash: —Adopenshenda iquec —quepanëdash ani amëbëdi.

Adoaquien: —Mimbi isboed chuibanenda —quepanëdash Esus.

Esusën ëbi chuibeneta, quequin ambi nidmiaido

(*Mat 10.5-15; 14.1-12; Mad 6.7-29*)

9 Adashic ambi ëbi chuibeneta caido 12tedtsëqui chometanquin Esusën nadopanëdash: —Ëmbi nadatiambocquin nabanacpaden mibitedishun nabanendac. Mayan icsa dapuduemequinc daicsaido bëdamequinc cain mibi capucueniacnoshon mimbi ismebenendac. ² Nëbi mibi nideque. Adec capucuenequin chuibenequimbi bëdamebeneta. ³ Nidquin cuate uidën nidte buanenda. Shictoatde buanenda. Petequid buanenda. Mitsana bedtequid buanenda. Dashcute utsi buanenda. Buanenquo yec dadauidquo nidtan. ⁴ Adec nidash mibi yuedquidën shubun puduedshun ëmbi chiacpadomboen nabanec anouidi tabadta. ⁵ Mibi nidacno mibi yuedquid nibëdsho isun naden nata. Mimbi tantiaid icsa mibibi cuidadte nec, quequin nidaid putu tasequequin ismeta —capanëdash Esusën abëd icquido chuiquin.

⁶ Aden chiac nidash abëd icquido abi yuedacno puduedash tabadquin Esusën chiacpadomboen Nuquin Papabëd tabadaid chuibanquimbi daicsaido bëdamebenepanëdash.

⁷ Adnubien Esusën nabansho isquidon Edodes chuibampanëdash. Edodes Cadidia yacnocquido ancaquid icpanëdash. Aden Esusën nabanaid chuisho tantiashun, ¿Tsu-dain nepec? Edodesën caquien,

Acten mentoanondaid, Uan cuëmëdquid uincuempash icnui, quenubien; ⁸Edias Nuquin Papan ambi chiaid chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanëdash, quequin chuiapanëdash Esusën nabansho isun chuiquidon Edodes tantiaequin.

⁹Adoaquien: —Mambi uincuentiapimbocon Uan mapi budtemiondac. ¿Tsu-dain ëmbi tantiacmaidquio adobanquid icpec? —quiashic Esus iste bumpanëdash Edodes.

Mates dadpen pemaiid

(Mat 14.13-21; Mad 6.30-44; Uan 6.1-14)

¹⁰Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibanpanëdash. Aden chuibansho tantias Esus abëd icquido bëyucanec shubu dadpen icquid Betsaida caid anoentsëqui nidpanëdash.

¹¹Aido nidsho isun cho-choquidon tsibanampanëdash. Adsho isun Esusën Nuquin Papa yacno tabadaid chuibanquimbi daicsaido bëdamepanëdash.

¹²Adashic ushë budtsan Esusbëd icquidombo Esusën dayunquio choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanëdash Esus chuiquin.

¹³Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidedtsëqui icsho isunda cho-choquidtedi pemenuëquin ëbitedi bedtan, cai? —quecuededpanëdash abëd icquido.

¹⁴Ambobi tabadsho chido bacuëbobëdtabi tambanenquio icquimbi dadauidquio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac ¹⁵ambi chiacpadomboen tabadmepanëdash. ¹⁶Aden tabadmesho isun panëmpi 5tedbëdta nuëcquid daëd sananquin abuc isec: —Mibi bëdambocquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

¹⁷Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

Chuiquid dapa abentsëcquiobi iquec, quiaid

(Mat 16.13-19; Mad 8.27-29)

¹⁸Adashic, mates nibëdacno abëd icquido icnubi Nuquin Papa chiec Esus onquepanëdash. Adec onqueshumbic: —¿Tsu-tsi ëbi tsibanquidon ëbi capec? —capanëdash Esusën.

¹⁹Adoaquien: —Acten mentoanondaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoapash —quepanëdash abëd icquido.

²⁰Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquio yec Quidistu caid ma mibi neyoc —quepanëdash.

Abi unëste chiaid

(*Mat 16.20-28; Mad 8.30-9.1*)

²¹ Adoaquien: —Mimbi ëbi tantiaid nëbi utsi chienda —quepanëdash Esus comapenen chiec. ²² Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiamequido yec quec aidtedi ëbi chieshënquido nec. Aidon naden chieandac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

²³ Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmene quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenquio iquendac. ²⁴ Cuesunenu cac unësmene quiash Esus tantiaquid nebi queboedi Esus tantiesha nebi quequid unësash Nuquin Papa yacno tabadenquio iquendac. Utsibo, Esus tantiaquid nebi, quiashic abi cuesunenuquid icnuc adecbidi Esus tantiaquid nebi, queoapec. Adquid unësash Nuquin Papa yacno tabadendac. ²⁵ ¿Atotsieshun Nuquin Papa yacno tabadaid tantienquio yec nidaidën bëdamboec tabadnuequin bedted-bedtede? Mimbi bedaidënquio Nuquin Papa yacno puduedtiapimbo mibi iquec. ²⁶ Esusbëdtabi ambi chiaid tantiaquid nebi nidaidënuësh quetiapimboquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. ²⁷ Nad iquendac. Tantiapiota. Chuinu. Ëbi tantiaquid dadpen yansho ënabicquid utsin-utsinquien isendac —quepanëdash Esus.

Esus bed-bedquesho istiapimbo yaid

(*Mat 17.1-8; Mad 9.2-8*)

²⁸ Aden chiashic Esus mëdante utsiuc tauadoec ushash Nuquin Papa chiec onquenuec macuësh yacno nidoapanëdash. Petedo, Uan, Acobo aidted buanec macuësh yacno Esus nidpanëdash. ²⁹ Adec macuësh yacno nidash Nuquin Papa chiec Esus onquenubi aton bësbed aton dashcutedëdi nac-nacquio ushë chënquiacbimboec icpanëdash. ³⁰ Adsho isnubien badedquio dada utsi daëd choash adquibidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. ³¹ Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecuededpanëdash. ³² Adnubien Esusbëd chobedo abëd icquido 3ted ushacasmash tabadtuidquin Esusbëd utsi daëd nac-nacquiocquid dasiuidacimboc bed-bedquesho isbededpanëdash. ³³ Esusbëd daëd nidtuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcnuc shubumpi uanuna, Icbo. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

³⁴ Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd chobedo dacuëdpanëdash.

³⁵ Adnubien abu ushunuësh onquec: —Nëidic ëbëd icte bunquidquo, con madombo, ëmbi bëdamboen isaidquo neque. Aidën chiaidquo tantiata —quepanëdash Nuquin Papa Esusbëd icquido tedestedshun isenquiocnobi.

³⁶ Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

Mayan icsa dapuduedaid madompi

(Mat 17.14-21; Mad 9.14-29)

³⁷ Adashic badiadash macuësh dapa yacnoësh Esus budsho isash bëquedec mat-ses dadpen cho-chopanëdash. ³⁸⁻³⁹ Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquo sidquianesho aidëmbidi bedshun bëcunedeniac con mado ëcbacushaniosh. Dapuduenenquo icquin con mado aidën uimambo icmedeniosh. ⁴⁰ Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquo iccosh —quepanëdash dada abentsëc Esus caic.

⁴¹ Adoaquien ambi nianaido caic Esus nadpanëdash: —Nadatiambocquid Nuquin Papa nec, quequin tantiesa mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiocsho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash.

⁴² Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

⁴³ Adsho isash: —Nuquin Papan nadatiambocquin naid uinsadpambo iquec —quecuededpanëdash isquido.

Abi unëste chuioaid

(Mat 17.22-23; Mad 9.30-32)

⁴⁴ Adoaquien: —Chuinu. Bëpiscudenquiocquin tantiaquiota. Matsesacsho nëbi bedmendabi —quepanëdash Esus abi unës uate chiec.

⁴⁵ Aden chuisho abëd icquidon tantienquiocpanëdash. Aden tantienquo yec, Mimbi chiaid tantienquo iquembi, quetiapimbo yec otacquo tabadcuededpanëdash abëd icquido.

¿Tsutsi chuiquid dapa icpec? quequin chiaid

(Mat 18.1-5; Mad 9.33-37)

⁴⁶ Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecuededpanëdash. ¿Ëbida chuiquid dapa icpe? quec ambibi tantiequi adpanëdash.

⁴⁷ Adoaquien Esus tantiaquidquo icquin bacuëmpi chomeshun aton dayunquo tabëcash: ⁴⁸ —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiacpadomboen nabanquid Esus nec, quequin tantiaquidquo iquec ëbi chomiondaid, Nuquin Papa tantiaquidquo icoaindac. Nidaidënuësh utsi nashunquidquo icboedi aidquobi Nuquin Papan chuiquid dapa icta caindac —quepanëdash Esus abëd icquido caic.

Abimbo tantiaquid ëbëd icquid nec quiaid

(*Mad 9.38-40*)

⁴⁹ Adashic, Uan Esusbëd icquid abentsëc nadpanëdash: —Mayan icsa dapudue-mebanquid ispombi. Aidi mayan icsa dapuduemenuec nadposh: “Esus, nadati-ambocquin naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

⁵⁰ Adoaquien: —Adquid, Padicnuna, cainda. Nadatiambocquin naquidquio Esus nec quequin abimbo tantiaquin ëmbi nacpadomboen nabanquid icnu mibipadquid ëbëd icquid neque —quepanëdash Esus Uan caic.

Esus bunesabo, Samadia yacnoquido

⁵¹ Adashic Esus abi abuc indote ushë chote anoentsëqui yanan, Unësmane quenquio yec nidebi, quequin ambibi tantianec Edusaden yacmi Esus nidoapanëdash.

⁵² Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien ⁵³ Esus isadaidbo nec, quequin yuedenquiocpanëdash Samadia yacnoquidon.

⁵⁴ Adoaquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icho? —quepanëdash.

⁵⁵ Adoaquien: —Padicnuna. ¿Matses unësmenuectabi chodio? —quianec ⁵⁶ shubu daëdpactsëc yacno nidoapanëdash abëd icquidobëd.

Esus tsibante bunquidën natequid

(*Mat 8.19-22*)

⁵⁷ Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananec nidendabi —quepanëdash Esus databëdquid abentsëc.

⁵⁸ Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹ Adoshombic: —Ëbi tsibanta —Esusën caquien utsi:

—Con pa unësascho chococashun mibi tsibanec nidendabi, Icho —quepanëdash.

⁶⁰ Adoaquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

⁶¹ Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icho —caquien:

⁶² —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

Abi bëyucanec nidquid 72ted icquido

(Mat 11.20-27; 13.16-17)

10 Adshumbic ambi bëyucmiaino dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. ²Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. ³Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënuquido dadpen iquendac. ⁴Ëbi chuibenec nidanequin mitsana buanenda. Mitsana bedtequidbëdta shictoachte buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. ⁵Shubun puduedshun naden shubu icbo chuita: Nuquin Papanëd abi yacnoquido bëdamboec tabadacpadquiec ma nëid shubun icquido tabadpanuna. ⁶Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënuquid ictsiash. Adquid yec mimbi chiaid tantianu quesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquio iquendac. ⁷Mibi yuedacnouidsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸“Shubu dadpen yacno mibi choacsho yuedshun pete meniac isuidec, Utsitsen bec cho, quenda. ⁹Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. ¹⁰Shubu dadpen yacno choshon mibi yuedquid nibëdsho isun aton podquedën nidquin naden chuita: ¹¹Nuquin Papan chomiaid mibi chuinuec chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin. ¹²Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi choabicnuc Sodoma yacnoquido icpampic. Ëbi choabicnuc aidon ëbi tantiatiapimbo icpampic. Adquido Nuquin Papan bëdiactsëc cuidendac —quepanëdash Esus.

¹³Aden ambi nidmetequid 72ted icquido chuibanshumbic utsibo isacbimboen Esusën nadopanëdash: —Nëbi icquido, shubu dadpen icquid tantiec unësquiocquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquio mimbi iccuededpec. Adembidi nadatiambocquin nabansho isted-istedboedi Betsaida yacnoquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, queshun unësquiocnoc shubiquin abi icsaid ëntsempampic. ¹⁴Aden Tido yacnoquidobëdta Sidon yacnoquidon tantiashun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnoquidobëd Betsaida yacnoquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. ¹⁵Adecbidi, nëbi icquido, Capednaun

yacnocquido mibi unësash ¿Nuquin Papa yacnoda mibi nidpe? Padenquio. Ĕmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacbimboec onquec.

¹⁶ Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoindac. Adomboembidi ëbi chuibansho tantienquio yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

¹⁷ Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: —Mimbi chiacpaden nabanombi. Aden nabanquimbic, Esusën nadatiambocquin naidënquio dapuduenta ëmbi caidtedi mayan icsa dapuduempsh, Icbo —quecuededpanëdash ambi nidmi-aido 72ted icquido ambi naboed Esus chuibanec.

¹⁸ Adoquien: —Ĕmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacbimboecnuc bedquetanacimboec Satanab abucuësh badedquio paëdsho isec niobi. ¹⁹ Ĕmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiacpadomboen nabanac mibi icsa uatiapimbo iquendac. ²⁰ Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuquin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

²¹ Aden chuibanshumbic ambi nidmiaidon chiaid tantiash, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi nami-aido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

²² Aden Nuquin Papa chiec onquequin nainec: —Con pa abia yampid icquin abitedi tantiaquidquido nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquido con pa nec. Adecbidi abëd abia yampid icquin con pa bëdamboen tantiaquidquido nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccuededquido caic.

²³ Aden iccuededquido chuibanshumbic naden ambi 72ted icquido nidmian choboedouidsëqui Esusën chuiopanëdash: —Ĕmbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. ²⁴ Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic —quepanëdash Esus.

Utsi tantiaquin bēdamboen naquidquio

²⁵ Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanēdash.

²⁶ Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanēdash Esus abi chuimequid caic.

²⁷ Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnēdacadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bēdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bēdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanēdash Esus chuimeboed Esus caic.

²⁸ Adoaquien: —Bēdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanēdash Esus.

²⁹ Aden Esusën chiac ëbi otacquo icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiashun Esusën chuimeboed: —¿Mitsicquid con utsi nepec? —quepanēdash.

³⁰ Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebēdtabi chicshun icsa uabudtsēcquien cuestanquin niamposh. ³¹ Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnu, quenquiocquin uano datamposh. ³² Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh. ³³ Utsibic, Samadia yacnoësh choquid aid podquedëmbi choquin cuestanquin nianaid istuidash unēsquiocquin ³⁴ aton dayun tsadbudshun cuestanquin nia-naidën chiuëtedi aton dauëmbi bēnoshcashun bētaneshumposh. Aden bētaneshunshun cuestanquin nianaid aton cabayo canandoash aton cabayobēdi nidequi capuquido puduedmete shubu yacno choash abēdi tabadquin bēdamboen isquin nashumposh. ³⁵ Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bēdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanēdash Esus. ³⁶ Aden chuishumbic: —Ëmbi chuibod utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanēdash Esusën.

³⁷ Adoaquien: —Ampequidon cuestanquin nianaid istuidash unēsquio yanquin abi nashumboedien con utsi nec, capendac —quepanēdash Esus chuimequid.

Adoaquien: —Adembidi mimbembi ëmbi chuibodimbimboecnuc utsibo tantiaquin nashunoata —quepanēdash Esus.

Madtan nabanubi Madian tantiaid

³⁸ Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash. ³⁹ Adoac ambo puduedash tsadquin Esusën chuibansho Madian Madtan chib-inquio datsadbudshun tantiapanëdash. ⁴⁰ Adec tsadquin Madian tantianubi Madtan ambi natiadquio yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiocsho isenquioda mimi ique? Min utsi-bëdtan nabanta, cata, Icbo —capanëdash Madtan Esus chuiquin.

⁴¹ Adoaquien: —Mimbi natiadquio yaid dadpen tantiaquidquio mibi iqueque. ⁴² Èbi tantiaquidquio icta. Adquid min utsimbo Madia icsho, Padicnuna. Min ut-sibëdtan nabanta, catiapimbo iquebi —quepanëdash Esus Madta caic.

Nuquin Papa chiec onquianete

(Mat 6.9-15; 7.7-11)

11 Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamapanëdash. Adembidi Nuquin Papa chiec onqueta quequin ëbitedi tantiamequin chuioa, Icbo —capanëdash.

² Adoaquien: —Nuquin Papabëd onquequin naden chuita:

“Bëdambocquidquio mibi nec, Papa.

Adquid mibi icsho matstedishun mibi con icbo capashun, Papa.

Mibi yacnoshon mimi uaido mayan bëdabon mimi chiacpadomboenuidi naic.

Adomboembidi matses abitedishunquio napashun, Papa.

³ Tantiaquidquio, mibi cadoque. Bumianenquiocquin badiadquidën-badiadquidënuen con pete ëbi bedmedene, Papa.

⁴ Adecbidi utsin ëbi chieshësho cuidenquio yec ëbi abi icsaid bëpiscudacpadquiequi ëbi icsasho cuidenquio yec bëpiscudoata, Papa.

Adembidi, Satanasën icsa uanushe qeshun ëbi cudasquin dayun uata, Papa, que-quin chuita”

—quepanëdash Esus.

⁵ Adtanequic Esus nadpanëdash: —Mibëd nashunanquid iquec. ¿Adquid icnuda inchëshpotsembo abi yacno nidshun pete mimi bedshumpatsia? ⁶ Inchëshpotsembo pete bedshunuec mibëd nashunanquid yacno nidash: ‘Èbi yacno utsi chosho pete nibëdnubi yuedombi. Con pete nibëdsho isash pemenu bedec chobi. Mimbi meni-aid cuidquin adquidi mibi meneoaimbi,’ quepatsiac mibi mibëd nashunanquid caic.

⁷ “Adoaquien, nuntanuëshi: ‘Padi. Shëcnandombi. Con bacuë ishcunec din ic-toshon mibi menetiapimbo iquebi,’ quequin mibëd nashunanquidën mibi chuitsiash.

⁸ “Aden aidën chiaqui min pete nibëdnuc chuidonetsiac mimi. Aden chuidoniac mibi menetsiash. ¿Abëd nashunanquid icshoda mibi menepadic? Padenquio. Mimi nidenquiocquin chuidonesho tantiasun mimi chuiboedtedi mibi menepatsiash —quepanëdash Esus.

⁹⁻¹⁰ Aden chiec abi onquec: —Adomboembidi Nuquin Papa chuidonesho mimi bedtiadquio yaid aidëmbi mibi bedmendac. Adembidi, Nuquin Papa tantianu que-

quin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

¹¹ “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi? ¹² Adembidi, ¿Cachinan bacuë bec cho, queshoda mimbi chichun menedi? ¹³ Padenquio. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, qesho tantiashun menenquioda mibi ictic? —quepanëdash Esus.

Bedtsibun namiaid Esus nec, quequin chiaid

(Mat 12.22-30; Mad 3.19-27)

¹⁴ Adashic, mayan icsa dapuduedquin eme uaid icsho Esusën istanquin: —Dapuduen —cac mayan icsa dapuduempänëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabadcuededpanëdash. ¹⁵ Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepanëdash Esus chieshënkuido.

¹⁶ Adnubien iccuededquid utsibo: —Nuquin Papan chomiaidquio icquin Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

¹⁷ Aden chuisho tantiash tantiaquidquio yec abi icsamboen chuimenuquido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. ¹⁸ Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiac abëd icquido nibëdenquioda ictic? ¹⁹ Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquio mibi icpe? ²⁰ ¿Nuquin Papan tantiamiac mayan icsa dapuduemequid ëbi yec ambi chomiaidquio matses chuiquid dapa mibi yacno ënden choabida ictio? —quepanëdash Esus abi chuimequido chiec.

²¹ Aden chiashic abi onquec: —Mibitedi tantiamenuen utsi chuinu. Bëdamboen tantiata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. ²² Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

²³ Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu qesa cuëshëdmianquid nec —quepanëdash Esus.

Abibi dapuduemboed mayan icsa dapuduedoaid

(Mat 12.43-45)

²⁴ Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapudued-

bocpadquid istuidenquo icposh. Adquid istuidambo yec, Abibidi dapuduedoanu, quianec anobidi nidoaposh. ²⁵ Adec nidshun abi dapuduemboed naden istuidposh. Mayan icsa nidan, Ĕbibi bēdambo iquec. Adash bēdambo tabadnu, abibi quiashic, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiapimbo icnuc abi dapuduemboed choshon aid abentsēcquo ²⁶ istuidashic nidoashun abipadquid chuituidac utsi 7ted abēdi choash abitedi dapuduedcuededac dada icsamboshē yamposh —quepanēdash Esus.

²⁷ Aden Esusēn chiambien iccuededquid chido: —Mibi tishacsho shuma chishmiondaid Nuquēn Papan bēdamboen isaid icpec —quepanēdash Esus caic.

²⁸ Adoquien: —Aden nasho padenquo. Nuquin Papan chiaid tantiashun nabansho Nuquin Papan bēdamboen isaidquo nec —quepanēdash Esus chido caic.

Onasēn ismiampicpaden ismiaid

(*Mat 12.38-42; Mad 8.12*)

²⁹ Adnubien abi yacno cho-choash utsi dadpen iccuededsho isun Esusēn nadopanēdash: —Nēbi nidaidēn tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquo iquendac. Nuquin Papan Onas ismiampicpaden ismiaid mimbi isendac. ³⁰ Ninibe yacno nidshun ambocquido icsaid cuidte Nuquin Papan chuimiapaden Onasēn comapenen chuisho tantiash, Abimbo chuiquid nec, qeshun abi icsaid Ninibe yacnocquidon ěmbededpampic. ³¹ Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonēn chiaid tantianuec ěnapenuēsh choshon tantiash, Abimbo iquec, quepampic. Nuquin Papan matsesēn naid icsa ambi naid bēdabēdta chuibante ushē chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bēdamboen tantiaquin chuiquid dapa Sadomon icmepampic. Abitedi tantiampidquo nēmbobi iqueque. Ĕmbi chiaid tantiata. ³² Adembidi, matses icsaidbēdta ambi bēdamboen naid Nuquin Papan chuibante ushē chonoc Ninibe yacnocquidon Onasēn chiaid tantiapadomboen Nuquin Papan chiaid abimbo iquec, quequin tantienquo icsho Nuquin Papan mibitedi isendac. Nuquin Papan chuimiapaden Onasēn chuisho Ninibe yacnocquidon tantiabededpampic. Onas Nuquin Papan matses icsaid cuidte chuimiaidquo icpampic. Padnuen mibi icsaid bedshunash abided cuidadtequid nēmbobi iqueque. Ĕmbi chiaid tantiata —quepanēdash Esus abibi chiadequi.

Tabote taboshon bētashenquo yacimboec abi bēdamboec tabadaid ismequid

(*Mat 5.15; 6.22-23*)

³³ Aden chuishumbic Esusēn abi chuibanec: —Tabote taboshon ompoesa. Adem-bidi matsun bētashesambo icbo nec. Ma ěmbi yuedaidon isnueshun tabote nēnantan nanquid. ³⁴ Adoaidbimboec min tantiate iquec. Min tantiate bēdamboec icquin bēdamboec tabadquin ismequid mibi nendac. Bētashacimboec min tantiate icnuc icsamboen ismequid mibi nendac. ³⁵ Con icbo ěbi bednuec choec qeshun bēpiscudenquiocquin isted-istedta. ³⁶ Min tantiate icsaisa icsho Nuquin Papan chiacpadomboen tantiaquidquo aidi nec, quequin utsibon mibi isendac —quepanēdash Esus.

Nuquin Papan icsamboen isaidquio

(Mat 23.1-26; Mad 12.28-40; Duc 20.45-47)

³⁷ Aden Esusën chuibanshobien padiseyobo abentsëcshun: —¿Ada ëbi yacno pec nidtsia? —capanëdash. Adoac aidbëdi nidash pete sanaid cueste dayunquio Esus tsadbudpanëdash. ³⁸ Adec Esus tsadsho isash, ¿Adpecshenda iquec. Penush më-pamëdenquio Esus icpec? quec abibi onquequin padiseyobon Esus yuedquidëmbi tantiaipanëdash.

³⁹ Adoquien, tantiaquidquio iquec Esus nadpanëdash: —Ëndenquimbo padiseyobon peshun acnun dëshote cachocbëdtabi pada-padaid cachoc bëdamboen dapanta quequin chuinëdacpaden mimbi naoaic. Aden dapanshun mimbi codocaidbëdtabi mimbi actequid nitsinaid anauc ampanenquio mimbi icpec. Mibitedi adquio iquec. Nesquin bëchish uquec dapanudquin mimbi tantiaid icsa ënenquio mimbi icpec. Adecbidi, mibi bunaid bednuen icsamboen naquin ampequid mibi nec. ⁴⁰ Nuquin Papan chiaid tantiesabimboecquid mibitedi nec. Nuquin Papan matses uaqin dad-abëdtabi tantiate uainquioda icpampic. ⁴¹ Ai. Adquid icnuc aton na nibëdquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebëdta min dada bëdamboen isendac —quepanëdash Esus.

⁴² Aden chiashic padiseyobo caic Esus nadpanëdash: —Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsëc Nuquin Papan na nec, quequin aid abentsëc menenuequin mimbi dayun uaic penquiocquin. Aden nabanquin Nuquin Papan ambi matses bëdamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bëdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo. ⁴³ Adembidi, tsusio dapabimboecsho bëdamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtenec. Adomboembidi tantiec matses ic-cuededacno nidequi, Ëbi bëquedquidon ëbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquio mibi nec. ⁴⁴ Adembidi, matses unësaid chococate manenushe queshun ismequin mabiunu, quenquio yacpadomboen ëbi icsaid tantianushe quequin ompoquid mibi nec —quepanëdash Esus padiseyobo chiec.

⁴⁵ Adoquien, Nuquin Papan naden nata quequin chiaid tantiembi, quiahs utsibo tantiamequid abentsëc: —Padiseyobo chuiquin ëbipadquido mimbi chuiiopec —quepanëdash.

⁴⁶ Adoquien: —Nuquin Papan ëndenquimbo naden nata quequin chiaidbëdta mimbi naden nata quequin chiaid dadpen chuibanquin matses mimbi namec. Adoac aidted matsesën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

⁴⁷ “Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ënenquiocquin tantianu quiacbimboen mimbi shubumpi uabanec. Ëmbi shubumpi uaido isun utsibon bëdamboen ispashuni, quequin aden mimbi nabanec. ⁴⁸ Aden naquin tantiec, Nuquin Papan chuimaido cuesunequin bëdamboen tsusedpabon napampic, quiacbimboen tantiaquid mibi

icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquio mibi nec. ⁴⁹Ëmbi chiacpaden chuibanta, cabicquin naden Nuquin Papan chuiampic. Ëmbi chuimiaid utsi-utsien aton matsesën mëyampec. Utsi-utsien mëyanshun cunesuneppec, quec Nuquin Papa abitedi tantiaquidquio adpampic. ⁵⁰Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimiaid tantiesambo mibi nec. Adquido iquec ënden mëyanampidpadquido mibi neoaic. Aido cuesuniampidpadquido mibi neoaic. ⁵¹Tsusedpan abia abed cunesunepampid icnubi ambi tsyuec Sacadias cunesunepampic. Aid Nuquin Papa tabadte shubu uashunaid dayunquiobi aidon cunesunepampic. Ai, Nuquin Papan chiaid tantiesatedi ambi chuimiaido cunesuniampidpadquido nëbi icquid neoaic.

⁵²“Nuquin Papan naden nata quequin chiaid tantiemi, qeshun utsibo tantiamenquiocsho Nuquin Papan icsamboen isaido mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaiduidi tantiaquido chiec.

⁵³Aden chiashic, Ëbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënkuidombo padiseyobo: —Esus icsamboen chuimenu —quiampanëdash. ⁵⁴Adquid icquin Esusën chuibanacno nidaneshun chuimeoanuequin naden padiseyobon tantiapänëdash: Ëbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unës uametiadquio iquebi, quequin Esus chiemi, quequin tantiaquin Esus chuimepanëdash padiseyobon.

Natiamiantequidbëdtabi dayacmetequid

(Mat 10.28-31)

12 Aden padiseyobon: Esus icsamboen chuimeoanemi, quequin tantianubien matses dadpenquioshë Esus yacno cho-choash tsucus-tsucustsëcquio yec tabadpanëdash. Aido tsucus-tsucustsëcquio yec tabadnubien abëd icquido Esusën nadopanëdash: —Sicaid nami uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuiioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista. ²Matsesën ompoquin naid Nuquin Papan abitedi ismendac. Matsesën ompoquin chienquio yaidbidi abitedi tantiamendac. ³Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaid Nuquin Papan matsestedi tantiamenuen chuiioaindac.

⁴“Adembidi chuinu. Tantiata. Mibi cunesunuequid dacuëdënenda. Adquidën mibi cunesunequin mibi nibëdametiapimbo iquendac. ⁵Nuquin Papauidtsëqui dacuëdënta. Icsadednequid icsho aidën mibi cunesunemeshun chian anëdënquequid nësecaindac. Adoanquiduidtsëqui dacuëdënta. ⁶Nuquin Papa tantiaquid yec dacuë-

denda. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquio ictic. ⁷ Ai, mibi tantiaquiec. Min manëdaidtedi ambi tambanaid nec. Aid pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

Esus tantiaquid nebi, quequin utsibon tantianubi chiaid

(*Mat 10.32-33; 12.32; 10.19-20*)

⁸ “Abi chiembique. Tantiaquiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi. ⁹ Adecbidi, utsibo icnubi, Esus tantiaquid nebi, quetiapimboquid Nuquin Papa yacno chosho isun, Nëid ëbi tantiesa neque. Puduedmenda, quequin Nuquin Papan uaido mayan bëdabo chiendambi. ¹⁰ Ëbi matsesacsho matsesën icsamboen chuipec. Aden icsamboen chuiboshombic, Icsamboen chiembique. Ëmbi mibi icsamboen chienquio yac bimboec bëpiscudta, Papa, qesho tantiash aidën icsamboen chienquio yac bimboec Nuquin Papa bëpiscuden-dac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquin Nuquin Papan abi yacno adquid yuedenquio iquendac.

¹¹ “Adembidi chuinu. Tantiaquiota. Mibi chieshënquido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. ¹² Nuquin Papan Mayanën mimbi chuibante mibi tantiamequë —quepanëdash Esus abëd icquido caic.

Aton na dadpen icquidën tantiaid icsa

¹³ Adashic, abi datsidadquid abentsëcshun: —Con pa unësan con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

¹⁴ Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic. ¹⁵ Aden aid chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquio mibi Nuquin Papa yacno puduedtiapimbo iquendac.

¹⁶ “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh: ¹⁷ ‘Con tiedën caniquid bacuëash dadpen iqueque. ¿Atontsimbimbi aidtedi dayun uapeba?’ ¹⁸ Naden naimbi. Tiedën caniquid ëshë dayun uate shubu shënitëdi chicbanshun aidtedi nuamboshëcnc shubu uabanuna. Aden nuamboshëcnc shubu uashun aidënquio con tiedën caniquid bacuëtedi sandoshon dayun uanuna. ¹⁹ Aden dayun uashumbic nadopembi: Con na dadpen iquec yuecash naimëdenquio iquec. Ad icnuc nainquio yec tabadquin peshun aquendambi. Aden naic, Bëdambo iquebi,’ quec aton na dadpen icquid abibi onqueposh.

²⁰ “Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanëdash Esus.

²¹ Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unësash Nuquin Papa yacno tabadtiapimbo iquec — quepanëdash Esus.

¿Atotsimbi napeba? quesa icta, quequin chiaid

(Mat 6.25-34)

²² Aden iccuededquido chuishumbic Esusën abëd icquido nadopanëdash: — Aton na dadpen icquidën tantiapaden tantienda. ¿Con na nibëdnuc atotsimbi pepeba? quec dacuëndenda. Adecbidi, ¿Atotsibi dasiuidpeba? quec dacuëndenda. ²³ Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda. ²⁴ ¿Uicchunënda ambibi cuëte ëshë siac bacuëacsho chepadic? Padenquio. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? ²⁵ Adecbidi, ¿mibi unëste ushë abimbo chonoc, Padi, quepecta mibi icti? Padenquio. ²⁶ Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

²⁷ “Adembidi, cuëtempi chuinu. Tantia. ¿Cuëtempinda aton bacuë ictequid daëdcapec? Padenquio. Adoenquio yaid aton bacuë ictequid bëdaidquio iquec. Cuëtempi bacuë ictequid bëdaidquio yacpadquid chuiquid dapa Sadomonën dashcute adquio ictiapimbo icpampic. ²⁸ Padnuen cuëte bacuë ictequid bëdaidquio icboedi badedquio sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquio ictsiash quequin Nuquin Papa bëdiactsëc tantienda. ²⁹ Aden tantienquio yec ¿Atotsimbi peshun aque? quec dacuëndenda. ³⁰ Nuquin Papa tantiesan abi bunaiduidi tantianubi Nuquin Papa tantiaquidquido icquin pete actequidbëdta ëbi bedmedonec, quequin tantiec tabadta. ³¹ Adembidi, Nuquin Papabëd tabadnu quequin tantiec tabadta. Aden tantiaquin mimbi bedtiadquido yaid mimbi bedendac.

Abi yacno choacsho meniaid

(Mat 6.19-21)

³² “Nuquin Papan abi yacno mibi chomeque. Dacuëndenda, ëbi tantiaquido caimbi. ³³ Ambo nidabi icquin mitsana menebanquin mitsana bedtequid bedshun aton na nibëdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquido iquendac. Capishton petemaidquido aid iquendac. ³⁴ Mimbi tantiaidquido mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bëdamboec tabadte cudasquin mimbi dayun uaid iquendac — quepanëdash Esus.

Chishenquiocquin caintequid

(Mat 24.45-51)

³⁵⁻³⁶ Aden chuishumbic Esusën nadopanëdash: —Aton icbo u isec nidan con icbo chonoshe quiash dasiuidacchobi ushenquiocquin tabote dëbedtonequin, Con icbo chosho puduedmeshun nashunu, quequin aton yuabon caimpec. ³⁷ Aden abi cainquido aton icbon bëdambo icmequin nadopec: “Èmbimbo mibi pemenu. Nëmbo

tabadec cho,” qeshun ambi yuaido icbonquoio pemequin bédambo icmendac. ³⁸Adembidi, icbo inchëshpotsembo choshon abi nashunuequin cainquido icsho icbon bédambo icmiaido iquendac. Adembidi, cachina cuèdanabi badiadabicnuc choshon abi cainquido icbon bédambo icmiaido iquendac. ³⁹Adquidpenquoio icbo utsi chuinu. Tantia. Aidi abi cainquid nibèdnubi aton na icnuc isedtanec choshon isac ampequid ènden nidac. Adsho isash, Ampequid choec, quequin tantiaquid yec nidenquoio ictsenobi, quependac icbo. ⁴⁰Adquiecbidi ampequid choac bimboec Nuquin Icbo choeque. Ad icnuc, Chosho èmbibi tantienquiocchitomane qeshun chieshenquiocquin èbi cainta —capanèdash Esusën.

⁴¹Aden Esusën chuisho tantiaash Petedo: —¿Utsi chuiquin mibèd icquidoudi tantiamenuenda chio? ¿Abitedi tantiamenuenda chio? Tantanu. Èbi chui —quepanèdash Esus caic.

⁴²Adoquien: —¿Icbon chiac mitsipadquiocquin ambi namiaido bédamboen napeba? Adquid chuinu: Pete tambanshun musucshun èmbi namiaid utsitedi bédamboen menebanta, quequin ambi namiaid utsi abentsèc chianec icbo nidac.

⁴³Adec nidashic choshon ambi chiacpaden ambi namiaidèn chieshenquiocquin nabanacsho isun icbon bédambo icmiaid nendac. Adquid naden chuipec: Èbi nidan chieshenquiocquin mimbi nabanoque. ⁴⁴Èmbi namiaid utsibotedi èbipadquiocquin chuiquid icta. Adquid icquin con natedi dayun uata, quequin chiendac icbon.

⁴⁵Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshènquin cuesbanshun ambentsèqui nua peshun tantienquoio yanquin aquec. ⁴⁶Aden nabanquin tantienquiocnoc aton icbo choshon ambi namiaidèn icsamboen cuesbanaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

⁴⁷“Adembidi, ambi chiacpaden nabanesa icsho isun, Comapenen cuesta, icbon cac cuesendac. ⁴⁸Aton icbo bunaid tantiabicquidèn cuesmetiadquiocquin nabansho aton icbon bèdiactsèc cuesmendac. Adembidi, Nuquin Papan dadpen tantiamiaido ambi chiacpaden nashuntiadquoio iquendac. Adembidi, icbon dadpen meniaidon dadpen meneoatiadquidi nendac —quepanèdash Esus.

Utsibèd bédamboec tabadnu quesa icquin cuèshèdmequid

(*Mat 10.34-36*)

⁴⁹Aden chiashic abi onquec: —Èbi tantiaquid icnuc èbi tantiesa yec cuèshèdendac. Aido ènden cuèshèdondan èbi tantiaquidombo bédamboec tabadtsiandac, quec tsadebi. ⁵⁰Adecbidi, Yuecshun èbi unès uanun mèyantequid iquendac, quequin tantiec, Ènden mèyanonaid iquec abuc Nuquin Papabèd tabadtsiandabi, quec tsadebi. ⁵¹¿Nidaidènsun abitedi bédamboen tabadmenu quectabi chodionda? Padenquoio. Èmbi chiaid tantiesa èbi tantiaquidbèd icboedi cuèshèdtsiash quianec chopondabi. ⁵²Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquoio yec cuèshèdec adquid. ⁵³Nadec cuèshèdtsiash: aton papa èbi tantiaquid icnuc con papadquid icnu quesa aton mado cuèshèdendac. Shubu utsin aton mado èbi tantiaquid icnuc aton papa adquid icnu quenquoio yec cuèshèdendac. Adecbidi aton tita èbi tantiaquid icnuc con tapadquid icnu quenquoio yec aton champi cuèshèdendac. Shubu utsin, aton champi èbi tantiaquid icnuc aton tita padenquoio yec cuèshèdendac. Shubu utsin aton chaya èbi tantiaquid icnuc aton babanèn padenquoio yec cuèshèdendac. Shubu utsin, aton babanèn èbi tantiaquid

icnuc aton chaya padenquo yec cuëshédendac —quepanédash Esus. Abi tantiesia cuëshédtequid chuibanec.

Nuquin Papan ismiente isun nad iquendac, quequin tantiaid

(Mat 16.1-4; Mad 8.11-13)

⁵⁴ Aden abéd icquidombo chuishumbic Esusën naden iccuededquido chuiopanédash: —Inchësh chosho isec, Ue choec, quiacpadec choec. ⁵⁵ Adecbidi, ushë chën-quec chosho isash, Chumbo yampec quiacpadec iquec. ⁵⁶ Aden isquin mimbi ëmbi nidaidëshun ismiaidbédta abucshun ismiaid mimbi tantiec. Aden abucshun ismiaid isquin tantiaquidquio icquin ¿atotsieshun abucshun Nuquin Papan chomiaid isumbi tantienquiocquin mibi icsaid ënenquo ique? —quepanédash Esus iccuededquido caic.

Utsibéd chushcananquid

(Mat 5.25-26)

⁵⁷ Aden chiashic: —Utsibéd chushcananquido mibi nec. Adec tabadec ¿atotsi quiaish, Naden natiadquidi nebi, quequin tantiashun mibi icsaid ënenquo ique? ⁵⁸ Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bédamenuen, Mimbi chiacpadomboen mibi nashunu, quequin bédamboen chuita. Mibi adenquo icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. ⁵⁹ Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanédash Esus.

Utsibo unësmiacpadec unësmemane quequin mibi icsaid ënta caid

13 Aden Esusën chuibanubien iccuededquid utsibon, Esus chuimenu, quequin caimpanédash. Aden cainequi Esusën chuibanquin nainsho tantiashun iccuededquid utsibo: —Chuinu. Tantia. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaidën intacbéd daédash chididiquiosh, quequin chuipanédash. Aid chiaid tantiashun. ¿Atotsi icsamboen nasho aido cuesunemepashba? caimbi mibi —quecuededpanédash Esus chiec.

² Adoquien: —¿Cadidia yacnocquido utsitedi icsaid daédpactsëc icnuc cuesunemiado icsaid dadpen icsho aido cuesunemiash, quequinda mimbi tantiapè? ³ Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe queshun. ⁴ Chuinu. Tantiata. Shubu dadpen icquid Edusaden caid ëndacno Sidoe yacno tabadquidon ambi abucshun nacnenaaid uebudquin abéd icquido 18ted cuesac unësosh, quiosh. ¿Edusaden yacnocquid utsibo icsaid daédpactsëc icnuc Sidoe yacnocquido icsaid dadpen icquid unësosh, quequinda mimbi tantiapè? ⁵ Mimbi icsamboen tantieque. Utsibo unësacpadec unësmemane quequin mibitedishun mibi icsaid ënta —capanédash Esusën abi chuimeboedo chuiquin.

⁶ Aden chuishumbic utsitsen chiec: —Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibédéc. ⁷ Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuec choudobi. Bacuëambo iqueque. ¿Bacuëenquiocquididambi

dayun uape? Utsi nitsinun dëdshuneta,' quequin abi neshcashunquid aton icbon chiosh.

⁸“Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshcatanquin seta abentsëc matamequin nidaid chëshë chodquiaid ëbi bëdamboen tasiameta. Adoac bacuëtsiash. ⁹Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh —quepanëdash Esus. Ëmbi tantiacpadec tabadenquiochoedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaid bëdamiaid

¹⁰Adashic, chonoadtemaid ushën Nuquin Papan chiaid chuibante shubun puduedshun Nuquin Papan chiaid Esusën tantiamenubien ¹¹seta dadpen 18tedi matamequin mayan icsan shuabudaid icpanëdash. ¹²Adquid icsho isun Esusën: —Shuabudaid icboedi nëbi cacueoaid mibi iquendac, chido —cashun ¹³mishac cacuiash, Nuquin Papan nadatiambocquin naid nec, quequin chiec chido onquepanëdash.

¹⁴Aden chonoadtemaid ushën Esusën chido bëdamesho isun Nuquin Papan chiaid chuibante shubu isquidon: —Nëid ushë chonoadtemaid ushë neque. Bëdamenu quequin nëid ushënquio bëdamenda. Chonoadtequid ushënquio bëdameta —capanëdash iccuededquido chuiquin.

¹⁵Adoaquien Esus: —Mimbi chiacpaden naisa mibi neyoc. ¿Chonoadtemaid ushë icnuc, Con yua acte acmebono qeshun mimbi yuaid tënëshacchobi acte yacno buanquioda mimbi icpe? ¹⁶¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën bëdamenda quequido tantiamequin chiec.

¹⁷Aden Esusën chuisho tantiash, Adenda, quequin bëdamboen chiombi, quetiapimbo yec otacquio tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

Cuëte ëshëmpi chiaid

(*Mat 13.31-32; Mad 4.30-32*)

¹⁸Adashic: —¿Nuquin Papan shubun icquido mitsipadquidquio icpec? ¹⁹Nadquidquio iqueque. Chuinu. Tantia. Icbon cuëte ëshë pistsëcquiocquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabededec. Adquiecbidi, Nuquin Papan chiaid chuisho tantiatsëcquidën tantiabenash bëdamboquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

Sicaid nami uaidpadquid

(*Mat 13.31-33*)

²⁰Aden chuishumbic utsitsen chuioaic: —¿Nuquin Papan shubun icquido mitsipadquidquio icpec? ²¹Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëec bidisquedoec. Adomboembidi ëmbi chi-

aid ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

Pudued-puduedtequid shëcuë pistsëcquio chiaid

(*Mat 7.13-14, 21-23*)

²² Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpacktsëcquid utsi-utsiec yacnotsen isbidanoaquin anocquidot-sen tantiamenuen chuibenenu, quec Esus nidpanëdash. ²³ Adec nidsho isun iccued-edquid abentsëcshun nadopanëdash: —¿Nuquin Papa yacno matses daëdpacktsëcta nidpec? Tantanu. Ëbi chui.

Adoaquien Esusën nadopanëdash: ²⁴ —Nuquin Papa yacno pudued-puduedtequid shëcuë pistsëcquio iquendac. Esusquio tantie aidëmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, ²⁵ Nuquin Icbon, Ëbi yacno puduedte ushë naimbudosh, caqui cho-choshon, Ëbi puduedme, quequin comapenen cuëmbededpec.

“Adoaquien: ‘Ëbëd icquidpenquo mibi neque. Mibi puduedmetiapimbo iquebique. Mibëd icquido yacno nidtan,’ caindac Nuquin Icbon adquid.

²⁶ “Adoaquien: ‘Mibëdtambi peshun acbededombi. Ëbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

²⁷ “Adoaquien: ‘Icsaquido mibi neque. Nëmbo puduedenda,’ quepec Icho. ²⁸ Aden chiaqui Abadauan yec Isac yec Acobo yec quec Nuquin Papan chuimiaido aitedi Nuquin Icho yacno tabadsho isash abi tantiesa adtiapimbo yec chian anëdënquiacno tabadec shubiquiec, Nuquin Papa icsambo iquec, quec nëishpec. ²⁹ Nuquin Papa yacno abi tantiesa puduedtiapimbo nobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. ³⁰ Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

Edusaden isash anocquido Esus unësquioequid

(*Mat 23.37-39*)

³¹ Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

³² Adoaquien: —Edodes cuesunemenuecbimboec onquequidquid nec. Aid yacno nidshun naden chuita. Nëbi mayan icsa dapuduemequin utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquien adomboembidi nabanoaimbi. Adobanquimbi naimbudembi. ³³ Adobanequi nëbi capuebi. Adobanequi badiadash capuoaiibi. Adobanequi abadiadash capuoaiibi. Adobanequi Edusaden yacno capuoaiibi. Adec capuec ¿Edusaden yacno choabidabi unës uapec? quiosh, Esus quequin Edodes chuita —capanëdash Esusën.

³⁴ Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: —Nuquin Papan chuimiaido cuesunequido mibi nec. Adembi, Nuquin Papan mibi yacno chomiaido cuënoten se-sequido mibi neoaic. Ëbi tantiaquid icmenu, quequin chuideniombi. Cachinan, Con bacuë chieshënuquid choec, qeshun nua shoccot-

sëcsnun aton bacuë cudasquin mabësec aton podon. Adembidi: Mibi chieshëncuid choec, qeshun mibi cudasquin chuibanombi. Aden chuisho tantiatiapimbo yec mibi tabadpoc. ³⁵ Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshënc cunesunuequido choabicnuc ëbi nidacsho yuen ëbi isenquio mimbi iquendac. Yuecash abucuësh choasho isash, Ambi chomiaid Nuquin Papan bëdamboen isaidquido nec, quequin tantienquicboedëmbi tantiendac —quepanëdash Esus Edusaden uano icnuc Edusaden yacnocquido tantiamequin chiacbimboec onquec.

Padiseyobon shubun Esus puduedash tabadaid

14 Adashic, chonoattemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe qeshun isnuequin padiseyobo utsibo tabadquin caimbededpanëdash. ² Aden caimbedednubien podo nidte chedo bidisquiaid uano tsadsho isun Esusën: ³ —¿Chonoattemaid ushën daicsambocquid bëdamenquicte ushë nec, quequina mimbi tantiapë? —caquien ⁴ abi caimbededquido otacquo tabadcuededpanëdash. Adec aido otacquo tabadcuedednubien podo nidte chedo bidisquiaid dada Esusën bedshun bëdameshun: —Nidec nid —cac bëdambo yec nidpanëdash.

⁵ Aden aid nidmeshun abi bëdamenushe quequin caimbededquido caic: —¿Chonoattemaid ushën nua uëdëshcaidën min baca ampaëdacsho isun badedquido bedtanquin indoenuioda mimbi ictsia? —quepanëdash Esus. ⁶ Aden chuisho tantiash adquiobidi otacquo tabadcuededpanëdash.

⁷ Adashic, tsusiobon dayunquio tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiashun Esusën nadopanëdash: ⁸ —Pec cho, cac choshon tsadte bëtinnenda. Tsadte mimbi bëtinnambien shubu icbon ambi pec cho caid utsi mibi chuiquid tsusio chosho ⁹ isun: “Chuiquid dapa choeque. Uano tabadad,” icbon cac icsamboen naombi quiash natiac uano tsadpec mibi. ¹⁰ Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu icbon. ¹¹ Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

¹² Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidouidi pec cho cainda. Aido pemiac, mibi pec cho caoic. ¹³ Pemenu, quequin aton na nibëdquido, daicsaidobëdta bëshuaido pec cho cata. ¹⁴ Adquido mibi cuidquin pemetiapimbo iquec. Adquido pemias, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

Nuquin Papa yacnoshon pequido

¹⁵ Aden Esusën chuisho tantiash abëdtan pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

¹⁶ Adoquien aidi tantiamenuen utsi chiacbimboec Esus nadpanëdash: —Yuednu, quequin nadënuquo pec chota, quequin ambi yuedtequid dadpen chuiposh. ¹⁷ Ambi chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidpoch. ¹⁸ Adec nidshun chuituidaquien: ‘Nidtiapimbo iquebi,’ quepoch

abitedi. Abia chuituidaïd abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

¹⁹“Utsibic: ‘Baca bedshun, Bëdamboen nimbanquinda buaneque. Isnu,’ qeshun isedtanenquiocquin ambi bedboed nimbameposh.

²⁰“Utsibic: ‘Con chido bedombique. Nidenquio iquebi,’ queposh.

²¹“Aden chuisho tantiash nidshun aidon chiacpaden aton yuan icbo chuioposh. Adsho tantiash nëishun icbon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

²²“Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

²³“Adoquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna. ²⁴Abia ëmbi pec cho caidon ëbëdtambi petiapimbo iquendac,’ queposh icbo —quepanëdash Esus.

Esuspadquio ictequidquio

²⁵Adashic, nidsho matses dadpeshun tsibanac abi choacmi bidiadshun isec Esus nadpanëdash: ²⁶—Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi, aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic. ²⁷Unësmene quiash mëyanac dayactiapimbocquid ëbipadquio ictiapimbo icoaindac —quepanëdash Esus.

²⁸Aden chiec Esus abi onquec: —¿Shubu uanu, qeshun abia shubu uaid isec, Nëidtenquio nanu, qeshun aidtedquiobidi bëshun toccashun shubu uainquioda icpec? ²⁹Aden tantienquiocquidën abentse-abentsen bë-bëtsëcquin baded naintiapimbo iquec. ³⁰Adsho isun utsibon mamëshumpec. Bëdamboen isun shubu uaquidpadquid, Esuspadquio icnu, qeshun ëmbi chiaid bëdamboen tantiabenash adquiobidi icpec. Ëbi tantiauidtsëcquid ëbipadquio ictiapimbo iquec.

³¹“Adembi chuinu. Tantiata: ‘Mibëd icquidobëd cuesnanuec chuiquid utsi nëmbo cho-choec,’ qesho tantiashun nëmbobi icquido chuiquidën naden tantiapec: ‘Ëbëd icquido daëdpectsëc iquec. Aidtedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec. ³²Padnuen, abëd icquido dayactiapimbo icsho isun chuiquidën: Chuiquid utsi bëquedtanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuioposh. ³³Adembidi ëbipadquio icnuequidon bëdamboen tantiata. ¿Ëbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda —quepanëdash Esus abi tsibananquido chiec.

Sa batapentsëcquiocquid

(*Mat 5.13; Mad 9.50*)

³⁴Aden chiashic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic? ³⁵Padenquio. Secatequid adquid nendac. Adecbidi Esuspadquio icnu quiash ëbipadquio

yanesa chian anëdënquequid nësiatequid nendac. Adquid ictiapimbo iquebi, quequin, Tantianu, qeshun tantiacpadomboen nabanta —quepanëdash Esus.

Obeca abentsëc bënudtequid

(Mat 18.10-14)

15 Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantianu, quish Esus datsidadpanëdash. ² Adsho isash padiseyobo Esus tantiamenquio yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuededpanëdash.

³ Adoquien, tantiaquidquio iquec Esus: ⁴—¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibëneç nidenquioda mibi icpe? ⁵ Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec. ⁶ Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipec. ⁷ Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuededpendac —quepanëdash Esus.

Aton na bedtequid bënudtequid

⁸ Aden icbon aton yua bënudaid chuishumbic utsi chieç Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec? ⁹ Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

¹⁰ “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

Aton mado cuëshëdquid

¹¹ Aden chido chiashic utsi chiacbimboec Esus nadpanëdash: —Aton mado daëd icnubi ¹² tsyuec tishaid aton papa caic: ‘Tsusio budquin mimbi chiondacpaden nëbi ëbi aited meneta, papa,’ quepondash. Adoac aton na musucshun aton mado abi daëdi menebampondash.

¹³ “Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash. ¹⁴ Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuededpondash. ¹⁵ Adec bundoquieç abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chanco pemebanta,’ qeshun aton chanco yacno tsusion mado nidmepondash. ¹⁶ Aden nidmiac nidquin chanco pemebanequi ambi chanco pemiaid petiadquio yec tabadshobi anocquidon menenquio icpondash.

¹⁷ “Adec natiambo bunec tabadquin aton papa ambi nianondaidbëdta abi icsaid utsitedi tantieç abibi onquec nadpondash: ‘Con pan namiaidon pete dadpen icnubi con na nibëdnuc unëspebi. ¹⁸ Nëbi con pa yacno nidshun naden con pa chiembi:

Nuquin Papan chiacpaden nainquiocquin mibi tantienquo yec nidshun icsamboen nabanombique. ¹⁹ Adquid icsho con mado nec, ëbi cainda, papa. Nëbi min yuapadquid ëbi icme,' quequin chiemi, ²⁰ abibi quianec aton papa yacno nidoapondash. Adec nidec ancuenquo yacno aton mado nidondaic casenash chosho isash unësquiocnoc aton mado bëquedquin dayumbudshun shubi uatanquin aton papan tanchoccapondash. ²¹ Adoac ambibi tantiabocpaden aton papa chuiquin: 'Nuquin Papan chiacpaden nainquiocquin mibi tantienquo yec nidshun icsamboen nabanec tabadteniobi. Aden naqid con mado ëbi cainda, papa. Min yuapadquid ëbi icme,' capondash aton madon.

²² "Aden chiaquien bëdambo yanshun ambi namiaidombo naden aton papan chuipondash: 'Con mado ënden nidondaic choashe. Dasiuidte bëdaidquo bëshun con mado dasiuinta. Adoshombic mësudtetsen mësusunta. Adoshombic tapucudtetsen tasiuinta. ²³ Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. ²⁴ Con mado unësacimboeçoedi nëbi ëbëdi tabadoaic. Aidi bënudacimboeçoedi nëbi istuidacimboec choash iquec,' cac bacan bacuë cuesuneshun codocacsho pebededpondash.

²⁵ "Adnubien bëyuc tishaid tied nantan icpondash. Auëshquo nidec shubu anoentsëqui choquin tentencate cuëdëmec matses cuëdënsho tantiatuidpondash. ²⁶ Aden tantiatuidashien aton papan namiaid istuidash: '¿Atotsi naic nec?' quepondash bëyuc tishaid.

²⁷ "Adoquien: 'Min utsi ënden nidondaic choaposh. Aidi chosho isash unësquiocquin nuquitedi bëdamboec tabadquin pemenuquin aton bacan bacuë nuacquid dapa papan cuesunemiosh,' cac ²⁸ bëyuc tishaid nëishash shubun puduedenquo icpondash.

"Adsho isash, Puduedenquo iccosh, quequin chiac bëyuc tishaid yacno nidshun: 'Min utsibobëd bëdambo icnuec cho, mado,' capondash aton papan. ²⁹ Adoquien: 'Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. ³⁰ Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepaboc,' quequin bëyuc tishaidën aton papa chushcapondash.

³¹ "Adoquien: 'Mado, ëbëd icquid mibi nec. Adquid icnuc con natedi mitsana neyoc. ³² Min utsi unësacimboeçoedi nëbi choash tabadoaic. Aidi bënudacimboeçoedi nëbi istuidaid nec,' quequin aton papan choaedën buchi chuipondash —quepanëdash Esus.

Icbon na icsamboen isquid

16 Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. ² Adoac, ambi con na ista caid chomiasch icbo nadposh: 'Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ¿Ëmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,' queposh icbo.

³ "Aden chiac icbon na isquid otacquio onquec: '¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëd-

equē. Bec cho, quetiapimbo icoaibi. ⁴Naden natsiambi. Con icbon na meniondaid abitedi cuidmenquio yac ëbi yuedtsiash,' queposh.

⁵“Aden tantiashun ambi icbon na meniondaid abentse-abentsen chomiac bëyuc choquid chuiquin: ‘¿Tedtsi ëmbi con icbon na meniaqui mimbi cuidenquiocpaccoc?’ caquien:

⁶“Bëchi shocosh nuacquid dapan cushtoaid 15tedi bedshun cuidamboccombi,' queposh.

“Adoquien: ‘Mimbi 15ted bedombi, quequin dada uaid secashun dada uatemp bedshun shocosh dapa bëchi cushtoaid 7ted bedshun cuidembi, quequin dada uata.’

⁷“Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquio mimbi icpo?’ caquien:

“Tsitsan dapa dadpen 1000ted tiedën caniquid ëshë bedombi,' queposh.

“Adoquien: ‘Mimbi aited bedombi quequin dada uaid secashun dada uatemp utsin tsitsan dapa dadpen 800ted tiedën caniquid ëshë bedshun cuidembi, quequin dada uata,' quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

⁸⁻⁹“Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquio iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,' caposh icbon —quequin Esusën chuipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

¹⁰Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac. ¹¹Adembidi mimbi nidaidënsun bedquin mimbi icsamboen nabansho isun, ¿Ëbi tantiaquid bëdamboen ista, quequina Nuquin Papan mibi chuipeba? Padenquio iquec. ¹²Adembidi, ¿utsin na isquin bëdamboen nashunquio icsho isun abi yacno chosho isun mibi menependa ictic? Padenquio.

¹³“Adecbidi, chuiquid daëd icnuc aid daëdshun namiaidquio ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquibidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec —quepanëdash Esus.

¹⁴Aden chuibanubi aton na bedtequid ambi tantiaidquio icnuc chieshec padiseyobo tabadcuededpanëdash. ¹⁵Adec tabadsho isun Esusën: —Bëdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bëdamboen naquidbimboecsho matsesën ispashuni, quequin tantiaquin nasho Nuquin Papan bëdamboen istiapimbo iquec.

¹⁶“Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tan-

tianu, quenquo yec ambibi tantiacpadec puduedte bunec. ¹⁷ Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

Aton chido nianquid

(Mat 19.1-12; Mad 10.1-12)

¹⁸ “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic —quepanëdash Esus.

Aton na dadpen icquid icnubien aton na nibëdquid

¹⁹ Adequi onquequimbi utsi chiacbimboen Esusën naden chuipanëdash: —Dada, aton na dadpen icquid bëdaidquio dasiuidquidën badiadquidën-badiadquidënquien nua peshun acposh. ²⁰ Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. ²¹ Bunquiec ambo tsadec aton na dadpen icquidën peshun secaid bedshun penuec tsadsëcscho menenquiocposh. Aden menenquiocnoc tsadshobi opa choquin aton chiuë bëtashuntuidposh.

²² “Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi ²³ chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec.

²⁴ Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebudoaquin ëbi ëcpanun Dasado acte bëme, papa,’ caposh.

²⁵ “Adoquien: ‘Chuinu. Tanta, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquiec tsadposh. Nëbi aidi ënabi bëdamboec tabadnubien anchumbo yec mibi tënquebudec. ²⁶ Adboedi, uquëmbo mibi iquec cuëma utsiuc potetemaïd icnuc nëuëshquio nidtiapimbo iquec. Adquiobidi mibi yacnocquido nëmbo chotiapiimbo icoaic,’ quequin Abadauanën aton na dadpen icboed chuiposh.

²⁷ “Adoquien: ‘Ëbi yacno potetemaïd icnuc con pan shubu yacno Dasado nidme. ²⁸ Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe queshun Dasado aido chuimetanta, papa,’ queposh aton na dadpen icboed.

²⁹ “Adoquien: ‘Nuquin Papan chiaid, Moisesën dada uampidbëdta dada uaid utsi isec tsusiobo onquepayoc. Aden chiaid ma min buchi adon tantiaquiopanuna,’ quequin Abadauanën chuiposh.

³⁰ “Adoquien: ‘Aid tantienquioctsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiposh.

³¹ “Adoquien: ‘Padicnuna. Nuquin Papa tantiesa icquin uincuemiaidën chiaid min utsibon tantienquio icpatsiash,’ caposh Abadauanën aton na dadpen icboed chuiquin —quepanëdash Esus.

Matses icsaid chiaid, ambi Esus tantiaid chiaid, ambi natequid chiaid

(Mat 18.6-7, 21-22; Mad 9.42)

17 Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac. ² Adquid ëbi tan-

tiabenabicquid icsa uanabicsho cuënote yuëmbocquid têtanetanquin acte shodom-boshë yacno nënepatecnëdan. ³Aid tantiec aidpadquid icmane quequin bëdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimi cac: ‘Ai, icsaobique. Ënëdnuna,’ qesho tantiash aidi icsainquio yacbimboec bëpiscudta. ⁴Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedecbidi aidi icsambo yenquio yacbimboec bëpiscudoata —capanëdash Esusën abëd icquido chuiquin.

⁵Adoquien: —Nuquin Papa nadatiambocquin nabanquidquo nec, quequin tantiacquidquo ictiadquo iquebique. Adquid ëbi icme, icbo —capanëdash abëd icquidon Esus chuiquin.

⁶Adoquien: —Cuëtempi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimi bëdiactsëc tantiaptec. Aden bëdiactsëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquo iquec, quequin tantiabenshun nëid cuëtempi caic, Cuëte mananuc tabadboedi adquiecbidi acte nantan tabadoata, quequin mimi chiacpadec acte nantantsen abi tabadacpatecbidi tabadoaindac —quepanëdash Esus.

⁷Aden chiashic Esus abi onquec: —¿Min yua mimi neshcata cac nidshun neshcaquin nainash shubuno chosho isun: “Nëmbo tsadquin pec cho,” caquinda mimi icpe? ⁸Padenquio. “Con pete codocashun ëbi pemeshun acte menetanquin mimbisen peshun acta,” mimi caic. ⁹Aden mimi chiac mimi chuiboedtedictsëqui nabanquin mimi yuaidën naimbudec. Aden naimbudsho isash: “¿Bëdamboen mimi naoc,” quecta mimi icpe? ¹⁰Padenquio. Ambembi nainquio iccosh. Mimi chiacpaden min yuan nabanosh. Adembidi Nuquin Papan chuiboedtedictsëqui nabanash Nuquin Icbo caic: “Mimi chuiboedtedi nabampombi. Mimi namiaid icquin ëmbi naboed ëmbi natequiduidi napombi,” quequin mimi chuite nendac —quepanëdash Esus.

Daushumbocquido bëdamiaid

¹¹Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec ¹²shubu daëdpectsëc yacno Esus chopanëdash. Ambo choshobien daushumbocquidon 10tedishun Esus bëquedtuiddpanëdash. ¹³Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapenen cuënquin.

¹⁴Adsho tantiashun Esusën: —Isadaidbo tsusiobo yacno nidshun ismetanta —capanëdash. Adoac nidanequi abitedi bëdambudnapanëdash.

¹⁵Adoac bëdamboed abentsëc dëbidiadanec Nuquin Papan naid chiec onquec choaic ¹⁶Esusën taëno tsadbudash: —Mimi bëdameboc bëdambo iquebi —quepanëdash Esus caic. Aidi Samadia yacnocquid isadaidpembo nepanëdash.

¹⁷Adoquien: —¿Diestedidambi bëdamepo? —quepanëdash Esus dëbidiadanec choaed caic. ¹⁸Aden chiashic iccuededquidtedi caic: —Nëidi isadaidpembo yequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaidbo icquimbi Nuquin Papan naid chienquio icpec —

quepanëdash Esus. ¹⁹ Aden chuishumbic: —Mimbi tantiacpadequi mibi bédanoque. Nidtoanec nid —capanëdash Esusën daushumbo icboedi chuiquin.

Chuiquid dapabëd bédamboec tabadte chote ushë

(Mat 24.23-28, 36-41)

²⁰ Adshumbic: —¿Chuiquid dapa abentsëcbëd bédamboec tabadte ushë choaid mitsipadënquio nuqui ispeque? Tantuanu. Èbi chui —capanëdash padiseyobon Esus chuiquin.

Adoaquien: —Chuiquid dapabëd bédamboec tabadte ushë chote ismete nibëden-dac. ²¹ Adecbidi, nëmbobi chuiquid dapa abentsëc choeque. Is, quetiapimbo mat-ses icpec. Adecbidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi —quepanëdash Esus padiseyobo abi chuimeboedo caic.

²² Aden padiseyobo chuishumbic abëd icquido Esusën nadopanëdash: —Yuecash natiamantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquio mimbi iquendac. ²³ Adec ëbi iste bunubien: “Bédamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. ²⁴ Nuquin Papa yacno bédamboec tabadte ushë chonoc abu bedquetaniacimboec uëshëmbo chënquec ëbi chosho abitedishun isbededendac. ²⁵ Aid ushë choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec —quepanëdash Esus.

²⁶ Aden chiec Esus abi onquec: —Ëndenquimboshë Noe tabadnuc matsesën icsamboen tantiaded-tantiadednëdacpadomboen ëbi choate ushë icnuc adembidi matsesën tantiadenepec. ²⁷ Nadec tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbed-edpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanëdash Esus.

²⁸ Adec Noe tabadnuc icsamboen tantiec matses tabadaid chiashic, Esus nadpanëdash: —Adecbidi Dod caid icnuc icsamboen tantiec matses tabadpampic. Nuquin Papan chiaid tantiesa iquec abi bunaiduidtsëqui tantiaquid icoapampic. Nidaidën tabadaiduidquid tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. ²⁹ Aden nabanquin Nuquin Papan chiaid tantienquio icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiacimboecquid nëdënquetequid ue sequiacimboec sequequidën Sodoma yacnocquidtedi Nuquin Papan chiaid tantiesabo unës uabunepampic —quepanëdash Esus.

³⁰ Aden chiashic: —Èbi choate ushë icnuc ëmbi chuibocpadquiec Nuquin Papan chiaid tantiesa yec abi bunaiduidtsëqui tantiaquid iquendac. ³¹ Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquio yec cuenta. Adecbidi, tied nantan mibi icnuc aid ushë chosho isash shubu yacno mitsana bednuc nidenquio yec badedquid cuenta. ³² Mibi yacnocquidtedi unës uanushe bidadshun isenquio yec cuenta, cac Dod cuenu-

bien aton na tantiec aton chido auebidi bidiadsho unës uampidpadquid iquenda. ³³Unësmane qeshun ambi tantiacpadec tabadquid unësash mëyanacno tabadnu-bien unësmane quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. ³⁴Ëbi choate ushë icnuc nad iquenda: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac. ³⁵Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac. ³⁶Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanëdash Esus.

³⁷Aden chuisho bëdamboen tantienquiocquin abëd icquidon: —¿Mitsimbo budpec, icbo? —capanëdash.

Adoquien: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanëdash Esus abëd icquido caic.

Cadonequidquo chido chiaid

18 Adashic, Ëbëd icquido chieshenquo yec Nuquin Papa chiec onquian-onquianquidquo ma icpanu quec aido tantiamenu quec Esus nadpanëdash: ²—Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh. ³Adnubien uano tabadquid niente chido icposh. Aidi icsambocquid cuidte chuiquid yacno nidshun: ‘Ëbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

⁴“Aden chuidoniaqui abi icsambocquin naquid cuidte chienquiocboedëmbi chido ënëdenquo yec ⁵choded-chodedquin adomboembidi chuioasho tantiashun: ‘Nuquin Papabëdta matses tantiesa nebi, quequimbi niente ënëdenquo yec chodednesho isun uimabudmane qeshun abi icsamboen naquid cuidte chuiquiono,’ qeshun cuidte chuiquidën chuiquioposh.

⁶Aden chiashic Esus: —Choded-chodedquin chidon chuioasho tantiash: “Mibi icsamboen naquid cuidte chuinu,” queposh icsambocquid cuidte chuiquid. ⁷¿Adomboembidi ambi cuënaidon, Ëbi chieshënuquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba? ⁸Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsishumbimbi ëbi tantiaquin caimbudnequido istuidpendac? —quepanëdash Esus.

Padiseyobo abentsëc icnuc ancanquidën utsin na bedtequid bedmianiaid chiaid

⁹Adashic, bëdambocquid nebi, quiaash utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash: ¹⁰—Nuquin Papa tabadte shubu uashunaid yacno Nuquin Papa chiec onquenuec nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh. ¹¹Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, an-

canquidën utsin na bedtequid bedmianiaidpadquidpenquo nebi, Papa. ¹² Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cuëscaquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

¹³ “Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquo yec abi onquec: ‘Icsambocquin nabanquid nebi que. Èbi tantiaquin pauc, Papa,’ quepash —quepanëdash Esus.

¹⁴ Aden chiashic: —Chuinu. Tantia. Ancanquidën utsin na bedtequid bedmianiaid Nuquin Papan bëdamboen isaidquo icnubien padiseyobo ambi icsamboen isaidquo icpash. Icsaisa yacimboec, Bëdamboquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuioaindac —quepanëdash Esus.

Bacuëbo Esus yacno bë-bëaid

(Mat 19.13-14; Mad 10.13-16)

¹⁵ Adshumbic, aton bacuëbo Esus mishmenuequin utsin-utsinuien bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

¹⁶ Aden chuisho tantiaish Esus nadpanëdash: —Bacuëbo nidmenquiocquin con dayunquo cho-chome. Chiac, Abimbo caic, quequin tantiaquidquo bacuëbo nec.

¹⁷ Adomboembidi, Nuquin Papa yacno tabadte iquec, quequin chiac bacuëbon badedquo tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

Nëbi caniquid chuiquidën chiaid

(Mat 19.16-30; Mad 10.17-31)

¹⁸ Adshumbic, nëbi chuiquid caniquidën: —Nuquin Papa yacno nidnuequin ¿atot-simbi nape? Bëdamboen tantiaquidquo icquin ëbi chui. Tantianu —capanëdash Esus chuiquin.

¹⁹ Adoaquien: —¿Mitsipaden tantiec bëdamboquid nec, quepe mibi? Nuquin Papauidsëqui bëdamboquid nec. ²⁰ Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec —capanëdash Esusën nëbi chuiquid caniquid chuiquin.

²¹ Adoaquien: —Canidotsëcquimbi aden nadeniondambi —quepanëdash nëbi caniquid.

²² Aden chuisho tantiaish: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

²³ Aden Esusën chuisho tantiasch aton na dadpen tantiec unësquio yanshun Esusën chiacpaden natiapimbo icpanëdash. ²⁴ Adsho isun: —Aton na dadpen tantiaquin Nuquin Papa badedquio tantiatiapimbo adquidën iquec. Nuquin Papa tantienquio yec abi yacno puduedtiapimbocquid iquendac. ²⁵ Adquiecbidi shëcuë pistsëcquid puduedte nidaidën capuquid dapan badedquio tantiatiapimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatiapimbo icoaic. Aden aid tantiatiapimbocquid ambibi tantiacpadequi puduedte bunec —quepanëdash Esus.

²⁶ Aden chuisho tantiasch iccuededquido nadpanëdash: —¿Tsutsi Nuquin Papa yacno puduedquid icpec? —quepanëdash Esus caic.

²⁷ Adoaquien: —Matses ambibi tantiacpadeq puduedtiapimbocnoc Nuquin Pambien abi yacno yuedanquid matses tantiamendac —quepanëdash Esus.

²⁸ Adoaquien Petedo: —Mibëd icnu, quequin ëbëd icquidbëdtan con natedi nianondambi, icbo —quepanëdash Esus caic.

²⁹ Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho ³⁰ ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac —quepanëdash Esus Petedo chiec.

Ëbi unës uaindac, quequin Esusën chiaid

(Mat 20.17-19; Mad 10.32-34)

³¹ Adashic, abëd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi nabanendac. ³² Anoshon bedshun buanshun isadaidbon isadaidpembo ëbi menendac. Aden meniac bedshun ëbi mamëshumbededquimbi, icsamboen chuibededquimbi, dacuishtuabededquimbi, dacuesbededtsëcquien mëyanshun ëbi cuesten dectanquin unës uaindac. ³³ Adoaqui daëdec ushtanec uincuenendabi —quepanëdash Esus abëd icquido chiec.

³⁴ Aden abi unëste Esusën chuisho abëd icquidon bëdamboen tantienquio yec tabadpanëdash.

Bëshuaid bëdamiaid

(Mat 20.29-34; Mad 10.46-52)

³⁵ Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiasch: “Mitsana bedtequid bec cho,” quepanëdash bëshuaid. ³⁶ Adec tsadquimbi matses dadpen cuen-cuensho tantiaschun: —¿Atotsi quec cuen-cuene? —capanëdash. ³⁷ Adoaquien choquid abentsëc: —Nasaded yacnoësh choquid Esus cuenec nec —quepanëdash.

³⁸ Adsho tantiaschun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

³⁹ Adshobien: —Adec cuëdenquio yec tsad —capanëdash choquidon.

Adoaquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanëdash bëshuaidën.

⁴⁰ Adoac nidtuidshun Esusën: —Aidi bec cho —cac abi yacno bësho isun: ⁴¹ —¿Atotsimbi mibi nashumpeba? —capanëdash Esusën bëshuaid chuiquin.

Adoquien: —Bëshuaid nebique. Ĕbi bëucshune, Icbo —capanëdash.

⁴² Adoquien: —Mimbi tantiacpadomboen padpidemboen is —cac ⁴³ badedquio isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdansho isun Esusbëd nidanequidotedishuntsen Nuquin Papan naid chuibededpanëdash.

Saqueyo, ancanquidën utsin na bedtequid bedmianiaid dapa

19 Adec nidequi Edico caid yacno datambidanec Esus nidpanëdash. ² Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash. ³ Adoaid icquimbi utsi, Esus cuenec, qesho tantias, ¿Mitsipadquidquio Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuctsëcquid icquin Esus Saqueyon isenquio icpanëdash. ⁴ Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

⁵ Adec tsadnubien aid podquedënquio choec nidtuidshun Saqueyo bushcuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac ⁶ Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

⁷ Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

⁸ Adnubien, aton shubu nuntanuësh nidtoash Saqueyo: —Chuinu. Tanta, Icbo. Nëbi con na mais uaqin aton na nibëdquid menenun nabono. Adoshombic, con matses: “Con na mimbi ampioc,” qesho tantias,shun ëmbi ampiaidbëdta daëddaëdquiecnuc daëd uaqin menebanembi —quepanëdash Esus chiec.

⁹ Adoquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec. ¹⁰ Icsambocquid Saqueyo icbocpadquid nibënquin istuidshun nësecanushe queshun mënchicnuec chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹ Aden Esusën chuisho tantias,shun Edusaden yacno choash chuiquid dapa Esus yantsias, quequin utsibon icsamboen tantiapanëdash. ¹² Aden tantianubi tantiaquidquio icquin utsi chiacimboen aido tantiamenuen Esusën nadopanëdash: —Chuiquid dapan mado: ‘Ĕnden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ ¹³ queshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ĕbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

¹⁴ “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe queshun chuiquid dapa yacno chuitanta,’ queshun abëd icquido chuimenuen chuiquid dapa yacno nidmeposh.

¹⁵“Adoaqui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ζtedtsi daëd uapashba? abibi qeshun ambi meneboedo chomeposh.

¹⁶“Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.

¹⁷“Adoaquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

¹⁸“Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

¹⁹“Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

²⁰“Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. ²¹Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quish dacuëdec tsadteniobi,’ queposh.

²²“Adoaquien: ‘Ëmbi chiaid niacquid mibi neyoc. Mimbi mua uaquin chiaidted-imbocsho mibi cuidtequid iquendac. ζUtsin na utsin nitsinaidbidi bedbanquid mibi icsho isombi, ëbi chiec quecta icco? ²³ζAden tantiaquin atotsieshun ëmbi chiaid nanuequin ëmbi meneboed daëd uamequin utsi menenquio icco? Aden meniac daëd uashun bedtsenombi,’ queposh abi chuiquid.

²⁴“Aden aton na daëd uaisa chuishumbic iccuededquido chuiquin: ‘Ëbi chieshëncquin con na daëd uainquiocquin ambi dayun uaboed bedshun ëmbi abentsëc meni-aid 10ted icnuc daëd uaboed meneta,’ caposh abi chuiquidën.

²⁵“Adoaquien: ‘Aton na dadpen iqueque. Aid menenda, chuiquid,’ queposh iccuededquido.

²⁶“Adoaquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. ²⁷Adembidi ëbi chieshënc abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

Chuiquid dapabimboec yec Edusaden yacno Esus choaid

(Mat 21.1-11; Mad 11.1-11; Uan 12.12-19)

²⁸Aden chuibanashic Esus Edusaden yacmi nidequi anoentsëqui choash nidtuidpanëdash. ²⁹Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: ³⁰—Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tēchicshun nëmbo bëta. ³¹Aden chicsho isash: “ζAtotsi canun mimbi aid chicpe?” quepec. Adsho tantiasun: “Con Icbo bunaid nec,” quequin chuita —quepanëdash Esus.

³²Adoac nidshun istuidtanquin ³³cabayobitsecquidëmpi tënëshaid tēchicsho isash: —ζAtotsi canuen aid tēchique? —capanëdash icbon.

³⁴Adoaquien: —Con Icbo bunaid nec —qeshun Esus yacno nimbanquin abi tënëshaidën buampanëdash Esusbëd icquidon.

³⁵ Aden bëshun, Chuiquid dapa Esus nepanui, quec onqueshun Esusbëd icquidon aton dashcute bëntsecquid chictanquin cabayobitsecquid capucshun Esus catsadumpanëdash. ³⁶ Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, queshun aidontsen adopanëdash.

³⁷ Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onqueduedpanëdash:

³⁸ —Nuquin Papan chomiaid ambi chuiquid dapa icmiaid ambi bëdambo icmi-aidquibidi nec. Nuquin Papa yacno abëdi bëdamboec tabadequi icsaisatedi iquendac —quepanëdash iccuededquido comapenec cuëdcuededec.

³⁹ Adec cuëdcuededsho tantishun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰ Adoquien: —Ëmbi naid chiec aitedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

⁴¹ Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: ⁴² —Ëbi bëdambo icmequid Esus nec, quec nëbi ëbi tantiaquid mibi ictsiandac. Tantiesa icquin mibi chuiquid mimbi nibënacpadquid mimbi istuidtiapimbo iquendac. ⁴³ Yuecash choquin uimanëmënkuidon mibi cuentiapimbo noc tsicategbudcuenendac. ⁴⁴ Aden mibi tsicategbudcuen-shun min bacuëbobëdtabi naimbudquin mibi unës uashun nendac. Min shubutedi nibëdquendac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquio icnuc anocquido chiacbimboec adpanëdash.

Nuquin Papa tabadte shubu uashunaid yacnoshon cuemiaid

⁴⁵ Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash. ⁴⁶ Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

⁴⁷ Adoshombic, badiadquidën-badiadquidënquiec Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash. ⁴⁸ Aden caimbededquimbi Esusën chiaid tantianu quec dadpen Esus datsidadacsho isun ashunquio isadaidbon Esus cuesunemenuen bedtiapimbo icpanëdash.

¿Tсандан chuibanta caid mibi ne?

(Mat 21.23-27; Mad 11.27-33)

20 Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash. ² Cho-choshon: —¿Tсандан chuibanta caid mibi neque? Tantianu. Ëbitedi chui —capanëdash.

³Adoaquien: —Ëmbia tantianu. Ëbi chui. ⁴¿Nuquin Papan ëmbi chiaid chuiban-shun mentobanta caidta Uan icpondash? Padenquo mibi quenuc, ¿Matsesën nata caidta nepondash, quequinda mimbi tantie? —quepanëdash Esus isadaidbo tsusiobo caic.

⁵Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi qesho tantiash Esus nadpendac. ¿Atot-sieshun Uanën chuisho mibitedishun tantienquo icponda? ⁶Matsesën nata caid Uan pado niondash, ëbitedi qesho tantiashun iccuededquidon cuënoten nuquitedi se-sependac. Nuquin Papan chuimaid, Uan icpondash, quequin iccuededquidon tantie —quepanëdash isadaidbo tsusiobo.

⁷Adec onquecuededash: —¿Tsuntsin nata caid Uan pado icpondash? quequin tiambo iccombi —quepanëdash tsusiobo.

⁸Adoaquien: —Mimbi chienquo yacpadembi ëmbitsen ëbi chuita caquid mibi chienquo icoaimbi —quepanëdash Esus.

Neshcashunquidon icsambocquin naid

(*Mat 21.33-44; Mad 12.1-11*)

⁹Aden isadaidbo tsusiobo chuishumbic, Utsi chuinu, quiacbimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: ¹⁰‘Tiedën caniquid ënden bacuëpash. Ëbi neshcashunquidën musucaid con na bedmenu,’ qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoaposh. ¹¹Adoshombic, icbon aton tied yacno ambi namiaid utsi nidmeoaposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoaposh. ¹²Adoshombic, ambi namiaid utsitsen icbon nidmeoaposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

¹³‘Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembali. Aidi con tied yacno chosho bëdamboen ispec,’ quequin aton mado nidmeposh.

¹⁴‘Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. ¹⁵Aden cuesunian icbo unësan aton natedi nuquin na ictsiandac,’ quecuededshun tied tsitsuno icbon mado buanshun icbo neshcashunquidon cuesuneposh —quequin chiashic Esus:

‘‘Min mado cuesuniosh,’ quequin utsin chiac ¿atotsi tied icbon napec? ¹⁶Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquo icpashun —quepanëdash iccuededquido. ¹⁷Adoaquien iccuededquido bësequi Esus nadpanëdash: —¿Nuquin Papan dada uamiaiðen naden chienquioda icpampic? Ai, aiðen chuipampid nad iquec: ‘‘Shubu uanuequidën isuidaid buintad utsin ambia nitsinaid icposh.’’ ¹⁸Buintad sec uebudec podquëd-podquëdendac. Adembidi buintad uebudquin matses

tish-tishendac. Adembidi, abi yacno puduedmianquid tantiauidquid Nuquin Papan cuëshêdmiac comapenen cuidte yacno tabadendac —quepanêdash Esus.

¹⁹ Aden Esusën chuisho tantiash: —Nuqui naid chiacbimboen chiec Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanêdash.

Sesadën shocoshêmpi neque. Mene, quequin chiaid

(Mat 21.45-46; 22.15-22; Mad 12.12-17)

²⁰ Adec Esus bedte bunquin isadaidbo tsusiobon ambi Esus ista caido Esus yacno nidmepanêdash. Ambi ista caido, Bêdamboequid nebi, quequin ismiacbimboecquid icsho Esusën chuibanacno tsusiobon nidmepanêdash. Esus yacno nidshun êmbi ista caidon chuimiac Esusën icsamboen chuitsiash. Aden chuisho isadaidpembo ancaquidên Esus bedpashun, quequin tantiaquin nidmepanêdash. ²¹ Aden nidmiac choash Esus ista caid abentsêc: —Mimbi tantiamequin chuibanaid bêdambo iquec, quequin tantiembi, Abitedi Nuquin Papan chiaid abimbo chuibanquid mibi nec. ²² Adquid mibi icquin êbi chui. Tantianu. ¿Ancanquid Sesad cuêmêdquid isadaidpembo icquin ambi piucquid shocoshêmpi bec cho caid isadaidbon menetiadquidida nepec? —quepanêdash isadaidbo tsusiobon ista caid Esus caic.

²³ Aden chuisho tantiashun choboedên icsamboen tantiaid tantiaquin Esusën nadopanêdash: ²⁴ —Piucquid shocoshêmpi ancanquidên bec cho caid sananquin abuc cadota —cac sananquin abuc cadosho isash: —¿Tsuntsin podo bitsi dada uaid aidên icpec? —quepanêdash Esus.

²⁵ Adoaquien: —Ancanquid Sesadën na nec —quepanêdash tsusiobon ista quequin chomiaid.

Adoaquien: —Ancanquid, Bec cho, quesho meneta. Nuquin Papan naden nata cac adobanta —capanêdash Esusën. ²⁶ Aden chiac, Bêdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquo tabadcuededpanêdash.

Uincuen uaid chido bedesa nec, quequin chiaid

(Mat 22.23-33; Mad 12.18-27)

²⁷ Adashic, saduseyobo caido yec ²⁸ unêsaid uincuen uate nibêdec quequin chuiquido Esus yacno chopanêdash. Aido choash: —Unêsaidên chido bedshun aidên tishmiaid unêsaidên bacuêbobimboecquid iquendac, quequin Moisesën dada uapampic. ²⁹ Aden Moisesën dada uaid icnuc dada 7ted iccuededposh. Aidedted dada icnuc bëyuc tishaidên aton chido bedshun bacuê tishmiabi yec unêsposh. ³⁰ Aton buchi unêsan aidên chido bedash adecbidi bacuê tishmiabi yec unêsaposh aton utsi. ³¹ Adembidi, bëyuc tishaid tsibanquidên-tsibanquidênquien chido abentsêqui bedto-bedtoec bacuê tishmiabi yec unêsibuneposh. ³² Yuecash chidotsen unêsaposh. ³³ Adec chido abentsêcshun bënë dadpen icboedi uincuen uate ushê icnuc ¿mitsicquid chidon bënë icpeque? Êbi chui. Tantianu —quepanêdash saduseyobo Esus caic.

³⁴ Adoaquien: —Nidaidênshun dadan aton chido bedec. Adecbidi, Min bënëbêd nidta, quequin aton papan chiac aton champi aton bënëbêd nidec. ³⁵ Uincuen uate ushê choan Nuquin Papan bêdamboen isaido abêdi tabadquin chido bedenquio iquendac. Adembidi, aton champi menenquio aton papan iquendac. ³⁶ Adecbidi, Nuquin Papan uaido mayan bêdabo unêsesa yacpadquiequi Nuquin Papan uincuen

uatequid unësenquoio iquendac. Nuquin Papan uincuen uatequido aton bacuëbo nendac. ³⁷ Adembidi chuinu. Tantia. Cuëtempi nëdënquiacbimboecquid isun Moisesën dada uapampid nec. Cuëte nëdënquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaid mibi nec. Adecbidi tsusedpa Isaquën papa cain cuënaid mibi neoaic. Adecbidi tsusedpa Acobon papa cain cuënaid mibi nec,” quequin Moisesën chuipampic. ³⁸ Moisesën tsusedpabo ambi chui-boed ënden unësampidën nami chodquiaidën papa cain Nuquin Papa cuëntiapimbo iquec. Aton nami chodquiaish abi tantiaquidquo icquin tantiec tsadquidën papa cain Nuquin Papa cuëne —quepanëdash Esus saduseyobo chiec.

³⁹ Aden Esusën chuisho tantiash Nuquin Papan naden nata quequin chiaid tantiamequid padiseyobo utsi-utsiec nadpanëdash: —Bëdamboen mimbi chuibanoc —quepanëdash Esus chiec. ⁴⁰ Aden Esusën chuisho tantiashun Esus chuimetiapimbo utsibo icpanëdash.

¿Tsuntsin mado Quidistu nepec? quiaid

(*Mat 22.41-46; Mad 12.35-37*)

⁴¹ Aden utsibon abi icsamboen chuimetiapimbo icsho isun Esusën nadopanëdash: —Ëbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipec? ⁴² Dabidën ambibi Sadmo caid dada uaqin naden chuipampic:

“Icbo utsi yec con mado mibi chiembique. Tantia, quequin chiec icbo dapa nadpampic:

“Ëquë con dayun abiucquoio cainec tsadec cho

⁴³ ma mibi chieshënuquidtedi mimbi namiaid ma icpanu,”

quequin Nuquin Papan Esus chiaid Moisesën dada uapampid nec. ⁴⁴ Aden Dabid padon dada uaqin ¿mitsipadomboentsibi con icbo cashumbi con mado ëbi caoapampic Dabidën? —quepanëdash Esus abi chieshënuquido caic.

Naden nata quequin chiaid tantiamequidpadquid iquenda, quequin chiaid

(*Mat 23.1-36; Mad 12.38-40; Duc 11.37-54*)

⁴⁵ Aden chuishun iccuededquidon tantianubi abëd icquido Esusën nadopanëdash: ⁴⁶ —Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon isplashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Ëbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho isplashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuiquid dapabimboecsho isplashuni, quec tsusiobo tsadacno tsadtenec. Adquidpadquid iquenda. ⁴⁷ Aidon bëdamboen nabanacbimboen nianten natedi bedbanec. Aidombidi Nuquin Papa abimbo tantiacbimboec yuen chiec onquec. Aden bëdamboen nabanacbimboecquido Nuquin Papan comapenen cuidendac. Adoesa bëdiactësëc cuidendac —quepanëdash Esus abëd icquido chiec.

Nianten piucquid shocoshëmpi meniaid

(*Mad 12.41-44*)

21 Adashic, Nuquin Papa tabadte shubu uashunaid yacno tabadtuidash tsadquin Esusën isbampañédash. Ambi isaido Nuquin Papa tabadte shubu nacnemetecuidnu, quequin menequin aid shubun shocosh tabëcaidën aton na bedtequid utsin-utsinquin sandobededpañédash. Aton na bedtequid dadpen icquidon dadpen sandobededsho isquimbi ²nianten aton na nibëdquidëmbi aton na bedtequid shocosh daëd ictsëcquid sandosho ispañédash. ³⁻⁴Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niante isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aido isoaic —quepañédash Esus.

Abitedi naimbudte ushë choec quequin chuite

(*Mat 24.1-35, 42-44; Mad 13.1-37*)

⁵Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepañédash utsibo.

⁶Adoquien: —Mimbi nëbi isaid yuecash nidbëdquiendac. Matses utsibon nëid shubutedi chic-chicbudendac —quepañédash Esus.

⁷Adoquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiantec icpeque? Tantienu. Chui —quepañédash utsibo.

⁸Adoquien: —Cho-choshon muaquin chuisho tantienquiocta. Adquid chochoash: “Nuquin Papan Chomiaid Quidistu nebique. Èbëd iquec cho,” quededquedendac. Aden chuiquid tsibanenda. ⁹Adecbidi: “Cuesnancuededec,” qesho tantias dacuëdenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquio choenquio iquendac —quepañédash Esus.

¹⁰Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. ¹¹Adecbidi, nidaid utsi-utsiec yacno canchednuec ishucud-ishucudendac. Adecbidi, utsi-utsiec yacno bunquiotec iquendac. Adecbidi, utsi-utsiec yacno daicsabudnetec iquendac. Adecbidi, mibi dacuëdmetequid iquendac. Adecbidi, mimbi isacmaid abucuësh natiambo icsho mimbi isbedendac.

¹²“Aidtedi choabicnuc ëbi tantiaquid utsi-utsien bedshun mëyanendac. Adoban-shumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac ¹³aidotsen tantiaquid yantsias qeshun ëbi chuibanta. ¹⁴Aden buanaqui, ¿atotsimbi ancanquid cape? quequin tantiec tsadenda. ¹⁵Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshëncquido iquendac. ¹⁶Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsias. Animbi aton mado adembidi adotsias. Utsi aton buchimbi adoatsias. Utsi aton chuchumbi adoatsias. Utsin abëdtan isedquidëmbi adoatsias. ¹⁷Èbi tanti-

aquid chieshënuquid dadpen iquendac. ¹⁸⁻¹⁹ Aden nabanquin mibi cuesunemenu, cac chieshenquoio yec, Esus tantiaquid nebi, quequid icta. Adquid iquec unësash ënëdenquoio yec Nuquin Papabëd mibi tabadendac.

²⁰ “Adecbidi shubu dadpen icquid Edusaden caid yacno cuesanquid dadpen cho-choshon tsicategudsho isash, Edusaden yacno naimbudte ushë choec, quequin mimbi tantierendac. ²¹ Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquoio cuempanuna. Adecbidi, dëuequido Edusaden yacno ma nidenquiocpanuna. ²² Aid ushë icnuc Nuquin Papan chiacpadomboen cuidtequid iquendac. ²³ Aid ushë chonoc matses utsibon Edusaden yacno tsicategudac pete naimbudnuc bacuë usunquidobëd bacuë chishmequido mëyadec natiacuiquendac. Edusaden yacnocquido abi tantiesabo icsho Nuquin Papan natiambocquin cuidte iquendac. ²⁴ Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateguëdo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

²⁵ “Adec Nuquin Papa, Chën, quian badiadën ushë, inchëshën ushë uispa chedo aidtedi ambi nadatiambocquin naid ismiantequid iquendac. Aid ismiantec icsho isash, Uinsadpambo iquec, quec comapenec dacuëdec matsestedi tabadcuëdedendac. Acte natiambo chëuëdsho isash adquiecbidi comapenec dacuëdec matsestedi tabadcuëdedoaindac. ²⁶ Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac. ²⁷ Adnubini Nuquin Papan chomiaid matsesaid ëbi dasiuidaid bëchomauanquieci ushë chënquiacbimboec uëshëmbo yec nadatiambocquin nabanquidquoio abu ushun ëbi budsho matsestedishun isbedendac. ²⁸ Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bëdambocquin abuc isteneta — quepanëdash Esus.

²⁹ Aden chuishumbic ambi chuiboed ushë chote tantiamenuen nadopanëdash: ³⁰ —Cuëtempï bacuëacsho isash, Ënden suc seccuduquiac nëbi seta taëec, quequin matsesën tantiec. ³¹ Adembidi ëmbi chuiboed icsho isun, Nuquin Papabëd tabadte ushë choec, quequin mimbi tantiec. ³² Abimbo chiembique. Tantia. Ëmbi chuibamboed naimbudabicnuc con tan matses isadaidbo naimëdbudenquoio iquendac. ³³ Abubëdta naimbudtequid nidaid nendac. Ëmbi chiaid abimbo iquendac.

³⁴⁻³⁵ “Adembidi chuinu. Tantiata. Nidaidën capuquidën, Nëbi ëbi sec, quequin tantienquoio yec capusho badedquoio siac cuentiapimbo iquec. Adembidi, Natiate ushë choec, quequin tantienquoio yec chieshquin badiadquidën-badiadquidënquien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsestedi cuidte ushë choenda ictic? Ai, aid ushë choendac, quequin caimbudec bëdamboec tabadta. ³⁶ Ënenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquoio ëbi icme, Papa. Adembidi natiambocquin cuidte ushë chonoshe queshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquoio ëbi icmeta, Papa, quec onquedeneta —capanëdash Esusën.

³⁷ Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënquieci macuësh

Odibos caid yacno nidash tabadtenepanëdash. ³⁸Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

Esus bedmenu, quequiquio Udas

(*Mat 26.1-5, 14-16; Mad 14.1-2, 10-11; Uan 11.45-53*)

22 Adashic, nami uabicquid pete tantiate ushë, Pascuas caid, anoentsëqui yampanëdash. ²Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquo icpanëdash. ³Adnubien Udas cashumbic Iscadiote caid Esusbëd icquid dapuededshun Satanasën tantiamiac ⁴Esus chieshënquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënquid utsibo iquec quianec aido yacno Udas choash, Esus bedmete bunebi, quequin chuipanëdash. ⁵Aden chiac isadaidbo tsusiobo bëdambo iquebi quetanquin: —Esus bedmiacsho mibi piucquid menenu —capanëdash Udas chuiquin. ⁶Adoaquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmembali, quequin isted-istedpanëdash Udasën.

Ënquin nidaidëshun Esusën pebanaid

(*Mat 26.17-29; Mad 14.12-25; Uan 13.21-30; 1Cod 11.23-26*)

⁷Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe queshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëd-abon matanampid tantiate ushë icpanëdash. ⁸Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacentia —capanëdash Esusën.

⁹Adoaquien: —¿Mitsishumbimbi aid nacnempe? —quepanëdash Uambëd Petedo.

¹⁰Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun ¹¹shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. ¹²Aden chiac abuc dectatoshon abuc quënëcquid mibi aidëmbi ismendac. Ashunquio penun nacentia —capanëdash Esusën.

¹³Aden Esusën chiac nidaneshun Esusën chiacpadomboen istuidshun matamampid ushë tantiaquin penun Uambëdtambi Petedon nacnempanëdash.

¹⁴Adashic, inchëshën choash abëd icquidobëd pete sante cuate dayun uequi Esus: ¹⁵—Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquio yanobi. ¹⁶Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquio iquendambi. Matses icsaquid icsho cuidnushe queshun obecaded cuesunaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

¹⁷ Adoshombic dëshote sananec Nuquin Papa chiec onqueshun actanquin abëd icquido menec: —Në, aniactse-aniactsen acban mibitedishun. ¹⁸ Tiedën caniquid ënë nidaidënshun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi —quepanëdash Esus.

¹⁹ Adoshombic, pete bedshun Nuquin Papa chiec onqueshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

²⁰ Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, qeshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe qeshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esuseded cuidadac, quequin tantiatequidquio nendac. ²¹ Ëbi chieshënquido ëbi bedmenuequin chuiquid pete sante dayun ëbëdi uec. ²² Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

²³ Aden Esusën chuisho tantiash abëd icquido: —¿Midacquidien capec? —quecuededpanëdash.

²⁴ Adashic: —Doseted nuqui iquec. ¿Tsudain chuiquid icpec? quequin utsibon ispec —quepanëdash Esusbëd icquido.

Aden chuitanec, Chuiquid nec, quequin utsibon ëbi ispec, Esusbëd abitedi nëishash comapenec chushcanampanëdash. ²⁵ Adec chushcanansho tantiash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi namiaido bëdambo icmequid nebi, quequin muaquin chiec. ²⁶ Mibitedi adquid iquenda. Nadquidquio icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. ²⁷ Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. ²⁸ Ëbi chieshënquido icnuc ëbi nianesa ²⁹ icsho con Pan ëbi chuiquid icmiacpadquid chuiquid mibitedi icmendambi. ³⁰ Aden chuiquid icmiac ëbëd icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëd icquido caic.

Esus ëmbi isacmaid nec, quequin Petedon chiaid

(Mat 26.31-35; Mad 14.27-31; Uan 13.36-38)

³¹ Aden chuishombic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquio iquec. Aden yuanuequin piacbo macuesquin nainshun bitsi secacbimboen mëyantankuin ëbëd icboedi mibi cuëshëdmetiadquio iquec. ³² Aden mibi Satanasën yuatiadquio iquec, quequin tantiaquin Nuquin Papa naden chiombi. Simon ëbëd icquidquio iqueque. Yuadnushe qeshun Satanasën niac-niacmete chiaid Petedo tantienquio icmeta, Papa, quequin chiombi. Adec ëbëd icboedi cuëshëdsembosh choashun comapenen ëbi tantiaquin ëbëd icquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

³³ Adoaquien: —Mibi caic, Quënën nauednu, quenuc mibëdi nauedadebi. Adecbidi mibi caic, Unës uanu, quenuc adecbidi mibëdi unës uadebi, Icbo — quepanëdash Petedo Esus caic.

³⁴ Adoaquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

Buanenda, queboedëmbi, Buanta, quequin chiaid

³⁵ Aden Petedo chuishumbic abëd icquidtedi chuiquin: —Mitsana bedtequid buanenquio yec shictoachte buanenquio yec dashcute utsi buanenquio yec quec nidaneta, ëmbi cac nidash ¿mibitedi bunecta tabado? —capanëdash Esusën.

Adoaquien: —Padenquio —quepanëdash abëd icquido.

³⁶ Adoaquien: —Ënden adquid buanenda, queboedi, Èbi nibëdnuc mitsana bedtequid shictoachtebëdtabi buanta. Chështe bednu, qeshun mitsana bedtequid nibëdnuc min dashcute abentsëc menequin chështe bedshun adembidi buanta, caimbi nëbi. ³⁷ Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

³⁸ Adoaquien Esusën chuiboed tantienquio yec abëd icquido: —Në, chështe daëd iqueque. Is, Icbo —quepanëdash.

Aden abëd icquidon tantienquiocsho isash: —Ai, padi —quepanëdash Esus.

Macuësh Odibos caid yacnoshon Esusën Nuquin Papa chiaid

(Mat 26.36-46; Mad 14.32-42)

³⁹ Adashic, Edusaden caid yacnoësh macuësh Odibos caid yacno abi nidteniäc-padën nidnuc abëd icquidon tsibanampanëdash. ⁴⁰ Adec nidequi abi tabadteniäcno choshon Esusën: —Chieshëmënkuidën ëbi namete bunäcpaden natiäpimbocquid ëbi icme, Papa, quequin Nuquin Papa chuideneta —capanëdash abëd icquido chuiquin.

⁴¹ Aden chiashic abiuidtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: ⁴² —Mëyanquin mibi unës uanu, ëbi chieshënquidon casho tantiash bunenquio yec, Adoenda, quepatsiac mibi Papa. Adoshombic mibi bunäcpadomboen nameta, Papa —capanëdash Esusën Nuquin Papa chuiquin. ⁴³ Aden Esusën baded-badedquien chuishobi Nuquin Papan uaid mayan bëda choshon Esus chieshtomenquio icpanëdash. ⁴⁴ Aden uidën uaqui adec uëshquec Nuquin Papa chuiquiequi ichäcbëd intacash nidaidën siquepanëdash.

⁴⁵ Aden Nuquin Papa chiashic nidtoash abëd icquido yacno choaquimbi ambi chuisho tantiäboed tantiec uimäbudash ushec uesho istuidshun: ⁴⁶ —¿Atotsi quiash ushe? Nidtosshon ëbi chieshëmënkuidën nametiädquio yäcpaden natiäpimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

Esus bedaid

(Mat 26.47-56; Mad 14.43-50; Uan 18.2-11)

⁴⁷ Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash: ⁴⁸ —

¿Ëbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.

⁴⁹ Aden Udasën nac Esus bednuesho isash Esusbëd icquido: —¿Cho-choquido nuquida cuesten cuespe? —quec ⁵⁰ onquetanquin abentsëcshun isadaidbo tsusio dapan yuan pabiate opioc pateshunepanëdash.

⁵¹ Adosho isash: —Padi. Chën. Adoenda —quetanquin Esusën tsusio dapan yuan pabiate patiacquo mishquin bëdamepanëdash.

⁵² Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec, qeshunda utsin-utsinquien chështe sananubi utsin-utsinquien cueste sananec cho-chopec?

⁵³ Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquo mimbi icpoc. Mimbi ëbi bedte ushë nëidquiobi nendac. Sataasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac —quepanëdash Esus.

Ëmbi isacmaid nec, Petedo quiaid

(Mat 26.57-58, 69-75; Mad 14.53-54, 66-72; Uan 18.12-18, 25-27)

⁵⁴ Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash. ⁵⁵ Adec choec umanuc cuëte dëtsiadaoaid cuëc utsibo tabadacno Petedo cuëte cuëc tsadpanëdash. ⁵⁶ Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec —quepanëdash.

⁵⁷ Adoaquien: —Bëboed ëmbi isacmaidquio nec —quepanëdash Petedo.

⁵⁸ Adashic, yuecpectsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquo iccobi —quepanëdash Petedo.

⁵⁹ Adashic yuec-yuecpectsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queoapanëdash.

⁶⁰ Adoaquien: —Mimbi chiaidbëd icquidpenquo nebi —quepanëdash Petedo. Aden chuinubien cachina bënë cuëdampanëdash. ⁶¹ Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chui-boed tantias ⁶² unësquio yec umanuc nidash Petedo shubiquioplanëdash.

Esus sondadon mamëshunaid

(Mat 26.67-68; Mad 14.65)

⁶³ Adshumbic Esus cuenushe qeshun abi isquidon, sondadon, Esus mamëshumbededquin cuesbededpanëdash. ⁶⁴ Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquio icquin ¿midaquidën mibi nëbi cueseque. Tantianu. Chui —capanëdash Esus chuiquin. ⁶⁵ Aden cuesbededquin Esus icsamboen chuiapanëdash.

Isadaidbo tsusiobo yacno Esus buanaid

(Mat 26.59-66; Mad 14.55-64; Uan 18.19-24)

⁶⁶ Adshumbic badiadnubi isadaidbo tsusiobo iccuededacno Esus buanshun ⁶⁷ nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tantianu. Chui —quepanëdash isadaidbo tsusiobo Esus caic.

Adoaquien: —Ëmbi abimbo chuisho mibitedishun tantienquo iquendac. ⁶⁸ Adem-bidi, ¿Mitsipadquidquo Nuquin Papan chomiaid neque? Tantianu. Èbi chui, cac ècbedenquo mimbi iquendac. ⁶⁹ Nad iqueque. Chuinu. Tanta. Matsesash nidaidën tabadboedi ambi nadatiambocquin naidënquo Nuquin Papan dayunquo tsadendabi —quepanëdash Esus isadaidbo tsusiobo tantiamequin chiec.

⁷⁰ Adoaquien: —¿Nuquin Papan madombobi nebi, quequina chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹ Adoaquien: —Nuquin Papan madombobi nebi, quequin ambibi chiec Esus muec nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquo iquembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

Pidato yacno Esus buanaid

(Mat 27.1-2, 11-14; Mad 15.1-5; Uan 18.28-38)

23 Aden ambibi chiec Esus muec nec, isadaidbo tsusio abentsëc qesho tantiash isadaidbo tsusiobotedi nidtoshon Esus bedshun Pidato yacno buampanëdash.

² Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

³ Adoaquien Pidato: —¿Isadaidbo chuiquid dapada ne? —quepanëdash Esus caic.

Adoaquien: —Mimbi chiaidquo abimbo iquec —quepanëdash Esus.

⁴ Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵ Adoaquien: —Ambi tantiamiaidënquo Cadidia yacnoquido nëishmiac comapenec cuëdcededosh. Anoshon tantiameshumbic Edusaden yacno choshon adomboembidi tantiameoposh —quepanëdash isadaidbo tsusiobo Pidato caic.

Edodes yacno Esus buanaid

⁶ Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

⁷ Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

⁸ Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin èquëducshun tantiapanëdash. Nadatiambocquin nabanquidquo nec, quequin isquidon chiac Edodes Esus isec, Nadatiambocquin nashun. Isnu, quequin ambibi tantiec ⁹ Esus chuimenu quec Edodes onquepanëdash.

Adoaqui Esusën eçbedenquio icpanëdash. ¹⁰ Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. ¹¹ Adoac Edodesbëd sondado Esus icsamboen chuiquin mamënshumbededshumbi chuiquid dapan dashcutebimboecquid abichobicquid Esus dasiuinshun Pidato yacno buameoapanëdash. ¹² Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

Esus cuesten dectameta quiaid

(*Mat 27.15-26; Mad 15.6-15; Uan 18.39–19.16*)

¹³ Adashic, isadaidbo tsusiobobëdta isadaidbo utsibo chomeshun ¹⁴ Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aidbëdi onquiash, ¿Cuëshëmianquidta nedic? quendabi. ¹⁵ Aden ëmbi tantiacpadomboen tantiaquin Edodesën ëbi yacno chomeoaposh. Esus unës uainquioctiadquidi nec. ¹⁶ Aden tantiaquin mëyanshun aidi nidmenuna —quepanëdash isadaidbo tsusiobo caic.

¹⁷ Aden chiac naden isadaidbon tantiapapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo nadec cuëdcuededquin: ¹⁸ —Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon. ¹⁹ Ancanquid bunenquioctquin utsibo cuëdcuededmiondaid utsi cusioniondaidbidi Badabas icsho quënën nauedmepanëdash.

²⁰ Adec isadaidbo cuëdcuededsho tantiaish Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

²¹ Adnubien: —Cuesten dectame —capanëdash isadaidbon yuec comapenec cuëdcuededquin.

²² Adec cuëdcuededsho tantiaish: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tiantianu. Ma unës uainquioctiadquidi neyoc. Aden tantiaquin mëyameshun Esus nidmembì —quepanëdash Pidato.

²³ Adoaquien: —Cuesten dectame —quepanëdash cuëdcuededoaic isadaidbo Pidato, Ai, camenuc.

²⁴ Adoac iccuededquidon chiacpaden namenuc ²⁵ Pidaton: —Utsi cusioniondaid Badabas puduemeshun Esus cuesten dectameta —capanëdash Pidaton cuesten dectamënquido chuiquin.

Esus mëyanaid

(*Mat 27.32-44; Mad 15.21-32; Uan 19.17-27*)

²⁶ Pidaton, Esus cuesten dectameta, cac sondadon abi dectante cuate Esus buamequimbi Simon, Sidene yacnoshon tishaid, chosho bëquedtuiddanquin Esus dectante cuate Simon buamiac Esus tsibambëpanëdash. ²⁷ Adec Esus nidsho isun matses dadpenshun shubiquin tsibanampanëdash. Adembidi abi tsibanquid chidobo icpanëdash. ²⁸ Adec chidobo abi tsibanec shubisho tantiaish bidiadshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuededta. ²⁹ Yuecash mëyantequid ushë choendac. Aid ushë chonoc bacuë tishtiapimbocquid caic utsibo nadendac: “Bacuëbo nibëdquid

icquin min bacuëbo natiasho isenquio mimbi iquec. Adquid yec bédamboshë mibitedi iquec.”³⁰ Mëyantequid ushë chonoc matses utsibon natiambocquin mëyanaqui naden mimbi Nuquin Papa chiendac:

“Natiambocquieque. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

³¹ Èbi buansho isec shubiequi, Èbi mëyantequid ushë choec, quequin tantiesa mibi icpec. Nèdënquenuioctiadquidi achuëshquiocquid nèdëncasho isash: “¿Tanunquiocquid badedquio nèdënquenuio icpec,” quecta mibi icti? Adembidi: “Cuidenquioctiadquidi nec,” queboedëmbi èbi icsaisa unës uasho isash: “¿Èbitedi icsambocquid comapenen cuidenquio icpec,” queoaspecta mibi ique? Ai, quequin tantiatiad —quepanëdash Esus.

³² Adnubien Esusbëdta icsambocquid dada daëd nidmequimbi ³³ macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash. ³⁴ Dectanac diadequi Esus Nuquin Papa caic: —Èbi unës uanuequidon tantienquiocquin unës uainquioctiadquidi cuesten dectanoshibique. Aidon icsamboen nambo yacbimboec bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempi puduemebanquin isquin Esusën dashcute bedbampanëdash.

³⁵ Adnubien matses dadpeshun isnubi Isadaidbo tsusiobo isec tabadquin mamëshumbededec: —¿Utsi-utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

³⁶ Adembidi sondadon mamëshumbededquin paëmbocquid mucambocquid sananquin Esus ismequimbi: ³⁷ —Isadaidbo chuiquid dapa iquec unësenquio iquebi, quish nëid bednush bud —capanëdash sondadon.

³⁸ Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

³⁹ Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac èbi daëdi mibëd budebi —quepanëdash abëd diadquid.

⁴⁰ Adec Esusbëdta dectamboed abentsëc onquesho tantiash aidbëdta dectamboed utsi: —¿Aidi unës uatequid yacpadquid mibi yec, Nuquin Papan èbi cuidendac, quec dacuëdënenquioda mimbi icpe? ⁴¹ Icsamboen nabanacsho cuidaid èbi daëdi nec. Aidi bédambocquin nabanquid icsho cuidenquioctiadquidi nec —quepanëdash.

⁴² Aden chiashic Esus caic: —Mibi yacno choash chuiquid dapa icquin èbi bédamboen tantiaquin nata —quepanëdash Esusbëdta dectamboed utsi.

⁴³ Adoaquien: —Abimbo chuinu. Tantia. Nëid ushëmbi abuc èbi bédamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

Esus unësaid

(*Mat 27.45-56; Mad 15.33-41; Uan 19.28-30*)

⁴⁴ Adec onquenubi ushë cuembo yanuc bëtinaçbimboec inchëshquio yashic ushë budtsan chënquedoapanëdash. ⁴⁵ Inchëshquio icnubi Nuquin Papa tabadte

shubu uashunaid yacno puduedtemaid quënën dashcute bitsipambocquid tsincabudquin dectanëdaid tembi daëdquoio yec canchedbudcuempanëdash. ⁴⁶ Adnubien unësbudec comapenec cuëdec: —Mibi yacno ëbi yuedta, Papa —quias Esus unësbudpanëdash.

⁴⁷ Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdamocquid niosh. Aidi unësenquioctiadquidi unës uaposh —quepanëdash. ⁴⁸ Ambo tabadquin isquid utsibo Esus unëso isash unësquoio yec aton shubuno nidanepanëdash. ⁴⁹ Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

Esus nauedaid

(*Mat 27.57-61; Mad 15.42, 47; Uan 19.38-42*)

⁵⁰ Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdamocquid icpanëdash. ⁵¹ Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquoio icpanëdash. ⁵² Aidi Esus unëso isash Esusën dada nauedtiadquoio yec Pidato yacno nidshun ambi tantiacpaden Osen chuipanëdash. ⁵³ Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquoio Esus Osen badedquoio nauedpanëdash. ⁵⁴ Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

⁵⁵ Adnubien: Nauednu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash. ⁵⁶ Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnenash inchëshbudtsëqui seis icnuc Nuquin Papan chiacpadece chonoadtemaid ushë nec, quias Esus nauedacno nidenquoio yec tabadpanëdash. Nuquin Papan chiacpadece tabadpanëdash.

Esus uincuente

(*Mat 28.1-10; Mad 16.1-8; Uan 20.1-10*)

24 Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocono isec chidobo nidpanëdash. ² Ambo choshon Esus nauedshun bëtashaid cuënote shëcniascho isashi ³ shëcuën puduedash aton Icho Esusën dada nibëdsho isec tabadpanëdash. ⁴ Adec tabadnubien dada daëd dashcute dasiuidac bimboec dasiuidash chënquec chopanëdash. ⁵ Aid isash dacuëdcuededequi isenquoio yec chidobo tabadpanëdash. Adsho isash dada daëd: —¿Atotsi canuen unësacsho nauedac uincuemi-aid nibëne? ⁶ Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco? ⁷ Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoaiibi,” quequin Esusën chiondash —quepanëdash

dada daëd chidobo caic. ⁸Aden chiac chidobon Esusën chiaid abi bēpiscudaïd pad-piden tantiapanēdash.

⁹Aden tantiash Esus nauedaid shēcuē yacnoēsh puduenanec Esus tantiaquid dadpen tabadacno choec puduedshun ambi isboedbēdtabi ambi tantiaboed chidobon chuïbampañēdash. ¹⁰Madia shubu dadpen icquid Mactada caïd yacnoshon tishaid yec Uana yec Madia utsi Uambēdtan Acobon tita yec chido utsibo yec quec choshon Esusën Ēbi chuïbeneta caïdo chuïpañēdash. ¹¹Aden chuïsho tantiash: —Mimbi chiaïd tantiatiapimbo iquebi —quecuededpañēdash iccuededquido. ¹²Adnubien Petedo nidtoanec titinqec nauedaid shēcuē yacno choash shuebudquin shēcuē anisquin dataniaïd dashcuteuidi uesho ispañēdash. Aden isanec nidequi: —¿Atodain nechitec? —quepañēdash Petedo tantienquio yec.

Emaus yacmi nitde

(Mad 16.12-13)

¹³Adashic abi ushēmbi Edusaden yacnoēsh utsibobēd iccuededboed dada daëd shubu daëdpactsēc icquid Emaus caïd yacno nidpañēdash. ¹⁴Adec nidequi ambi Edusaden yacnoshon isboedbēdta ambi tantiaboed chiec onquepañēdash. ¹⁵Aden chiec onquec nidshobi Esusën aid daëdi chinunash aidobēd nidpañēdash. ¹⁶Aden abi chinuntuidsho isac utsibimboec Esus isadpañēdash.

¹⁷Adec nidequi Esus: —¿Atotsi chuïbanec onquec nide? —quepañēdash. Adsho tantiash unēsquio yec mamēnenquio yec nidtuidpañēdash.

¹⁸Adec nidtuidash Quēdeyopas cuēmēdquid: —¿Edusaden yacno tabadtuidquin anoshon naboed mimbiuidtsēqui tantiamboda icco? —quepañēdash Esus caic.

¹⁹Adoaquien: —¿Atotsi naid chiec ne? —quepañēdash Esus.

Adoaquien: —Esus Nasaded yacnoēsh choquid chiec nebi. Aidi Nuquin Papan ambi chiaïd chuïmiaïd icquin ambi chuïbaniaïd ambi nabanaidbidi Nuquin Papanbēdtan matses dadpenshun bēdamboen isaid icposh. ²⁰Nuquin tsusio dapabobēdtan nuqui chuïquid utsibon Esus bedshun: “Unēs uata,” quequin isadaïdpembo chuïquid meniac cuesten dectanquin unēs uaposh. ²¹Nēbi chuïquid dapa isadaïdpembo iquenquïocpashun, quequin Esus isadaïdbo yec isadaïdbo chuïquid dapa ictsiash quequin ēbitedishun tantiapombi. Ēmbi caboedi unēs uaposh. Aidi unēs uan daēdec ushobi. ²²Adec daēdec ushun dacuēdanquiecnuc chidobon naden chuïbededposh: “Esusën dada nauedbocono badiadnuc nidshun isac ²³nibēdosh. Ambobi icnubi Nuquin Papan uaido mayan bēdabo daëd icsho isac, ‘Mimbi nibēnaïd nibēdec. Uincuenac,’ quïosh,” quequin chidobon chuïposh. ²⁴Aden chidobon chuïsho tantienquio yec ēbēd icquido Esusën dada nauedbocono nidshun chidobon chuïbocpadembi unēs uaboed nibēdsho isposh —quepañēdash ambi chinunaido Esus chiec.

²⁵Adoaquien: —Ma bēdiactsēc tantiaquid mibi daëdi neyoc. Nuquin Papan ambi chiaïd chuïmiaïdon dada uampid bēdiactsēc tantiatsec tantiesabidi ma mibi neyoc. ²⁶¿Bēdamboec tabadacno chuïquid dapa icnuec Esus mēyanaidba iquendactiosh? —quepañēdash Esus. ²⁷Aden chuïbanquin Moisesën dada uampidbēdtabi Nuquin Papan ambi yuecshun nanun chiaïd chuïmiaïdon dada uampid tantiamequin Esusën chuïbampañēdash.

²⁸Aden chuïbanequi shubu daëdpactsēc icquid Emaus caïd yacno anoentsēqui choshon datanshobimboecnuc Esus isun: ²⁹—Inchēsheque. Nēmbo ēbi yacno tabadec cho —abi daëdshun cac nidash aidobēd tabadpañēdash.

³⁰ Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash. ³¹ Aden nasho isun badedi, Esus nec, quequin tantianubi Esus nibëdquio yampanëdash. ³² Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

³³ Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash. ³⁴ —Abimbo iquec. Nuquin Icho uincuempaccosh. Uincuenanec choquin aidëmbi Simon ismetuidposh —quepanëdash iccuededquido. ³⁵ Aden iccuededquidon chuisho tantiashun Emaus yacnoësh choabod daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

Abëd icboedo yacno Esus chote

(Mat 28.16-20; Mad 16.14-18; Uan 20.19-23)

³⁶ Adec onquecuedednubi nënantanquio choshon Esusën: —Nuquin Papan bëdamboen isaïdo yec dacuëdenquio yec tabad —capanëdash.

³⁷ Adec aid chosho isash: Podo bitsi nec, quec dacuëdequi abëd icquido tabadpanëdash. ³⁸ Adsho isashien Esus: —¿Atotsi quiash, ¿Esusida nepec? mibitedi quepe? ³⁹ Con mëdantebëdta con taë is. Èbibi nebique. ¿Mëtoccaïd taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

⁴⁰ Aden chuitanquin abi bëchun shuin mëtoccoid chiuë aton mëdantebëdta aton taë Esusën ismepanëdash. ⁴¹ Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentequidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien ⁴² nuëcquid shëaid cuëshë menepanëdash. ⁴³ Aden meniac bedshun Esusën pepanëdash abëd icquidon isnubi.

⁴⁴ Aden piash: —Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi —quepanëdash abëd icquido tantiamenuc. ⁴⁵ Aden chuishumbic abëd icquido tantiamequioquin: ⁴⁶ —Nuquin Papan dada uamiampid nad iquec: “Nuquin Papan chomiaïd, Quidistu caïd, matsesën mëyanquin unës uaqui daëdec ushash uincuenendac. ⁴⁷ Aid tantiashun mibi icsaid mimbi ënsho isash, Icsaquid nec, quenquio yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaïd utsi-utsiec yacno nidshun adomboembidi chuibanoaindac. ⁴⁸ Mëyanquin unës uaqui ëbi uincuenacsho mibitedishun ispec. ⁴⁹ Aden isun tantiaquido mibitedi icsho Nuquin Papan ambi mibitedi menenu caïd aton Mayan chomendambi. Aïdi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aïdi caimbudta,” —capanëdash Esusën.

Esus abuc indote*(Mad 16.19-20)*

⁵⁰ Adashic, bëyucanec nidequi Betania yacno anoentsëqui choash nidtuidshun aton mëdante abuc sananquin ismec: —Nëidtedi bëdamboen ista, Papa — quepanëdash Esus. ⁵¹ Aden chiacsho abëd capucuenequido niamequin Esus aton Papan abuc indopanëdash. ⁵² Aden indosho isash, Ębitedishun icbo nec, quequin ismec shuebudash: —Bëdambo iquebi —quianec Edusaden yacno nidanepanëdash. ⁵³ Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nitted-nittedquin Nuquin Papan naid chuidenepanëdash.

Padi. Aiteded dada uaombi, Teyopido.

UANËN DADA UAID

Nuquin Papa tantiamianquid chiaid

1 Ëndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquiobidi yec: —Nadquio Nuquin Papa iquec —quec tantiamianquidquio nec. ²Aidëmbi Nuquin Papabëd icquin ³abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec. ⁴Aidquio Nuquin Papa yacno tabadmianquid nec. Nuquin Papapadquidquiobidi yec: —Nadquio Nuquin Papa iquec —quequin paposhquiacbimboecnuc tantiamianquidbidi Esus nec. ⁵Adembidi matses ambi icsamboen naid tantiamequid nec. Adquid icquin: —Con Pamboen bëdamboshë icquidquio nendac. Aidën chiaid niac-niaquec mibi icsamboec tabadec —quequin chuisho tantiatipimbo icquin matsesën Esus chieshëmpondash.

⁶Aden Esusën chuibeniabi icnuc con shënision acten mentoanquidëmba Nuquin Papan chiacpadomboen ambi chiaid chuibampondash. ⁷—“Nuquin Papa yacnuësh abi tantiamequidquio choendac,” quequin Uanën chuibansho tantiashtun ma dadpeshun ambi chuiboed tantianu —quequin Nuquin Papan con shënision abi chuibanquid icmepanëdash. ⁸Nuquin Papa yacnuësh choacmaidëmbi con shënision: —Nuquin Papan chomiaid Esus nec —quequin chuibampondash. ⁹Aden ambi chuiboedquio Nuquin Papa tantiamenuec matsespanëdash Esus.

¹⁰Adash matsesbëd tabadsho ambi matses uaidombi tantienquio icquin chieshëmpondash. ¹¹Aden con matses isadaidbon Esus tantienquio iccondash. —Isadaidbo con matses nec —Nuquin Papa quenëdacpadquiec: —Isadaidbo con matses nec —queoapondash Esus. Adsho ambi con matses caidonquiobi dadpeshun Esus tantienquio icpondash. ¹²Utsibombien daëdpactsëcshun: —Nuquin Papan Madombo Esus nec —quequin tantiashtu Nuquin Papan: —Con mado nec. Con champi nec —cabempanëdash. ¹³—Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padenquio. —Nuquin Papan mado nebi —quequin ¿ambembi chuiquidta con mado capanëdash? Padenquio. Nuquin Papan Mayanën tantiamiacpadomboen aton Madombo Esus tantiashtu dada con mado caquin chido con champi capanëdash. Adembidi Esus tantiashtu adoendac.

¹⁴Adec Nuquin Papa tantiamequidquio Esus matsespanëdash. Nuquin Papan Mado abentsëqui yec bëdamboshë icpondash. Èbëd tabadquin nadatiambo icquin nabanquin matses bëdamboen nashumbampondash. Aden Nuquin Papambo tantiamepondash Esusën. ¹⁵Aid con shënision chuipondash. —Èmbi chuiboedquio nec. “Èbi icsaquid icnuc bëdamboshë icquidquio choec,” èmbi caboedquio nec. “Èmbia Nuquin Papan chiaid chuibambon aidëntsen tsyuec choshon chuibanendac. Èbi bëyuc tishaidi tishabi icnubi aid ënden icpampic,” èmbi caboedquiobi Esus nec —quepondash con shënision.

¹⁶Con shënision chiacpadquidquio icquin abi tantiaquido Nuquin Papan bëdamboen isaido icmeshun adenuidi Nuquin Papa nuqui bëdamboen ismec. ¹⁷Ëndenquimboshë Nuquin Papan chiaid dada uaquin Moisesën Nuquin Papan matses icsaido cuidte tantiamepampic. Padnuen Esuquidistun Nuquin Papan bëdamboen iste tantiamequin: —Nadquio Nuquin Papa iquec —quequin matses bëdamboen tan-

tiampepondash. ¹⁸ Ambi isacmaidquio icsho matsesën Nuquin Papa bédamboen tantiatipimbo iquec. Padnuen aton Mado abentsëcshunquio aton dayun tsadquidën-quiobi matsesun Nuquin Papa bédamboen tantiampepondash. Aidquio chuinu. Tántia.

Tsusiobon chuimiác Uan acten mentoanquidën chiaid

(Mat 3.11-12; Mad 1.7-8; Duc 3.15-17)

¹⁹ Con shënisio Nuquin Papa tantiabenquid acten mentobenequid niondash. Aden acten mentobenesho isash Moisesën chiampid namequido aid chuimenuc chochopondash. Edusaden yacnocquido isadaidbo tsusiobon: —Chuimetan —cac chochoquin con shënisio chuituidpondash. ²⁰ —¿Tsuntsin chiac nai? ¿Mimbembida nai? “Bédamboshë icquidquio Nuquin Papan chomendac,” quequin nuquin tsusedpan ¿dada uapampidta ne? —catuidpondash. Adoquien: —Padenquio. Aidpenquio nebi —quepondash. ²¹ Adshobien: —¿Tsumintsi ne? “Naden naindambi,” quequin Nuquin Papan chiaid chuibanquidquio unëspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: ¿Tsumintsimbo ne? “Moisespadquidquio choendac,” ¿capampidta ne? —caquien: —Padenquio. Aidpenquio nebi —queoapondash con shënisio.

²² Adshobien padpidemboen: —¿Tsumintsimbo ne? ¿Mimbenquiobienda nao? Èbi: “Chuimetan,” caboed chiec nidnu. Baded ëbi chui —caquien: ²³ —Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bédamboshë icquid chomiabi icnuc aid bëyuec utsiba choendac.

Aidën shubu nibëdacno capucuenequin chuibanendac naden.

‘Chuiquid dapambo choeque. Podqued andëdbanshunta,’

quiácimboen chuiquin: ‘Nuquin Icbo choeque. Icsaid ënash bédamboec tabadta,’ quequin chiendac bëyuc choshon,”

quequin chuipampid nebi —quepondash con shënisio.

²⁴ Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shënisio chuituidpondash. ²⁵ —Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquio icquin acten mentobano?” mibi caimbi —caquien: ²⁶ —Nuquin Papan chiacpadomboen abi tantiabenquido acten mentobenec nebi. Èmbi aden bédamboen nanuc utsimbien bédamboenshë naindac. Aidi mibëdi tabadshobi ma mimbi tantienquio icboc. ²⁷ Èmbia Nuquin Papan chiaid chuibanombi. Aidëntsen tsyuec choshon comapenen tantiaquin Nuquin Papan chiaidquio chuiquin Nuquin Papambo tantiamendac. “Aidi bédamboshë icquid icnuc ëbi icsaquid icsho ¿atotsieshun: ‘Aid choec,’ quequin chuiquidquio Nuquin Papan icmioshi?” quec tsadebi —quepondash con shënisio padiseyobo chiec. ²⁸ Acte Odan caid uquë cuëmatsiucüesh shubu dadpen icquid Betania caid yacnuësh adpondash.

Abided cuidadtequid nendac, Esus caid

²⁹ Badiadshun padpiden con shënision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquio obeca bacuëbimboecquid choeque. Aidi isadaidbon obeca bacuëded cuidquin unës uacimboec matses icsaid bedshunec abided cuidadec unësendac. ³⁰ Èmbi chianeboedquio nec. “Èbi bëyuc tishaidi tishabi icnubi aidi ënden icpampic,” quiash:

“Ëbi bēdapabi icnuc bēdamboshē icquidquo choendac,” quepobi. ³¹ Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidēmbi ěmbibi badedquio tantienquio iccombi. “Nuquin Papan chomiaid nec,” quequin tantienquio iccombi —quepondash con shēnisio.

Esus mentoaid

(*Mat 3.16-17; Mad 1.9-11; Duc 3.21-22*)

³² Adashic abi onquec: —Nuquin Papan naden ismiac tantiabenombi. Aton Mayan aton dada nibēdquiec dēbimbimboec budec: “Matsadtoendac,” quebocpadequi Esus matsadtocho ispombi. ³³ Adsho isash: “Adquidshenda caposh Nuquin Papan: ‘Acten mentoanquid icta,’ ěbi caboedēn. ‘Con Mayan dēbimbimboec budec matsadto-boedēn abi tantiaquidobēd con Mayan tabadmendac,’ Nuquin Papan caboedshenda nepec,” quiobi Esus caic. Ęmbemi tantienquio ictsenombi. ³⁴ Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquio Esus nec,” quequin mibi chiec nebi —quepondash con shēnisio.

Nēid dada uaquid Uan Esusbēd yanaid

³⁵ Adashic badiadash ambi acten mentobambocno con shēnisio nidoapondash. Aid tsibanequi nidoapondabi. ³⁶ Adec nidquin isquien Esus cuempec. Cuensho isashien con shēnisio: —Is. “Nuquin Papan namiaidquio obeca bacuēbimboecquid nec,” ěmbi caboed cueneque —quepondash.

³⁷ Adsho tantiatanequini con shēnisiobēd iccondaids utsibēd Esus chinunec nidpondac. ³⁸ Nidquin chinunac bidiadquin istanequien: —¿Atotsi quec ne? —quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu —capondambi. —Chuiquidquio nec —quequin con onquetembi Dabi caondambi. ³⁹ Adoac: —En isec cho —cac abi ushacno isec nidondabi. Ushē abucquio icnuc puduedash yuec tabadec onquetaniash inchēshtsēcnubi chondabi.

⁴⁰ Ębēdtan Esus chinunondaids Andedes niondash. Shubu dadpen icquid Betsaida caid yacnuēsh caniquid niondash. Aton buchi Petedo niondash. Petedobidi Simon capondash. ⁴¹ Adnubien Andedes aton buchi chiec nidpondash. Adec nidquin Petedo istuidash: —Nuquin tsusedpabon chuiampid Nuquin Papa yacnuēsh choquid Mesias caid istuidombique. En isec cho, buchi —capac caondash. Nuquin Papa yacnuēsh choquid Quidistu cashumbic con onqueten Mesias caic.

⁴² Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaid moco utsi uatiapimbo yacimboec mibi chieshtoenquio icquid yanendac,” quequin mibi nidaid moco cuēnendambi —quepondash Esus Petedo caic. Con onqueten nidaid moco cain Sepas capondash Esusēn. Quidieco matsesēn onqueten Petedo capondash.

Esusēn Uedipebēdta Natanaid istuidaids

⁴³ Badiadash: —Con nidaids Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash. ⁴⁴ Betsaida yacnuēsh caniquidbidi nepondash aid. ⁴⁵ Esusbēd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesēn chiampicpadomboen chuiquin nuquin tsused-

pabo utsibon: “Bëdamboshë icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuësh caniquid neque. Osen mado nec —quepac caondash. ⁴⁶ Adsho tantiash: —¿Nasaded yacnuështa dada bëdambo icquid chopatsiash? Auëshquio dada bëdambo icquid chotiapimbo iquendac —quepac caondash Natanaid. Adsho tantiash: —En isquiec cho —quepac caondash Uedipe.

⁴⁷ Adoac choshobien Esusën: —Is. Isadaidbombo neque. Muesambo nec —caquien ⁴⁸ Natanaidën: —¿Mitsipaden ëbi tantie? Mabi mimi isacmaidquio nepayoc —capondash. Adoquien: —Uedipen bedtanabi icnubi mibi cuëte icueda caid tayun tsadsho tantiombi —capondash Esusën. ⁴⁹ Adsho tantiashumbien: —Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac —capondash Natanaidën: —Istiapimbo yacno chiosh —quequin tantiashun. ⁵⁰ Adoquien Esusën: —“Cuëte icueda caid tayun tsadsho mibi tantiombi,” ëbi qesho ¿tantiashta: “Nuquin Papan Madombobien nec,” badedquio que? Padpiden comapenen tantiaquin nabansho isun mimi ëbi tantiaquiot-siandac. ⁵¹ Tanta. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bëdabo Nuquin Papa yacno dectatonesho isash: “Aidbëd tabadte Nuquin Papan ëbi tantiametiadquio iquec,” quequin tantiapampicpadomboen mimi ëbi tantiendac. “Matsesun Nuquin Papan Madon matses abëd tabadte tantiamec,” quequin mimi ëbi tantiendac —quepondash Esus abëd icquido chiec.

Esusën ambembi actequid uaid

2 Aden Natanaid chiash aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobëd Esusën tita puduedpondash. ² Esus-sen puduedpondash. ³ Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid naimëdoshe. Comapenen tantiaquid icquin mimi tantiacpadomboen nata, mado —capondash. ⁴ Adoquien: —¿Atotsi quequin mimi ëbi chuipe, tita? Chiata. Con Pan tantiacpadënquio naimbique —quepondash Esus. ⁵ Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash.

⁶ Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash. ⁷ Adnubien Esusën: —Në tabadquidën acte cushtoban —cac cubu-cubuctsëcquio icnuc acte cushtobampondash yuabon. ⁸ Cushtobanacsho isun Esusën: —Ueshun buanshun mibi ancaquid acmetan —cac acmetampondash.

⁹ Adoac acquin tanaquien actequid bëdamboshë icquid icpac caondash acte icboedi. —Nibëda damboedquio ¿mitsimbo bedpash? —quepac caondash yuabo ancaquid. Adsho tantiashun yuabon: —Esusënquiobien naccosh —quequin tantiapac caondash. Adnubien yuabo ancaquidën chido bednuequid chuipondash: —Aidën actequid bëpash —qeshun. ¹⁰ —Nuquin matsesën actequid bëdambo icquidba isedanquido acmequid nendac. Adquid acmiac matses nua cubudacsho isash: “Actequid icsactsëcquidtsen acmenu,” quequid yendac. Aden mimi nambo. Bëdambo icquidquio ma mimi nëbi acmianeyoc —quepondash yuabo ancaquid

chido bednuequid chiec. Adnubien yuabon actequid bēdamboshē icquid abitedi acmebampondash.

¹¹ Aden comapenen tantiaquid icquin ambembi actequid uaquin Esusēn tauamboen ismebempondash. —Nuquin Papa yacnuēsh choquid yec comapenen tantiaquidquio nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquio. Adosho isun: —Con matsesēn chiampid Nuquin Papan chomiaidien nec —quequin tantiabenondambi.

Esusēn chushcaquin cuemiaid

(*Mat 21.12-13; Mad 11.15-18; Duc 19.45-46*)

¹² Aden ambembi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abēd icquido yec ēbi yec quec Esusbēd nidaniondabi. Ambo daēdpactsec ushec tabadondash. ¹³ Ambo ushcuidanec nidequi shubu dadpen icquid Edusaden yacnotsen Esus nidaniondash. —Nuquin matses tsusedpabo unēs uainquio icquin Nuquin Papan matamiampid inchēsh tantiaquin obeca bacuē pec nēbi tabadeque. Isec nidnu. Nid —quianec nidanepondash. ¹⁴ Nidashic Nuquin Papa tabadte shubu uashunaid dapa daquēnē uaidēn puduedondash nuntanquio puduedabi. Puduedshun isquien matses dadpen nēish yua chedobēd tabadpec. Baca bēnē yec obeca yec dēbimbimboecquid quēnēmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabēcaid dayun tabadpondash. Aido nidaid utsi yacnuēsh choquido aton piucquid dadpen bedshun ampeshunquin daēdpactsēc menequido niondash. ¹⁵ Adec tabadsho istanquimbien Esusēn cueshcate badedquio nacentanquin cuesquin niacumpondash umanuc abitedimbo. Aden umanuc niacuntanquin tabēcaidtsen bidiacbanquin piucquid siabudshumbampondash. ¹⁶ Adotanquimbic dēbimbimboecquid yuaquidotsen chushcapondash. —Baded mitsana buanec nid. ¿Piucquid bednuen shubu uaidta nedic? Ma con Pa tantiate shubu neyoc —quequin chushcapondash.

¹⁷ Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquio nendac,” quequin Esusēn nate chuiquin dada uapampic —quequin tantiondambi.

¹⁸ Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ēbi isme —caquien ¹⁹ ismenquio icquin ompoacbimboen Esusēn chuipondash. Abibi cadequi: —Mimbi nēid shubu icsa uabocsho padpiden nacnenoaindambi bēdambo icnuc. Daēdec ushquin nacnenquin nainendambi —quepondash Esus. ²⁰ Adsho tantias Nuquin Papa tabadte shubu uashunaid dapa ca danec: —¿Badedquioda nacnempatsia? Nēid nacnenquin seta dadpenquioshē 46tedquiobi matamiac cadenec —quepondash con matses chuiquido.

²¹⁻²² Yuecquio ictaneshun Esusēn aden chiaid tantiondambi. Unēs uacsho chococac daēdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daēdec ushquin nacnenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

Dadpeshun Esus tantiauidaid

²³ Nuquin Papa tabadte shubu uashunaid daquënë uacnoshon cuemeshumbic Edusaden yacnoshontsen comapenen tantiaquin nabanquin Esusën ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —queshun Esus bëdiactsëc tantiatsëcondash. ²⁴ Aden tantiat-sëcscho ambembi tantiaash: —Ai, ëbi tantiaquidquo nec —quenquo icquin: —Ëbi bëdiactsëc tantiatsec —quequin tantiapanëdash. ²⁵ Utsin chiambobi ambembi tantianëdash. Aden matses abitedishun otacquo tantiaid ambembi tantiaquidquo Esus niondash.

Esusën Nicodemo caid chiaid

3 Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash. ² Inchëshën Esusbëd onquenuc chopondash. Choshombic aidëmbi: —“Nuquin Papan icmiacpadquid chuiquidquo mibi nec,” quequin tantiembi. Mimbi comapenen tantiaquin nabansho isun: “Nuquin Papan nami-aidënuidtsëquien adotsiash,” mibi caombi —quepondash.

³ Adsho tantiaashun: —Ai, adquid nebi —quenquo icquin Esusën ompoacbimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquo ictsiac ⁴ —quesho tantiaashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo. ⁵ Adsho tantiaashun Esusën: —Nuquin Papan Mayanën tantiamiac: “Nuquin Papa tantiaquin ëbi ic-said ëntiadquo iquebi,” quiash bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac. ⁶ Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. ⁷ “Chuca uaiduidtsëqui Nuquin Papabëd tabadendac,” ëbi quesho tantiaash: “¿Midapaden chie?” quepequien mibi iquec. ⁸ Tantia. Mibi chuinu. Cunquequid isadenquo icquid nec. Isadenquo icquimbi cuncac cuëte ishcodsho isash: “Abi cunquec,” mibi quepec. Adquiobidi isadenquo Nuquin Papan Mayan iquec. Isadenquo icquimbi aidën chuca uaid bëdamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin mimbi tantienquo icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

⁹ Adsho tantiaash: —¿Midapadec? —quepondash Nicodemo. ¹⁰ Adoquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc. ¹¹ Ènden ushë utsin mibi chedo chiombi. Èmbi isondaidquo chuiquinc ëmbi tantiondaidquo chuiquinc caombi. Adsho tantiaash: “Tantiadenquo iquec,” ma mibi queboc. ¹² ¿Èmbi chuiboed tantiadenquo icnubi padpiden chuiquin ëmbi Nuquin Papan abi yacnoshon naid chuishomenda tantiatsia? ¹³ Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Èmbien Nuquin Papa yacnuësh chondaidënquo: “Nadquo iquec,” quequin Nuquin Papa tantiamendac. ¹⁴ ¿Atotsi canuen nuquin tsusedpa Moisesën nisibimboecnuc shocosh nacnenaïd dectampampic? “Nuquin Papan chiacpadec ma aid isec

nisin piaid bēdanu,” quequin cuesten dectampampic. Adomboembidi matses cuidmenquo icnuec cuesten dectamēdendabi ēbided cuidadec unēsec. ¹⁵ Ēbi tantiaquido unēsacsho cuidenquo icquin Nuquin Papa yacno ēbēd tabadmenuec adendabi — quepondash Esus Nicodemo chiec.

Nuquin Papan matses abitedi tantiaquin naid

¹⁶ Aden Esusēn abided cuidadec unēste chuipondash. Nuquin Papan: —Ma adec abided cuidadec unēsnu —quequin Esus chomepanēdash. —Unēsquo iquec — quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsēcquiobi abided cuidpanēdash. —Ēmbi adoaid con Mado tantiaquid unēsacsho icsaido cuidacno nidmenquo icquin ēbēdi tabadmendambi —quequin aton Madoded cuidpanēdash. ¹⁷ ¿Matses cuidnuenda Nuquin Papan Esus matsesmepanēdash? Padenquo. Matses cuidenquo icnuen napanēdash.

¹⁸ Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshēmpec —qeshun. ¹⁹ Nuquin Papan matsesmiadēn Esusēn abi icsaid chuisho matses icsambo icquidon tantiatipimbo iquec. Ambi icsamboen naid ėntiapimbo icquin Esus tantiatipimbo iquec. ²⁰ Adquidon: —Ēbi icsaid Esusēn utsibo tantiamenushe. “Icsambo iquec,” ēbi canushe —qeshun Esus chieshēmpec. ²¹ Nuquin Papan chiacpadec tabadquidombien Esus chieshēnenquo iquec. —Nuquin Papan namiacpadec tabadquid nebique. Ma Esusēn ėmbi bēdamboen naid chuibampanuna —quiash Esus tantiate bumpec.

Uan acten mentoanquidēn Esus chuioaid

²² Adec Nicodemobēd onqueboshien Esus nidpondash. Edusaden yacnuēsh nidec aid nidaidēmbi Udeya caidēn capucueniondash. Abēd nidshobini Nuquin Papan chiaid Esusēn chuibampondash. Adec nidshun Nuquin Papa tantiabenuido acten mentobeniondambi. ²³ Adnubien adomboembidi con shēnisiotsen acten mentobeniac caondash. Enon caid yacnoshon Sadin caid anoentsēqui chunquen diadacnoshon matses dadpen acten mentoac caondash con shēnision. ²⁴ Chieshēmēnquidon quēnēn nauedabi adoac caondash.

²⁵ Adnubien con shēnisiobēd icquido con matses utsibēd: —Mimbi icsamboen chiec —quec chushcananac caondash. Con shēnisiobēd icquido: —Uanēn Nuquin Papa tantiabenuido bēdamboen acten mentobamposh —quesho tantiaish: —Padenquo. Esusēmbien bēdamboen acten mentobaniosh —quepac caondash. ²⁶ Adshumbien con shēnisiobēd icquidon: —Nuqui chuiquid chiec nidnu. Nid —quianec nidquin con shēnisiio chuituidpac caondash. —Acte Odan caid uquē cuēmatsiucshun ¿mitsicquid: “Nuquin Papan chomiaid nec,” mimbi cadio? Aidēn mimbi naid dēniacquin matses dadpenquo acten mentobeniac caosh. ¿Ada bēda icpec? —caquien: ²⁷ —“Nuquin Papan chiacpadomboen Esusēn nash. Adomboembimbi naic,” qeshun Esus chieshēntiapimbo iquendabi. ²⁸ “Nuquin Papan chomiaidpenquieni nec,” quequin mibi chiondambi. “Nuquin Papan chomiac bēdamboshē icquid choendac, quequin bēyuc choshon aid chiec nebi,” quiondabi mibi chiec. ²⁹ “Ēmbi chuiboed nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidēn: “Min bēnēbēd nidenda,” caquinda ictiosh? Padenquo. Bēnēbēd nidmiash bēdambo yacimboc Esusbēd nidanesho isash bēdambo iquebi. ³⁰ Ēmbibi Nuquin Papan chi-

acpadomboen Esus tantiaequin ënquin chuibanuc ëmbi acten mentoaido daëdpactsäc yanendac. Ëmbi chuiboedquio Esus tantiaquidoen dadpenquio yanendac. Aidquio bédamboshë iquec —quepac caondash con shënisio abëd icquido chiec.

Nuquin Papa yacnuësh choquid chiaid

³¹ Adshumbic con shënision naden chuipac caondash. —Esusquio bédamboshë iquec. Nuquin Papa yacnuësh choquid abipadquid utsi nibëdec. Padnueni mates yec: “Nuquin Papa isondambi. Nadquio iccondash” quequin chuitiapimbo iquebi. Esusëmbien ³² ambi isondaidbëdta ambi tantiondaidquio chuipec. Aden chiaqui mates dadpen: “Abimbo caic,” quenquio icpec. ³³ Esus tantiaquidon: “Nuquin Papa muesambo nec. Ambi: ‘Bédamboshë icquid choendac,’ quequin dada uamepampidquio Esus nec,” capec. ³⁴ Nuquin Papan chomiaidquio icquin Nuquin Papan chiaidquio Esusën chuibanec. Nuquin Papan aton Mayan abëd tabadmiaid icquin comapenen tantiaquin ismebanquin chuibanec. ³⁵ Ambi tantiaidquio icsho aton Papan abitedishun Icbombo icmiac. ³⁶ Adnuc: “Abitedishun Icbombo Esus nec,” quequin aton Mado tantiaquido unësacsho Nuquin Papan abëdi tabadmendac padpidec unësenquio icnuc. Esus chieshëncquidoen Nuquin Papa yacno isenquio yec icsaido cuidquiacno nidendac —quequin con shënision chuipac caondash.

Acte uequid chido Esusën chiaid

4 Esusbëd icquin Nuquin Papa tantiabenquido acten mentobanondambi. Adnubien con mates chuiquido padiseyo caidon: —“Uan acten mentoanquidën naid dëniacquin Esusën mates dadpenquio acten mentobanosh,” quiosh —queshun Esus chieshëmpac caondash. ² Esusën nainquio icnuc ëmbimbo nasho isun chiaqui aden Esus chieshënac caondash. ³ —Mibi adosh —cac: —Con nidaidën nidnu —quianec nidondash Esus. Aid nidaid Udeya caid yacnuësh nidec aton nidaid Cadidia caid yacno nidondash.

⁴ Aid podquedën nidequi nidaid utsi yacno Samadia caid yacno nidpondash. ⁵⁻⁶ Adec nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: —Ëbi unësan nëid tied: “Con na nec,” cata, mado —quequin aton mado Ose chiampid tied niondash. Ambo aidën uëdëshcampid acte uete icpondash. Aid dayunquibi: —Tiboquenu —quec Esus tsadtuidpondash. ⁷⁻⁸ Adec tsadtuidnubini: —Pete bedtanu —quianec shubuno nidanepondac. Esus abentsëqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusën: —Acte beccho. Acnu, champi —caquien: ⁹ —“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. —Samadia yacnocquidbëd onquesambo isadaidbo nec —quequin tantiec adac caondash.

¹⁰ Adshobien Esusën badedquio cuembo chienquio icquin chuipac caondash. —Nuquin Papan bédamboen isquin naidbëdta ëbi tantiaquin: “Acte beccho,” mimbi ëbi catsiac. Adsho acte bédambo icmianquid mibi acmetsiambi —quepac caondash Esus. ¹¹ Adoquien acte uequid chidon actembo ca danquin: —¿Mitsipaden acte ueshun ëbi menetsia? Ma min tëchu nibëdpayoc. ¿Midapaden mimbi uetiapimboen acte uquëducquio iquec? ¿Mitsimbo acte bédambo icmianquid ueshun ëbi acmetsia? ¹² Nëid acte nuquin tsusedpa Acobon uëdëshcapampid nec. Aton yuabobëdta aton

bacuëbon acpampid nec. Nuquin tsusedpa bédambo icquin nampid icnuc ¿mitsipadquidquo icquin nai? ¿Bédamboshë icquid icquinda mimbi acte bédamboshë icquid ëbi acmepatsia? —capondash acte uequid chidon. ¹³ Adoquien: —Nëid acash mibi bundoaic. ¹⁴ Èmbi acmiac mibi bundoenquo ictsiac. Acte bédambo icmianquid acmiac ënëdenquo yec tabadquid mibi yantsiac —quepac caondash Esus badedi cuembo chienquo yec. —Èbi tantiaquidobëd con Mayan tabadmiac bédambo yanec unësascho ëbëdi tabadmendambi —quequin tantiec adac caondash.

¹⁵ Adsho tantiashun padpiden acte ca danquin: —Adquidquo ëbi acme. Bundoenquo yec nëmbo acte uec choenquo ictsiabique —caquien: ¹⁶ —Min bënë bedtan —capac caondash Esusën. —Nuquin Papan chomiaidquo yec comapenen tantiaquid mibi nec —camenuen adoac caondash. ¹⁷ —Min bënë bedtan —caquien acte uequid chido: —Con bënë nibëdec —quepac caondash. Adshobien Esusën: —Abimbo mimbi caic. Min bënë nibëdec. ¹⁸ Dada mëdante auc abentsëctedquiobi min bënë icpadenec. Aidon mibi niambudnian nëbi mibëd icquid min bënëpenquo nec. Abimbo mimbi caic —quepac caondash Esus.

¹⁹ Adsho tantiash: —Isambobi comapenen tantiaquidien mibi nechitec. Mibipadquidquo chiec: “Nuquin Papan chomiaidquo nendac,” quepec con matses. Adquid icquin en ëbi chui. ¿Mitsishunquiemi Nuquin Papa bédamboen tantiapë?

²⁰ Con matses: “Nëmboen Nuquin Papa iquec. Nëid macuësh dapanshunuidtsëqui Nuquin Papa tantiac bédambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bédambo ictsiash,” quepec —quepac caondash acte uequid chido. ²¹ Adsho tantiashun Esusën: —Tantia. Mibi bédamboen chuinu. Nëbi nëid macuësh dapanshunuidtsëqui Nuquin Papa tantienquo icquin Edusaden yacnoshonuidtsëqui tantienquo icquin nidaid utsi-utsiec yacnoshon adembidi Nuquin Papa tantiabededendac. ²² Min matsesën Nuquin Papan chiaid daëdpactsëc tantiatsëcshun Nuquin Papa bëdiactsëc tantiatsec. Con matses isadaidbombien Nuquin Papan chiaid dadpen tantiashun: “Nuquin Papan chomiaid nuquin matses bédambo icmianquid nuquin matsesën tishendac,” quequin bédamboen tantiec. ²³ Nëbien utsin-utsinquien muainquo icquin: “Con Icbo nec,” quequin Nuquin Papa tantiendac. Ambi chiacpadec bédamboec tabadsho isash: “Adquid ëbi tantiaquidquo nec,” quetsiash Nuquin Papa. ²⁴ “Nuquin Papa tantiaquid ictiadquo iquebi,” quequidën Nuquin Papan Mayanën tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chiec.

²⁵ Adsho tantiash chido: —“Nuquin Papan matses bédambo icmequid chuiquid dapa chomendac,” quequin chuisho tantiondambi. Aid mesias caidi utsibon quidistu caposh. Aidëmbi nuqui tantienquo yaidtedi tantiametsiash. Aidbimboecquidien mibi nechitec —caquien: ²⁶ —Mimbi chiaidquiobini nec —quepac caondash Esus chido chiec.

Esus Samadia yacnocquido chiec tabadaid

²⁷ Adnubini pete bedtanec chopondac. Adshun isquien chidobëd onquepec. Adsho isash: —¿Atotsi chiec chidobëd onquepec? —quepondabi utsibëd otacquio onquec. —¿Atotsi chiec chidobëd onquo? —cainquo iccondambi Esus. ²⁸ Adec ëbi chonobi tëchu nianec acte uec choquid chido nidpondash aton matses chiec shubuno nidec. ²⁹ —Isec cho. Èmbi isacmaid dadan ëmbi naid abitedi chiohi. ¿Nuquin Papa yac-

nuësh choquid Quidistu caidta nioshe? En isec cho —catuidac: ³⁰—En isnu. Nid. Aidiën nechitashe. Isnu —quianec matses dadpen cho-chopondash.

³¹ Aido choabi icnubi: —Në pete, Icho —ëmbi caquien: ³²—Padi. Mimbi tantienquio yaid con na utsi iquec —quepondash Esus petepenquio chiequi. ³³ Adsho tantiashini pete ca danec: —¿Utsibonda pete bëshumpash? —quecuededpondac ëbitedi. ³⁴ Adsho tantiash Esus: —Ëbi cuishoncamete utsi iquec. Ëbi chomiondaid Nuquin Papan chiacpadomboen naic bëdambo iquebi pete piac bimboec. Ambi chiaidtedi nainuec dayacquo iquebi —quepondash. ³⁵ Adashic padpidec: —“Ushë daëd-daëdquiecnuc nidmeshun nadquid adosbiecquid ëshëacsho bedembi,” quepec nuquin matses. Adosbiecquid ëshëacpaden ¿yuecshunda nëmbo icquidon ëbi tantiabempec? Padenquio. “Nëidon Esus tantiendac,” mimbi cacmaidobi cho-choeque. Is. ³⁶ Acte uequid chido ëmbi chuibodëdn chiac matses dadpen cho-choeque. Chuibanuna. Ëbi tantiash Nuquin Papabëd tabadtequid yanendac. Adsho isash nuqui cuis honquendac piucquid bedash bimboec. ³⁷ Tied icbon: “Con na peta,” cac ambi nidtsinacmaid matsesën bedec. ³⁸ Aden ambi nitsinacmaid bedac bimboen mimbi naic. Utsibomba Nuquin Papan chiaid chuibanëdaido nëmbo icquido mimbitsen chuibanec. Adoac nëmbo icquidon Nuquin Papabëdta ëbi tantiabenec. Cho-choeque. Is. En chuiban —capondash Esusën abëd icquido chuiquin.

³⁹ Adnubien Esusbëd onqueboed chidon chuitanaido cho-chopondash. —“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashe. Isnu. Nid —quianec cho-chopac caondash. ⁴⁰ Chochoquimbi badedi: —Ëbi yacno ushquin chiec cho —quequin beduanac Samadia yacno tabadquin chuibampondash Esusën. Aid matses chiec ambo daëdec ushpondash. ⁴¹ Aden Esusën chuisho tantiashien: —Nuquin Papa yacnuësh choquid Esus nec —quiampondash anocquido dadpen. ⁴² Adashic acte uequid chido chiec: —Mimbi chuishouidi tantiaboedëmbi nëembi aidënquio chuisho bëdamboen tanti aquioc. “Nuquin Papa matses bëdamboen ismequid nec,” quequin tantiembi —quiampondash Samadia yacnocquido dadpen.

Chuiquid dapan mado Esusën bëdamiaid

⁴³ Daëdec ushanec Samadia yacnuësh Esus nidondash. Abi caniondacno nidaid Cadidia caid yacno nidpondash. ⁴⁴ —Ëmbi chiacpaden abi caniondacnoshon Nuquin Papan chiaid chuibanquidën chuisho aton matsesën tantienquio iquec. Con nidaidën nidsho con matsesën abi chuiquid dapa icmetiapimbo icpebi —quianec aton nidaidën chopondash. ⁴⁵ Adsho isun: —Tantiesa nendac —Esusën caboedombi abi bëdiactsëc tantiatsëccondash. —¿Choecta icco? Nuquin Papan nuquin tsusedpabo unës uainquio icquin matamiampid inchësh tantianuec Edusaden yacno nidshun mimbi nadatiambo icquin nabansho isondambi —quepondash abi bëdiactsëc tantiatsëcquido Esus chiec.

⁴⁶ Adec aton nidaidën nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidën mado unës-tiadtsëcquio yampac caondash. ⁴⁷ Adashic: —Esus Udeya yacnuësh choac caoshe. Istanu —quianec chopac caondash unëstiadtsëcquio icquidën papa. Adec Esus yacno choshombien: —Con mado unëstiadtsëcquio iccoshe. Bëdamec cho —caqui ⁴⁸ nidenquio yec abi datsidadquido chiec: —Ëbimbo mimbi tantienquio iquec. Ëmbi bëdameteuidtsëqui mimbi tantiec.

Ëmbi comapenen tantiaquin nabansho isunuidtsëqui: “Nuquin Papan chomiaidien nechitec,” quequin mimbi tantiec —quepondash Esus.

⁴⁹Adec onqueshobien abi niacbidanquin padpiden: —Baded cho. Con mado unëstiadtsëcquio iccoshe —capondash. ⁵⁰Adoquien Esus: —Padi. Min mado unësenquo ye. Nidec nid —quesho tantiash: —Abimbo caic —quianec nidpondash. ⁵¹Adec nidquimbi abi chuinec cho-chosho aton yuabo bëquedac caondash. Aden bëquedacqui yuan: —Min mado bëdanosh —quesho tantiashun: ⁵²—¿Mitsimbo ushë icnuc con mado bëdanosh? —cac: —Ënden ushë yaquëduidtsëcnubi da una yantsëcnubi bëdanosh —quepac caondash aton yuabo. ⁵³Adsho tantiash: —Adënquioshendabi: “Min mado unësenquo ye. Nidec nid,” caposh Esusën —quepac caondash unëstsemboedën papa. Adshun: —Nuquin Papan chomiaidquio yec comapenen tantiaquin nabanquidquio Esus nec —quequin aton shubun icquidobëdtambi Esus tantiapac caondash. ⁵⁴Adec Udeya yacnuësh choash Cadidia yacnobidi ambi uba chinaid actequid uaquin ismequin tauaondacnobidi tabadquin bëdamequintsen Esusën ismepondash.

Esusën dada icsatsaid bëdamiaid

5 Yuecquio ictanec Esus: —Edusaden yacno cuëdënuec nuquin matses cho-choeque. Nuquitsen nidnu. Nid —quianec nidanepondash. ²Shubu dadpen icquid Edusaden caid dacuenadquin daquënë uaid puduedte shëcuë dadpen icnuc abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash. ³Acte nënantanquio icnuc dacuenadquiec shubumpi tabadquidën matses dadpen tabadpondash daicsaidouidquio. Bëshuaido yec capuenquo icquido yec canite tsasiaido yec quec tabadpondash. ⁴—“Nuquin Papan abi yacnoshon uaid mayan bëdan tëccuascaid acten abia mentoadquid bëdanquid,” quedeneque. Tëccuascaic ma chobono —quiash cainec tabadpondash.

⁵Adnubien Esusën ënden caniaidquio ambobi uesho istuidpondash. Ëndenquimboshë aton dada icsabudash seta dadpen 38tedquiobi matamec capuenquo yec icsabudtsaidquio nepondash. ⁶Adsho istuidshun: —Ëdenquo daicsabudaid nec —quequin tantiashun: —¿Bëdanteda bune? —catuidpondash Esusën. ⁷Adoquien: —Ai ¿mitsipadequini bëdampe? Ëbi bëdiactsëcquio nidnuc utsiba badedquio mentoadteniosh. Ëbi buanquin mentoquid nibëdec —quepondash daicsatsaid. ⁸Adshobien Esusën: —Min ushte nacentanquin buanec nid —cac ⁹badedquio aton dada bëdantanquin aton ushte buanec nidpondash. Aid ushë chonoadenquo icte ushë niondash.

¹⁰Aden buanshobien con matses chuiquidon: —¿Chonoadenquo icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimbi niacpayoc —quequin chushcapac caondash. ¹¹Adoquien: —Ëbi bëdameboedën: “Buanec nid,” cac mambi naiyoc —quepac caondash Esusën bëdameboed. ¹²Adsho tantiashun: —¿Tsuntsin naosh? —caquien: ¹³—Tsaudi. Ëmbi isacmaid ëmbi isquiambobi badedquio nidaccosh matses dadpen icnuc —quepac caondash bëdameboed.

¹⁴Adshumbic Nuquin Papa tabadte shubu uashunaid daquënë uacno puduedshun ambi bëdameboed daicsacboed Esusën istuidpondash. Istuidshumbien: —Tantia. Mibi chuinu. Ëmbi bëdameboedquio mibi neque. Mimbi icsamboen naid ënash bë-

dambo icta. “Nuquin Papan cuidquiac bēdanenquo yec daicsabudquiochitomane,” quiaash adta —capondash Esusēn.

¹⁵ Adoquien bēdameboed abi: “¿Tsuntsin naosh?” caboedo chiec nidpac caondash. Nidshumbic: —Ēbi bēdameboed Esus niosh —quequin chuituidpac caondash. ¹⁶ Aden chuisho tantiatanequien: —Chonoadenquo icte ushēnuidi bēdamepac caosh. Icsambo iquec —quequin con matses chuiquidon Esus chieshēmpac caondash. ¹⁷ Adnubien: —Mibi adosh —quesho tantiaashun abi chieshēnquido istuidshun Esusēn naden chuipondash. —Mimbi Nuquin Papa caid con Pa ēnenquo icquin matses nashunquido nec. Adecbidi ēnenquo icquin matses nashunquido nebi. Chonoadenquo icte ushēmbidi con Pabēdtan adoquid nebi —quepondash Esus. ¹⁸ Adsho tantiatanequien: —“Chonoadenquo icte ushēn naquid icsambo iquec,” nuqui caboedquo: “Nuquin Papambo con pa nec,” quiosh. Adquid icsamboshē iquec. “Nuquin Papapadquido nebi,” quechitequien nioshe. Cuesunequimbien ictiad —quepac caondash con matses chuiquido.

Nuquin Papan Mado nebi, quiaid

¹⁹ Adec abi chieshēnquido abi cuesunete bunshobien padpiden istuidshun chuipondash Esusēn. —¿Ēmbimbo naidtambi nadio? Padenquo. Con Pan nasho isun aidēn nacpadomboen mambi naboc. Adomboebidi Con Pan nacpadomboen naimbi. Ēmbentsēqui natiapimbo iquebi. ²⁰ Ēbi tantiaquin Con Pan ambi naidtedimbo ēbi tantiamec. Ambentsēqui nainquo iquec. Aidēn tantiamiacpadomboen bēdiactsēc naquin nēid capuenquo icquid bēdamiombi. Adembidi ambi tantiamiacpadomboen naquin dacuēdampamboecnuc naindambi ma isquionoeshun. ²¹ Con Papadquido yec unēsaid uincuemquido nebi. Matses ēmbi tantiaidotedi ēbēdi tabadmenuen uincuemendambi. ²² ¿Ēbi tantiesabo cuidnuen ambiuidtsēqui chuiquidta con Pa nedic? Padenquo. Ēmbien ambi chiapadomboen naden chien-dac. “Nēid nuqui tantiaquid neque. Nuquibēdi tabadmenuna. Nēid ēbi tantiesa icsambo icsho cuidnuna,” caindambi con Pa. ²³ Aidēmbi: “Ēbi tantiacpaden ma con Madotsen bēdamboen tantianu,” qeshun aden matses cuidte chuiquid icmion-dashi. Ēbi adquid icmiondaid icsho ēbi tantiatiapimbo icquidon ēbi chomiondaid Nuquin Papatsen tantienquo iquec. ²⁴ ¿Muectabi nedi? Abimbo chuinu. Tanta. Ēbi chomiondaid con Pabēdtan ēbi tantiaquid unēsacsho cuidenquo icquin ēbēdi tabadmendambi. Cuidtequid icboedi ēbi tantiaash ēbēdi tabadtequid yanendac —quepondash Esus.

²⁵ Adashic padpidec onquec: —Tantia. Mibi padpiden chuinu. Unēsaidēn tantienquo yacimboen ēbi tantienquo icboedombi ēbi tantiabensho bēdamboen tantiamequin bēdamboec tabadquid icmendambi. Adshun aido unēsacsho uincuemeshun ēbēdi tabadmendambi. ²⁶ Con Pan icmiacpadequi unēsaid uincuemquid nebi. Abibi unēstiapimbo icquid icquin unēsaid uincuemquido con Pa nec. Ambi icmiacpadquiequi abi yacpadquido iquebi. ²⁷ Adec unēstiapimbo iccondaidi matsesash icsaisambo icsho Con Pan matses icsaido cuidquid icmiondashi. ²⁸ Ēbi adsho tantiaashun: “¿Abimbobida capeba? Muequien nechitec,” ēbi cainda. ¿Muectabi nedi? Padenquo. Con Pan tantiacpadēnquo ēmbi cuēnac unēsaidotedi uincuenendac. ²⁹ Adec uincuenacsho ēbi tantiaquido ēbēdi tabadmequin ēbi tantiesabo icsaido cuidacno nidmendambi. ³⁰ Ēmbentsēqui nainquo iquembi. Con Pan chiapadomboen naquin matses cuidte chiendambi. Matsesēn naidtedi tantiaquid icquin ado-

dambi. Ęmbi naid nainquio icquin Con Pa będambo icmenuen aidęn chiacpadomboen naimbi —quepondash Esus abi chieshęnquido chiec.

Utsintsen ębi chiec, quequin Esusęn chiaid

³¹ Adshumbic Esusęn abi chieshęnquido chuiopondash. —Nuquin matsesęn naden chiec. “Abentsęcshun chiaid icsambo iquec. Daędshun chiaid abimbo iquec,” quequin chiec. Aden chiaid tantiec ębiuidtsęqui: “Nuquin Papan Mado nebi,” qesho tantiashun: “Abimbo mimbi caic,” mimbi ębi catiapimbo iquec. ³² Ębi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. ³³ Aden ębi chuiquid utsi acten mentoanquid Uan pado icpadenec. Aidęmbi ębi abimbo capadenec. “ęNuquin Papa yacnuęsh choquidta ne?” quequin mimbi chuitanac: “Padenquio. Esusuidi Nuquin Papa yacnuęsh choquid nec,” quepadenec Uan pado. ³⁴⁻³⁵ Aden chieshtoenquio icquin będamboen chuipadenec. Chuisho tantiat-sash mibi będambo icuidtsęccondac. “Ęmbi Uan padon naid chuisho tantiashun: ‘Abimbo mimbi caic,’ ębi capashun. Ębi adosho będamboen istsiambi,” quequin mimbi tantiondaid Uan caombi. Matses icquimbi Uanęn ębi będiactsęc tantiamequin chuipadenec. ęAdquid matsesęnuidtsęquidabi abimbo chuipec? ³⁶ Con Pambien: “Con Mado neque. Matses ismenu,” qeshun comapenen tantiaquidquio icmepondashi. Ambi adomiaid icquin comapenen tantiaquin nabanquin ęmbi ismesho isash: “Ai, adquid nec,” quetiadquidi mibi nec. ³⁷ Ębi chiecbiti onquequin Nuquin Papan nuquin tsusedpabo dada uamepampic. Adecbidi Nuquin Papa onqesho ęada mimbi tantiapadio? ęNuquin Papada istio? Padambo mimbi iquec. ³⁸ Adembidi ambi dada uamequin chiampidquio ma mimbi będamboen tantienquio yoc. Aid będamboen tantiashumbien Nuquin Papan chomiondaid ębitsen mimbi tantiatsiac. ³⁹ Mibi nadpec. “Nuquin Papan chiaid nuquin tsusedpabon dada uampid tantiaquidquio nebi. Aid isbanquid yec Nuquin Papabęd tabadtequid nebi,” mibi quepec. Ma ębimbo chuiquin Nuquin Papan dada uamepampid neyoc. ⁴⁰ Aden dada uamepampid isbanquidombi mimbi ębi tantienquio iquec. Ębi tantiashoembi mibi Nuquin Papa yacno ębęd tabadmetsiandac. ⁴¹ “Ębi adsho tantiashun ma matsesęn ębi: ‘Będambo mibi iquec,’ canu,” ęquectabi ique? Padenquio. Con Pan chiacpadomboen nanuembimbi aden chioc. ⁴² Ębi tantienquio icsho isun: “Nuquin Papa tantiesabo nec,” quequin mibi tantiembi. ⁴³ Ęmbien Nuquin Papan chiacpadomboen naic. Aden nasho mimbi ębi tantienquio iquec. Utsi: “Nuquin Papa yacnuęsh choquid nebi,” quec muaquidien mimbi badedi tantiatsiac. ⁴⁴ Mibibi tantiadec: “Mibi będambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi będambo iquec,” cametiapimbo iquec —quepondash Esus abi chieshęnquido chiec. ⁴⁵ Adashic padpidec: —ęĘmbentsęquidambi: “Ębi tantiesabo neque. Cuidnuna,” quequin mimbi naid Nuquin Papa chuipe? Padenquio. Mimbi tantiaidęnquio Moisesęntsęn: “Nęido icsambo iquec,” mibi caindac. ⁴⁶ Aidęn chiampid będamboen tantiaquimbien mimbi ębi tantiatsiac. Aidęn chiampidi mabi neyoc. ⁴⁷ Aden Moisesęn chiampid tantienquio icquin ęmbi chuiboedtsen mimbi tantiatiapimbo iquec —quequin Esusęn abi chieshęnquido chuipondash: —Moisesęn chiampid tantiaquidquio nebi —quequido chuiquin.

Esusën pete uatanquin 5000tedi pemiaid

(Mat 14.13-21; Mad 6.30-44; Duc 9.10-17)

6 Yuecquio ictaniash Edusaden yacnuësh nidec Cadidia yacnobidi Esus nidpon-dash. Ambo nidash chian dapa Cadidia caidbidi budash cano antabêdtoshon potiacpondash. Aid chiambidi matses utsibon Tibedias capondash. ²⁻³ Poteshun nandoash pudundoanec macuësh dapa dectatoash macuësh poctsebi tabadtuidpon-dash. Ambo tabadquin ëbi chedo chuipondash. Adnubien Esusën matses dadpen bē-damesho isboedo Esus isnuec cho-chopondash. ⁴ Nuquin Papan isadaidbo unēs uain-quo icquin matamiampid inchësh tantianuec pec tabadte ushë nēbi yanuc niondash.

⁵ Aido cho-chosho istanequien Esus: —Uedipe, piucquid buanshun ¿mitsimbo pete bedtane nēido pemenun? —quepondash Uedipe chiec. ⁶ —¿Atoda queque? Tantianu —quiash adpondash Esus. —Pete bedabi icnuc ëmbibi pete uanu —quequin otacquo tantiequi adondash. ⁷ Adoquien Uedipe: —Ma aittedquo peme-tiapimbo yoc. Inchëshën ushë 8tedquiobi nidmec chonoadshun bedaidtedimbo pi-ucquid menequin pete bedshun: “Pemenun,” cac aittedquo pemiadenquo ictsiash —quepondash Uedipe.

⁸ Adnubien Andedesën Petedon utsin: ⁹ —Ma nē madompin panëmpi 5tedtsēc ic-payoc, Icho. Nuēcquidëmpi daëdquiobi ictsec. Matses dadpenquo iquec. Aittedtsēc-quid pemetiapimbo iquec —caquien ¹⁰ Esusën: —Padi. Aidi bēdambo iquec. Abitedi: “Nēmbo tabad,” caban —cac: —Nēmbo tabad —cabanac sebad-sebadpambo ic-quidën uasinën matses dadpenquioshë tabadbudpondash. Dadaidtsëqui tambanac 5000ted icpondash. Chido bacuëbobêdta tambanambo icpondambi.

¹¹ Adshumbien Esusën madompin pete pamba bedtanquin Nuquin Papa chuipon-dash. —Pete uaquid yec mibi bēdamboshë iquec. Mimbi uaid nēid pete bēdambo iquec, Papa —quec onquetanquin: —Meneban —cac abēd icquidon tabadquido abitedi menebampondash. Adotanquimbic nuēcquidëmpitsen bedtanquin adembidi Nuquin Papa chuitanquin menebanoapondash. Adoac utsibon ambi piactembi pebe-dednubi utsibon ambi piactembidi pebededpondash. ¹² Aden ambi piactembi pebe-dedacshobien Esusën: —Napi uaid secainda. Sandoshon dayun ua —cac ¹³ tsitsan dapan napiuaid sandoshon dayun uapondambi tsitsan 12tedquiobi sandoaid icnuc.

¹⁴ Aden pemiaquien pemiaido: —Comapenen tantiaquin Esusën pete dadpen-quo icmiac. Moisesën chuipampidshenda nepec. “Nuquin Papan bēdamboshë ic-quid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquo yec. ¹⁵ Adsho ambembi tantiasien: —Abi chuiquid icmenuen ëbi “Bednu,” caique. Nēbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

Esus acte bëntse choaid

(Mat 14.22-27; Mad 6.45-52)

¹⁶ Esus cuembon inchëshbudtsëqui chian budondabi ëbitedi. ¹⁷ —Capednaun yacno nidnu —quec cano antabêdtoshon potenubi inchëshpondash Esus acte bëntse chopanushta. ¹⁸ Adnubien cunquequid dapa cunquetuidpondash. Acte comapenec tēcguasquenuc ¹⁹ uncadenquo yampondash. Ënapen nidabi nēbi 6 quidometedos cactiontsëqui nidshun isquien matsesbimboec acte bëntse chopec. Adsho istanec dacuëdquiondabi. ²⁰ Adshobini: —Ëbi neque. Dacuëndenda —capondash. ²¹ Adoac:

—Esus nec —quetanquin badedi antsadtomiondambi. Aid antsadtometanquin bad-edquio potepondambi. Nandoash ambobi ushondabi Capednaun yacno.

Pemiaidon Esus istuidoaid

²² Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëcquidëmbi abëd icquidon potepaboc. Ma aibëd nidenquio icpaboc. ¿Mitsimbo nidpash? —quepac caondash pemiaido. ²³ Adnubien shubu dadpen icquid Tibedias caid yacnocquidon cano dadpen bë-bëpac caondash. Pete pemebocno anoentsëqui nando-nandosho isash: ²⁴ —Potequimbien Esusën yashe. Nëid canobi antabëdtoshon potenuna —quetanec antabëdtoshon potiac-potiacpac caondash.

Potiac-potiacash Capednaun yacno pudundoshon ²⁵ Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquio yec: ²⁶ —Tantia. Mibitedi chuinu. ¿Ëbimbo tantianucta chodio? Padenquio. Ëmbi pete uasho isash: “Nuquin Papan namiaidën naoshe. Istanu,” ¿quecta ictio? Peteuidtsëqui tantiaquin ma mimi ëbi nibëneyoc. ²⁷ Peteuidtsëqui tantiaquin pete bednuen naquidquio ma mibi neyoc. Aidquio chodquetequid nendac. Chodquetiapimbo icquid tantiaquin bëdamboen nata. Aden nash ëmbi icmiacpadquiec Nuquin Papabëd tabadtequid mibi yanendac. Nuquin Papan: “Con Mado neque. Ismenu,” quequin namiacpadom-boen comapenen tantiaquid icquin mibi adquid icmetsiambi —quepondash Esus. ²⁸ Adsho tantiash: —“Nuquin Papan chiacpadomboen nata,” quepequien mibi iquec. Adomboen natiadquio icquin ¿atotsimbi nape? —caquien: ²⁹ —Nuquin Papan chiacpadomboen natiadquio icquin ambi chomiondaidquio tantiata —quepondash Esus ambi pemiaido chiech.

³⁰ Adoaquien: —¿Mimbi aden chuishouididambi: “Adquid nec,” quequin tanti-ape? ¿Atotsi utsi comapenen tantiaquin mimi ëbi ismepatsia? ³¹ “Ëndenquimboshë pete nibëdacnoshon Moisesën con tsusedpabo nibëdbëdi sequiaid pete pemianepampic,” quequin dada uapampid isombique. Adquid nacnenquin ëbi isme —quepondash pemiaido peteuidtsëqui tantiec. ³² Adoaquien Esus: —Nuquin tsusedpa Moisesën nainquien icpampic. Con Pambien aden pemepampic. Nëbi ambi chomiondaid petebimboecquid utsien Nuquin Papan mibi tantiametiadquio iquec. ³³ Aid petebimboecquidën matses bëdambo icmetsiash pete piacbimboecnuc —quepondash Esus abibi cadequi.

³⁴ Adsho tantiash petembo ca danec: —Ënenquio icquin adquid ëbi pemeta —quepondash pemiaido ambi peboeuidtsëqui tantiec. ³⁵ Adshobien Esusën: —“Ëbiuidtsëqui petebimboecquid icquin matses bëdambo icmequid nebi,” caimbi. Ëbi tantiaquid ënenquio icquin bëdambo icmendambi petebëdi acte bundoenquio yacbimboecnuc. ³⁶ Ëmbi chuibocpadomboen ma mimi ëbi tantienquio icboc. Ëmbi comapenen tantiaquin nabansho isumbi ma mimi ëbi tantienquio icboc. ³⁷ Ut-sibombien ëbi tantienac. Nuquin Papan tantiamiaidtedishun ëbi tantiasho bëdamboen isquin cacumenquio iquendambi. ³⁸ ¿Ëmbi tantiacpadomboen naquidtabi nedi? Padenquio. Nuquin Papan chiacpadomboen nanuec mabi abi yacnuësh chondac. ³⁹ Aden aidën chiacpadomboen nanuen ëbi tantiaquido unësacsho uincuemeshun cuidenquio icquin ëbëdi tabadmendambi. Unësaid abitedi uincuemete ushën adoendambi. ⁴⁰ Nuquin Papa bunacpaden ëbi tantiaquido uincuemeshun

Nuquin Papa yacno ëbi tabadacnombo tabadmendambi —quepondash Esus ambi pemeboedo chiec.

⁴¹ Adec: —Nuquin Papa yacnuësh chondaid yec petebimboecquid nebi —quesho tantiashien con matses chuiquido: ⁴²—¿Adquidida nepec? Ma icsamboen chui-payoc. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmédquid neyoc. Ma Osen mado neyoc. Anitsen tantiambi. Matsesën tishaid Nuquin Papa yacnuësh choquid ictiapimbo iquec —quecuededpondash.

⁴³ Adshobien Esusën: —Shoshquetsëcquin ëbi icsamboen chienda. Abimboembi caoc. ⁴⁴ Ëbi chomiondaidën Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatsiac. Aden Nuquin Papan ëbi tantiamiaido unësacsho unësaid uincuemete ushën uincuemendambi. ⁴⁵ Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bédamboen iste matses tantiamendac,” quequin chui-pampic. Aden Nuquin Papan tantiamiaido ëbi tantiaquido yantsiash. ⁴⁶ “Ambi tantiamiaidën matsesën Nuquin Papa ispash,” quenquio iquebi. Ëmbiuidtsëqui abéd icquin Nuquin Papa isondambi. Aden abéd icquin abi isondaidi matsesondabi —quepondash Esus: —Matsesi nec —abi caquido chiec.

⁴⁷ Adashic padpidec: —Abimbo caombi. Ëbi tantiaquido Nuquin Papa yacnombo ëbëdi tabadmendambi. ⁴⁸ Petebimboecquid icquin aden tabadmendambi. Adecbidi bédamboec tabadmianquid nebi. ⁴⁹ Nuquin tsusedpabon pete utsi nibëdacnoshon mana caid pepampic. Aid pequidi tsusiobudash unëspampic unëstiapimbo icquid yanabi. ⁵⁰ Petebimboecquid utsien Nuquin Papa yacnuësh chondaid nëmbobi iquec. Aid piash ëmbi chiacpadquiec padpidec unësenquio yec Nuquin Papabéd tabadtequid yanendac. ⁵¹ Adquidquio nebi. Con nami piash matses unëstiapimbo icquid yanendac. Adquidquio matses icmenuec ëbided cuidadquin con nami menendambi —quepondash Esus ompoacbimboen chiec. —Ëbi tantiaquido nëbi bédamboen tabadmeshun unësacsho Nuquin Papa yacno ëbëdi tabadmendambi padpidec unëstiapimbo icnuc —quequin tantiec: —Petebimboecquid icsho ëbi piash matses unëstiapimbo icquid yanendac —quepondash Esus. —Ëbi tantiaquido cuidmenquio icnuec ëbided cuidadec unësendabi —quequin tantiec: —Con nami menendambi —quepondash Esus.

⁵² Adec: —Con nami piash matses unëstiapimbo icquid yanendac —quesho tantiashien namimbo ca danec con matses chuiquido onquecuededpondash. Utsi-utsiec: —¿Mitsipaden Esusën aton nami nuqui pemepatsiash? Aidquio tantiatiapimbo iquebi —quecuedednubi utsi-utsiec: —¿Atotsi chuitiadquio yec niosh? Chuisho tantianu —quecuededpondash. ⁵³⁻⁵⁴ Adsho tantiashun Esusën ambi chiacpadomboembidi chuiopondash. —Tantia. Mibi chuinu. Matses tantiaquidquio nebi. Aden tantiaquiec ëbided cuidadec unësendabi. Ëbi adec unëso isun con nami pequinc con intac acquinc cash nidaidënuësh bédamboec tabadquid yanash Nuquin Papabéd tabadtequid mibi yanendac. Adquid icsho unësaido uincuemete ushënquio uincuemendambi ëbëdi tabadmenuen. Ëmbi chiacpadomboen nainquio yash Nuquin Papabéd tabadtiapimbo mibi iquendac. ⁵⁵ Ai, con nami petebimboecquid nec. Con intac actebimboecquid nec. ¿Petebëdi acte naimëdanda mibi bédambo icpatsia? Adecbidi con intac chididiquec con nami icsabudec ëbided cuidadec unësaid tantienquio yec mibi bédamboec tabadtiapimbo iquendac. ⁵⁶ Aden ëmbi namibëdta intac chuisho bédamboen tantiashun ëmbi chiacpadomboen matsesën natiadquio yanendac. Ad-

sho isun aibdëd tëshnanenquio icquin bëdamboec tabadquid icmendambi. ⁵⁷ Nuquin Papa unëstiapimbo icquid yec matses uincuemequidquio nec. Aidën chomiac ambi namiacpadomboenuidi naquin ëbi tantiec tabadquid unësacsho uincuemequin unëstiapimbo icquid icmendambi. ⁵⁸ Aden ëmbi naid tantiamenuec: “Nuquin Papa yacnuësh chondaid petebimboecquid utsi iquec,” quiobi. Ëbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon pepampidpadquidpenquio nebi. Adquid pequidi tsusiobudash unëspampic. Ëbi tantiaquidien padpidec unëstiapimbo icquid yanendac ⁵⁹ —quepondash Esus Nuquin Papan chiaid chuibante shubunuësh Capednaun yacnuësh.

Abi tantiauidquidon Esus nianondaid

⁶⁰ Adec: —Con nami pequinc con intac acquinc cash mibi bëdambo ictsiac — Esus qesho tantiashien abëd icquido utsi-utsiec: —Aidën chiacpadomboen natiapimbo iquebi. Icsamboen chiec —quepondash Esus tantiamenquio yec. ⁶¹ Adec onqesho ambembi tantiash Esus onqueoapondash. —¿Ëmbi chuiboed tantiash chieshtotiadquioda ique? ⁶² Nuquin Papan matsesmiaid yequi unësash ëbi iccondacno ëbi nidacsho isash ¿atoda mibi quendac? Abimbo caombi. Nuquin Papa yacnuësh chondaidini nec. ⁶³ Namimbo intacquiobëdta ca danequien mibi nec. ¿Namimbo pequinc intacquio acquinc cashta mibi bëdambo icpatsia? Padenquio. Nuquin Papan Mayanën ëmbi chuiboedbëdta ëbi tantiamequin matses bëdamboec tabadquid icmetsiash. Adoaid unësash Nuquin Papa yacno ëbëdi tabadtsiash —quepondash Esus cuembo chiec. ⁶⁴ Adashic padpidec: —Ëmbi aden bëdamboen chiaqui utsinutsinquien mimbi ëbi tantienquio yanendac —quepondash abi tantiauidquido chiec. Aido tauamboec abëdi nidnuc: —Nëidën ëbi tantienquio yanendac. Nëid utsin ëbi chieshënkuido ëbi bedmendac —quequin ambembi Esusën tantiapanëdash.

⁶⁵ Adashic padpidec: —Ëbi tantiauidquido tantiaquin naden chiombi. “Nuquin Papan tantiamiabi yaidën ëbi tantiatiapimbo iquendac. Nuquin Papan tantiamiaidënkuien ëbi tantiatsiash,” quequin chiombi —quepondash Esus. ⁶⁶ Adsho tantiashun dadpeshun Esus nianondash. ⁶⁷ Aden nianaquien Esusën abëd icquido 12ted icquid chuipondash. —¿Mimbisendabi niampe? —caquien ⁶⁸ Petedo: —Padenquio. ¿Tsudabëd icnuendambi mibi nianuc? Mibipadquid utsi nibëdec. Mimbuidtsëquien: “Ëbi tantiaquid bëdamboen isquin unësacsho uincuemeshun ëbëdi tabadmendambi,” quequin chuipoc. ⁶⁹ “Abimboen caosh,” quequin mibi tantiambi. “Nuquin Papa yacnuësh chonëdaid yec bëdamboshë icquidquien nec,” caombi mibi. Mibi niantiapimbo iquebi —quepondash Petedo Esus caic. ⁷⁰ Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” camampondambi. Ëmbi adondaid abentsëc Satanasën namiaidquio yec icsamboshë iquendac —quepondash Esus. ⁷¹ —Simon Iscadioten mado Udasën ëbi chieshënkuido ëbi bedmendac —quequin ambembi tantiash adondash Esus.

Aton utsibon Esus tantienquio yaid

7 Abi tantiauidquidon nianac Cadidia yacnoudi yuec Esus capucuenepondash. —Nidaid Udeya caid yacnocquido con matses chuiquidon ëbi cuesunetiadquio iquec —quiash Udeya yacno nidenquio icpondash. ² Adnubien con matses abitedi: —Edusaden yacnuësh cuëdëntanu —quiampondash. Adanec nidaid utsi Udeya caidën nidec 7tedec ushec cuëdënuec matses dadpen nidacno Edusaden yacno nidanepon-

dash. Cuëdënuec Esus nidenquo icpondash. ³ Adec nidenquo icsho isumbien aton utsibon: —Edusaden yacno nidec nid. Mibëd ictiadquo icquid ano icnushe. Comapenen tantiaquin nabanquin aido ismec nid. ⁴ ¿“Ma matses dadpeshun ëbi tantianu,” quequina matses daëdpectsëc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. ⁵ —Nuquin Papan chomenëdaidquo nec —quequin tantienquo icquimbi adopondash aton utsibon.

⁶ Adoquien Esus: —Matses dadpen nidnuc nidtiadquo yec mibia nidta. Abitedishun isnuc nëbi nidtiapimbo iquebique. ⁷ Mibien anocquidon chieshëntiapimbo ye. Mibia nidta. “Nuquin Papan chiaid niac-niaquec mibi icsaic,” ëmbi cac chieshëndashibique. ⁸ “Cuesunenushe,” quiaash nëbi nidtiapimbo iquebique. Mibia nidta. Nuquin Papan tantiacpadec nidendabi ⁹ —quiaash anobi Cadidia yacno Esus tabadpondash.

Esustsen Edusaden yacnuësh cuëdënuec nidaid

¹⁰ Aden aton utsibo nidanemiashe yuec-yuecpectsëc ictanec abitsen Esus nidpondash Edusaden yacnuësh cuëdënecc nidec. Abitedi ismenquo yec tsyuec Esus nidpondash. ¹¹ Adnubien con matses cuëdëncuededacnoshon abi chieshënkuidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash. ¹²⁻¹³ Adsho tantiashe con matses Esus chieshënkuido dacuëdënecc utsibo tantiamenquo yec sho-shoshquetsëcquiecc onquepac caondash. Utsi-utsiecc: —Esus bëdamboshë icquid nec —quenubien utsi-utsiecc: —Ma icsambo icquid neyoc. “Nuquin Papa yacnuësh chondaidini nec,” quecc ma muequi neyoc —quecc onquecuedepac caondash.

¹⁴ Adnubien con matses cuëdënecc taëbon abentsëcc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. ¹⁵ Adsho tantiashe: —¿Mitsipaden tantiashe chuipecc naic? Nuquibëdtan Nuquin Papan chiaid isbanambo aidën iquecc —quepondash con matses chuiquido. ¹⁶ Adsho tantiashe Esus: —Ëmbembi chienquo icquin ëbi chomiondaidën chiaidquo chiecc nebi. ¹⁷ Nuquin Papan chiacpadomboen natiadquo icquidën bëdamboen tantiashe. Ëmbi Nuquin Papan chiaid chuisho tantiashe: “Nuquin Papan chiaidquo chiecc nec,” quequin tantiashe. Ëmbembi chuisho tantiashe: “Ambembi chiaid nec. Nuquin Papan chiaidpenquien nec,” quequin tantiashe Nuquin Papa tantiaquidën. ¹⁸ Ambembi chuiquidën: “Mabi matsesën bëdambo canu,” quequinuidtsëqui chuibantsiashe. Adquidpenquien nec. Ëmbien: “Ëbi chomiondaidquo ma matsesën tantianu,” quequin ambi chiaidquo chiecc. ¹⁹ Mimbien adoenuquo iquecc. Mimbic tantiaid nuquin tsusedpa Moisesën: “Cuesunenda,” quequin Nuquin Papan chiaidquo dada uapampic. Ëbi: “Cuesunenu,” caquin aidën chiaid ma mimbic niac-niaqueyoc —quepondash Esus abi chieshënkuido chiecc.

²⁰ —Mimbic ëbi: “Cuesunenu,” caoc —Esus quesheo tantiasheumbien ano tabadquidon: —Podobitsic icsa dapuduedash mibic tantiaidenuquo yec onquepec. ¿Tsuntsin mibic cuesunepatsiashe? —capondash. ²¹ Adoquien Esus: —Nëidën ëbi cuesunetsiashe —quequin chienquo yec: —Chonoadenuquo icte ushën comapenen tantiaquin dada bëdamepondambi. Aden bëdamiashe isash: “Adopenshenda naic. Chonoadenuquo icte ushën daicsatsaid bëdamequin Nuquin Papan chiaid

niac-niacposh,” ma mibi quepondac. ²² ¿Ëmbentsëquidambi chonoadenquio icte ushën nadi? Ma min matsesën adoapaboc. Mimi tantiad Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquio ictaneshun adembidi Moisesëntsen adopampic. Nëbi adembidi naic chonoadenquio icte ushëmbi chonoadquimbi ma mimi shui dëbid dëteshoneyoc. ²³ Aden Moisesën chiampid niaquenquio icquin shui nacnenquin mimi bëdamboen naic. Ëmbitsen daicsatsaid dada abichobi bëdamequin mambi bëdamboen naondac. ¿Atotsi quequin ëbi chushcai? ²⁴ Chonoadenquio icte ushën dada bëdamequid icsho: “Icsambo mibi iquec,” mimi ëbi capec. Aden ëbi bëdamboen tantienquio icquin mimi icsamboen chiec. Ëbi bëdamboen tantiaquioshon ëmbi naboed bëdamboen chui —quepondash Esus abi chieshënquido chiec.

Esus bedshun cuesunetiad, cauidaid

²⁵ Adec Esus: —Chonoadenquio icte ushën naondambi —quesho tantiashien anocquido Edusaden yacnoquido nader onquecuededpac caondash. —Nuqui chuiquidon: “Cuesunetiad,” caboedien nëid nechitec. ²⁶ En is. Abi chieshënquidobëdi tabadquin chieque. Chuisho ma chuiquidon chushcainquio icboc. “Nuquin Papa yacnuësh choquid Quidistu caid Esus nec,” quequin tantiashumbien nachitec —quetanequien ²⁷ aidobidi: —Nuquin Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiadenquio ictsiash —quepondash ano tabadquido.

²⁸ Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Ëmbi isondaic nec. Aton nidaic Cadidia caid yacnuësh caniquid nec,” ¿quequindabi bëdamboen tantiapadi? Ma mimi padenquio yoc. Ëbemi chondaidpenquio nebi. Ëbi chomiondaic abi iquec. Ma mimi aidquiobi tantienquio yoc. ²⁹ Ëmbien aidquio tantiendac. Aidbëd tabadondaicquio nebi. Adsho aidën: “Nid,” cac chondaic nebi —caquien ³⁰ —“Con pa Nuquin Papambo nec,” quechitequien nec —qeshun abi chieshënquidon: —Cuesunemenuembien bedtiad —quetanquin: —Bednu —caqui bedadenquio icpondash. —Nëbi ma Esus unës uainquio icnu —Nuquin Papa quenuc bedmenquio icquin Esusën mëtampanëdash. ³¹ Esus cuesunetiadquio icnubien utsibon dadpeshun Esus tantiabempondash. —Nëidpadquid utsi nibëdtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bëdamebamposh. Nuquin Papa yacnuësh choaid Quidistu caid Esus nec —quequin dadpeshun Esus tantiabempondash.

Ëbi istuidenquio iquendac, quequin chiaid

³² Aden Esus chiec sho-shoshquetsëcquiec onqueshobien Esus chieshënquidon padiseyo caidon tantiapac caondash. Adshun abëdtan chuiquid utsibo chuiyac caondash. —Ëmbi chuibocpaden Esusien bedtiad. Icsamboec onquioshe —cac: —Ai, adembien ictiad —quepac caondash. Adshumbic abëd icquido sondado chuiquin: —Baded bedtan —capac caondash. ³³ Adoac nidanequin tantiatuidaquien nader Esus onquepondash. —Yuec-yuecpactsec mibëd icashic ëbi chomiondaicbëdtsen

tabadoaic nidendabi. ³⁴ Ëbi nibënquin ëbi istuidenquio mimbi iquendac. Ëbi nidacno mibi nidtiapimbo iquec —quepondash Esus.

³⁵ Adsho tantiash abi chieshënquido: —Nuqui istuidmenquio icnuec ¿mitsimbo nidpanuec nec? Matses utsi yacno tabadnuec con matses utsi-utsiec nidequi nidandiondacno nidshun ¿anocquidoda chuiatsiash? ³⁶ Tantiadenquio yec onquepec. ¿Atotsi quepec? “Ëbi nibënquin mimbi ëbi istuidenquio iquendac. Ëbi nidacno mibi nidtiapimbo iquec,” quepequien iccosh. ¿Atotsi quepash niosh? —quepac caondash Esus chieshënquido.

Aton Mayan abi tantiaquidbëd tabadmete chiaid

³⁷ Adnubien cuëdëneç ënëdte ushënquobi con matses abitedimbo cuëdëneç chochopondash. Cho-choash tabadbudnubien nidtoash comapenec onquequin Esusën chuipondash. —Acte natia bunacbimboec Nuquin Papa tantiante bunquin ëbi bëdamboen tantiata. ³⁸ Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobëd tabadmendambi. Adoac mibëd tabadquin mibi bëdamboen tabadmequin utsibotsen Nuquin Papa tantiante bumetsiash —quepondash Esus. ³⁹ —Nuquin Papabëdta ëbi tantiamequidquio Nuquin Papan Mayan nec —quequin tantiec adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuenondash.

¿Nuquin Papan chomiaidta nepeba? Esus caid

⁴⁰ —Nuquin Papa tantiante bunquin ëbi tantiata —Esus quesho tantiashien Esus chieç ano tabadquido onquecuedepac caondash. Utsi-utsiec: —“Nuquin Papan chiaid chuiquidquio choendac,” quequin nuquin tsusedpa Moisesën chiampidien Esus nechitec —quenubien ⁴¹ utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? ⁴² Padenquio. Nuquin Papan chiaidquio naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuiampic. Ma Esus muequi neyoc. Beden yacnoshon tishaidpenquio nec —quepac caondash. ⁴³ Adec dadpen: —Bëdambo icquid nec —quenubi aitedbidi: —Icsambo iquec —quepac caondash. ⁴⁴ Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

Isadaidbo chuiquid dapabon Esus chieshënaid

⁴⁵ Adnubien: —Esus bedtan —caboedo sondado bedabi Esus chieshënquido chieç chopac caondash. Chosho: —¿Atotsi quiash bedabi cho? —caquien: ⁴⁶ —Ma bëdamboenshë chuiboc. “Adomboen chuibanquid utsi nibëdec,” queshun bedtiapimbo iccobi —quesho ⁴⁷ tantiashien: —Aid muasho tantiashun: “Abimbo caic,” ¿cainda icco? ⁴⁸ ¿Adambi Esus muasho tantiadio? ¿Ada tsusiobon tantiadiosh? Padenquio iccosh. ⁴⁹ Utsibombien tantiash. Adquidon ëmbi bëdamboen tantiacpadomboen Nuquin Papan chiampid tantienquio iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquido padiseyobo Esus chieshëneç.

⁵⁰ Adnubien inchëshën puduedash Esusbëd onquiondaid Nicodemo caid abitsen chuiquid yec nadpac caondash. ⁵¹—¿Abibi chuimiabida cuidpec? Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bëdambo ictsiash. Chuimiabi cuidac icsambo ictsiash —quepac caondash Nicodemo abëdtan chuiquid ut-sibo chiec. ⁵² Adoquien chuiquido: —Esus yacpadec Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquio iquendac,” quequin mimbi tantiatsiac. Ma Esus muequi neyoc —quepac caondash chuiquido Nicodemo chushcaic. ⁵³—¿Chuimiabida cuidpec? —quetsëcsho aden Nicodemo chushcanec abitedi nidaniac caondash aton shubuno ushec nidec.

Bënëpenquo chudmequid cuënoten seshunetsenaïd

8 Nicodemo chushcabon Esus macuësh dapa Odibos caid yacno ushec nidondash. ² Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen cho-choec abi datsidadsho Esusën chuipondash.

³ Aden chuinubien con matses tsusiobon aton bënëpenquo chudmesho istuidshun chido bëpondash. Moisesën dada uampid chuibanquidobëdtan tsusedpabon chiampid namequido padiseyobon Esus yacno bëshun chido nënantanquo nitsimpondash. ⁴ Adshumbien Esus chuipondash. —Aton bënëpenquo chudmesho istuidshun nëïd bëombi. ⁵ Nuquin Papan chiaïd Moisesën naden dada uapampic. “Aton bënëpenquo chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido. ⁶—¿Atotsi Esus quepatsiash? Nuquin Papan chiampidquo chienquo icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquo icquin shuebudshun mëdanten nidaïd dada uapondash. ⁷ Adshobien padpiden: —¿Adembidida tantie? —cado-cadoac nidtotanec: —Nuquin Papan chiaïd niaquesambo icquin en mimbïa cuënoten se —quetanec ⁸ padpidec shuebudshun mëdanten nidaïd dada uaoapondash.

⁹ Adnubien: —Nuquin Papan chiaïd niaquesambo icquin en mimbïa cuënoten se —cac: —Nuquin Papan chiaïd niaquesamboen nibëdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouïdtsëqui Esusbëd icnuc. ¹⁰ Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac: ¹¹—Ai, nibëdosh —quesho tantiashien: —Ëmbimbo mibi cuënoten senquo iquembique. Mibi icsaïd ënash bëdamboec tabadec nid, champi —capondash Esusën. Adoac chido nidondash.

Pabiate cuembo icnuc tantiamequid

¹² Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënuquido tantiamequin padpiden chuiapondash. —Pabiate cuembo icnuc con Pan bëdamboen iste matses tantiamequidquo nebi. Ëmbi tantiamiac ëbi tantiaquido icsateuïdi bunenquo yanec bëdamboec tabadte buncuenendac. Adec ëbëd tabadtequid yanendac —quepondash Esus.

¹³ Adsho tantiash abi chieshënquido: —Mibentsëqui: “Adquid nebi,” qesho tantiatiapimbo iquebi. Muequien mibi nechitec. Matses daëdshun chiac bëdambo ictsiash —quepondash. ¹⁴ Adsho tantiash Esus: —Ëbibi abimbo cadebi. “Con Pa yacnuësh chondash anobidi nidendabi,” quec muainquio iquebi. “Aton papa yacnuësh choash anobidi Esus nidoaindac,” quequin ma mimbi ëbi tantienquo icboc. ¹⁵ Cadidia yacnuësh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nëid icsambo iqueque. Cuidnuna. Nëid bëdambo iqueque. Cuidenquo icnuna,” quequin nëbi chienquo iquembi. ¹⁶ Aden chuiquin abimbo chuitsiambi. Ëmbentsëqui chienquo icquin ëbi chomiondaid Nuquin Papabëdtambi chuiquin abimboshë chuitsiambi. ¹⁷ Nuquin Papan chiaidquo Moisesën naden dada uapampic. “‘Icsaosh,’ quequin daëdshun chuisho tantiash: ‘Abimbo chiec,’ quequid yendac. Adecbidi: ‘Bëdambo iquec,’ quequin daëdshumbidi chuisho tantiash: ‘Abimbo chiec,’ quequid yendac. Abentsëcshun chuishoen mua caquid yendac,” quequin Nuquin Papan chiaidquo Moisesën dada uapampic. ¹⁸ Aden Moisesën dada uampid tantiashun ëmbentsëqui chienquo iquembi. Ëbi chomiondaid con Pabëdtantsëqui chiembi —quepondash Esus.

¹⁹ Adsho tantiashun abi chieshënquidon: —¿Mitsimbo papa icpec? —capondash. Adoquien: —Con Pa ëbëdta ma mimbi tantienquo icboc. Ëbi tantiaquimbien mimbi con Patsen tantiatsiac —quepondash Esus abi chieshënquido chiec. ²⁰ Abi chieshënquido onquecuededec quënën tabadnubi aid quënë cachoctsëqui Nuquin Papa tantiaquin piucquid menequin nauedte tabëcacnoshon Esusën chuipondash. Adec Esus anoentsëqui tabadsho abi chieshënquidon bedabi icpondash. Nuquin Papa: —Ma ëmbi tantiacpadënquo matsesën unës uanu —quenuc Esus bedabi icpondash.

Utsibon Esus tantiauidaid

²¹ Adnubien Esusën abi chieshënquido padpiden chuiopondash. —Nidendabi. Ëbi nidan ëbi nibënquin mimbi ëbi istuidenquo iquendac. Ambi chiaid niacniacquido icsho Nuquin Papan bëdamboen isambobi mibi unësendac. Adash ëbi nidacno mibi nidtiapimbo iquendac —quequin chuipondash Esusën. ²² Adsho tantiash Esus chieshënquido: —¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta: “Ëbi nidacno mibi nidtiapimbo iquec,” quepec? —quepondash abi chieshënquido. ²³ Adsho tantiash Esus: —Mibi matses nec. Ëbien con Pa yacnuësh chondaidquo nec. ²⁴ “Adquid icsho ëbi tantienquo icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bëdamboen isabi mibi unësendac,” mibi caombi —quepondash Esus.

²⁵ Adsho tantiash abi chieshënquido: —¿Mitsipadquid icquin ëbi aden chie? —quepondash Esus caic. Adoquien: —Ëmbi chianeboedquiobi mabi neyoc —queopondash Esus. ²⁶ Adashic padpidec: —Mimbi naid dadpen chuiquin mibi cuidte chiendambi. Ëmbembi chienquo icquin ëbi chomiondaid muesanquo chiaidquo chiendambi. Aidën chiaiduidi matses abitedi chiendambi —quenubien ²⁷ Esus chieshënquidon: —Abi chomiondaid Nuquin Papambo nec —quequin tantienquo icpondash. ²⁸ Aden tantienquo icsho isun Esusën padpiden chuiopondash. —Matsesmiaidquo icshobi ëbi cuesten dectanshumbic mimbi ëbi tantiabenedac. “Ambi chiacpadquidshenda nepadenec. Ambembi chiaid chienquo icquin

aton Papan chiaidquio chuiquin aidën chiacpadomboenshenda napadenec,” quequin ëbimbo mimbi tantiendac —quepondash Esus. ²⁹ Adashic padpidec: —Nëbi ëbi chomiondaid ëbëd iquec. Aid bëdambo icmenuen ambi chiacpadomboen nasho isun ëbi nianenquio iquec —quepondash Esus.

³⁰ Adsho tantiashun: —Abimboen Esusën caic. Nuquin Papa yacnuësh choquidien nec —qeshun Esus tantiauidtsëcondash dadpeshun.

Satanasën yuabo nec, quequin Esusën chiaid

³¹ Adsho isumbien Esusën abi bëdiactsëc tantiauidtsëcboedo chuipondash. —Ëbi tantiaquidën ëmbi chiacpadomboen natiadquio iquendac. ³² Nuquin Papabëdta ëbi aden tantiasho icsamianquidën yua icboedi aidën yuapenquio mibi icmetsiambi —quepondash Esus abi tantiauidtsëcboedo chiec. ³³ Adec Esus: —Yua —qesho tantiashien: —Abadauan yampidën tsyuecquido yec utsin yuacmaido nebi. Tantienuio icquin mimbi icsamboen chiec. ¿Atotsieshun: “Mibi yuapenquio icmetsiambi,” quequin ëbi chio? —capondash abi tantiauidtsëcboedon Esus chuiquin.

³⁴ Adoquien: —Tantia. Mibi abimbo chuinu. Uidën uacbimboen icsambo icquidën ambembi abi icsaid ëntiapimbo iquec. Abembi bëdambo ictiapimbo iquec. ³⁵ ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. ³⁶ Aden con Pan aton Madombo icsho ëbi bëdamboen isquin ëbi tantiaquidotsen bëdamboen isendac. Aden ëbi tantiaquido bëdamboen isquin bëdamboec tabadte bumequin abi yacno ëbëd tabadtequido icmendac —quepondash Esus.

Satanasën madobimboecquido chiaid

³⁷ Adshumbic Esusën abi chieshënquido chuiopondash. —“Con tsusedpa Abadauan icpampic,” quequin mimbi abimbo chioc. Adboedëmbi ëbi cuesunetiadquio mibi iquec. Ëmbi abimbo chuisho tantiante bunenquio icquin ëbi cuesunetiadquio mibi icpec. ³⁸ “Con Pabëd tabadquin isondambi,” quequin ëmbi bëdamboen chuisho tantienuio icquin min papabimboecquidën chiacpadomboen mimbi naindac —quepondash Esus abi chieshënquido chiec. ³⁹ —Min papabimboecquidën chiacpadomboen mimbi naindac —qeshobien: —Con tsusedpa Abadauanën nacpadomboen mambi napaboc —capondash Esus chieshënquidon. Adoquien Esus: —Ma mimbi adoenuio yoc. Abadauanën nacpadomboen naquin mimbi bëdamboen natsiac. ⁴⁰ Bëdamboen natiapimbo icquin mimbi ëbi cuesunetiadquio iquec. Nuquin Papan chiaidquio abimbo chuisho mimbi adotiadquio iquec. Nuquin Papan chiaid tantiec ma Abadauan cuesuniantiapimbo icpampiyoc. ⁴¹ Min papabimboecquidën namiacpadomboen naquidien mibi nec —capondash Esusën abi chieshënquido chuiquin. Adoquien: —Mambi Nuquin Papauidtsëqui tantieyoc. Utsi tantiatiapimbo icquin Nuquin Papauidtsëqui con pa caimbi —quepondash Esus chieshënquido.

⁴² Adsho tantiashien Esus: —Nuquin Papambo tantiaquimbien mimbi ëbitsen tantiatsiac. Ëbembi choenuio iccondabi. Nuquin Papan: “Matsesbëd tabadec nid,” caquini chondac. Adoaid icsho Nuquin Papa tantiaquidën ëbitsen tantiatsiash. ⁴³ ¿Mitsipadquid yec ëmbi chiaid tantiash: “Tantiadenquien icpec,” quepe mibi? Ëmbi abimbo chuisho tantiante bunenquio yec pamumëdacbimboec mibi iquec. ⁴⁴ Min papabimboecquid Satanas nec. Aid bunacpadenuidi mimbi natiadquio iquec.

Ëndenquimboshë Nuquin Papan tauamboen matses uanubi min papabimboecquid cuesunianquidquio nepampic. Aton padibi nec. Nuquin Papan chiacpadomboen namenquio yec chieshë nec muaquidquio nec. Aton padibi icquid yec matses muamequidquio nec. Aidën madobimboecquin mimbi ëbi tantiatipimbo icpec. ⁴⁵ Ëmbi Nuquin Papan chiaidquio abimbo chuisho mimbi tantiatipimbo iquec. Icsambo icquidën ambembi chuisho mimbi tantienquio yaquien bëdambo ictsiash. Mabi icsambo icquidpenquio neyoc. ⁴⁶ ¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquio mimbi icpe? ⁴⁷ Nuquin Papa tantianuequidën Nuquin Papan chiaidquio chuisho tantiatish. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatipimbo iquec —quepondash Esus abi chieshëquido chushcaic.

Esus chieshëquido cuënoten siantiadpambo yanaid

⁴⁸ —Nuquin Papa tantiesabombo ma mibi neyoc —Esus qesho tantiasien abi chieshëquido: —Ma mibi podobitsi icsa dapuduedash neyoc. Tantiadenquio yec mibi onquec. Samadia yacnocquidobimboec icsamboshë ma mibi iqueyoc —caquien ⁴⁹ Esus: —Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquio abimbo mimbi chiec,” catiadquidi mimbi ëbi: “Muec nec,” capec. ⁵⁰ “Mabi: ‘Bëdambo iquec,’ canu,” quenquio iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac. ⁵¹ Tantiata. Mibi bëdamboen chuinu. Ëmbi chiacpadomboen naquidquio unësenquio ictsiash —quepondash Esus ompoacbimboen chiec. —Ëbi tantiaquido unësacsho uin-cuemeshun Nuquin Papa yacno ëbëdi tabadmendambi padpidec unëstiapimbo icnuc —quequin tantiec adondash.

⁵² —Unësenquio ictsiash —qesho tantiasien Esus chieshëquido: —Ma mimbi tantiadenquio icnuc chuipayoc. Adsho: “Mayan icsa dapuduedashien nec,” mibi caombi. “Ëmbi chiacpadomboen naquidquio unësenquio ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bëdamboen isaidombo abitedi unëspampic. ⁵³ ¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

⁵⁴ Adoquien Esus: —Ëmbembi: “Mabi: ‘Bëdambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bëdambo iquec,” quequin ëbi comapenen tantiaquin namec. ⁵⁵ “Tantiembi,” mimbi caboed Nuquin Papa ma mimbi tantienquio yoc. Ëmbien Nuquin Papa tantiaquiec. “Aid tantienquio iquembi,” quec mibi yacpadec muatsiabi. Mambi con Pa tantiaquin ambi chiacpadomboen nayoc. ⁵⁶ Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuësh choash bëdambo icmi-anquidquio matsesbëdi tabadendac,” quequin tantiec cuishonquepadenec. Nuquin Papan tantiamiac ëbi aden tantiapadenec —quepondash Esus. ⁵⁷ Adsho tantiashun Esus chieshëquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanën mibi tantiatipimbo icpampic —caquien ⁵⁸ Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquio nebi —quepondash Esus. ⁵⁹ Adsho

tantiash nëishtanequin: —¿Icsamboenda chuipec? ¿Nuquin Papada muauapebac? —quetanquin cuënote dapa bedtanequin: —Seshunenu —cac siadenquo yec ompo-danec cuempondash Esus.

Esusën bëshuaid bëdamiaid

9 Yuecquo ictaniash chonoadenquo icte ushën capucuenequin Esusën dada bëshuaid istuidpondash. Anin bëshuacshobi tishnëdaid niondash. ²⁻³ Aid istuidshumbimbi: —En chui, Icbo. Tantanu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaidta nepec? —caquien: —Padenquo. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? —caondambi. Adoaquien: —Padenquo. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec. ⁴ Nëbi ambi chiacpadomboen nanuna. “Nainabi inchëshmane,” quiash comapenec chonoadnuna. Inchëshën matses chonoadesa —quepondash Esus. —“Con Pan tantiaidtedi nainabi unëshmane,” qeshun unëshabi icquin con Pan chiaidtedi naindambi —quequin tantiec: —“Nainabi inchëshmane,” quiash comapenec chonoadnuna —quiondash Esus. ⁵ Adashic: —Matsesbëd icquin Nuquin Papa bëdamboen tantiamequidquo nebique. Nëidtsen tantiamenu ⁶ —quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

⁷ Adotanquimbic: —Acte tiquidimbo icquid Sidoe caidën bëpamëdec nid —cac nidash bëpamëdtanec bëdamboen isec aton shubuno nidpac caondash. Aid acte con onqueten Sidoe quequin buanaid caic. ⁸ Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: —Bëshuaid nebique. Piucquid beccho —quedonetsec tsadtsëcsho isboedontsen istuidpac caondash. Istuidshun: —¿Nuqui isboedquibida nepec? “Beccho,” ¿quedoneboedquibida nepec? —cabededpac caondash. ⁹ Utsi-utsiec: —Ai, aidquiobi nec —quenubi utsibo: —Padenquo. Aidbimboecquidien nec —quesho tantiash: —Aidi nebi —quepac caondash bëshuacboed. ¹⁰ Adsho tantiashun: —¿Mitsipadec bëdano? —caquien: ¹¹ —Esus caidën bëdamioshi. Nidaidën uicchun cuishtucashun nidaidbëdta uicchun cabiunshun bëbitaccashun: “Acte tiquidimbo icquid Sidoe caidën bëpamëdec nid,” cac nidash bëpamëdec bëdanobi. Nëbi bëdamboen isembi —quepac caondash bëshuacboed. ¹² Adsho tantiashun: —Mibi bëdamequid ¿mitsimbo iquec? —cac: —Tsauid —quepac caondash bëshuacboed.

Bëshuaid bëdameboed chuimiaid

¹³ —Bëdamioshi —quesho tantiashun: —¿Abimboda capec? Ma con chuiquidon chuimenu —quequin padiseyobo yacno bëshuacboed buampac caondash. ¹⁴ Buacshobien padiseyobon: —Chonoadenquo icte ushën nac caosh —quequin tantiaquin: ¹⁵ —¿Mitsipadec bëdano? —caquien: —Esusën nidaidbëdta uicchun cabiunshun bëbitaccac bëpamëdec bëdandshun nëbi bëdamboen isembi —quepac caondash bëshuacboed.

¹⁶ —Bëpamëdec bëdanobi —quesho tantiashien chuiquido onquecuededpac caondash. Utsi-utsiec: —Nuquin Papa tantiaquid icquin Nuquin Papan chiaid niac-

niaquenquo ictsiash. Chonoadenquo icte ushën nëid bédamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bédamepatsiash? Ma comapenen tantiaquin nacnempaboc —quepac caondash. Adshumbic abitedishun: —Esus icsambo iquec —cainquo icquin ¹⁷ bēshuacboed chuipac caondash. —Mibi bédamequid ¿tsutsi mimbi cape? —caquien: —Nuquin Papan: “Yuecshun naden naindambi, quequin chiaidquo chuiquidien nec,” caimbi —quetanec bēshuacboed nidpac caondash.

¹⁸ Aid nidnubien Esus chieshënquido: —Bēshupenquien niash. Muequien niashe. Anibēdta amē chuimenun chomenuna —quetanquin ^{19–20} chomeshun bēshuacboed cain: —¿Min madoda niosh? —capac caondash. Adoac: —Ai, con mado niosh —qeshobien: —¿Bēshuacshobida tishonda? —capac caondash. Adoquien: —Ai, bēshuacshobi tishonaid nec —ani qeshobien: —Bēshuaid ¿mitsipadec bēdanosh? —capac caondash. ²¹ Adoquien: —Tsaudi. Bēdansho isambo iccombi. ¿Tsunambien bédamechitash? Dada ënden caniaid neque. Aidi chuime —quepac caondash bēshuacboedën tita amēbēdi. ²² —“Nuquin Papa yacnuēsh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuēdec: ²³ —Dada ënden caniaid neque. Aidi chuime —quepac caondash.

²⁴ Adoac padpiden bēshuacboed chomeopac caondash padiseyobon. Chomiash: —“Nuquin Papan bēdamioshi. Nuquin Papa bēdambo iquec,” ¿quecta icco? Ma Esus Nuquin Papan chiaid niac-niacquid neyoc. Ma icsamboshē icquid neyoc —quepac caondash. ²⁵ Adsho tantiash bēshuacboed: —Icsamboshē icquidien Esus nechitec. Aden tantienquo iquembi. Mabi bédameboc. Isenquo icboedēmbi mambi nēbi bēdamboen iseyoc. Adenuidtsēqui tantiembi —quepac caondash. ²⁶ Adsho tantiashun: —¿Mitsipaden mibi bēdamiosh? —caquien: ²⁷ —Mambi mibi chuipaboc. Ma mimbimbi tantienquo icboc. ¿Atotsi quequin padpiden: “Ēbi chui,” cai? ¿Esus tantiadquioda icti? —capac caondash bēshuacboedën.

²⁸ Adsho tantiash nēishtanquin chushcapac caondash. —Mibi Esus tantiaquidquo nec. Mibi icsambo iquec. Ēbien nuquin tsusedpa Moises tantiaquidquo nec. ²⁹ “Moisesien Nuquin Papan chuiquin namepampic,” quequin tantiembi. ¿Tsuntsin chiac mibi bédamequidën napash? Ma mibi bédamequid ěmbi tantiacmaidquo neyoc —quepac caondash chuiquido. ³⁰ Adoquien bēshuacboed: —¿Abida cai? “Dadpenquo tantiembi,” ma mibi quepaboc. Adboedi: “Ēmbi tantiacmaidquo nec,” ¿quecta ique? Mimbi tantiacmaidēmbini bēdamiosh. Ma bēdambo yoc. ³¹ Abi icsaid ěnabi icquidën chianesho Nuquin Papan tantienquo ictsiash. Abi tantiaquin ambi chiacpadomboen naquidën chianiac tantiashun Nuquin Papan nashuntsiash. ³² Anin bēshuacshobi tishaid bēdamenquo ictenec. Adquid bédamequid nibēdpadened. ³³ Nuquin Papa tantienquo icquin Esusën ěbi bēdamenquo ictsenosh. Nuquin Papa tantiaquimbini bēdamiosh. Ma Esus bēdambo icquid neyoc —quepac caondash bēshuacboed. ³⁴ Adsho tantiash nēishquioshon: —Bēshuacsho tishaid yec mibi icsamboshē iquec. Icsactsēcquidën chuitiapimbo iquebique. Baded nidec nid. Nēmbō padpidec puduedenda —quequin cuemepac caondash. Aden Esus chieshënquidon bēshuacboed Nuquin Papan chiaid chuibante shubun padpiden puduedmenquo icpac caondash.

Ambi bédameboed istuidoashun Esusën chiaid

³⁵ Adnubien: —Mimbi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matsesmi-aidquo caic: “Nuquin Papa yacnuësh choquid nec,” ¿quequinda mimbi tanti-ape? —capondash Esusën ambi bëshuaid bédameboed chuiquin. ³⁶ Adoquien: —¿Tsutsi neque? Isnu —cac: ³⁷ —Ëbi nec. Mibi bédameboedi nebi —caquien: ³⁸ —Ai, Nuquin Papa yacnuësh choquid Quidistu caidien mibi nec. Comapenen tanti-quin nabanquidquo yec mibi bédamboshë iquec —quetanec ismenuec danëshën tinquebudpondash.

³⁹ Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbéd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatipimbo icquin Nuquin Papa tantienquo iquec —quepondash Esus. ⁴⁰ Adsho tantiash néishtanec: —¿Nuquin Papa tantiesabodabi nedi? —quepondash Padisyobo. ⁴¹ Adsho tantiashien: —Nuquin Papa tantiesambo icsho ëmbi tantiamiac Nuquin Papabëdta ëbi tantiasho Nuquin Papan mibi bédamboen istsiash. “Nuquin Papa tantiaquiemi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec —quepondash Esus abi chieshënquido chiec.

Obecabimboecquido chiaid

10 ¹⁻² Adshumbic abi chieshënquido Esusën padpiden chuioapondash ompoacimboen chuiquin. —Tantia. Mibitedi chuinu. ¿Mitsipaden nuquin matsesën aton yua obeca dadpen dayun uaquin napec? Obeca daquënë uaidën puduedte shëcuënquo obeca icbo puduedquid. Daquënë uaid mayadec puduedquidien ampequid nendac. ³ Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. ⁴ Adshobic icbon daquënë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuë nec. Con icbo nec,” quequin icbo tsibanquid obecan. ⁵ Utsibon cuënaquien tsibanenquo yec dacuëdec cuenquid obeca. Icbouidsëqui tsibanquid obeca nec —Esus quesho tantiashien: ⁶ —Tantiadenquo yec mibi onquec —quepondash Esus chieshënquido.

⁷ Adsho tantiashun Esusën chuipondash. —Tantia. Mibi bédamboen chuinu. Obeca daquënë uaid puduedte shëcuëbimboecquid nebi. ⁸⁻¹⁰ Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Ëbi tantiesain Nuquin Papa yacno puduedtiapimbo iquendac. Ëbi tantiaquido cain obeca caombi. Aido bédamboen dayun uaquin bédamboec tabadquid icmendambi. Aido unësacsho uincuemeshun Nuquin Papa yacno ëbëdi tabadmendambi. Adec ëbi bédambo icnuc ampebimboecquid abi iquec. Ëbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquo iquec. Aido Nuquin Papan cuidtequidombo nendac. Padnuen ëbi tantiaquidon mimbi chi-

aid tantienquo icquimbi ëmbi chiaiduidtsëqui tantiendac —quepondash Esus abi chieshënquido chiec.

Ëbi tantiaquido dayun uaimbi, quequin chiaid

¹¹ Adashic Esus padpidec onqueoapondash. —Obeca icbobimboecquid nebi. Ico cudasacimboec ëbi tantiaquido cudasnuec ëbided cuidadec unësendabi. ¹²⁻¹³ Utsiboen adenquo icsiash. Piucquid bednuen obeca isquidbimboec iquec. ¿Mitsipadopaid obeca isquidën? Bëdi dapa chosho isun: “Con napenquo nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidën icbonpenquo nianacimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquo iqueyoc —quepondash Esus abi chieshënquido chiec.

¹⁴⁻¹⁵ Adashic abi onquec: —Ëmbien matses bëdamboen tantiamequin ëbi tantiaquido dayun uaindac. Nuquin Papabëd ëbi tantiananacpadquiec ëbi tantiaquidobëdtsen tantiananqueiebi. Aden ëbi tantiaquido tantiec Nuquin Papa cuidmenquo icnuec ëbided cuidadec unësendabi. ¹⁶ ¿Nëid matses isadaidboudidsëqui tantiectabi adec unëspadi? Padenquo. Matses utsibontsen Nuquin Papan tantiamiaido icquin ëbi tantiendac. Aidobëdta nëid matses con matses caquin abitedi bëdamboen dayun uaindami. ¹⁷ Con Pan tantiamiacpadec ëbided cuidadec unësendabi. Aden ambi chiacpadomboen ëmbi nasho con Pan ëbi tantiaquiec. Unësash ëbembu uincuenendabi. ¹⁸ Matsesën ambembi ëbi unës uatiapimbo icsiash. Ëmbi tantiacpadquiequi matsesën unës uadendabi. Adecbidi uincuentiadquo yec ëbembu uincuenendabi. Aden con Pan namiacpadomboen naindami —quepondash Esus.

¹⁹ Adsho tantiash con matses chuiquido nadec onquecuedepac caondash. ²⁰ Esus chieshënquido: —Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquo tantiatiapimbo iquendabi —quenubien ²¹ utsibo: —Podobitsi icsa dapuduedashta ¿adec onquepatsiash? Bëdamboequien onquiosh. ¿Podobitsi icsa dapuduedaidënda aden bëshuaid bëdamepatsiash? Bëdambo icquidëmbien adotsiash —quepac caondash.

¿Quidistu caidta ne? quequin chiaid

²² Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi. ²³ Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquo puduedabi quënë cachoqui capupondash. Aid quënë cachoc: “Sadomonën nacnenaid nec,” caondash. ²⁴ Ambo Esus capusho isashien con matses chuiquido Esus natia datsidadshun: —En sebadënquo chui. Tantienquo yec tsatiapimbo iquebique. Mimbi cuembo chuisho tantiatiadquo iquebi. ¿Nuquin Papan chomiaid Quidistu caidta ne? —capondash con matses chuiquidon. ²⁵ Adoquien Esus: —Mambi mibi chuipaboc. Ma mimbimbobi ëbi tantienquo icboc. Con Pan: “Adota,” cac comapenen tantiaquin nabandeniombi. Mibi bëdamboen tantiamenuen adodeniombi. ²⁶ Adosho isash mibi: “Ai, Nuquin Papa yacnuësh choquidien nec,” quetiadquidëmbi mimbi ëbi tantienquo iccoc. Nuquin Papan tantiamiabi yaido icquin mimbi ëbi tantiatiapimbo iquec. ²⁷ Con

Pan tantiamiaidien ëbi tantiaquid yanendac. Adshun obecan aton icbo tsibanac bimboen ëmbi chiacpadomboen natiadquio yanendac. ²⁸ Aido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” qeshun bëdamboen dayun uaindami. Ëmbi adoacsho bedshunac bimboen icsambo icquidën yuaquin Nuquin Papan cuidtequido icmeoatiapimbo iquendac. ²⁹ Con Pansen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adembidi mënchitiapimbo iquendac. ³⁰ Aden ëbi bedshuntiapimbo icquin con Patsen bedshuntiapimbo iquendac. Con Papadquidquio nebi —quepondash Esus.

Cuënoten seshunetiadpambo yanoaid

³¹ —Nuquin Papapadquidquio nebi —Esus qesho tantiash nëishtanquin cuënote dapa bedshun abi chieshënquidon Esus seshunetiadquio icoapondash. ³² Adsho isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? —quepondash Esus. ³³ Adoquien: —¿Bëdamboen nabanshodambi: “Mibi seshunenu,” cadì? Padenquio. “Con Papadquidquio nebi,” quequin Nuquin Papa muauasho mambi mibi nayoc. Matses icquin mimbi aden icsamboen chuisho tantiashumbimbi mibi seshunec —quepondash abi chieshënquido.

³⁴ Adshobien Esusën: —Nuquin Papan chiaidquio nuquin tsusedpan naden dada uapampic. “Nuquin Papa naded onquec: ‘Min matsesën ëmbi chiacpadomboen nasho: Ëbipadquid nec, caombi,’ queposh Nuquin Papa,” quequin dada uapampic. ³⁵ Matses caic: “Ëbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chiac,” quequin chiamo iquec. “Muesambo icquin Nuquin Papan icsamboen chuitiapimbo iquec,” qeshun mimbi chushcambo iquec. Nuquin Papa adoambobi ¿ëbida chushcai? ³⁶ Nuquin Papan namiacpadec abi yacnuësh chondayid nebi. Adquid yec: “Nuquin Papan Madombo nebi,” quiobi. Ëbi adsho tantiashun ¿atotsi quequin ëbi chushcai? ¿Nuquin Papadambi muauadio? Mambi abimbo caboc. ³⁷ Ëmbi chiaidquio tantiatiapimbo icquimbi ëmbi naidquio tantiata. Ëmbi Nuquin Papan namiacpadomboen comapenen tantiaquin nabanenquio icsho isun mimbi ëbi mua catsiac. ³⁸ Con Pan namiacpadomboen nasho isun: “Ai, ambi chuibocpadquidshenda nepec,” ëbi cata. Ëmbi chiaiduidtsëqui tantiatiapimbo icquin adota. Adshun: “Ai, Nuquin Papapadquidquibidien Esus nec,” quequin mimbi tantiabentsiac —quepondash Esus.

³⁹ Adsho tantiash padpidec nëishtanquin abi chieshënquidon: —Bedchitono —caqui bedadenquio icpondash. ⁴⁰ Adashic acte Odan caid potiash con shënision tauaquin matses acten mentodenecono Esus nidoapondash. Ambo ëbi chedobëdi tabadpondash. ⁴¹ Adshumbic Esusën comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusën adobansho isun: “Nëid chuiquinshenda Uan padon abimbo capadenec,” caimbi —cabededpondash anocquidon. ⁴² Adshumbic: —Nuquin Papa yacnuësh choquidien Esus nec —quequin Esus tantiabempondash.

Dasado caid unësaid

11 Udeya yacnuësh Esus cuembon Dasado Esusën utsibimboecquid unëstiadt-sëcquio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. ²Madian aton manëdaidën ubcanquin Esus tanoshcabi icnuc adec aton utsi unëstiadtsëcquio yanac caondash. ³Adnubien aton chuchun: —Esus chuitan —cac aton matsesën Esus chuituidpondash. —Mimbi con utsi caidquio unëstiadtsëcquio yanoshe. En isec cho —catuidpondash. ⁴Adoaquien Esus: —Chiata. ¿Unësash chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” qeshun naindambi —quepondash. ⁵Adbosh Dasado aton chuchubëdta tantiaquidquio yequi ⁶badedquio nidenquio yec anobi daëdec ushpondash Esus.

⁷Daëdec ushumbic Esusën: —Nuqui icbocno Udeya caidën padpidec nidnu. Nid —capondashi. ⁸Adoaquimbi: —Icbo, ma mibi anoshon cuënoten seshunetsempondac. ¿Anobidida nidtiad? ¿Ada: “Seshunequionoshe,” cadec? —capondambi. ⁹⁻¹⁰Adoaquien cuembo chienquio icquimbi: —Badiadën capuec tocoshquetanec uebudes. Inchëshëmbien tocoshquetanec uebudquid —quequin Esusën chuipondashi. —Nëbi ëbi unës uatiapimbo iquec. Badiadën nidacimboen con Pan tantiaidtedi nainabi icsho ëbi unës uatiapimbo iquec. Inchëshën uebudacimboen ambi tantiaidtedi nainshobini ambi tantiacpadënquiobi matsesën ëbi unës uaindac —quequin tantiec adondash Esus.

¹¹Adshumbic Esusën padpiden ompoacimboen chuioapondash. —Ëmbi con utsi caid Dasado ushtoaccoshe. Isucumec nidnu. Nid —quesho ¹²tantiashini: —Ma ushnu. Ushash isucunquid —quepondac. ¹³Esusën Dasado unësaid chuinubi Dasado ushe dantsëcondambi. ¹⁴Adnubien Esusën sebadënquio chuipondash. —Dasado unësaccosh. ¹⁵“Bëdamec nidtiadquidi niobi” ¿quepectabi ique? Padenquio. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombique. Nëbi mibi ismec nidnu. Nid ¹⁶—caquien: —Ai, abëdquiobi unësec nidnu. Nid —quiampondash Tomas anin abi ushëmbi daëdpambo tishaid. Adanec abitedi nidondash.

Unësaid uincuemequidquio nebi, quiaid

¹⁷Adashic unësacno anoentsëqui Esus chopondash. Choshon: —Unësacsho chococash daëd-daëdquieq ushobi —quetsëcquieq onquecuededsho tantiatuidpondash. ¹⁸⁻¹⁹Esus choabi icnuc con matses chuiquido Dasado unësacnuësh sedenquenuc Edusaden yacnuësh cho-chopac caondash. Unësaid nëbi ictsëcnuc tedes quidometedos tiontsëcquidën badedquio cho-chopac caondash. Cho-choash unësaidën chuchubëd sedenquec tabadpac caondash. ²⁰Adnubien: —Esus choec —quesho tantiash Madta bëquedec chopondash aton chibi Madia shubuno sedenquec tsadnubi. ²¹Choequien Esus bëquedec: —Mibi icnuc con utsi unësenquio ictsenosh, Icbo. Con utsi unësosh. ²²Mimbi chiacpadomboen Nuquin Papan nëbi natsiash —quepondash Madta: —¿Ada con utsi uincuemetsia? —quequin chuitiadquio yequi. ²³Adoaquien Esusën: —Mín utsi uincuenendac —capondash. ²⁴Adsho tantiash: —“Ai, yuecash unësaido abitedimbo uincuemete ushën con utsi uincuenendac,” quequin tantiembi —quepondash Madta. ²⁵Adsho tantiashun Esusën: —Ëbibbi matses

unësaid uincuemequidquo nebi. Ĕmbi tantiacpadënquo uincuenendac. Aden ëbi tantiaquido unësacsho uincuemendambi. ²⁶ Ĕmbi adoac Nuquin Papa yacno ëbëdi tabadendac padpidec unëstiapimbo yec. Ĕmbi aden chuisho tantiaash: “Ai, abimbo mimbi caindac,” ¿quequinda tantie? —capondash Esusën. ²⁷ Adoaquien Madta: —Ai, adembi tantiembi. “Nuquin Papa yacnuësh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuiampidquien nec,” mibi caombi —quetanec ²⁸ nidpondash aton chibi chiec. Nidshun: —Nëmbo cho, chibi. Chuinu —cac aton chibi choshobien: —Esus chosh. Mibi iste bunoshe. En isec cho, chibi —caquien ²⁹ Esus bëquednuec badedi choquin istuidpondash. ³⁰ Shubu dadpen yacnombo choabi icsho Madtan bëquedacnobi Esus tabadsho Madiantsen istuidpondash. ³¹ Adec Madia nidsho isun chococacnobi sedencaic nide danquin abëd sedenquenequidon tsibanampac caondash. ³² Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ënëdash: —Mibi unësquo iccoc, Icbo. Bëdambo icquid mibi nec. Mibi icnuc con utsi unësenquo ictsenosh —quepondash Madia Esus caic.

³³ Adnubien Madia tsibanec cho-choec con matses chuiquido sedenquetuidpondash. Madiabëd sedenquecuededsho istanec: —Ai, unësquo icnuc nec —quiash Esus abitsen shubiantiadtsëcquo icpondash. ³⁴ Adec shubiantiadtsëcquo tsadacnuëshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien ³⁵ shubinidequi nidpondash Esus. ³⁶ Adec shubinidsho isumbien: —Ma Dasado unësquo icnuc shubieyoc —cabampondash con matses chuiquidon. ³⁷ Adnubien utsibo: —¿Atotsieshun bëshuaid bëdamiondaidëmbi Dasado unëso bëdamenquo icpoh? —quepondash.

Esusën Dasado uincuemiaid

³⁸ Nidquimbi chococacno istuidequi Esus shubiantiadtsëcquo yanoapondash. Nidaid cuënoteuidpambo icquid macuësh tsimpiduc shëcuë uaidën unësaid nauedshun cuënote dapan bëtinacnuësh shubiantiadtsëcquo iccondash. ³⁹ Adashien Esus: —Cuënote bidiaquin shëcuë shëcne —quepondash. Adsho tantiaash unësaidën chuchu Madta: —Padi. Ĕnden pisenashe. Chococash mabi daëd-daëdquiec ushboc —quepondash. ⁴⁰ Adoaquien Esus: —Dacuëdenda. Mambi mibi chuiboc. Mimbi: “Nuquin Papan Madombobien mibi nec,” ëbi casho: “Ĕmbi comapenen tantiaquin nabansho mimbi isendac,” mambi mibi capaboc. En na. Baded bëcune —cac ⁴¹ cuënote shëcuë bëtinaid shëcnequin bëcunepondash.

Adsho istanquimbien Esusën abuc isquin Nuquin Papa chuipondash comapenec onquequin. —Papa, ëmbi nëbi chuisho mimbi tantiec. Ĕmbi chuibocpadomboen mimbi naindac. Mibi bëdambo iquec, Papa. ⁴² Ĕmbi otacquo chianiaid mimbi tantioc. Ĕbi datsidadaido tantiamenuen nëbi comapenec onquequin mibi chiembi. “Mibi chuitanquin ëmbi comapenen tantiaquin nabansho isun: ‘Nuquin Papan chomiaidien nec,’ quequin ma nëidon ëbi tantianu,” qeshun comapenec onquequin mibi chiembi, Papa. Padi, aitedtsëqui mibi chiombi, Papa —quepondash Esus. ⁴³ Adtanquimbien comapenen cuënquin: —Dasado, puduenec cho —capondash. ⁴⁴ Adoaquien Dasado badedquo puduenanec chopondash abi dashcute dataniacchobi. Unësacsho uesquin dashcuten datanetanquin dashcuten abi bëpucacchobi chopondash. Adec chosho istanquin: —Baded dashcute dachic. Ma nidnu —capondash Esusën.

Nëbien Esus unës uametiad, quiaid

(Mat 26.1-5; Mad 14.1-2; Duc 22.1-2)

⁴⁵ Aden Esusën ënden unësaidquiobi uincuemesho isashien Madia tsibanec seden-quec cho-chobedo abentse-abentsec: —Nuquin Papan chomiaidien Esus nec —quiampondash. ⁴⁶ Adnubien utsin Edusaden yacno nidshun Esus chieshënquido padiseyobo chuituidpac caondash. —Esusën unësaid uincuemiosh —quepondash. ⁴⁷ Adsho tantiatanquimbien chuiquid dapan abëdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomiaid tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh. ⁴⁸ Aden Esusën nabansho isun nuqui ëmiabi icsho nuquin matsesën abitedishun abi chuiquid dapa Esus icmetsiash. Adnubien nuqui yuaquido Doma yacnoquidon ambi chuiquid icmiacmaidquio chuiquid yansho isun nëishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chichtsash. ¿Mitsipadotiad Esus? —quepac caondash chieshëmënquido.

⁴⁹ Adnubien abëdtan chuiquido chuiquid dapambo aid setan icquin Caipas caidëntsen chuipac caondash. —¿Midapadotsëccquien mimbi chiendac? Tantiadentsëccquio icnuc ma mimbi chuipaboc. ⁵⁰ Tantia. Mibi bëdamboen chuinu. ¿Atotsi quec: “Abitedi unës uaindac,” mibi quepe? Ma nuquin matses abitedi unës uainquio icnueshun Esused unës uamenuna —quepac caondash chuiquid dapambo abëdtan chuiquido chieci. ⁵¹ Aden chuiquin ambembi chiambo Nuquin Papan oncamiac Nuquin Papan chiaidquido aden chuipac caondash. —Nëid setan abëdtan chuiquido chuiquid dapambo nec —queshun Nuquin Papan aden oncamiaqui Caipas onquepanëdash. —Matses cuidmenquio icnuc con Madoded cuidadec unësendac —queshun Nuquin Papan Caipas aden oncamepanëdash. ⁵² Aden Caipasën chuinëdaid tantiaquin ëmbitsen chuinu. Tantia. ¿Isadaidbouditsëqui cuidmenquio icnucta Esus abided cuidadec unësiondash? Padenquio. —Matses utsitsen abi tantiaquid yansho isun abëdi tabadmenuec Esused cuidadec unëspondash —quequin tantiembi. Nëbi Caipasën chuisho tantiashun tsusiobon chiaid chuinu. ⁵³ Aden Caipasën Esus unës uamete chuisho tantiashien Esus chieshënquido: —Nëbimbobien Esus unës uametiad —quecuededpac caondash.

⁵⁴ —Tsusiobon mibi adosh —quesho tantiatanequien chieshëmënquido ismenquio yec Esus cuempondash. Cuenequi nidaid utsin nidash masi dapa yacno anoentsëqui shubu dadpen icquid Epadain caid yacno nidpondash. Ambo tabadquin ëbi chedo Esusën chuibampondash. ⁵⁵ Epadain caid yacno tabadnubien Nuquin Papan con tsusedpabo unës uainquio icquin matamiampid inchësh tantiec cuëdënuec Edusaden yacno con matses nidanepac caondash. Cuëdëne taëabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuëdëntemaid,” quedeneque —quianec nidanepac caondash. ⁵⁶⁻⁵⁷ Adshumbien Edusaden yacnoshon Nuquin Papa tabadte shubu uashunaid daquënë uaidën puduedtanquin Esus iste bunquin nibëntuidpac caondash mishtemaid mishquidon. Nibëntuidshobien: —Nuqui chuiquido nadpac caosh. “Esus istuidshun ëbi chuita. Bedshun unës uamechitono,” quepac caosh —quesho tantiashien: —¿Ada Esus chopeba? “Unës uamenushe,” quiash choenquien icchitec —quecuededpac caondash.

Madia Dasadon chuchun Esus tanoshcaid

(Mat 26.6-13; Mad 14.3-9)

12 Aden mishtemaid mishquidon abi nibë nubien Edusaden anoentsëqui ambi Dasado uincuemiondacno Betania yacno Esus chopondash. Seistedec ushash Nuquin Papan matamiampid inchësh tantiec cuëdë nec taënushi niondash. ² Ambo chosho isash: —Esus bëdambo iqueque. Pemenu —queshun: —Pec cho —cac puduedash tabadpondash nëidtedi. Nëidic Esus. Nëidic Dasado. Nëidic shubu icbo. Nëidic Esusbëd icquid ëbi chedobi. Nëidic Dasadon chuchu daëd. Aidedi icpondash. Adec penuec tabadsho Madtan pete menebampondash. ³ Adnubien Madian: —Esus bëdamboshë iquec. Ismenu —quetanquin bëdamboshë nuadquidën Esus tanoshcapondash. Tanoshcatanquin aton manëdaidën taupondash. Aden tanoshcaid shubu anuestsëcquiec comapenec nuadpondash. Piuquid dadpenquo menequin bedaid niondash. Sedunten cushtoaid bëdambo nuadquid nado caid niondash. ⁴ Adsho isun Esus bedmequidën Udasën Madia chushcapondash. ⁵ —Padi. Mimbibi uesqueque. Utsi uain nata. Nëid danoshcate meneshun piucquid dadpenquo seta abentsëc matamec chonoadaidtedquiobien bedtiad. Adoshombien piucquid nibëdquido aid piucquid menetiad —capondash Udasën. ⁶ Adomboen chuisho tantishun Udas bëdambo icquidquo danondambi. Esusbëd icquido ëbitedishun piucquid bedshun sauedten sauedshun dayun uaquidquiemi danondac. Piuquid bëdamboec dayun uashumënenquo yequi abibi ampeshumënashi adondash Udas. Aden ambi ampiaid tantiequi: —Piuquid nibëdquidoen menetiad —quequin muaquin Madia chushcapondash. ⁷ Adshobien Esusën: —Padi. Chushcainda. Ma nanu. Ma nuquin matsesën unësaid bëdambo nuadnuc danoshcapaid yoc. “Nëbi con Mado unësendac,” quequin Nuquin Papan tantiamiacpadomboen ëbi unëso chocate tantiaquin Madian ëbi tanoshcaquin naic. ⁸ Piuquid nibëdquido dadpen iquec. Nibëdenquo iquendac. Èbien mibëd icboedi nëbi nibëdquido yanendac. Èbi tantiec Madia bëdambo iquec —quepondash Esus Udas chiec aidi: —Abi chieshënkuido Esus bedmenu —quepanuda.

Dasadotsen cuesunetiadquo yaid

⁹ Adnubien: —Betania yacno Esus choaccosh —cac Edusaden yacnuësh mat-ses dadpen Esus isec cho-chopondash. Ambobidi Dasado Esusën uincuemiondaid icsho aidtsen isnuec cho-chopondash. ¹⁰⁻¹¹ Cho-choshon Dasado uincuemiondaid isumbien abentsëcshun abentsëcshunquien: —Comapenen tantiaquin nabanquidquo yec Nuquin Papapadquidquibidien Esus nec. Nuquin Papan chomiaidien nec —quequin Esus tantiabempondash. Esus tantiabenshumbic abi chuiquidon chiaid tantienquo yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabenossh,” quioshe. Dasadotsembien unës uatiad —quianac caondash chieshëmënuquiec.

Chuiquid dapa ismiacbimboen Esus ismiaid

(Mat 21.1-11; Mad 11.1-11; Duc 19.28-40)

¹² Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdë nec cho-choboedon: —Esus choec —quesho tantiatanquin ¹³ niste podobiecquid bedbëtsenec Esus bëquedec cho-chopondash. Esus

bëquedshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uiccaiqui:

“Mibi bédamboshë iqueque. Èbi bédamboen ista.

Nuquin Papan chomiaid yec mibi bédamboshë iquec.

Con matses isadaidbo chuiquid dapambo mibi nendac,”

quecuededpondash Esus caic. ¹⁴ Ambì podquedën choquin bedbëtsemboed cabay-obitsecquidëmpi catsadtoanec Esus chosho isash adcuededpondash. Adec aid catsadte Nuquin Papan tantiamicpadomboen con tsusedpan dada uaquin naden chuiampic. ¹⁵ “Edusaden yacnocquido chiec:

‘Dacuëdenda, Edusaden yacnocquido.

Is. Cabayobitsecquidëmpi catsadtoanec mibi chuiquid dapambo choeque,’ quepec,” quequin Nuquin Papan chiaid dada uapampic. ¹⁶ Adec Esus catsadtoanec chosho isun aden chuiampid tantienquo iccondambi. Esus abuc nidambimbi ëbitedishun tantiabenondac. —Esus chuiquinshenda nuquin tsusedpan dada uapampic. Aidën chiacpadomboen niste podò uic-uiccaquin: “Bédambo iquec,” quequin nuquin matsesën Esus ismebededpondash —quequin tantiabenondambi.

¹⁷ Esus cabayobitsecquidëmpi catsadtoanec choabi icnuc Esusën Dasado uincuemesho isboedon: —Uincuemesho isombi —quequin matses dadpen chuibenepanëdash. ¹⁸ Adsho tantiashun: —Unësaid uincuemequid Nuquin Papan chomiaidien neque. Istanu —quianec Esus bëquedec cho-choshon aden niste podò uic-uiccaquin ismepondash. ¹⁹ —Esus bédamboshë iquec. Nuqui chuiquid dapa nendac —quecuededsho tantiashien Esus chieshënquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

Matses utsibo: Esus isnu, quiaid

²⁰ Edusaden yacno cuëdë nec cho-choboedo matses utsibo isadaidpembotsen icpondash. ²¹ Adnubien adquido matses utsibon Esus iste bunquin shubu dadpen icquid Betsaida caid yacnuësh caniquid Esusbëd icquid Uedipe chuituidpac caondash. —Esus istiadquio iquebi —quesho tantiashien: —Chiata. Chuitambono —quianec nidshun ²² Esusbëd icquid utsi Andedesba chuibëtsenec Andedesbëd choequi Uedipe Esus chiec chopondash. —Matses utsibon mibi istiadquio iquec —caquien ²³ aid matses utsibo isadaidpembo tantiamenuec Esus comapenec onquepondash. —Nuquin Papan matsesmiondaidquio icquin nëbimbobimbi ambi chiaidtedi nainendac. Èmbi adoacsho Nuquin Papan: “Mibi bédambo iquec,” èbi caindac —quepondash Esus abi unës uate chiequi. ²⁴ Adshumbien ompoacbimboen chuipondash. —Tantia. Mibi chuinu. ¿Mitsipadquio pete ëshë chococaid icpec? Chococac canias bacuëec bédambo icpaid yoc. Chococabi bédambo ictiapimbo iquec. Adoacbimboen chococabi yac matses bédambo icmetiapimbo iquendabi. Unë sacsho chococac matses bédambo icmequid nendabi —quepondash Esus. ²⁵ Adashic padpidec: —Ambi naiduidi naquin ëmbi chiaid niacquido Nuquin Papan cuidtequido nendac. Ambi naiduidi nainquo icquin ëmbi chiacpadomboen naquido ëbëdi tabadtequido yanendac. ²⁶ Adquid ëmbi chiacpadomboen natiadquio yec èbi yacpadec chieshtoenquo ictsiash. Adquidquio unësash uincuenash ëbëdi tabadsho Nuquin Papan: “Nëid con Mado tantiaquid bédambo iquec,” capendac —quepondash Esus.

Esusën abi unës uate chiaid

²⁷ Adashic abi unës uate tantiec Esus nadpondash. —Unësquioshë yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec nebi —quepondash Esus. ²⁸ Adtanequien Nuquin Papa chiec: —Nuqui tantiacpadomboen nëbi nainembi, Papa. Ęmbi aden nainacsho: “Nuquin Papa bēdambo iquec,” matses cameta, Papa —quenubien abucūeshquio Nuquin Papa comapenec onquepondash. —Ai, ěmbi namiaid mibi icsho: “Nuquin Papan namiaid nec. Nuquin Papa bēdambo iquec,” matses camepombi. Nēbi padpiden adomeoaindami —quepondash Nuquin Papa.

²⁹ Abucūesh onquesho bēdamboen tantiabi yec utsibo: —Abu cuēdtoec nec —quenubien utsibo: —Nuquin Papan abi yacnoshon uaid mayan bēdan Esus chuiplash —quecuededpondash. ³⁰ Adsho tantiash Esus: —Ěbi tantiamenuecta onquediosh? Padenquio. Mibi tantiamenuequien niosh. Aden tantiashun ěmbi bēdamboen chuisho tantiata. ³¹ Nuquin Papa chieshēnquid Satanasēn yuaido matses dadpenquioshē iquec. Nēbi Nuquin Papan tantiacpadomboen aido utsi-utsien Satanas bedshunendambi: “Chēn. Con na neque,” quequin. ³² Ębi abuc dectanac aden matses ěbi tantiaquid icmendambi —quepondash Esus. ³³ —Ěbi cuesten dectanquin unēs uaindac —quequin tantiec: —Ěbi abuc dectanendac —quepondash Esus.

³⁴ Adsho tantiash abi datsidadquido: —“Ěbi dectanendac,” quiosh. “Unēsebi,” quepequien iccosh —quiashien Esus chiec: —“Nuquin Papa yacnuēsh choquid Quidistu caid unēs sambo nendac,” quequin Nuquin Papan chiaid nuquin matsesēn chuinubi: “Unēsebi,” ¿quecta icco? “Unēsebi,” quequid Nuquin Papa yacnuēsh choquid ictiapimbo mibi iquec. “Nuquin Papan matsesmiaid nebi,” quequid ¿tsutsi mibi nepe? —quepondash Esus datsidadquido. ³⁵ Adoquien Esusēn: —Nadquid nebi —quenquio icquin ompoacbimboen naden chuipondash. —Mibi bēdamboen tantiamequid nēbi isadenquio iquendac. Aid nibēdnuc bēdamboen mimbi tantienquio iquendac. Nidabi aidēn chuisho bēdamboen tantiata. ³⁶ Nuquin Papan bēdamboen iste tantiamequid tantiata. Adsho bēdambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

Isadaidbon Esus tantienquio yaid

³⁷ Ęmbi dadpen chuiquin dada uabanacpadomboembi Esusēn comapenen tantiaquin dadpen nabansho isun con matses isadaidbon Esus tantiatiadquidi Esus tantienquio icpondash. ³⁸ Aden Esus tantienquio icte con tsusedpa Isayasēn Nuquin Papan tantiamiacpadomboen chuiquin dada uapampic.

“Nuquin Papa yacnuēsh choash nadec onquendac.

‘Mimbi chiaidquio chuibansho tantiashun: Muequien mibi nec, ěbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuēsh choquidien nec, quetiadquidi adenquio iquendac, Papa,’ quependac,”

quequin Esusēn chuite Isayasēn dada uapampic.

³⁹ Nuquin Papan pamumēdacbimboecnuc icmiac con matsesēn Esus tantienquio icpondash. Aden chuiquin Isayasēn padpiden dada uapampic.

⁴⁰ “Isadaidbon ěbi tantiatiapimbo icsho isun

‘Ma adembi tantienquo icpanuna,’ caimbi.

Ma adequi pabiate shëcuë nibëdacimboec icchitono.

Ëbi tantiasho abi icsaid bëpiscudquin bëdamboen ismane,”

quequin Nuquin Papan ambi con matses caido nëishëshun chushcaid Isayasën dada uyapampic. ⁴¹ Nuquin Papambo Esusbëd uinsadpambo yec tabadsho isonaid icquin Isayasën aden Esus tantienquo icte chuiipampic.

⁴² Con matses dadpenhun Esus tantienquo icnubi con matses chuiquidon abentsëcshun abentsëcshunquien Esus tantiauidpac caondash. Adoboedi: —“Nuquin Papan chiaid chuibante shubun puduedenda,” canushe —quiash dacuëdquin: —Esus tantiaquid nebi —quequin chuitiadquidi utsibo chienquo icpac caondash. ⁴³ —Ma con matsesëmbi ëbi bëdamboen isnu —quequinuidtsëqui tantiaquin aton matses chuitiapimbo icpac caondash. —Ma Nuquin Papan ëbi bëdamboen isnu. Aton Mado tantiaquid nebi que —quetiadquidi adenquo yac caondash.

Cuidenquo icte chiec nebi, quiaid

⁴⁴ Abi tantiauidboedo Nuquin Papan chiaid isbanquido cho-choash abi datsidacsho chuinuec Esus padpidec comapenec onquepondash. —¿Ëbi tantianuequidën ëbiuidtsëquida tantiapadic? Padenquo. Ëbi tantiaquidën ëbi chomiondaidsen tantiatsiash. ⁴⁵ Adembi con Papadquibidi ëbi icsho isun: “Ai, adquiobidien Nuquin Papa iquec,” quequin tantiatsiash. ⁴⁶ Nuquin Papan matses bëdamboen iste tantiamenuec matsesbëd tabadec chondabi. Adec matsesash: “Ëbi tantiaquido ma Nuquin Papan bëdamboen isquin bëdamboen tabadmenu,” quiash nebi. ⁴⁷ “Ëmbi aden chuisho tantiatiapimbo icquido nëbi cuidnu,” ¿quetabi icti? Padenquo. Nëbi Nuquin Papan bëdamboen isquin cuidenquo icte chuinuequini nec. ⁴⁸ Nuquin Papan cuidte ushëmbien ëbi tantiesabon: “Nuquin Papan chiaidshenda chuiipadenec. Aid tantienquo yec icsabudquiopobi,” quequin ambibi tantiendac. Adsho Nuquin Papan cuidendac. ⁴⁹ ¿Ëmbembi chuiquindambi nadi? Padenquo. Ëbi chomiondaid con Pan chiaidquo chiequini nec. ⁵⁰ “Ëbi tantiaquid ëbëdi tabadendac padpidec unësenquo yec,” queshun Nuquin Papan chiaiduidtsëqui chiequini nec —quepondash Esus.

Esusën abëd icquido tapanaid

13¹⁻² Esusën comapenen tantiaquin nabanaid chuiquin aidtedi chiombi. Nëbi abi tantiaquido tantiaquieci abided cuidadec unësaid chuiquin unësash abi uincuenaidtsen chuinu. Tanta. Nuquin Papan con tsusedpabo unës uainquo icquin matamiampid inchësh tantiaquin pec tabadte ushë nëbi yanuc inchëshën Esusbëd pec bëdamboec tabadondabi. Padnuen Udas Simon Iscadioten mado Satanäsën tantiamiacpadomboen Esus bedmete tantiec tsadpanëdash. Adnubien Esus: —Nëbi con Pa yacno nidebi nëido nianec. ³ Con Pabëd tabadec ambi tantiacpade abëdi abitedishun Icbombo iccondaiddi nëbi anobidi nidoash adquiobidi icoaindabi. Adquid icquin nëido bëdamboec tantianante ismenu —quequin tantiaquin ⁴ yuan nacimboen nadopondash. Uequin peboedi nidtotanec dashcute bëntse icquid dachiquidtanec daucudte tsibidiquepondash. ⁵ Tsibidiquetanquin pada-padaid dapan acte cushtotanquin abëd icquido tapambampondash. Daucudten tauchanquin tapambanondash.

⁶Aden tapambanquimbi: —Mibitsen tapanu —cac Petedon: —¿Icbonda yua tapampaid? Èbi tapanenda, Icho. Padi —capondash. ⁷Adoaquien Esusën: —Èmbi nasho nëbi mimbi tantienquo iquec. Yuecshun mimbi tantiendac. En tapanu —caquien: ⁸—Padi. Mibi bédamboshë icquid nec. Èbien icsaquid nec. Yua namiacimboen mibi tapametiapimbo iquebique. Padi —caoapondash Petedon. Adoaquien: —Èmbi tapanabi yac con yuambo mibi ictiapimbo ictsiac —capondash Esusën. ⁹Adsho tantiashun Petedon: —En na, Icho. Tapantanquimbi mapinobëdtabi èbi mëpanta —caquien: ¹⁰—Padi. Nesboed mibi nec. Taënouidtsëqui bëchishacsho tapanembi. Èmbi bëchish ucac mibi bédambo iquec. Abentsëc icsambo iquec —quepondash Esus. —Bëchish ucacimboen èmbi nasho Nuquin Papan mibi bédamboen isendac icsaid ucadacimboencuc —quequin tantiec: —Èmbi bëchish ucac mibi bédambo iquec —quepondash Esus. ¹¹—Udasën èbi unës uamenuen bedmendac —quequin tantiec: —Abentsëc icsambo iquec —quepondash Esus.

¹²Aden tapambanash dasiuidash samëdquin pebededquin abëd icquido Esusën chuipondash. —Èmbi naboed ¿ada tantie? Tantia. Mibi chuinu. ¹³“Èbi chuiquidquo mibi nec,” mimbi èbi capec. Adembidi: “Con Icho mibi nec,” mimbi èbi capec. Bédamboen mimbi chiec. Adquid nebique. ¹⁴Èmbi nabocpadomboen mibitsen nata. “Èbëd icquid tantiaquiquin tapanquin nashunu,” qeshun naombique. Adecbidi nashunanta. Naden tantiashun nata. “Esus tantiaquido tantiaquiembi. Con buchibimboencuc nashunu,” quiash nashunanta. ¹⁵Èmbi nabocpadomboen namenuen adombique. Mibitsen nata. ¹⁶En chuinu. Tantia. ¿Icbon chiacca chieshpadic? ¿“Nid,” cacta nidenquo icpadic? Icbon chiacpadomboen yuan naquid yendac. Adomboen tantiaquin èmbi chiacpadomboen nata. ¹⁷Èmbi aden chuisho tantiashun èmbi chiacpadomboen naic mibi bédambo iquendac —quepondash Esus.

¹⁸Adashic padpidec: —Mibitedi caic: “Bédambo iquec,” quetiapimbo iquendabi. Tauamboen: “Nuquibi icnu. Cho,” èmbi caondaïdo con yuabotedi tantiembi. Abentsëc icsambo iquec. “Aid con yuapenquo nec,” quequin èmbi tantiaidi nec. Nuquin Papan tantiamiac aidën icsamboen nate chuiquin nuquin tsusedpan dada uapampic naden. “Èbëdtan planeboedëmbi èbi unës uamenuen bedmendac,” quequin dada uapampic. ¹⁹“Abi unës uametebi chioshi. Nuquin Papapadquidquobi icquimbien naosh,’ quequin ma tantianu,” qeshun mibi chiombi. ²⁰Mibipadquidën nate mibi chuinu. Tantia. Mibipadquidën èbi chuibansho tantiash: “Ai, abimbo caic,” qeshun utsibon èbi tantiatsiash. Adembidi èbi tantiashun èbi chomiondaïd Nuquin Papatsen tantiatsiash —quepondash Esus.

Abi bedmequid Esusën chiaïd

(*Mat 26.20-25; Mad 14.17-21; Duc 22.21-23*)

²¹Adshumbien abi bedmequid Udas tantiac unësquo icnuc Esusën chuipondash. —Tantia. Mibitedi chuinu. Èbëd icquidëmbi èbi chieshëncquido èbi bedmendac —quesho ²²tantiash abëd icquidobëd bëisnanc: —¿Tsutsi capec? Nëidien cachitec —quecuededpondabi otacquo tantiec.

²³Èbi tantiaquidquo yec con cachoctsëqui Esus uepondash. ²⁴Adec Esusën dayuntsëqui ueshobini: —“¿Tsutsi cai?” ca —capondash Petedon mëdquin onquenquo icquin. ²⁵Adoaquimbi cachoc isquin: —¿Tsutsi cai, Icho? —capondac. ²⁶Adoaquien Esus: —En istac. Pete cuëshën ènë puntanquin menequin mibi ismenu —quetanquin pete cuëshën ènë puntanquin Udas Simon Iscadioten mado menepon-

dash. ²⁷ Adoac penubi Satanasquio Udas dapuduedquiopanëdash ambi tantiaidquio namenuc. Adshobien Esusën: —Mimbi tantiacpadomboen baded nëbimbobi naic nid, Udas —capondash.

²⁸ Adsho tantiashini ëbitedi: —Tantiadenquio yec onquepec. ¿Atotsi quiash: “Baded naic nid,” quepec? —quepondac. ²⁹ Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibëdquido piucquid menetan,” quepequien iccosh —quecuededpondash. ³⁰ Pete cuëshëmpi pesho: —Nëbimbobi baded naic nid —caquien Udas nidpondash. Inchëshëmbi nidpondash Esus bedmenuen chiec nidec.

Tantiananquiota, quequin chiaid

³¹ Abi bedmenuen chiec Udas nidbombien Esus: —Nuquin Papan matsesmiaidquio icquin ambi tantiaidtedi nëbimbobimbi nainendac. Ëmbi nainsho isash con Pa bëdambo iquendac. ³² Èbitsen bëdambo icmenuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac —quepondash Esus. Abi unës uatebëdta abi unësash uincuenash Nuquin Papa yacno nidte chiec adpondash. ³³ Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacpadomboen mibi chuiuanu. Tantia, mado. Ëbi nidacsho mimbi ëbi istuidenquio iquendac. Ëbi nidacno mibi nidtiapimbo iquendac. ³⁴ Aden tantiaquin Nuquin Papan chiaid utsi mibi chuinu. Ëbi nidan ëmbi chiacpadomboen nata. Ëmbi mibi tantiaquiacpadquiec tantiananquiota. ³⁵ Ëbi tantiaquido tantianan-sho isun: “Adec tantiananquido Esus tantiaquidombo nec,” quequin utsibon tantiasish —quepondash Esus.

Petedo: Ëmbi isacmaid nec, quete chiaid

(*Mat 26.31-35; Mad 14.27-31; Duc 22.31-34*)

³⁶ Adec —Nidebi —quesho tantiashun Petedon: —¿Mitsimbo nide, Icbo? —capondash. Adoquien Esus: —Nëbi mibi nidtiapimbo yacno nidebi. Yuecash ambo mibitsen nidendac —quepondash Esus. ³⁷ Adsho tantiash Petedo: —¿Atotsi queti-adquio yec: “Nëbi ëbëdi nidtiapimbo mibi iquec,” quepo mibi? Mibëd nidec dacuëdenquio ictsiabi. Mibi chieshënkuidon: “Unës uanu,” mibi casho tantiash: “Èbien natiad,” quetsiandabi —quepondash Petedo.

³⁸ Adsho tantiashien Esus: —“Èbien natiad,” ¿quecta icpatsia? Padenquio mibi ictsiac. Cachina bënë cuëdanabi icnuc mibi chieshtouidendac. “Èmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac —quepondash Esus. Adsho tantiashini Esusbëd icquido ëbitedi dacuëdcuededpondac.

Nuquin Papabëd tabadmendambi, quiaid

14 Èbitedi dacuëdcuededsho isashien Esus: —Dacuëndenda. “Èbi dayun uaquid nec,” quequin mimbi Nuquin Papa tantiacpadomboen ëbitsen tantiaquiota. ² Mimbi tantiacpadquio Nuquin Papan shubu iquec. Quënë dadpenquioshë iquec. Tsucustiapimbo iquec. Adpenquio icsho mibi aden chienquio ictsiambi. Adquid tantiaquin: “Èbi tantiaquido ëbëdi tabadmendambi,” quequin chiombi. ³ “Adquid iquec,” quiash ëbia nidshun con Pa chiendambi. “Èbi tantiaquido neque. Nuquibëdi

tabadmenuna,” quequin chiendambi. Adashic ëbi yacno mibi buanuec choaindabi. ⁴Ëbi nidan ëbi nidacno nidte mimi tantiec —quepondash Esus.

⁵Adsho tantiashun Tomasentsen: —¿Mitsimbo nide, Ico? Tantiambo iccombi. Podqued tantienquo iquembique. Ëbi chui —caquien ⁶Esus: —Nuquin Papa yacno nidte tantiamequidquo nebi. Nuquin Papan chiaiduidtsëqui chiec muesambo nebi. Adquid icquin ëbi tantiaquid Nuquin Papabëd tabadmendambi. Ëbi tantiesan Nuquin Papa tantiatiapimbo ictsiash. Ëbi tantiaquidënuidtsëqui Nuquin Papa tantiatsiash. ⁷Ëbi caic: “Nuquin Papan Mado nec,” quequin mimi Nuquin Papatsen tantiendac. Nëbi abipadquid ëbi icsho isun Nuquin Papambo isacimboen mimi tantiendac —quepondash Esus.

⁸Adshobien Uedipentsen: —Nuquin Papa ëbi isme, Ico. Nuquin Papa iste bunebique. Aid isash bëdambo ictsiabi —caquien ⁹aidsen Esusën: —¿Tantienquioda ique, Uedipe? Yuec mibëdi tabadobi. ¿Mimi isacmaidtabi nedi? ¿Mibi chianenquiodambi ictio? Nuquin Papapadquidquobidini nec. Ëbi adquid icsho isun: “Adquidquobidi Nuquin Papa iquec,” quequin Nuquin Papatsen mimi tantiendac,” quequin mibi chiombi. ¿Atotsi quequimbini: “Nuquin Papa ëbi isme,” cai? ¹⁰“Nuquin Papapadquidquo nebi,” ëbi qesho tantiash: “Ai, abimbo caic,” ¿quenquioda icco? Ëmbembi chienquo iccombi. Con Pan chiaidquo chiequini nec. Adembidi ëmbembi nabanenquo iccombi. Ëbëd tëshnanenquo icquin con Pan namiaquimbi naoc. Ëmbembi nainquo iccombi. ¹¹“Con Papadquidquo nebi,” ëbi qesho tantiashun: “Ai, abimbo caic,” cata. Ëmbi chiaid tantiatiapimbo icquin ëmbi comapenen tantiaquin dadpen nabamboedquo tantiata. Aden ëmbi nabamboed tantiaquin: “Nuquin Papan chomiaidënuidtsëquien adotsiash,” quequin tantiata. ¹²Tantia. Mibi chuinu. Ëmbi nacpadomboen ëbi tantiaquidontsen comapenen tantiaquin nabanendac. Ëmbi chuibanac daëdpactsëcshun ëbi tantiabentsëccosh. Con Pa yacno nidshun ëmbi chomiaidën con Mayanën namiac mibipadquidën ëbi chuibanac dadpenshun ëbi tantiabenendac. ¹³Ëmbi chiacpadomboen naquidën: “Ëbi nashunta, Ico,” qesho tantiashun ambi chiacpadomboen nashunendambi. “Nuquin Papa bëdamboshë iquec,” camenuen ¹⁴ëbi tantiaquidën chiacpadomboen nashunendambi —quepondash Esus abëd icquido chiec.

Nuquin Papan Mayan tabadte chiaid

¹⁵Adashic abëd icquido padpiden chiec Esus: —Ëbi abimbo tantiaquidën ëmbi chiacpadomboen natiadquo iquendac. ¹⁶Adotiadquo icsho isun con Pabëd icquin con Pa chiendambi naden. “Nuqui tantiaquido bëdamboen tantiamenuen nuquin Mayan aidobëd tabadmenuna, Papa,” ëmbi cac Nuquin Papan con Mayan mibëdi tabadmendac. ¹⁷Adoac mibi nianenquo yec mibëdi tëshnanenquo iquendac. Mibëd icquin ëbi chuiquin mibi abimbo tantiamendac. Aid isadenquo icsho ëbi tantiesabon aid tantiatiapimbo iquec. Mimbien aid tantiec. Con Pan ëbëd icmiaidquo nec. Ambi namiaid ëbi icsho aid tantiashumbimboen mimi tantiec. Ëbi nidan choash mibëdi tëshnanenquo yec tabadendac con Mayan. ¹⁸¿Shiadimpi mëyadacbitsec icnudambi mibi niampe? Padenquo. Nuquin Papan Mayan con Mayambi nec. Mibëd aid icnuc ëbëd yacimboequi con Mayan tantiadendac. ¹⁹Nëbi ëbi nidacsho ëbi tantiesabon ëbi isenquo icnuc mimi ëbi isendac uincuenacsho. Adec uincuenaid icquin con Mayan mibëd tabadmequin mibi unësacsho uincuemeshun ëbëdi tabadmendambi. ²⁰Ëbi uincuenaid ushëmbi mimi naden tantiendac. “Esusën Nuquin Papa tanti-

aquec aibdëd tëshnanenquo icquin aidën chiacpadomboenuidi naindac. Adecbidi Esusbëd tantianaquec aibdëd tëshnanenquo icquin aidën chiacpadomboen natiadquo yec tabadebi,” quequin mimbi tantiendac. ²¹ Ëmbi chiacpadomboen naquid ëbi tantiaquidquo nec. Ëbi tantiaquidquo mibi icsho con Pabëdtan mibi tantiaquiquin: “Adquo aton Papabëd Esus iquec,” camequin mibi bëdamboen tantiamendambi —quepondash Esus.

²² Adsho tantiashtun Udas utsin abi bedmequidënpenuico: —“Nuquin Papa yacnuësh choash con matses chuiquidquo yanshtun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin çatotsieshtun ëbiuidtsëqui tantiamene, Icho? —caquien ²³ Esus padpidec: —Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquiquin aibdëdi con Mayan tabadmendambi. Adoac con Mayanë tantiamiac ëbëd iquec con Pabëd iquec quiacbimboec tantiadendac. ²⁴ Ëbi tantienquo icquidoen ëmbi chiaid niac-niacquido nendac. çËmbiuidtsëqui chiaidta adquidën niac-niacpadic? Mambi Nuquin Papan chiaidquo chuiboc. Aidën chiaidquo adquidën niac-niaquec —quepondash Esus abëd icquido chieci.

²⁵ Adashic padpidec Esus onquiondash. —Mibi bëdiactsëc tantiamequin mibëd icquin con Pan chiaid chuibanombi. ²⁶ Con Pa yacno nidshun ëmbi: “Nuquin Mayan aidobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naidbëdta ëmbi chiondaitedimbo mibi bëdamboen tantiamendac. ²⁷ Con Pa yacno nidshun con Mayan mibëdi tabadmequin dacuëdenquo icquid mibi icmendambi. Adoac dacuëdenquo yec bëdamboec tabadta. Ëbi tantiesabo dacuëdacbimboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquo yec bëdamboec tabadta. ²⁸ “Nëbimbobini con Pa yacno nidendac. Adtanequic choaindabi,” quepobi mibi chieci. Ëbi adsho tantiasht ëbi tantiaquidombo cuishonquetsiasht. “Esus abi namequid aton Papabëd tabadec nidec,” quiasht ëbi tantieci cuishonquetsiasht. ²⁹ Nidnumbi mibi chieci nebi. “Unësash uincuenendabi. Adashic con Pa yacno nidendabi,” quioibi. “Ëmbi chiacpadec ëbi adsho isun ma nëidon: ‘Esusën abimboshenda capondash. Ambi chiondacadquid Nuquin Papan Madombo nec,’ quequin tantianu,” quiasht adobi. ³⁰ Nëbi ënquimbi chuinu. Ëbi tantiesabon icho Satanas ëbi unës uamenuc choeci. Ambembi aidën ëbi unës uametiapimbo iquec. ³¹ Con Pan tantiacpadequini unësendac. Ëbi adec unëso isash: “Nuquin Papa tantiaquin ambi chiacpadomboen naic abided cuidadec Esus unësac,’ quequin ma matses abitedishun tantianu,” quiasht adebi. Nëbimbobimbi naique. Nidec nidnu. Nid —quepondash Esus.

Shancuinbiecquid uba caid chiaid

15 —Nidec nidnu. Nid —quetanquimbi padpiden chuipondashi ompoacbimboen chuiquin. —çMitsipadquico shancuinbiecquid uba caid icpeci? Mapictsëci itsequi cuidi-cuidipambo yanquid. Adquidic shancuin bacuëbimboec didiquequid. Uba dadan aton cuidi canimequin bëdambo icmequid. Adomboembidi ëbi tantiaquido bëdambo icmendambi. Nuquin Papain uba icbobimboecquid nec. ² Uba aton icbon cuidi utsiuc bacuëesa icsho pateshtunepaid yoc. Adoacbimboen ëbi tantiauidtsëcboedon ambi icsamboen naid ëntiapimbo icsho con Pan ambi icsaido cuidacno nënendac. Uba icbombidi bëdamboen bacuëmenuen dadpen cuidi icquid cuidi

dadpen pateshun siaquid. Adomboembidi ëbi tantiaquido bédamboshë icmenuen Nuquin Papan aidon icsamboen naid ëmetsiash. ³Ëmbi chiacpadomboen naic mibi bédambo iquec. Aden ëbi tantiasho Nuquin Papan mibi bédamboen isec. ⁴Ëbi adem-bidi tantiaquin ëmbi chiacpadomboen nata. Adsho isash mibi bédamboen tabad-mec mibéd iquendabi. Uba cuidi padquédaid bacuëtiapimbo iquendac. ⁵Adecbidi ëbëdi tëshnanash matses bédambo ictiapimbo iqueque. Ëbéd tëshnanenquo yec bédamboec tabadta. Bédamboec tabadquin mimbi utsibo ëbi tantiametsiac. ⁶Uba icbon cuidi utsiuc bacuësa icsho pateshun tsindoshon nédëncapaid yoc. Adoacim-boen ëbi tantiesabo unësacsho Nuquin Papan ambi icsaido cuidacno nësecaindac —quepondash Esus.

⁷Adshumbic Esusën padpiden chuipondash. —Ëbi tantiaquin ëmbi chiacpadom-boen naquidën: “Ëbi nashunta, Papa,” cac ambi chiacpadomboen Nuquin Pa-pan nashuntsiash. ⁸Nuquin Papan adoshonac: “Nuquin Papa bédambo iquec,” mimbi catsiac. Adembidi utsibotsen: “Nuquin Papa bédambo iquec,” camenuen bédamboec tabadquin ëbi tantiameta. Mimbi adosho: “Ai, ëbi tantiaquidquo nec,” caindambi. ⁹Con Pan ëbi tantiaquiacpadomboembi mibi tantiaquiembi. Adoaid icquin ëbitsen tantiaquiquin ëmbi chiacpadomboen nata. ¹⁰Abi tantiaquiquin ambi chiacpadomboen nashobini con Pan tantiaquiec. Adembidi ëbi tantiaquidën ëmbi chiacpadomboen nasho ëmbitsen aid tantiaquiendambi. ¹¹“Ëbi cuishonquiac-padquiecbidi ma ëbi tantiaquiec cuishonquequiono,” queshun aden mibi chiembi —quepondash Esus abéd icquido chiec.

Tantiananta, quequin Esusën chiaid

¹²Adashic abéd icquido padpiden chiec Esus: —Ëmbi mibi tantiaquiacpadquiec tantiananta. ¹³Nadquiec caimbi. “Min utsi cuesnu,” cashunac: “Ëbien natiad,” quiacbimboec tantiananta. Aden mibi tantiec ëbided ciudadec unësendabi. ¹⁴Ëmbi chiacpadomboen nasho mibi con utsi caimbi. ¹⁵Ëmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bëda icpec?” quequin aton yua chienquo icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. ¹⁶“Esusbéd iquec nidnu,” ¿que-quinda mimbembi tantiadionda? Ëmbien mibi: “Nuquibi icnu. Cho,” caondac. “Ut-sibo tantiamequin ma nëidon ëbi chuibenenu. Adoac utsibotsen ëbéd tabadtequid yanendac,” queshun mibi cho caondambi. Aden ëmbi chiacpadomboen naquidën Nuquin Papa chuiquin: “Min Mado Esus tantiaquid ëbi icsho ëmbi chiacpadom-boen ëbi nashunta, Papa,” mimbi cac mimbi chiacpadomboen Nuquin Papan mibi nashuntsiash. ¹⁷Ëbi adsho tantiash ëmbi chiacpadquiec tantiananta —quepondash Esus.

Esus tantiaquido chieshënte chiaid

¹⁸Adashic padpidec Esus onquepondash. —Ëbi tantienquo icquidon chieshënac: “Aden Esusba chieshë nondash,” quequin tantiata. ¹⁹Ëbi tantiesabo icsho ëbi chieshë nquidon mibi bédamboen istsiandac. Adquid iccondaidi ëmbi: “Cho,” cac ëbi tantiaquid mibi yanondac. Adec ëbi tantiaquid icsho mibitsen chieshënoaindac. ²⁰“Yuan icbon chiacpadomboen napaid yoc,” quequin ëmbi ¿chuiboedta tantie? Aden ëmbi chiacpadomboen nasho ëbi chieshë nquidon mibitsen chieshënoaindac. Adembidi ëmbi chiaid tantiatiapimbo icquidën mimbi chiaidtsen tantiatiapimbo

icoaindac. Padnuen ëmbi chiaid tantiaquidën mimbi chiaidtsen tantiendac. ²¹ Ëbi chieshënquidombi ëbi chomiondaidquio tantiaquin ëbi chieshënenquio ictsiash. Ma ëbi chomiondaid Nuquin Papa tantienquio icquin aidon ëbi chieshëmpayoc. Adomboembidi ëbi tantiaquidotsen chieshënoaindac. ²²⁻²³ ¿Ëbi chieshënquidon ëbiuidtsëquida chieshëmpadic? Ma ëbi chieshënquin Nuquin Papatsen chieshëneyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshënquido ëbi chieshë nec icsainquio ictsenash. Nuquin Papa yacnuësh choshon mambi Nuquin Papan chiaidquio chuibamboc. Adnuc Nuquin Papan ëbi chieshënquido: “Mibi icsamboshë iquec,” caindac. ²⁴ Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshë nec mibi icsambo iquec,” cainquio ictsenosh. Utsibon nabanacmaidquio comapenen tantiaquin mambi nabamboc. Adosho isash ëbi chieshënquido: “Icsapenquio iquebi,” quetiapimbo iquendac. Ëmbi nabansho isun ëbi chieshënquin con Patsen chieshë nec. ²⁵ “Aden matsesën ambembi ëbi chieshëmpac,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënquidon isbanaidi nec —quepondash Esus.

²⁶ Adashic padpidec: —Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiac mibëdi tabadquin abimbo chuiquin ëbi tantiamequiendac. ²⁷ Adoac mimbitsen ëbi chuibanendac. “Yuec aidbëd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshënquidon mibitsen chieshënendac. Adoac dacuëndenda.

16 “Chieshtonoshe,” qeshun mibi aden chiombi. Mibitsen chieshë nac dacuëndenda. Mibëd con Mayan tabadmembique. ² Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuësh adendac. Adomboembidi mibi chieshënquin utsi-utsien cuesun secash: “Nuquin Papa tantiaquidquio icquin Esus tantiaquido cuesun secaombi,” quependac. ³ Aden Nuquin Papa ëbëdta tantienquio icquidon ëbi tantiaquidotsen chieshënendac. ⁴ Mibi chieshë nac: “‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” qeshun nëbi mibi chiembi. “Ëbi icnuc ëbi tantiaquido cuesun secadenquio iquec. Ëbi nidambien aido cuesun secabenendac,” quequin tantiaquin ënden aden mibi chienquio iccondambi. “Nëbi nidebi,” qeshun nëbi mibi chiembi —quepondash Esus.

Nuquin Papan Mayan chote chiaid

⁵ Adashic: —Nëbi ëbi chomiondaidbëd tabadec nidendabi —quepondash Esus. Adsho tantiasch padequimbo tabadpondabi. Adec ëbi padequimbo tabadsho isash Esus padpidec onquepondash. —“¿Mitsimbo nide?” ¿quenquioda ique? ⁶ Ai, ëmbi chuiboad tantiac unësquio icnucen mimbi ëbi chienquio icchitec. ⁷ Ëbi nibëdnuc mibi bëdambo iquendac. Ëbi nidenquio icnuc con Mayan mibi bëdamboen tantiamenu nec choenquio ictsiash. Nidshumbimbi mibëdi tabadmenuen chomendac. ⁸ Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac. ⁹ Aden Nuquin Papan Mayanë tantiamiac: “Esus tantienquio yec icsambo icchitebi,” quendac matses. ¹⁰ Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantiaschoeni Nuquin Papan bëdamboen istsiasch,” quen-

dac matses. Ēbi isadenquoio yec con Pa yacno nidan con Mayanën tantiamiac matses adendac. ¹¹ Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquoio icquidobēdta Nuquin Papan cuidendac,” quendac matses. Con Mayanën tantiamiac adec matses onquendac —quepondash Esus.

¹² Adashic abēd icquido chiec Esus: —Mibi dadpenquoio chuitiadquoio icquimbi nēbi dadpen chienquoio iquembi. Nēbi ěm̄bi chuisho mimbi tantiatiapimbo iquec. ¹³ Nuquin Papan Mayan choshombien mibi abimbo chuiquin ěbi tantiamendac. Ambembi chienquoio icquin Nuquin Papan chiaiduidi chiendac. “Nadquoio iquendac. Adecbidi nadquid choendac,” quequin mibi dadpen tantiamendac. ¹⁴ Adembidi ěm̄bi naidbēdta ěm̄bi chiaidtedi tantiamequin: “Esus bēdamoshē iquec,” camendac. ¹⁵ ĘĒbiuidtsēqui tantiamenuenda con Mayanën adopec? Padenquoio. Ęmbembi chiaid mambi chiamo yoc. Nuquin Papan chiacpadomboenuidi naquin ambi chiaiduidtsēquimbi chuibandenioc. “Con Mayanën ěbēdta con Pa tantiamendac,” quequin tantiec: “Ęm̄bi naidbēdta ěm̄bi chiaidtedi tantiamendac,” quiobi —quepondash Esus abēd icquido chiec.

Abi nidte Esusēn chiaid

¹⁶ Adashic padpidec: —Nēbi isadenquoio yanebi. Adashic yuecpectsēc yash isadcuendadabi —quepondash Esus. —Nēbi unēsash uincuenash padpidec isadebi —quequin tantiec adondash. ¹⁷ Adsho tantiashini ěbitedi: —ĘAtotsi quepec? Tantiadenquoio yec onquepec. “Con Pa yacno nidash ěbi nibēdnuc mibi tabadendac,” ma quepaboc. ĘAtotsi chuitiadquoio yec: “Nēbi isadenquoio ictanec yuecpectsēc yash isadcuendadabi,” queposh? ¹⁸ ĘAtotsi quepec nec? —quepondabi Esusbēd icquidobēd onquec. Esus tantiamenquoio yec sho-shoshquetsēcquiec onquepondabi. ¹⁹ Adsho ambembi tantiash: —Ębēd icquidon ěbi chuitiadquoio iquec —queshun Esusēn: —“ĘAtotsi chuitiadquoio yec nio?” quequin ěbi chuite mibi buneque. ²⁰ Tantia. Mibi Chuinu. Ębi unēsō isash mibi sedenquenubi ěbi tantienquoio icquido cuishonquendac. Adec sedenqueboedobi mibitsen cuishonquianendac. ²¹ ĘMitsipadquoio bacuē tishēc chido icpec? Bacuē cuididiquenuc natiamboshē icboedi bacuē tishash cuishonquepaid yoc. ²² Adecbidi nēbimbobi ěbi unēsō isash mibi natiaquiendac. Adboedi yuecpectsēcshun ěbi padpiden isash mibi cuishonquendac ěnēdenquoio yec. ²³ Adnubini con Pa yacno nidendac. Ębi adnuc mibi bēdambo iquendac. Ębi nidan: “Ębi nashunta,” ěbi catiapimbo icquimbi Nuquin Papa mimbi chianendac. Ębi tantiaquidēn: “Min Mado Esus tantiaquiembique. Ębi nashunta, Papa,” cac ěbi tantiaquin con Pan mibi nashunendac. ²⁴ Aden mimbi Nuquin Papa chianenquoio iccoc. Nēbi adomboen chianeta. “Min Mado Esus tantiaquid icsho ěbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuishoncamendac —quepondash Esus abēd icquido chiec.

Esusēn abēd icquido ěnquimbi chiaid

²⁵ Adashic abēd icquido padpiden chiec: —Ompoacbimboen dadpen chuiban-iombi. Yuecpectsēcshun: “Con Pa nadquoio iquec,” quequin mibi sebadēnquoio chien-dambi —quepondash Esus. —Uincuenashun aden chiendambi —quequin tantiec adondash Esus. ²⁶ Adashic padpidec: —Con Pa yacno ěbi nidan mimbi: “Min Mado Esus tantiaquid nebique. Ębi nashunta, Papa,” quequin Nuquin Papa mimibi chianendac. “Ęmbiuidtsēqui: ‘Ębi tantiaquid nashunta, Papa,’ cac ěbiuidtsēqui tanti-

aquin Nuquin Papan mibi nashuntsiash,” ¿quectabi ique? Padenquo. ²⁷ Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuësh choquid Esus nec,” quequin ëbi tantiaquid mibi icsho con Pan mibitsen tantiaquiquin mibi nashunendac. ²⁸ Matsesbëdi tabadec Nuquin Papa yacnuësh chondash nëbi con Pa yacnobidi nidendabi —quepondash Esus.

²⁹ Adsho tantiashini ëbitedi: —Adquidshenda mibi nepec. Ma nëbi mimbi seabdënquo chieyoc. ³⁰ Mibi: “Nëbi isadenquo yanebi,” quioc. Adashic: “Yuecpactsëc yash isadcuendabadi,” mibi qesho tantiash mibi tantiamenquo yec shoshshquetsëcquiec: “¿Atotsi quepec?” quecuedepobi. Mibi chuimetiaquido iccobi. Ëmbi chiambobi ma mimbibi tantiapaboc. Comapenen tantiaquidquo icquin ma mimbi abitedimbo tantiapayoc. Aden tantiaquid yec Nuquin Papa yacnuësh choquid mibi nec —quepondabi ëbitedi. ³¹ Adsho tantiash Esus: —Ai, nëbi mimbi ëbi tantiaquiec. ³² Aden ëbi tantiaquidquobi ëbi chieshënquin bedsho isanec mibi niqendac ëbi nianec. Mimbi niamënubi con Pan ëbi nianenquo iquendac. ³³ “Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquiec,” quequin dadpen chuibanombi. “Ëbi tantiec dacuëdenquo yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdënenda. Satanasën: “Icsamenu,” cac icsainquo iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëdenda —quepondash Esus abëd icquido chiec.

Esusën Nuquin Papa chiaid

17 —Dacuëdenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bëdambo icmeta. Aden mimbi bëdambo icmiac mibitsen bëdambo icmendambi, Papa. ² Ëndenquimboshë mimbi ëbi chiondac naden chuiquin. “Nuqui matses uaidon abitedishun Icbo mibi nec, Mado,” quequin mimbi ëbi chiondac. Mimbi adondaic icquin mimbi tantiactedi matses nuquibëd tabadtequido icmendambi, Papa. ³ Matsesën nadosho adoendambi. “Abipadquid utsi nibëdnuc Nuquin Papa iquec. Ambi chomiondaicquido Esus nec,” quequin tantiasho nuquibëd tabadtequido icmendambi, Papa. ⁴ Mimbi chiacpadomboen naquin nëbimbobimbi nainec. Ëmbi adoacsho isash matses: “Ambi chomiaid tantiasho Nuquin Papan nuqui bëdamboen isec. Nuquin Papa bëdamboeshë iquec,” quependac, Papa. ⁵ Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa —quepondash Esus Nuquin Papa chiec.

Esusën abëd icquido Nuquin Papa chiaid

⁶ Adshumbic Esusën abëd icquido ëbitedi chuiquin aton Papa chuioapondash. —Mimbi tantiactedi mimbi ëbi tantiaquid icmiacsho mimbi bëdamboen iste chuibanombi. Aden mimbi chiaidquo chiac: “Ai, adotiadquo iquebi,” quiosh, Papa. ⁷ Adembidi aidon: “Nuquin Papan namiaidquo nec. Ambembi nainquo iquec,” quequin ëbi tantiaposh. ⁸ Mimbi chiaid ëmbi chuisho tantiashun mimbi comapenen tantiaquin nabamiaid nasho isun: “Ma Nuquin Papan chomiaidquo nepayoc,” caposhi ëbëd icquidon, Papa. ⁹ Ëbi tantienquo icquido mibi chienquo iquembi, Papa. Ëbi tantiaquiduidtsëqui mibi chiec nebi. Mibi tantiaquido icsho mimbi

tantiamiac ëbitsen tantiec aidon. ¹⁰ Adsho isun: “Nuqui tantiaquido nec,” caimbi, Papa. Aidon: “Mibi bédambo iqueque. Con Icbo mibi canu. Mimbi chiacpadec bédamboec tabadtiadquio iquebi,” quequin bédambo icmioshi, Papa. ¹¹ Mibi bédamboshë iqueque. Ëbi mibi yacno nidan ëbi tantiaquido dayun uata, Papa. Ëbi chieshënquidon chieshtomenushe. Nëido bédamboen dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma ëbi tantiaquido tantiananu. Nëido bédamboen dayun uata, Papa. ¹² Aidobëd icquin mimbi chiaidquio bédamboen chuibanquin chieshtomiambu iccombi. Aden bédamboen dayun uaquin ëbi tantiaquido cudasënquin Satanas yuamiambu iccombi. Udas abentsëquien Satanasën Udas yuaccosh. Mimbi chiaid matsesën dada uapampicpadomboen ëbi bedmenuen Satanasën Udas yuaccosh. Adoac ëbi bedmequid yanash mimbi cuidtequid iquendac.

¹³ Nëbi mibi yacno nidendabi, Papa. “Ëbi nidan dacuëdec ëbi tantiaquido chieshtonoshe,” qeshun mibi otacquo chienquio iquembi. “Ëmbi abi dayun uate chuisho tantiashe ëbi yacpadec ma cuishonquenu,” quequin mibi otacquo chienquio iquembi, Papa. ¹⁴ Mimbi chiaidquio nëido chuibanombi. Adoac ëbi tantiaquido yansho ëbi chieshënquidon nëidotsen chieshëmpec. Ëbi yacpadec mimbi chiaidniac-niacte bunenquio icshobidi nëido chieshënquiec, Papa. ¹⁵ Aden tantiashe: “Ëbi tantienquio icquidobëdi ëbi tantiaquido tabadmenda,” ¿quectabi ique? Padenquio. “Ëbi tantiaquido chieshtomenda,” caimbi, Papa. Satanasën yuanushe. Bédamboen dayun uaquin chieshtomenda, Papa. ¹⁶ Ëbi tantiesabo tabadacpadec tabadenquio icquin ëmbi nabocpadomboen natiadquio iqueque. ¹⁷ Mimbi chiaidquio pausunquioquin bédamboen tabadme, Papa. ¹⁸ Mimbi ëbi: “Matses chiec nid,” caondacpadomboen aido: “Ëbi chuibeneta,” caindambi. Adoac nëidon ëbi chuibenendac, Papa. ¹⁹ Nëido tantiaquiec nëbimbobini mimbi chiacpadec ëbided cuidadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiash ëbi tantiaquido min yuabombo icmenuec adebi, Papa —quepondash Esus aton Papa chiec.

Esusën abi tantiaquid utsibo Nuquin Papa chiaid

²⁰ Adashic padpiden Nuquin Papa chiec Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquio yanendac. Ëbi tantiaquidotedi tantiaquin mibi chiec nebi, Papa. ²¹ Nuqui tëshnanenquio yacpadequi nuquibëd tëshnanenquio icquid icmeta, Papa. Nuqui tantiananquiacpadec ëbi tantiaquidotedi shubu abentsëquën tabadacbimboecnuc tantianameta, Papa. Adsho isash nuqui tantienquio icquido nadtsiashe. “Esus tantiec bédambo iquec. Aden Nuquin Papanuidtsëqui bédambo icmetsiashe. Nuquin Papan chomiaidquien Esus nechitec,” quetsiashe. ²² “Mibëd ëbi tantiananquiacpadquiec ma ëbi tantiaquido tantiananquiono. Ma chieshënanenquio icnu,” quequin mimbi ëbi namiacpadomboen ëbi tantiaquido namiombi, Papa. ²³ Nuqui tëshnanenquio yacpadec aidobëd tëshnanenquio iquendabi. “Chieshënanenquio yec tantiananquiec ma bédamboec tabadnu,” quec aidobëd tëshnanenquio iquendabi, Papa. Adec ëbi tantiaquido bédamboec tantianansho isun matsesën naden tantiatsiashe. “Ambi chiacpadquid Nuquin Papan chomenëdaid icquin Esusën abi tantiaquido aden bédamboen tabadmec. Ambi chomenëdaid aton Mado

tantiaquiapadomboen Nuquin Papan aid tantiaquido tantiaquiec,” quequin matsesën tantiatsiash, Papa. ²⁴ Mimi ëbi tantiaquido icmiaido nuqui tabadacnombo tabadmeta. “Nuqui matses uabi icquin mimi: ‘Ëmbi tantiaidquio mibi neque. Nuquiibi nanuna, Mado,’ cac nuqui bédamboshë yec tabadtenecpadequi nuqui tabadsho ma ëbi tantiaquidon isnu,” qeshun mibi: “Nuqui yacno tabadmeta, Papa,” caimbi. ²⁵ Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbéd icquidon: “Ai, Nuquin Papa yacnuësh choquidien nec,” quequin tantiaposh, Papa. ²⁶ Aden tantiamenuen yuec ëbéd icquidobéd tabadquin mimi naid chuibanombi. Ëbi nidan ëmbi chomi-aidën con Mayanën adembidi ëbéd icquido tantiamendac. “Mimi ëbi tantiaquiapadomboen ma nuqui daëdi tantiaquiash ma tantiananquiono,” qeshun con Mayan aidobéd tabadmendambi. Adoac ëbéd icacimboc con Mayan tantiadendac, Papa —quepondash Esus Nuquin Papa chiec.

Esus bedmiaid

(*Mat 26.47-56; Mad 14.43-50; Duc 22.47-53*)

18 Aden Nuquin Papa yuen chianec Esus nidpondash. Ëbi chedobéd nidquin acte Sededon caid potiashtiedno cuète odibos caid nitsinacno ëbitedi chiec tabadtenebocnombo chopondash. ² Ambo tabadnubien Udas: —Ëbi abéd tabadtenebocno tiednoen nidchitash —quianec Esus bedmenuc ³ chopondash. Aden chieshëmëquido chuiquid dapabo chuitanshun matses dadpen bëpondash nëidtedi. Nëidic con matses chuiquid dapabobëdtan padiseyobon namiaido sondado chedo. Nëidic con matses yuaquido Doma yacnocquido sondado dadpen. Nëidic aid sondado chuiquid. Aidedi Udasën bëpondash. Tabotëbëdta cueste sanambédedsëc-queic cho-chopondash. Utsibombic chështe.

⁴ Adec cho-chosho isash bëquedbanec nidquin: —Ëbi unës uamec —quequin tantiaquin Esusën: —¿Atotsi quec ne? ¿Tsutsi nibëne? —cac ⁵ —Nasaded yacnuësh caniquid Esus bednuec nebi —quepondash sondado chuiquid. Adshun isac aidbéd Esus bedmequid Udas icpondash.

⁶ Adshobien Esusën: —Në iquebi —capondash. Nuquin Papapadquidquibi icquin adoac dacuëdec: —Aucbidi cuenu —quec uebudcuededpondash bednuequidotedi. ⁷ Adshobien padpiden Esusën: —¿Tsutsi nibëne? —cac: —Nasaded yacnuësh caniquid Esus bednuec nebi —queoasho tantiashtun: ⁸ —“Në iquebi,” caombi. Ëbiuidtsëqui bedta. Ëbéd icquido bedenda —capondash Esusën. ⁹ —“Mimi ëbi tantiaquid icmiaido Satanas chieshtomiambo iccombi, Papa,” quequin ëmbi Nuquin Papa chuibocpadomboen nëido chieshtometiapimbo iquebi —quequin tantiec: —Nëid bedenda —quepondash Esus.

¹⁰ Adnubien Petedon abi tsidiadaid chështe chictanquin chuiquid dapan yua abiucquio pateshunepondash. Aid yua Madco niondash. ¹¹ Adosho isashien Esus: —Padi. Chën. Min chështe naued. Nuquin Papan chiacpader paëmbo icnuc unësendabi —quepondash Esus.

Anasën shubuno Esus buanaid

(*Mat 26.57-58; Mad 14.53-54; Duc 22.54*)

¹² Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash. ¹³⁻¹⁴ Aden

cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshë nec: —Nuquin matsestedî unës uamenquio icnuen Esusded unës uame-nuna —queboed Caipas niondash. Aton cucu chuiquid dapabidî niondash. Aidi Anas niondash. Anasën shubunoba Esus buampondash. Ashunquio Caipas ismenuen buampondash.

Petedon: Ęmbi isacmaid Esus nec, quequin chiaid

(*Mat 26.69-70; Mad 14.66-68; Duc 22.55-57*)

¹⁵ Esus buansho isun Petedobëdtan chinunondambi. Chinuntuidash nidequi Caipasën shubuno choash daquënë uaidën puduednuesho tantiashun shëcuë isquid chidon puduedmiondashi. Ambi isondaï icsho aden puduedmiondashi. ¹⁶ Ębi puduedmequin Petedo ambi isacmaid icsho puduedmenquio icpondash. Adsho istanquin: —Ębëd icquid neque. Shëcneshun. Ma puduednu —capondambi. ¹⁷ Adoac puduedmeshun shëcuë isquid chidon: —ĚNë bedboed Esusbëd icquidta mibi ne? —capondash Petedo chuiquin. Adoquien Petedo dacuëdec: —Padenquio —quepondash muequi. ¹⁸ Adnubien iquendoshon daquënë uacnoshon cuëte dëtsiadoshon sondado chedobëd anocquido yuabo cuëte cuëec tabadpondash. Adsho isashien Petedotsen cuëte cuënu ec nidpondash Ębi shubunquio puduednuc.

Caipasën Esus chuimiai

(*Mat 26.59-66; Mad 14.55-64; Duc 22.66-71*)

¹⁹ Adec Ębi puduednubien Caipasën Esus chuimepondash. —Mibëd icquid Ětedtsi iquec? ĚĘbëd icquido dëniaquecta icpec? Mibëd icquido Ěmitsipaden chuibano? —capondash. ²⁰ Adoquien Esusën chuipondash. —ĚOmpoquindambi chuibandio? Nuquin Papa tabadte shubu uashunaid daquënë uaidën puduedshun mambi chuibandeneboc. Nuquin Papan chiaid chuibante shubun-shubunquieç puduedcuenequin mambi chuibeneboc. Ompoquin chiambo iccombi. ²¹ Mimbi: “Icsamboen naosh,” caid Ębiuidtsëqui chuimenda. Ębëd icboedotsen chuime. Ęmbi chiaid abitedi tantiashun aidombi mibi chuitsiashe. Aidotsen chuime —quepondash Esus.

²² Adsho tantiashun: —ĚChuiquid dapada adopaid? —quetanquin sondado chuiquidën mëdanten bëcuespondash Esus. ²³ Adoquien: —ĚIcsamboendambi chuidio? ĚAtotsimbi icsa uaoque? En chui. Mambi abimbo chuiboc. ĚAbimbo chuiquidta cuespaid? —quepondash Esus. ²⁴ Adondash Esus Anasën abi cataniacchobi Caipasën shubuno bëac.

Petedon: Ęmbi isacmaid Esus nec, quequin chuoiaid

(*Mat 26.71-75; Mad 14.69-72; Duc 22.58-62*)

²⁵ Adnubien Petedo abi cuëte cuëec tsadsho abëdtan cuëte cuëec tabadquidon: —Esusbëd icquidien mibi nechitec —capondash. Adoquien Petedo: —Padenquio. Mabi aidbëd icambo yoc —quepac caondash. ²⁶ Adshobien chuiquid dapan yua utsin Petedon pateshuneboedën matsesën: —Esus bedacnobimbi mibi ischitoc —caquien ²⁷ padpidec: —Padenquio. Mabi ano nidambo yoc. Ęmbi isacmaidquio ma Esus neyoc —quenubien Esusën chuibocquio cachina bënë cuëdampac caondash.

Pidato caidën shubuno Esus buanaid

(Mat 27.1-2; Mad 15.1-5; Duc 23.1-5)

²⁸ Adnubien Caipas aton chuiquid utsibobëd: —Nuquin matses yuaquido ancaquid Pidato caid ismenuembien Esus buantiad. Aid Esus unës uamenuembien natiad —quecuededpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchësh tantiec con matsesbëd pec tabadtiapimbo icchitomane —quiash Pidaton shubun puduedenquio icpondash. ²⁹ Adnubien Pidaton aton shubunuësh puduantanquin Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien ³⁰ —¿Bëdambo icquidtambi mibi ismenuen bëdio? Con matses chuiquid dapa ictiadquio icquin icsamboen naoshe. Cuidquiota —quepondash chieshëmënkuido. ³¹ Adoquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Ëmbi cuidquin unës uacsho isash min matses chieshtonoshe. Min matsesën: “Con matsesënuidsëqui unës uaquin cuidaquien bëdambo ictsiash,” qeshun ëbitedi chieshënushe —quepondash Esus chieshënkuido Pidatambo Esus unës uame tiadquio yec. ³² Ënden abi chieshënkuidon bedabi icnuc: —Ëbi cuesten dectanquin unës uaindac —quequin Esusën chiacpadomboen namenuec adpondash.

³³ Adnubien aton shubun puduedtanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien ³⁴ Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash. ³⁵ Adoquien Pidaton: —¿Isadaidbodabi nedi? Padenquio. Ëmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien ³⁶ Esusën Pidaton bëyuc chuiboed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

³⁷ Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuc matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ëbi tantiatsiandac —quepondash Esus.

³⁸ Adsho tantiash Pidato: —¿Tsuntsin matses uaquid quequin abimbo chuipatsiash? —quetanec pduenshun Esus chieshënkuido chuioapondash. —¿Icsambo icquidta Esus nedic? Ma icsapenquio icquid neyoc. ³⁹ Nëid cuidtiapimbo icquin chuinu. Nuquin Papan matamiampid inchësh tantiate ushën min matses quënën nauedaid abentsëc cuemedeniandambi. Adembidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: ⁴⁰ —Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquio icnuc adcuededpondash Esus chieshënkuido Esus unës uamete bunquiec.

Esus cueshcaid

(Mat 27.27-31; Mad 15.16-20)

19 —Badabasquio cuemeta —quesho tantiatanquin Pidaton: —Në Esus cueshcanuen buan —capondash. Adoquien buanshun sondadon canite cuëshë dëdectanquin nacnenaïd cueshcanten Esus comapenen cueshcapac caondash. ²Cueshcatanquin pinchuc-pinchucpambo icquid mauete nacnenaïd Esus maumepac caondash. Adotanquimbic chuiquid dapan dashcutebimboecquid umucquid dasiuintanquin: ³—Adec dasiuidquid chuiquid dapambo nec —quequin sondadon Esus mamëshshumpac caondash. Aden mamëshshunquimbi: —Isadaïdbo mattses chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacnobidi buanoapac caondash.

Esus unës ua, quiaïd

(Mat 27.15-26; Mad 15.6-15; Duc 23.13-25)

⁴Buanoacsho istanequien Pidato padpidec puduenoash Esus bëquido chiec: —Mimbi bëboed Esus icsapenquïo iquec. Icsambo icquid icsho: “Unës uata,” catsiambi badedi. Icsapenquïo icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien ⁵Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec puduëshobien Pidaton: —Is. Mimbi bëboed choeque —cac ⁶chosho istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënquïdo comapenec cuëdec. Adoquien Pidaton: —Mimbi cuesten dectanquin unës uatan. Èmbimbo adotiapimbo iquebi. Icsapenquïo icquid icsho Esus unës uatiapimbo iquebi —capondash Pidaton.

⁷Adoquien Esus chieshënquïdon: —Con mattsesën: “Nuquin Papa muauaquïd unës uaquïd yendac,” cacpadomboen natiadquïo iquebi. Esusën: “Nuquin Papan Madombo nebi,” quequin Nuquin Papa muauaoshe. Unës uaquïmbien ictiad —quepondash. ⁸—“Nuquin Papan Madombo nebi,” quïosh —quesho tantiashien Pidato dacuëdqüiec yampac caondash. ⁹Adash aton shubun Esusbëdi puduedoashun Pidaton Esus chuiïoapondash. —¿Tsutsimbo ne? ¿Mitsiüëshquïo chonda? —caqui Esusën ëcbedenquïo icpondash.

¹⁰Aden ëcbedenquïo yac nëishashien Pidato: —¿Chuitiapimboda ique? ¿Tantienquïoda ique? Èmbi: “Cueme,” cac mibi cuemetsiash. Èmbi: “Cuesten dectanquin unës ua,” cac mibi adotsiashe. En chui —caquien Esus: ¹¹—¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquïo icquin mimbi ëbi cuesten dectanquin unës uametiapimbo ictsiac. Èbi cuesten dectanquin unës uamenuec mibi icsambo icnuc ëbi bëboedo chuiquid dapabo icsamboshë iquec —quepondash Esus.

¹²Adsho tantiashien Pidato: —Esus unës uatiapimbo icchitebi. Cuemetiadquïo iquebi —quetanquin padpiden Esus chieshënquïdo chuitanoapondash. —Esus cuemenu —caquien: —Icsambo iquec. Min mattses abitedimbo chuiquid dapambo Sesad caïd: “Èbentsëqui chuiquid dapambo nebi,” quïac caosh. Aid dëniaquec Esus chuiquid dapa icte bunquïec. Esus cuemequin mibi chuiquid dapambo mimbi nëishmeque. Esus cuesten dectanquin unës ua —quecuededpondash. ¹³Adsho tantiashun Esus puduemëoatanec cuënote nacnenaïd abuc tsadunaidën cuidte chuïn-

uec tsadten tsadtopondash Pidato. Aid cuënote nacnenaid con onqueten Cabata capondash. ¹⁴Nuquin Papan matamiampid inchësh tantiate ushë badiadash icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin. ¹⁵Adoaquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash Esus chieshënquido. Adoaquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënquido: —Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin unës ua —quecuededpondash Esus chieshënquido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

¹⁶Adoaquien Esus chieshënquidon chiacpadomboen: —Esus cuesten dectanquin unës uatan —capondash Pidaton aton sondado chuiquin.

Cuesten dectanquin Esus unës uaid

(Mat 27.32-56; Mad 15.21-41; Duc 23.26-49)

¹⁷Adoac buanquin: —Nëidën dectanu —qeshun sondadon cuate daëd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash. ¹⁸Ambo nidshun aton dashcute dachictanquin bëchun shuin mëtoccaquinc tatoccaquinc catanquin cuate daëd napotiaid ambi bëboedëmbi Esus dectampondash. Icsambo icquid daëdpambo cuesten dectanaid uquë diadbudcuenec diadnuc Esusquio nënantanquio dectampondash.

¹⁹⁻²⁰Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cuate pada uaidën dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —qeshun Pidaton adopac caondash. Aden dada uashun dectanaid isashien Esus chieshënquido nëishquiopac caondash. —Shubu dadpen icquid Edusaden caid anoentsëqui Esus dectanaid icnuc matses utsin onqueten-onquetenquien dada uaid matses dadpeshun isnushe —quiash ²¹Pidato chiec nidpac caondash. —Icsamboen chuiquin ma mibi dada uapac. ¿Con matses chuiquid dapada Esus nedic? Adquidpenquio nec. Utsi uain dada uata. “Isadaidbo matses chuiquid dapa nebi,’ quequid Esus nec,” quequin cuate cuëshë utsin dada uata —caquien ²²—Padi. Mambi ëmbi tantiaboedquido dada uaboc. Utsi uain dada uoa-tiapimbo iquebi —quepac caondash Pidato.

²³Adnubien Esus dectanquido sondado daëd-daëdquieci pondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi daëdcaid tuscabi icquid niondash. ²⁴Adquid icsho isun: —Canchenquio icquin ¿tsundanquio bedequé? Isnuna —qeshun abi cuëmëdquidtedi dada uabanshun tëchun sandoshon cadotanequin dada uaidëmpi abia puduemaiid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “Abentse-abentsen con dashcute bedosh. Con dashcute utsi bednu, quequin dada uaidëmpi abia puduemaiid isnuen naosh,’ quependac,” quequin dada uapampic.

²⁵ Adnubien Esus dectanaid cuate tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash. ²⁶ Në chido tabadnuc ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. — Nëid con mado cata, tita. Ma mibi bédamboen dayun uanu —capondash Esusën. ²⁷ Adshumbic ëbitsen chuiquin: —Con ta tita cata. Adshun bédamboen ëbi dayun uashunta —cac con shubunobi buanondambi bédamboen Esus dayun uashunuen.

²⁸ Adboshien unësqiuonoshi Esus: —Con Pan chiacpadomboen nainembi. Mates tantiec ëbided cuidadec unësebi —quequin tantiec con tsusedpan dada uaquin chuiampicpadece: —Acte bundobi —quepondash Esus. ²⁹ Adsho tantiaishun mat-sun acte mucambo icquid anidquid shapu-shapupactsëcquidën punshun cuate dëdectanshun abuc sananquin ëccuëscadonetsëcquin chishmepondash. ³⁰ Adoac acte mucambo icquid chishtanequien: —Con Pan chiacpadomboen nainquiombi — quepondash. Adtanequi tédquëdbudpondash Esus unësequi.

Esus uinte masiaid

³¹ Adnubien Esus chieshënquido: —Badiadash Nuquin Papan matamiampid inchësh tantiate ushë iquec. Chonoadenquio icte ushë nec. Aidën cuesten dectanquin unës uaid chococac icsambo icstiashe. Nëbimbobi chococamenu —qeshun Pidato chuitampac caondash. —Baded nidte podquënquin unës uame. Inchësheque —cac ³² Pidaton aden chiac sondadon nidte podquëntanondash. Esusbëdta dectanaid ëquë diadquidba nidte podquënshumbic utsiuc diadquidtsen. ³³ Adotanquin isquien Esus ënden unësa. Adshobien nidte podquënenquio icpondash.

³⁴ Adotanquimbic: —Unësa bi icnushe —qeshun: —Unës uaquibono —quetanquin sondadon cudan podo ansequin Esus uinte masepondash. Adoac nua intact chididiquiondash actebëdi. ³⁵ —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaquin. ³⁶ Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. ³⁷ Adembidi podo ansete dada uapampic. “Ambi podo anseboed isec tabadendac,” quequin dada uapampic.

Esus unësacsho chococaid

(Mat 27.57-61; Mad 15.42-47; Duc 23.50-56)

³⁸ Adnubien shubu dadpen icquid Adimateya yacnocquid Ose chopondash. Esus tantiaquid aid nondash. Esus chieshënquido dacuëdënquin: —Esus tantiaquid nebi —quequin utsibo chienquio icboedëmbi Pidato chuitampac caondash. — Esus chococanun buanendambi —cac: —Ai —cac Esus buampondash. ³⁹ Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaïd dabiunte bëac caondash. Nuamboshë. Yuëmbo icnuc 35 quidostembi icnuc bëac caondash. ⁴⁰ Adshumbien Osebëdtambi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoquid. Adshumbic padpiden dabiunoaquin. Adshumbic dataneoquid. Chococanun con matsesën adoquid. ⁴¹⁻⁴² Adashic: — Badiadash Nuquin Papan matamiampid inchësh tantiate ushën unësaïd chococac icsambo icstiashe. Badedquio chococanu —qeshun tied nëbi icstëcquidën Esus

buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bêtimpac caondash cuënote dapambidi.

Esus uincuenaid

(*Mat 28.1-10; Mad 16.1-8; Duc 24.1-12*)

20 Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bêtinaid cuënote dapa bëcunepamboen shëcniac. ²Cuënote dapa bëcunepamboen shëcniacsho istanec titinquianec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

³Adoaquini: —Istanu —quianec ⁴titinquianec chococacno Petedobëdi nidpondac. Petedo nianec ëbia nidpondabi. ⁵Adshumbimbi puduedenquo icquin shëcuë anshuebudshun anispondac. Adshun isquien dashcute dataniaiduidtsëqui uec. ⁶Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash. ⁷Në dataniaid uenubi uidtsëc dashcutempi bëpucaid bëdamboen shëbunaid uiondash. ⁸Aid puduedsho istanec tsyuec puduedshun ëmbitsen isondambi. Adash: —Uincuenac. Nuquin Papan Madombobi nec —quepondabi Petedobëdtsëqui onquec. ⁹—Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquo icboedi adondabi. ¹⁰Aden istanec ëbi ushboconobidi chiec choapondabi.

Esusën Madia Mactada yacnocquid ismiaid

(*Mad 16.9-11*)

¹¹Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien ¹²Nuquin Papan abi yacnoshon uaido mayan bëda daëd ushumbo icquid dasiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash. ¹³Adshumbic aidën: —¿Atotsi quiash sedenque, champi? —caquien: —Con Icbo pado ¿midambo buanac? Istiadquo iquebi. ¿Mitsimbo buampashba? Unësquio iquec —quetanec ¹⁴aucbidi nidnuec bidiadshun isquien Esusquio icpec. Utsi dansho ¹⁵Esusëntsen: —¿Atotsi quiash sedenque, champi? ¿Tsutsi nibëne? —caquien Madian tied neshcaquid danquin: —¿Con Icbo padoda buano? ¿Mitsimbo buano? Ëbi isme. Shëcuë utsin chococanun buanu —capac caondash Madian Esusquiobi chuiquimbi.

¹⁶Abi adoshobien Esusën: —Ëbi nebi, Madia —cac bëisquotanequien: —Esus nec. Ëbi chuiquidquo nec —quetanquin con onqueten cuënquin: —Dabi —capac caondash. Adotanquimbien Esus dayumbudpac caondash unësquio icsho. ¹⁷Aden abi dayumbudshobien Esusën: —Ëbi dayunenda. Padpidec nidenquo icte danquin ëbi dayunenda. Ëmbi chuibocpadec con Pa yacno nidabi yuec-yuecpactsec tabadtanec nidebique. Ëbëd icboedo ëmbi con utsibo caboedo ëmbi chuiboedquo chuitan. “Nuquin Papa yacno nidendabi, quiosh,” catan —quepac caondash Esus. ¹⁸Adoaquien ëbi chiec Madia chopondash. —Nuquin Icbo Esus isombi. Uincuenac-

cosh. Ambi chuiboed chuinu. Tantia —quequin Esusën abi chiaidquio chuituidpondashi Madian Mactada yacnocquidën.

Uincuenshun Esusën abëd icquido ismiaid

(*Mat 28.16-20; Mad 16.14-18; Duc 24.36-49*)

¹⁹ Madian aden chuituidboed inchëshbudtsëqui shubun tabadpondabi Esusbëd icboedobëdi. Esus chieshënquido dacuëdënquin umanucueësh utsi puduedtiapimbo icnuc bëdamboen bëtashash tabadnubien shëcuënuësh puduedenquio icboedi nuntanquibi Esus isadcuempondash. Adtanequien: —Dacuëdenda —quepondash. ²⁰ Adtanquin abi bëchun shuin mëtoccaïd abi podo ansiaïdbëdta ismiaquini cuis-honquiampondac: —Nuquin Icho uincuenac —quiash. ²¹ Adec cuishonquesho isashien ambi chuibocpadecbidi: —Dacuëdenda —quetanec: —Tantia. Mibi chuinu. Con Pan: “Mates chiec nid,” ëbi caondacpadomboebidi: “Ëbi chuibeneta,” mibi caimbi —quepondash Esus. ²² Adtanquin ëbi chedo dabushcabampondash. Dabushcabanashic: —Nuquin Papan Mayan mibëd tabadendac. ²³ Mibëd icquin Nuquin Papan tantiaidquio tantiamequin Nuquin Papan Mayanën mibi utsibo chuibamendac. Adoac mimbi aden chuibanaido caic: “Nuquin Papan chiaïd niaquec icsambo icboedi Esus tantiaquid yansho Nuquin Papan nëïd bëdamboen isec,” quequin mimbi chiacpadomboen Nuquin Papan bëdamboen istsiash. Utsien: “Nuquin Papan chiaïd niaquec icsauidequi icsho nëïd Nuquin Papan bëdamboen istiapimbo iquec,” quequin mimbi chiacpadomboebidi Nuquin Papan bëdamboen istiapimbo ictsiash —quepondash Esus ëbi chedo chiec. Adtanequi isadenquio yanoaondash.

Esusën Tomas ismiaid

²⁴ Adec Esus isadenquio yanoanubien Esusbëd icboed utsi Tomas abi ushëmbi anin daëd tishaid chopondash. ²⁵ Choshobi: —Esus isombi —cac: —¿Aidquibida nepash? Utsien nechitash. Bëchun shuin mëtoccaïd shëcuë isun aid shëcuë mëdanten bëmishquinc podo ansiaïd bëmishquinc caquioshombimbi: “Ai, nuquin Icho uincuenac,” quequin tantiatsiac. Padambobi: “Con Icbobien niash,” quetiapimbo iquebi —quepondash Tomas. ²⁶ Tomas adbon 7tedec ushash shubu nuntambidi tabadoaondabi. Tomas chedobëdi tabadondabi. Puduedtiapimbo icnuc padpiden bëtashoash tabadnubien shëcuë shëcniabi Esus isadcuenoaondash. Adashic: —Dacuëdenda —queoapondash. ²⁷ Adtanequien: —Is con mëdante, Tomas. Shëcuë bëmishec cho. Në podo ansiaïd iqueque. Aïdtsen bëmishec cho. Adshun: “Uincuenabien icchitash,” queboedëmbi: “Uincuenaccosh,” quequin tantiata —caquien ²⁸ mishenquio yec badedi: —Tso. Con Icbombo ma mibi neyoc. Nuquin Papapadquidquibidi ma mibi neyoc —quepondash Tomas. ²⁹ Adsho tantiashien Esus: —Ëbi isun: “Nuquin Papapadquidquibidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquibidien nec,” quequin ëbi tantiasho Nuquin Papan bëdambo icmendac —quepondash Esus Tomas chiec. Adtanec isadenquio yanoaondash.

³⁰ Comapenen tantiaquidquio yec abembi uincuenash Esus adpondash. Ënden unësabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. ³¹ Padi, aïdtedi chiombi. —“Nuquin Papan chomiaïdquio yec Nuquin Papan Madombobien Esus nec,” quequin

aid tantiash ma Nuquin Papa yacno abëd tabadtequido icpanu —quequin aitedi dada uaombi.

Chian cuëmanuësh Esus isadoaid

21 Tantia. —Edusaden yacnuësh isadboshic chian Tibedias caid cuëmanuësh-
sen Esus isadpondash —quequin mibi chuinu. ²Esus uincuenash daëdec
isadan con nidaid Cadidia caid yacno nidanepondabi. Nidaniash nëidtedi tabad-
pondabi. Nëidic Petedo. Nëidic Tomas anin abi ushëmbi daëd tishaid ëmbi caboed.
Nëidic Cana yacnocquid Natanaid. Nëidic ëbëdta tishaidquio. Nëidic ëbi. Nëidic
Esusbëd icboed utsi daëd. Aitedi icpondabi. ³Adnubien Petedo: —Ëmbi bedtenec-
paden nëshaidën nuëcquid bedtanu —quepondash. Adshobimbi: —Nid. Nuquitedi
nanu —capondac. Adash chian yacno nidash cano antabëdtoanec nënantan nid-
pondabi. Adshun nëshaid dapa nëneshun yuecshun cadoshon isac nibëdec. Ad-
shumbic padpiden nëneoashun cadoshon isac nibëdoaic. Inchëshbudtsëc tauash
nuëcquid bedambobi ambi badiadpondabi.

⁴Badiadquionobi acte cuëman masi dapan Esus nidsho istuidpondambi. Utsiembi
dampondac. ⁵Adshobini Esusën cuëmpondash. —Con utsibo ¿tedtsi bedo? —cac:
—Padambo. Nibëdosh —capondambi. ⁶Adsho tantiashun: —Mimbi nëniauc nënen-
quio icquin cano utsiuc nëshaid nëne. Adoac nuëcquid bedadec —cac ambi chiauc
nëshaid nënetanquin: —Indono —cac nëshaid indotiapimbo yuëmboshë icpondash.
Nuëcquid dadpen bedac.

⁷Adsho isumbimbi: —Ma Esus neyoc, Petedo. Nuquin Icbo nec —capondac.
Adoquien aton tsitsumi icquiduidtsëqui icnuc abi dachiquidboed aton dashcute utsi
dasiuidtanec acte nëpudunash Petedo tan-tanidec nidpondash Esus isnuec. ⁸Ëbien
utsibobëd canombi tsyuec nidondac nëshaid shoyombanec. Cuëma anoentsëqui
nuëcquid bedash 100 metedos cactiontsëc nidondabi. ⁹Tsyuec choash pudundoshon
isquien pambëdi nuëcquid cuëten shëadtsec. ¹⁰Adnubien Esusën: —Mimbi bed-
boed daëdpectsëc beccho. Penu —cac ¹¹Petedo: —Ai, bedtanu —quianec nidash
cano anidtoashon nëshaid cubu-cubuctsëcquio icquid indopondash. Acte cuëmano
tsindoshon isac dadpenquioshë 153tedi nuëcquid icpondash. Nua-nuaic tsadquido
icpondash. Nëshaid tësëdtiadtsëcquio icnuc indondambi.

¹²⁻¹³Adshumbic ambi: —Pec cho —cac cho-choash tabadsho pamba meneban-
tanquin nuëcquidtsen Esusën menebampondashi. Adoac: —¿Tsutsi ne? —quenquio
icquin: —Esus nec. Comapenen tantiaquin nuëcquid nuqui bedmiosh —quequin tan-
tiondambi ëbitedishun. ¹⁴Adec uincuenash shubu nuntan tabadnuc daëdec isadon-
dashic chian cuëmanuështsen isadoapondash Esus.

Esusën Petedo chiaid

¹⁵Aden chian dapa cuëmashun Esusbëdtan piondambi. Adshumbic Onas caidën
mado Petedo Esusën chuipondash. —Tantia. Mibi chuinu, Petedo. Nëidon ëbi bëdi-
actsëc tantianuc ¿ada ëbi tantiaquie? —caquien: —Ai, mibi tantiembi. Aden ëmbi
tantiaid mimbi tantiec —quepondash Petedo. Adsho tantiash: —Ëbi tantiaquin con
obecabimboecquido ëbi dayun uashunta —quepondash Esus. —Obeca icbon aton
yua dayun uacimboen ëbi tantiaquido ëbi dayun uashunquin ëmbi chiaidbëdta
ëmbi naidtedi chuibanta —quequin tantiec adpondash. ¹⁶Adshumbic padpiden:
—¿Ada ëbi tantiaquie, Petedo? —cac: —Ai, mambi mibi tantieyoc —quesho tan-

tiashien padpidec: —Ëbi tantiaquin con obecabimboecquido ëbi dayun uashunta —queoapondash Esus. ¹⁷ Aden daëden chuishumbic padpiden Esusën: —¿Ada ëbi tantiaquie, Petedo? —cac shubiantiadtsëcquio yanondash Petedo. —Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusën chiebi —quiash shubiantiadtsëcquio yanondash. Adashic: —Mibi con Icbo nec. Ma mimbi abitedimbo tantieyoc. “Petedon ëbi tantiaquie,” quequin ma mimbi tantieyoc —quepondash Petedo. Adsho tantias Esus padpidec: —Ëbi tantiaquin con obecabimboecquido ëbi dayun uashunta —queoapondash Esus.

¹⁸ Adashic Petedobidi chuiocic: —Tantia. Utsien chuinu. Cania yec mibibi tsi-siuidondac. Adanec mibi bunacno mibi niddedniondac. Tsusiobudtsacshoen tsi-umeshun utsibon ëquë mëdimbudcuentsëcshun mibi nidte bunacmanombo mibi buanendac —quepondash Esus. ¹⁹—Aden mimbitsen Nuquin Papan chiacpadom-boenuidi nabansho ëbi chieshënquidon mibi unës uaindac —quequin tantiec adpondash Esus. Adashic: —Ënenquio icquin ëbi tantiata —quetanquimbic: —Cho. Nidnu —cac ëbitedi puduanec nidondabi.

²⁰ Tsyuec nidshobini Petedon bidiadquin ispondash. Adshumbic: —Nëid Esusën tantiaidquio nec. Esus bedmiaid inchëshën Esus aton cachoctsëqui uesho aidën: “¿Tsutsi cao, Icbo?” capondash. ²¹ ¿Mitsipadec aid unëspatsiash? —qeshun: —Ma nëid. ¿Mitsipadec unëspec? —capondash Petedon ëbi unëste Esus chuimequin. ²² Adoquien Esus: —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadec unësenquio ictsiash. Adecbidi: “Ëbi choabi icnuc ma unëspanu,” ëbi quiacpadec unëstsiash. “Nadec unësendac,” quequin mibi chienquio iquembique. Ënenquio icquin ëbi tantiata —quepondash Esus. ²³ Adec: —Unësenquio ictsiash —Esus qesho tantias ëbi caic: —Esusën tantiaidquio yec Uan unësenquio iquendac —quecuededpondash Esus tantiaquido. ¿Adenda Esusën chuidiondash? Ma padenquio iccondac. —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadequien unësenquio ictsiash. “Adecbidi ëbi choabi icnuc ma unësnu,” ëbi quiacpadec unëstsiash —quequien iccondash.

²⁴ Aden Esusën nabanondaaid ënquin chiombi. Ëmbi isondaaidquio chuiquin abimbo chuiquin aidtedi dada uaombi. ²⁵ Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada uaquin dada uate dadpenquioshë naimbudnetsiambi. Padi. Aidtedi dada uaombi.

ESUS CHUIBENEQUIDON NAID

Esus aton Papan abuc indote

1¹⁻² Ducas nebi. Mibi Esus tantiamenu, quequin ënden dada uaondambi, Tey-opido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi. ³ Cuesten dectanac unësash uincueneshun: “Uincuenobique. Is,” quequin Esusën utsi-utsien ismebampanëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. ⁴ Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. ⁵ Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

⁶ Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantikanu. Chui —capanëdash Esus chuiquin. ⁷ Adoquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. ⁸ Aden chuishumbic: —Aton Mayan Nuquin Papan meniac aidënquio tantiamequin pausunac ëbi chuibenequidquio mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

⁹ Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

¹⁰ Adec Esusbëd chobedo isec tabadnubien dashcute ushumbocquid dasiuidquid daëd choash tabadec: ¹¹ —Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

Matias Esus chuibeneta quequin iccuededquidon chiaid

¹² Aden Esus abuc indosho isash abëd macuësh Odibos caid yacno chobedo Edusaden caid yacno nidoapanëdash. Chonoadtemaid ushë nec, quec aidtionsëqui capunëdash. Aido Edusaden yacno choash abuc quënë yacno abi tabadbocono dectoash tabadoapanëdash. ¹³ Aid quënë nuntan Esusën ëbi chuibeneta caido nëdted icpanëdash: nëdic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembe namequin chuiquid bunesa, Simon cuëmëdquid,

utsibic Acobo utsin mado Udas cuëmédquid. Aidedi Esusën ëbi chuibeneta caido aid quënë nuntan tabadnubi ¹⁴ utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc on-quiabimboec onquecuededpanëdash.

¹⁵ Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuipanëdash: ¹⁶⁻¹⁷ —Udas pado chuibanu. Tantiata. Esusbëd icquin piucquid dayun uaquid icquimbi Esus chieshë- quido Udasën Esus bedmepondash. ¹⁸ Aden Esus bedmeshun ambi piucquid bedboed menequin aton tiedëmpi bedashic aid tied nantanuësh têtaniadash pobidisquias paëdec aton pucu tishidpac caondash. ¹⁹ Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuëmb- edpondash. ²⁰ Adembidi ëndenquimboshë Udas pado tishabincuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu mosadpanuna ma aibidi aton matses nibëdquid shubu icpanuna.”

Aden Udas pado cuidte chuiquin cuëdënte Sadmo caid utsitsen naden Dabid Padon dada uaoapampic:

“Aidën icsain nacpaden tanenquiocquin ma utsin bëdamboen napanuna,” quequin Dabid padon dada uapampic —quepanëdash Petedo. ²¹ Aden chiashic abi onquec: —Udas pado nibëdnuc Esus chuibeneta quequin abentsëc nuquidtedishun chuinuna. Nëid quënë nuntan nuquibëd capuquido dada dadpen iquec. Nuqui Esus chuibeneta caid nadquid ictiad. Chuinu. Tantia. ²² Esus Uan padon acten mentosho isash niamëdenquio yec Esusbëd capucueneshun Esus indosho isquidquo icsho, Esus chuibeneta, quequin nuqui chuitiad. Adoac Esusën ëbi chuibeneta caidobëdtan Esus uincuemaid chuibantiad —quepanëdash Petedo iccuededquido chiec.

²³ Aden Petedon chuibanac daëd istuidash Petedobëd iccuededquido, Petedon chuibocpadquid nëid daëd iquec, quequin chuipanëdash aidon. Ambi istuidaid abentsëc Ose cashun Badsabas cashumbic Ustus, quequin cuënaid nepanëdash. Utsibic, Matias cuëmédquid icpanëdash. Nëid daëd Petedon chuibocpadquid nec, qesho tantiasun: —Nënantanquio tabadec cho —cac abi daëdi choash tabadsho isash ²⁴ Nuquin Papa chiec nadec iccuededquido onquepanëdash: —Nënantanquio chomeboed nëid daëd iqueque. Is, Papa. ¿Mitsicquidimbi Esus chuibeneta, cape? Èbitedi tantiamë, Papa. ²⁵ Udas pado tauitdiadpambo chian anëdënquiacno nidboedën nauidaid namenu, quequin mimbi bëdamboen isaid abentsëc ëbi isme. Papa. Aden mimbi ismiac ma aidëntsen Esus chuibenepanuna —quepanëdash Nuquin Papa chiec. ²⁶ Aden chuitanquimbic aid daëd abi cuëmédquid abentse-abentsen dada uatempin dada uashumbic tëchun sandoshon cadotaniac dada uatempi abia puduenaid istanquin, Matias cuëmédquid nec, quequin isbededboshic, Esusën ëbi chuibeneta caido onseted icboedi nëbi Matiasbëd doseted yanosh, quequin chuibed- edpanëdash nuntan iccuededquidtedishumbi.

Aton Mayan Esus tantiaquidtedi menebanaid

2 Adashic isadaidbon ambi aton tiedën caniquid abia ëshëaid bedaid tantiaid ushë chotsëcnubi Esus tantiaquidtedi shubunuëshic iccuededoapanëdash. ² Ambo iccuededquimbi badedquido shubu nuntan cunquequid dapa choec natiambo cun-

quiacbimboecsho abitedishun isbededpanēdash. ³ Aden aid isbedednubi cuēte dēt-sisidacimboecquid budec mais-maisec Nuquin Papan Mayan matsadtocuededpanēdash abi isquidtedi. ⁴ Nuquin Papan ma aidobēd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanēdash ambi matsadtomiaidotedi.

⁵ Aden Nuquin Papan aton Mayan menenubien isadaidbo utsibo Edusaden yacno cho-choash dadpen tabadpanēdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoēsh Edusaden yacno cho-choapanēdash. ⁶ Ambo cho-choash tabadnubi Nuquin Papan aton Mayan meniaidmeniaidquieci nēmbobi choquidon onqueten-onquetenquieci onquesho tantiash nēbi cho-choboedo utsi-utsiec: ⁷ —¡Padtec! Dacuēdanquiopaic. Ēbipadquiecsienda onquepec. ¿Onquequidotedi nidaid Cadidia yacocquidoda nepec? ⁸ ¿Mitsipaden con onquete bedash onquecuededpec nec? ⁹ Ēbitedi nidaid utsi-utsiec yacnoēsh cho-choquido nebi. Padtia yacnoēsh choquido; utsibic, Media yacnoēsh choquido; utsibic, Edan yacnoēsh choquido; utsibic, Mesopotamia yacnoēsh choquido; utsibic, Udeya yacnoēsh choquido; utsibic, Capadosia yacnoēsh choquido; utsibic, Ponto yacnoēsh choquido; utsibic, Asia yacnoēsh choquido; ¹⁰⁻¹¹ utsibic, Pidiquia yacnoēsh choquido; utsibic, Pampidia yacnoēsh choquido; utsibic, Equipito yacnoēsh choquido; utsibic, Dibia Sidene uidictsēcuēsh choquido; utsibic, shubu dadpen icquid Doma caid yacnoēsh choquido; utsibic, acte nēnantan nidaid nacrēdquid Quideta caid yacnoēsh choquido; utsibic, Adabia caid yacnoēsh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo ēbitedi nebi. Ēbibimboec onquequidtedishun Nuquin Papan naid chuibanasho tantiembi. ¹² ¿Mitsipaden tantiaquin oncamiaquien adec onquepec? —quepanēdash Edusaden yacno cho-choquid.

¹³ Adnubien: —¿Bēdamboec onquepequida onquec? Paēmbocquid cubudquin acshun tantienquiocquido nepanui —queoapanēdash utsibo.

Iccuededquido Petedon chuibanaid

¹⁴ Adec onquesho tantiashun Esusēn ēbi chuibeneta caido cho-choquin Petedon nidtoshon tantiamenu quequin naden cho-choboedo comapenec onquequin chuipanēdash: —Mimbi icsamboen tantiaid chiembique. Tantiata. ¹⁵ Ushē abuctotsēcnubi ēbitedishun paēmbocquid acamboccombi. ¹⁶ Utsin-utsinqueci onqueten onquesho mimbi tantiaid Nuquin Papan ēndenquimboshē chiampicpadec onquec nebi. Tsusedpa Oedēmbi Nuquin Papan ma matsesbēd tabadnueshun aton Mayan menenun chiaid naden aidēn dada uampic:

¹⁷ ‘Nēid nidaid naimbudnubi

Con Mayan matses utsi-utsien menendambi.

Aidon madobobēdtan aidon champibontsen ēmbi yuecquio icshun nanun chiaid chuibanendac.

Adembidi caniabontsen ushquin ēmbi chiapaden isendac.

Adembidi tsusiobontsen ushquin ēmbi chiapaden isendac.

¹⁸ Aden con Mayan meniac ambi tantiacpadomboembidi ēmbi chuiquin namiaidon dadan chidobēdtan

ēmbi yuecquio icshun nanun chiaidquiobidi chuibanoaindac.

¹⁹ Adembidi, con Mayanën tantiamiac ëmbi yuecquio icshun nanun chiaid matsesën chuibanubien abucuësh uinsadpamboctequid icnubi nidaidënsun ismete intacimboectequidbëdtabi nëdënquetequid cuëte pushudquidbimboectequid abembi pushudquidbëdta adquidtedi mibi ismendambi.

²⁰ Adquid icnuc badiadën ushë chënquenquiocnoc inchëshacimboectequid inchëshën ushë piu-piupambo yec intacimboecsho mimbi isbededendac.

Ëmbi ismiaidtedi icambi matses cuidte ushë choendac.

²¹ Ismequimbi con Icbombo nec ëbi caquidquo mënchiquendambi,' quequin Nuquin Papan chuimiapaden Oedën dada uapampic.

²² "Adembidi Nuquin Papan chomiaid chiembique. Tantiata, isadaidbo. Nasaded caid yacnoësh choquid, Esus, Nuquin Papan chomiaid icquin nadatiambocquin nabanquin ismebansho mimbi isondac. ²³ Aidi Nuquin Papan tantiampicpaden Esus bedshun mimbi isadaidpembo chuiquid menequin, Unës uata, cac cuesten dectanquin Esus unës uapanëdash. ²⁴ Aden mimbi nac unësacsho icsaisa chococacno yuec ictiapimbo iquec, qeshun Nuquin Papan Esus uincuemepanëdash. ²⁵ Adembidi ëndenquimboshë tsusedpa Dabid padon Esus chuibanquin naden dada uapampic: 'Con Icbo abuc nidec bëyucanquid ëbëd tsadacimboecsho isec nebi.

Aidi con dayun tsadquid icsho isquin natiaic cametequid dacuëdënenquio iquendambi.

²⁶⁻²⁷ Aid unësash uincuenta tantiec ëbitsen uincuenendabi, Papa, quec cuëdë nec bëdambo iquebi.

²⁸ Nuquin Papa yacno tabadacpadec nidaidën tabadquin ismiac mibi yacno nidash mibëdi tabadec bëdamboshë iquebi mimbi camiaid iquendabi,' quequin Esus tantiaquin Dabid padon dada uapampic.

²⁹ "Adomboen tantiaquin dada uash Dabid unësacsho chococapampid nëbi shëcuë iquec. ³⁰ Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshë yash mibi ëndenquimbo unësampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. ³¹ Aden Nuquin Papan nanun chiaid tantiaquin Esus uincuenta isacimboen dada uaqin, Nuquin Papan Chomiaid unësacsho chococaqui aton nami chodquenquio yec uincuenendac, quequin chuipampic Dabid padon. ³² Ai, Dabid padon chiampicpadembi Nuquin Papan Esus uincuemepanëdash. Aid uincuemiasho isondaid icquin mibitedi chuibanec nebi. ³³ Aid uincuenash Nuquin Papan dayunquio tabadendac nëbi. Ambo choacsho matses tantiaquin Nuquin Mayan ma aibdëd tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquec onquesho nëbi mibitedishun tantiec. ³⁴ Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic:

'Nuquin Papa Icbo Dapa icquin abipadquid icbo cain: Nëbi ëbëdi tsadec cho.

³⁵ Mibi chieshëncuido dëniacquidquo mibi icmenun nabono. Chiata,' quequin Nuquin Papan nanun chiaid Dabid padon dada uapampic.

³⁶ "Aden tantiaquin Dabid padon chuipampid Esus mimbi cuesten dectanquin unës uaid uincuemequin matses icsaid bedshunash abided cuidadquid Nuquin Pa-

pan icmepondash. Adoac ěmbi chiaid abimbo iqueque. Esus tantiaquidquo icta, isadaidbo —quepanědash Petedo.

³⁷ Aden Petedon chuisho tantiaash iccuededquido abi icsaid tantiec uněsquo yec: —Esus tantianuequin ĵatotsi nuqui nape? —quepanědash utsi-utsiec Petedoběda Esusěn ěbi chuibeneta caid utsibo chiec.

³⁸ Adoquien Petedo: —Mibi icsaid ěnshun, Esus con Icbombo nec, quequin abimbo tantiaquin acten mentometa ma ěbi icsaid Nuquin Papa běpiscudnu queshun. Adoacsho aton Mayan mibi menendac. ³⁹ Adembidi tantiaasho isun min tsyuecquidtsen menendac. Adembidi nidaidtedi yacnocquiděn tantiaasho isun aton Mayan meneoaindac ambi chiampicpaden —quepanědash Petedo Esus isquidquo.

⁴⁰ Aden chuibanequi: —Mimbi icsamboen tantiaid ěnta. Aden ěnash Esus tantiaquidquo icta —quequin chuibudquin Petedon ěmpanědash.

⁴¹ Aden chuisho tantiaash, Tantaquiemi, quepanědash utsi-utiec. Aid ushěmbi dadpenquioshě tedes midted Esus tantiaquid yampanědash. Adquid icsho isun acten mentobampanědash.

Esus tantiaquido iccuededaid

⁴² Adashic, Esus tantiemi, queboedo tantiabenabi iquec Esusěn ěbi chuibeneta caidon Esus chuibansho tantiec tabadequi Nuquin Papa chiec onquedenepanědash.

⁴³ Adec tabadcuededsho isash: —ĵPadtembo! Dacuědampambo iquec —quec utsibo tabadpanědash. Adnubien Esusěn ěbi chuibeneta caidon nadatiambocquin nabampanědash. ⁴⁴ Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpanědash. ⁴⁵ Aton na menequin piucquid bedshun utsin na nibědsho isun menepanědash. ⁴⁶ Adecbidi badiadquiděn badiadquiděnquiec Nuquin Papa tabadte shubu uashunaid yacno nidash iccuededpanědash. Adecbidi shubu utsi-utsiec yacno nidash iccuededquin Esus uněsaid tantiaquin paněmpi cuěsh-cuěshun peded-pededpanědash. Adembidi bundoshon pebedoapanědash. Adobanequi ěbi icsaid bedshunash Esus cuidadaid tantiec bědambo iquebi, quec ⁴⁷ Nuquin Papan naid chiec cuěděncuededpanědash. Adec tabadsho isash, Bědambocquido nec, quec utsibotsen Esus tantiaquid yanash abi tantiaquid utsitediběd iccuededpanědash.

Caputiapimbo icquid bědamiaid

3 Adnubien abi nidteniactaděn ushě budec 3 yanuc Petedo Uamběd Nuquin Papa tabadte shubu uashunaid yacno Nuquin Papa chiec nidpanědash. ² Ambo nidnubien caputiapimbocquid aid shubu shěcuě Bědaidquo caid yacno utsibon buampanědash. Anin tishacchobi yec caputiapimbocquid icpanědash. Aidi badiadquiděn badiadquiděnquien buandenequin aid shěcuě cuěmano nanded-nandedac uequimbi cho-chosho isun: —ĵAdabi piucquid menetsia? —cabampanědash. ³ Ambo Petedoběd Uan chosho isquin: —ĵAdabi piucquid menetsia? —capanědash caputiapimbocquiděn uequin.

⁴ Adoquien Uamběd nidtuidash nidquin Petedon: —Ěbi daědi is —capanědash caputiapimbocquid běisquin. ⁵ Adoquien, Ěbi menepashun, quequin abi daědi isobien, ⁶ Petedon: —Piucquid con na nibědec. Ěmbi tantiaiděn ěbi tantiamebocpaden naimbique. Nasaded yacno iccondaiděn Esusěn bědamiactadec bědanash nidtoash nidec nid —capanědash. ⁷ Aden chuiquin caputiapimbocquiděn mědante

abiucquoio bedtanquin Petedon nidtomiac badedquoio nidtopanēdash caputiapimbochoedi. ⁸Bēdambo yec nidtoash capupanēdash. Adec bēdanash Petedobēd Uan chedobēd capuashic Nuquin Papa tabadte shubu uashunaidēn puduedash, Nuquin Papan bēdamioshi, quec pudundotan-pudundotanec: —Cuishon —quepanēdash. ⁹Adec capusho isquidon nadobededpanēdash: ¹⁰—Nuquin Papa tabadte shubu uashunaid shēcuē, Bēdaidquoio caid yacno uetsequi, Piucquid ēbi menepashun, queboedi capueque. En is. ¡Adpaidie. Is! Tantiadempamboctequid nec —quequin isbededpanēdash.

¹¹Adec capuequi Petedobēdta Uan mēdinec Sadomonēn tacpan quēnē uabicquid yacno puduednubien iccuededquid tsibanash anotsen tantiadempambo yec tabadoapanēdash. ¹²Adec tabadsho isun Petedon naden chuibampanēdash: —¿Atotsi quiaish padtec quequin ēbi daēdi comapenen bēise? ¿Ēbi daēdshun nacta nēid capupadic? ¿Ēbi bēdamboquid icquindambi nadio? Padenquoio. Nuquin tsusedpabon Papa caidēn bēdamiaid nec. ¹³Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidēmbi ambi nidaidēn chomiaid Esus nēbi aton Papabēd tabadoaic. Aton Papa yacno nidoabicsho Esus bedshun Pidato meniaquien, Nēid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unēs uaquimbien ictiad, quequin mibitedishun chuipondac. ¹⁴Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. ¹⁵Abia uincuentequid mibi chuiquid dapa mimbi unēs uacshobien Nuquin Papan aidi uincuempondash. Aid uincuenacsho ēbitedishun isondambi. ¹⁶Esusēn ēbi bēdamepec, quequin tantiash nēid taē icsacboedēn Esus tantiash capusho mibitedishun isec.

¹⁷“Utsibo, Nuquin Papan chomiaid nec, quequin tantienquiocquin mibi chuiquidobēdtan mimbi Esus unēs uamiondac. ¹⁸Ēmbi matses chuiquid dapa icmenu caid matsesēn mēyanaid iquendac, quequin ambi chuimiaidtedi Nuquin Papan dada uamiampicpaden mimbi naondac. ¹⁹Nēbi mimbi icsamboen tantiaid ēnquin Nuquin Papa tantiata ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna; ²⁰adecbidi ma ambi chuiquid dapa icmiaid Esus mibi bedmenuen chomepanuna. ²¹Nuquin Papan abitedi icsaisa icmete ushē choabicnuc ambi chiampicpadequi nēbi Esus abuc aton Papabēd tabadec. ²²Adembidi chuiquin Moisesēn dada uampid nad iqueque. Tantiata:

‘Chuiquid Dapa ēbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bēdamboen nabanta.

²³Ambi chiaid tantiesa Nuquin Papan nēsecaindac,’ quequin Moisesēn dada uampic.

²⁴“Adomboembidi Samuedēn chuibampampic. Adomboembidi Nuquin Papan chuimiaid utsibon chuibanoampic. ²⁵Nuquin Papan chuimiaidon tsyuecquido mibitedi nec. Tsusedpa Abadauanēn tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuioaid mibitedi nec. Naden Abadauan Nuquin Papan chuipampic:

‘Mibi ēdenquimbo unēsampin aton matsesbēdta matses utsi-utsien min tsyuecquidēn bēdambo icmendac.’ ²⁶Nuquin Papan Abadauan chiampicpadece aton tsyuecquid choacsho mimbi unēs uapondac. Aidi Nuquin Papan uincuemiac ma isadaidbomba abi icsaid ēnsho ma ambi bēdambo icmiaid icpanuna — quepanēdash Petedobēd Uan.

Ambi naid Petedobēdta Uan isadaidbo tsusiobon chuibamiaid

4 Aden Petedobēdta Uanēn chuibanubien isadaidbo tsusiobo cho-chopanēdash. ¹Utsi-utsiec Nuquin Papa tabadte shubu uashunaid yacno cho-choquid bēdamboen tabadmequidquio icnubi utsi-utsiec saduseyobo icpanēdash. ²Esus unēs uacsho Nuquin Papan uincuemiacpadembi matsesetsen unēsacsho uincuemioaindac, quequin Esus chuibenequidon chuibanubi chopanēdash aidō. ³Choshon Petedo Uambēdta bedash: —Inchēsheque. Badiadshun nēidēn chiaid tantianush nidnu. Nid —quianec puđuanquimbi Petedobēdta Uan quēnēn naudempanēdash isadaidbo tsusiobon. ⁴Aid daēdi bedabicnuc Petedobēdta Uanēn chuibansho tantiaquido Esus tantiaquid dada dadpen sinco midted yampanēdash.

⁵Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoēsh iccuededpanēdash. ⁶Nēidtedi icpanēdash: ancanquid dapa daēd Anasbēdi Caipas icpanēdash. Nēidic aton shubun icquido abipadquido: nēidic Uan, utsibic Adecandedo, aidtedi cho-choash iccuededpanēdash. ⁷Iccuededshumbic Petedobēdta Uan bēmeshun nēnantanquio nidtomesun: —¿Tsutsi chuiquin caputiapimboquid bēdamio? —capanēdash tsusiobon.

⁸Adoaquien Petedo Nuquin Papan Mayanēn comapenen tantiamiac nadpanēdash: ⁹—Caputiapimboquid tantiaquin bēdamiaid isec ¿mitsipaden nao, quecta mibitedi tabadpe? Ancanquidbēdtabi chuiquid utsibo isadaidbo utsibo mibitedi chiembique. Tantiata. ¹⁰Caputiapimboquid Esuquidistu Nasaded yacno iccondaidēn bēdami-aid niosh. Mimbi unēs uacsho Nuquin Papan uincuemiaidēn nac nēid caputiapimbochoedi nēbi nidtoash capusho mimbi isec. ¹¹Aid bēdamequid mimbi tantienquio yaid Nuquin Papa yacno yuedanquidquio nec. ¹²Nuquin Papa yacno yuedanquid utsi nibēdec. Nuquin Papa yacno tabadte bunec aid tantiaquid icta —quepanēdash Petedobēd Uan.

¹³Adec Petedobēd Uan dacuēdenquio yec comapenec onquesho tantias tsusiobo: —Aid daēdi tsusiopenquio iquequi adecbidi Nuquin Papan chiampid tantiabenicquid iquequi Esusbēd icquid aid daēd icquin ¿mitsipadomboen caputiapimboquid bēdamepashba? —quec tantiadempambo yec tsusiobo tabadpanēdash. ¹⁴Aden ambi bēdameboed aidbēdi icsho isash, Icsamboen mimbi naoc, quetiapimbo tsusiobo tabadpanēdash. ¹⁵Adshun Petedo Uambēdta nidmiash, Tantiānu, quec onquecuededec tsusiobo: ¹⁶—¿Mitsipadomboen aid daēd nuqui napeba? Natiambocquin nasho Edusaden yacnocquidtedishun isbededposh. Ad icnuc, Caputiapimboquid bēdanambo iquec, ēbitedi quetiapimbo iquebi. ¹⁷Dadpenshun tantianushe queshun, Esus padpiden chuibanoainda, quequin aid daēdi chuina —quecuededpanēdash tsusiobo. ¹⁸Adshun Petedobēdta Uan chomeoashun: —Padpiden Esus chuibanoainda. Aidēn chiaid chuiquin tantiamenda —capanēdash tsusiobon.

¹⁹Adoaquien: —¿Mitsicquidēn chiaid ėmbi natequid icpec? ¿Nuquin Papan chiaid niacquindambi mimbi chiacpaden nadi? ²⁰Nuqui isboed nuqui tantiaboedbidi chuitequidquio iquendac —quepanēdash Petedo.

²¹⁻²²Adoaquien: —Ėmbi chiacpaden nainquiocsho isun mibi daēdi mēyantsiambique. Baded nid cueschitomane —capanēdash tsusiobon. Abi tishaid seta 40ted icquid caputiapimbocho bēdamepanēdash. Aid Nuquin Papan bēdamic-

sho isash utsibo cuëdëncuededpanëdash. Adsho tantiash Petedobëdta Uan mëyanti-adquiocboedi adotiapimbo yec tabadpanëdash tsusiobo.

Isadaidbo tsusiobon chiaid Esus tantiaquidon chuioaid Nuquin Papa chiaid

²³ Tsusiobon nidmiac nidash iccuededboconombo choash puduedshun tsusiobon chuiboed Petedobëdttan Uanën chuioapanëdash. ²⁴ Adoac abentsëc onquiacbimboen naden Nuquin Papa chuipanëdash: —Con Icbombo mibi nec. Abubëdta nidaid acte chedo uashun aidënquoio icquidtedimbo mimbi uabampampic. ²⁵ Adembidi ëndenquimboshë mimbi tantiapaden min Mayanën tantiamiac mimbi chuimiaid, Dabid padon naden dada uapampic:

“¿Atotsieshumbini ëbi dëniactiapimbo icquidombi isadaidpembo comapenec nëishash ëbi dëniacte buncuededpec? Adquiecbidi ¿Atotsi quiash ëmbi chomiaid icsamboen nanushbimboec isadaidbo onqueuidoapec?”

²⁶ Ancanquidobëd chuiquid utsibo ëmbi chomiaid aton Icbobi mëyanuec iccuededec.”

²⁷ Ai, mimbi Dabid pado dada uamiampicpadembi ënabi Edusaden yacno isadaidpembo ancaquid daëd Edodesbëd Ponsio Pidato icnubi isadaidbo chedo iccuededquin mimbi Chomiaid icsaisa Esus icsa uanuec onqueuededpondash.

²⁸ Mimbi tantiampicpadembi unës uapondash, Papa. ²⁹ Adquidën Petedobëdta Uan chushcasha mimbi tantioc. Cuesambocquid ëbitedi icmequin mimbi chiaid ëbi chuibame, Papa. ³⁰ Icsaisan Esusën bëdamiapaden nadatiambocquin naban, Icho —quepanëdash Esus tantiaquido Nuquin Papa caic.

³¹ Adoac abi iccuededacno ishcutpanëdash. Adec ishcutnuc ambocquid Nuquin Papan Mayanën comapenen pausunac dacuëdenquiocquin Nuquin Papan chiaid chuibampanëdash.

Abentsëc yacbimboec tabadaid

³² Aden chuibanequi abentsëc onquiacbimboec tabadec Esus tantiaquido, Con na nec, quenquoio yec, Nuquin Papan na nec, quec tabadcuenepanëdash. ³³ Adequi tabadcuenequimbi dacuëdenquiocquin, Esuquidistu uincuenacsho isombi, quequin chuibenepanëdash. Adec Esus tantiaquido tabadsho utsibon bëdamboen isbededquin aidën chuibansho bëdamboen tantiapanëdash. ^{34–35} Adembidi nidaid icbo utsin-utsinquien aton nidaid menequin piucquid bedshun Esus chuibenequido menepanëdash. Adembidi, shubu icbo utsin-utsinquien aton shubu menequin piucquid bedshun meneapanëdash. Aden meniac aton na nibëdquid icsho isun Esus chuibenequidon menebanac bunenquoio tabadpanëdash. ³⁶ Adecbidi ambo acte nënantanquoio nidaid nactëdquid shubu uaidëshun Chipide caid yacnoshon tishaid Edusaden yacno choash Ose tabadpanëdash. Aidi, Bëdamboen mimbi naoque. Adobanta, quedenesho Bednabe cuëmpañëdash. ³⁷ Aidëmbi aton nidaid menequin piucquid ambi bedaidtedimbo Esus chuibenequido meneapanëdash.

Ananiasbëd aton chido Sapidamuid

5 Adnubien dada utsi Ananias cuëmëdquid aton chido Sapidabëdttan aton nidaid menequin piucquid bedpanëdash. ² Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meni-acbimboen menepanëdash Ananiasën. ³ Adnubien, Piucquid abitedi meni-acbimboen

Ananiasën mua uaposh, quequin Nuquin Papan Mayanën tantiamiac naden Petedon Ananias chuipanëdash: —Satanasën tantiamiaid icquin ¿mitsipaden tantiaquin Nuquin Papan Mayanën isnubi mua uaquin ëbi menio? ⁴ ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidedi mitsana niosh. ¿Mitsipaden tantiaquin piucquid abitedi meniabcimboen meniano? Aden bëquin abimbo chienquiocquin Nuquin Papambobi mimbi mua uaboc ⁵—Petedo qesho tantianec Ananias unësequi uebudpanëdash. Adsho isash Esus tantiaquidtedi dacuëdpanëdash. ⁶ Unësassho isun dashcute cuëshën dataneshun buanshun caniabon chococatampanëdash.

⁷ Bënë chococambic ushë abuctoan unësboedën chido aton bëñë unësaid tantienquio yec choapanëdash. ⁸ Choasho isumbien: —¿Ada min nidaid menequin nëidtedi piucquid bedo? —Petedo qesho tantiasien:

—Ai, aidedi bedombi —quepanëdash Sapida.

⁹ Adoquien Petedo: —¿Nuquin Papan Mayanën ëbi muasho tantiapec, quequin tantienquiocquinda min bënëbëdtambi min piucquid abitedi meniabcimboen meniano? Nëbi min bënë chococaboedon mibitsen buanendac —Petedo quenubic ¹⁰ Petedon tayumbi uebudec Sapida unëspanëdash. Aidsen unësassho buanshun aton bënëbëdtabi chococatampanëdash. ¹¹ Adoac aid daëdi unësaid tantias Esus tantiesatedi Esus tantiaquidobëd comapenec dacuëdcuededpanëdash.

Bë-bëaidtedi bëdanaid

¹² Adashic Sadomonën tacpan caid yacnoësh Esus tantiaquido iccuedednubi Esus chuibenequidon nadatiambocquin nabampanëdash. ¹³ Adomboen nabansho isash Esus tantiesabo dacuëdec tacpan yacno chotiapimbo yequi: —Esus tantiaquido bëdamboshë iquec —quecuededpanëdash. ¹⁴ Adec tabadequi utsi-utsiec dadpen dadabëdi chido Esus tantiaquido yampanëdash. ¹⁵ Adec Esus tantiaquid yanshun, Daicsaido Petedon bëdamepec, quequin tantiaquin daicsaido bë-bëshun Petedo capuacno nambededpanëdash. ¹⁶ Adembidi dëuequidon Edusaden yacno daicsaid bë-bëñubi mayan icsan mëyanaido bë-bëoapanëdash. Aden bë-bëaidtedi bëdampanëdash.

Esus chuibenequido tsusiobon quënëñ nauedmiaid

¹⁷ Adnubien isadaidbo ancaquidbëd tsusio dapa utsibo saduseyobo caid isec otacquio tabadboedi matses dadpen Esus chuibenequido yacno cho-chosho isash nëishcuededpanëdash. ¹⁸ Adec nëishcuededshun Esus chuibenequido bedmeshun quënëñ nauedmepanëdash. ¹⁹ Aid inchëshëmbi Nuquin Papan uaid mayan bëda choshon quënë shëcuë bëtashaid bécadoquin abitedi puduemec: ²⁰—Mibi puduemimbique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanoata —quepanëdash Nuquin Papan uaid mayan bëda.

²¹ Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanoaic tabadoapanëdash aidedi. Chuibanubien isadaidbo tsusio dapan abëd icquidobëdtambi tsusio utsibotedi cho-chomeshun: —Esus chuibanquido bedtan —cac ²² quënëñ nauedaid puduenushe quequin isquido chuiquid nidshun isquien Esus chuibenequido nibëdec. ²³ Adsho isash choaquin: —Quënë shëcuë bëdamboen bëtashquin quënëñ nauedaid puduenushe quequin

isquido shëcuë cuëmano capusho isombi. Shëcuë bëcadoash puduedshun isaquien ënden puduen-puduenac —quepanëdash quënën nauedaid puduenushe quequin isquido chuiquid. ²⁴ Aden chuisho tantiash isadaidbo tsusiobo: —¿Atodain nechitec? —quepanëdash Nuquin Papa tabadte shubu uashunaid isquido chuiquid chiec. ²⁵ Adnubien dada utsi choshon: —Mimbi quënën nauedboedon Nuquin Papa tabadte shubu uashunaid yacnoshon chuibanoasho tantiombi. ¿Ada tantio? —capanëdash. ²⁶ Adoquien quënën nauedaid puduenushe quequin isquido chuiquid capitan caidën ambi namiaidobëdtan tantiec nidshun bedtanquin bëoapanëdash. Matsesën cuënoten ëbi se-senushe qeshun mëyanenquiocquin Esus chuibenequido bëoapanëdash.

²⁷ Aden bëquin Nuquin Papa tabadte shubu uashunaid nuntan tsusiobo ic-cuededacno yuedpanëdash. Bësho isash tsusio dapambo: ²⁸ —Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimbi tantiamebanoc. Adoquimbic, Esus unës uaid tsusiobon naid nec, quequin mimbi chuibanoc —quepanëdash tsusiobo. ²⁹ Adsho Esus chuibenequido utsibon tantianubi Petedonuidi: —¿Matsesën nata caidodabi nedi? Nuquin Papan nata caid icquin nabanembi. ³⁰ Mimbi cuesten dectanquin unës uaondaaid Esuquidistu Nuquin Papan padpiden uincuemepanëdash. Nuquin Papa caid tsusedpabon Papa caidquio nec. ³¹ Esus uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna. ³² Esuquidistun nabansho isbempondambi. Adembidi abi unësash uincuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiameoaic —quepanëdash Petedo.

³³ Aden Petedon chuisho tantiash tsusiobo: —Icsambo iquec —quiash Esus chuibenequido cuesunete bumpanëdash. ³⁴ Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bëdamboen isaid, Camadied cuëmëdquidën: —Chiata. Bëboedtedi buantan —cac ³⁵ buanambic: —Icsamboen nanushe qeshun bëdamboen tantiaquiota. Aido cuesunete mibi buneque. Cuesunenushe chiata. ³⁶ Ëndenquio utsi Teyudas cuëmëdquid icpondash. Aidi tsusio dapa icnuequin chuisho tantiash dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash. ³⁷ Adashien matses tambanta caid ushëmbi utsi Udas cuëmëdquid Cadidia yacno icnëdaidbëd matses dadpen capupanëdash. Udastsen cuesuniac abëd icnëdaidtedi padpidec choenquio yec adecbidi udimbo nidanepanëdash. ³⁸ Adec umanuc buamboedo chuiquid nibëdanaque. Aidbëd icboedo mishenda. Cuesunemenda. Aidën chuibanaidbëdtabi ambi naid matsesën naiduidtsëqui icnuc badedquio ënëdendac. ³⁹ Aido Nuquin Papan namiac chuisho mimbi ëmetiapimbo iquendac. Nuquin Papa chieshënushe qeshun aido nidmeta.

⁴⁰ Aden Camadiedën chiac: —Adonona —qeshun: —Buamboedo bëoata —cac bëacsho cueshcanten cuesmepanëdash. Aden cuestanquin: —Esus chuibanoainquio yec nidtan —qeshun puduemepanëdash. ⁴¹ Puduemiatic Esus mëyanaid tantiec nidëqui abi chuibanansho mëyanaid yec bëdambo iquebi, quec tabadpanëdash. ⁴² Adshumbic badiadquidën-badiadquidënkien Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus

nec, quequin chuibampanēdash aidon. Shubu utsi-utsiec yacno nidshun adomboembidi chuibenepanēdash.

Niante chidobo pete menebanquid icta caid

6 Adashic badiadquidēn-badiadquidēnquiec Esuquidistu tantiaquid dadpen-dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanēdash. ² Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ėntiapimbo iquebique. ³ Niantebo meneta canuen nadquidquio istuidshun chuita. Nuquin Papan aton Mayan meniac tantiamiac bēdamboec tabadsho mimbi bēdamboen isaidquio istuidta. Adquid 7ted istuidshun, Niante chidobo pete menebanquid icta, cata. ⁴ Aidedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanēdash Esus chuibenequido.

⁵ Adoaquien: —Mimbi bēdamboen chioc —quepanēdash Esuquidistu tantiaquid utsibo. Aidēn chuibocpadembi aidtedi istuidpanēdash. Nēidic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquio Esteban cuēmēdquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēdquid. ⁶ Aidedi istuidshun Esuquidistu tantiaquid utsibon aido bēdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

⁷ Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiash utsi-utsiec Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantiash Esuquidistu tantiaquido yampanēdash.

Esteban bedaid

⁸ Adnubien Nuquin Papan Mayan meniaidēnquio. ambi comapenen tantiamiaidēnquio, Estebanēn nadatiambocquin ismebampanēdash. ⁹ Aden nadatiambocquin ismenuc bēdamboen tantienquio yec utsibo comapenec onquecuededpanēdash. Nēidic, Sidene yacnoēsh choquido; utsibic, Adecandedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aidtedi Edusaden yacno cho-choash tabadec Estebambēd comapenec onquepanēdash. ¹⁰ Comapenec onquequin Esteban Nuquin Papan aton Mayan meni-aid icsho aidēn comapenen tantiamiac onquesho dēniaquec utsibo onquetiapimbo icpanēdash. ¹¹ Onquequin dēniactiapimbo icquin utsibo naden aidon chuipanēdash: —Tsusiobo naden chiec nidtan: Estebanēn nuquin tsusedpa Moises caidēn dada uampidbēdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanēdash. ¹² Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismepanēdash. ¹³ Ambo abi dēniactiapimbocquidon Esteban

muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēdta Nuquin Papan Moises dada uamepampid ēnenquiocquin muaquin chuibanec. ¹⁴Naden Estebanēn chioshe. Tanta: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata quequin chiaid natiapimboctequid nec, quequin Estebanēn chuibanosh, quequin muaquin chuipanēdash Esteban dēniactiapimbocquidon chomiaidon. ¹⁵Aden Estebanēn chiaid muaquin chuiquin naimbudquimbi tsusiobobēdtambi comape-nen Esteban bēisquin Estebanēn bētantiatie ushēbimboec ushumbo yec chēnquesho isbededpanēdash.

Estebanēn chuibanaid

7 Adec Estebanēn bētantiatie ushēbimboec chēnquesho isec tsusio dapambo Esteban chuiquin: —¿Abimboda mimbi naid chuiposh? ²—caquien yuecquio onquequin Estebanēn naden chuipanēdash: —Chiembique. Tantiaquiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uēshēmbō yec dasiuidteniaid matsesēn istemaidd bēchomaoanqueic icquid Abadauan ismepampic. ³Aden ismec nadec onquepampic: “Min utsitedi nianec nidaid utsi yacno mibi ēmbi ismenu caid yacno nidta.” ⁴Adsho tantiash Candeyabon nidaid yacnoēsh nidashic nidaid Adan caid yacno choash Abadauan tabadpampic. Ambo tabadashien aton papa unēsan Adan yacno nēbi nuqui tabadbocono Nuquin Papan nuquin tsusedpa Abadauan chomepampic. ⁵Aden chomeshun Nuquin Papan naden Abadauan chuipampic: “Nēid nidaidēn mibi capuacno mit-sanapenquio nec. Yuecshun mibi menenun nanuna. Mimbi tishmiambochoedi min chidon tishaid abentsēc min madombo nēid nidaid menendambi. ⁶Nēid nidaid bedabi yec mimbi tishmiaidēn tishmiaid caidaido matses utsibon nidaidēn tabadendac. Ambo tabadshobi anocquidēn aido yuashun seta dadpen 400ted matamequin mēyanendac. ⁷Adoacsho aidotsen cuidquin mēyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaid caidaido abi mēyanacnoēsh nidashic nēid macuēsh yacno choshon ēmbi chiacpadomboen nabanendac.” ⁸Aden chuishumbic, Nidaid menenun nanuna, quequin Nuquin Papan naden Abadauan chuiopampic: “Dada bacuēbēdta dada caniaidtedi shui dēbid dētemeta. Adobansho isun, Ēmbi chiaid bēdamboen naquidquio aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanēn ambia dētemeshun dadatedi aidēmbidi shui dēbid dētemeoapampic. Adoshombic yuecquio icshun Abadauanēn aton mado tishmeshun Isac cuēnquin 7tedec ushun Isaquēn shui dēbid dētemeoapampic. Adoshombic adembidi Isaquēn aton mado tishacsho Acobo cuēnquin aidtedecbidi ushun Isaquēntsen Acobon shui dēbid dētemeoapampic. Adoshombic, canishun Acobon tishmiaido 12ted icpampic. Abentseabentsen tishmeshun aidtedecbidi ushun aton madon shui dēbid dētemeoapampic. Adoquien yuecash Acobon madotedi tsusiobudnepampic —quepanēdash Esteban isadaidbo tantiamenu quequin chiec.

⁹Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquio icsho isash nēishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid

Ose meneoapampic. ¹⁰Adoac, Yuanu, qeshun natiamiaid Ose icsho isun Nuquin Papan aid dayun uaquin dacuëdenquio icmequin comapenen tantiaquidquio bëdamboen chuiquidquio Ose Nuquin Papan icmepampic. Adquidquio icsho isun Equipito yacnocquido ancaquidën Padaon caidën Equipito yacnocquido chuiquidquio Ose icmepampic.

¹¹“Yuecash Equipito yacnocquido chuiquid, Ose, icnubi nidaid Equipito caid yacnocquidbëd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquiec yampampic.

¹²Adshumbic, Equipito yacno quënë uashun dayun uaid pete iquec, qesho tantiaashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiombique. Bedtan,’ cac Osen utsibo aton papan chicapadec pete bedec nidanepampic.

¹³Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquiochoedëmbi Padaonën tantiabempampic.

¹⁴Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. ¹⁵Adashic, Equipito yacno yuec tabadashi tsusio budashi Acobo unëspampic. Auëshquiobidi nuquin tsusedpabo Acobon madotedi adecbidi unësoapampic. Unësacsho Equipito yacno chococapampic. ¹⁶Adashic, yuecquio yash Equipito yacnoësh nidquin unësaidon tishmiaid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauanën tied bedshunëdacno chococapampic.

¹⁷Aden chuishumbic Estebanën nadopanëdash: —Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuiampid ushë chote anoentsëc yanuc nuquin tsusedpabo dadpen yanec caidpampic. ¹⁸Dadpen caidsho isun Equipito yacnocquido ancaquid utsin Ose pado tantienquio icpampic.

¹⁹Aidëmbi mua uaquin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. ²⁰Adnubien dada bacuë Moises tishacsho Nuquin Papan, Aid bëdaidquio iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin ompopampic.

²¹Ompoaqui Moises shubisho tantiaashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadt-sëcsho istuidshun bedash, Con mado caimbi, quepampic ancanquidën champi. ²²Bedtsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

²³“Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoacacno nidquin Moisesën istuidpampic. ²⁴Istuidnubi Equipito yacnocquid dada abentsëcshun isadaidbo dada abentsëc mëyanquin cuesunesho isun Equipito yacnocquid cuidnuequin Moisesën cuesuneopampic. ²⁵Ëmbi adoshu isun, Equipito yacnoësh

nuqui bëyucanquin buanquid Moises nendac, quequin con matsesën tantiapatsi-ash, abibi quetsëcquiec nidnubi aton matsesën tantienquio icpampic. ²⁶ Badiadash aton matses yacno padpidec nidquin aton matses daëd cuesnansho istuidshun, Ēmenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic. ²⁷ Adoquien Moises cuëscatanec: ‘¿Ēmbi nasho cuidquin ëbi chuiquid tsuntsin mibi icmioshe? Chui. Tantianu,’ quetanequi: ²⁸ ‘¿Equipito yacnocquid mimi cuesunebocpadenda ëbitsen cuesune?’ quepampic cuesnanquid Moises caic. ²⁹ Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

³⁰ “Adashic, seta dadpen 40tedbidi matamec nidaid Madian caidën tabadec cuëtempuidquio yacno matses nibëdquiec yacno macuësh dapa Sinai caid anoentsëqui Moises chopampic. Ambobi tabadquimbi cuëtempi nëdënquiacbimboecquid nënantanquio Nuquin Icbon Chomiaid tabadsho Moisesën ispampic. ³¹ Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuipampic: ³² ‘Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ quesho tantiash dacuëdec uëdëquec isti-
tiapimbo yec Moises nidtuidpampic. ³³ Nidtuisho isec Nuquin Icbon Moises chiec nadpampic: ‘Nëmbo ëbi icsapenquio icquid icnuc caputemaid nidaid iqueque. Min tapucudte chicshun tantiata. ³⁴ Min matses ëbi cudasaido Equipito yacnocquidon mëyanac uëshquec shubiquiosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,’ quepampic Nuquin Icbon Moises chiec.

³⁵ “Aden cuëtempi nëdënquiacbimboecquid nënantanquio icboedën Nuquin Papan Chomiaidën isadaidbo bëyucanquin buanquid icca cac: ‘¿Ēmbi naid icsho cuidquin ëbi chuiquid tsuntsin mibi icmioshe? Chui. Tantianu,’ abi caondaido bëyucanquin buanquid Moises icpampic. ³⁶ Adquid Nuquin Papan icmiac Equipito yacnoshon aton matses bëyucanquin buanun Moisesën nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeoapampic. Adoshombic, matses nibëdquiec yacno seta dadpen 40tedbidi matamec abi tabadcueniachontsen nadatiambocquin nabanquin isadaidbo Moisesën ismeoapampic. ³⁷ Aidëmbi naden chuipampic: ‘Yuecquio icshun ëbipadquid mimi tishmiaidën tishmiaidon caidaid Nuquin Papan chuiquidquio icmendac,’ quequin Moisesën chuipampic. ³⁸ Isadaidbo bëyucanquin chuiquid Moises matses nibëdacno isadaidbobëd macuësh dapa Sinai caid yacno choash Nuquin Papan chomiaidobëd Moises tabadpampic. Ashunquio Nuquin Papan abëdi tabadte tantiamenuequin cuënote pada-padambocquidën ambi naden nata quequin dada uaid Moises menepampic. ³⁹ Aden aid dada uaid bedshun bëyucanquin chuisho tantiesa yanec nuquin tsusedpabo Moises bunenquio yec Equipito yacno nidoate bumpampic. ⁴⁰ Adashic, Moises macuësh yacno yuecquio tabadnubi Moisesën utsimbo Adon cuëmëdquid aton matses utsibon naden chuibededpampic: ‘¿Moises nuqui Equipito yacnoshon bëyucanquin bëboed mitsi nidpash nec? Nibëdpequien iquec. ¿Atotsi quec nidpash? Nuquin Papan uacpadquiocnoc nacenata. Nacnenash bëyucanquin chuiquid aid iquendac,’ tsusedpabon cac ⁴¹ bacan bacuëbimboecnuc Adonën nac-

nempampic. Ambi nacnenaaid tantiaquin isadaidbon nidaidën capuquid yua cuesuneshun cuëdënëmbededpampic. ⁴² Adquid cuëdënënsho tantiash isadaidbobëd ic-tiapimbo iquec Nuquin Papa, Padi. Adenda, quenquo icpampic. Adquido Nuquin Papan ëndenquimbo tantiaquin naden chuipampic: ‘Adomboen mimbi nacnenaaid tantiec tabad.’ Adembidi Nuquin Papan yuecquio icshun nanun chiaid isadaidbo chuiquin naden dada uamepampic:

‘¿Mates utsi nibëdquio yacnoshon seta dadpen 40ted matamequin ëbi tantiaquina nidaidën capuquid yua cuesuneshun pambid tauidenio? Padenquo.

⁴³ Ëmbi uaid badiadën ushë, ëbitedishun bëyucamembi, qeshun aidpadquid naceneshun Modoc cuëqnin aton shubumpi nuntan namposh.

Aidbëdtabi uispa dapatsen ëbitedishun bëyucamembi, qeshun aidpadquidbidi naceneshun Dempan cuë nec danëshën sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caid nidaid yacno mibi nidmenquo icquin nidaid utsi, Babidonia caid udi mibitedi nidmeoaindami.’

Aden ambi chiaid niacquido isadaidbo tantienquo icquidobi Nuquin Papan chuipampic —quepanëdash Esteban isadaidbo chiec.

⁴⁴ Aden chiec yuec onquebudec: —Mates utsi nibëdacnombo nidanequin tsusedpabon Nuquin Papa tabadte chicbanshun buampampic. Aidëmbi Moises ismiacpadembi isadaidbon Nuquin Papa tabadte shubu uashumpampic. ⁴⁵ Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquo shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. ⁴⁶ Aidi Nuquin Papan bëdamboen isaidquio aid nidaidën tabadquin Nuquin Papa tabadte buantiapimbocquid shubu uashuntiadquiocquin shubu uate bë-bëmepampic. ⁴⁷ Aid shubu uabi Dabid unësambic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. ⁴⁸ Aden matesën shubu uaidën Nuquin Papa tabadenquo iquec. Adembidi Nuquin Papan chuimianiaidën naden chuipampic:

⁴⁹ “Abutenquiobi con tsadte dapa iquec. Adecbidi nidaidtenquiobi ëmbi tincatequid nendac.

¿Adquid icnubidabi matesën nidaidën shubu uashun tabadmepadic? ¿Nidaidënuidi tsadpectabi tiboquendac?

⁵⁰ ¿Tauaquioquimbi abitedi uambodambi ictionda?”

quequin Nuquin Papan chuimiaiën dada uapampic —quequin chiashic Esteban abi onquec: ⁵¹ —Pacuëndacimboen Nuquin Papan chiaid tantiash icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpadembi mibitedishun chieshënoaic. ⁵² ¿Nuquin Papan ambi yuecquio icshun naden nanuna quequin chiaid ambi chuimiaidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuquido tsusedpabon cuesunepampic. Aidon nacpaden Nuquin Papan chomiaid mibitedishun unës uamiondac. ⁵³ Nuquin Papan chiaid ambi uaidon mayan bëdabon meniaqui Nuquin Papa chieshënuquido mibi nec —quepanëdash Esteban isadaidbo chuiquin ënec.

Esteban se-siaid

⁵⁴ Adec Esteban onquesho tantiashun nëishëshun Esteban iccuededquidon chushcapanëdash. ⁵⁵ Adoaquien Nuquin Papan Mayan meniaidquio icquin Estebanën abuc isquin Nuquin Papa uëshëmbo yec matesën istiapimbo bëchomaoanquieic ictequid abichobi dasiuidteniaid chënquenubi Nuquin Papabëd tancandaëdquieic Esuquidistu nidtuidsho ispanëdash. ⁵⁶ Aden isequi: —Abuc shëcuë uaid shëcniaye. Is. Umbo Esuquidistu, matesondaid, Nuquin Papabëd tancandaëdquieic tsadsho isembi —quepanëdash Esteban.

⁵⁷ Adsho tantiash tsusiobo comapenec sidquianec pamumëdanec titinquequin Esteban bedshun ⁵⁸ cuënoten se-senuen shubu nibëdacno udi buampanëdash. Aden Esteban buanshun aton dashcute Saudo cuëmëdquidën taëno sampanëdash Esteban se-senuequidon. ⁵⁹ Sanshun se-siaquic Estebanën Esuquidistu cuënquin naden chuipañdash: —Ëbi yued, Icbo —quiashic, ⁶⁰ danëshën sebudash comapenec nadeconquec: —Ëbi se-sequido icsaid cuidenquio yec bëpiscudta, Icbo —quepanëdash. Adec onquetanec Esteban unëspanëdash.

Saudon Esus tantiaquido mëyanaid

8 Esteban se-senu caquien, Ai, adota, quiash isec uano Saudo tsadpanëdash. Esteban se-siaid ushëmbi Edusaden yacnoshon Saudon Esus tantiaquid utsi-utsien comapenen mëyanquin tauadopañdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanëdash. ² Adnubien Nuquin Papan chiacpadomboen naquin Esteban chococaic comapenec sedenquec shubipañdash. ³ Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën nauedmepañdash.

Samadia yacnoshon Esus chuibanaid

⁴ Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenepañdash. ⁵ Adembidi niante chidobo aton na nibëdsho menequid, Uedipe cuëmëdquid nidaid Samadia caid yacno choshon adembidi Esus chuibanoapanëdash. ⁶ Aidën nadatiambocquin nabanquin Esus chuibansho ambocquido iccuededquin bëdamboen tantiapanëdash. ⁷ Aidëmbi nadatiambocquin nabanac mayan icsa dapuedaid icboedi mayan icsa sidquianec cuempanëdash. Adecbidi canite icsaidbëdta caputiapimbocquid dadpen bëdampanëdash. ⁸ Adsho isash Samadia yacnocquido, Bëdambo iquebi, quec tabadpanëdash.

⁹ Adnubien Samadia yacno ënden chondaïd, Nadatiambocquin nabanquid dapanebi, quequin mayan icsan tantiamiacpaden Simon cuëmëdquidën nabampanëdash. ¹⁰ Adosho isash: “¡Eee! Abimboshenda caposh. Nëid dada Nuquin Papan ambi nadatiambocquin nabante tantiamiaid nec,” quequin anocquidobëdтан abi chuiquidon comapenen tantiapanëdash. ¹¹ Aden yuen Simonën ismiac, Isnuequid dadpen badiadquidën-badiadquidënquieic abi yacno choash iccuededpanëdash. ¹² Adnubien, Nuquin Papa yacno puduedmianquid Esus nec, quequin Uedipen chuibanasho tantiaquid yampanëdash dadabëdi chido chedo. Adsho aïdtedi acten mentomepañdash. ¹³ Simontsen: —Esus tantiaquid nebi —quesho acten mentoquai Si-

mon Uedipebëd capuquimbi Uedipen nadatiambocquin nabansho isun, Adopenshenda nabanec, quequin ispanëdash Simonën.

¹⁴ Adashic yuecash Samadia yacnocquido Edusaden yacno nidash nadpanëdash: —Nuquin Papan chiaid Samadia yacnocquidon tantiabedec. Aden chuisho Esus chuibenequidon tantiashun Uambëdta Petedo Edusaden caid yacnoësh nidaid Samadia caid yacnoshon nidmepanëdash. ^{15–16} Adec aid daëd nidaneshun: —Esus tantiacquid acten mentoaidouidi nëidtedi nec —anocquido quesho tantiashun: —Nëidtedi min Mayan mene, Papa —quec onquequin ¹⁷ Petedobëdtan Uanën mëdanten Esus tantiaquido mamishbampänëdash. Aden mamishbanubi aidtedi Nuquin Papan aton Mayan menepänëdash.

¹⁸ Aden Petedon nasho isash Simon: —Ma adquiec mëquiadnueshun mibi piucquid menenu. ¹⁹ Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —quepanëdash.

²⁰ Adoaquien Petedo: —¿Piucquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min piucquid icpanu. ²¹ Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac. ²² Mimbi icsamboen tantiaid ënta. Aden icsaid ënsho isash Nuquin Papa mibi icsaid bëpiscudendac. ²³ Mayan icsan yua icquin tactaui tishidaid mishaid mucambo yacpadec icsamboen mimbi muaquin chuibanaido icsaindac.

²⁴ Adoaquien: —Ëbi tauiantiadpambo chian anëdënquequid nënenushe quiash mibi Uambëd Nuquin Papa chiec bëdamboec onquebudneta —quepanëdash Simon.

²⁵ Adec Samadia yacno tabadquin Petedobëdtan Uanën: Esus ispondambi, quededquedquid Nuquin Papan chiaid chuibanashic Edusaden yacno nidquimbi utsiutsiec yacnoshontsen chuiopanëdash aidëmbidi.

Uedipe Etiopia caid yacnocquidbëd icaid

²⁶ Adoshombic, Samadia yacno Uedipe icsho Nuquin Papan uaid mayan bëdan nadopanëdash: —Nëuëshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibëdacno podquedën nidash nidtuidtanec chotan.

²⁷ Adoac nidtoanec nidquimbi Nuquin Papan uaidën mayan bëdan chuibocno choquin Etiopia caid yacnoësh choquid Uedipen bëquedtuiddpanëdash. Ancanquid chido Candase cuëmëdquid aton na dayun uashunquid aid dada nepanëdash. Aidi Edusaden yacno nidash tabadquin Nuquin Papa chianec ²⁸ padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanëdash. ²⁹ Adnubien Nuquin Papan Mayanën: —Nidaid cano chinunta —cac ³⁰ Uedipen titinquequin chinumpänëdash.

Aden Etiopia yacnoësh choquid dada uaid isec onquesho isash: —¿Isbanec onquequina tantiaquie? —quepanëdash Uedipe.

³¹ Adoaquien: —Tantiamequid nibëdnuc ¿mitsipadentsimbi tantiape? Èbëdi antsadtoec cho —cac Uedipe abëdi antsadtopanëdash.

³² Aidbëdi antsadtoshon Etiopia yacnoësh choquid Nuquin Papan dada uamiampid isec onquesho Uedipen naden tantiapanëdash:

“Obeca cuesunenuen nimbambocpadomboembidi mëtaneshun nimbanoaposh Nuquin Papan chomiaid unës uanuequin.

Adecbidi obeca bacuë abi datasnuequid icnuc cuëdenquio yacpadec abi unës uanuequid icnuc cuëdenquio icoaposh Nuquin Papan Chomiaid.

³³ Aidi Icsaisa icsho mëyansho isec, Icsambocquidta neque. Isnu, quenquiocposh aton matses.

Aidi chido inesa yec ambi tishmiaid nibëdnuc ¿Tsuntsin ambi naid chuipadic?”

³⁴ Aidedtsëqui abi isec onqueboed Uedipe ismeshun Etiopia yacnoësh choquidën: —Ëbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibaneque? Ëbi chui. Tiantianu —capanëdash Etiopia yacnoësh choquidën Uedipe chuiquin.

³⁵ Adoaquien, Matsestedi icsaid bedshunash abided ciudadec Esus unësaid Nuquin Papa yacno puduedmianquid nec, quequin dada uapampidën chiec, quequin Etiopia yacnoësh choquid tantiamenuen chuibampanëdash Uedipen.

³⁶ Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

³⁷ Adoaquien Uedipe: —Esus tantiaquidquio nebi, qesho mibi acten mentono —capanëdash.

Adoaquien: —Nuquin Papan mado Esuquidistu nec, quequin aid tantiaquid nebi —qeshun Etiopia yacnoësh choquidën: ³⁸—Niduid —cac nidaid cano nidmequidën cabayo niduidmian acte budshun Etiopia yacnoësh choquid Uedipen mentopanëdash. ³⁹ Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiec bëdambo iquebi, quec Etiopia yacno nidoapanëdash.

⁴⁰ Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caid yacnotsen choapanëdash.

Saudon tantiate paucaid

9 Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquio yec isadaidbo chuiquid dapabo yacno Saudo choash ²shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquido chuipanëdash Saudon.

³ Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash. ⁴ Aden dëcatiac Saudo paëdash uesho isun nadec abucuësh onquec: —Saudu, ¿atotsieshun ëbi tantiaquido mimbi mëyampeba? Èbitsen mëyantiadpambocquin mimbi aido mëyanec —quepanëdash.

⁵ Adoaquien: —Icho, ¿Tsutsi mibi ne?

⁶ Adoaquien: —Mimbi mëyanaid Esus nebi. Èmbi chiaid chieshë nec mibi tabad-
eque. Nidtoash Damasco yacno nidtan. Anoshon ëmbi nata cacpadomboen anocquid
mibi chuimembique. Nidtan.

⁷ Adec abucuësh onquenubi Saudobëd cho-choquido nidtuidshun tantiequi onquequid isenquio yec tabadtuidpanëdash. ⁸ Onquec ënëdan nidtoash Saudo istiadquio iquequi bëshupanëdash. Adsho isun mëdinanquin Damasco yacno buampanëdash. ⁹ Adequi Damasco yacno choash 3tedec ushec isenquio yec buna mëmunquiec Saudo tsadpanëdash.

¹⁰ Adashic, Saudo puduedash tabadacno ëdibictsëc tabadquid Esus tantiaquid Ananias cuëmëdquid icpanëdash. Aid usho Esusën: —Chuinu. Tantia —caquien: —¿Atoda? Nëbi uebi, Icbo —quepanëdash Ananias.

¹¹ Adoaquien: —Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tadso caid yacnoshon tishaid Saudo cuëmëdquid Nuquin Papa chiec onquec tsadsho mimbi istuidendac. ¹² Adec aid ushacimboec tsadsho mibi choshon aidi padpiden ismenuen mimbi mëdanten mamishac isoshe. Aidi istan —capanëdash Esusën.

¹³ Adoaquien: —Con matses dadpeshun Saudon naid icsa chuibansho tantiombi, Icbo. Aidëmbi Edusaden yacnoshon mibi tantiaquido mëyamepac caoshe. ¹⁴ Aidbidi Edusaden yacnocquido chuiquid dapanquio dada uaid sananquin nëmbotsen mibi tantiaquido bedmeshun tanemenuec aidi chopac caosh —quepanëdash Ananias Esus chiec.

¹⁵ Adoaquien: —Aidi ëbi chuibeneta caidquio icmeshun ëmbi bëdamboen isaid neque. Aid dacuëdënenquio yec nidshun istanta. Aidën isadaidbo abi chuiquidobëdta isadaidpembo abi chuiquidobëdtabidi ëbi chuiben-chuibenec capuendac.

¹⁶ Ëbi chuibenesho mibi mëyantequid iquendac, quequin Saudo tantiamembi —quepanëdash Esus.

¹⁷ Adsho tantianec Ananias nidash Udasën shubun puduedshun Saudo mamishec: —Con utsi, mibi podquedën chosho chuiquidën Nuquin Icbonquio, Esusën mibi padpiden ismenuen Nuquin Papan Mayan mibi menenuembidi chomiaid nebi —quepanëdash Ananias Saudo chiec.

¹⁸ Aden Ananiasën chuinubi nuëcquid bitsibimboecquid ëshënuësh paëdnubi bëshuacboedëmbi, Saudon, bëdamboen ispanëdash. Aden isec capusho isun acten mentopanëdash. ¹⁹ Adecbidi Saudo penquio yec padishacboedi piash padpidec uidëncuenoapanëdash.

Damasco yacnoshon Saudon Esus chiaid

²⁰ Adec uidëncuenash Saudo Esus tantiaquidobëd tabadpanëdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipanëdash Saudon. ²¹ Aden chuisho tantiash tantiadempambo yec tabadec: —¿Edusaden yacnoshon Esus tantiaquido mëyameboe-dida nec? ¿Adecbidi nëmbo choshon tanemeshun isadaidbo Edusaden yacnocquido chuiquid dapabo yacno buamenuec choabida ictic? —quepanëdash Damasco yacnocquido.

²² Aden anocquidon tantianubi Nuquin Papan Mayanën oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuided-chuidedpanëdash.

Isadaidbo Esus tantiesa abi cuesunete bunsho isash Saudo cuenaid

²³ Adembidi yuec ushquin Saudon ënenquiocquin chuibansho tantiash, Icsamboen chiec, quiash isadaidbo utsibo yec abi cuesunete bunsho isun tantiaquidën chuisho Saudon tantiapanëdash. ²⁴ Adnubien Saudo cuesunenuen shubu dadpen icquid abichobi tsicatequin daquënë uaidën shëcuë cuëmanoshon abi chieshënkuidon caimpanëdash Saudo puduensho bednu quequin. ²⁵ Aden cainsho isun Saudo cuesunenuehe queshun chiac inchëshëmbi onquenquiocquin tsitsan dapan Saudo antsaduntanquin tsicataid quënë cachoc Saudo budmepanëdash.

²⁶ Budanec Saudo Edusaden yacno nidoash Esus tantiaquidobëd tabadnuesho isash, Saudon mua uaquin ëbi bednueshe quiash dacuëdcuedpanëdash aido. ²⁷ Adnubien, Saudobëd Esus tantiaquid utsitedi yacno choshon Bednaben yuedpanëdash. Aden yuedshun: —Saudon Damasco yacno nidquin Nuquin Icho ispac caosh. Nuquin Icho Saudobëd onquepac caosh. Adanec Damasco yacno choshon dacuëdenquiocquin Esus chuibampac caosh, quequin Saudon naid Bednaben chuibampapanëdash. ²⁸ Aden Bednaben chuibanac Esus tantiaquido Saudo dacuëdenquiocnobi aidobëdi capuquin Saudon anoshombidi Esus chuibanoapanëdash. ²⁹ Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuequin aidontsen cainoapanëdash. ³⁰ Aden Saudo cuesunenuen, cainec qesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsëqui nidmepanëdash.

³¹ Adashic Saudo nidmian cuesunenuehe quenquo yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuëdenquo yec tabadpanëdash. Adec tabadquin, Nuquin Papan chiaid tantiabenu, qesho Nuquin Papan Mayanën adomboembidi tantiamiac bëdamboec tabadpanëdash. Adec tabadquin Esus chuisho tantiesa icboedi Esus tantiaquid dadpenquo yampanëdash.

Petedon Ananias Dodcastsen bëdamiaid

³² Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanëdash. ³³ Ambo choshon dada, Eneyas cuëmëdqid, seta dadpen 8ted matamec canite tsasiaid Petedon istuidshun: ³⁴ —Esusën mibi bëdamiaque. Nidtoшон min uete buanun nacenta, Eneyas —Petedon cac Eneyas badedquio nidtoash capupanëdash. ³⁵ Eneyas capusho isash Dida yacnocquidobëdi nidaid Sadon caid yacnocquido Esus tantiaquid yampanëdash.

³⁶ Adnubien Dida uditsëc shubu dadpen icquid Ope caid yacnocquid, Esus tantiaquid utsi, chido, Tabita cuënshumbi quidiecon onqueten Dodcas cain cuënaid tabadpanëdash. Aidi bëdamboequid icquin badiadquidën-badiadquidënkuien pete nibëdqido menedenepanëdash. Adembidi aton na nibëdqido Dodcasën menedenepanëdash. ³⁷ Aidi Petedo Dida yacno icnubi icsabudec unëso isun abëd icquidon dapanshun shubu abuc quënë icquidën nampanëdash. ³⁸ Aden nanshun, Petedo Dida yacno tabadec, qesho tantiashun aid chomenuequin dada daëd Petedo tabadacno nidmiac aid daëdi Petedo tabadacno choshon Dodcas unësboed chuishun: —Nidtuidentquo yec badedquio ëbëdi cho —cac ³⁹ abëdi badedquio Ope yacno Petedo nidpanëdash. Adec nidec Ope yacno chosho isun abuc quënë icquidën pudued-

mepanëdash. Ambo puduedsho isun shubiquimbi niantebon Dodcasën tuscaboed dashcute dadpen Petedo ismepanëdash.

⁴⁰ Adosho isun abitedi puduemiasch danëshën sebudash Nuquin Papa chiec onquetanec nidtoshon unësboed isquin: —Nidto, Dodcas —Petedon cac uincuenequi Petedo isec Dodcas badedi uëtsëdtopanëdash. ⁴¹ Uëtsëdtosho isun mëdinquin nidtomeshun niantebobëdta Esus tantiaquid utsibo cuëinquin cho-chomeshun uincuenboed ismepanëdash. ⁴² Aden Dodcas ismescho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanëdash. ⁴³ Adnubien Petedo Ope yacnocquid nidaidën capuquid bitsi uashun chodcashun nacnenquid Simombëd yuec Petedo tabadpanëdash.

Petedo Codnedion chomiaid

10 Adnubien shubu dadpen icquid Sesadeya caid yacno Codnedio cuëmëdquid isadaidpembo nidaid Itadia caid yacnoësh Sesadeya caid yacno choash tabadpanëdash. Aidi sondado dadpen 100tedi chuiquid icpanëdash. ² Aidi aton shubun icquidobëdi Nuquin Papa tantiaquid icquin isadaidbo aton na nibëdquid icsho isun menebanquid icpanëdash. Adecbidi Nuquin Papa chiec onquianedenepanëdash. ³ Adquid yec ushë budtsambi tedes yanuc Nuquin Papa chiec onquequimbi ushac bimboecquin Nuquin Papan uaid mayan bëda Codnedion ispanëdash. Nuquin Papan uaid mayan bëda choshon: —Codnedio —capanëdash.

⁴ Adsho tantiasch dacuëdquin comapenen isec: —¿Atotsibi name, Icbo? —quepanëdash Codnedio.

Adoaquien: —Abi chiec mibi onquedenesho Nuquin Papan tantiec. Adembidi aton na nibëdquid tantiaquin menedenequid mibi icsho Nuquin Papan bëdamboen isaid mibi neque. Chuinu. Tantiata. ⁵ Nëbi Simon cuënshumbic Petedo cuënoaid ma bednu mimbi namiaido Ope yacno nidmetan. ⁶ Simon utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec —quepanëdash Nuquin Papan uaid mayan bëda Codnedio chiec.

⁷ Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun ⁸ Nuquin Papan uaid mayan bëdan chuibocpaden Petedo bedmuenen ambi namiaido Codnedion nidmepanëdash.

Petedor ushac bimboec tsadquin isaid

⁹ Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onquenuec shubu macano pada-padapambocquid yacno dectatopanëdash. ¹⁰ Adec dectatoash shubu icbon codocanubi Petedo bundoec ushac bimboec tsadquimbic ¹¹ abu posonianec abi yacmi dabidiete dapabiecquid bucun dënëshbudcuenaid budsho Petedor ispanëdash. ¹² Aidënquoio ambi petequid ambi petemaid chedo nidaidën capuquid tacbidën capuquidbëd podochoquid chedo antabëdpanëdash. ¹³ Adnubien: —Nidtoshon cuesuneshun pe, Petedo —capanëdash abucüesh onquequin.

¹⁴ Adoaquien: —¿Abida cai? Ëmbi petemaid tauishun mibi shëdmetemaidquio antabëdquid nec. Adquid piamboccombi, Icbo —quepanëdash Petedo.

¹⁵ Adoaquien padpidec abucüesh onquec: —Nuquin Papan bëdambo icmiaid ic-sambo iquec cainda —quepanëdash. ¹⁶ Adotanquimbic antabëdquid abuc buanshun

adomboembidi abentsëc chotsëcnuc budmequin adembidi Petedo chuishun abuc shëcuë uaid yacno badedquio buanshun puduedmeoapanëdash.

¹⁷ Adosho isash Petedo ambi isboed tantiec tsadnubi Codnedion chomiaido Simonën shubu istuidash shëcuë cuëmano choec nidtuidpanëdash. ¹⁸ Choec nidtuidash: —¿Nëmboda Simon Petedo tabadec? —quetuidpanëdash.

¹⁹ Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibë nec. ²⁰ Ëmbi chomiaido neque. Budash cacuidenquio yec aidobëdi nidtan —capanëdash.

²¹ Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

²² Adoaquien: —Codnedio cuëmëdquidën chomiaid nebi. Aidi sondado dadpen chuiquid bëdambocquidquio nec. Adquid icquin Nuquin Papan chiacpaden naban-sho isun isadaidbon bëdamboen isaidquio nec. Aidi Nuquin Papan chomiaid mayan bëdan naden chuipac caosh. “Simon cuënshumbic Petedo cuënoaid bedmetan. Bëac chuibansho tantiatata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioposh —quepanëdash Codnedion chomiaido Petedo chiec.

²³ Adoaquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnocquid utsin-utsinquien tsibanampanëdash. ²⁴ Adec nidanec Sesadeya caid yacno chopanëdash. Adnubien, Nëid ushëmbien chochitec, quequin tantianshun Codnedion aton shubun icquido abi isedquid chedo Petedon chuiban-sho tantiamenuen aton shubu nuntan iccuededmepanëdash. ²⁵ Aden iccuededmiac tabadnubi utsibobëd choec Petedo chedo puduedsho isash, Mibi bëdambocquid icnubi adesa nebi, quequin Petedo ismec danëshën sebudec shuebudash Petedo bëisenquio yec Codnedio uepanëdash.

²⁶ Adec uesho isash Petedo: —Mibipadquid nebique. Nid tota —quepanëdash Codnedio caic.

²⁷ Adtanec Codnediobëd onquetanec quënë utsin puduedshun isadaidpembo dadpen Petedon istuidpanëdash. ²⁸ Aden aido isec: —Isadaidbo nebi. Adquid yec isadaidpembobëd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ëmbi bëdamboen isaid icsambo iquec cainda, quequin ismequin ëbi tantiamiac ²⁹ mimbi ëbi bedmiaido choacsho isash, Mibëd capuesa nebi, quenquio yec chobi. Adecbidi nëmbo choash isadaidpembon shubu nec. Nëmbo puduedtiapimbo iquebi, quenquio yec puduedobi. Nëbi Tantanu. Chui. ¿Atotsieshun ëbi chomio? —quepanëdash Petedo Codnedio chiec.

³⁰ Adoaquien Codnedio: —Abentsëc choec ushanec ushë budec tedes yanubi Nuquin Papa tantiec buna mëmunec con shubu nuntanuësh Nuquin Papa chiec onquec tsadobi. Adnubien dashcute shocosh bed-bedquiacbimboec dasiuidquid ëbi yacmi Nuquin Papan budmiac onquec: ³¹ “Codnedio, mibi Nuquin Papa chiec onquesho Nuquin Papan tantiec. Adembidi aton na nibëdquido mimbi menebansho aidëmbi bëpiscudenquio icquin tantiec. ³² Nuquin Papa bëdamboen tantianuen Simon cashumbic Petedo caid Ope yacnocquidbëd tabadquid ma chono queshun mimbi namiaido nidmeta. Aidi Simon cuëmëdquid utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec,” quec Nuquin Papan uaid mayan bëda onqueposh. ³³ Aden chiac: “Petedo bed-

tan,” quequin ěmbi namiaido nidmiombi. Adoac bĕdamboquid yec cacuidanenquio yec badedquio mibi choc. Adec mibi choacsho isash bĕdambo iquebi. Nuquin Papan nuqui isnubi ambi mibi tantiamiacpaden chuibansho tantiec tabadnuna —quepanĕdash Codnedio Petedo chiec.

Codnedion shubu nuntanshun Petedon chuibanaid

³⁴ Aden Codnedion chuiban cac Petedon naden chuipanĕdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nĕbi abimbo tantiombi. ³⁵ Nuquin Papan chiaid tantiashun matses utsin-utsinquien chieshĕnquiocquin bĕdamboen nabansho isun, Aidedi Nuquin Papan abi yacno yuedendac, quequin tantiombi. ³⁶ Ĕndenquimboshĕ Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsĕqui matsestedi chuiquid icnubi utsibĕd bĕdamboec tabadendac. ³⁷ Nidaid Cadidia yacnoshon Uan padon chuibanquin acten mentoaquien Esuquidistun ambi naid tauapondash. Mibitedishun aid tantiondac. ³⁸ Ma abĕd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bĕdamboen nabanquin abi chieshĕnquidĕn Satanas caidĕn mĕyanaido Esuquidistun bĕdamebampondash. Adosho mibitedishun isbampondac. ³⁹ Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unĕs uaqi ⁴⁰ uincuenash, Uincuenobi, quequin Esuquidistun ismebempondashi. ⁴¹ Aidi uincuenshun matsestedi ismenquiocquin aidbĕdan peshun acquidotedictsĕqui Esuquidistun ismepondashi. ⁴² Abĕdi icshobi, Ĕbi chuibanquin matses icsaid cuidte chuibante ushĕ choec quequin chui, cac nebi. ⁴³ Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ĕnsho isash abi icsaid Nuquin Papa bĕpiscudendac. Esuquidistu chuiquin aden dada uapampic —quepanĕdash Petedo Codnedion shubun iccuededquido tantimequin chiec.

Isadaidpembo Nuquin Papan aton Mayan meniaid

⁴⁴ Aden Petedon chuibanshobi abitedi tantiaquid icsho isun Nuquin Papan ma abĕd tabadnueshun aton Mayan menepanĕdash. ^{45–46} Aden meniac isadaidpembo nĕbi Esuquidistu tantiaquido yanshun abi onquiacmaidĕnquio utsin onqueten onquequin Nuquin Papa chiec cuĕdĕmpanĕdash. Adsho tantiash Petedobĕd cho-choboedo isadaidbo aton tsusedpabon nacpaden shui dĕbid dĕtemequido: —ĭPadtec! Tantiadempamboctequid nec. Isadaidpembotsen Nuquin Papan aton Mayan meniac —quepanĕdash isadaidbo Petedobĕd cho-choboedo.

⁴⁷ Adoaquien: —Nuquin Papan aton Mayan meniaido icquin Esuquidistu tantiaquido neque. ĵAdquid icsho acten mentoenda ictic? ⁴⁸ Aid, acten mentometa —capanĕdash Petedon.

Aden acten mentoaqui: —Nuquibi tabadnuna —cac Petedobĕd cho-choboedo acten mentoaidobĕd daĕdpactsĕc ushec tabadpanĕdash.

Isadaidbo Petedon ambi naid chiaid

11 Adnubien utsibo Sesadeya caid yacnoësh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bédamboen tantiash Esuquidistu tantiaquido yanosh, quequin chuipanédash. Anoshon chuibétsenec Edusaden yacnotsen choshon adomboembidi chuioapanédash. ²Aden chuisho anocquidon Esuquidistu tantiaquid utsibon tantiash tsusedpabon chiacpadamboen shui dëbid dëtemequido yec Petedo nëmbo choacsho isun, Aidi ambi nabanaid chuimenu, quequin caimapanédash. Aden cainubic Petedo choacsho isash ³comapenec onquecuedec: —Isadaidpembo shui dëbid dëtemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tantikanu —quepanédash Edusaden yacno tabadquido.

⁴Adoquien Petedon nadopanédash: —Aidobéd ëbi tabadboed chuibanu. Tantiata. ⁵Ope yacnoësh Nuquin Papa chiec onquequin ushacimboen naden ispombi. Abuc posonianec ëbi yacmi dabidiete dapabiecquid dënëshbudcuenaaid budposh. ⁶Aidënquio nidaidën capuquid tacbidën capuquidbéd podochoquid chedo antabédsho ispombi. Aidën antabédquid nuqui petequidbéd nuqui petemaid icposh. ⁷Adquid icsho isnubi: ‘Nidtoshon cuesuneshun pe,’ caposhi. ⁸Adsho tantiashun: ‘Aidtedi ëmbi petemaid tauiquin mibi shëdmetemaidquio nec. Adquid pesambo nebi, Icho,’ capombi. ⁹Adoquien abucuësh padpidec onquequin: ‘Nuquin Papan bédambo icmiaid icsambo iquec cainda,’ caposhi. ¹⁰Adomboembidi abentsëc chot-sëcnuic tabëcaido abuc buanshun padpiden budmeshun adembidi chuishun buanshun abitedi abuc puduedmeoaposh. ¹¹Abuc buanoabombic dada abentsëc chotsec Sesadeya caid yacnoësh choquido shubu shëcuë cuëmano nidtuidash nidpac caosh. ¹²Aidtedi icnubi Nuquin Papan Mayan: ‘Aidobëdi cacuidenquio yec nidtan,’ qesho tantiash aidobëdi nidpobi. Aidobéd Ope yacnocquido dada 6ted Esuquidistu tantiaquido puduanec nidec Codnedion shubun ëbëdi puduedposh. ¹³Puduedacsho isash Codnedio: ‘Nuquin Papan chomiaidën ambi uaid mayan bédan naden chuiposhi: Simon cuëshumbic Petedo caid Ope yacno tabadeque. Aid bedmenuen mimbi namiaido nidmeta. ¹⁴Aidëmbi mibéd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bédan chuiposhi,’ quequin Codnedion chuioaposhi.

¹⁵“Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh. ¹⁶Aden meniacsho isun Nuquin Icho Esuquidistun chiondaid ëmbembi tantiatsëcquiec tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icho Esuquidistun. ¹⁷¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanédash Petedo shui dëbid dëtemequid utsibo chiec.

¹⁸Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaid ënsho isun Nuquin Papan aidotsen abëd icquid icmeoapac —quepanédash Nuquin Papan naid chiec.

Antioquiya yacnoshomba Esus tantiaquido iccuededaid

¹⁹ Esteban cuënoten seshuniash: “Esuquidistu tantiaquido cuesunenu,” qesho tantiash ëbitsen cuesunenushe quianec Edusaden caid yacnoësh Esuquidistu tantiaquid utsi-utsiec nidanepanëdash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquio nidaid nacdëdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibanpanëdash. ²⁰ Adshumbic, utsibo Chipide caid yacnoësh Antioquiya yacno cho-choquidobëdttan nidaid Sidene yacnoësh Antioquiya yacno cho-choquidon isadaidpembo Esuquidistu tantiamenuen chuibanpanëdash. ²¹ Aden chuibanu, qesho Nuquin Papan bëdamboen tantiamiac aidon chuibanaid tantiashun isadaidpembon: Èbi icsaid ënu, quequin ënash Esuquidistu tantiaquid dadpen yampanëdash.

²² Adec isadaidpembo Esuquidistu tantiaquid dadpen yanosh, qesho tantiashun Esuquidistu tantiaquid utsibon Edusaden yacnocquidon Antioquiya yacno Bednabe nidmepanëdash. ²³ Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iquec. Adembi tantiaquin chieshenquiocquin Esuquidistu tantiata —quepanëdash Bednabe. ²⁴ Bednabe bëdambocquid icsho Nuquin Papan aton Mayan meniac Esuquidistu bëdamboen tantiaquidquido icquin Esuquidistu chuibanac Esuquidistu tantiaquid utsi-utsiec dadpen yampanëdash.

²⁵ Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon ²⁶ Saudo istuidash Antioquiya yacno aibdëdi Bednabe choapanëdash. Ambo choash seta abentsëc matamec anocquid Esuquidistu tantiaquidobëd iccuededquin Esuquidistu chuibanquin aid daëdshun tantiamepanëdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpanëdash.

²⁷ Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquido icshun nanun chiaid chuiquido chochopanëdash. ²⁸ Cho-choshon abentsëqui Accabo cuëmëdquid Nuquin Papan Mayanën oncamiac: —Yuec-yuecpectsëc yash nidaidtedi yacnocquidon pete nibëdendac —quepanëdash. Aden chiambic shubu dadpenquioshë icquid Doma yacnocquido ancaquid Quëdaudio cuëmëdquid icnubi pete nibëdquiec yampanëdash. ²⁹ Adnubic, Udeya yacnocquidon pete nibëdec, qesho tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanëdash. ³⁰ Esuquidistu tantiaquido Edusaden yacnocquido chuiquido nëid piucquid menetanta ma pete bunquido menenueshun, quequin ambi dayun uaidtedi Bednabebëdta Saudo menequin Edusaden yacno buamepanëdash Antioquiya yacno tabadquin Esus tantiaquidon.

Acobo cuesuniabëdta Petedo quënën nauedaid Nuquin Papan puduemaiad

12 Adnubien Edusaden caid yacno tabadquid domanobo ancaquid Edodes cuëmëdquidëmbi Esuquidistu tantiec iccuededquido utsi-utsien comapenen mëyanuequin bedmeshun quënën nauedmepanëdash. ² Aido quënën nauedmeshun Esuquidistun ëbi chuibeneta caid abëd capucue-neboed Acobo cuëmëdquid chështen

cuesunemepanēdash. Acobon utsimbo Esuquidistun ēbi chuibeneta caid abēd capuceneboed utsi Uan nepanēdash. ³Adoac, Acobo cuesuniosh, qesho tantiash isadaidbo utsibo, Esuquidistu tantiesabo: —Bēdamboen Edodesēn naosh — quepanēdash aido. Adec onquesho tantiash Edodes: Isadaidbon pan bidisquesa tantiaid ushē choec, quequin Esuquidistun ēbi chuibeneta caid utsi, Petedo cuēmēdquid, bedmeshun quēnēn nauedmepanēdash. ⁴Aden quēnēn nauedmeshun Petedo cuenushe qeshun sondado 4ted quēnē nuntan tabadmeshun pan nami uambocquid petequid tantiaid ushētedi naimēdambi ambi naid icsa Petedo chuimenuquin Edodesēn caimpanēdash. Adnubien quēnē nuntanshun Petedobēdta mētaniaid sondado daēd uenubi utsi daēdshun shēcuē ēctabēdquid Petedo isec tabadpanēdash. Aid isquidotedi badiadnuc puduedshun isanec ushē abuctotsan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtsēcnubi badiadnuc isboedo choapanēdash. Adecbidi isboed utsibo inchēshēmbi padpiden isec choapanēdash. ⁵Adnubien Esuquidistu tantiaquido iccuededash Nuquin Papa Petedo quēnēn nauedaid chiec yuec onquepanēdash.

⁶Adshumbic, Badiadshun Petedo bēmembī, quequin Edodesēn tantianubi aid inchēshēmbi Petedo bucun mētaniacchobi ushnubi ⁷Nuquin Icbon chomiaid, ambi uaid mayan bēda, nibēdquiochoedi Petedon dayun choan quēnē nuntan comapenec chēnquepanēdash. Aidēn Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mētaniaid mēchiquidpanēdash. ⁸Adtanquimbien Nuquin Papan uaid mayan bēdan: —Chinēshēdtanec tapucudta —cac Petedo chinēshēdtanec tapucudpanēdash.

Adsho isash: —Min dashcute bēntsecquid dasiuidshun ēbi tsiban —quianec nidsho ⁹Nuquin Papan uaid mayan bēda nidsho isacbimboequin abimbo tantienquiocquin Petedon tsibanampanēdash. ¹⁰Adec nidquimbi sondado abēdta mētaniaidēn tantienquio icnubi datanshun shēcuē isquid daēdshumbidi tantienquio icnubi aidotsen datanoashumbic umanuc puduenuenubi shocosh shēcuē abembi shēcniadpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampanēdash.

¹¹Abēd icboed nibēdnubien Petedo padpiden tantiaquiec: —Edodesbēd isadaidbo, Esuquidistu tantiesabo, ēbi cuesunete bunsho isun Nuquin Papan ēbi puduemenuen ambi uaid mayan bēda chomiosh. Abimbo iccosh —quianec Petedo nidpanēdash.

¹²Adec nidequi Nuquin Papan abi puduemeboed tantiequi Uan cashumbic Madcos caidēn titan shubu yacno Petedo chopanēdash. Aidēn tita Madia cuēmēdquid icpanēdash. Ambobi Esuquidistu tantiaquid dadpen iccuededec Nuquin Papa chiec onquepanēdash. ¹³Adnubien choshon Petedon shēcuē tosh-toshcasha tantiash chido yua Doda cuēmēdquid isnec nidtopanēdash. ¹⁴Aid shubu shēcuē yacno choshon Petedon cuēnsho tantiash bēdamboshē iquequi shēcnenquio yec aucbidi titinquec: —Petedo shēcuē yacno choash nidec —quequin iccuededquido chuituidpanēdash.

¹⁵Adsho Nuquin Papa chiec iccuededquidon abimbo tantienquiocquin: —Muequi mibi nec. Aidida ispash neba —quepanēdash iccuededquido.

Adoaquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bēda ischitashien nec —quepanēdash tantiesā.

¹⁶ Adnubi padpiden Petedon tosh-toshcasha shécnequin isash: —¡Tso! Abimbo caic —quecuededpanédash.

¹⁷ Adnubien médante uic-uiccaic Petedo: —Onquenquo yec tabadquin tantitata. Ēbi nashunquin Nuquin Ibon naboed chuibanu —quepanédash Petedo abi quénèn nauedacnoshon Nuquin Papan puduemaiad chuibanec. Aden chiash: —Ēbi puduemaiad Esuquidistun utsi, Acobobédta Esus tantiaquid utsibo chuitanta —quianec puduenanec utsi yacno Petedo nidpanédash.

¹⁸ Adashic, badiadnubi quénè nuntan Petedobéd icboed sondadotedi: —¿Mitsimbo nuquibédta mètaneboed icpec? Nibèdeque. Is —quec dacuédpanédash.

Adashic, Petedo nibédec, quequin sondadon chiac ¹⁹ Edodesèn: —Nibèntan —cac nidshun sondadon istuidenquiocsho isun quénè nuntanshun Petedo isquido ambi quénèn tabadquin nabamboed chuimeshumbi aidotedi Edodesèn cuesunemepanédash.

Edodes unésaid

Adashic, Edodes nidaid Udeya caid yacno abi tabadacnoësh puduanec shubu dadpen icquid Sesadeya caid yacno choash tabadpanédash. ²⁰ Sesadeya caid yacno anoentsécbidi shubu dadpen icquid Tido caid icnubi aid yacnoësh anoentséqui shubu dadpen icquid utsi Sidon caid icpanédash. Tido caid yacnoquidbéd Sidon caid yacnoquido Edodesbéd chushcananquido icboedi padenquo yanec tabadpanédash. Adec chushcananenquo yec tabadquin, Sesadeya yacno Edodes choash tabadosh, qesho tantiaash Edodesèn yua Bédasto cuémédquidbéd onquenuec chochopanédash. Cho-choshon, Ēmbi pete nibédsho isun Edodesèn menioshi. Nēbi aid chushcainquo iquembi, quiosh, quequin cho-choquidon chuituidpanédash. Aden chiac adomboembidi Bédaston Edodes chuiopanédash. ²¹ Aden adomboembidi Bédaston chuiasho tantiaashun Edodesèn: —Ēmbi chiacpadèn cho-choata, quiosh Edodes, quequin chuita —cac cho-choquido Bédaston chuiopanédash. Aden chiac Edodes onquesho tantianuec ambi chiacstedec ushash dashcute naccuioquid dasiuidash abembi onquenuec tsadten abuc tsadtoash onquec taēpanédash. ²² Aid onquesho tantiaash: —Nidaidēnshun tishaid onquiaidpenquo nec. Abuc tabadquid nuquin papa caidien Edodes nechitec —quec iccuededquido comapenec cuēdcuededpanédash. ²³ Aden chuisho tantiaash, Mimbi Nuquin Papa caidpenquo nebique. Aidi abia yampid abentsécquiobi iqueque. Auidi tantitata, quequin chuitiadquidēmbi chienquo icsho tantiaashun Nuquin Papan chomaidēn ambi uaid mayan bédan daicsa uac chichan dadpen yanec Edodes badedi unēspanédash.

²⁴ Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanédash.

²⁵ Adnubic Antioquiya yacnoquidon Esuquidistu tantiaquidon aton piucquid ambi menuen dayun uaid Bednabebédta Saudo meniac buanec Edusaden yacno choshon anocquido Esuquidistu tantiaquido menetanashic auëshquo puduanec Antioquiya yacno nidoapanédash. Aidobēdi Uan cashumbic Madcos caid nidpanédash.

Saudobédtabi Bednabe nidmiaid

13 Adashic, Esuquidistu tantiaquid utsi-utsiec Nuquin Papan yuecquo icshun nanun chiaid chuiquido Antioquiya caid yacno tabadnubi Esuquidistu tanti-

amenuen chuibanquido tabadoapanēdash. Nēdic, Bednabe; utsibic, Simon, Dada Chëshē caid; utsibic, Sidene yacnoësh choquid, Dusio cuēmēdquid; utsibic, Caddidia yacnoësh choquid, tsusio dapa, Edodesēn shubun icquid icboedi, Manain cuēmēdquid; utsibic, Saudo cuēmēdquid. ²Aidtedishun Esuquidistuidi tantianuen buna mēmunsho Nuquin Papan Mayanēn: —Saudobēdtan Bednaben aid daēdshun ěmbi chuibocpaden ma napanuna —capanēdash. ³Adoquien, buna mēmunquin nainash Nuquin Papa chiec onqeshun abēd icquid utsibon mēdanten Saudo Bednabebēdta mamishquin nadopanēdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanēdash abēd icquidon.

Chipide yacnoshon Esuquidistu chuibanaid

⁴⁻⁵Esus tantiaquidon mamishquin chiaquien Nuquin Papan Mayanēn nidmiac Saudobēd Bednabe Antioquiya yacnoësh puduanec nidpanēdash. Aid daēd nidsho isash Uan cashumbic Madcos cain cuēnaid nidpanēdash dada uate buanshunec. Aidtedi nidanec acte cuēman shubu dadpen icquid Sedusia caid yacno choash cano antabēdtoanec acte nēnantanquio nidaid nacnēdquid Chipide caid yacno nidtampanēdash. Chipide yacno choash nidequi shubu dadpen icquid Sadamina caid yacno choapanēdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebēdtan chuibanpanēdash. ⁶Adoshombic, Sadamina yacnoësh nidquin chuibidanec Chipide cuēma utsiuc shubu dadpen icquid Pabos caid yacnotsen choash tabadoapanēdash. Ambo tabadquin isadaidbo Badesus istuidpanēdash Pabadobēd icquidon. Satanasēn tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquo nebi, quequin muaquin chuipanēdash Badesusēn. ⁷Aidi Pabos yacnocquido tsusion shubun tabadpanēdash. Anocquido tsusio cobednadod caid Sedquio Paudo cuēmēdquid icpanēdash. Aidi tantiaquiono, quec tabadquin, Isedquido chosh, qesho tantias, Aidon chuibanaid tantianu, qeshun Saudobēdta Bednabe chomeshun tsusion yuedpanēdash. ⁸Yuedac Pabadon Esuquidistu chuibanpanēdash. Saudo quequin isadaidbon cuēnubi Pabado quequin isadaidpembon cuēmpañēdash. Aden Pabadon Esuquidistu chuibanasho tantiec tsusio tsadsho isun Badesusēn tantiamenquiocnuen utsi uain chuioapanēdash. Ambi ompoaid ismianesa Badesus icsho Edimus cuēmpañēdash. ⁹Aden utsi uain chuisho tantiasshun Nuquin Papan Mayanēn tantiamiac Edimus bēisequi Pabado: ¹⁰—Satanasēn bacuē yec bēdamboen naidbēdta bēdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaquin muaquin mimbi adenuidi chuibanecque. Tantia. ¹¹Nēbi con Icbon mibi mēyanquin bēshu uaindac. Ushē chēnqesho mimbi yuen isenquio iquendac —quepanēdash Pabado Edimus chiec.

Aden chuibon Edimusēn ěshē cuen-cuempambo yec inchëshbudacimboc yanash: —¿Tsuntsimbini mēdinshun buampeba? —quequin nibēdacno mishquin uēmbampanēdash. ¹²Aden Edimus bēshu uacsho isec: —Nuquin Icbon chiaid abimbo iquec —quiash tsusio Sedquio Paudo cuēmēdquid Esuquidistu tantiaquid yampanēdash.

**Nidaid utsi, Pisidia caidën shubu dadpen icquid Antioquiya
caid utsi yacno Bednabe Pabadobëdi choash tabadoaid**

¹³ Adashic, Chipide yacnoësh puduanec nidaid Pampidia caid yacno Pabadobëd icquido canon potepanëdash. Aden potiash nidaid Pampidia caid yacno choash Pabadobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabadobëd Bednabe pudundoanec nidquin shubu dadpen icquid Pedque caid ¹⁴ isbidanec nidaid Pisidia caid yacno shubu dadpen icquid Antioquiya yacno chopanëdash. ¹⁵ Ambobi tabadequi chonoadtemaid ushën Nuquin Papan chiaid chuibante shubun puduedash tabadpanëdash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiametiadquio ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanëdash.

¹⁶ Adoquien abi tsadacnoëshi nidtoashi Pabado: —Nuquin Papan naid mibi chiembique. Tantiaquiota. ¹⁷ Nidaid Equipito caid yacno nuquin tsusedpabo tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquio bëyucanquin tsusedpabon tishmiaidën tishmiaid caidaido Equipito yacnoshon buanubi ¹⁸ tsusedpabon Nuquin Papan chiaid chieshëmpampic. Adoquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic. ¹⁹ Aden buanquin nidaid Canan caid yacno buanshun anocquido isadaidpembo istuidmeshun matses utsibo utsiutsiectsëcquiec 7tedi icquido naimbudmeshun aidon nidaidtedi nuquin tsusedpabo menebampampic. ²⁰ Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmëdquid tsusedpabo chuiquid icmepampic. ²¹ Aidi isadaidbo chuiquid icnubic, Matses utsibo ancaquidpadquid bunebi, quequin tantiashun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmëdquid, isadaidbo ancaquid icmepampic. ²² Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmëdquid tsusedpabo ancaquid icmeopampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid, Isain mado, ëbi bëdamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanëdash Pabado aton matses Antioquiya yacnoquido tantiamenuen chiec.

²³ Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanëdash. ²⁴ Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanëdash. ²⁵ Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun:

¿Ēbi icsambocquid icsho atotsieshun mibi choec? quequin chuiquidquio Nuquin Papan icmioshi, caindami, quepanēdash Uan acten mentoanquid —quepanēdash Pabado.

²⁶ Aden Uan padon chiacpaden chuibanashic: —Abadauanēn tishmiaidēn tishmi-aid caidaido nuqui icsho nuquitedi icsaid bedshunash abided cuidadec Esuquidistu unēsapanēdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanēdash. ²⁷ Padnuen, Aton madombo Nuquin Papan chomiaid Esus nec, quenquiocquin Edusaden yacnoquidobēd aton tsusio dapabo, Icsambocquid neque. Unēs ua, quequin chuipanēdash. Aden chuiquin utsibēd iccuededte ushēn-ushēnquien abi isec onquiaid Nuquin Papan dada uamiampicpadembi aidon napanēdash. ²⁸ Esuquidistu icsaid nibēdquidquio caiqui, Icsambocquid neque. Aid unēs uatiadquidi mibi nec, quepanēdash Isadaidbo Pidato caic. ²⁹ Adoquien Nuquin Papan dada uamiampicpaden nabanambien Esuquidistu cuesten dectanquin unēs uacsho chicshun, Ēbi unēsacsho nēidēn ěbi nauedec, quequin ambi shēcūē uain nacnenaid chucanquio Osen Esus nauedpanēdash. ³⁰ Adoacsho Nuquin Papan Esuquidistu uincuemi-³¹ capusho Cadidia yacnoēsh Edusaden yacno abēd capuceneboedon aidi isbempanēdash. Aden isun aidombi Esuquidistu chuibededec. Adembidi aid isboedobēdtambi abimbo chuibanquidquio nebi — quepanēdash Pabado.

³² Aden chiashic: —Abi chiambique. Tantia. Nuquin Papan chometequid ambi chuipampid tsusedpabon isenquiocnobi ³³ Nuquin Papan uincuemiasho nuqui isonaid aidi nec. Aidi chuiquin Nuquin Papan dada uamiampid nad iqueque. Tantia. Chuinu.

‘Con madombo mibi nec.

Nēbi ěmbi uincuemiaqui ěmbi chiactedi mimbi naimbudoc.

Adosho isun ěbipadquiocnoc chuiquid dapa mibi icmembī.’

Aden ěndenquimboshē aton mado tantiaquin Nuquin Papan chiampic. ³⁴ Adecbidi ambi uincuemetequid Esuquidistun nami chodquesa icpanēdash. Aid chuiquin dada uamiampid nad iqueque. Tantiata. Chuinu.

‘Dabid chiampicpadembi mibi icsaisa icsho ěmbi bēdamboen isaid mibi nec, mado,’ quequin Nuquin Papan dada uamepampic. ³⁵ Ambi dada uamiampid utsi nad iquec: ‘Icsaisa icsho aton nami chodquesa icmenuna,’ quequin Nuquin Papan chiampic.

³⁶ “¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquin nabanash Dabid unēsacsho isun aton mēdimbon nami chodquiacno Dabid chococac aidēn namitsen chodquepampic.

³⁷ Nuquin Papan uincuemetequidēn namien chodquesa icpanēdash. ³⁸ Aidi icsainquiocquid yec ěbitedi icsaid bedshunash abided cuidadpanēdash. ³⁹ Adoac abi tantiaquidquiot- sen icsaisabidi Nuquin Papan isec. Nuquin Papan naden nata quequin dada uamiampidtedi matsesēn natiapimbo iquec. Aden ambi chiacpaden natiapimbo yec, Nuquin Papan bēdamboen isaid nebi, quetiapimbo icboedēmbi, Matses icsaquid icsho cuidnushe quia- sh abided cuidadec Esus unēsapanēdash, quequin tantiasho, Esuspadquid icsaisa Nuquin Papan nuqui isec. ⁴⁰ Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

⁴¹ ‘Ēmbi ěndenquimboshē dada uamiampicpadembi adquid chomembī.

Ëmbi chomiaid isquidon chiac mimbi tantienquoio icpec.

Adquid yec, Tantiadempambo iquec, quec mamëshumênquid ëbëdi tabadtiapimbo iquendac.

Adquid icmane qeshun tantiaquiota'

—quepanëdash Pabado iccuededquido chiec.

⁴²Aden chuibudashic Pabado Nuquin Papan chiaid chuibante shubu yacnoësh abëd choboedobëd puduenanec nidsho isash: —¿Iccuededte badiad utsi chonoc iccuededquin chuinuecta mibi choape? —quepanëdash iccuededquid utsibo Pabado chiec. ⁴³Aden chianec Pabado bëd Bednabe nidsho isun isadaidbo utsin-utsinquiembëdtan isadaidpembo isadaidbopadquid icnuequid utsin-utsinquien tsi-banampanëdash. Aden abi tsibanansho isash: —Nuquin Papan bëdamboen isaid yec bëdamboec tabadta —quepanëdash Pabado Bednabebëd.

⁴⁴Adashic, chonoadtemaid ushë icnuc Nuquin Papan chiaid tantianuec Antioquiya yacnocquid dadpen iccuededoapanëdash. ⁴⁵Dadpen iccuededsho isash isadaidbo tsusiobo: Ëmbi chuibanansho tantianuec aidtedi choenquoio iccosh, quequin tantiec nëishpanëdash. Adec nëishash: —Mimbi Nuquin Papan chiaid icsamboen chuibanec —quepanëdash Pabado caic.

⁴⁶Adoquien, dacuëdenquoio yec Pabado bëd Bednabe: —Mibitedi con matses icsho, Nuquin Papan dada uamiampid chuibanu, queboedëmbi tantiesa icsho isun mibi chuibanenquoio iquembi. Mibi tantiesa yec Nuquin Papabëd tabadte bunesabidi icnuc isadaidpembo Esuquidistu chuibanendambi. ⁴⁷Nuquin Icbon naden tantiamioshibique. Tantia. Chuinu.

“Isadaidpembo ëmbi chiaid chuibanquid mibi icmembali

ma nidaidtedi yacno ëbi tantiaquido ëbi yacno puduedquid ma icpanuna,”

quequin chioshi —quepanëdash Pabado abi chieshênquido isadaidbo Nuquin Papan dada uamiampicpaden chiec.

⁴⁸Adsho tantias isadaidpembo: —¿Padtec! Nuquin Papan chiaid bëdamboshë iquec —quecuededpanëdash. Adoquien, Nuquin Papan ëbëdi mibi tabadmendambi, quequin chiaid ambi tantiamiactedi Esuquidistu tantiaquid yampanëdash.

⁴⁹Adec Esuquidistu tantiaquid yanash auëshquoio dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanapanëdash. ⁵⁰Adosho tantias, Pabado icsambocquid nec, quequin isadaidbo tsusiobon Antioquiya yacnocquidon chidobobëdta anocquido chuiquid dapa nëishmeshun Pabado bëdta Bednabe mëyantinquin ashunquoio nidmepanëdash. ⁵¹Aden nidta cac puduanec nidtuidash, Esuquidistu ëmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanëdash. ⁵²Pabado bëd Bednabe Antioquiya yacnoësh nidan Antioquiya yacnocquid Esuquidistu tantiaquido: —Bëdambo iquebi —quecuededpanëdash. Adembidi aidtedi aton Mayan Nuquin Papan menepanëdash.

Iconio yacno

14 Adashic, Pabado bëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanëdash. ²Aido Esuquidistu tantiaquid yanubi isadaidbo utsibo Pabado chuibanaid tantiatiapimbo icquin Esuquidistu tantiaquido

muaquin chuiquin isadaidpembo utsibo nëishmepanēdash. ³Aido nëishmiambi Iconio yacno yuec tabadquin Pabadon Bednabebēdtan dacuēdenquiocquin Esuquidistu chuibampanēdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobēdta Bednabe icmepanēdash. ⁴Aden icmiac aid daēdshun nadatiambocquin nasho isash, Isadaidbo tsusiobon chuibocpadec Pabadobēd Bednabe icsambocquid nec, utsi-utsiec quenubien, Ambi chi-aid abimbo iquec, utsibo quepanēdash. ⁵Aden chuishumbic, Pabadobēdta Bednabe cuestanquin cuēnoten se-senuequin Esus tantiesabo isadaidpembon aton tsusio dapabobēdtan cainubi adembi isadaidbon aton tsusio dapabobēdtan cainoapanēdash. ⁶⁻⁷Aden caimbededosh, quequin tantiaquidēn chiac cuenec nidequi nidaid Dicaonia caid yacno Pabadobēd Bednabe choash shubu dadpen icquid Disteda caid yacno choash tabadquin Pabadobēdtan Bednaben Esuquidistu chuibampanēdash. Adtanec auēshquo puduanec nidec shubu dadpen icquid Dedbe caid yacnosen choash tabadquin adomboembi Esuquidistu chuibampanēdash. Adtanec auēshquo puduanec nidshun dēuequiec shubu dadpen icquid utsi-utsiec yacnoquidotsen chuibampanēdash.

Disteda yacno

⁸Disteda yacno tabadnubien anocquid taicsaidi anin tishaid caputiapimbo icpanēdash. ⁹Aidi Pabadon Esuquidistu chuibansho tantiec, Esuquidistun ēbi bēdamepatsiash, quec otacquo tsadpanēdash. Aden caputiapimbocquidēn tantiacpadomboen Nuquin Papan Pabadotsen tantiamiac ¹⁰caputiapimbocquid comapenen bēisquin: —Nidto —Pabadon cac badedi nidtoash taicsaid bēdanash capupanēdash.

¹¹Aden taicsaid bēdamic capusho isash anocquido aton onqueten cuēdcuedequin: —Disteda yacnoquidon tantiaid matsesbimboec yanash abucuēsh budoshe. Nēid daēdi isec cho —capanēdash. ¹²Adtanequi Bednabe otacquo tsadquid icsho isash ambi tantiaid abentsēc Upited icnuc Upited cain Bednabe cuēnquimbi Pabado chuiquidquo icsho isun ambi tantiaid utsi Medcudio icnuc Medcudio cain Pabado cuēmpañdash Disteda yacnoquidon. ¹³Aden cuēnsho tantiaishun baca bēnē daēd bēec: Mibi daēdi tantiaquido Disteda yacnoquido nec, quequin, Ismenu, quequin ambibi tantiacbimboecnuc nacnenaid Upited caid dayun uaquido baca cuesunenu, quepanēdash.

¹⁴Aden baca cuesunenuen bēsho isun abi dasiuidaid aton dashcute bēntsecquid shoyonquin cancheuidashic iccuededquidon nēnantanquo nidash Pabadobēd Bednabe comapenec nadpanēdash: ¹⁵—Ēbi daēdi mibipadquid matsesquo nebi. Mimbi tantiacmaid nebique. Baca cuesunenda. Chiaid bēda mibitedi naden chuinuec chobi. Nuquin Papa caid abentsēcquiobi iquec. Aidēmbi abubēdta nidaid uashumbic aidēnquiocquidtedi uabanampidquido neque. Aiduidtsēqui tantiaquin ambi uaidbimboecnuc matsesēn nacnenaid tantiesa icta. ¹⁶Ēndenquimbo Nuquin Papan, Adoenda, cainquiocnoc matsesēn ambi tantiacpaden nabampampic. ¹⁷Aden, Adoenda, cainquiocquimbi, Abitedishun icbo icquin bēdamboquid nebi, quequin ismequin ue secamedenequinc, cuēte bacuēmequinc, nuqui penun tiedēn nitsimbeniaid canimequinc caquin Nuquin Papan nac bēdamboen nuquitedi pebededec. Aden nabanquin Nuquin Papan, Bēdambo iquebi. Cuishon, camiaido nuquitedi nec —quepanēdash Pabadobēd Bednabe Disteda yacnoquido chiec. ¹⁸Aden chuido-chuidoquido baca cuesunenuen icpanēdash Disteda yacnoquidon.

¹⁹ Adnubien Antioquiya caid yacnocquidobēd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid yacnocquido nēishcuededpanēdash. Adec nēishcuededshun Pabado cuēnoten se-siash, Unēsosh, qeshun nimbanquin buanshun shubu nibēdacno Pabado netampanēdash. ²⁰ Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobēd Disteda yacno choec shubun puduedpanēdash. Badiadash puduanec shubu dadpen icquid Dedbe caid yacno Pabadobēd Bednabe nidoapanēdash.

Nidaid Sidia caid shubu dadpen icquid Antioquiya yacno choaid

²¹ Adec Dedbe yacno choash tabadquimbi Pabadobēdtan Bednaben chuibanac Esuquidistu tantiaquid dadpen yampanēdash. Auēshquio puduanec nidoaic padpidec Disteda caid yacno choash tabadquin, Dadpen tantiamequiono, quequin chuibampanēdash. ²²⁻²⁴ Aden chuibanshumbic: —Natiastianquid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nēbi dayacquio yec tabad —capanēdash Pabadon. Adotanquin ambia Esus tantiaquid utsi-utsien Pabadobēdtan Bednaben: —Bēdamboec tabadquin ismequin Esuquidistu tantiaquid utsibo chuiban —capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmnuquin chiec onquepanēdash. Aden Nuquin Papa chuiquin naimbudquin, Nēmbocquid mibi tantiaquido bēdamboen dayun uata, Papa, quequin chianec Pabadobēd Bednabe chedo Disteda yacnoēsh nidoapanēdash. Adecbidi Iconio yacno choashun adomboembidi chuibanoapanēdash. Adecbidi Antioquiya yacno choashun adomboembidi chuibanoapanēdash. Antioquiya yacnoēsh puduanec nidec nidaid Pisidia caid datambēsenec nidaid Pampidia caid yacno choash nidec ²⁵ shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanēdash. ²⁶ Auēshquio cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash. ²⁷ Ambo choash tabadquin anocquido Esuquidistu tantiaquid utsibobēd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobēdtan Bednaben chuibampanēdash. Isadaidpembo dadpen Esuquidistu tantiaquid yamposh, quequin chuipanēdash. ²⁸ Adtanequi yuec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

Edusaden yacnocquido iccuededec tantianu quiaid

15 Pabadobēd Bednabe Antioquiya yacno choabicnubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dēbid dētemesa abi yacno Esuquidistun yuedtemaid nendac, quequin chuipanēdash. ² Adnubic Pabadobēd Bednabe Antioquiya yacno choash tabadquin aidon chiaid tantiash: —Nuquin Papan aden chiambo iqueque. Aden chienda —quepanēdash.

Adsho comapenec cuēdquin chushcapanēdash. Adsho tantiashun abi chuiquidon, Edusaden yacno nidshun chushcanamboed chuitanta, quequin Pabadobēdta Bednabe chuishumbic Esuquidistu tantiaquid utsibo chuioaquin aido nidmepanēdash. ³ Adoac Antioquiya yacnoēsh puduanec nidec nidaid Penisia caid yacno

choash tabadquin, Isadaidpembotsen Esuquidistu tantiaquid yamposh, quequin chuiapanēdash. Adsho tantiash: —Aid tantiec bēdambo iquebi —quepanēdash anocquid Esuquidistu tantiaquido. Adtanec auēshquio nidequi nidaid Samadia caid yacno choash tabadquin adomboembidi chiac adquiecbidi, Bēdambo iquebi, quepanēdash anocquido. ⁴Auēshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobēdtan Bednaben chuibanoapanēdash. ⁵Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dēbid dētemetiadquidi nec. Nuquin Papan naden nata quequin Moises dada uamiampid nabantiadquid neoaic —quepanēdash.

⁶Adoquien Esuquidistu ambia tantiaquido tsusiobobēd Esuquidistun ēbi chuibeneta caido: Tantiabono, quiaash onquecuededpanēdash. ⁷Adec yuec onquecuededash nidtoash Petedo nader onquepanēdash: —Chuinu. Tantiata. Ēnden Nuquin Papan naden chuipondashi: “Isadaidpembo Esuquidistu tantiaquid icmete bunebique. Aidotsen chuibanta,” quequin chuipondashi. Aden ěmbi chuioasho mibitedishun tantiondac. ⁸Ēmbi isadaidpembo Esuquidistu chiac abi tantiaquid aido yampondash. Matsesēn tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniacadembi isadaidpembo meneoapondash. ⁹Utsibo nec, quenquiocquin aidotsen tantiamequin paucoapondash. ¹⁰Aden Nuquin Papan nasho isun, ¿Atotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? ¹¹Padenquio icnuna. Matsestedi icsaquid icsho cuidnushe quiaash abided cuidadac, quequin tantiaquiec unēsash abēdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanēdash Petedo.

¹²Aden Petedon chuiquin ěnambic Pabadotsen Nuquin Papan tantiamiac ambi nadatiambocquin naquin isadaidpembo ismebanaid chuiapanēdash. Adem-bidi Bednaben chuioapanēdash. ¹³Aid daēdshun chuibanquin nainan Esusēn utsi Acobo, Esus tantiaquido tsusio dapa, nadpanēdash: —Ēmbitsen chuinu. Tantiata. ¹⁴Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibēdta aton matses icmiac. ¹⁵Adomboembidi Nuquin Papan chuimiaidēn dada uampid nad iqueque. Tantiata. Chuinu:

¹⁶“Isadaidbobēd yuec tabadenquicboedi padpidec choash aidobēd icoaindabi.

Dabid padon tsyuecquido isadenquicboedi isadcuenendac

¹⁷ma aton Icho matsestedishun istuidpanuna;

ma adembidi isadaidpembon ěmbi cuēnaidon aidbidi istuidpanuna,

¹⁸quec Nuquin Icho ambi ěnden tantiampicpadomboen chiaid nec”

—quiahic abi Acobo onquec: ¹⁹—Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquio ictiad.

²⁰Nēiduidtsēqui dada uaquin isadaidpembo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chidouidtsēqui chudta; adembidi, min bēnēuidtsēqui chudmeta; adembidi, Nēish tētaniaid itacchobi codocaid penda, quequin isadaidpembo chuibanuna. ²¹Adec Moisesēn

dada uaid iccuededquin isec nuqui onquedenec. Aid icnuc, Adomboembidi nata, quequin isadaidpembo chuinuna —quepanēdash Acobo iccuededquido chiec.

²² Adashic Esuquidistu tantiaquido iccuededec onquec enēdshun ěmbi dada uaid Antioquiya yacno buanuec Edusaden yacnocquid daēd nidta, quequin Pabadobēdta Bednabe nidmepanēdash. Abentsēc Udas cashumbic Badsabas cuēnaid; utsibic, Sidas cuēmēdquid. Aid daēdi Nuquin Papan chiaid comapenen tantiaquidquio icpanēdash. ²³ Isadaidpembo chuiquin Edusaden yacnoshon Esuquidistu tantiaquidon naden dada uapanēdash:

“Esuquidistun ěbi chuibeneta caidobēdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobēdta nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta. ²⁴ ěbēd icquido nēuēshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. ²⁵ Aden chuisho tantiashun nēmbocquidobēd iccuededec onquequin abentsēcshun tantiacbimboen dada uaombi. Aidi nēmbocquid daēdi Pabado Bednabebēdta buantan, quequin chiemi. ²⁶ Unēsmane, quenquio yec capucuenequin Esuquidistu chuibanquido Pabadobēd Bednabe nec. ²⁷ Adquid aid daēd icsho isun aid chedobēdta Udas Sidas chedo mibi yacno nidmembi. Adoac ěmbi dada uacpaden ma mibitedi chuiopanuna abimbo iquec camenuen. ²⁸ Nuquin Papan Mayanēn ěbitedi tantiamiacpaden isadaidbon naden nata quequin chiacpaden nata mibi caisa nebi. ²⁹ Nēidtedtsēqui ěbitedishun nata caid nec: Nuquin Papan uaidbimboecnuc nacenaid tantiaquin utsibon abi yacnoshon sanaid penda; adembidi, min chidouidtsēqui chudta; adembidi, min bēnēuidtsēqui chudmeta; adembidi, mimbi nēish cuesuniaid intacchobi codocashun penda. Adoac ěmbi chiacpaden nabanec mibi bēdambo icpec. Padi aidtedtsēqui chiemi.”

³⁰ Aden dada uaquin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menepanēdash. ³¹ Aden meniac isbanash: —Mimbi bēboed dada uaid isash bēdambo iquebi —quepanēdash isadaidpembo Antioquiya yacnocquido.

³² Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamepanēdash. Adomboembidi chuibanquin Sidasēn tantiameoapanēdash. ³³ Aden dadpen ushquin chuibanshun: —Edusaden yacno nidoaibi —caquien:

—Ai, mibi nidsho isash unēsquio icquimbi mibi chomequido yacno nidtan, mibi caimbi —quepanēdash Esuquidistu tantiaquido Antioquiya yacno tabadquido.

³⁴ Adec aido Edusaden yacno nidnubien ³⁵ Pabadon Bednabe chedobēdta Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenuen chuibampanēdash.

Pabadobēd Bednabe cuēshēdaid

³⁶ Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanēdash.

³⁷ Adoquien: —Ma Madcosbidi nidoanu. Chuita —quepanēdash Bednabe.

³⁸ Adoaquien: —Chieshec aidi cuëshëdondashe. Padi. Nuqui daëdtsëqui nidnu. Nid —quepanëdash Pabado.

³⁹ Adoaquien Bednabe aden tantienquo yec Pabadobëd comapenec onquiash Madcosbëd cano antabëdtoanec Chipide yacno nidoapanëdash. ⁴⁰ Adnubien Pabado Sidas abëd Edusaden yacnoësh choboed caic: —Nuquibi nidnuna —quepanëdash.

Adec aid daëd nidnuesho isash anocquid Esuquidistu tantiaquido: —Ma Nuquin Papan mibi daëd bëdamboen nidmequin ma mibi bëdamboen namepanuna —cac Pabadobëd Sidas nidpanëdash. ⁴¹ Adanec nidaid Sidia caid yacno choash capucenequin Esuquidistu tantiaquido icuededacno puduedshun bëdamboen tantiamenuen chuibanpanëdash. Aden chuibeneshumbic nidaid Sidisia yacno choshon Esuquidistu tantiaquido shubu utsin-shubu utsinqueic icuededacnomboec puduedcunequin Pabadon chuibanoapanëdash.

Pabadobëd Timoteyo nidaid

16 Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobëd Sidas choapanëdash. Ambo Esuquidistu tantiaquid Timoteyo cuëmëdquid tabadpanëdash. Aidën tita isadaidbo Esuquidistu tantiaquid icnubi aidën papa isadaidpembo quidienco matses icpanëdash. ² Timoteyo bëdambocquid nec, quequin Disteda yacnocquidon Pabado chuipanëdash. Adomboembidi shubu dadpen icquid Iconio yacnocquidon chuioapanëdash. ³ Aden dadpeshun chuisho tantias Timoteyo buante bumpanëdash Pabado. Adec, Timoteyo buanu, qeshun ëbi capucueniacno isadaidbo dadpen iqueque. Aidon Timoteyo isash, Aidën papa quidienco matses icnuc aton madobidi isadaidpembo nec, aido quenushe qeshun Pabadon Timoteyon shui dëbid dëtemepanëdash. ⁴ Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaqin chiaid Pabadon chuioapanëdash. ⁵ Adembidi Nuquin Papan chiaid chiac ënden Esuquidistu tantiaquidon tantiabenuicnobi utsi dadpen Esus tantiaquid yanoapanëdash.

Ushquin Masedonia yacnocquid Pabadon isaid

⁶ Adanec nidaid Sidisia caid yacnoësh nidsho Nuquin Papan Mayanën: —Nidaid Asia caid yacno Esuquidistu chuibanuec nidenda —cac Pabadobëd icquido nidaid Pidiquia caidtsen datambidanec nidaid Cadasia caidbidi datambidanec ⁷ nidaid Misia caid yacno chopanëdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanën aido tantiaméapanëdash. ⁸ Adoac nidaid Misia datambidanec shubu dadpen icquid Todoas caid yacno ëbi tabadacnobi chopondash. ⁹ Ambo choash tabadec inchëshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ëbitedi Esuquidistu chuibanec cho —quec onquesho Pabadon tantiapondash. ¹⁰ Aden tantias: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ëbitsen Pabadobëd nidpondabi.

Didia cuëmédquid Esuquidistu tantiaquid yanaid

¹¹ Adanec Todoas yacnoësh puduanec cano antabédtoanec cuebi nidequi acte nënantanquio nidaid nacrédquid Samotodasia caid yacno choash Pabadobéd icquido tabadtuidpondash. Badiadash auëshquio puduanec cano antabédtoanec nidquimbi potebidanec nidaid Masedonia caid yacno ëbitedi chopondabi. Aid nidaidën acte cuëmambi shubu dadpen icquid Niapodis caid yacno pudundoanec ¹² nidequi shubu dadpenquio icquid Pidipos caid yacno domanobo dadpenquioshë tabadacno yuec ushec tabadpondash.

¹³ Pidipos yacno tabadashic isadaidbo iccuededte badiadën Nuquin Papa chiec utsibo onquedeniacno istuidnuec puduanec shubu nibédacno nidequi acte utsi cuëmambi choapondash. Ambo choshon iccuededquido chidobo istuidshun Esuquidistu Pabaton chuibanpondash. ¹⁴ Pabaton chuibanacno chido Didia cuëmédquid shubu dadpen icquid Tiatida caid yacnoësh choquid icpondash. Aidën piucquid bednuec dashcute cuëshaid umu-umumbocquid menebenepondash. Aidi Nuquin Papa tantiaquid icquin Pabaton chuibanubi Nuquin Icbon tantiamiac Esuquidistu tantiaquid Didia yampondash. ¹⁵ Aidbéd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedash Pabadobéd icquido tabadpondash.

Pabadobédta Sidas quënën nauedaid

¹⁶ Adashic padpidec Nuquin Papa chiec onquedeniacno Pabadobéd icquido nidoasho chido yuaidën bëquedtuidpondash. Aidën mayan icsan tantiamiacpaden yuecash nad iquendac, quequin chuisho piucquid dadpen aid chido matsesën meniac aid chidon ambi bedaidtedi abi yuaquid meneoapanédash. ¹⁷ Pabadobéd icquido bëquedtuidshun tsibambëec choec aid chido: —Nëid dadatedi Nuquin Papan nami-aidquio nec. Abi yacno puduedmianquid iquec, quequin chuibanquid nëid dadatedi nec —quec ¹⁸ badiadquidën-badiadquidënquiec comapenec cuédpondash.

Adec cuédtonesho tantiate bunenquio yec amibidi bidiadquin mayan icsa dapuedaid chido chuiquin comapenen Pabaton: —Esuquidistun nadatiambocquin naidënquio dapudenta —cac badedquio mayan icsa dapuduempondash. ¹⁹ Aden dapuduemiatic chido bédanacsho isun abi yuaquidon: —Nëbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneoatiapimbo iquec, quequin tantiasch nëishun Pabadobédta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bëshun utsibon sambanaid anoentsëqui abi chuiquido icsho isun chido yuaquidon Pabadobédta Sidas ambo buampondash. ²⁰⁻²¹ Aden abi chuiquid tsadacno bëash: —Nëid dada daéd isadaidbo nec. Nëmbo choshon abi chuiquidon naden nata quequin chiaid chuibanec. Èbitedi domanobo icquin ambi chiaid ëbitedishun natemaid icnuc matsestedi chushquecuededosh —quepondash chido yuaquido abi chuiquido chiec. ²² Aden chuisho tantiaquidon chiac dadpen cho-choash iccuededquin Pabado bëquidon chiacpadomboen aidontsen chuiocabi chuiquido: —Bëboedon dashcute chicshun cueshcaten cuesta —cac sondadon cuespondash. ²³ Aden comapenen cuesmeshun buameshun quënën nauedmeshun ambi quënën nauedaid ista caid chuiquin Pidipos yacnocquido chuiquidon: —

Puduenanec cuenushe queshun nëid daëdi bēdamboen isquiota —capondash. ²⁴ Adsho tantiashun ambi ista caidēn Pabadobēdta Sidas nēnantanquio quēnēn nauedquin tsadunshun cueste shēcuē uaidēn tausunash puduantanquin quēnē bēdamboen bēdashpanēdash.

²⁵ Aden bēdashash aton shubu dayunquiocquidēn puduedambic inchēshpotsembo Pabadobēd Sidas Nuquin Papa chiec onquepanēdash. Adecbidi Nuquin Papan naid chiec cuēdēmpañēdash. Adec cuēdēnsho utsibon tantianubi ²⁶ comapenec nidaid ishcudnubi mētaniaidtedi mēchiquidpanēdash. ²⁷ Adnubien ista caid isec tsadboedi ushtanec isucunquin isac shēcuē bēdashaid ēnden shēcniac. Adsho isash ista caid: —Quēnēn nauedaido puduen-puduempacnui —quetanec: —Chuiquid dapabon ēbi cuesunemetsiash —queshun siadnuequin chēshte abi tsiusudaid chicsho ²⁸ istanquin Pabadon: —Quēnēn nauedaidtedi nēmbo iquebique. Seshuniadenda —quequin comapenen cuēmpañēdash.

²⁹ Adoaquien, seshuniadtsemboedēn: —Tabote bec cho —cac ambi namiaidēn tabote bedtanquin meniac tabote bedshun sananec badedi quēnēn puduedash dacuēdec uēdēquec Pabadobēd Sidas tabadacno choash danēshēn sebudec shuebudpanēdash. Mibi daëdi bēdambocquid icnubi adquidpenquio nebi, quequin tantiaquin ismepañēdash. ³⁰ Adsho isun Pabadon nidtomiaqui seshuniadtsemboed bēyucanec nidquin aton shubun Pabadobēdta Sidas yuedash: —¿Nuquin Icho yacno puduednush mitsipadequibi ēbi icsaid cuidadpeque? Chui. Tantianu —quepanēdash seshuniadtsemboed.

³¹ Adoaquien Pabado: —Mibibi cuidadtiaimbo iquec. Mibēdta min shubun icquido icsaquid icsho cuidnushe quiash abided ciudadec unēsash Esuquidistu aton Papa yacno puduedash abi tantiaquido yuedquid neque. Mibi icsaid ēnash, Esuquidistu con Icho nec, quequin abimbo tantiaata ³² —queshumbic seshuniadtsemboedbēd icquido Esus tantiamenuen Nuquin Icbon chiaid Pabadon chuipanēdash.

³³ Adoaqui Pabadobēdta Sidas cuesaid chiuē acten bēpanshunquin nainacsho aton shubun icquido Esuquidistu tantiaquido yansho isun aidtedi Pabadobēdtan Sidasēn acten mentobampanēdash. ³⁴ Aden mentobanaqui aton shubun yuedshun pemepañēdash. Adashic, Nuquin Papan chiaid abimbo tantiaquid yec ambi bēdambo icmiaido seshuniadtsemboedbēd icquido icpanēdash.

³⁵ Adashic, badiadash Pidipos yacnoquido chuiquidon: —Nauedaid shubu yacno nidshun quēnēn nauedboed daēd pudueme, quequin chuitanta —cac quēnē yacno nidshun ista caid adomboembidi chuiopanēdash. ³⁶ Aden chiac ista caidēn: —Quēnēn nauedboed daēd pudueme, quequin chuiquid dapabon chiosh, quequin aidon chomiaidēn chioshibique. Dacuēdenquio yec nid —capanēdash Pabadobēdta Sidas chuiquin.

³⁷ Adoaquien Pabado: —Ēmbi naid chuimenquiocquin ēbi daëdi domanobo icsho utsibon isnubi cuesmeposhi. ¿Nēbi puduemenueen utsibo isenquiocnobida ēbi daëdi nidmepec? Padenquio caimbi. Ēbi daëdi puduemenuec ma chuiquid dapabo abibi chopanuna —quepanēdash.

³⁸ Aden chiac puduenanec nidequi abi chuiquido yacno choshon, Mimbi quēnēn nauedmeboed daēd domanobo nec, quequin chuisho tantiash chuiquid dapabo comapenec dacuēdcuededpanēdash. ³⁹ Adec dacuēdec nidequi nauedaid shubuno choash: —Domanobo nec, quequin tantienquiocquin mibi quēnēn nauedmiombi —queshun puduemetanec: —Pidipos yacnoēsh nidtan —capanēdash Pabadobēdta

Sidas chuiquin. ⁴⁰Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bédamboen tabadmenuequin Pabadon chuibampanédash. Aido chuibidanec Pabadobéd icquido nidoapanédash.

Tesadonica caid yacnocquido isadaidbo nëishcuededaid

17 Pidipos yacnoësh puduanec nidequi Pabadobéd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, qesho tantiash Tesadonica caid yacno Pabadobéd icquido tabadpanédash. ²⁻³Ambo tabadec isadaidbo iccuededte badiadën abi nidtenuiapadec Nuquin Papan chiaid chuibante shubu yacno choshon Pabadon Esus tantiamenuen Nuquin Papan ënden chiampid chuibampanédash. Nuqui icsaid bedshunash abided cuidadec Esuquidistu unësaid ambi uincuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanédash Pabadon. Sabado 3ted matamequin adomboen chuibampanédash. ⁴Aden chuibanaqui Esus tantiaquid utsi-utiec yampanédash. Nëidic, isadaidbo utsi-utsiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanédash.

⁵Aden Pabadon chuibanac Esus tantiaquid dadpen yansho isash isadaidbo utisibo nëishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nëishmiac nattia chushquecuededpanédash. Adec chushquec nidequi Pabadobédta Sidas bednuec Ason cuëmédquidën shubuno puduedec nidpanédash. ⁶Ambo choshon Pabadobéd Sidas nibédsho isun Esuquidistu tantiaquido Asombéd icquido bedshun abi chuiquid dapabo yacno Pabado chieshënquidon buanec abi chuiquid dapabo yacno choash: —Nidaid utsi-utsiec yacno capucuenequin chuitemaid chuibanquido nëmbo ⁷choacsho Asonën aid daëd yuedaccosh. Nuqui ancaquid Sesadën chiaid niacquin ancanquid utsi Esus cuëmédquid iquec, quequin chuibanec —quepanédash Pabado chieshënquido abi chuiquido chiec.

⁸Aden, Ancanquid utsi iquec, quequin Pabadobédtan Sidasën chiec, qesho tantiash chuiquid dapabo iccuededquidobéd comapenec chushquecuededpanédash. ⁹Adtanec abi chuiquid Asombéd icquido caic: —Nëbi, ¿Atotsi tantiaquin Pabadobédta Sidas yuedo? quequin mibi chuimetiapimbo iquembi. Yuceshun mibi chomeshun chuimembi. Ëmbi chuimiabi Tesadonica yacnoësh nidenda. Ëmbi chiacpaden nanuequin piucquid ëbi mene —capanédash Tesadonica yacnocquido chuiquid dapabon Asombéd icquido chuiquin. Adoaquien piucquid meniac bedshun: —Min shubuno nidtan —cac nidanepanédash Asombéd icquido.

Bedeya yacnotsen tabadaid

¹⁰Adshumbic bednushe qeshun aid inchëshëmbi Tesadonica yacnocquido Esuquidistu tantiaquidon Pabadobédta Sidas shubu dadpen icquid Bedeya caid yacno nidmepanédash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanédash. ¹¹Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ënden dada uamiampid Pabadon chuibanoasho tantiashun bédambocquid icquin, Abimbobida chuibanoshe. Isbono, quequin Nuquin Papan chiampid isban-isbampanédash

Bedeya yacnocquidon. ¹² Aden isbanec, Abimbo caic, quiash Esuquidistu tantiaquid dadpen isadaidbobëd isadaidpembo Esuquidistu tantiaquido yampanëdash. Adecbidi isadaidpembo chuiquid dapabo quidieco matses utsi-utsiec aton chido che-dobëd Esuquidistu tantiaquid yampanëdash.

¹³ Adnubien, Bedeya yacnoshontsen Pabadon chuibanec, qesho tantiash Tesadonica caid yacnocquido, isadaidbo, Asombëd icquido bedmeboedo, Bedeya yacno choshon anocquidotsen nëishmiac comapenec chushqueuededpanëdash.

¹⁴ Adsho tantiashun Esuquidistu tantiaquidon Bedeya yacnocquidon acte dapa cuëmano Pabado nidmepanëdash. Adnubi Sidasbëd Timoteyo nidenquo yec Bedeya yacno tabadnubien ¹⁵ Bedeya caid yacnoshon utsibon bëyucanquin Pabado buampanëdash. Aden buanec nidequi shubu dadpen icquid Atenas caid yacno chopanëdash. Ambo choash abia bëyucanquido: —Ëbi chobocnobidi Bedeya yacno nidoaibi —qesho tantiashun Pabadon:

—Mibi yacno choash, Badedquo Atenas yacno chota, quiosh Pabado, quequin Sidasbëdta Timoteyo chuita —capanëdash. Aden Pabadon chiaquien Bedeya yacnocquido abi yacno nidoapanëdash.

Atenas yacnotsen Pabado tabadaid

¹⁶ Abia bëyucanquido Bedeya yacno nidambi Atenas yacno Pabado tabadquin, Sidasbëd Timoteyo choec, qeshun cainec capuquimbi Atenas yacnocquidon nacenaid isbampanëdash. Aidon Nuquin Papan uaidbimboecnuc nacenaid dadpen tabëcaid papa cain cuënaid ambi tantiaido icsho isash, Nuquin Papa Abentsëc-quiobi iquec, quequin tantiesa Atenas yacnocquido nec, quequin tantiec Pabado unësquo yampanëdash. ¹⁷ Adec unësquo yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampanëdash. Adembidi anocquidon piucquid bednuen aton na sambanshun ismiacno nidshun adomboebidi Pabadon chuibanoapanëdash. Isadaidbobëd onquequin Esuquidistu Pabadon chuipanëdash. Adembidi isadaidpembobëd onquequin Esuquidistu chuiopanëdash. ¹⁸ Anoshon chuibansho tantiash epicudeyo cuëmëdquidën chuinëdacpaden tantiaquido Pabadobëd onquepanëdash. Adembidi tantiash estoico cuëmëdquidën chuinëdacpaden tantiaquido Pabadobëd onquepanëdash. Aido Pabadobëd onquequin Pabadon Esus chuisho tantienquo yec: —¿Atodain comapenec onquequin nëid dadan chuipash? —quepanëdash. Adnubien utsi: —Matses utsibon papa cain cuënaid chuibanec nepanui —quepanëdash. Pabadon Esuquidistu unësash uincuenaid chuisho tantiash adpanëdash. ¹⁹⁻²⁰ Adec onqeshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëash Pabado: —Mimbi chiaid ëmbi tantiacmaid nec. ¿Mìdapadquidquo mimbi chuibaneque? Tantianu. Chuiban —quepanëdash abi bëquido caic. ²¹ Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh cho-choquido badiadquidën-badiadquidënquiec utsin-utsinquien ambi tantiacpaden chuibansho tantianuec iccuededpanëdash.

²² Aden mimbi tantiacpaden chuibanta caquien nënantanquo nidtoshon naden Pabadon chuibampanëdash: —Chuibanu. Tantiata. Mimbi papa cain cuënaid mimbi tantiaid iquec, quequin tantiemi. ²³ Capucuenequin mimbi tantiaidbimboecnuc nacenaid dadpen isombi. Mimbi papa cain cuënaid dadpen tabëcaid icnubi mimbi cuënacmaid abentsëc iccosh. Aid mimbi cuënacmaid icnuc abibimboecnuc nace-

naid nibëdosh. Aton shubumpiuidtsëqui iccosh. Mimbi cuënacmaid mimbi tantiacmaid mibi chuibanu. Tantiata.

²⁴“Ëmbi Nuquin Papa cain cuënaid nidaidbëdtabi abu uashumbic aidënquiocquidtedi uaquidquio nec. Abitedi uaquidquio yec abitedishun icbombo aidi nec. Aidi tabadmenuequin matsesën shubu uashunaidën tabadesa nec. ²⁵Aidi abitedishun Icho icnuc abitedi aton na nec. Adquid icsho, Con na mibi menenu, matsesën aid catiapimbo iquec. Aidën tantiacpadeç ëbitedi nëmbobi tabadebi. Aidën tantiacpadeç ëbitedi tiboquebi. Aidën tantiacpaden ëbitedishun bedbanoaimbi. ²⁶Aidëmbi bëyuc dada uampidën tsyuecquido ëbitedi nec. Aid bëyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taënuec ue yanendac. Adecbidi, inchështanec badiadoaic. Adecbidi, ushë nidash choaic. ²⁷Aidëmbi naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ¿Tsuntsin nabanaid nepec? qeshun ëbi tantiaquin Icho ëbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. ²⁸Aidën nac tiboquequid ëbitedi nebi. Aidën nac capuquidbidi ëbitedi nebi. Adembidi min matsesën dada uampid adomboen chiaid nad iqueque. Tantiata. Chuinu: Nuquin Papan bacuëbo ëbitedi nebi, quequin min mëdimbon chuipanëdash.

²⁹“Nuquin Papan bacuëbo ëbitedi iquec tiboquequid icquin matsesën nacnenaid tiboquesa papa cain cuënenquiocquidquid matses nec. ³⁰Ënden matsesën ambi nacnenaid aden cuësho tantiaquin Nuquin Papa, Chën. Adoenda, quenquiocboedi nëbi, Mimbi icsamboen tantiaid ënta, quequin chieç. ³¹Matsesën naid chuibante ushë chonoc matses icsaidbëdta ambi bëdamboen naid chuibanquin Nuquin Papan chomeshun matses icmiaidën cuidbanendac. Ambi abipadquid matses icmiaid, Nuquin Papan matsesën naid chuibanquid icmenu caid unësacsho isun ambi chiampicpaden nanuequin Nuquin Papan uincuemepondash —quepanëdash Pabado Adeyopaco yacno iccuededquido Esus tantiamenuc.

³²Adec aidi unësacsho Nuquin Papan uincuemepondash, quequin Pabaton chuisho tantiaquin utsi-utsiec mamëshumënubi utsi-utsiec: —Aidën chuiboed padpiden tantianuna —quepanëdash. ³³Adoquien, Pabado Adeyopaco caid yacnoësh nidpanëdash. ³⁴Adec nidshun yuec ushquin chuisho tantianu quec Pabadoëd iccuededquin utsin-utsinquien padpiden-padpidemboen tantiabededpanëdash. Aden Pabaton chuibanac utsi-utsiec Esuquidistu tantiaquid yampanëdash: Nëidic, Dionisio cuëmëdquid Adeyopaco caid yacno iccuededquido chuiquid nepanëdash. Ut-sibic, chido Damadis cuëmëdquid adecbidi Esuquidistu tantiaquid yampanëdash. Aidobëd utsi-utsiec Esus tantiaquid yampanëdash.

Codinto yacno Pabado tabadaid

18 Adec Atenas caid yacno tabadash auëshquio puduanec nidec shubu dadpen icquid Codinto caid yacno Pabado chopanëdash. ²Ambo isadaidbo Aquida cuëmëdquid nidaid Ponto caid yacnoshon tishaid Pabaton istuidpanëdash. Isadaidbotedi nidaid Itadia yacnoësh nidtan, ancanquidën cac aton chido Pidisida cuëmëdquidbëd Codinto yacno choash Aquida icpanëdash. ³Nidaidën capuquid yua bitsi shubumpi nacnenquid abipadquid Aquidabëd aton chido icsho isun aidobëd tabadquin Pabaton shubumpi nacnempanëdash. ⁴Codinto yacno tabadec aton mat-

ses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabado chuibampanēdash.

⁵ Ambo tabadnubi Sidasbēd Timoteyo nidaid Masedonia yacnoēsh choambic shubumpi nacnenenquiocquin isadaidbo Esuquidistu tantiamenuen Pabado chuibampanēdash. ⁶ Adsho, Aid tantiatiapi, quequin isadaidbon Esuquidistu icsamboen chuisho tantiash abi daēd dasiuidaid bēntsecquid chicshun ishcunec Pabado: —Esuquidistu mibitedi qiombi. Aid tantiesa yec unēsash Nuquin Papa yacno puduedquimio mibitedi iquendac. Adquid Nuquin Papan cuidquin nēsecatequid nendac. Nēbi padpiden mibi chienquio iquembi. Isadaidpembon tantiatsiash, quequin aido chuibanembi —quepanēdash Pabado isadaidbo tantiesa chiec.

⁷ Aden chiashic Nuquin Papan chiaid chuibante shubu yacnoēsh puduenanec aid dayuntsēqui shubu icquidēn Pabado puduedpanēdash. Aid shubu icbo Usto cuēmēdquid Nuquin Papa tantiaquid icpanēdash. ⁸ Uston shubunoshon Esuquidistu Pabado chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnocquid dadpen Esuquidistu tantiaquid yampanēdash. Adsho adquidtedi acten mentobampanēdash.

⁹⁻¹⁰ Adashic, yuecash inchēshēn Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ěmbi chiac dacuēdenquiocquin comapenen chuideneta. Mibi dayun uaquidquio nebi. Aden dayun uasho ěbi tantiesabon mibi natiametiapimbo iquendac —quepanēdash Pabado caic. ¹¹ Aden chiac Codinto caid yacno seta abentsēc matamiash ushē 6ted nidmec tabadquin Nuquin Papan chiaid Pabado chuidonepanēdash.

¹² Adnubien nidaid Acaya caid yacnocquidon chushcaid chuisho tantiashun mases icsambocsho cuidte chuiquid Cadion cuēmēdquid icnubi isadaidbon Pabado bedshun abi chushcaid Cadion chuinen buampanēdash. ¹³ Ambo bēquin puduedmish: —Ancanquidēn chiaid niacquin masesēn tantiatemaid nēid dadan chiosh —quepanēdash Pabado chieshēnquido Cadion caic.

¹⁴ Adoaquien Pabado onquetsenubi Cadiomba onquedopanēdash: —Tantiata, isadaidbo. Mibi chuinu. Nēidēn icsamboen nabanaid mibitedishun ěbi chuisho tantiatsiambi. ¹⁵ Aden chienquio yec, Nēidi mibi onquiaidbēdta min masesēn Nuquin Papa cain cuēnaid icsamboen chuiquid nec, mibi quepec. Adecbidi, Mimbi natemaid chuiquidquio nēid dada nec, mibi queopec. Aden mimbi chuisho tantiashun, ěbi chienda caimbi. Domanobo chuiquidēn naden nata quequin chiaid niaquesa nēid nec, quequin isembi. Aden ěmbi isac mibi chushquiaid mibi chuiquid yacno nidshun chuitanta. ¹⁶ Aden chuishumbic Cadionēn: —Aidtedi umanuc puduemeta —cac isadaidbo Pabado bēboedo Cadionēn namiaidon puduemapanēdash. ¹⁷ Adoc puduensumbic Nuquin Papan chiaid chuibante shubun iccuededquido chuiquid utsi Sostenes cuēmēdquid bedshun isadaidbon comapenen cuespanēdash. Adosho isun chiac Cadion, Icsamboen naic, quenquio yec otacquio tsadpanēdash.

¹⁸ Adnubien Codinto caid yacno yuec tabdashic Esuquidistu tantiaquido nianec nidaid Sidia yacno nidoaic Pabado puduampanēdash. Abēdi Aquida aton chido chedobēd Codinto yacnoēsh nidec shubu dadpen icquid Senquedeya caid yacno chopanēdash. Ambo tabadquin, Nuquin Papan ěbi dayun uaid cuidquin Edusaden

yacno choshon piucquid menembi, quequin ismenuequin aton manëdaid Pabado matasmepanëdash. ¹⁹ Ambo ushë abentsëc nidmec tabadash cano antabëdtoanec acte dapa potiash Epeso yacno choshon Aquida aton chido chedobëd, Nëmbobi tabadnu, quepanëdash. Adsho tantiashun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibanpanëdash Pabado. ²⁰ Aden chuibancho tantiashun: — Adomboembidi chuibanuec ¿ada ëbëd yuec tabadtsia? —iccuededquidon caquien: —Nëbi padenquid iquebi. ²¹ Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquio puduanec nid-equi cano antabëdtopanëdash Pabado.

²² Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuedacno nidshun isanec nidequi shubu dadpen icquid Antioquiya yacno Pabado choapanëdash. ²³ Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auëshquio nidequi nidaid Pidiquia caid yacno choash tabadquin Esuquidistu tantiec iccuededquid dadpen bëdamboen tantiamenuen chuibanopanëdash Pabado.

²⁴ Adnubien isadaidbo Apodos cuëmëdquid shubu dadpen icquid Adecandedia caid yacnoësh Epeso yacno chopanëdash. Aidi dadpen tantiaquid yec Nuquin Papan chiampid tantiaquid nepanëdash. ²⁵ Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanëdash. ²⁶ Aidi Nuquin Papan chiaid chuibante shubu yacno nidshun dacuëdenquiocquin ambi tantiaid chuibanpanëdash. Aden chuisho tantiash, Èbi yacno isec cho, qeshun Aquidan aton shubu yacno buanshun Esuquidistu choaid ambi nadatiambocquin naidbëdtabi abi unësash uin-cuenaid chuibanpanëdash Aquidabëdtan aton chidon Apodos tantiamequin.

²⁷ Aden Esuquidistu bëdamboen tantiash Epeso yacno yuec tabadquin Esuquidistu Apodosën chuibanpanëdash. Adec yuec tabadquin chuibanashic, Nidaid Acaya caid yacno nidnu, quepanëdash. Adec nidnuesho tantiashun, naden dada uashun Apodos menepanëdash Epeso yacnocquidon: Nëid dada uaid sananquid Apodos cuëmëdquid Esuquidistu tantiaquid nec. Èmbi isaid neque. Yuedta, quequin dada uashun, Apodos Epeso yacnocquidon menepanëdash ma nidaid Acaya caid yacnocquido Esuquidistu tantiaquido Apodosën menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bëdamboen tantiamenuen chuibanpanëdash. ²⁸ Aden chuibanquimbic isadaidbo Esuquidistu tantiesabo icsho isun abëd onquequin, Esuquidistu Nuquin Papan Chomiaid nec, quequin Nuquin Papan chiampid Apodosën chuibanpanëdash.

Epeso yacno Pabado abëd icquido tabadaid

19 Codinto yacno Apodos icnubi Pabado nidaid Pidiquia caid yacnoësh puduanec podquedën choec macuësh dapa dectatocuëtsenec shubu dadpen icquid Epeso caid yacno choapanëdash. Ambo choshon Esuquidistu tantiaquido istuidshun: ² —¿Esuquidistu tantiaquido icshoda Nuquin Papan aton Mayan mibitedi menepanëdash? —capanëdash Pabado.

Adoaquien: —Nuquin Papan Mayan iquec, quequin tantiamboccombi —quepanëdash Epeso yacnocquido.

³Adoaquien Pabado: —¿Atotsi canuen mibi acten mentobampanēdash? — quepanēdash.

Adoaquien: —Uan padon chiaid tantiaquid icsho acten mentondashi — quepanēdash Epeso yacnocquido Pabado chiec.

⁴Adoaquien: —Mibi icsaid ěnta, qeshun abimbo tantiaquidtedi acten mentobanquin, ěbi tsibanec choquid Esus tantiaquid icta, quequin Uan padon chuipanēdash —quepanēdash Pabado Epeso yacnocquido chiec. ⁵Aden chiac, Esuquidistu tantiaquid nebi, quequin Epeso yacnocquidon chuisho tantiaquid padpiden acten mentomepanēdash. ⁶⁻⁷Aden aitedi acten mentoacsho mēdanten Pabadon mamishbanac aid doseted Nuquin Papan aton Mayan menepanēdash. Aden meniac abi onquiacmaidēnquo onque Nuquin Papa chiec cuēdēmpañēdash Epeso yacnocquido.

⁸Adashic Nuquin Papan chiaid chuibante shubun puduedshun Pabadon Nuquin Papabēd tabadaid chuibampanēdash. Cuembo tantiamenuequin ushē choaid 3ted nidmequin badiadquidēn-badiadquidēnquien dacuēdenquiocquin Nuquin Papan chiaid Pabadon chuibampanēdash. ⁹Aden chuisho tantiaquid pamumēdacbimboec tabadquin, Tantiatiapibi, quequin utsin-utsinquien chieshēmēnquioquin Esuquidistu icsamboen chuipanēdash. Aden chiac Esuquidistu tantiaquidobēd Pabado, Nidnu, quianec Nuquin Papan chiaid chuibante shubu yacnoēsh puduanec nidec Tidano cuēmēdquidēn chuibante shubu yacno choshon adomboembidi tantiamenuen matsesbēd onquequin Nuquin Papan chiaid chuibampanēdash. ¹⁰Seta daēd matamequin adomboembi chuibampanēdash Pabadon. Aden chuibansho tantiaquid nidaneshun chiac nidaid Asia caid yacnocquidon tantiaquidapanēdash. Adoac isadaidbobēd isadaidpembo Esus tantiaquido yampanēdash. ¹¹Epeso yacno Pabado tabdasho Nuquin Papan nadatiambocquid icmiacsho ¹²Pabadon dada cuēscashun dashcute cuēshē buanshun daicsaid mishbanac bēdampanēdash. Adembidi Pabadon dada cuēscabanaidēn nēnquid mishac bēdampanēdash. Adembidi pashuidtsen pamishac bēdanoapanēdash. Adembidi mishac mayan icsa dapuduempanēdash.

¹³Adnubien mayan icsa dapuduemenueen Pabadon chiacpaden tanquin isadaidbo utsibon: —Esus Pabadon chuiboedēnquio dapuduen —capanēdash. ¹⁴Pabado tanuequido isadaidbo chuiquid Esqueba cuēmēdquidēn mado 7ted icpanēdash. ¹⁵Aden chiaquien mayan icsa: —Esus iquec, quequin ěmbi tantiaid aidi nec. Pabado iquec, quequin ěmbi tantiaidbidi aidi nec. ¿Mibitedi tsutsi neque? Tantanu. Chui ¹⁶—qeshun nebudquin dashcute ched-chedcapamboen mayan icsan cuesactaniqui shubu nuntanuēsh puduenanec cuempanēdash Esqueban mado. ¹⁷Adec cuensho isquidon chiac Epeso yacnocquid isadaidbobēd isadaidpembo dacuēdcuededpanēdash. Adec dacuēdquin, Dacuēdampambo iquec. Esuquidistu bēdambocquid nec, quequin tantiabededpanēdash. ¹⁸Esuquidistu tantiesa icboedi Esuquidistu tantiaquid yanec dacuēdenquio yec Esuquidistu tantiaquido iccuededacno nidshun abi icsaid chuibampanēdash. ¹⁹Adquid dadpenshun icsamenueen ambi ompoquin naid ismenquicboedombi, Nēbi adquid ictiapibi, quequin cuēte dētsiadotanquin ambi ompoquin tantiamiaid dada uatetedi tantianuen bedash utsitsen icsabudnush qeshun abitedi tauipanēdash. Aden tauiboed menequin piucquid dadpen bedtsiandac, quepanēdash. ²⁰Aden abi icsaid dada uate tauisho isquidon chuibanac Esuquidistu tantiaquid dadpen yampanēdash.

²¹Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden

yacno choash tabadashic shubu dadpen icquid Doma caid yacnotsen nidtiadquio iquebi —quepanēdash Pabado. ²² Aden chiash Asia caid yacno abi tabadquin Masedonia caid yacno abia Timoteyobēda Edasto nidmepanēdash Pabadon.

²³ Aid daēdi nidan Epeso yacno tabadquin Esuquidistu Pabadon chuibanaquien tantiesabo nēishpanēdash. ²⁴ Adquid Demetedio cuēmēdquid Diana caidbimboecnuc nacnemequid icpanēdash. Aidēmbi ambi nacnemaiid menequin piucquid dadpen bedbampānēdash. ²⁵ Aden Esuquidistu tantianu quesa icquin ambi Dianabimboecnuc nacneta caidobēda abipadquid Diana nacnemequid utsibo iccuededmeshun Demetediion nadopanēdash: —Nuqui tantiaid Dianabimboecnuc nacneshun menequin piucquid dadpen nuqui bedbanec. ²⁶ Aden nanubi nidaid utsi yacnoēsh Pabado cuēmēdquid nēmo choshon utsi comapenen chuibanac Epeso yacnocquid dadpembēdtan nidaid Asia caid yacnocquid dadpeshun tantiec. Dianabimboecnuc nacnetaid tiboquesa iquec. Adquid matsesēn tantiaid abimbo ictiapimbo iquec, quequin Pabadon chiec. ²⁷ Aden chiac matses dadpeshun tantiash Dianabimboecnuc nacnenquido icsambo iquec, quetsiash ēbitedi caic. Adecbidi, Dianabimboecnuc nacnetaidbēd abi tabadte shubu uashunaid icsambo iquec, queoapec. Adecbidi Dianabimboecnuc nacnetaid tiboquesa icsho matsesēn tantienquio ictiadquid nec, queoapec Pabado. Aden chiac nidaid Asia yacnocquidon dadpeshun Diana tantiaobedombi padenquio yampec. Aidēmbi tantienquio yanshun aibimboecnuc nuqui nacnetaid bedenquio iquendac —quepanēdash Demetedio.

²⁸ Aden chiac ambi chomeboedtedi, Piucquid ēbi menequin ēmbi nacnetaid matsesēn padpiden bedenquio ictsish, quec nēishash: —Epeso yacnocquidon tantiaid Diana bēdambo iquec —quec comapenec cuēdcuededpanēdash. ²⁹ Adec comapenec cuēdcuededsho tantiash Epeso yacnocquid utsibo aidobēd cuēdcuededpanēdash. Adec cuēdcuededquin nidaid Masedonia caid yacnoēsh Pabadobēd choaed Cayobēda Adistadico bedshun iccuededte shubu yacno cuēdcuededquidon buampānēdash. ³⁰ Aden aid daēd bedshun buansho isquidēn chiac Pabado, iccuededte shubu yacno nidnu, qesho tantiashun: —Padi. Ambo nidenda —capanēdash Esuquidistu tantiaquidon. ³¹ Adembidi, anocquido chuiquid utsin-utsinquien Pabado chuiopanēdash.

³² Adnubien cuēdcuededquidon Cayobēda Adistadico bedshun buansho isash matses dadpen, ¿Atotsieshun aid daēdi bēo? quequin tantienquio yec tabadpanēdash. ³³ Adnubien, Nuqui tantiacpadomboen chuitan, quequin isadaidbon Adecanedo cuēmēdquid nēnantanquio tscunepanēdash. Aden tscunequien nidtoash: —Tantia. Chuinu —quequin ³⁴ daēdpactsēc chiec onqesho tantiash onqueboedi ēnēdash tabadnubi: —Isadaidbo aid nec —qesho tantiash: —Epeso yacnocquidon Diana cain ambi tantiaidbimboecnuc nacnetaid bēdambo iquec —quec badedbadedquiec cuēdcuededpanēdash.

³⁵ Adec cuēdcuededshobien Epeso yacnocquidon naden nata quequin chiaid dada uaquidēn ēnēdmenuequin nadopanēdash: —Epeso yacnocquidon tantia. Chuinu. Diana caidbimboecquid abucuēsh paēdaidbimboecnuc nacnetaid nuqui comapenen tantiaidbēdta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. ³⁶ Aden utsibon tantiec, quequin tantiaquin icsamboen nainda. ³⁷ Dada daēd mimbi nēmo bēboed Diana caidēn shubun puduedamboccosh. Adembidi ampiambo iccosh. Adecbidi, Diana caid chiec icsamboec onquenquioccosh. ³⁸ Adenquio icnuc Demetediobēd icquido abi chushquaiid

chuinuec Epeso yacnocquidon naden nata quequin chiaid tantiaquid yacno nidshun ³⁹ mimbti tantiacpaden chuita cuëdcuededenquiocquin. ⁴⁰ Comapenec cuëdcuededec quesho tantiaash ancanquid dapan Epeso yacnocquido bëdamboen tabadmeta caid yacno nidshun chiac, Ancanquid dapan chiacpadec Epeso yacnocquido tabadenquio iqueque. Cuëdcuededquido chome, nuqui catsiash. Aden chomiac ¿atotsi nuqui chuipe? ⁴¹ Aidën nuqui chomenushe quiash min shubuno nidaneta —capanëdash Epeso yacnocquidon naden nata quequin chiaid dada uaquidën. Aden chiac Demete-diobëd iccuededquido nidanepanëdash.

Masedonia yacnocquido isbidanec nidequi Quedesia yacnocquido isbidanec nidaid

20 Natia cuëdcuededboedo nidanian Esuquidistu tantiaquido chomiash Pabado: —Nidaid Masedonia caid yacno nidoaibique. Bëdamboec tabadta —quianec Epeso yacnoësh puduanuc abëdi nidondabi. ² Auëshquio puduanec nidquin nidaid Asia caid yacnocquid utsi-utsien chuibidanec nidaid Quedesia caid yacno choapon-dash Pabado. ³ Ambo choash ushë abentsëc chotsëcnuc nidmec tabadash: —Nidaid Sidia caid yacno nidnu —quepondash. Adsho tantiaashun: —Ambo nidacsho mibi cuesunenuquin isadaidbon cainec —cac nidaid Masedonia caid yacno Pabado nidoapondash. ⁴ Nidaid Masedonia caid yacno choash Pabado tabadnubien abëd capuquido bëyucanec nidaid Asia caid yacno nidpondash. Abëd capuquido nëidted icpondash. Nëidic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo cuëmëdquid; utsibic, shubu dadpen icquid Dedbe caid yacnoësh choquid, Cayo cuëmëdquid; utsibobi, nidaid Asia yacnoësh choquido: nëidic, Timoteyo cuëmëdquid, utsibic Tiquico cuëmëdquid, utsibic Tedopimo cuëmëdquid. Aidedi icpondash. ⁵ Aidedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. ⁶ Aidedi nidan pan nami uainquioctequid pete ushëtedi tantiec tabadanec Pabadobëd cano antabëd-toanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabadobëd icquido tabadoapondash.

Eyutico unësacsho uincuemiaid

⁷ Todoas caid yacno tabadequi dominco ushën Esuquidistu tantiaquidobëd iccuededquin Pabadobëd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiash yuec onquepondash inchëshpotsembo yantsëcquiec. ⁸ Aid onquiacno shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash. ⁹ Pabado onquenubi nëbi caniaid, Eyutico cuëmëdquid, iste shëcuë yacno tsadec ushcasmash ushtotanec abucuësh paëdpondash. Adec paëdsho isash bud-budshun unësacsho isbedednubien ¹⁰ Pabadotsen budquin dayumbudec: —Unësboedi abi tiboquianeque. Shubicuededenda —quepondash. ¹¹ Aden chiash abuc quënë yacno padpidec dectatoashun abitedishun pebededpondash. Aden piash tabadec Pabado utsibëd onquecuededpondash badiadbudtsëcquiec. Adec badiadbudbon Pabadobëd icquido shubu nuntanuësh puduem-puduenubien ¹² paëdboed aton shubuno utsibobëd nidpondash bëdambo yec.

Todoas yacnoësh puduanec Mideto yacno chote

¹³ Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abëd capuquid utsibobëd puduanec nidequi cano antabëdtoanec Ason yacno nidoapondabi. ¹⁴ Adec nidequi Ason yacno choshon istuidac Pabado ëbëdi cano antabëdtoanquin potiash shubu dadpen icquid Mitidene caid yacno choapondash. ¹⁵ Auëshquio puduanec nidec badiadash acte nënantan nidaid nactnëdquid Quio caid datambidanec nidash badiadash acte nënantan nidaid nactnëdquid utsi Samos caid datambidanec shubu dadpen icquid Mideto caid yacno choapondash. ¹⁶ Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmentiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

Epeso yacnocquido tsusiobo Pabaton chuibanaid

¹⁷ Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabaton chomepondash. ¹⁸ Aden chomeshun naden aido chuipondash: —Chiemnique. Tantiata. Ëbi ënden nidaid Asia caid yacno choash mibëd yuec tabadquin nabanaid mibitedishun istenepondac. ¹⁹ Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta cacpaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. ²⁰ Esuquidistu mibitedi bëdamboen tantiamenuen matses dadpen iccuededacnoshon chuibanondambi. Adembidi shubu utsin-utsinquec puduedcuenequin chuibanondambi. ²¹ Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

²² “Aden chuibanshobi Nuquin Icbon Mayanën: Edusaden yacno nidta, quequin chuioposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. ²³ Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioishi. ²⁴ Aden Nuquin Papan Mayanën chuisho tantiasi, Ëbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Pababëd tabadte iquec, quequin chuibanembi.

²⁵ “Nëshunquio Nuquin Papan chiaid ëmbi chuibansho mibitedishun tantiabonondaidon nëüëshquio ëbi nidacsho mimbi isoainquio iquendac. ²⁶ Ëmbi nëshunquio Esuquidistu mibitedi chuibanac, Esuquidistu chiambo iccoshi, que-tiapimbo mibitedi iquendac. ²⁷ Tantienquioctsiash, quenquiocquin Nuquin Papan tantiacpaden chuibanombi. ²⁸ Aden chuibanash nëbi nidebi. Ëbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnü, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabadnushe queshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabad-

menuec Esuquidistu unēspaniedash. ²⁹Ēbi nidan abimbo chiacbimboen chuiquid Esuquidistu tantiaquido chuiquid icnuec choendac. ³⁰Adembidi mibēdi iccuededquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquio icnuequin adoendac. ³¹Adquid Esuquidistu tantiec iccuededquido cuēshēdmequid neque. Ista. Adquid iquendac, quequin mibēdi tabadquin ēnenquiocquin chuibanondambi. Adquid choec, quequin mibitedi chiec shubiondabi.

³²“Bēdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bēdambo icmeshun abēdi tabadmendac. ³³Mibēd tabadec, Min piucquid bec cho, qesa niondabi. Adecbidi, Min dashcute bec cho, qesa niondabi. ³⁴Ēmbibi shubumpi nacneshun menequin piucquid bedshun con na bedondambi. Adembidi nacneshun bedshun ēbēd capuquido menebanondambi. ³⁵Adembidi chonoadshun aton na bedshun natiapimboquid meneta, quequin mibitedi ismebanondambi. Nuquin Icbo Esuquidistu nidaidēn tabadec nadpaniedash: ‘Utsin natiapimbocho menequid Nuquin Papan bēdambo iquebi camiaid nendac. Nabanenquio yec bedshumēnquidquio icsho Nuquin Papan bēdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabadon.

³⁶Aden chiashic Pabado Nuquin Papa chuinuec utsibobēd danēshēn sebudcuededash onquecuededpondash. ³⁷Aden Nuquin Papa chiec onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. ³⁸Ēbi padpiden mimbi isoainquio iquendac, Pabado qesho tantias shubicuededpondash. Adec shubiquin dayumbudash unēsquio yec Epeso yacnocquido tsusiobo Pabadobēd cano yacno nidanepondash.

Edusaden yacno Pabado nidoaid

21 Epeso yacnocquido tsusiobo acte cuēman tabadnubi cano antabēdtoanec Pabadobēd capuquido nidquimbi cuebi potias acte nēnantan nidaid nacnēdquid Cos caid yacno choapondash. Badiadnuc auēshquio puduanec nidec acte nēnantan nidaid nacnēdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. ²Ambo choashic nidaid Penisia caid yacno cano dapa utsin nidnuequid istuidash antabēdtoanec Pabadobēd capuquido nidoapondash. ³Adec nidquimbi acte nēnantan nidaid nacnēdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bēaid icbo yacno buamepondash. ⁴Aden buan-buanubi Esuquidistu tantiaquido yacno nidane puduedash 7tedec ushec Pabadobēd capuquido tabadpondash. Ambo tabadnubi, Edusaden yacno Pabado cuesunenuequid iquec, quequin Nuquin Papan Mayanēn tantiamiac aidon, Edusaden yacno nidenda, quequin Pabado chuipondash. ⁵Aden chiaqui cano icbo nidnuesho isash padpidec cano antabēdtoanec, Nidnu, quepondash Pabado. Aid nidnuesho isash Esuquidistu tantiaquido bēnēbēdi aton chido aton bacuēbo chedo Pabadobēd acte cuēmano choash Nuquin Papa chiec onquecuededpondash. ⁶Adec Nuquin Papa chiec onqueshun, Nidec nid, cac Pabadobēd icquido cano antabēdtoanubien Tido yacnoēsh acte cuēmano chobedo aton shubuno nidaneapondash.

⁷Adec cano antabédtoanec auëshquio nidec shubu dadpen icquid Todemaida yacno choash Pabadobéd capuquido tabadtuidpondash. ⁸Adec anocquidobéd tabadec badiadash cano antabédtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niante meneta caid utsi 6tedibéd Uedipe icpondash. ⁹Aidën champibo 4tedi aton bënën bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰Adec Uedipebéd yuec tabadnubi Nuquin Papan naden nanun chiaid chuiquid utsi Accabo cuëmédquid nidaid Udeya yacnoësh chopondash. ¹¹Adec choshon Pabaton tsiute bedash tataniadash mêtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mêtaneshun buanshun, Unës uata, quequin isadaidpembe menendac —quepondash Accabo Pabado chiec.

¹²Aden Accabon chuisho tantiash shubiquin Pabadobéd choboedon Uedipen shubun icquidobédtan, Edusaden yacno nidenda, quequin Pabado chuioapondash. ¹³Adoaquien: —¿Atotsi canuen shubiquin ëbi icsambo icme? Edusaden yacno nidshun Nuquin Icbo Esuquidistu chuibansho ëbi taneshun unës uatsiash, quequin tantiaquin abi Esuquidistu chuibanuna —quepondash Pabado. ¹⁴Adoaquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, qesho tantiashun: —Ma Nuquin Icbo bunacpadec nidpanuna —capondash.

¹⁵Aden chiashic Sesadeya yacnoësh puduanec Edusaden yacno Pabadobéd capuquido nidoapondash. ¹⁶Adec nidsho isash Sesadeya yacnocquid Esuquidistu tantiaquid utsi-utsiec Pabadobéd nidquin Menason cuëmédquidën shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabenquidbidi nepondash.

Pabaton Acobo isaid

¹⁷Adec Edusaden yacno choacsho Esuquidistu tantiaquidon Pabadobéd capuquidtedi Pabadobédtabi yuedpondash. ¹⁸Aden yuedac tabadash badiadash Acobo isec nidoapondash. Acobobéd Esuquidistu tantiaquido tsusiobotedi icpondash. ¹⁹Adec nidec ambo puduedshun, Mibi isec chobi, quequin, Ëmbi Esuquidistu chuibanubi Nuquin Papan tantiamiac isadaidpembe dadpen Esuquidistu tantiaquido yanosh, quequin Pabaton chuipondash.

²⁰Aden chuibanac Nuquin Papan naid bédambo iquec, quiash Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. ²¹Adquidombo icquin, Min bacuëbon shui dëbid dëtemenda, quequin isadaidpembe Pabaton chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. ²²Aden chiec tabadquin mibi nëmbo choaid tantiash mibi cuesunete buntsiash. Mibi cuesunete bumenquio icmenuequin ¿Atotsi nuqui napeba? ²³Naden nac bédambo ictsiashe. Tantia. Chuinu, Pabado. Nëmbo ëbéd icquido Nuquin Papauidi tantiec tabadnuequid daëd-daëdquieac iquec. ²⁴Nuquin Papan ëbi bédamboen dayun uadenesho ismenu, quiash nidaid Quedesia yacnoësh, Ëbi matas, qesho matasac mibi: “Edu-

saden yacno choash Nuquin Papa tabadte shubu uashunaid yacno nidash puduedshun shubu nacnenuequiv piucquid menembi,” quepondac. Nēbimbobi Edusaden yacno mibi choaoc. Nēid dadatedibēd Nuquin Papa tabadte shubu uashunaid yacno nidshun mimbi ēnden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquido Pabado nec, quequin tantiatsiash. ²⁵ Ēmbi isadaidpembo Esuquidistu tantiaquid ut-sibo dada uaquin naden chuioaombi: “Nuquin Papan, Naden nata, quequin chiaid dada uamiampid nēidtedictsēqui mimbi natequid nendac. Nēidic, Nuquin Papan uaidbimboecnuc nacnenaid tantiaquidon pete sanaid penda; adembidi, min chidouditsēqui chudta; adembidi chidon min bēnēuidi chudmeta; adembidi, nēish cuesaid intacchobi codocaid penda.” Aden dada uabanquin isadaidpembo chiombi — quepondash Acobo Pabado chiec.

²⁶ Aden chiaquien badiadash Nuquin Papa tabadte shubu uashunaid yacno dada 4tedbēd choash Pabado, Nēidted dadabēdtambi ēmbi Nuquin Papan chiacsted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

Pabado bedaid

²⁷ Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoēsh choquidon isadaidbon ispondash. Aden isash Pabado bedmete bunec, Isadaidbo utsibo nēish-menu, quec: ²⁸ —Isadaidbotedishun tantiata. Nēidēmbi Nuquin Papa tabadte shubu uashunaidēn puduedtemaid isadaidpembo yuedquin nēid shubu bēda icsa uameboed neque. Bednu. Uidēn uaic cho —quequin abimbo chiacbimboec onquecuededpondash. ²⁹ Epeso yacnoēsh choquid isadaidpembo Tēdopimo Pabado bēd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰ Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shēcuē bētashpondash. ³¹ Aden Pabado buanec, Cuesunenu, quec cuēdcuededsho tantiashun chuitanac ³² abi chuiquidbēd sondado cho-chosho isun Pabado cuesbedquid isadaidbon ēmpondash.

³³ Adec choshon sondado chuiquidēn bedtan cac Pabado bedshun shocosh bucun mētanemepondash. Aden mētanemiash: —¿Tsutsi nēid nepec? ¿Atotsi icsamboen naosh? —quepondash sondado chuiquid. ³⁴ Adoquien iccuededquid utsi-utsitsēcquien chiec onquecuedednubi utsi-utsitsēcquien utsi uain chiec cuēdcuededpondash. Adec dadpen cuēdcuededsho: —Tantiatiapibi ye. Quēnēn nauedmenu. Buanec nid —quepondash sondado chuiquid sondado chiec. ³⁵ Aden Pabado buanec nidec nauedte shubun dectatonobi cuēdcuededquidon tsucuscuededtsēcquien Pabado bednuesho isun Pabado abuc cadoanquin sondadon buampondash. ³⁶ Aden cadoanquin buansho isash cuēdcuededquido: —Aidien cuesunetiad — quepondash sondado chuiquid chiec.

Ambi nabanaid iccuededquido Pabado chiaid

³⁷ Adec abi buanec shubun puduedtsenubi Pabado: —¿Ada ēbi onquesho tantiatsia? —quepondash Quidieco matsesēn onqueten Pabado sondado chuiquid chiec.

Adoaquien: —¿Quidieco matsesën onqueten onquequidta mibi ne? ³⁸ Chuiquid dapa icnuequin Equipito yacnocquid matses dadpen cuête nibêdacno buanaccondaidien nechitec, qeshun mibi bedombi. ³⁹ Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰ Adoaquien: —Ai, onqueta —capondash sondado chuiquidën.

Adoac abuc decataten nidtoash nidec, Otacquo tabad, quequin ismequin Pabadon mëdante uic-uiccapondash. Aden nasho isash isadaidbo otacquo tantiec tabadsho isash: —Ebedeyon, nuquin onqueten mibi chuinu —quec nadec Pabado onquedopondash:

22 —Ëmbi naid mibitedi chiembique. Isadaidbo tsusiobobêdta isadaidbo utsibon tantiata.

² Adec aton onqueten Pabado onquesho tantiash isadaidbo otacquo tantiec tabadpondash.

³ Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquo tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. ⁴ Aden nabanquin Esuquidistu tantiaquido Nuquin Papan chiaid niacquido nec, quequin dadabêdta aton chido chedo bedmeshun mëyamequin quënën nauedmeshun unës uamepondambi. ⁵ Ëmbi adobanquin naondaid tsusio dapatedishun tantiec. Adondash, quequin chuitiadquo icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

⁶ “Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiacimboec chënquequin dëcatepondashi. ⁷ Adec chënquequin dëcatiac nidaidën paêdshun nadec abucuësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tantianu,’ capondashi.

⁸ “Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaid mimbi mëyanaid Esus nebi,’ capondashi.

⁹ “Adnubic ëbêd icquidon shocosh bed-bedquiacimboec chënquesho isequi con Icbon chuisho tantienquo yec tabadpondash.

¹⁰ “Aden dëcatiac uequin ëmbentsëqui tantiec: ‘¿Atotsimbi nape, Icho?’ quepondabi.

“Adoaquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon. ¹¹ Adoaquini nidtoquin shocosh bed-bedquiacimboec chënquequidën bëshuacsho isun ëbêd icquidon mëdianquin Damasco yacno buampondashi.

¹² “Adec Damasco yacno choash bëshuash ëbi tsadnubi Ananias cuëmêdquid ëbi isec chopondash. Aidi isadaidbon naden nata quequin chiaid naquidquo icsho isadaidbo utsibon bëdamboen isaidquo icpondash. ¹³ Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

¹⁴“Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismendac. Aidën chuisho mimbi tantierendac. ¹⁵Aden aid isquin tantiaishun utsi-utsien dadpen mimbi isaïdbëdta mimbi tantiaid mimbi chuibenendac,’ quequin ¹⁶chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi paucacbimboen utsibo ismenuen acten mentometa,’ capondashi Ananiasën.

¹⁷“Adoquai, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacximboec tsadpondabi.

¹⁸Adec tsadquimbi Nuquin Icbo ëbi chiec onquesho isnubi nadpondash: Mimbi ëbi chuïbansho tantienquicquid yec nëmboçquido mibi cuesunete buntsiashe. Edusaden yacnoësh badedquio nidtan, quequin Nuquin Icbon chuïpondashi.

¹⁹“Adoquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi. ²⁰Adembidi, mibi chuïbanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icbo chiec.

²¹“Adoquini Nuquin Icbon: ‘Isadaidpembo yacno mibi nidmembique. Nidtan,’ capondash —quepondash Pabado ambi nabanaid iccuededquido chiec.

Pabado cuestsenaïd

²²Pabadon ambi nabanaid chuïbansho tantiec iccuededquido otacquo tabadboed, Isadaidpembo, quec Pabado onquesho tantiaish: —Tantiatiapibi. Adec onquequid isadaidbo utsibëd tabadenquio ictiadquidi nec. Aid unës uata —quec cuëdcuededpondash iccuededquido.

²³Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabadon chuïboed tantiatemaid nec, quequin ismequin. ²⁴Adnubien, Cuesunenushe shubu nuntan buanta, quequin sondado chuïquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuïmenuen comapenen paëmbocnoc cuesta, quequin sondado chuïquidën chuïpondash. ²⁵Adoquien cueste nidtsinacno Pabado buanshun cuestebëdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidënsun tishaid icsho ëmbi naid chuïmiabida ëbi cuese? —quepondash Pabado sondado chuïquid chiec.

²⁶Adsho tantiaish sondado chuïquid puduanec nidec abi chuïquid comandante caid yacno choash: —¿Atotsi natseno? Bëboed: “Domanobon nidaidënsun tishaid nebi,” quïosh —quepondash sondado chuïquid comandante chiec.

²⁷Adoquien Pabado yacno nidshun comandanten: —¿Domanobon nidaidënsun tishaidta mibi nepe? —capondash Pabado chuïquin.

Adoquien: —Ai, domanobon nidaidënsun tishaidquïo nebi —quepondash Pabado.

²⁸ Adoaquien: —Domanobon nidaidënshun tishaidpenquo ëbi icsho, ¿ada adquid ëbi icmetsia? quequin piucquid meniondambi —quepondash comandante Pabado chiec.

Adoaquien: —Con tan tishaid yec domanobo nebi —quepondash Pabado comandante chiec.

²⁹ Aden Pabado chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucun mëtanemechitombi, quequin tantiec comandante dacuëdpondash.

Isadaidbo tsusiobo iccuededacno Pabado buanaid

³⁰ Adshumbic, badiadshun ambi mëtanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nënantanquo Pabado nidtomepondash.

23 Aden nidtomiaquien isadaidbo tsusiouidi comapenen isec: —Utsibo, ëmbi naid chuibanu. Tantiata. Nuquin Papan isnubi ambi naden nata quequin chiaid nabanquidquo icteniobi —quepondash Pabado.

² Aden chuisho tantiashun: —Muaquin chieque. Ëccues —Isadaidbo tsusio dapan Ananiasën cac Pabado dayunquo icquidën Pabado ëccuespondash.

³ Aden ëccuesaquien Pabado: —Mibi icsaid nibëdacbimboec mibibi tsadsho Nuquin Papan mibi ëccuesmendac. Nuquin Papan naden nata quequin chiaid tantiambi, quequimbi ëbi ëccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

⁴ Aden Pabado chuisho tantiash aton dayunquiocquidquo: —¿Aden Nuquin Papan isadaidbo tsusio dapa icta caid chiash dacuëdenquioda ique? —quepondash.

⁵ Adoaquien: —Ëmbi chuiboed Nuquin Papan isadaidbo tsusio dapa icta caid nec, quequin tantiamboccombi. Aidi Nuquin Papan isadaidbo tsusio dapa icta caidquo icsho ëmbi chuibocpaden chienquo ictsenombi. Mimbi abimbo chioc. Ëmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

⁶ Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ëbibi padiseyobon tishmiaid nebi. Adquid yec, Unësash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ëbi mimbi chiec —quepondash Pabado iccuededquido caic. ⁷ Aden Pabado chiaquien saduseyobo, Uincuenta nibëdendac, quequin ëmbi tantiacpaden Pabado tantienquo iquec, quec comapenec onquecuedednubi padiseyobo, Uincuenta iquendac, quequin ëmbi tantiacpaden Pabado tantiec, quec comapenec onquecuededpondash. ⁸ Unësash uincuentequid nibëdec, quec saduseyobo. Adecbidi, Nuquin Papan uaid mayan bëdabëd ambi uaid utsi mayan nibëdec, queoac saduseyobo. Padiseyoboen, Uincuentequid iquec, quec. Adecbidi Nuquin Papan uaid mayan bëda, ambi uaid utsi mayambidi iquec, queoac.

⁹ Aden ambi tantiacpaden chuibanec comapenec onquec saduseyobobëd padiseyobo natiambo cuëdcuededpondash. Adec onquec cuëdcuedednubi padiseyobo, Nëid dada bëdambocquid nec. ¿Mayanën chioishi, qeshodambi muc nec capadi? Adecbidi, ¿Nuquin Papan uaid mayan bëdan chioishi, qeshodambi muc nec caoa-

padi? Padenquo iquemi. Pabaton chuiboed abimbo iquec, quepondash padiseyobo saduseyobo caic. ¹⁰ Adec comapenec onquec natiambo chushcanansho tantiashun comandanten: —Podon shoyonquin canite dëchicnushe qeshun mënchicshun shubu nuntan bëoata —cac sondadon Pabado mënchicpondash.

¹¹ Aden mënchicshun shubu nuntan sondadon yuedaquien Pabado ushash badiadash padpidec inchëshën Pabado ushnuvi Nuquin Icbo chopondash: —Mimbi Edusaden yacnoshon ëbi chuibanacpaden shubu dadpen icquid Doma caid yacnoshontsen mibi chuibamembique. Dacuëdenquo yec dayacquo icta —capondash Nuquin Icbon Pabado chuiquin.

Pabado cuesunenu quequin ompoquin cainaid

¹²⁻¹³ Adec Pabado bäd Nuquin Icbo onquebombien badiadash isadaidbo 40ted Pabado cuesuniabi icquin buna mëmunembi, quequin abimbo chiemi, quepondash. ¹⁴ Aden nanu quiash isadaidbo tsusiobo yacno nidash: —Pabado cuesuniabi icquin buna mëmunembi, quequin muenquiocquin chuibanombi. ¹⁵ Èbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabaton naid bëdamboen tantianuna. ¿Ada padpiden isadaidbo tsusiobo iccuededte shubuno bëmeoatsia? quequin chuitan Pabado bëmeoatsiashe. Aden Pabado sondadon bësho Pabado cuesunenuna —quepondash Pabado cuesunenuquido isadaidbo tsusiobo caic.

¹⁶ Aden aidon chuishobien Pabaton piauën tantiashun Pabado yacno nidshun chuioapondash aton piauën.

¹⁷ Adoaquien Pabaton sondado 100ted chuiquid cho, cata cac nidshun aton piauën chiac Pabado yacno sondado chuiquid chopondash. Adec chosho isun: —Nëid con piac nec. Aidi comandante chuite buneque. Aid yacno buanta —Pabaton cac ¹⁸ buampondash.

Aden Pabaton piac comandante yacno buanash sondado 100ted chuiquid: —Quënën nauedboed Pabado cuëmëdquidën ëbi chomeshun: “Con piac comandante chuite buneque. Aid yacno buanta,” cac bëombi —quepondash sondado 100ted chuiquid comandante chiec.

¹⁹ Aden chiaquien Pabaton piac mëdinanquin uidictsëc buanash comandante: —¿Atotsi ëbi chuinuec cho? —quepondash comandante.

²⁰ Adoaquien Pabaton piac: —Badiadshun isadaidbon ambi namiaid mibi yacno chomec. Aden chomiac nëmbo choshon naden chiec: “¿Ada isadaidbo tsusiobo iccuededte shubuno Pabado mimbi bëoapatsia? Aidën naid chuibansho bëdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. ²¹ Isadaidbon muaquin chiendac. Con cu Pabado buamenuen mibi aden chiendac. Comandanten Pabado bëmetsiash, quequin tantiaquin Pabado con cu cuesunenuquin caineque. Nidmenda. Con cu cuesunenuquid: “Pabado cuesuniabi icquin buna mëmunembi,” quiosh. Con cu cuesunenuen nëbimbobi podqued cuëmanshun ompodshon cainec —quepondash Pabaton piac comandante chiec.

²² Adoaquien comandanten: —Isadaidbon chiaid mimbi chuiboed utsi chienquo yec nidec nid —capondash Pabaton piac chuiquin. ²³ Aden Pabaton piac nidmeshun sondado 100ted icquido chuiquid daëd chomiashe comandante nadpondash: —Ënden inchëshan Sesadeya yacno ma mibëdi mimbi namiaid sondado 200ted nidnu mit-sana buanuequin nacnenta cata. Adomboembidi, cabayo catsadquid 70ted icquido

chuiquin nacnenta, quequin chuiyoata. Adomboembidi shocosh sianten senuequin sananquid 200ted icquido chuiquin mitsana nacnenta, quequin chuiyoata. ²⁴ Adem-bidi Pabadobëd icquido cobednadod Pediques yacno buanun cabayo nacnenta — capondash comandanten sondado 100ted chuiquid daëd chuiquin.

²⁵ Aden chuishumbic naden comandanten dada uapondash Pediques cobednadod caid chuiquin: ²⁶ “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Ëmbi dada uaid isec onqueta. ²⁷ Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiapaden tantiashun sondado dadpembëd choquin mënchiccombi. ²⁸ Aden mënchichumbic, ¿Atotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. ²⁹ Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabado chuisho tantiashun quënën nauedenquioctiadquidi nauedmepondash, quequin tantiashumbi quënën nauedmeopombi. ³⁰ Aden Pabado quënën nauedmeoashumbic, Podqued cuëmanshun Pabado cuesunenuequin isadaidbon cainec, qesho tantiashun badedquio mibi yacno buamiombi. Adembidi, Pabado icsambocquid nec, quequin aid cuesunenuequido mibi yacno nidmembali. Adoac ma ambibi Pabado naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabadobëdta nëid cobednadod Pediques menenuen buanta — capondash comandanten.

³¹ Aden comandanten dada uashun meniac aidën chiapaden Pabado buanec sondado aid inchëshëmbi shubu dadpen icquid Antipatidis caid yacno chopondash. ³² Ambo choash badiadshun sondado cabayo catsadquidonuidquio Pabado buanec nidnubi sondado utsitedi aurbidi nidaneopondash. ³³ Adec Pabado buanec nidequi Sesadeya yacno choshon abi chuiquid comandanten Quëdaudio Disiasën dada uaidbëdta Pabado Pediques menepondash cabayo catsadquidon. ³⁴ Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoquien Pabado: —Nidaid Sidisia caid yacnoshon tishaid nebi —quepondash.

³⁵ Adoquien: —Mibi icsambocquid nec, quequin chuiquido isadaidbo choacsho mimbi nabanaid chuimembali —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquio Pabado nauedsho isun: —Puduenanec cuenushe ista —capondash sondado chuiquin.

Pediquesën tantianubi Pabado ambi naid chiaid

24 Adashic, 5tedec ushash isadaidbo tsusio dapa Ananiasbëd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuëmëdquid bëquin. ² Aido chosho isun Pediquesën Pabado chomiacsho isun isadaidbo tsusiobon tantiacpaden chuinuequidën Tedtudo naden Pediques chuipondash: —Mibi chuinu. Tantia. Chuiquid bëdambocquid icquin mimbi bëdamboen nabanaic isadaidbo bëdamboec tabadec. ³ Mimbi aden na-

bansho isun, Bëdambocquid mibi nec, quequin mibi chiemi. ⁴ Aden chuishun mibi chieshmenquiocnuequin isadaidbon chushcaboed badedquio chuinu. Tantiata.

⁵ “Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaid tantiaquido tsusio nec. Aidëmbi nidaidtedi yacno nidshun ambi tantiaid chuibanquin isadaidbo comapenen chushcamequin cuëdcuededmiac cuëshëd-cuëshëdposh. ⁶ Aidëmbi Nuquin Papa tabadte shubu uashunaidën puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. ⁷ Aden cuidnu quenubien comandante Disias cuëmëdquid choshon Pabado mënchicanquin buamposh. ⁸ Pabadon ambi naid chuisho mimbibi tantiashun, Isadaidbo tsusiobon abimbo chiosh. Icsambocquid nec, quequin mimbi chuioapatsiac —quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

⁹ Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

¹⁰ Adsho tantiashun, Onqueta, quequin mëdante uiccaquin Pediquesën ismiac Pabado nadec onquepondash: —Chuiquid dapan tantiata. Ëmbitsen chuinu. Dadpen seta matamequin con matses isadaidbo abi chushquiaid tantiashun mimbi bëdamboen tantiacpaden namedenioc. Adquid mibi nec, quequin tantiaquin, Ëmbi naid chuibanec bëdambo iquebi, quec dacuëdenquio yec onquebique. Tantiata.

¹¹ Edusaden yacno choash ambobi 12tedec ushobi. Ëbi anoshon isboedon, Abimbo iquec, quequin nëmbo choshon mibi chuitsiash. Edusaden yacno choash Nuquin Papa shubu uashunaidën puduedec Nuquin Papa tantianuec choapobi. ¹² Ambo puduedash utsibëd chushcanaanenquio yec tabadsho istuidash, Icsambocquid nec, queposh. Adembidi chuibanquin utsibo nëishmequin chushcamenquio iccombi. Pabado icsambocquid nec, quequido Pabadon chiaid abimbo iquec, quetiadquidi nec. ¹³ Ëmbi naid Tedtudon chuibamboed, Abimbo iquec, quetiapimbo iquec tsusiobo. ¹⁴ Nëiduidtsëqui abimbo iqueque. Chuinu. Tantia. Nuquin tsusedpabo chuimi-acpaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquio nebi. ¹⁵ Adembidi, matses unësacsho Nuquin Papan uincueniac abi tantiaquid abëdi tabadnubi abi tantiesa chian anëdënquequid nësecaindac, quequin tantiembi isadaidbo tsusiobon tantiacpadembi. ¹⁶ Aden tantiaquin Nuquin Papan, Bëdamboen mimbi naoc, capashuni, quequin bëdamboen nabanec tabadec nebi. Adembidi, matsestedishun, Bëdamboen mimbi naoc, capashuni, quequin adomboembidi bëdamboen nabanec tabadec nebi.

¹⁷ “Adequi nidaid utsi-utsiec yacno capucuenec tabadcuenequin, Edusaden yacnoquid isadaidbo bunec tabadec, qesho tantiasch piucquid menenuc choapobi. Adembidi, Nuquin Papan bëdamboen dayun uabenioshi, quequin piucquid menenuc choapobi. ¹⁸ Aden menenuc abi tabadte shubu uashunaidën puduedash ëbentsëqui capusho ëbi chushcaboedon istuidposhi. Bëdamboec tabadsho istuidposhi. ¹⁹ Ëbi capusho istuidquido isadaidbo nidaid Asia caid yacnoësh choquido niosh. Aido, Pabado icsamboec tabadsho isombi, quepac caosh. Ambi chiaid abimbo icnuc nëshuntsen adomboembidi chuitiadquidi nec. ²⁰ Adembidi isadaidbo tsusiobon: ‘Padiseyobo yec bëdambocquid nec,’ quequin ëbi anoshon chiacpadembi nëshuntsen adomboembidi chuioatiadquidi nechitec. ²¹ Anoshon nëiduidtsëqui chiech comapenec cuëdobi: ‘Unësash uincuentequid iquec,’ quequin chuisho tanti-

ashun, Icsambocquid nec, quequin isadaidbo tsusiobon ëbi mibi chiec caimbi — quepondash Pabado Pediques chiec.

²² Aden Pabaton chuisho tantiash Pediques tantiauidquid iquec: —Nëbi mimbi aidtedquio chuibansho tantiembi. Comandante Disias nëmbo choan mibi padpiden chuimembi —quepondash Pediques Pabado chiec. ²³ Aden chuishumbic naden Pediquesën sondado chuipondash: —Shubuno Pabado buanshun puduednushe qeshun ista. Abi menuequid abi isnuequid chedo chosho isun yuedta — quepondash Pediques ambi Pabado ista caid chiec.

²⁴ Adashic, daëdpactsëc ushash Pediquesbëd aton chido, Dusidia cuëmëdquid chopondash. Aton chido isadaidbo icpondash. Adec aton chidobëdi choshon abi yacno Pediquesën bëmiacsho ambi tantiaid Esuquidistu Pabaton chuibanac Pediquesën tantiauidpondash. ²⁵ Aden chuibanquin Pediques Pabaton nadopondash: Utsin abi utsibëd chushcananai chuibanacsho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuioapondash Pabaton. Adembidi, Esuquidistu tantienquio icsho chian anëdënquequid Nuquin Papan nësecanushe quequin Esuquidistu tantiata, quequin Pabaton chuioapondash. Aden Pabaton chuisho tantiash: —Padi. Ëmbi naid nibëdsho isun padpiden chuimenuen mibi bëmeoaimbique. Nëbi nidec nid —cac Pabado nidpondash. ²⁶ Adshumbic, adembidi abi yacno Pabado Pediquesën bëmeded-bëmededpondash. Nidtiadquio icquin piucquid Pabaton ëbi menetsiash, quequin tantiaquin Pabado bëmiash aibëd Pediques onquepondash.

²⁷ Adashic, seta daëd matamiash Podsio Pesto cuëmëdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesën Pabado shubu nuntan niampondash naden tantiaquin: Pabado shubun nauedshun ëmbi niansho isash, Bëdambocquid nec, quequin isadaidbon ëbi cain chuibededpec, quequin Pediquesën Pabado shubun nauedshun niampondash.

Pabaton ambi naid Peston chuimiaid

25 Pesto cobednadod yanash Sesadeya yacno choash 3tedec ushanec Edusaden yacno nidpondash. ² Adec Pesto Edusaden yacno choash tabadsho isadaidbo tsusiobo, Pabado chushcaquido: ³—¿Ëbitedi bëdambo icmenuequin Pabado Edusaden yacno ada bëmeoatsia? —quepondash Pesto chiec. Pabado bësho cuesunenuequidon cainshun cuesuneppec, quequin tantiaquin isadaidbo tsusiobon aden Pesto chuipondash.

⁴ Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi. ⁵ Pabaton icsamboen naosh, quec utsi-utsiec ëbëdi nidshun anoshon Pabaton naid icsa ëbi chuita —quepondash isadaidbo tsusiobo caic.

⁶ Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bëmepondash isadaidbo tabadnubi. ⁷ Aden bëmiacsho isash Pabado dëcatec isadaidbo Edusaden yacnoësh chobedo Pabaton naid chiec abimbo chiacbimboec onquecuededpondash.

⁸ Aden isadaidbon chiaquien: —Ëmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobëd puduedambocobi. Adembidi,

empedadod Doma yacno tabadquid, Sesad cuëmëdquidën chiaid niacamboccombi —quepondash Pabado.

⁹Adoaquien: —¿Edusaden yacno buanac anoshon adomboembidida isadaidbo tsusiobo chuioatsia? —quepondash Pesto Pabado chiec. ¿Edusaden yacno Pabado ada bëmeoatsia? quequin isadaidbon chiacpaden nanuec Pesto adpondash. ¹⁰Adoaquien Pabado: —Domanobo ancaquidën empedadod caidën, Sesad cuëmëdquidën, Mibi yacnocquido bëdamboen tabadmequid icta, caid icquin mim-bimbo chushcananquid bëdamboen tabadmeta. Isadaidbo icsamboen tantiaquin nainquioccombi. Abimbo Pabadon chiec, quequin mimbi tantiec. ¹¹Icsambocquidquid iquec Pabado unës uame, qesho tantiash, Adoanenda, quenquioctsiabi. Isadaidbon abimbo chiacbimboen chuisho tantiash, Pabado buanshun cuidta, que-tiapimbo mibi iquec. Isadaidbo yacno buanta, mibi quenuc, Empedadod ëmbi naid chuite bunebi, quequin dada uaindambi —quepondash Pabado Pesto chiec.

¹²Aden Pabadon chuisho tantiash Pesto udictsëc nidash abipadquidbëd onquiash choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

¿Atotsimbi Pabado napatsia? quequin Peston Aquidipa caid

¹³Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash. ¹⁴Adec isedec choash dadpen ushec tabadsho isash Pabado chiec Pesto nadpondash: —Pediquesten quënën nauedmiaid Pabado cuëmëdquid chuinu. Tantiata. Aidi abi iquec shubu nuntan. ¹⁵Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

¹⁶“Adoaquien, Mibi abëdi chushquiaid Pabadontsen chiamoocnoc unës uata que-tiapimbo iquebi. Domanobon naden nata quequin chiacpadpenquiocquin adoti-apimbo iquebi, quequin isadaidbo tsusiobo chiombi. ¹⁷Aden chiac nëmbo choshon abi chushquiaid aidon chuisho tantiec tsadnuen Pabado bëmiombi. ¹⁸Aden Pabado bëmiacsho ëmbi tantiacpaden abi chushcaquidon Pabadon naid chienquiocposh. ¹⁹Ëmbi tantiaidpenquio Esuquidistu unësash uincuenaid Pabadon tantiaid icsambo iquec, quequin chuiposhi isadaidbo tsusiobon. ²⁰Aden ambi tantiaidquid bëdamboen tantienquid yec nadpobi Pabado caic. Min matsesën naden nata quequin chiaid tantienquid iquembique. Edusaden yacno buamiac mimbi naid anoshon chiac bëdambo ictsiash, quequin chiombi. ²¹Adoaquien: ‘Empedadod, Sesad yacno nidshun ëmbi naid chuitiadquid iquebi,’ queposh Pabado. Aden chiac quënë yacnoshon aid puduedmetiapimbo iccobi. Nëmbobi Pabado quënën tabadec —quepondash Pesto Pabado chiec Aquidipa tantiamenuquin.

²²Adoaquien Aquidipa: —Ëbi aidën chuibansho tantiate bunebi —quepondash. Adoaquien Pesto: —Badiadshun aidëmbi chuisho mimbi tantiendac —quepondash.

Aquidipa ambi naid Pabadon chiaid

²³Aden Peston chiaquien badiadash bëdaidquid dasiuidash Aquidipabëd aton chuchu choash iccuededte quënën puduedash sondado chuiquid chuiquid utsi-bobëd aid daëdi tabadpondash. Aido tabadsho isun Peston Pabado bëmepondash.

²⁴ Bëmiac Pabado nënantanquio nidtonobi Pesto nadpondash: —Ancanquid Aquidippan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chioshi. Èbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioposhi. ²⁵ Aden chuisho tantiashun nëid ambi naid chuimeoapombi. Aden Pabaton chiaidsen tantiashun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabaton chuiposhi. Adoac Doma yacno aidi buamenuna. ²⁶ Aden buamenuen çatotsimbi dada uaqin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimbicac dada uatsiambi. ²⁷ Ambi icsamboen naid nibëdnuc Doma yacno buametiapimbo iquebi — quepondash Pesto ancanquid Aquidipabëd iccuededquido chiech.

26 Aden Peston chiaquien: —Mibibi onquequin mimbicac naid chui. Tantienu — quepondash Aquidipa Pabado caic.

² Adoquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi. ³ Isadaidbon naden nata quequin chiaidbëdta abi onquiaid mimbicac tantiec. Aden tantiaquid mibi icsho ëmbi nabanaid ëmbi chuibanesho tantiata. Chuinu.

⁴ “Èbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi. ⁵ Èbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec. ⁶ Unësash uincuente iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ëbi icsho isash, Icsambocquid nec, quec isadaidbo. ⁷ Nuquin tsusedpa Acobo isadaid caidën madobon tsyuecquidon, Unësasho Nuquin Papan uincuemetete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. ⁸ Nuquin Papan nadatiambocquin uincuemetete chiaid mimbicac tantienquio icpe.

⁹ “Ènden ëmbitsen tantiauidquin shubu dadpen icquid Nasaded yacno ictened, Esus cuëmëdquid tantiaquid icsambocquid nec, quequin unës uamembi, qeshun adobampondambi. ¹⁰ Edusaden yacnoshon adquid dadpen mëyamepondambi. Isadaidbo tsusiobon, Adota, cac ëmbibi Esus tantiaquid bëdamboquid icsho bedshun quënën nauedmepondambi. Unës uanu, qesho tantiash, Ai, unës uatiadquio iqueque. Adota, quepondabi. ¹¹ Nuquin Papan chiaid chuibante shubu utsi-utsiec yacno nidted-nidtedondabi aido mëyamenuc. Esus, Nuquin Papan madopenquio nec, aido camenuc mëyamepondambi. Adembidi nidaid utsi yacnoshontsen adquid istuidshun mëyameoapondambi.

¹² “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. ¹³ Adec nidquimbi ushë cuembo yanec ushë comapenec chënquequidën ëbëd icquidobëdta ëbi dëcatesho isondambi. Abimbo iquec, quequin mibi chuinu. Ancanquid dapan tantiata. ¹⁴ Aidën dëcatiac ëbitedi nidaidën uebudcuededondabi. Adec uequimbi con matsesën onqueten ebedeyon onqueten abucuësh onquesho naden tantiondambi: Saudo, çatot-

sieshun ëbi tantiaquido mimbi mëyampe? Èbitsen mëyantiadpambocquin mimbi aido mëyanec, quec onquequin chiondashi.

¹⁵“Adoaquimbi: ‘¿Tsutsi mibi ne, Icbo?’ caondac.

“Adoaquien, Mimbi mëyanaid Esus nebi. ¹⁶Èmbi namiaid mibi icmenuec chobi. Esus isombi, quequin ¿ëbi chuibeneta caid nëbi mibi yanec? Èbi chuibenequin mimbi isaidbëdta ëmbi yuecshun ismetequad chuibeneta. ¹⁷Aden ëbi chuisho mibi cuesunete bunquid isadaidbobëd Isadaidpembro icsho mibi mënchiquendambi. Adquid chuibanta, quequin mibi nidmëmbi. ¹⁸Aden chuibanac utsinutsinquier pashuac bimboeodëmbi tantiendac. Icsambocquid nebi, quequin tantienquiocboedi, Icsaobique. Èbi pauc, Papa, quependac adquid. Mayan icsan yua icboedi Nuquin Papan bacuë iquendac. Adquid yanash abi icsaid paucac Nuquin Papan bëdambo icmiaid ëbi tantiaquid utsibëd iquendac, quequin Esusën chuipondashi.

¹⁹“Aid abucuësh onquesho tantiashun chieshenquiocquin chuibeniombi caimbi, mibi chuiquin Aquidipa. ²⁰Damasco yacnoshomba chuibanondambi. Anoshomba chuibanshumbic Edusaden yacnoshontsen chuibanooandambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiacpaden nabanta, quequin chiombi. ²¹Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. ²²Padnuen ëbi dayun uaquid Nuquin Papa icquin isadaidbon cuesunenushe qeshun cudasëmposhi. Adoac nëid ushënquio mibëdtabi mimbi namiaido mibi chuibanec nebi, ancanquid Aquidipa. Moisesën, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tanta. ²³Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembro Quidistun chiendac, quequin chiampicpadec chopanëdash —quepondash Pabado iccuededquido chiec.

²⁴Adec Pabado onquesho tantiash: —Min tantiate icsabudash mibi onquec. Mimbi tantiaid dadpen iquec tantienquio yec onquechitequien mibi nec —quepondash Pesto Pabado caic.

²⁵Adoaquien Pabado: —Bëdamboen tantiec onquebi. Èmbi chiaid abimbo iquec, caimbi mibi ancaquid Pesto. ²⁶Ancanquid Aquidipan ëmbi chuibamboed abimbo iquec quequin tantiec. Aden aidën tantiasho dacuëdenquiocquin aid chiombi. Èmbi chuibamboed ompoenquiocquin isquidon chuisho aidëmbi tantiapondash. ²⁷Nuquin Papan ambi naden nanun chiaid dada uamiampidon chiaid chuisho mimbi tantioc —capondash Pabado Aquidipa chuiquin.

²⁸Adoaquien Aquidipa: —¿Mimbi chuiboedtedtsëqui tantiashtabi Esuquidistu tantiaquid yampe? —quepondash Aquidipa Pabado chiec.

²⁹Adoaquien Pabado: —Esuquidistu tantiaquid ëbipadquid mibëd iccuededquidtedibi Nuquin Papan icmepashun. Nëid ushënquio daëdpactsëc chiombi. Aidtedtsëqui chiac tantiatipimbocsho isun yuen chuibantsiambi ma Esuquidistu tantiaquid mibitedi yaneshun. Padnuen ma mëtaniaid ëbipadquid ma mibitedi iquenquiocpanuna —quepondash Pabado.

³⁰ Aden Pabadon chuibanaquien ancanquid Aquidipa nidtopondash. Nidtoشو isash Pestobëd Bedenise iccuededquid utsibo chedo nidtocuededpondash. ³¹ Adec nidtocuededash puduenash onquecuedec: —Chuibamboed icsamboen nainquioc-cosh. Adoenquiocsho unës uainquiocriad. Adembidi ënden quënën nauedenquioc-patecnëdan —quepondash ancanquido.

³² Aden chiash: —Empedadod chuite bunebi Pabado quiambocsho quënën nauedacnoshon aidi mimbi nidmetsenosh —quepondash Aquidipa Pesto chiec.

Doma yacno Pabado buanaid

27 Adashic, Nëbi mëtaniaido nidaid Itadia caid yacno buanac bëdambo iqueque. Pabadobëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100ted-bëdi abi chuiquid abibi cuëmëdpondash. ² Aden buanta cac Pabadobëdta utsibo bedshun acte cuëmano buanshun cano dapa Adadamitio cain cuënaid istuidpondash. Aid cano dapa istuidashien, Icbo, nidaid Asia caid cuëman shubu dadpen icquid utsi-utsiec yacno nidtuidebi, quequin chuisho tantias Pabadobëd antabëdtopondabi. Adec antabëdtosho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

³ Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno nid. Aidon mibi menetsiash, quequin Pabado bëdamboen tantiaquin sondado chuiquidën, Udion, chuipondash. ⁴ Adshumbic Sidon caid yacnoësh puduanec nidquin potesho cunquequidën bëquedtuïdac ushë choacmi cuenadtanquin acte nënantan nidaid nacnëdquid Chipide caid datampondash. ⁵ Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. ⁶ Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabadobëd icquido aid canontsen antabëdtomepondash. ⁷ Adec Mida yacnoësh puduanash nidquin potec dadpen ushacsho cunquequidën cano bëquedtuïdpondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nacnëdquid Quideta caid yacno buanoapondash. Uquë cuëma utsiuc Sadmon caid icpondash. ⁸ Ushë choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsëc shubu dadpen icquid Dasia caid iccondash.

⁹ Cunquequidën bëquedac yuenquio potiactanetsëcquien buampondash. Comapenec cunquequidën nuqui bëquedendac, quequin tantiaquin Pabadon nadopondash: ¹⁰ —Chuinu. Tantiata. Nëuëshquio puduanquin potesho cunquequid dapan bëquedshun cano chic-chictsiash. Acten mentoadmane quequin potenquio iquembi, quequin chuita —capondash Pabadon sondado chuiquid chuiquin. ¹¹ Aden Pabadon chiaqui sondado chuiquidën niacbidanquin cano icbobëdtan cano nidmequidën nidnu quequin chiaid tantiapondash. ¹² Cunquequid dapa cunquequid Buenos Puedtos yacno tabadec iquen uanquid dapanquio nuqui iquenendac, quiash

shubu dadpen icquid Penise caid yacno nidnuna. Ambo choash nuqui tabadendac cunquequid dapa cunqueubui, quequin utsitedishun chuipondash.

Acte dapa potesho cunquequid dapanquio cano bëquedte

¹³ Nuqui iquenendac, quequin tantiaquin bëdiatsëc cunquecho isun abi bunac-paden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. ¹⁴ Adec nidequi udictsëc yanshobi ushë cho-choaid ëquëbicseshun Quideta caid nidaid mananucüesh cunquequid dapa choquin bëquedtuiddquin ¹⁵ icbon cano nidmetiapimbocnobi cano buampondash. ¹⁶ Aden cunquequidën buanaqui acte nënantan nidaid nacdëdquid utsimpi Quëdauda caid ëquëbicsëc cuenadquimbi canompi cano dapan nëshun buanaid buanushe qeshun anandopondash. ¹⁷ Aden canompi anandoshon cano dapa canchednushe qeshun uidën uaqin datanebanshumbic cano buante dashcute abi dec-tante cuestebëdtabi imbudshun dashcute chicacsho cunquequidën cano comapenen buampondash. ¹⁸ Aden cano cunquequid dapan buanubi badiadnuc acte natiambo tēccoasquesho isun ambi ansandoshon bëboed acte nësiapondash. ¹⁹ Adshumbic 3tedec ushun bucu dënëshun cano dashcute indotetedi nësiaoapondash. ²⁰ Aden nësecanec nidquimbi inchëshën ushëbëdta uispa abu chëshën bëtinacsho isenquio iccondambi. Adembidi badiadën ushë isenquio iccondambi. Dadpen ushquin aitedi isenquioccondambi. Aited isenquiocnobi acte comapenen tēccoascapondash. Ad icsho isash, Bënudchitequien nuqui iquec, abitedimbo quecuededpondash.

²¹ Adequi nuqui iquec, qeshun buna mëmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoësh puduanenda caombi. Adsho tantiaboshi tantienquio yec mibi puduampoc. Ēmbi chiacpaden nabanuc mimbi ansandoaidtedi abi ictsiandac. Adecbidi, Unësebi, quenquio nuqui ictsiandac. ²² Padnuen acte tēccoasquenubi nuquitedi unësenquio iqueque. Dacuëdenquio yec dayacquio icta. Canouidi canched-cannedendac. ²³ Nuquin Papan namiaidquio nebi. Adquid icsho inchëshën ambi uaidën mayan bëdan ambi chomiaidën naden chiochi: ²⁴ “Ancanquid dapa, empedadod caid mat-ses chushquiaid tantiec tsadte yacno mibi nidtoendac. Mibi ambo nidmequin canon mibëd icquidtedi acte yacnoshon mënchiquembique. Dacuëdenquio yec tabad,” caposhi Nuquin Papan uaid mayan bëdan. ²⁵ Aden aidën chiac dayacquio icta. Nuquin Papa ambi chiacpaden nabanquid nec, quequin tantiombi. ²⁶ Adembidi, acte tēccoasquequidën nuqui acte nënantan nidaid nacdëdquid cuëmano buanshun cano cancheshunendac, quequin tantiombi —quepondash Pabado canon antabëdtoaido chiec.

Cano canched-cannedaid

²⁷ Adashic, Buenos Puedtos caid yacnoësh ënden nidboshi 14tedec ushec acte Adidia caid yacnoshon cunquequidën buampondash. Aden acte tēccoasquequin buanubi inchëshpotsembo yanuc, Cuëma anoentsëquien nuqui choendac, quequin cano nidmequidon tantiapondash. ²⁸ Aden tantiaquin, ¿Tionda iqueque? Tanu, qeshun yuëmbocquid shocosh bucu dëdectanshun pumbudquin tampondash. Aden tanshun, Aidiompenquio iquec, quequin chuipondash. ²⁹ Nidaid cuënote dapa cunquequidën buanquin cano semenushe qeshun cano uidën uate dapa yuëmbocquid tsitsumi tsidectanshun acte nënequin uidën uash ma badiadbono quiaash tabadpon-

dash. ³⁰ Adec tabadnubi cano nidmequido cuenueshun dēbiate yacnoshontsen cano uidēn uate yuēmbocquid dēdectanuequin abimbo chiacbimboen canompi anandoboed nēnetsempondash. Cano dapa mentoadtsiash, qeshun cuenuequin adopondash. ³¹ Adec aido nidtsenubien Pabado: —Cuenuequido canompin nidnuc cano dapanidquido nuqui mentoadendac —quepondash sondado chuiquid caic. ³² Aden Pabado chiaquien abi dectante bucutedi sēnac canompi nēpaēdpondash cuenuequido nidtiapimbo yec.

³³ Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequo tantiaded-tantiadedtsēcquin mimbi piamboccoc. ³⁴ Mibi mentoadenquio iqueque. Min manēdaid abentsēc paēdenquio iqueque. Penquiochoedi unēschtomane quenquiocquin peta —quepondash Pabado. ³⁵ Aden chuishumbic utsitedi ismequin pan bedshun Nuquin Papa chuishun pan cuēshun Pabado pepondash. ³⁶ Aden Pabado pesho isun, Nuquitsen penuna, qeshun abitedishun pebededpondash. ³⁷ Cano antabēdtoquido 276ted icpondash. ³⁸ Aidedshun peshumbic, Cuēmano nidec, quequin ambi sandoaid utsitedi tiedēn caniquid ēshē acte nēsiapondash, Cano yuēmbo iquec, qeshun.

³⁹ Adshumbic, badiadnuc ambi isacmaid nidaid istuidpondash. Acte cuidiantanquid cuēmambi masi icsho isun ambo cano nidmenueshun ⁴⁰ uidēn uaid tebanac acte nēpaēdpondash. Adembidi, cano dēbidiadmete bucutedi seccudoashun cano dēbiateno buanquin dashcute shoyontanquimbi cadoapondash, Cunquequidēn acte daēd naccuēscananacno buampashuni, quequin. ⁴¹ Aden cano nidmenubi cano dēbiaten masi setuidec dēchiquidtiapimbo yec cano dapa dētocquepondash. Adec dēchiadash acte tēccoasquidēn cano dapa canche-canchequin tauapondash.

⁴² Adsho isash sondado, Mētaniaidtedi cuentsiashe. Cuesunenu, qesho ⁴³ tantiash Pabado cuesunenushē qeshun: —ǰChēn! —capondash sondado chuiquidēn. Aden chuishumbic, Acten tantanec mēquiadquido tantanec nidanenubi ⁴⁴ tantantiapimbocquido cano cuēsh-cuēshēdaid bedbanash noadec tantanquido tsibanec nidta, quequin chuipondash sondado chuiquidēn canon antabēdtoquido chuiquin. Aden ambi chiacpadquiec nidanec mentoadenquio yec abitedi nidaid yacno choash decatocuededpondash abitedi.

Madta caid yacno Pabado bēd icquido choaid

28 Adec nidaid yacno choash dectatoneshun, Nēid acte nēnantan nidaid nāc nēdquid Madta caid nec, qesho tantiabededpondash. ² Ambo tabadquidon abitedi bēdamboen yuedpondash. Iquen uampamboec ue sequenubi Madta caid yacno chosho isun cuēte dētsiadoshon, Cuēc cho, quequin chuipondash. ³ Adnubic Pabadontsen cuēte tanunquiocquid bedtanquin tsindoquin masandopondash. Aden masandoaid nēdēnquiacnoēsh puduenquin nisin Pabado mēpepondash. ⁴ Aden mēpiash ēchiquidenquio yec mēdiadsho isashien anocquido: —Nisin piaid cuesunianquid nepanui. Mentoadenquio yec actenuēsh dectatoacsho nisin piac unēschtequien iquec. Abi icsaid cuidtequidien nechitec.

⁵ Adec onquecuedednubien Pabado comapenen uicac nisi cuēte dētsiadaidēn nēpaēdpondash. Adnubien Pabado abi bēdambo icpondash. ⁶ Aden Pabado uicac nisi paēdsho isun Pabado mēdante mēbidisquetsiashe. Isnu, quequin isbededpondash. Aden tantiaquin yuen cainquin mēbidisquenquiocsho isash, Nisin mēpeboed utsibon papa cain cuēnaid nepanui, quecuededpondash Madta caid yacnocquido.

⁷Madta caid yacnoquido tsusio dapan shubu anoentsëqui icpondash. Tsusio dapa Pudio cuëmédquid icpondash. Aidëmbi aton shubu yacno canon choboe-dotedi yuedshun abentsëc chotsëcnuc ushquin ëbitedi bédambo icmepondash. ⁸Ad-nubien Pudion papa chumbo yec pieneç aton madon shubu nuntan uepondash. Adec Pudion papa uec qesho tantiash Pabado aid isec nidshun ashunquiobi Nuquin Papa chuishumbic Pudion papa damishquin bédamepondash Pabado. ⁹Pudion papa bédanacsho isash Madta caid yacnoquido nënquidbëd daicsaid chedo cho-chopondash. Èbitsen bédametsiash, quiash cho-chosho aidotsen bédamepondash Pabado. ¹⁰Adosho isun canon choquido bédamboen tabadmepondash anocquidon. Nidnuesho tantiashun menebampondash mitsana nibëdec quequin.

Doma yacno Pabado choash tabadaid

¹¹Adashic ushë 3ted nidmiash Madta caid yacnoësh puduampondash. Madta caid yacno choash cano icbo, Iquenoampamboec icnuc nëmbo tabadnuna, quiash tabadash: —Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nacnenaid icpondash. Ambi papa cain cuënaid abentsëc Castod icnuc utsi Podus icpondash. Adembidi aton cano cuëmpondash icbon. ¹²Aidën puduanec nidequi acte nënantan nidaid nacnëdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. ¹³Ambo tabadash puduanquin aid acte nënantan nidaid nacnëdquid cuëma anoentsëqui potequi nidaid Itadia caid cuëmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidën buanac badiad utsin shubu dadpen icquid Puteyodi caid yacno chopondash. ¹⁴Ambo choshon Pabadobëd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobëd tabadashic auëshquio puduanec podquedën nidequi shubu dadpenquo icquid Doma caid yacno chopondash Pabadobëd icquido. ¹⁵Podqued Apio caidën choec, quequin chuituidac Esuquidistu tantiaquid Doma yacnoquid utsi-utsiec Pabado bëquedec nidanepondash. Adecbidi Esuquidistu tantiaquid ut-sibo shubu dadpen icquid Tabednas Abentsëc chotsec quequin cuënaid yacnoquido Pabado bëquedoac nidaneopondash. Aido cho-chosho isashien, Èbi dayacquio icmenuen nëidtedi mimbi chomioc, Papa, quec dayacquio iquebi, quiampondash Pabado. ¹⁶Adec aido bëquedec choash aucbidi nidec Pabadobëd Doma yacno choapondash. Doma yacno choacshobien Pabado quënëñ nauedenquiocquin shubun tabadmepondash sondado abentsëcshun abëd tabadquin isnubi.

Doma yacnoshon Pabado Esuquidistu chuibante

¹⁷Adec aton shubun tabadec 3tedec ushun isadaidbo tsusiobo chinuequin, Aido chome, capondash. Aido chomiacsho isun Pabado nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matsesën bedshun domanobo chuiquid meniondashi. ¹⁸Aden meniac domanobo chuiquidën, Mimbi naid chuiban, cac chuibanondambi. Aden chuiban-sho tantiash, Unës uainquioctiadquidi mimbi naic, quepondash domanobo chuiquid

ëbi caic. ¹⁹ Aden domanobo chuiquidën tantianubi nuquin matses tsusiobon, Unës uatiad, quequin chiac, Empedadod, Sesad yacno nidshun ëmbi naid chuite bunebi, quequin chuipondambi, Con matses icsambo iquec, quenquiocquin. ²⁰ Ëmbi chui-boed mibi chuiunquequin mibitedi chomiombi. Unësash uinciente nec, quequin tantiaquin nuquin matsesën cainacpaden cainquid icsho mëtaniaid nebi —quepondash Pabado isadaidbo tsusiobo chiec.

²¹ Adoaquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoësh choquido, Pabado icsambocquid nec, quequin chienquioccosh. ²² Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnoquido tsusiobo Pabado caic.

²³ Aden Pabado tantiaid tantianuec, Nëidted ushash padpidec choaindabi, quianec nidanepondash tsusiobo. Adec nidaniash ambi chiacstedec ushash Pabado tabadacno choapondash isadaidbo tsusiobobëd utsibo dadpen. Adec cho-choash tabadsho isun: —Matses icsaquid icsho Nuquin Papan cuidnushe quish abided cuidadec Esuquidistu unëspaneðdash. Aid tantiaquid yec Nuquin Papabëd tabadendac, quequin Pabado chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbëdtabi Nuquin Papan naden nanun chiaid ambi utsibo dada uamiampid chuibampondash Pabado. Ambi dada uamiampidën chiaid Nuquin Papan madombo Esuquidistu nec, quequin badiadnubi chuiquin tauashun inchëshbudtsëqui chuiquin ëmpondash Pabado. ²⁴ Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. ²⁵ Aden abentsëc tantiacbimboen tantiatiapimbo yec comapenec onquesho tantiasien Pabado nadpondash. —Nuquin Papan Mayanën Isayas dada uamequin nuquin tsusedpabo naden chuiampic:

²⁶ “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantienquo iquendac; Adembidi Ëmbi nadatiambocquin nabanaid isted-istedquimbi abimbo isenquo iquendac.

²⁷ Bëdamboen tantiaboedobi nëbi min matses pamumëdacbimboec tabadec; pashuacbimboen tantiec tabadoaic; ushacimbocbidi tabadoaic.

Adec tabadenquiocquin ëmbi nabansho mimbi istsiac. Adembidi ëmbi chiaid mimbi tantiatiasiac. Aden tantiasun mibi icsaid mimbi ëntsiac.

Adquiduidi ëmbi bëdambo icmiaid nendac.”

²⁸ Adesa mibi icnuc isadaidpembo Esuquidistu chuimembi. Aden aidi chuisho aidon tantienac —quepondash Pabado ²⁹ Nuquin Papan dada uamiampicpaden chuiquin isadaidbo Doma yacnoquido tantiamenuc. Aden chuisho tantias isadaidbo nidanepondash.

³⁰ Adembidi seta daëd matamec tabadquin Pabado Esuquidistu chuibampondash. Aton shubun tabadquin abi isedec choquidtedi Pabado yuedpondash. ³¹ Utsi, Chën, quenquiocnobi dacuëdenquiocquin, Nuquin Papabëd tabadte iquec, quequin huibampondash. Adembidi Esuquidistu tantiamenuc chuibampondash Pabado.

Padi. Esuquidistun, Ëbi chuibeneta, caidon naid chuibanquin aitedi dada uaombi, Teyopido.

DOMA YACNOCQUIDON ISTE

Tauamboen chiaid

1 Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papantsen: —Con Mado chuibeneta —caidquio nebi. ² Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. ³ Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. ⁴ Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec. ⁵ Aidën: —Pabadon chuibeniac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. ⁶ Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. ⁷ Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

Doma yacnocquido iste Pabado bunaid

⁸ Tantia. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi. ⁹ Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabadon abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenuc. ¹⁰ Nadembidi Nuquin Papa chianembi. —Doma yacnocquido istantiadquio iquebi. Mimbi nidmiac nëbi nidtsiabi, Papa —quequin chianembi. ¹¹ Aden mibi istantiadquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadomboen chieshtoenquio icquin Esus tantiaquionona —quequin mibi chuibantsiambi. ¹² —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

¹³ Tantia, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuidqueuidobi. —Nidnu —queshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpenshun Esus tantiabenacpadomboen ma Doma yacnocquidon utsibontsen Esus tantianu —quiash mibi yacno nidtiadquio iquebi. ¹⁴ Esuquidistun chiacpadomboen ambi naid matses abitedi chuibantiadquio iquebi. —Dadpen tantiaquidobëdtabi tantienquio icquidotsen chuibenenu. Adembidi dada uaquidobëdtabi dada uainquio icquidotsen chuibenenu —quiash nebi. ¹⁵ Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

¹⁶ Esusën naid chuibenec bédambo iquebi naden tantiash. —Nuquin Papan tantiapadec matses cuidmenquio icnuec Esus abided cuidadec unësac caondash. Aid tantiasho Nuquin Papan matses cuidenquio iquec. Abia chiaidon isadaidbon Esus tantiasho cuidenquio icquin isadaidpembo matses utsibontsen Esus tantiasho Nuquin Papan cuidenquio iquendac —quiash Esusën naid chuibenec bédambo iquebi. ¹⁷ Esusën naid chuisho tantiash nuqui naden tantiec. —Nuquin Papan chiaid niacniacboedombi Esus tantiasho Nuquin Papan nuqui bédamboen isbenec ambi chiaid niac-niacacmaidbimboecnuc —quequin nuqui tantiaptec. Adembidi chuiquin Nuquin Papan isadaidbo tsusedpa dada uamepampic. “Nuquin Papa ambi chiacpadomboen naquidquio nec,’ quequin abi tantiec tabadquid Nuquin Papan bédamboen isec,” quequin dada uamepampic.

Matses utsibo icsamboec tabadaid

¹⁸ —Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpeshun Nuquin Papan cuidte tantiatiapimbo iquec. ¹⁹ Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquio matses icpec. —Adquidshenda Nuquin Papa nepec —matses camenuen Nuquin Papan abitedi uapampic. ²⁰ Nidaid uaquinc cuète uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nëid uaquidien nadquio icchitec. Nibédantiapimbo icquidien nechitec. Abipadquid utsi nibèdnuc comapenen tantiaquin nabanquidquio yec abitedishun Icboen nechitec —quetiadquidi adenquio matses iquec. Adquid Nuquin Papan cuidendac.

²¹ Ambi uaid isash: —Nëid uaquid bédambo iquec. Aidëmbien ëbi nashunchitec —quetiadquidi pamumëdacbimboecquin Nuquin Papa tantiatiapimbo matses iquec. ²² —Dadpen bédamboen tantiembi —quequimbi tantienquio matsesën iquec. ²³ Aden unëstiapimbo icquid Nuquin Papambo tantiatiapimbo icquimbi unësquiduidquio tantiaquin aidbimboecnuc nacenashun papa quequin chianec. Utsibon matsesbimboecnuc nacenashun: —Ëbi bédamboen ista, papa —quequin ambi nacenaid chiec. Utsibombic aben icquid nidaidën capuquidbimboecnuc nacenashun adembidi chiec. Utsibombic uicchun podochuquidbimboecnuc nacenashun adembidi chiec. Utsibombic aben icquid tacbidën siuidquidbimboecnuc nacenashun adembidi ambi nacenaid chiec. Ënden adquio matses yampicpadomboembidi nëbi adomboembidi matsesën naic.

²⁴ Adsho isash Nuquin Papa: —Ma bédamboec tabadnu —quetuidboedi icsamboecuidi matses tabadsho isash: —Ma ambi tantiapadecqui icsamboec tabadpanu —quiampampic. Adnëdambic nëbi abi bunacpadec icsamboec tabadec utsin chido chudteuidi bunquiec dada. Adecbidi aton bënëpenquio chudmeteuidi bunquiec chido. ²⁵ —Abitedi uaquidquio Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bédamboshë iquec —quequin ënenquio icquin chuitiadquidi aidon padenquio icpec.

²⁶ Adsho isash: —Ma abi bunacpadec icsamboec tabadpanu —quiampampic Nuquin Papa. Adnëdambic nëbi icsabudquiec dada bunenquio yequi chido daëdi dachudnanec. ²⁷ Adecbidi chido bunenquio yequi dada daëdi chichudnante natia

bunquiopec. Aden ambi chiaid niac-niaquec icsamboec tabadsho Nuquin Papan cuidendac.

²⁸Adec abi tantiate bunenquio icsho isash: —Ma bēdamboec tabadnu — queuidboedi Nuquin Papa: —Ma abi icsate bunacpadequi tabadpanu — quiampampic. Adnēdambic nēbi pabiate shēcuē nibēdacbimboecquin Nuquin Papan chiaid niac-niaquec icsamboec tabadpec bēdambo ictiadquidobi. ²⁹Nadquido icsamboec tabadquido nec. Nēidic aton chidopenquio chudquido. Nēidic aton bēnēpenquio chudmequido. Nēidic icsamboshē icquido. Nēidic aton na dadpen bedteuidi bunquido. Nēidic chieshquido. Nēidic matses utsibobimboec icte bunec chieshēmēnquido. Nēidic cuesunianquido. Nēidic chieshēmēnquido. Nēidic muaquido. Nēidic icsa uate bunquido. Nēidic utsibo icsaiduidi chuiquido. ³⁰Nēidic ambenquiobi chuishunquin chieshēnquin muuaquido. Nēidic Nuquin Papa chieshēnquido. Nēidic mamēnshumēnquido. Nēidic utsibo nashunenquio icquin aton nauidi naquido. Nēidic: —Ēbiuidtsēqui bēdambo iquebi —quequido. Nēidic: —¿Icsaquin atotsimbi utsi nape? —quec icsate bunquido. Nēidic anibēdtan amēn chiaid niac-niacquido. ³¹Nēidic piushbimboecquin Nuquin Papan chiaid tantienquio icquido. Nēidic aton matses tantienquio icquido. Nēidic nēishash baded nēish bēdanenquio icquido. Nēidic utsibo bēdamboen istiapimbo icquido. Adquidtedi Nuquin Papan chiaid niac-niacquec icsamboec tabadquid nendac. ³²—Abi icsaid ėntiapimbo icquido Nuquin Papan cuidquin chian anēdenquiacno nēsecaindac — quequin tantiequi ėnēdenquio yec icsaded-icsadedqueic. Utsibotsen icsasho isash cuishonquec. —Bēdambo iquec. Ēbipadquidquido nec —quepec.

Matsesēn naid Nuquin Papan abimbo chuite

2 Aden icsamboec tabadaid ėmbi chuisho tantias: —Adquid icsamboshē iquec —¿quecta ique? —Aden naic aid icsaic —queboedi mibitsen adecbidi icsapec. —Icsaquidpenquio nebi —quec mibi muaic. ²Nuquin Papambien matsesēn naidtedi tantiaquid icquin: —Nēido icsambo iqueque. Icsano nidmenu —quequin abimbo chiendac. ³—Matses utsibo icsambo iquec —queboedombi mimbitsen Nuquin Papan chiaid niac-niacpec. Adash: —Nuquin Papan nuqui cuidenquio iquec —¿quecta ique? Mibitsen Nuquin Papan cuidendac. ⁴Ambi uaido matses abitedi icsambo icsho isash unēsquio icquin matses bēdamboen iste bunquin icsaidobi Nuquin Papan baded cuidenquio iquec. —“Icsaboedi nēbi Nuquin Papan chiacpadec bēdamboec tabadtiaquio iquebi,” quequin ma matsesēn ėbi tantianu —queshun Nuquin Papan matses baded cuidenquio iquec. Abi icsaid ėnenquio icsho isun cuidendac. ¿Adsho tantiashta mibi nadpe? —Mua. Nuquin Papan ėbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

⁵—Nuquin Papan chiaid niacboedēmbi ėnta —caqui: —Padi. Ēmbi naiduidi naic bēdambo iquebi —quequin ėnenquio icquin Nuquin Papan chiaid niac-niacbudec icsamboecuidi mibi tabadec. Aden mimbi Nuquin Papa cuidmendac. Nuquin Papan matsesēn naidtedi chuite ushēmbi mimbi icsamboen naidtedi chuishun Nuquin Papan mibi cuidendac. ⁶Matsesēn naidtedi tantiaquin matses cuidendac. Bēdambo icquido abēdi tabadmequin icsaido icsano nidmendac Nuquin Papan. ⁷Abi tantiec bēdambo icquido: —“Mibi bēdambo iquec,” mabi Nuquin Papan canu —quiash abēd tabadte bunec Nuquin Papan chiacpadec bēdamboec tabadec nec. Aido unēsacsho Nuquin Papan abēdi tabadmendac padpidec unēstiapimbo icnuc. ⁸Ic-

saquidoen Nuquin Papan chiaid chiaqui tantiate bunenquo icquin aton nauidi naic icsamboecuidi tabadsho Nuquin Papan comapenen cuidendac. ⁹ Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibotsen icsasho Nuquin Papan cuidendac. ¹⁰ Abi tantiec bēdamboec tabadquido unēsasho abi yacno tabadmeshun: —Nēid bēdamboec tabadquid niondash —quequin utsibo tantiamequin Nuquin Papan bēdambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmequimbi matses utsibotsen abi tantiaquid icsho Nuquin Papan abēdi tabadmendac. ¹¹ Icsamboec tabadquido ic sano nidmequin bēdamboec tabadquido abēdi tabadmendac. —Isadaidbouditsēqui bēdamboen isembi —quenquo icquin adoendac.

¹² Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantia shi aidēn chiaid niac-niaquec icsamboec tabadsho adembidi cuidendac. ¹³ Ambi: —Naden nata —quequin chiaid tantia shumbic adomboen naisa bēdamboen istiapimbo icquin ambi chiacpadec tabadquid Nuquin Papan bēdamboen istiasish. ¹⁴ ¿Ada Nuquin Papan chiaid tantiacmaidon matses utsibon bēdamboec tabadte tantienquo iccuededpec? Ma bēdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bēdamboen naic Nuquin Papan chiaid tantia shumbimboen. ¹⁵ Adec bēdamboec tabadec: —Bēdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. ¹⁶ —Adec matses abitedi bēdamboec tabadte tantiequi adquec tabadenquo iquec —qeshun Nuquin Papan chiacpadēn Esuquidistun matses cuidendac. Matsesēn otacquo tantiaidbēdta matsesēn ompoquin naidtedi ambembi tantia shun Esusēn matses cuidendac. Esus chuibanquin aden aidēn cuidte chiombi.

Isadaidbon Nuquin Papan chiaid niac-niacaid

¹⁷ Tanta, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidēn tsyuecquid icsho Nuquin Papan ēbi bēdamboen isec. Utsibon Nuquin Papa tantienquo icnubi Nuquin Papambo con matsesbēdtambi bēdamboen tantiembi. Bēdambo iquebi —mibi quepec. Adboedi mibi icsaic. ¹⁸ Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec utsibo bēdamboec tabadsho isash: —Aido bēdamboec tabadec —queboedi mibi bēdamboec tabadenquo icpec. ¹⁹ Adecbidi: —Nuquin Papan chiaid tantiacmaido Nuquin Papan chiaidquido chuibanquid nebi. Paposhquiacbimboecnuc tantiamequidquido nebi —mibi quepec. Adboedi aidēn chiaid niaquec mibi icsaic. ²⁰ —Chuisho tantia bi icquido nēbi tantiabentsēcquidobēdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquido chuibanquid nebi —mibi quepec. ²¹ Adec: —Nuquin Papan chiaid niac-niaquenda —queboedēmbi aidēn chiaid mimbi niac-niaquec. —Ampenda —queboedēmbi mimbítsen ampepec. ²² —Utsin chido chudenda —queboedēmbi utsin chido mimbítsen chudpec. Papa quequin matsesbimboecnuc matses utsibon nacenaid isash: —Nuquin Papa tantienquo yec nēid nacenquid icsambo iquec —queboedēmbi aidēn nacenaid tantiate shubun puduedshun mimbi ampepec. ²³ —

Nuquin Papan ambi chiaid con tsusedpa Moises dada uamepampid bedshun con matses isadaidbonuidtsëqui Nuquin Papa tantiec —queboedëmbi ambi chiaid niac-niaquec mibi icsamboec tabadec. ²⁴ Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsembien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bëdamboen tantienquo iquec.

Nuquin Papa tantiaquidquo icete chiaid

²⁵—Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuëbo shui dëbid dëteshun secaic. Adonëdaid ambi chiaid niac-niaquenquo yec bëdamboec tabadsho Nuquin Papan bëdamboen istsiash. Isadaidbo utsibon ambi chiaid niac-niacsho Nuquin Papan bëdamboen istiapimbo iquec ambi con matses cacmaidobimboecnuc. ²⁶ Nuquin Papan con matses cainquo icpampido matses utsiboen ambi chiacpadec bëdamboec tabadsho Nuquin Papan bëdamboen istsiash ambi: —Con matses nec —caidobimboecnuc. ²⁷ Adec matses utsibo Nuquin Papan chiacpadec bëdamboec tabadsho isash isadaidbo naded chiadpec. —Matses utsibo bëdamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. ²⁸ ¿Shui dëbid dëteshun secaquido isadaidbotedi Nuquin Papa tantiaquidomboda nedic? Padenquo. ¿Matses ismenuen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquo. ²⁹ ¿Ambi Moises dada uamepampiduidi ëmbimbo nanuequid Nuquin Papa tantiaquidquioda nedic? Padenquo. Nuquin Papa tantiaquidquien aton Mayanën tantiamiacpadec bëdamboec tabadec. Adquid: —Mibi bëdambo iquec. Con matses mibi canu —capec Nuquin Papan matsesën adoenuo icnubi.

Nuquin Papan isadaidbo tantiec, quequin chiaid

3 Aden: —Abi tantiec bëdamboec tabadquid Nuquin Papan con matses catsiash —quequin ëmbi chuisho tantiash: —¿Isadaidbo yecta icsambo icpec? —¿quecta ique? —Padenquo iquec —caimbi. —¿Ada aido ambi con matses caido Nuquin Papan nashunac? —¿quecta ique? ² Ai, aido nashunquiac. —Ëmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. ³ Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquo icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquo icpatsiash? ⁴ Padenquo. Ma ambi chiacpadomboen naquidquo Nuquin Papa neyoc. Muesambo nec. Matses abitedimbo muaquidquo icnuc Nuquin Papan abimbo chuiquidquo nendac. Aden chuiquin Nuquin Papan con tsusedpa dada uamepampic. “Nuquin Papa abimbo chuiquidquo nec. ‘Nëid bëdambo iquec. Nëid icsambo iquec, quequin Nuquin Papan abimbo chuibanendac, quequin ma matsesën tantianu,’ quequin Nuquin Papan: ‘Mibi icsaac,’ quequin ëbi chuiboed chiombi,” quequin dada uapampic.

⁵Ëbi adsho bédamboen tantiata. Icsamboen tantienda. —Nuquin Papan chiaid niac-niaquec ëbi icsasho isash: “Adquidpenquio Nuquin Papa nec. Icsaisambo nec,” quetsiash con matses. Adec icsaquimbi ëmbi con matses Nuquin Papa bédambo icte tantiameshobi Nuquin Papan ëbi cuidac icsambo ictsiash —quequin icsamboen tantienda. ⁶Matsesën naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bédambo iquec. Mibi cuidenquio iquembi —quetiapimbo Nuquin Papa iquec. Muesambo nec. ⁷Nadembidi icsamboen tantienda. —Ëbi muaquidquio icnubi: “Adquidpenquio Nuquin Papa nec. Bédamboshë iquec. Muesambo nec,” quetsiash con matses. Adec muaquimbi Nuquin Papa muainquio icte con matses tantiametsiambi. Aden ëmbi abi tantiameshobi Nuquin Papan ëbi cuidac icsambo ictsiash —quequin icsamboen tantienda. ⁸Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquio. —Pabado chedo: “Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Ëbi muauaquido Nuquin Papan cuidchitoshon.

Matses abitedi icsaquido nec, quiaid

⁹Tantia, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquio. Nuquin Papan chiaid niaquesamboen nibëdec. Matses utsibo con matses isadaidbobëd abembi bédamboec tabadtiapimbo iquec. Abitedimbo icsamboec tabadquido nec. Aden mibi chiombi. ¹⁰Aden chuiquin Nuquin Papan dada uamepampic naden.

“Nuquin Papan chiaid niaquesambo nibëdec.
Abitedimbo icsaquido nec.

¹¹Nuquin Papa tantiaquin ambi chiacpadomboenuidi naquidquio nibëdec.
Nuquin Papa tantiate bunquidquio nibëdec.

¹²Bënudshun podqued tantienquio yacimboen Nuquin Papa tantienquio icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.
Ambi chiaid niaquesambo nibëdec.

Abitedimbo icsapec.

¹³Nadquio iquec. Nëid icsamboec chuishumënuquido. Unësaid ënden chococacno shëdec: ‘Pisenac,’ quequin tantiacimboen adquido onquesho tantias: ‘Icsambo icquido nec,’ quequin matsesën tantiec.

Nëidic muaquido.

Nëidic nisin pequin icsa uacimboen icsa uate bunec icsamboec onquequido.

¹⁴Nëidic nëishash chieshëmëdec: ‘Unëschitoshon,’ quequin icsamboenuidi chuiquido.

¹⁵Nëidic intac mëyamec badedquio cuesunianquido.

¹⁶Nëidic abëd icquido natiamec chieshëmënuquido.

¹⁷Adquidtedi cuesnante bunec bédamboec tabadtiapimbo iquec.

¹⁸‘Nuquin Papan cuidnushe,’ quenquio icquid Nuquin Papa tantiesabo nec,” quequin dada uamepampic.

¹⁹Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuec con tsusedpa dada uamepampic. Aden dada uami-

ampid tantiashun: —Icsaquidpenquio nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedibëdtabi isadaidbotsen chiac: —Abimbo chiec —quiash dacuëdec ëcbedanen-
 quio tabadendac matses abitedi. ²⁰ Aden ambi chiaid niaquesambo nibëdnuc: —
 Ambi chiaid niaquesa icsho Nuquin Papan nuqui bëdamboen isec —quequin nuqui
 abimbo chuitiapimbo iquec. Nuquin Papan chiaid isash: —Ambi chiaid niac-niaquec
 icsamboequien nuqui tabadchitec —quequin nuqui tantiapec.

Nuquin Papa matses bëdamboen ismete chiaid

²¹ Aden ambi chiatedi natiapimbo yec matses icsasho isun Nuquin Papan abi matses bëdamboen ismete chuiquin isadaidbo tsusedpa Moisesbëdta tsusedpabo utsibo dada uamepampic ëndenquimbo. Aden ambi dada uamepampicpadomboen nëbi Nuquin Papan abi matses bëdamboen ismequid matsesmpac caondash. ²² Adoac Nuquin Papa abi tantiaquido bëdamboen ismenuc Esuquidistu abided cuidadec unëspac caondash. Nëbi aidquio tantiasho Nuquin Papan matses bëdamboen isec. Isadaidbobëdtambi matses utsibotsen Esus tantiasho adoendac. ²³ Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo nibëdec. ²⁴ Adquid bëdamboen istiapimbo icquin matses bëdamboen iste bunquin aton Mado Esuquidistu abided unës uamequin Nuquin Papan cuidpac caondash. Nëbi abided cuidadaid Esus tantiasho nuqui bëdamboen isec icsaisabimboecnuc. ²⁵ —Icsaido cuidquid icquimbi nuqui cuidenquo icnuen Nuquin Papan nac —nuqui camenuen Nuquin Papan nuqui icsaid bedshumequin Esusded unës uamequin cuidpac caondash. Esus tishabi icnuc Nuquin Papan abi tantiaquido cuidenquo icpampic: —Yuecshun con Madoded cuidendambi —quequin tantiaquin. ²⁶ Nëbi adecbidi: —Icsaido cuidquid nebi —quequimbi Nuquin Papan ambi chiacpadec nuqui icsaid bedshunec abided cuidadaid Esus tantiasho adembidi nuqui bëdamboen isquin cuidenquo iquendac.

²⁷ Ëmbi aden chuisho tantiash: —Ambi chiacpadomboenuidi nasho Nuquin Papan bëdamboen isebe —quequin mimbi abimbo chuitiapimbo iquec. Matsesën Nuquin Papan chiacpadomboenuidi natiapimbo icsho bëdamboen istiapimbo icboedi nëbi Esus tantiasho Nuquin Papan nuqui bëdamboen isec. ²⁸ Aden matsesën ambembi naquin Nuquin Papa bëdamboen ismetiapimbo iquec. Padnuen utsin: —Matsesash ëbi icsaid bedshunec abided cuidadaid tantiasho Nuquin Papan ëbi bëdamboen isec —quequin Esus tantiasho Nuquin Papan bëdamboen isec. ²⁹ ¿Isadaidbouidida Nuquin Papan bëdamboen ispatsiash? Padenquo. Matses utsibo isadaidpembobi Nuquin Papan bëdamboen istsiash. ³⁰ Matses abitedi uaquid icquin ambi chiacpadomboen isadaidbon Esus tantiasho Nuquin Papan bëdamboen isec. Adembidi matses utsibon Esus tantiasho Nuquin Papan bëdamboen isec. ³¹ Adoaido: —Nuquin Papan chiaid niac-niaquec icsamboec tabadnuna —¿quecta icpec? Padenquo. Esus tantiaquido icquin Nuquin Papan chiacpadomboen natiadquido nuqui yanec.

Nuquin Papan Abadauan bëdamboen isaid

4 Tantia. Aden Nuquin Papan bëdamboen iste chuiquin isadaidbo tsusedpa Abadauan caid ënden icpampidtsen mibi chuinu. ¿Atotsieshun Nuquin Papan Abadauan bëdamboen isbempampic? ² Bëdamboecuidi tabadsho Nuquin Papan bëdamboen isaid yec Abadauan: —Bëdamboecuidi tabadquin Nuquin Papa bë-

damboen ismembi —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembi —quenquo icpampic Nuquin Papa. ³ Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen isbempampic icsaisabimboecnuc,” quequin chuipampic. ⁴ Matsesien adenquo iquec. —Ambi chiacpadomboen nasho icbon yua bēdamboen isquid —nuqui quepec. ⁵ Nuquin Papambien nadotsiash. Matses icsaboedi: —Bēdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bēdamboen isbentsiash icsaisabimboecnuc. ⁶ Adembi Nuquin Papan tantiamiac ambi bēdamboen iste chuiquin con tsusedpa Dabidēn dada uapampic naden. ⁷ “Ambi chiaid niac-niacboedēmbi: Bēdambo icquid icquin Nuquin Papan ambi chi-

acpadomboen naindac,

quequin abi tantiasho Nuquin Papan ēbi bēdamboen isec ēbi icsaid bēpiscudacimboen.

Icsaisabimboecnuc ēbi bēdamboen isquin ēbi cuidenquo iquendac,’ quiash matses bēdambo yec cuishonquec.

⁸ ‘Abi tantiaquid icsho isash ēbi icsaid bēpiscudash:

Ēmbi chiaid mimbi niac-niaccoque. Mibi cuidnu, Nuquin Papan ēbi cainquo iquendac,’ quiash matses bēdambo iquec,”

quequin Dabidēn chuipampic ēndenquimbo.

⁹ ¿Shui dēbid dēteshun secaido isadaidboudida Nuquin Papan bēdamboen ispec? Padenquo. Matses utsibotsen bēdamboen istsiash. Tantia. Ēmbi chuiboebidi chuioanu. Abi tantiaquid icsho Nuquin Papan Abadauan bēdamboen isbempampic ambi chiaid niac-niacacmaidbimboecnuc. ¹⁰ ¿Ambi chiacpadomboen shui dēbid dēteshun secacshoda Nuquin Papan Abadauan bēdamboen isbempampic?

Padenquo. Shui dēbid dēteshun secabi icsho Nuquin Papan Abadauan bēdamboen isbempampic. ¹¹ Bēdamboen isbenshumbic: —Abadauan, ēmbi chiacpadomboen nabenta. “Nuquin Papan bēdamboen isaido nebi. Aid bēshunchitomane,” qeshun min matsestedi shui dēbid dēteshun secabanta —capampic Nuquin Papan. Adoac Abadauanēn nabempampic. Aden shui dēbid dētiacmaid icquin Abadauanēn Nuquin Papa tantiacpadomboen nēbi shui dēbid dētiacmaidon Esus tantiasho Nuquin Papa bēdamboen isendac ambi chiaid niac-niacacmaidbimboecnuc. ¹² Abadauanēn tsyuecquido isadaidbo Abadauambimboecquido Nuquin Papa tantiaquido abi iquec.

—Shui dēbid dētemenēdaid icsho Nuquin Papan bēdamboen isebe —quenquo icquin Nuquin Papabēdta Esus tantiasho isadaidbo Nuquin Papan bēdamboen isaido abi iquec.

Nuquin Papan Abadauan chiaid

¹³ Ēndenquimboshē Nuquin Papan Abadauan naden chuipampic. —Abadauan, mibi nibēdanan yuecshun min tsyuecquid abentsēcshun utsibo bēdambo icmendac. Nidaid utsi-utsiec yacno tabadquido adoendac —quepampic Nuquin Papa. —Min tsyuecquid abentsēqui tantiasho matses bēdamboen isendambi —quequin otacquo tantiaquin Nuquin Papan adopampic. ¿Ambi chiacpadomboenuidi Abadauanēn nashoda Nuquin Papan aden chuipampic? Padenquo. Nuquin Papan chiac: —Ai, abimbo caic —qeshoen Abadauan bēdamboen isbenshun Nuquin Papan

adopampic. ¹⁴ ¿Nēbi: —Moisesēn chiaid niaquesa icsho Nuquin Papan bēdamboen isebe —quec muaquidoda Nuquin Papan bēdamboen ispadic? Padenquio. Adec muaquidobi bēdamboen isquin ambi Abadauan chiaid niactsiash. Adotiapimbo icquin ambi chiacpadomboen Abadauanēn tsyuecquid tantiaquidoen bēdamboen isec. ¹⁵ —Moisesēn chiaid niaquesambo nebi —queboedombi aidēn chiaid niac-niacsho isun Nuquin Papan cuidendac. Ambi chiaid niaquesambo nibēdec. Nuquin Papan: —Bēdamboec tabadta —quequin chiaid nibēdnuc ambi aden chiaid matsesēn niactiapimbo ictsiash. Ambi: —Bēdamboec tabadta —quequin chiaid abi iquec. Aid niaquesambo nibēdec.

¹⁶ Nuquin Papan naden Abadauan chuipampic. —Abadauan, ěmbi chuisho tantiaish: “Mimbi abimbo caic,” quesho mibi bēdamboen isquin min tsyuecquido bēdambo icmendambi —quequin chuipampic. Nēbi ambi chuipampicpadomboen naquin Esus tantiaquido Nuquin Papan bēdamboen isec. Nuquin Papan ambi chiaid dada uamepampidēn Moisesēn tsyuecquido isadaidbon Esus tantiaisho Nuquin Papan bēdamboen isec. Abadauanēn Nuquin Papa tantiacpadomboen matses ut-sibontsen Esus tantiaisho adembidi bēdamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec.

¹⁷ Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unēsān yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoquien: —Abimbo mimbi caic —quequin Nuquin Papa Abadauanēn tantiapampic. —Comapenen tantiaquin unēsaid uincuemequidquico icquin ambi chiacpadomboen ěbi bacuē tishmendac —quequin Abadauanēn Nuquin Papa tantiapampic. Nēbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

¹⁸ Nuquin Papan: —Min tsyuecquido dadpenquio iquendac —cac: —¿Mitsipadoac aidtedi con tsyuecquido icpec? Ma con bacuēbo nibēdpayoc. Tsusiombo icquin bacuē tishmetiapimbo iquebi —queuidboedi Abadauan nadpampic. —Ai, abimbo mimbi caic —quepampic aton mado nibēdnubi. Adshun tsusioctšēcquico icquimbi aton mado tishmepampic. Nēbi aton tsyuecquido dadpenquio iquec Nuquin Papan chiampicpadequi. ¹⁹ —Con seta dadpenquio 100tedi icnuc tsusiobudtsēcshun ěmbimbo bacuē tishmetiapimbo iquebi. Con chido ěndenquio machobudtsēccondaid icquin bacuē usundotiapictšēcquico iquec —quequin tantiequi: —Nuquin Papan abimboen caosh —quepampic. ^{20–21} —Nuquin Papa mue nec —quenquio yec: —Nadatiambo icquid icquin ambi chiacpadomboen Nuquin Papan naic —queshun Nuquin Papa tantiatšēcboedēmbi aid tantiaquiopampic. Adshun: —Mibi bēdambošē iquec, Papa —quequin Nuquin Papa chuipampic. ²² Adsho tantiaishun Nuquin Papan bēdamboen isbempampic icsaisabimboecnuc.

²³ Aden Nuquin Papan ambi Abadauan bēdamboen isaid isadaidbo tsusedpa dada uamepampic. ¿Abadauanēn naiduidi tantiamenuenda aden dada uamepampic? ²⁴ Padenquio. Nuquitsen Nuquin Papan ambi bēdamboen iste tantiamenuen aden dada uamepampic. Nuquin Icho Esusbēdta abi uincuemequid Nuquin Papa tantiaisho nuquitsen bēdamboen isec. ²⁵ Nuquin Papan tantiacpadec nuqui cuidmenquio icnuec nuqui icsaid bedshunec abided ciudadec Esus unēsānēdash. Aden Nuquin Papa abi tantiaquido bēdamboen ismenuec unēsash uincuepanēdash Esus.

Esus tantiaquido Nuquin Papan bēdamboen isaid

5 Aden Esus tantiaquo Nuquin Papan bēdamboen isaido yec abi cuidte dacuēdenquo yec abēdi nuqui bēdamboec tantiananec. ² Ĕmbi chuibocpaden abi tantiaquido nuqui cuidmenquo icnuec abided unēsquin Esusēn Nuquin Papan nuqui bēdamboen ismepec. Adoac nuqui nadpec. —Nuqui bēdamboen isquin unēsacsho nuqui abipadquid icsaisa icmequin Nuquin Papan abēdi nuqui tabadmendac —quec nuqui cuishonquec. ³ Nadectsen nuqui cuishonquec. —Esus tantiaquid icsho utsibon chieshēnaqui Esus tantiatšēboedi chieshtoenquo icquin Esus tantiaquidquo yanebi —quectsen nuqui cuishonquec. ⁴ Aden chieshtoenquo icquin Esus tantiaquo Nuquin Papan nuqui bēdambo capec. Adoac: —Esus tantiaquid icsho Nuquin Papan ēbi bēdambo icmec. Unēsacsho abi yacno ēbi tabadmendac ambi chiacpadomboen —quepec nuqui. ⁵ Adec: —Abi yacno ēbi tabadmendac —quequin Esus tantiaquid ¿ada Nuquin Papan cacumepec? Padenquo. Aton Mayan nuquibēd icmiac paposhquiacimboen nuqui naden tantiec. —Nuquin Papan ēbi bēdamboen tantiaquin abi yacno ēbi puduedmendac —quequin nuqui tantiec.

⁶ Aden matses tantiaquiec Nuquin Papan tantiacpadec Esus nadpanēdash. Matses abitedi abembi bēdamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquo icnuec abided ciudadec Esus unēsapanēdash. ⁷ ¿Ada adquid matses icpadic? Padenquo. ¿Cuesanquidēn matses bēdambo icquid caic: —Cuesnu —quesho tantiaquid dadpeshun: —Aid cuesenda. Ĕbiquien cuesta —capatsiash? Padenquo. Bēdamboshē icquid cuesmenquo icnuen: —Nēid cuesenda. Ĕbiquien cuesta —cachitembien ictsiash abentsēcshun. Icsambo icquid icshoen aden chienquo ictsiash. ⁸ Padnuen matses abitedi icsamboecuidi tabadnuc nuqui cuidmenquo icnuec Esuquidistu abided ciudadec unēsapanēdash. —Nuquin Papan ēbi tantiaquiec —matses camenuen Nuquin Papan aden Esus namepanēdash.

⁹ Nēbi abided cuidadaidquo Esus tantiaquo Nuquin Papan nuqui bēdamboen isec icsaisabimboecnuc. Aden bēdamboen isquin Nuquin Papan nuqui cuidtiapimbo iquendac. ¹⁰ Matsesēn abi chieshēnsho isun aido cuidte bunenquo icquin Nuquin Papan aton Madoded cuidpanēdash. Aden aton Madoded cuidash nēish bēdandshun Nuquin Papan aton Mado tantiaquid bēdamboen isec. Nēbi Nuquin Papan uincumenēdaid icquin Esusēn nuqui bēdamboen tabadmec. ¹¹ Adembidi aidēn tantiamiacpadomboen nuqui: —Ĕbi cuidenquo icnuen aton Madoded cuidquid bēdamboshē iquec —quequin Nuquin Papa tantiec nuqui cuishonquec.

Adanēn naidbēdta Esusēn naid chiaid

¹² Nuqui bēdamboen ismequid Esus tishabi icnuc abia matses uaidēn Adanēmba Nuquin Papan chiaid niac-niaquec icsasho cuidquin aidba Nuquin Papan unēsquid icmepampic. Adembidi Adanēn tsyuecquido matses abitedi Adan icsacpadecebidi ic-sate tantiaquimbi Nuquin Papan unēsquidoidquo matses icmepampic. ¹³ Nuquin Papan: —Adec icsainda —quequin ambi chiaid Moises dada uamiabi icnubi matses abitedi icsapampic. —Ĕmbi Moises chuimiaid mimbi niac-niaquec —Nuquin Papa quetiapimbo icnubi matses icsapampic. ¹⁴ Nuquin Papan chuiboedquiobi ni-quec Adamba icsasho Nuquin Papan cuidac unēssec taēpampic. Adan unēsambic aidēn nacpadomboen nabi icsa utsi naiqui matses abitedi icsasho adembidi unēsquidoidquo Nuquin Papan icmepampic. —Naden nata —quequin Moises dada

uamequin Nuquin Papan chiabi icnubi aidën chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquo Esuquidistu nec.

¹⁵ Matses abentsëcshun Adanëmba Nuquin Papan chiaid niacscho cuidquin aidba unësquid icmeshun aton tsyuecquido matses unësquidoidquio Nuquin Papan icmepampic. Adecbidi Nuquin Papa matses bëdamboen ismequid abentsëc iquec. Esusuidtsëqui abi tantiaquidotedi cuidmenquo icnuec abided cuidadec unëspac caondash. Nëbi aid tantiasho Nuquin Papan nuqui bëdamboen isec. ¹⁶ Adanën nacbimboen Nuquin Papa matses bëdamboen ismequidën nambo. Adan abentsëqui icsaquin Nuquin Papa cuidmiac abi unësapadquieci matses abitedi unësquidombo yanac. Nuquin Papa bëdamboen ismequidëmbien matses icsaid bedshunec abided cuidadquin Nuquin Papa abi tantiaquidotedi bëdamboen ismec icsaisabimboecnuc. ¹⁷ Ambi chuiboedi niacquin Adanën Nuquin Papa cuidmiash unësquid yanacpadece matses unësquidoidquio iquec. Esuquidistunuidtsëqui nac Nuquin Papan matses bëdamboen isendac. Nëbi aid tantiasho Nuquin Papan nuqui bëdamboen isquin bëdamboec tabadquid icmendac. Adec bëdamboec tabadec unësash Esusbëdtan Nuquin Papan namiacno bëdamboshë yacnombo nuqui tabadendac.

¹⁸ Adec matses abentsëqui icsasho aidbëdta aton tsyuecquido matses abitedimbo cuidquin Nuquin Papan unësquidoidquio icmepampic. Padnuen Nuquin Papan chiacpadece abentsëqui abided cuidadaidën Nuquin Papa abi tantiaquido bëdamboen ismequin Nuquin Papa yacno tabadmendac. ¹⁹ Nuquin Papan chiaid niac-niaquec Adan icsaic taëambic aton tsyuecquido abitedimbo icsaquidoidquio yanac. Padnuen Nuquin Papan chiaid niaquesambo icquin Esusën Nuquin Papa nuqui bëdamboen ismec. ²⁰ ¿Matses bëdamboen isnuenda Nuquin Papan ambi: —Bëdamboec tabadta —quequin chiaid Moises dada uamepampic? Padenquo. Matses abi icsaid tantiamenuen ambi chiaid Moises dada uamepampic. Aden chiaid chuisho tantiash: —Icsaobi —quequin tantiaquin abided cuidadaid tantiasho Nuquin Papan matses bëdamboen isec. ²¹ Taëec matses icsasho cuidac unësquidoidquio yanac. Adsho isun matses bëdamboen isnuen Nuquin Papan ambi chiaid niaquesambo Esusded cuidac. Nëbi Nuquin Icbo Esuquidistu tantiasho Nuquin Papan nuqui bëdamboen isec icsaisabimboecnuc. Nuqui unëscascho abëdi tabadmendac padpidece unëstiapimbo icnuc.

Esus tantiaquid bëdamboec tabadquid, quiaid

6 Nuquin Papan bëdamboen iste ëmbi chuisho tantiashun naden tantienda. — Icsaido cuidmenquo icnuec abided Esus cuidadec unëspanëdash. Aid tantiasho Nuquin Papan bëdamboen isquin nuqui cuidtiapimbo iqueque. Aden bëdamboen isaqui icsaquionona —quequin tantienda. ² Esus tantiaquido adesambo nec. Esus tantiec icsateuidi nuqui bunenquo yanec. ³ ¿Tantienquioda ique? Naden chuiquin mimbi acten mentomiac. —Ëbi cuidmenquo icnuec abided cuidadec unësaid Esus tantiaquid nebique. Ambi chiacpadece tabadtiadquio iquebique. Utsibo ismenu —quequin mimbi acten mentomiac. Adec Esus unësaid tantiequi icsaboedobi icsate bunenquo nuqui yanec. ⁴ Aden Esus abided cuidadec unësaid tantiasho Nuquin Papan utsiacbimboecnuc nuqui icmec. Esus unëscascho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan ut-

siac bimboec nuc nuqui icmec. Adoac icsateuidi bumboedobi adte bunenquo yanec Nuquin Papan chiacpadequi nuqui bēdamboec tabadcueneec.

⁵ Adec abided cuidadec unēsaid tantiec icsate bunenquo yanquid yec Esus uincuemiabimboen comapenen tantiaquin Nuquin Papan utsiac bimboec nuc icmiaidtsen nuqui nec. ⁶⁻⁷ Esus tantiabi yec icsaquido icboedi matses icsaid bedshunec Esus unēsaid tantiec nuqui icsate bunenquo yanec. Mētaniaid abibi mēnchiquidtiapimbo yac bimboec matses abemi icsaic ēnēdtiapimbo iquec. Adboedi Esus tantiec nuqui icsate bunenquo yanec.

⁸ Adec Esus unēsaid tantiec icsainquo yanec nuqui nadpec. —Nuquin Papan uincuemiaidēn Esusēn nuqui bēdamboen tabadmec. Unēsacsho Nuquin Papa yacno abēdi nuqui tabadmendac —nuqui quepec. ⁹ Nuquin Papan uincuemiabimboen Esus padpidec unēstiapimbo iquendac. Aton dada unēsquid icboedi unēstiapimbo icquid yanac. ¹⁰ Matses icsaido cuidmenquo icnuec abided abentsequi cuidadec Esus unēsac caondash padpidec unēsenquo yec. Adsho uincuemiabimboen Nuquin Papan chiacpadomboen nabanec aidbēd tēshnanenquo yec tabadec.

¹¹ Ēbi adsho tantiash nadta. —Ēbi cuidmenquo icnuec abided cuidadec unēsacsho uincuemiaid Esus ēbēdi iquec. Aid tantiec icsainquo yanebi. Ambi nacpadecc tabadtiadquido iquebi —queta. ¹² Icsamboec tabadenquo icnuna. Nuqui icsate bunaid nainquo icnuna. ¹³ —Icsaquionona —quesho tantiash: —Padi —quenuna. Unēsac bimboen Nuquin Papa tantienquo ictenedēmbi uincuenciabimboen Nuquin Papa nuqui tantiabenondaque. Ambi chiacpadecc bēdamboequien tabadtiad. ¹⁴ —Nuquin Papan ambi: “Bēdamboec tabadta,” quequin chiaid Moises dada uamiactedi naquin ēmbimbo Nuquin Papa bēdamboen ismembi —quenquo icquin Esus tantiasho Nuquin Papan nuqui bēdamboen isec. Ambi bēdamboen isaideo yec nuqui icsate bunenquo nuqui yaneque. Bēdamboec tabadnuna.

¿Tsuntsin yuabo Esus tantiaquido icpec? quequin chiaid

¹⁵ —Aden Nuquin Papan nuqui bēdamboen isec —quequin ēmbi chuisho tantiashun naden icsamboen tantienda. —Nēbi abided cuidadaid Esus tantiasho ēbi bēdamboen isec. Ēbi cuidtiapimbo iqueque. Ambi chiaid niac-niaquec ic-sabudquionona —quequin tantienda. Esus tantiaquid adesambo nec. ¹⁶ ¿Tantienuquioda ique? Icbon chiacpadomboen yuan naquid. Icsamequidēn tantiacpadomboen icsamboen naquid aton yua nendac. Aidēn yua icquin icsaid ēntiapimbo yec unēsash icsano nidendac. Nuquin Papan yuain ambi chiacpadecc bēdamboec tabadcuenecc. ¹⁷ Mibi adec tabadsho isun: —Esus chuibanac icsaid ēntiapimbo icboedi Esus tantiabenash Doma yacnocquido bēdamboec tabadcuenecc. Aden namec mibi bēdambo iquec, Papa —quequin Nuquin Papa chiombi. ¹⁸ Satanasēn yua icquin mim-bimbo mibi icsaid ēntiapimbo icsho Nuquin Papan nac ambi chiacpadquiecc mibi bēdamboec tabadcuenecc.

¹⁹ —Matses icquin: “Nuquin Papan chiaid tantiadenuquo iquec,” canushe —quequin bēdamboen tantiamenuen mimbi tantiaid yuan naid mibi chiombi. Satanasēn yua yec icsateuidi bunquiecc mibi icsaded-icsadedondac. Adec icsamboshē iccondaidi nēbi Nuquin Papan chiacpadequien bēdamboec tabadtiad. ²⁰ Satanasēn yua yec icsaquiecc Nuquin Papan chiacpadecc bēdamboec tabadtiapimbo mibi iccondac. ²¹ ¿Ada bēdamboec tabadonda? Ma mibi chieshēmēnquiecc tabadteneyoc. —Ēbi chieshēmēnquiecc tabadondaidd tantiashun: “Mibi icsambo iquec,” ēbi canushe

—qeshun mimbi naondaid ma mimbi chienquo iccondac. Icsaid ënabi yec unësash icsano mibi nidtsenac. Adecbidi icsaid ënenquo icquido unësash icsano nidendac. ²²Nëbi nuqui Esus tantiasho Nuquin Papan aton yuabo nuqui icmiac. Adoac icsaid ëntiapimbo icboedi nëbi nuqui bëdamboec tabadcuene. Adquid unësacsho Nuquin Papan abëdi tabadmendac. ²³Icsaido cuidquin Nuquin Papan icsano nidmendac. Abided cuidadec unësaid Esuquidistu Nuquin Ico tantiasho Nuquin Papan nuqui bëdamboen isquin unësacsho abëdi tabadmendac.

Bëdamboec tabadte chiuinen chido bënëchoquid Pabadon chiaid

7 Con utsibobimboecquido mibi neque. Tanta. Padpiden mibi chuinu. Naden chiaid mimbi tantianëdac. —Nuquin Papan dada uamiac Moisesën chiampicpadomboen matsesën naquid. Unësun aidën chiaid natiapimbo iquec —quequin mimbi tantianëdac. ²Nuquin Papan chiacpadomboen inaidën aton bënë nianesa. Dada utsi chudmesa chidon. Bënë unësambien niantè dada utsin bedadquid. ³Bënë unësabi icnubi aton bënë nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash. Bënë unësambien dada utsin bedadquid chido. Aden bedacsho Nuquin Papan: —Mibi cuidnu —cainquo ictsias.

⁴Adecbidi ambi chiaid niac-niacsho Nuquin Papan cuidtsenaido nuqui iccondac. Adondaidd abided cuidadec unësaid Esus tantiasho Nuquin Papan: —Mibi cuidnu —nuqui cainquo iquendac. Aden Nuquin Papan uincuemënëdaiddën Esusën aton yua nuqui icmequin bëdamboec tabadquid icmenuen nuqui icsaid bedshumpanëdash.

⁵Esus tantiabi yec nuqui bunacpadecuidi nuqui icsapadenec. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenec. Adquid yec unësacsho icsano nidmequin Nuquin Papan nuqui cuidtsenëdash.

⁶Esus tantiabi yec nuqui nadondac. —Moisesën chiacpadec bëdamboec tabadsho Nuquin Papan nuqui bëdamboen istsiash. Ambi chiaid niac-niacsho nuqui cuidendac —quiondaidd nëbi Esus tantiec nuqui adenquo iquec. Nëbi Nuquin Papan Mayanën tantiamiacpadec nuqui bëdamboec tabadec.

Icsaquid nebi, quequin Pabadon chiaid

⁷—Nuquin Papan ambi chiaid Moises dada uamepampid icsambo iquec —¿quectabi ique? Icsapenquo iquec. Nuquin Papan ambi chiaid Moises dada uami-aid isun: —Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibëdec,’ quec chieshëmënenda,” quequin Nuquin Papan Moises dada uami-aid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiemi ictsenchitondac. ⁸Utsin na isash: —Adquid con na nibëdec —quiash chieshëmëntsëcboedi Nuquin Papan: —Adenda —quequin chiaid tantiashi icsaquid yec utsin na comapenec bunquiech chieshëmënquiondabi. Nuquin Papan chiaid nibëdnuc: —Adec icsachitobi —quequin tantienquo ictsenondambi. ⁹Nuquin Papan chiaid tantiabi yec Nuquin Papan cuidte dacuëdënenquo yec: —Bëdambo iquebi —nuqui quedene. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. ¹⁰Adquid Nuquin Papan cuidendac —nuqui quianondac. —Ma bëdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bëdamboec tabadenquo iccobi. Icsachitobi. Adquid Nuquin

Papan cuidendac —nuqui quianondac. ¹¹—Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan ic-sano nidmequin cuidendac —nuqui quianondac. ¹²Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

¹³¿Nuquin Papan chiaid isbanashta matses Nuquin Papan cuidtequido yanactic? Padenquo. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —queshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Ēbien cuidchitec —nuqui quianondac. ¹⁴Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidtiapimbo yacimboen icsaquido icquin Nuquin Papan chiacpadomboen natiapimbo nuqui iquec. ¹⁵—Nuquin Papan chiacpadomboen nanu —queboedombi natiapimbo nuqui iquec. Adecbidi: —Utsibo icsacpadec icsainquo iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. ¹⁶—Nuquin Papan chiaid bēdamboen icchitec. Aidēn chiaid niacte bunenquo iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi. ¹⁷Bēdamboecuidi tabadtiadquidini icsaquid yec ēbemi icsadenechitec. ¹⁸—Bēdamboec tabadnu —queboedi icsaquid yec ēbemi bēdamboec tabadtiapimbo iquebi. Icsaquidini nec. ¹⁹—Bēdambo icte bunebi —queboedi ēbemi bēdamboec tabadtiapimbo iquebi. —Icsate bunenquo iquebi —queboedi ēbenquiobi icsaded-icsadedebi. ²⁰Icsate bunenquo icboedi icsaquid yec ēbemi bēdamboec tabadtiapimbo iquebi.

²¹—Adquid nebi. Nuquin Papan chiacpadec bēdamboec tabadtiadquidi badedquo icsaded-icsadedebi —quequin tantiemi. ²²—Nuquin Papan chiaid bēdambo iqueque. Ambi chiacpadec ēbemi bēdamboec tabadnu —queboedi ²³icsaquid yec ēbemi bēdamboec tabadtiapimbo iquebi. Mētaniaid abemi mēnchiquidtiapimbo yacimboen ėmbi naid ėntiapimbo iquebi. —Nuquin Papan chiacpadec bēdamboec tabadnu —queboedi bēdamboec tabadtiapimboeni icchitec. ²⁴⁻²⁵Adquid yec shubitiadquido icchitebi. Icsaquid yec: —¿Mitsipadequini bēdamboec tabadpeba? —queboedi: —Abi tantiasho Esuquidistumbini bēdamboen tabadmec —quianondabi. Adshun Nuquin Papa naden chiemi. —Ēbi bēdamboen tabadmequid Esus mimbi ēbi tantiamiac. Mibi bēdambo iquec, Papa —quequin Nuquin Papa chiemi.

Nuquin Papan Mayanēn namiaid

8 Aden matses bēdamboen tabadmequid Esuquidistu tantiasho: —Mibi icsambo iqueque. Cuidnu —cainquo iquendac Nuquin Papan. ²Icsaquido yec bēdamboec tabadtiapimbo icsho Nuquin Papan cuidtequido icboedēmbi Esus tantiasho Nuquin Papan aton Mayan meniac aidēn tantiamiacpadec nuqui bēdamboec tabadanendac. ³—Moisesēn chiacpadec bēdamboec tabadec unēsash Nuquin Papa yacno tabadebi —queboedi icsaquido yec abemi bēdamboec tabadtiapimbo matses iquec. Adsho isun matses bēdamboen iste bunquin Nuquin Papan aton Madombo

Esus matsesmiac. Adoac Nuquin Papan tantiacpadec matses icsaid bedshunec abided cuidadec unëspanëdash. ⁴—Abided cuidadaid con Mado Esus tantiasho bëdamboen isquin con Mayan matses menendambi. Adoac aidën tantiamiac ëmbi Moises chuimi-ampicpadec bëdamboec tabadendac. Matses abi icsate bunacpadec icsainquo yec bëdamboec tabadendac —qeshun Nuquin Papan Esusded cuidpac caondash.

⁵Adec Nuquin Papan Mayanën tantiamiaid Esus tantiaquid Nuquin Papan tantiacpadec bëdamboec tabadte bunec. Padnuen icsaquid: —Ëbi bunaid nanu —quequin ambibi tantiacpadec icsaic. ⁶Aden abi bunaidquo naic icsamboec tabadquid Nuquin Papan cuidendac. Padnuen Nuquin Papan Mayanën tantiamiacpadec tabadquid Nuquin Papan cuidte dacuëdënenquo yec bëdambo yec unësash Nuquin Papa yacno tabadendac. ⁷—Icsate bunquidën ëbi chieshë nec. Ambi naiduidtsëqui naquin ëmbi chiacpadomboen natiapimbo iquec —qeshun Nuquin Papan cuidendac. ⁸Adquido chuiquin: —Mibi bëdambo iquec —catiapimbo Nuquin Papa iquec.

⁹Esus tantiaquidien adesa nec. Esus tantiasho Nuquin Papan aton Mayan nuqui meniac aidën tantiamiacpadec nuqui bëdamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusën Mayambidi nec. ¹⁰Abided cuidadaid Esus tantiasho bëdamboen isquin Nuquin Papan aton Mayan meniaid yec abëd tabadtequido nuqui nec. Icsaquido yec matses abitedi unësquidombo icnubi Esus tantiaquid unësacsho Nuquin Papan abëdi tabadmendac. ¹¹Esus uincuemequidën Nuquin Papan ambi aton Mayan meniaido unësacsho nuqui uincuemequin nuquin dada utsi uaindac. Aton Mayan nuquibëd tabadsho isun nuqui adoendac.

¹²¿Ëbi adsho tantiashta Esus tantiaquid abi bunacpadequi icsapec? Padenquo. Bëdamboec tabadte bunec. ¹³Utsiboen abi bunacpadec icsamboecuidi tabadec unësacsho cuidquin Nuquin Papan icsano nidmendac. Nuquin Papan Mayanën tantiamiacpadec tabadquin nuqui icsaid nuqui ë nec. Adash unësash Nuquin Papa yacno nuqui tabadendac.

¹⁴Aden aton Mayanën bëdamboec tabadmiaido Nuquin Papan: —Con mado nec. Con champi nec —capendac. ¹⁵¿Icbo icsambo icquidën yua dacuëdmicbimboenda Nuquin Papan Mayanën nuqui dacuëdmec? Padenquo. Nuqui bëdambo icmec. Aidën tantiamiacpadomboen Nuquin Papauidsëqui papa nuqui capec. ¹⁶Aden Nuquin Papan Mayanën: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. ¹⁷—Con mado nec. Con champi nec —qeshun nëbi Nuquin Papan nuqui bëdamboen isquin unësacsho abëdi tabadmequin nuqui bëdamboshë icmendac. Utsibon chieshë nac chieshtoenquo yec unësacsho Nuquin Papan abëdi tabadmequin Esus bëdamboshë icmiac. Adembidi Esus tantiaquid icscho utsibon chieshënaqui chieshtoenquo icquin Esus tantiequi unësacsho Nuquin Papan abëdi tabadmequin nuqui bëdamboshë icmendac. Nuquin Papa yacnombo Esuquidistun natedi nuquin na nendac.

Nuquin Papan bëdamboshë icmete chiaid

¹⁸Adec Nuquin Papa yacno nuqui bëdamboshë icte tantiaquin nuqui nidaidën natiaic tabadaiduidi ma nuqui tantiatiapimbo iqueyoc. ¹⁹Aden Nuquin Papan nuqui bëdamboshë icmete tantiec ambi uaid utsitedi nidaidën icquidtedi aben icquidtedi: —Nëbimbobi bëdambo icmepashuni —queded-quededec tabadec. ²⁰Abia

matses uaid Adan icsasho cuidquin ambi uaid nidaidën icquidtedi Nuquin Papan unësquiduidquio icmepampic aidon: —Padi —catiapimbo icnuc. ²¹ —Yuecshun ëmbi Esus tantiaquido uincuemequin aton dada utsi uacpadën ëmbi uaido utsi nidaidën icquidtedi chodquete icboedi utsi uain bédamboshë icmendambi —quequin tantiaquimbi unësquiduidquio icmepampic. Aden Nuquin Papan chiaid tantiaquin ambi uaidon nidaidën icquidtedishun aton dada abi bédambo icmete tantiaquin cainec tabadec. ²² Unëstiapimbo icte bunec unësquid yec: —¿Tedectsicshun Nuquin Papan nuqui utsi uapeba? Nëbimbobi Nuquin Papan utsi uapashuni —queded-quededec Nuquin Papan uaidtedi. Bacuë tishquid bacuë paëmbo icnuc: —Badedquio tishmepashuni —quiacbimboec adpec. ²³ Nuquin Papan meniaidën aton Mayanën tantiamiapaden nuquitsen naden chiec. —Con dada utsi uaquin unëstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unëstiapimbo icquid icmendac —queded-quededquin nuquin dada utsi uate tantiaquin nuqui cainec. ²⁴⁻²⁵ —Esus tantiaquido unësacsho Nuquin Papan nuquin dada utsi uaindac —quequin tantiaquin nuqui Esus tantiabenondac. Nuquin dada utsi uabi icnubi: —Nëbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquio iquendac.

²⁶ —Aden aton dada utsi uate tantiaquin yuen cainec chieshtonoshe —queshun Nuquin Papan Mayanën nuquibëd icquin bédamboen tantiamec. —¿Mitsipadembimbi Nuquin Papa chuipeba? —quec nuqui shubitiadquio icsho isun Nuquin Papan Mayanën abi chiec. Unësquio icnuc onquenquio icquin chiec: —Mimbi tantiacpadomboen aid matses bédambo icmeta, Papa —quequin Nuquin Papan Mayanën nuqui comapenen chuided-chuidedec. ²⁷ Aden Nuquin Papan: —Ma Esus tantiaquido bédambo icnu —quequin tantiaidbidi aton Mayanën onquenquio icquin chuisho Nuquin Papan tantiec. Otacquio tantiaidtedi tantiaquid icquin Nuquin Papan aden aton Mayanën chiaid tantiec.

Nuquin Papan nuqui bédambo icmiaid

²⁸ Aden tantiashun nuqui naden tantiec. Ambi tantiamiacpadomboen abi tantiaquido bédambo icmete bunquin Nuquin Papan bédamboen nashunec. Unësquio yec tabadsho aden naic. Natiambo icsho adembidi naic. Cuishonquesho adembidi naic. ²⁹ Ëndenquimboshë nidaid uabi yequi Nuquin Papa nadpampic. —Ëmbi tantiactedi ëbëdta con Mado tantiaquid icmequin Esuspadquio icnuc bédambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquio icnuc bédambo icmencu Nuquin Papan naic. ³⁰ Ëndenquimboshë nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquio icnuc abided cuidadaid Esus tantiasho Nuquin Papan nuqui bédamboen isec isaisabimboecnuc. Nuqui bédamboen isquin nuqui bédamboen tabadmec. Unësacsho nuqui unëstiapimbo icquid icmeshun abëdi tabadmendac.

³¹ ¿Embi aden chiaidtedi tantiashta Esus tantiaquido dacuëdpec? —Nuqui cudasquin Nuquin Papan nuqui bédambo icmendac. Ëbi chieshënuquidën: “Cuid,” cac Nuquin Papan ëbi cuidenquio ictsiash —quec nuqui dacuëdenquio iquec. ³² Nuquin Papan nuqui tantiaquiec. Aton Madombo cudasenquio icquimbi nuqui cuidenquio icnuc aton Madoded cuidquin unës uamepanëdash. Adshumbic Esus tanti-

asho ënenquio icquin bëdamboen isquin nëbi bëdambo icmequin unësacsho abëdi tabadmequin nuqui bëdamboshë icmendac. ³³ ¿Nuquin Papan nuqui bëdamboen isquidëmbida nuqui cuidpec? Padenquio. ¿Utsibo nuqui caic: —Icsambo iquec —queshobida Nuquin Papan nuqui cuidpec? Padenquio. ³⁴ ¿Esusëmbida nuqui cuidpec? Abi tantiaquido cuidmenquio icnuec abided cuidadec Esus unësac caondash. Unësacsho Nuquin Papan uincuemiac Nuquin Papa yacnoshon aidëmbi abi tantiaquido chianec. —Ëbi tantiaquido bëdamboen isquin cuidenda, Papa —quequin Nuquin Papa chianec tabadec. ¿Adquidënquiobida nuqui icsano nidmequin cuidpec? Padenquio. ³⁵ Nuqui bëdamboen isquin ënenquio icquin Esusën nuqui tantiaquieci. ¿Shubisho isunda Esusën nuqui tantienquio icpec? Padenquio. ¿Dacuëdshoda Esusën nuqui tantienquio icpec? Padenquio. Adembidi nuqui tantiaquieci. Utsibon chieshënsho bëdamboen isquinc pete natia bunsho bëdamboen isquinc nuquin dashcute nibëdsho bëdamboen isquinc nuqui Esusën caindac. —Ëbi acshunendac —quesho bëdamboen isquinc chieshëmënuquidon: —Cuesunenu —casha bëdamboen isquinc nuqui caindac Esusën ënenquio icquin. ³⁶ Aden utsibon Esus tantiaquido chieshënte chuiquin Nuquin Papan dada uamepampic naden. “Mibi tantiasho ëbi: ‘Cuesunenu,’ caded-cadedec uimanëmënuquidon. Aben icquidbimboecnuc: ‘Cuesunenu,’ caded-cadedebi, Papa,” quequin Nuquin Papan chiaid dada uapampic Esus tishabi icnuc.

³⁷ Aden utsibon nuqui chieshënsho Esuquidistun nuqui bëdamboen tantiaquieci. Shubisho abi nuqui tantiamec. Adoac Esus tantiatsec shubiquimbi chieshtoenquio icquin nuqui Esus tantiaquieci yanendac. ³⁸⁻³⁹ Nuquin Papantsen ënenquio icquin nuqui tantiaquieci. Nuquin Icbo Esus tantiasho Nuquin Papan nuqui bëdamboen isec. Unësacsho nuqui bëdamboen tantiatiashi. Unësabi icsho nuqui bëdamboen isec. ¿Nuquin Papan abi yacnoshon uaid mayan bëdan: —Aid tantienda —cashoda nuqui Nuquin Papan tantienquio yampatsiashi? Padenquio. Adembidi nuqui tantiaquiotiashi. ¿Podobitsi icsabon icbo Satanasën: —Aid tantienda —cacta Nuquin Papan nuqui chieshëmpatsiashi? Padenquio. Adembidi nuqui tantiaquiotiashi. Nëbi nuqui bëdamboen tantieci. Yuecshun adembidi nuqui bëdamboen tantiendac. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiotiashi. Abuc nidacsho Nuquin Papan nuqui bëdamboen tantiatiashi. Nidaid uquëducquio nidacsho adembidi nuqui bëdamboen tantiatiashi. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bëdamboen tantiatiashi ënenquio icquin.

Pabadon aton matses isadaidbo chiaid

9¹⁻² Aden con matses isadaidbo tantiaquid Nuquin Papa nec. —Aden abi tantiaquidi con matsesën bëdamboen tantienquio iquec —quiash shubitiadquio iquebi. Muainquio iquebi. Esus tantiaquid icsho Nuquin Papan Mayanën tantiamiaid icquin abimbo chiembique. Tantiata. ³ Con matses isadaidbo tantieci unësquio yec tsadebi. Nuquin Papan: —Min matses abitedi cuidenquio icnuen mibiuidtsëqui Esusbëd tabadmenquio icquin icsano nidmequin cuidnu —capatecnëdani. Adoac: —Ai, con matses cuidenquio icnuen ëbided cuid —quetsenondabi. ⁴ Con matses tsusedpa Acobo caid Nuquin Papan Isadaid caidën tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibëdi tabadebique. Mibi ismenu —quequin con matses tabadacno abu ushu bëchamuanquieccuid

chomequin ismepampic. Adashic nadpampic. —Ĕmbi chiacpadec bēdamboec tabadsho mibi bēdamboen isquin bēdambo icmendambi. Mibi nianenquio iquendambi —queshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquio ictequid chuiquin: —Mibi bēdambo icmendambi —quequin Nuquin Papan con matses chuiampic ĕndenquimboshē. ⁵ Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquibi yec abitedishun Icho yec matsesac caondashe. Esus chuiquin: —Nuquin Papa padquibi yec mibi bēdamboeshē iquec —canuna ĕnenquio icquin.

⁶ Ĕmbi chiacpaden Esus tantienquio icsho Nuquin Papan con matses dadpen bēdamboen istiapimbo iquec. ¿Aden tantiashtabi nadpe? —Nuquin Papa muapampic. Ambi chiacpadomboen nainquio icquin con matses bēdamboen istiapimbo iquec —¿quectabi ique? Padenquio. Nuquin Papan abimbo chuiampic. Isadaidbo dadpeshun Nuquin Papa bēdamboen tantienquio iquec. Ambi tantiactedishun abi tantiasho ambi chiacpadomboen Nuquin Papan bēdamboen isec. ⁷ Ĕndenquimboshē con tsusedpa Abadauanĕn mēdaidtedi adembidi Nuquin Papan bēdamboen isambo. Abadauanĕn mado abentsēqui Isac caic: —Aidĕn tsyuecquido ĕmbi mibi cuĕnacpadomboen con matses caindambi —quequin Nuquin Papan chuiampic. ⁸ ¿Abadauanĕn bacuĕbotedishun tsyuecquidotedida Nuquin Papan con matses caido nepc? Padenquio. Ambi chiacpadomboen Isaquĕn tsyuecquido Nuquin Papan con matses caido nec. ⁹ Naden Nuquin Papan Isac tishte chuiampic. “Ĕmbi tantiacpadĕn choashun ĕmbi namiac Sadan min chidon dada bacuĕ tishendac,” quepampic Nuquin Papa Abadauan chiec.

¹⁰ Aden ambi: —Adoendambi —quequin chiacpadomboen naquidquido Nuquin Papa nec. Aden Nuquin Papan Isaquĕn bacuĕ abi ushĕmbi daĕd tishte chuiampic. Adnubien con tsusedpa Isaquĕn aton chido Debeca caid bedshun chudquin dada bacuĕ daĕd usundomepampic Nuquin Papan chiacpadomboen. ¹¹⁻¹² Aid dada bacuĕ daĕd tishabi icshobi Nuquin Papan ani naden chuiampic. “Ĕmbi tantiacpadquid min madon utsimpi bĕyucquidbimboecquid nendac,” quepampic. Aid daĕd tishabi bēdamboec tabadtiapimbo icnubi: —Tishacsho ĕmbi tantiacpadembi tsyuec tishsaidĕmpi abentsēqui bēdamboen isendambi —quequin tantiec adpampic Nuquin Papa. ¹³ Adembidi Isaquĕn mado chuiquin Nuquin Papan ambi chiaid dada uamepampic. “Acobouidsēqui tantiaquiquin aton buchimpi Esau bĕdiactsĕc tantiatendambi,” quepampic Nuquin Papa,” quequin dada uamepampic.

¹⁴ Ĕmbi aden chuisho tantiashtabi: —Nuquin Papa icsambo iquec —quecta mibi ique? Ma Nuquin Papa icsapenquio icquid neyoc. Icsaquido yec matses abitedi ambi cuidtequido icsho Nuquin Papan ambi tantiactedi bēdamboen isec. ¹⁵ Aden Nuquin Papan con tsusedpa Moises chuiampic.

“Embi tantiactedi matses bēdamboen isendambi.

Aidtedi cuidenquio iquendambi,”

quequin chuiampic. ¹⁶ ¿—Ĕmbembi nasho Nuquin Papan bēdamboen istiashtabi —quec matses bunacpadenda Nuquin Papan matses bēdamboen ispec? Padenquio. Ambi tantiactedishun abi tantiashtabi Nuquin Papan bēdamboen isendac. ¹⁷ Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuiampic. “Matses abitedishun ma nadono. Padaon caid ic-

sasho Nuquin Papan cuidec. Nuquin Papa abitedishun Icho yec nadatiambo icquidquio nec, ma ëbi canu,' quequin mibi chuiquid dapa icmiondambi. Mibi icsasho pacuënëdacimboecnuc mibi icmembi," quequin Nuquin Papan padaon chiaid Moisesën dada uapampic. ¹⁸ Aden ambi tantiacpadomboen utsi-utsien icsaido pacuënëdacimboecnuc icmequin abi tantiamenquio iquec. Adembidi utsi-utsien bëdamboen isquin abi tantiamec.

¹⁹ ¿Ëbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesën nainquio icpadic? —¿quecta ique? ²⁰ ¿Matses icquinda mimbi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ëbipadquid matses uao, Papa? —¿capenda nuqui ique? ²¹ ¿Ada abi nacnenquid matsun chushcapadic? Padenquio. Matsu nacnenquidën ambi tantiacpadomboen nacnenendac. —Nëid nidaid tëshë tëchu bëdambo icquid acte uetequid nacnenu. Nëid nidaid tëshë matsumpi icsactsëcquid opa acmete nacnenu —quequin matsu nacnenquid. Aden ambi tantiacpadomboen nidaid tëshun nacnenquid.

²² Adembidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapenen tantiaquidquio nebi. Adquid icquin icsaido cuidquid nebique. Ismenu —queboedëmbi ambi cuidtequido baded cuidenquio iquec. Ambi ëndenquimboshë tantiacpadomboen aido icsano nidmendac. ²³ —Ma ëmbi bëdamboen isaidon naden tantianu. "Icsaisambo icquin matses bëdamboen iste bunquin Nuquin Papan icsaido badedi cuidenquio iquec," quequin ma tantianu —qeshun icsaido badedi cuidenquio iquec. Ambi ëndenquimboshë tantiacpadomboen ambi bëdamboen isaido abëdi tabadmendac.

²⁴ Aden ambi tantiacpadomboen Esus tantiasho Nuquin Papan nuqui bëdamboen isec. Isadaidbon abi tantiasho bëdamboen isquinc isadaidpembo matses utsibon abi tantiasho bëdamboen isquinc nuqui caindac. ²⁵ Ambi matses utsibotsen aden bëdamboen iste chuiquin Nuquin Papan con tsusedpa Oseyas caid dada uamepampic naden.

"Utsibo ëmbi con matses cacmaidobi con matses cabenendambi.

Adembidi ëmbi bëdamboen tantiacmaidobi matses utsibo bëdamboen isbenendambi,"

quequin Nuquin Papan chiaid dada uashun ²⁶ nadentsen dada uapampic.

"Matses utsibo ambi con matses cacmaidobi ambi tantiacpadën aido abentseabentsen Nuquin Papan bëdamboen isendac.

Bëdamboen isquin: 'Con mado nec. Con champi nec,' caindac,"

quequin Nuquin Papan matses utsibo bëdamboen iste chuiquin dada uapampic.

²⁷ Ambi con matses caidombi abi tantiatiapimbo icscho isash Nuquin Papa chushquiaid con tsusedpa Isayasën naden dada uapampic. "Masitedi dadpenquio caidnëdaido isadaidbo daëdpactsëcshun abi tantiasho bëdamboen isquin aidtedtsëqui Nuquin Papan cuidenquio iquendac. ²⁸ Ambi chiacpadomboen ambi tantiacpadën matses abi tantiesabotedi Nuquin Papan uesquin cuidendac isadaidbo yec matses utsibo yec quenuc," quequin Isayasën dada uapampic. ²⁹ Nuquin Papan chiaid padpiden dada uaquin isadaidbo cuidte Isayasën chuipampic naden.

"Shubu dadpen icquid Sodoma caid yacnoquidobëdta shubu dadpen icquid utsi Comoda caid yacnoquido Nuquin Papan uesquin cuidac aton tsyuecquido nibëdquiec iquendac.

Adembidi con matses Nuquin Papan uesquin cuidtsempanëdash.
 Abitedishun Icho icquin con matses nibëdquiecnuc cuidtsempanëdash. Dadpen
 cuidquin daëdpactsëc cuidabi icpanëdash,”
 quequin dada uapampic Isayasën.

Isadaidbo bëdamboen istiapimbo icte chiaid

³⁰ Aden Isadaidbo dadpeshun abi tantienquo icsho Nuquin Papan bëdamboen
 istiapimbo iquec. Padnuen matses utsibo: —Mabi Nuquin Papan bëdamboen isnu.
 Ambi chiapadec bëdamboec tabadnu —quesabobi: —Ëbi cuidmenquo icnuec
 abided cuidadec unësaid Esus bëdamboshë iquec —quesho Nuquin Papan bë-
 damboen isec icsaisabimboecnuc. ³¹ Isadaidboen: —Moisesën chiampiduidi ëmbe-
 mbi nasho Nuquin Papan bëdamboen isebe —queboedombi nainquo icsho Nuquin
 Papan bëdamboen istiapimbo iquec. ³² ¿Atotsieshun Nuquin Papan isadaidbo bë-
 damboen istiapimbo icpec? —Ambi chiapadomboenuidi ëmbembi naquin Nuquin
 Papa bëdamboen ismembu —queboedombi adotiapimbo icquin Nuquin Papa bë-
 damboen ismequidquo Esus chieshë nec. Adsho Nuquin Papan bëdamboen isti-
 apimbo iquec. ³³ Esus tishabi icnuc isadaidbon Esus chieshënte chuiquin Nuquin
 Papan con tsusedpa naden dada uamepampic.

“Buintad bëdambo icquid istuidash: ‘Nëidquo shubu uanun nitsinembi,’
 quiacbimboen

Edusaden yacno ëbi bëdamboen ismequidquo isadaidbobëd tabadmendambi.

Adec tabadsho anocquidon chieshë nendac.

Aid chieshë nquid nadquo iquendac. ‘Cuëte mabud iquec,’ quequin tantienquo yec
 nidec tocoshquetanec uebudac bimboec

ëbi bëdamboen ismequid tantienquo yec unësash icsano nidendac.

Aid tantiaquido: ‘Nëid tantiasho Nuquin Papan abi yacno nuqui tabadmendac,’ que-
 quid unësacsho ëbi yacno tabadmendambi,”

quequin Nuquin Papan ambi chiaid dada uamepampic.

10 Con matses isadaidbo tantiac unësquo icnuc Nuquin Papa chianiombi. —
 Con matses isadaidbo abided cuidadaid Esus tantiameta, Papa. Esus tanti-
 ashobëdamboen ista, Papa —quequin Nuquin Papa chianiombi. ² Esus tantiabi
 ëmbi chuidenecpadomboen chiec: —Nuquin Papan chiapadomboenuidi naquin
 Nuquin Papa bëdamboen ismembu —quetsëcboedombi con matsesën Nuquin Papa
 bëdamboen ismete tantienquo iquec. ³ —Abided cuidadaid Esus tantiasho Nuquin
 Papan bëdamboen isebe —quetiadquidi icsamboen tantiec. —Nuquin Papan: “Bë-
 damboec tabadta,” quequin chiaid Moisesën dada uactedu naquin Nuquin Papa bë-
 damboen ismembu —quequin icsamboen tantiaquin Nuquin Papan tantiacpado-
 mboen nainquo icquin Esus tantienquo iquec. ⁴ Esusuidtsëqui Nuquin Papan: —
 Bëdamboec tabadta —quequin chiaid Moisesën dada uactedu naquidquo nec. Adec
 icsaisa yec matses icsaid bedshunuec abided cuidadec unësac caondash. Nëbi Esus
 tantiasho Nuquin Papan matses bëdamboen isec icsaisabimboecnuc.

⁵ Nuquin Papan chiaid dada uaquin Moisesën chuipampic naden. “Ambi chi-
 apadomboenuidi naquid Nuquin Papan bëdamboen isquin abëdi tabadmetsi-
 ash,” quequin Nuquin Papan chiaid Moisesën dada uapampic. ⁶ Aden ambi chi-
 apadomboenuidi natiadquidombi natiapimbo icsho Nuquin Papan matses bë-
 damboen istiapimbo icpanëdash. Nëbi abided cuidadaid Esus tantiasho nuqui bë-

damboen isec. Adoac Esus tantiaquido nadenquo iquec. —Nuquin Papa yacno nidshun ¿tsuntsin Nuquin Papa nuqui bēdamboen ismepatsiashba? —quenquo nuqui iquec. —Esusquo Nuquin Papa bēdamboen ismequidquo nec —quequin nuqui tantiec. ⁷ Aden tantiec: —¿Tsuntsin Nuquin Papa bēdamboen ismequidquo uincuempatsiashba? —quenquo nuqui iquec. —Abided cuidadec unēsacsho Esus uincuemiāc caondash —quequintsen nuqui tantiec. ⁸ Aid tantiasho Nuquin Papan nuqui bēdamboen isec. Ambi bēdamboen iste chuiquin Nuquin Papan naden dada uamepampic. “Nuquin Papan chiaid chuisho tantiash: ‘Abimbo chiec. Aid tantiambi,’ qesho Nuquin Papan matses bēdamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiasho Nuquin Papan nuqui bēdamboen isec. Aden nuqui bēdamboen ismequid Esus chuibenequid nebi. ⁹ —Nuquin Papan uincuemiaid Esus abitedishun Icbo neque. Con Icbo Esus canu —quequin chuisho Nuquin Papan nuqui bēdamboen isquin cuidenquo iquendac. ¹⁰ —Ēbi cuidmenquo icnuec abided cuidadaid Esus tantiambi —quequin otacquo tantiaquidēn: —Esus tantiaquid nebi —quequin utsibo abimbo chuisho bēdamboen isquin Nuquin Papan cuidenquo iquendac.

¹¹ Ambi chiaid Nuquin Papan dada uamiapaden:

“Aid tantiec: ‘Nēid tantiasho Nuquin Papan abi yacno nuqui tabadmendac,’ quequid unēsacsho ēbi yacno tabadmendambi.”

¹² Isadaidbo yec matses utsibo yec quequido Esus tantiaquidtedi adoendac. Aden abitedishun Icbo icquin abi tantiaquidtedi Esusēn bēdambo icmendac. ¹³ Aden Esusēn nate chuiquin con tsusedpan Nuquin Papan chiaid dada uapampic. “‘Abitedishun Icbombo icsho mibi tantiaquid nebique. Ēbi bēdamboen ista, Icbo,’ qesho bēdamboen isquin cuidenquo iquendac,” quequin dada uapampic.

¹⁴ ¿Mitsipaden matsesēn Esus tantiabempec? ¿Esusēn naid chiabi yacta mat-sesēn tantiapec? Padenquo. Esusēn naidquo chuibanauquen tantiendac. ¿Esusēn naid chuisho tantiash: —Mua —quequidta Esus tantiaquid nepadic? Padenquo. —Abimbo caic —qeshun: —Min Mado Esus tantiambique. Ēbi bēdamboen ista, Papa —quequidien Esus tantiaquid nec. ¹⁵ ¿Mitsipadoaidēn Esusēn naid chuibampec? ¿—Chuita —cacmaidēnda chuibampec? Padenquo. Nuquin Papan: —Con Mado chuibeneta —caidien Esusēn naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bēdamboen iste chuibanquid chosho isash: ‘Bēdambo iquec,’ quec matses cuishonquendac,” quequin dada uamepampic.

Isadaidbo dadpeshun Esus tantienquo yaid

¹⁶ Adquidēn Esusēn naid chuibanac isadaidbo dadpeshun Esus tantienquo iquec. Daēdpactsēchun tantiec. Abi tishabi icnuc aden abi tantiesabo Esusēn chuite Nuquin Papan con tsusedpa Isayas caid dada uamepampic naden. “Mimbi chiaidquo ěmbi chuibanasho ¿tsuntsin tantiapec, Papa? Daēdpactsēchun: ‘Abimbo mimbi chiec. Mibi tantiaquin mimbi chiacpadomboen naimbi,’ ěbi caindac, Papa,” quequin Esusēn aton Papa chuite Isayasēn dada uapampic. ¹⁷ Aden Esusēn naid chuibanasho tantiashun: —Abimbo caic —qeshun utsibon Esus tantiec.

¹⁸ ¿Esusēn naid chuisho tantiabida con matses isadaidbon icpadiac? Ma tantiapoboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidēn naid chuibanquidēn chuibanendac.” Aden chuiban-

sho ma con matsesën tantiaboc. ¹⁹ Aden Nuquin Papan chiaid chuisho tantiash: —Tantiadenquoio yec onquec —¿quepecta icnëdash con matses? Padenquoio. Tantiashi abi bëdamboen tantiata bunenquoio icsho isun matses utsibo bëdamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidboudi ëmbi bëdamboen iste mimbi danubi ëmbi con matses cacmaidobi matses utsibo bëdamboen isbenendambi.

Ëmbi matses utsibo bëdamboen iso isash: ‘¿Atotsieshun Nuquin Papan matses utsibo bëdamboen ispec?

Icsambo iquec,’ quec mibi chushquendac.

Matses utsibobi ëbi tantiabi icquido ëbi tantiamendambi.

Aido bëdamboen isquin mibi nëishëmendambi,”

quequin Nuquin Papan Moises dada uamepampic. ²⁰ Adembidi dacuëdenquoio icquin Isayasën Nuquin Papan matses utsibo bëdamboen iste dada uapampic.

“Nuquin Papa tantiatiadquoio iquebi,’ quenquoio icquidombi ëbi tantiabenosh.

‘¿Mitsipadembimbi Nuquin Papa bëdamboen ismepeba?’ quesabobi ëmbi bëdamboen iste tantiamiombi,”

quequin Isayasën Nuquin Papan chiaid dada uapampic. ²¹ Isadaidbotsen chuiquin Nuquin Papan chiaidquibidi Isayasën naden dada uapampic. “Mibi tantiac unësquoio iqueque. Ëbi bëdamboen tantiata,’ cadeniaqui: ‘Padi, mibi tantiatiapimbo iquebi,’ quequin ënenquoio icquin ëmbi chiaid mimbi niac-niacpec,” quequin Nuquin Papan chiaid Isayasën dada uapampic.

Ambi chiactedi isadaidbo Nuquin Papan bëdamboen isaid

11 ¿Ambi chiaid niac-niacsho isadaidbotedida Nuquin Papan chieshëmpec? — Con matses catiapimbo iquebi —¿quecta iquec? Padenquoio. Isadaidbombo nebi. Ëndenquimboshë con tsusedpa Abadauan campidën baban tishmiaid Benaminën tsyuecquidon tsyuecquid yec isadaidbombo nebi. Adquid icsho Nuquin Papan chieshënenquoio iquebi. ² Ëndenquimboshë nidaid uabi icquimbi Nuquin Papan: —Con matses caindambi —quequin con matses isadaidbo tantiapampic. Adshun abitedi chieshënenquoio iquec. ¿Ediasën chiampid tantienquioda ique? Aton matses isadaidbo nëishëshun Nuquin Papa naden chuiampic. ³ “Mimbi con matses caidotedi icsamboshë icquec, Papa. Mimbi chiaid chuibanquidobi cuesun seccac. Papa quequin mibi menequin ismete cuënote nacnenaid uesquin chic-chicpac, Papa. Icsamboshë iquec. Ëbiuidtsëqui bëdambo iquec. Mimbi chiaid chuibansho tantiashun ëbi cuesunetiadquoio iquec, Papa,” quequin Ediasën Nuquin Papa chuiampic. ⁴ Adoac ¿mitsipadomboen Nuquin Papan chuiampic? “Ëbi tantiaquido abi iquec. Ëmbi namiacpadomboen isadaidbo dadpenshun 7000tedishun ëbi tantiec. Ëbi tantiesabon papa quequin nacnenaid Bad caid tantienquoio icquin ëbi tantiec,” quequin Nuquin Papan Edias chuiampic. ⁵ Adembidi nëbi con matses isadaidbon ambi tantiactedishun Esus tantiasho Nuquin Papan bëdamboen isec. ⁶ ¿Ambembida con matsesën Nuquin Papa bëdamboen ismepec? Padenquoio. —Ëmbi chiacpadomboenuidi nasho matses bëdamboen isembi —¿quecta icpec Nuquin Papa? Padenquoio. Aden naquid nibëdsho bëdamboen istiapimbo icboedëmbi ambi tantiactedishun icsaboedon Esus tantiasho Nuquin Papan bëdamboen isendac.

⁷ Isadaidbon ambi tantiactedishun Esus tantiasho Nuquin Papan bēdamboen isec. Isadaidbo utsiboen bēdamboen istiapimbo iquec. Aido: —Nuquin Papa bēdamboen ismete bunquin ambi chiacpadomboenuidi ěmbimbo nanu —queboedombi nainquio icsho Nuquin Papan bēdamboen istiapimbo iquec. Abi bēdamboen ismequidquo Esus chieshēsho Nuquin Papan pacuēnēdacbimboecnuc isadaidbo icmepanēdash. ⁸ Aden ambi isadaidbo pacuēnēdacbimboecnuc icmete chuiquin Nuquin Papan dada uamepampic naden.

“Nuquin Papan pacuēnēdacbimboecnuc icmiac Nuquin Papan chiaid chiaqui tantiatiapimbo iquec,”

quequin dada uamepampic. ⁹ Adembidi ambi isadaidbo pacuēnēdacbimboecnuc icmete chuiquin Nuquin Papan con tsusedpa Dabid naden dada uamepampic ěndenquimboshē.

“Ěbi bunaiduidi naic ěbibi bēdambo iquebi,’ quequidēmbi Nuquin Papa bēdamboen tantienquo iquec.

Adsho Nuquin Papan cuidpashun.

Cuidadnushi abimbo chiaid danec: ‘Ěmbembi naic bēdambo iquebi,’ quendac.

Adec abi tantienquo yec icsasho Nuquin Papan cuidpashun.

¹⁰ Pacuēnēdacbimboecnuc icmequin Nuquin Papan abimbo tantiamenquo icpashun.

Natiamequin shubimepashun,”

quequin Nuquin Papan chiaid Dabidēn dada uapampic.

Nuquin Papan matses utsibo bēdamboen isbenaid

¹¹ ¿Aden pacuēnēdacbimboecnuc icmiac Esus tantiatiapimbo icsho isadaidbo padpiden bēdamboen tantiametiapimboda Nuquin Papa icpec? Amba tantiacpadomboen bēdamboen tantiamendac. Nēbi isadaidbo dadpen bēdamboen istiapimbo icquimbi matses bēdamboen iste bunquin Nuquin Papan matses utsibo Esus tantiamequin bēdamboen isbenec. —Ěmbi adosho isash isadaidbotsen ma nadnu. “Nuquin Papa bēdamboen ismete bunquiebique. Ěmbitsen Esus tantianu,” ma quenu —qeshun Nuquin Papan aden matses utsibo ambi bēdamboen iste tantiamiac.

¹² Amba chomiaid Esus tantienquo icsho isadaidbo dadpen bēdamboen istiapimbo icquimbi matses utsibon Esus tantiasho ambi con matses caido isadaidbobimboecnuc Nuquin Papan bēdamboen isbenec. Amba tantiacpadēn ambi tantiamiacpadomboen isadaidbo dadpenshun Esus tantiabensho Nuquin Papan bēdamboen isendac. Adshumbic matses utsibobēdta isadaidbo Nuquin Papan bēdamboeshē icmendac.

¹³ Tanta, matses utsibo. Mibitsen chuinu. Nuquin Papan icmiacpadomboen matses utsibo Esusēn naid chuibenequidquo nebi. Ěmbi chuibeneboed con matses isadaidbo chuibanombi naden. —Esusēn naid ěmbi chuibeniac matses utsibon Esus tantiabensho. Adsho Nuquin Papan aido bēdamboen isbensho —quequin con matses chiombi. ¹⁴ —Aden Nuquin Papan matses utsibo bēdamboen isaid ěmbi chuisho tantiash Nuquin Papa bēdamboen ismete bunquin Esus tantiatsiash. Adsho Nuquin Papan bēdamboen istsiash —qeshun con matses aden chiombi. ¹⁵ Aden isadaidbon Esus chieshēsho isun Nuquin Papan matses utsibo Esus tantiamequin bēdamboen isbenac. Amba tantiacpadēmbi isadaidbontsen Esus tantiasho Nuquin Papan bēdamboen isbenendac. Isadaidbontsen Esus tantiabededsho isumbic Nuquin Papan matses unēsaidotedi uincuemendac. ¹⁶ Con tsusedpa Abadauan abi tanti-

aquidquo icsho Nuquin Papan bēdamboen isquin: —Con matses mibi caimbi. Adem-bidi min tsyuecquidotsen ěmbi chiactedi con matses caindami —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuēte caniacsho: —Tapunuidtsēqui con na nec. Dada con napenquo nec —¿capenda icbon iquec? Padenquo. —Abichobi con na nec —caquid. Adem-bidi Nuquin Papan isadaidbotedi con matses caic. Caniec taēquid cuēte tapumbimboecquid abia con matses caid Abadauan nec. Cuēte cuidibimboecquido Nuquin Papan con matses caidobidi Abadauanēn tsyuecquido isadaidbo nec.

¹⁷ Aden ambi con matses caidombi ambi chomiaid chieshēnsho cuēte cuidi utsi pobinun pateshuniacimboen Nuquin Papan isadaidbo dadpen bēdamboen istiapimbo iquec. Matses utsibo Esus tantiamequin cuēte dada utsi pobiacimboen aton matses icmequin ěbipadquid isadaidbo ambia Esus tantiaquidobēdta Nuquin Papan mibi bēdamboen isec. ¹⁸ Adoac icsamboec onquenda. —Isadaidbo dadpen bēdamboen isenquo icquin Nuquin Papan ěbien bēdamboen isec. Isadaidbo icsambo iquec. ěbien bēdambo iquec —quequin icsamboen chienda. Aden icsamboen chuitiadquo icquimbi nēid chiaidtsen tantiatia. Cuēte tapunabi icnuc dada yec podo yec quec cuēte ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibēdtsempampic. Isadaidbo nibēdnuc isadaidbon chidon Esus tishenquo ictsempanēdash. ěmbi aden chiac isadaidbo chiec icsamboec onquenda.

¹⁹ ¿Ěbi adsho tantiashta mibi nadpe? —Ambi con matses caido chieshēmēnsho isun cuēte cuidi pateshuniacimboen nēbi isadaidbo dadpen Nuquin Papan bēdamboen isenquo iquec. ěbipadquid matses utsiboen bēdamboen isbenac —¿quecta iquec? ²⁰ Abimbo mimbi caic. ¿Atotsieshun Nuquin Papan isadaidbo bēdamboen istiapimbo icpec? Ambi chomiaid Esus tantienquo icsho Nuquin Papan aido bēdamboen istiapimbo iquec. Padnuen Esus tantiasho mibi bēdamboen isec. Adoac: —Ěbi bēdambo icnubi isadaidbo icsambo iquec —quenda. —Esus tantienquo icsho isadaidbo cuidacpadomboen ěbitsen Nuquin Papan cuidpanundac —quequin Nuquin Papa Esusbēdta tantiaquiota. ²¹ Ambi con matses caidon Esus tantienquo icsho Nuquin Papan bēdamboen istiapimbo iqueque. Adem-bidi matses utsibon Esus tantienquo icsho Nuquin Papan mibi bēdamboen istiapimbo iqueque. Esus tantiaquiota.

²² Aden Esus tantiasht nadec onqueta. —Esus tantiasho bēdamboen isquid yec Esus tantienquo icsho isun cuidquid Nuquin Papa nec —cata. Esus tantienquo icsho cuēte cuidi pateshuniacimboen cuidquin isadaidbo bēdamboen isenquo iqueque. —Esus tantienquo yansho adem-bidi ěbitsen cuidpanundac —queshun chieshtoenquo icquin Esus tantianuna. ²³ —Padi, aid tantiatiapimbo iquebi —queboedombi isadaidbon Esus tantiabensho abēdi tabadmenuen Nuquin Papan bēdamboen isendac. Ambi cuēte cuidi pateshuneboedi abibidi pobioacimboen padpiden bēdamboen isendac. ²⁴ Min matses abitedi Nuquin Papa tantiesabo icnēdash. Nēbien cuēte icsan cuidi pateshuniaid pobiacimboen Esus tantiamequin Nuquin Papan mibi bēdamboen isec. Adoac Esusbēdta Nuquin Papa mimbi bēdiactsec tantiatsec. Con matses isadaidbo tsusedpabo Nuquin Papa tantiaquido dadpenquo icpampic. Nuquin Papan tantiamiac Esus chote chuiquin ěnden dada uapampic. Ambi tantiacpadēn ambi cuēte bēda cuidi peteshuniaid abibidi pobioacimboembi

Esus tantiamequin Nuquin Papan con matses isadaidbo bēdamboen isendac. Adoac cuēshēd-uidboedombi Nuquin Papabēdta Esus bēdamboen tantiaquendac.

Ambi chiacpadēn Nuquin Papan isadaidbotsen bēdamboen isoaid

²⁵ Tantia. —“Isadaidbo icsambo iquec,” quequin chuinushe —qeshun mimbi tantiacmaid Nuquin Papan chiaid mibi chuinu. Nuquin Papan pacuēnēdacbimboecnuc icmiac con matses dadpen Esus tantiate bunenquoio iquec. Daēdpactsēcshun Esus tantiec. Nuquin Papan tantiatedishun matses utsibo dadpenshumba Esus tantiambic ²⁶ paposhquiacbimboen con matses isadaidbo dadpenhun Esus tantiendac. Aden tantiasho Nuquin Papan con matses bēdamboen isendac. Aden ambi isadaidbo bēdamboen iste chuiquin Nuquin Papan naden dada uamepampic.

“Icsambo icquidobi cuidmenquoio icnuec Nuquin Papa yacnuēsh choquid isadaidbon chidon tishaid iquendac.

Aidēmbi isadaidbo Nuquin Papa tantiaquid padpiden icmendac.

²⁷ ‘Aden ěmbi chiacpadomboen ěmbi chomiaid tantiasho abi icsaid bēpiscudquin isadaidbo bēdamboen isendambi,’ quependac Nuquin Papa,” quequin ambi chiaid Nuquin Papan dada uamepampic.

²⁸ Nēbi Esus chieshēnsho isadaidbo bēdamboen istiapimbo icquin Nuquin Papan matses utsibo mibi Esus tantiamiac. Ambi nēbi bēdamboen istiapimbo yaido isadaidbo unēsquoio icnuc Nuquin Papan tantiaquieic. —Ěmbi aton tsusedpabo chiampicpaden aido con matses caimbi —qeshun adoec. ²⁹ Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. ³⁰ Min matsesēn isadaidpembon Nuquin Papa tantienquoio yacbimboen nēbi isadaidbon Nuquin Papa tantiamequid Esus tantienquoio iquec. Aden Esus tantiapimbo icsho isun Nuquin Papan Esus tantiamequin matses utsibo bēdamboen isbenac. ³¹ Con matsesēmbien abided cuidadaid Esus chieshēnquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bēdamboen isendac. ³² Aden matses abitedishun ambi chiaid niac-niacsho isun: —Abitedimbo icsaquieic —quequin matses bēdamboen istiapimbo icboedēmbi nēbi Esus tantiasho Nuquin Papan bēdamboen isendac isadaidbo yec matses utsibo abitedi yec quenec.

³³ Aden Nuquin Papan bēdamboen iste chuisho tantiash nadnuna. Nuquin Papa bēdamboshē iquec. Abipadquid utsi nibēdec. Matsesēn naidtedi tantiaquidquio nec. Abitedimbo tantiaquid icquin ambi natiapimbo ictequid nibēdnuc bēdamboen naquidquio nec. ¿Ada adquid icsho Nuquin Papan naidtedi matsesēn tantiapadic? Padenquoio. Ambi naidtedi matsesēn tantienquoio iquec. ³⁴ “¿Nuquin Papan otacquoio tantiaidtedida matsesēn tantiapadic? Padenquoio. ‘¿Mimbi tantienquoio iquec. Ěmbi chiacpadomboen nata,’ quequinda matsesēn Nuquin Papa chuipadic? Padenquoio. Ambi tantiacpadomboembien Nuquin Papan naindac.” ³⁵ “¿Ada matsesēn Nuquin Papa menepadic? Padenquoio. ‘Nē. Con na bedquin mitsana ěbi cuidquin mene, Papa’ ¿quequinda Nuquin Papa chuipadic? Padenquoio. Matsesēn: ‘Con na nec,’ caitedi Nuquin Papan na nendac.” ³⁶ Abitedimbo uaquidquio yec abitedishun Icbombo Nuquin Papa nec. —Uesadec nibēdanushe —quequin abitedimbo isquidquio nec. Aton na abitedi nec. Adec abitedishun Icbombo icsho: —Nuquin Papa bēdamboshē iquec —canuna ěnenquoio icquin.

Esus con Icbo cain ambi chiacpadomboen naid

12 Con utsibobimboecquido mibi neque. Tantia. Mibi chuinu. Nuqui cuidmenquo icnuec abided cuidadaid Esus tantiasho Nuquin Papan nuqui bēdamboen isequē. Nuquin Papa bēdamboen tantiatiadquo icquin nadonona. —Ēbi bunaid nainquo yec mibi bēdambo icmenuc mimbi chiacpadec bēdamboec tabadtiadquo iquebique. Min yuambo ēbi icme, Papa —quequin Nuquin Papa chuinuna. ²Esus tantiesabon nacpadomboen nainquo icquin Nuquin Papan Mayanēn pausunacpadomboen Esus tantiaquin nuqui icsate bunaid ēnuna. Aden nuqui icsate bunaid ēnquin Nuquin Papa bunacpadec bēdamboec tabadquin nuqui tantiendac. Aden naic nuqui bēdambo iquendac.

³Tantia. Nuquin Papan tantiamiacpadomboen mibi chuinu. Nadenda. —Ēbiuidtsēqui bēdambo iquebi. Utsibo abitedi icsambo iquec —quenda. Nuquin Papan Mayanēn tantiamiacpadec mibibi datantiadec: —Adquid nebi —quequin abimbo chuita. ⁴Nuquin Papan Mayanēn tantiamiacpadomboen naquid Esus tantiaquidēn. Adquid yec ¿ada Esus tantiaquido abitedi chuiquid dapa yampatsiash? Padenquo. ¿Mitsipadquo min dada icpec? ¿Abichobida bedantequid icpec? Padenquo. Mēdanteuidtsēquien bedantequid iquec. ¿Abichobida istequid icpec? Padenquo. Ēshēuidtsēquien istequid iquec. ¿Abichobida shēdtequid icpec? Padenquo. Dēbiateuidtsēquien shēdtequid iquec. ⁵Min dada yacimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bēdamboec tantiananquin nashunanquido yanec. ⁶—Ma utsibo nashunu —qeshun Nuquin Papan Mayanēn namiaid nec Esus tantiaquido. ¿Atotsi naquid Nuquin Papan Mayanēn mibi icmiac? Nuquin Papan ambi tantiaidquo oncamiaid iquendac. Adquid icquin Nuquin Papan Mayanēn tantiamiaiduidi chuibanta. ⁷Utsibic: —Utsibo nashunquid icta —caid iquendac. Adquid icquin bēdamboen nashumbanta. Utsibic Nuquin Papan: —Ēmbi chiaid bēdamboen tantiashun chuibanta —caid iquendac. Adquid icquin Nuquin Papan chiaid tantiatsēcquido bēdamboen tantiameta. ⁸Utsibic: —Chieshtoenquo icquin Esus tantiec bēdamboec tabadnuna —quequin bēdamboec tabadquin ismequid iquendac. Adquid Nuquin Papan icmiaid icquin Esus tantiaquido bēdamboec tabadte tantiameta. Utsibic aton na nibēdquido aton na menequid Nuquin Papan icmiaid iquendac. Adquid icquin cudasenquo icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusēn namiacpadomboen Esus tantiaquido bēdamboen nameta chieshenquo icquin. Utsibic dada icsaido yec isedanquido yec aton shubu nibēdquido yec aton pete nibēdquido yec macho yec tsusioctšec yec qesho bēdamboen nashunquid iquendac. Adquid icquin Esusēn chiacpadomboen chieshtoenquo icquin nashumbanta.

Esus tantiaquidon nadoquid, quiaid

⁹—Mibi tantiac unēsquo iquec —quequin utsibo chuiquin abimbo chuinuna. Muainquo icquin utsibo tantiaquionona. Chieshēmēnenquo yec bēdamboec tabadnuna. Utsibon: —Icsanuna —caqui: —Padi —quiash icsainquo yec bēdamboec tabadnuna. ¹⁰—Ēbēdtan Esus tantiaquido con utsibobimboecquido nec —quiash bēdamboec tantiananuna. —Nēid con buchibimboecquid bēdambo iquec. Aidēn chuisho bēdamboen tantianuna —canuna nuquibēdtan Esus tantiaquido chuiquin.

¹¹ Nuquin Papan chiacpadomboen naic chieshtoenda. Nuquin Papan Mayanën tantiamiacpadec Esus tantiec chieshtoenquoio yec bédamboec tabadnuna. ¹²—Unēsacsho abi yacno Nuquin Papan ëbi tabadmendac —quec cuishonquenuna. Esus tantiaquido icsho utsibon chieshënaqui chieshtoenquoio icquin Esus tantianuna. ¿Atotsi natiamente utsi icpec? Adquid tantiec shubiquimbi chieshtoenquoio icquin Esus tantianuna. Baded-badedquien Nuquin Papa chian-chianuna. ¹³ Nuquibëdtan Esus tantiaquido aton na nibëdsho isun nuquin nabi menenuna. Isedanquido bédamboen isnuna. Pemequinc nuquin shubun ushmequinc canuna. ¹⁴ Esus tantiaquido yec nuqui chieshënuquidobëdi chieshënanenquoio icnuna. Chieshënanenquoio icquin Nuquin Papa naden chuinuna. —Ëbi chieshënuquido bédamboen tantiameta. Chiesh bédameta, Papa —quequin Nuquin Papa chuinuna. ¹⁵ Utsi bédambo yec cuishonquesho isash aidbëdi cuishonquenuna. Utsi unēsquoio icnuc shubisho isash aidbëdi shubinuna. ¹⁶ Cuesnanenquoio yec chieshëmënenquoio yec bédamboec tabadnuna. —Con nauidsëqui naimbi —quenquoio icquin utsibobëdtan bédamboen nanuna. —Ëbiuidtsëqui bédambo iquebi. Ëmbi tantiacpadomboenuidi naimbi. Utsibon chiaid natiapimbo iquebi —quenquoio yec bédamboec tabadnuna. —Chuiquid dapabëduidtsëqui onquequid nebi —quenquoio yec matses abitedibëd onquec bédamboec tabadnuna.

¹⁷ Chieshënaqui cuidnanenda. —Ma utsibo: “Bédamboec tabadquido nec,” quenu —quiash bédamboecuidi tabadnuna. ¹⁸ Uimanëmënuquido icsasho isun aid chuiquin: —Bédamboequien tabadtiad —canuna. Adquidobëd chieshënanenda. ¹⁹ Ëmbi tantiaido mibi neque. Tantia. Chuinu. Nuqui chieshënuquidobëdi cuidnanenquoio icnuna Nuquin Papan naden chiaid tantiash. “Matses cuidnanac icsambo iquec. Ëbentsëcquiobini icsaido cuidquid nec,” quequin Nuquin Papan chiaid dada uapampic. ²⁰ Nuqui chieshënuquidobëdi cuidnanenquoio icquin bédamboen isnuna. “Pete bunsho pemequinc acte bunsho acmequinc canuna. Nuqui chieshënuquido: ‘Bédambo icquidi chieshë nec icsachitobi,’ quiash ma nēish bēdanu,” quiash ²¹ adec cuidnanenquoio icquin nuqui chieshënuquido bédamboen isnuna.

Chuiquid dapan chiacpadomboen Esus tantiaquidën naquid

13 Aton matses chuiquid dapan chiacpadomboen Esus tantiaquidën naquid. Adembidi aton nidaid pais caidën tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibëdtsiash. Nuquin Papan chuiquid dapa icmiaidien aido nec —qeshun aidon chiacpadomboen naquid Esus tantiaquidën. ² Nuquin Papan chuiquid dapa icmiaidën chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid. ³ Bédamboec tabadquidon chuiquid dapan cuidte dacuëdëntiapimbo iquec. Adquido cuidenquoio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bédamboec tabadta. Adsho isun: —Mibi bédamboec tabadec —catsiash chuiquid dapabon. ⁴ —Ma matses bédamboec tabadnu —quequin Nuquin Papan chuiquid dapa icmiaidën mibi bédamboen tabadmetiadquio iquec. Nuquin Papan icmiac icsambo icquido cuidquid nec. Adquid icnuc: —Icsasho chuiquid dapan ëbi cuidpanundac —quiash icsaquid dacuëdendac. ⁵ Ëbi adsho tantiashun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin Papan chiacpadomboen natiadquio iquebi —qeshun adonona.

⁶Bëdamboen tabadmenuen Nuquin Papan chuiquid dapa icmiaidon: —Ëmbi chi-
acpadomboen nata —cac naquid Esus tantiaquidën. ⁷Aden chuiquid dapan chiac-
padomboen nanuna. Aid bëdamboen isnuna. Aidën: —Nata —cac nanuna chieshen-
quio icquin.

Utsibo tantiaquionona, quiaid

⁸—Ëmbi nashumbocpadomboen ëbi cuidquin nashunenuio iquec —camenda.
Abi nashunquidobëd cuidnanquid Esus tantiaquid. Esus tantiaquidbidi bëdamboec
tantiananquid. Adec bëdamboec tantiananquin Nuquin Papan Moises chiampic-
padomboen nuqui bëdamboen natsiac. ⁹“Ambi naiduidtsëqui nainquio yec abibi
datantiadacimboec ma matses bëdamboec isnanu,” quequin Nuquin Papan Moises
naden dada uamepampic. “Min chidopenquio chudenda. Adembidi min bënëpen-
quio chudmenda chidon. Cuesunenda. Ampenda. Utsin na isash: ‘Adquid con na
nibëdosh,’ quec chieshëmë nec tabadenda,” quequin Nuquin Papan con tsusedpa
Moises dada uamepampic. Aidën chiacpadomboen natiadquio icquin nuquibi datan-
tiadacimboen utsibotsen tantiaquionona. ¹⁰Utsibo bëdamboen isquin aido icsa ua-
tiapimbo nuqui ictsiac. Aden utsibo bëdamboen tantiasho Nuquin Papan: —Aden
naic ëmbi Moises chiacpadec bëdamboec tabadec —caindac.

¹¹—Nëbien abi tantiaquido abi yacno buanuec Esus chochitec —quequin Nuquin
Papan chiacpadomboen nanuna. Ushacimboen nainquio icboedi nëbi ushash isucu-
nacimboec dayacquio yec chieshtoenquio icquin Nuquin Papan chiacpadomboen
nanuna. Esus tantiabënash: —Yuecashien Esus choec —quiondaidi: ¹²—Nëbien Esus
chochitec —quedonetsëcquieç bëdamboec tabadnuna. —Satanasën yuanushe —
queshun Esus tantiaquin nuqui icsaid ënshun bëdamboen nanuna. ¹³Icsainquio yec:
—Bëdambo iquebique. Ma isnu —quiash bëdamboec tabadnuna. Tantiadenuen acte-
quid paëmbo icquid aquenquio icquinc utsin chido chudenquio icquinc utsin bënë
chudmenquio icquinc chido utsi mëismenquio icquinc canuna. Adecbidi utsin na
isash: —Con na adquid nibëdec —quiash chieshëmë nec tabadenquio icnuna. Adem-
bidi utsin mihi bunaid nasho isash: —Aden ëbi namenquio icpec —quec chieshëmë-
nenquio icnuna. Icsainquio yec bëdamboec tabadnuna. ¹⁴—Icsate bunchitebi. ¿Mit-
sipaden naiquini icsape? —quenquio yec Esus tantiaquieç abi tabadacpadquieç bë-
damboec tabadnuna. Nuqui icsate bunaid ënquionona.

Esus tantiaquido utsibo bëdamboen isaid

14 Nuquibëdtan Esus tantiatsëcquidon nuqui nacpadomboen nainquio icsho
bëdamboen isnuna. Ambi chiaidquio chuiquin Esus tantiaquidon natetedi
Nuquin Papan uesquin chiabi iquec. —Naden nac bëdambo iquec. Naden nac ic-
sambo iquec —quequin uesquin chiabi iquec. Aden Nuquin Papan chiacmaid chieç
nuquibëdtan Esus tantiatsëcquido: —Ëmbi natemaid nec —queshobi: —Icsamboen
chieç —cainquio icnuna. ²Esus tantiaquidquido: —Pete abitedi pambidbëdta pesho
Nuquin Papan nëishënenquio iquec —quenubien Esus tantiatsëcquid: —Padi. Pam-
bid pesho isun Nuquin Papan nëishënushe. Esus tantiaquidën nitsinaid pequid. Pam-
bid isuidquid —quepec. ³Pambid pequidobëdtan pambid isuidquidombi Esus tan-
tiasho Nuquin Papan aid daëdi bëdamboen isec. Padnuen pambidbëdta pete utsi
abitedi pequidën pambid isuidquid mamënsunac icsambo ictsiash. Adembidi pam-
bid isuidquidën: —Pambid pequid icsambo iquec —cac icsambo ictsiash. ⁴¿Icbon-

penquioda: —Yua icsambo iquec —capadic? Icbombien adoquid. Adembidi: —Mibi bédambo iquec —caquid icbon. Nuquibédtan Esus tantiaquid Nuquin Icbon yua icsho: —Ēmbi nacpadomboen nainquio yec mibi icsambo iquec —cainquio icnuna. —Nëid icsambo iquec. Nëid bédambo iquec —quequin Nuquin Icho Esusën ambentsëqui abi tantiaquido chiendac. Aidën namiacpadomboen abi tantiaquidon bédamboen naindac.

⁵ Esus tantiaquido utsi-utsiec: —Aid badiadquidënuidsëqui Esus tantiec cuëdënac bédambo ictsiash —quenubien utsibo: —Badiadquidën badiadquidënquiec Nuquin Papa Esusbédta tantiec cuëdënebi —quecuededpec. Adquid daëd icsho Nuquin Papan nëishënenquio iquec. Esus tantiaquid ambi tantiacpadënquibi cuëdënac bédambo ictsiash. ⁶ Aden Esus tantiaquin nac bédambo ictsiash. Adembidi Esus tantiaquin: —Mimbi pete uaid bédambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bédambo iqueque. Aid penu —qeshun utsi pequimbi pambid isuidquid iquendac.

⁷ ¿Esus tantiaquid ambi naid-uidi naquidta nedic? Padenquio. ¿Ambi tantiacpadën unësquidta nedic? Padenquio. ⁸ Nuquin Icho Esusën chiacpadomboen natiadquio yec nuqui tabadec. Ambi tantiacpadën nuqui unësendac. Unësabi yec tabadec Esusën yuambo icboedi unësash adecbidi aton yuambo nuqui iquendac. ⁹ Adec Nuquin Icho icnuec abided cuidadec unësash Esus uincuempañédash. Unësabi yec nuqui tabadnuc Nuquin Icbombo icboedi nuqui unësan adecbidi Nuquin Icbombo iquendac.

¹⁰ —Adquid Nuquin Icho iquec —qesho ¿tantiashunda nuquibédtan Esus tantiaquid mamëshuntiad? Padenquio. ¿Nuquin Papan chiacmaid chiec: —Ēmbi nacpadomboenuidi nainquio yec icsambo iquec —quequina chushcatiad? Padenquio. Nuquin Icho Esusbédtan Nuquin Papanuidtsëqui matsesën naidtedi chiendac. —Nëid bédambo iquec. Utsi icsambo iquec —quequin chiendac matses abitedishun tantianubi. ¹¹ Adote chuiquin Nuquin Papan ambi chiaid naden dada uamepampic. “Tantia. Abimbo caimbique.

Naden matses abitedishun ëbi chiendac.

‘Abitedishun Icbombo mibi nec.

Bédamboshë icquidquio mibi nec.

Abitedishun naid tantiaquid icquin mimbiuidtsëqui: Nëid icsambo iquec. Nëidien bédambo iquec, quequin abimbo chiendac,’ quequin matses abitedishun ëbi chiendac,”

quequin Nuquin Papan dada uamepampic. ¹² Aden ambi cuidte ushën Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

Utsibo icsamenquio icnuna, quiaid

¹³ Ēbi adsho tantiashun Nuquin Papan: —Adoenda —quequin chiacmaid nuqui tantiaid chienquio icnuna. —Ēmbimbo natemaid naic aido icsambo iquec —nuquibédtan Esus tantiaquido cainquio icnuna. Adenquio icquin nadonona. —Ēmbi ambi natemaid nasho isash chieshtoshon Esus tantienquio yanushe. Ambi natemaid naquin ismenquio iquembi —qeshun Esus tantiaquidtedi bédamboen isnuna. ¹⁴ Nuquin Icho Esuquidistu tantiaquidquio icquin ëmbien naden tantiec. —Nëbi Nuquin Papan: “Petemaid nec,” caid nibëdec —quequin tantiembi. Ēbi adnubi

utsibo: —Petemaidquio nec. Aid pec icsamane. Aid petiapimbo iquebi —qeshumbi adquid pec: —Icsachitobi —quetsiash. ¹⁵ Adsho tantiashun aido bēdamboen tantiaquin ambi petemaid nuqui pemenquo ictsiac. Ambi petemaid pemequin mimbi aido tantienquo iquec. —Ĕmbi petemaid piash icsachitobi —quequin Esus tantienquo yanushe. Ambi petemaid pemenda. —Nēid petemaid nec —quequido aidot-sen tantiaquin cuidmenquo icnuec abided cuidadec Esus unēsaque. Aido tantiata. ¹⁶ —Nuquin Papan chiaid niaquenquo icquin Esus tantiaquido utsibon: “Aden naic icsatsiash,” caid naimbi. Ĕmbi tantiacpadomboen naimbi —qeshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ĕmbi natemaid naique —camenda. ¹⁷ ¿—Nadquid petemaid nec. Nadquid actemaid nec —quequin petebēdta acteuidi tantiecta Nuquin Papan chiacpadec Esus tantiaquido bēdamboec tabadpatsiash? Padenquo. Aton Mayan nuquibēdi tabadmiac chieshēmēnenquo yec cuishonquec Esus tantiaquido bēdamboec tabadendac. ¹⁸ Adec Esuquidistun chiacpadec tabadsho isun Nuquin Papan: —Bēdambo iquec —caindac. Matsesēnsen: —Aido bēdambo iquec —caindac.

¹⁹ Ĕmbi chiacpadec chieshēmēnenquo yec bēdamboec isnanuna. —Esus tantiec chieshtoenquo yec bēdamboec tabadnuna —quec chuinanuna. ²⁰ —Nuquin Papan bēdamboen isaidon Nuquin Papa Esusbēdta tantienquo yanushe —qeshun utsibon petemaid pequin aido chieshtomenda. Nuquin Papan: —Matsesēn petemaid nec —caid nēbi nibēdnubi Esus tantiatsēcquidēn petemaid pequin aid chieshtomec mibi icsatsiac. ²¹ —Ĕbēdtn Esus tantiaquido icsamemane —qeshun ambi petemaid pambid penquo icquinc ambi actemaid acte paēmbo icquid aquenquo icquinc ambi natemaid utsi nainquo icquinc cac bēdambo ictsiash. ²² Nuquin Papan: —Matsesēn natemaid nec —cacmaid tantiaquin: —Ĕmbimbo petequid nec. Ĕmbimbo actequad nec. Ĕmbimbo natequad nec. Aden nasho Nuquin Papan ēbi cuidenquo iquec —quequin mimbi tantiaid caic: —Natemaid nec —quequido naden chienda. —Ĕmbi nacpadomboen nainquo yec mibi icsambo iquec —cainda. Adembidi aidon: —Ĕmbi natemaid nec —caboed naquin ismenda. Chieshtonoshe. ²³ Adquid ambi: —Aid pesho Nuquin Papan nēishēnchitembini ictsiash —caboed piash —Icsachitobi —quetsiash. Adsho Nuquin Papantsen: —Ai, adec icsaic —catsiash. —Aden naic icsachitequini ictsiac —nuqui caidtedi naic nuqui icsatsiac.

Nuqui bunaiduidi nainquo icnuna, quiaid

15 Esus tantiaquidēnquo Esus tantiatsēcquid chieshēnenquo icquid. —Natemaid nec —quequin Nuquin Papan chiabi icnubi Esus tantiatsēcquid: —Esus tantiaquin Ĕmbimbo natemaid nec —qesho tantiashun ambi natemaid naquin ismequin chieshtomenda. Aid tantiaquin ambi natemaid nainquo icquin nuqui bunaiduidi nainquo icnuna. ² —Esus tantiatsēcboedēmbi ma Esus bēdamboen tantiabēnquiono —quequin nuquibēdtn Esus tantiatsēcquidēn natemaid nainquo icnuna. —Aden naic mibi bēdambo iquec —camenuen ambi natemaid nainquo icnuna. ³ Esuquidistun ambi naiduidi nainquo icquin Nuquin Papan chiacpadomboenuidi naic abi chieshēnquido yacnobi chopanēdash. Esus tishabi icnuc Esusēn chuite chuiquin Nuquin Papan con tsusedpa naden dada uamepampic. “Mibi chieshēnacpadomboen chieshēnquin ēbi icsamboen chuishunec, Papa,” quequin Esusēn abi chuite Nuquin Papan dada uamepampic. ⁴ Aden con matses isadaidbobēdta matses utsibo abitedi bēdamboen tantiamenuen Nuquin Papan ambi chi-

aid dada uamedenepampic. —Nëid isban-isbanquin ëbëdta Esus ënenquo icquin tantiec ma matses bëdamboec tabadnu. Adec bëdamboec tabadec: “Unësash Esus-bëdi Nuquin Papa yacno tabadendabi,” ma matses quenu —qeshun ambi chiaid dada uamepampic. ⁵ Aden matses chieshtoenquo icnuc bëdamboen tabadmequid Nuquin Papa mibi chianembi. —Chieshtoenquo icquin Esus tantiaquid icmequin dayacquio yacbimboecnuc matses bëdamboen tabadmequid mibi nec, Papa. Adquid icquin Doma yacnocquidon Esus tantiasho bëdamboec isnanquid icmeta, Papa. ⁶ Mimi adoac: “Nuquin Papa chuinuna,” cac aidon abitedishun: “Ai, adonona,” qeshun mibi naden chuitsiash, Papa. “Con Ico Esuquidistun Papa mibi nec. Mibi bëdamboshë iquec,” quequin mibi chuitsiash, Papa —quequin Nuquin Papa mibi chianembi.

Nuquin Papan matses utsibo Esus tantiamiaid

⁷ Tantia. Padpiden mibi chuinu. —Nuquin Papa bëdambo iquec —nuqui camenuen Esuquidistun nuqui bëdamboen isequë. Bëdamboec isnanuna. Isadaidbo yec isadaidpembo yec quec bëdamboec isnanuna. ⁸ Esuquidistu matses abitedi bëdambo icmenuec matsesbëd tabadpanëdash. Esus chote chuiquin Nuquin Papan dada uamepampicpadec isadaidbobëdi tabadquin Esusën aido nashumpanëdash. —Nuquin Papan abimbo chuipampic —quequin tantiamenuen adopanëdash. ⁹ —“Icsaboedombi Esus tantiasho Nuquin Papan bëdamboen isquin cuidenquo iquec. Nuquin Papa bëdambo iquec,” ma isadaidpembo matses utsibo quenu —quecbidi Esus matsespanëdash. Aidën abi chuite chuiquin Nuquin Papan naden dada uamepampic.

“Isadaidpembo matses utsibobëdtan mibi naden chiendambi.

‘Nuquin Papa bëdambo iquec,’ caindambi mibi.

Adecbidi mibi bëdamboen tantiec cuëdënendabi,”

quequin Esusën abi chuite Nuquin Papan dada uamepampic. ¹⁰ Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobëdi cuishonqueta.

‘Nuquin Papa bëdambo iquec,’ quec cuishonqueta,”

quequin Nuquin Papan chiaid dada uapampic. ¹¹ Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

‘Nuquin Papa bëdambo iquec,’ cata.

‘Nuquin Papa bëdambo iquec,’ quec cuëdëncuededec tabadta,”

quequin dada uapampic. ¹² Adembidi isadaidpembon matses utsibon Nuquin Papanbëdta Esus tantiabente chuiquin Nuquin Papan con tsusedpa Isayas naden dada uamepampic.

“Dabidën papa Isai caid ënden unësampidën tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bëdamboen namendac.

Aid caic: ‘Nëidën nuqui cuidmenquo iquendac,’ quependac isadaidpembo matses utsibo,”

quequin dada uapampic.

¹³ Aden chiampid mibi nec. Nuquin Papa Esusbēdta tantiaquido icsho mibi Nuquin Papa chianembi. —Mibēdi matses tabadmequidquio mibi neque. Mibi tantiamequin Doma yacnoquido cuishoncameta, Papa. Adembidi dacuēdenquio icnuc bēdambo icmeta. Aden min Mayan aidobēdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

Matses utsibo Esus chuibanquid nebi, quiaid

¹⁴ Con utsibo mibi caimbique. Tanta. Mibi chuinu. —Nuquin Papan Mayanēn tantiamiacpadec bēdamboec isnanec bēdamboec tabadtiaquido icquidien nec. Aidēn tantiamiacpadomboen Nuquin Papan chiaid bēdamboen tantiec: “Nuquin Papan chiacpadec bēdamboec tabadnuna,” quec chuinanquidien nec —quequin mibi tantiombi. ¹⁵ Aden tantiash: —Nēishēnushe —quenquio icquin: —Bēdamboec tabadta —quequin chuiquin nēid dada uaimbi. Nuquin Papan: —Esus chuibeneta —caid icquin mimbi ēnden tantiaidbidi Esusēn naidquio bēdamboen mibi tantiamenuen dada uaimbi. ¹⁶ Nuquin Papan icmiacpadquid Esusēn naid chuibenequidquio nebi. Adquid icquin isadaidpembo matses utsibo Esus tantiaquido Nuquin Papan bēdamboen iste chuibeniombi. Adoac matses utsibon Esus tantiabensho isun aton Mayanēn bēdamboen tabadmesho: —Bēdambo iquec —caindac Nuquin Papan.

¹⁷ Aden: —Esuquidistu bēdamboshē iquec —quequin matses utsibo dadpen Esusēn naid chuibeniombi. ^{18–19} Esuquidistun ēbi namiaiduidtsēqui mibi chiec nendabi. Aidēmbi namiac matses utsibo Esusbēdtan Nuquin Papan naid chuibenequimbi Nuquin Papan Mayanēn tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquio yanosh. Shubu dadpen icquid Edusaden yacnuēsh ēnapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi. ²⁰ Esusēn naid chiacmanouidquio Esusēn naid chuibenetiadquio iquebi. Utsibon Esusēn naid chuibanacno nidtiapimbo iquebi. Esusēn naid chuisho tantiacmaido Esus chuite bunquiebi. ²¹ Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidēn naid chuisho tantiacmaidon tantiabenendac.

Adshun paposhquiacbimboen bēdamboen tantiendac,”

quequin dada uamepampic. ²² —Aden Esusēn naid chiambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnoquidon Esusēn naid tantiash —quiash mibi yacno nidabi iccobi. Nēbi mibi yacno nidtiadquio iquebi.

Mibi yacno nidtiadquio iquebi, quiaid

²³ —Nēbi Ididico yacno Esusēn naid uesquin chuibeniac —quiash mibi yacnotsen nidtiadquio iquebi. Ēdenquimbo taēc mibi yacno nidte bunondaidi seta dadpen matamiashic adi nēbi mibi iste bunquiebi. ²⁴ Nidaid utsi Espania caid yacno nidquimbi mibi isbidanendambi. Doma yacno nidash mibēdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibēdi nidendac —ēbi caindac mimbi. Aden tantiec mibi yacno isbidantiadquio iquebi. ²⁵ Nēbini Edusaden yacnoba nidendac. Anocquido Esus tantiaquido utsibon meniaid menenuec nidendabi. ²⁶ —Edusaden yacnoquido Esus tantiaquido utsi-utsiec aton piucquid nibēdeque. Nuquin nabi ma buanshunu. Mene-

nuna —qeshun Esus tantiaquido icquin Acaya yacnocquidobëdtambi Masedonia yacnocquidon: —Con na buanshun meneta —caposhi. ²⁷ Aden ambi tantiacpaden nasho: —Bëdambo iquec —caombi. Edusaden yacnoshon Esusën chiac isadaid-bomba Esus tantiapanëdash. Adshumbic aidon chuibeniac matses utsibontsen Esus tantiapanëdash. Aden abi nashunquin chuiquido Edusaden yacnocquido caic: —“Piucquid nibëdec,” quiac caoshe. Menenuna —qesho: —Bëdambo iquec —caombi. ²⁸ Aden piucquid bedshun: —Edusaden yacno buanec nid. Anoshon meneta —quequin meniäc aid buanec nidendabi. Buanshun Edusaden yacnoshon Esus tantiaquido aton na nibëdquido menebanash nidaid utsi Espania yacno nidquin mibi isbidanendambi. ²⁹ Mibëdi tabadquin ëmbi Esus tantiamequin chuisho Esusën nuqui bëdambo icmendac.

³⁰ Ëmbi tantiaidombo mibi neque. Tantia. Chuinu. Nuquin Icho Esuquidistun aton Mayambëdtan tantiamiacpadec nuqui bëdamboec tantiananec. Ëbi tantiaquin Nuquin Papa chianeta. —Ënenquo icquin Esus tantiamequin mimbi chiacpadomboen Pabado name, Papa. ³¹ Udeya yacno nidsho Esus chieshënquidon Pabado cunesnushe. Bedmenda, Papa. Piucquid buanacsho Edusaden yacnocquido Esus tantiaquido bëdamboen bedmeta, Papa. “Matses utsibon isadaidpembon meniäc bedtemaid nec,” quequin bedenquo icnushe. Bëdamboen bedmeta, Papa —quequin Nuquin Papa chianeta. ³² Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bëdamboec tabadendac Esus tantiamenanec. ³³ Aden mibi tantiaquin: —Nuqui dacuëdenquo icnuc bëdambo icmequid Nuquin Papa mibëd icpashun —caimbi.

Mibi unësquio iquec, quequin chiaid

16 Nuquibëdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bëdamboen ista. Shubu dadpen icquid Senquedeya caid yacnoshon utsibo bëdamboen nashunquidquo nioshe. ² Pebe bëdamboen ista. Utsibobëdta ëbitsen bëdamboen nashunoshe. —Nuquibëdtan Esus tantiaquid nec —qeshun bëdamboen isquin aidën: —Ëbi nashunta —cacpadomboen aid nashunta.

³ Aquida caidbëdta aton chido Pidisida caid chuiquin: —Mibi caic: “Unësquio iquec,” quiosh Pabado —cata. Aidon ëbëdtan Esusën naid chuibeniondash. ⁴ Aden Esusën naid chuibenesho: —Cueschitomane. Aden chienda —Esus chieshënquidon caqui aidon adembidi ëbëdtan Esusën naid chuibeniondash. Adsho isun: —Mimbi bëdamboen naoc —caondambi. Adembidi aidon chiondaidon isadaidpembon chiondash. ⁵ Aquidan shubuno Esus tantiec cuëdë nec cho-choquidotsen chuita. —Mibi caic: “Unësquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabenondaid ëmbi tantiaidquio Epeneto caidtsen adembidi chuita. ⁶ Nëidtedi chuiquin: —“Mibi unësquio iquec,” quiosh Pabado —cabanta. Nëidic Madia caid mibi nashunquidquo. ⁷ Nëidic con matses isadaidbo Andedonico caid. Nëidic con matses Unias caid. Aidon ëbëdtambi Esusën naid chuibenesho chieshëmënquidon bedshun quënën nauedondash. Aidombien ambia Esus tantiabempac caondash ëmbi padabi icnubi. Adsho aidoba Esusën: —Ëbi chuibeneta —cac chieshtoenuquo icquin Esus chuibenequido nec.

⁸ Nëidteditsen chuiquin: —“Mibi unësquio iquec,” quiosh —cata. Nëidic Esus tantiaquid utsi Ampidias caid ëmbi tantiaidquio. ⁹ Nëidic Esusën naid chuiquid utsi Ud-

bano caid. Nēidic ěmbi tantiaidquio utsi Estaquis caid. ¹⁰Nēidic Apedes caidtsen. Utsibon chieshēnaqui chieshtoenquio icquin Esus tantiaquidquio nec. Nēidic Adis-tobudo caidēn shubun icquidotedi. Aidedi: —Mibi caic: “Unēsquio iquec,” quiosh Pabado —cabanta. ¹¹Nēidotsen adembidi chuita. Nēidic con matses utsi Edodion caid. Nēidic Nadsiso caidēn shubun icquido Esus tantiaquidtedi. ¹²Nēidic chido Tidipena chedo Tidiposa caidbēdi. Aido Esus tantiec dayacquio icquin ambi chiac-padomboen nabanquido nec. Nēidic chido utsi Pedsida caid con chu icbobimboec-quidquio. Aidtsen Esus tantiec dayacquio icquin ambi chiacpadomboen naquidquio nec. ¹³Nēidic Dupo caid Nuquin Papan Esus tantiamiaidquio. Nēidic aton tita con tabimboecquidquio. ¹⁴Nēidic Asinquidito caid. Nēidic Pedeconte caid. Nēidic Edmes caid. Nēidic Patēdobas caid. Nēidic Edmas caid. Nēidic abēd icquido Esus tantiaquido. ¹⁵Nēidic Pidodoco caid aton chido Udiabēdi. Nēidic Nedeyo caid aton chuchubēdi. Nēidic Odimpas caid. Nēidic abēd icquido Esus tantiaquido. Aidedi chuiquin: —Mibi caic: “Unēsquio iquec,” quiosh Pabado —cabanta.

¹⁶Esus tantiaquido yec bēdamboec isnanta. —Mibi tantiambi —cananta. Nēmbo icquido Esus tantiaquidtedi mibi caic: —Unēsquio iquec —quiosh. ¹⁷Ěmbi tanti-aido mibi neque. Tantia. Mibi chuinu. ¿Ada mibēdtan Esus tantiaquido chieshēme-quin cuēshēdmequido icpec? ¿Ada Nuquin Papan chiaid mimbi tantiaid chienquio yec mibi icsamenuc muaquido icpec? Adquidobēd onquec tabadenda. ¹⁸Nuquin Icbo Esuquidistun chiacpadomboen nainquio icquin ambi petequid-uidtsēqui aidon chieque. Aidon: —Mibi bēdambo iqueque. Ěmbi chiaid tantiata —quequin ambi chi-acpadomboen namequin Esus tantiatsēcquid icsamec. ¹⁹—Doma yacnocquido abi tantiec Esusēn chiacpadec bēdamboec tabadosh —quequin mimbi naid chuibenesho dadpeshun tantiac caosh. Adsho tantiash bēdambo iquebi. Adecbidi Nuquin Papan chiaid tantiec bēdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbēdi icsainquio icta. ²⁰Nuqui bē-damboen tabadmequid Nuquin Papa nec. Aidēmbi matses icsamequidquio Satanas chedo comapenen cuidendac. Nēbi Satanasēn mibi icsametiadquio icsho tantiashun: —Satanas yuamenquio icnuen Nuquin Icbo Esusēn abibi tantiamequiopashun —mibi caimbi.

²¹Nēmbo icquidtedishun mibi tantiec. Mibi caic: —Unēsquio iquec —quiosh Tim-oteyo ěbēdtan Esusēn naid chuibenequidquio. Adembidi con matsesēn chiosh. Dusio caid yec Ason caid yec Sosipated caid yec quec adosh.

²²Pabadon —Naden na —cac nēid dada uaquidquio Tesio caid nebi. Esus tan-tiaquid icquin ěmbitsen mibi tantiambi. Padi. Aidedtsēqui ěmbimbo tantiaquin chuishun Pabadon chiaidbidi dada uaoaimbi.

²³Nēidteditsen mibi caic: —Unēsquio iquec —quiosh. Nēidic Cayo caid. Aidēn shubun ushobi. Adnuc Esus tantiaquido iccuedednuec aton shubun pudued-puduedosh. Nēidic Edasto caid. Aid nēmbocquidon bedtequid bedbeneshun dayun uaquid nec. Nēidic nuquin utsibimboecquid Cuadto caid. Aideddishun mibi aden tantiosh. ²⁴Doma yacnocquido mibi tantiaquin: —Nuquin Icbo Esuquidistun bē-damboen isquin mibi bēdamboen tabadmepashun —caimbi.

²⁵—Nuquin Papa bēdambo iquec —canuna. Esuquidistu chuibanquin ěmbi: —Aid tantiasho Nuquin Papan mibi bēdambo icmendac —quequin chiacpadomboen Esus tantiamequin Nuquin Papan mibi bēdamboen tabadmetiadquio iquec. Ěnden-quimboshē Esus tishabi icnuc matsesēn Esus chote bēdamboen tantiambo icpampic.

²⁶ Adnubien Nuquin Papan unësesambo icquin con tsusedpabo utsi-utsien Esus chote chuiquin dada uamepampic. Nëbi: —Esusën naid chuisho tantiaquin ma nidaid utsi-utsiec yacno tabadquidon Esusën chiacpadomboen nanu —qeshun Nuquin Papan Esusën naid chuibenequido icmiac. ²⁷ Aden namec Nuquin Papa bëdambo iquec. Abipadquid utsi nibëdec. Ambi natiapimbo ictequid nibëdec. Abitedimbo tantiaquid nec. Nuqui cuidmenquio icnuec abided cuidadaid Esuquidistu tantiasho Nuquin Papan nuqui bëdamboen iseque. —Nuquin Papa bëdambo iquec —canuna ënenquio icquin. Padi. Aidedi chuiquin dada uaombi.

CODINTO YACNOCQUIDON ISTE 1

Pabadon Codinto yacnocquidon iste dada uaid

1 Pabado nebi. Nuquin Papa bunacpadomboen Esuquidistun ëbi chuibenequid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec. ²Aidbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided ciudadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

³Matses icsaquid icsho cuidnushe quiash abided ciudadec Esuquidistu unëspanëdash, quequin abimbo tantisho isun Nuquin Papan bëdamboen isaidquio nuqui nec. Adquido yec utsibobëd bëdamboec ma tabadpanuna.

Mibi tantiaquin Nuquin Papa chuided-chuidedaïd

⁴Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided ciudadec Esuquidistu unësaid chuibanac abi tantiaquido Codinto yacnocquido yanacsho bëdambocquidbimboecnuc mimbi isec, quec bëdambo iquebi, Papa, quequin chuided-chuidedembi. ⁵Aden Nuquin Papan bëdamboen isaido icquin ambi bëdamboen tantiamiaïdobidi mibitedi nec. Matses icsaquid icsho cuidnushe quiash abided ciudadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuibanac.

⁶Esuquidistu tantiesabo iccondaidi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec. ⁷Adquido yec Esuquidistu choate caimbudec Nuquin Papan abi bëdamboec tabadaïd tantiamiaïbi iccoshi quetiapimbo mibitedi iquec. ⁸Aden abi bëdamboec tabadaïd tantiamequin Nuquin Papan mibitedi chieshenquio icmec ma Esuquidistupadquid icnu quequin mimbi caimbudacpadquio icpanuna aid padpidec choanuc. ⁹Adquid mibitedi icmequin ambi Esuquidistubëd icquido icta caido ambi cuëmbanaido Nuquin Papan mibitedi icmiac. Adoshon mibi badedquio Esuquidistupadquid yanenquiocsho isun chieshebi, quesa Nuquin Papa icquin abi mibitedi bëdambocquid icmebanec.

Esuquidistu tantiaquid cuëshëdacbimboec chushcananquido

¹⁰Adembidi chuinu. Tantiata. Esuquidistu tantiaquid nebi quec Nuquin Papan bëdambo icmiaïd ënacbimboec tabadenda. Adec tabadec Esuquidistu tantiaquid ut-sidedi tantiananec ma cuëshëdacbimboec chushcananesa yampanuna. ¹¹Esuquidistu tantiaquido Codinto yacnocquido chushcananec quec. Chido, Quëdoen shubunoësh choquido nëmbo ëbi isec choshon aden chiec. ¹²Mibi onquiaïd chuinu. Tantia. Pabadon tantiamiaïd nebi, quec chushquiacbimboec utsi-utsiec tabadnubien; Apodosën tantiamiaïd nebi, quec chushquiacbimboec utsi-utsiec tabadnubien; Petedon tantiamiaïd nebi, quec chushquiacbimboec utsi-utsiec tabadnubien; Esuquidistun tantiamiaïd nebi, quec chushquiacbimboec utsi-utsiec tabadec.

¹³ ¿Esuquidistu tantiaquido cuëshédmenuenda ëbipadquidon chuibandiondash? Padenquio. Naden chuinu. Tántia. ¿Mates icsaquid icsho cuidnushe quiash ëbida cuidadec unëshpanëda? Padenquio. Adembidi ¿Esuquidistu tantiaquid nebi quequin ëbi mimbi chuishodambi mibitedi acten mentobandionda? Padenquio. ¹⁴ Esuquidistu tantiaquid icsho Quidispobëdta Cayo aid daëdtsëqui naondambi quec tantiec tsadebi. ¹⁵ Utsi padenquio iccondambi ma Pabadon ëbi acten mentondacsho aid tantiaquid nebi, quetiapimbo ma mibitedi icpanuna. ¹⁶ Ai, Estepanasën shubun icquidobidi acten mentondambi. ¿Utsidambi acten mentoponda? Padenquio iccondambi. ¹⁷ Ëbi tantiaquido acten mentoban, Esuquidistu cainquio yaqui Mates icsaid bedshunec abided cuidadec Esuquidistu cuesten dectanac unëshpanëdash quequin chuibeneta, Nuquin Papan cac aden chuibenec nebi. Ëmbibi tantiaid chienquiocquin ma mates icsaquid icsho cuidnushe quiash abided cuidadec Esuquidistu cuesten dectanac unëshpanëdash quequin ma utsibontsen tantiapanu qeshun chuibenec nebi.

Esuquidistu abitedi tantiaquidquo nadatiambocquin nabanquidquibidi

¹⁸ Nuquin Papabëd icquido icmenuec mates icsaquid icsho cuidnushe quiash abided cuidadec Esuquidistu unëshpanëdash quequin chiac, ¿Adpecta iquec? quequin tantiesa yec Nuquin Papa yacno puduedtiapimbo iquec. Adec adquido onquenubi nuquien Nuquin Papa yacno puduedtequido yec Nuquin Papan nadatiambocquin nac mates icsaquid icsho cuidnushe quiash abided cuidadec Esuquidistu unëshpanëdash quequin tantiec. ¹⁹ Abi yacno puduedtemaido chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi ëmendambi. Adquidon tantiatiapimbo yacpadembi natiamequin nabanendambi,” quequin Nuquin Papan dada uamiampid aidëmbi nëbi naid nec.

²⁰ Esuquidistu tantiesa ambibi tantiaidtedi naimëdan ¿mitsimbo adquido tabadpec? ¿Nidaid abubëd aidën icquidtedimbo mitsipadquidquo icpec? quequin isbanquin, Nadquio icpec, quequin comapenen adquidën tantiec. Aden tantiashic ambi tantiaid Nuquin Papan ëmiac ¿mitsimbo adquido tabadpec? ¿Midaquidën bëdamboen tantieque? Adquidën tantiaid tantianu, quec onquecuededquid ¿mitsimbo tabadpec Nuquin Papan aidon tantiaid ëmiac? Adquidon dadpen tantiaquimbi mates icsaquid icsho cuidnushe quiash abided cuidadec Esuquidistu unëshpanëdash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadic? Padenquio iquec. ²¹ Nuquin Papan nadatiambocquin nac mates icsaquid cuidnushe quiash abided cuidadec Esuquidistu unëshpanëdash quequin chuisho ambibi dadpen tantiaquidon tantiauidec. Ëmbi tantiaidpenquio tantiatiapibi quequin tantiatiapimbo iquec. Adquido tantiatiapimbo icnubi ëbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac. ²² Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matesëmbien, Ëbi ënden tantiec papuduedaid daëd uanu queboedëmbi Nuquin Papan chiaid tantiauidoaic. ²³ Adec tabadnubi mates icsaquid icsho cuidnushe quiash abided cuidadec Esuquidistu cuesten dectanac unëshpanëdash, quequin ëbi yacpadquidon chuibanoaic. Adoquien, Nuquin Papan chomiaid nec, quequin isadaidbon cuesten dectanenquioctsenëdash, quequin tantienquio yec tabadec. Isadaid-

pembo, Esuquidistu mimbi chuiboed ëmbi tantiacpadpenquo iquec. Adoac mimbi Esus chuibanaid ëmbi ënden tantiaidbëdta daëd uatiapimbo iquebi quec tabadec. ²⁴ Adquidon tantiauidnubi isadaidbo utsi-utsiec adecbidi isadaidpembo utsi-utsiec Nuquin Papan cuëmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided cuidadec Esuquidistu cuesten dectanac unëspanëdash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin nuqui tantiec. ²⁵ Abitedi tantiaquidquo icquin ambi abentsëc tantiatsaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

²⁶ Utsibo, ¿mitsipadquidquo mibi icponda? Nadquid mibi icpondaque. Chuinu. Tantia. Daëdpectsëc tantiatsëcquido mibi icpondac. Namequidpenquo mibi icpondac. Chuiquid dapan bacuëpenquo mibi dadpen icpondac. Adquid icsho Nuquin Papan mibitedi tantiaquin, Con bacuë caid nec, quequin mibi cuëmbanondash. ²⁷ Ai, daëdpectsëc tantiatsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesha icsho Nuquin Papan cuëmbantemaide nebi quequin tantiec natiac ma shubiquiopanuna. ²⁸ Adembidi utsibon tantiauidtsaido Nuquin Papan cuëmbanaido neoaic. Adecbidi, ¿Ada matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc ²⁹ ëmbi comapenen tantiaquin nabansho Nuquin Papan cuënoshi quequin matsesën chuitiapimbo iquec. ³⁰ Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bëdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unësaid isun Nuquin Papan cuidtiapimbo nuqui iquec. Icsaisa icsho Nuquin Papan aid bëdamboen isquin adomboembidi nuquitsen isoaic. Adecbidi, aidi abi yacno bëyucanec puduedash tsadacpadec adecbidi nuquitsen tabadoaindac. ³¹ Aden nuqui tantiaquin Nuquin Papan dada uamiampicpaden, Èbibi bëdambo ictiapimbocquid icsho mimbi bëdambo icmiaid nebi, Icbo, quequin ëmbi naid chienquiocquin Esusën naidquio chuibanuna nuquitedi.

2 Adembidi chuinu. Tantia. Mibi yacno nidshun dadpen tantiembi quenquiocquin daëdpectsëqui cuembo chuibanondambi. ² Esuquidistubëdta abi cuesten dectanaid chuinu quequin aiduidi mibitedi chuibanondambi. ³ Codinto yacnocquido dacuëdampambo iquec quequin uëdëequimbi mibi chuibanondambi. ⁴ Èmbibi dadpen tantiacpadomboen chuibanenquioccombi. Nuquin Papan Mayanën tantiamiacpadomboen ëmbi chuibanubi aidëmbi nadatiambocquin mibitedi tantiamiondash ⁵ ma Pabodon tantiamiacpadomboen tantiamioshi, quetiapimbo mibitedi icpanuna.

Nuquin Papan Mayanën tantiamiaid

⁶ Nuquin Papan tantiamiac comapenen tantiaquin ëbi yacpadquidon chuibanoaic. Aden chuibeniac Nuquin Papan chiaid tantiabenec papuduedquidon bëdamboen tantiec. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanesambo nuqui nec. Adembidi matses chuiquid dapabon comapenen tantiacpaden chuibanesambo ëbi yacpadquido nec. Matsesën dadpen tantiaid uesadendac. ⁷ Adnubien Nuquin Papan comapenen tantiaquin, Esuquidistu

chuiবেনeta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. Ushë uabi tabadquin matses bëdambo icmequid con mado nendac, quequin Nuquin Papan tantiapampic. ⁸ Esuquidistu nuqui bëdambo icmequid Nuquin Papan chomiacsho adquid nec quequin chuiquid dapabon tantienquiocpanëdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanenquio ictsenëdash. ⁹ Aidpadquid chuiquin Nuquin Papan ëndenquimboshë dada uamiampid nad iquec:

“Nuquin Papan abi tantiaquido ambi cuëmbanaido abi yacno tabadmenun nacne-
naid bëda tantiesan istiapimbo iquec.

Adecbidi Nuquin Papa yacno nadquio ictsiash, quetiapimbo matses iquec.”

¹⁰ Adnubien Nuquin Papan Mayanën Nuquin Papan abi yacnoshon bëdamboec tabadte nacneaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquieci tabadaid nuqui tantiamioaic. ¹¹ Matsesën ambi tantiacpaden chiabi yac utsin tantienquio iquec. Adembidi Nuquin Papan ambi tantiacpaden chiambocon matsesën tantiatiapimbo iquec. Abipadquid aton Mayanënuidquio tantiec. ¹² Con mayan ëbi padquidquio menenu quetiapimbo matses iquec. Nuquin Papambien abipadquid aton Mayan nuqui menec ma aidënquio abi yacno bëdamboec tabadaid nuqui tantiamopanuna. ¹³ Aden aidënquio tantiamiac adomboembidi ëbi yacpadquidon chuibanoaic. Ëmbibi tantiacpadpenquiocquin Nuquin Papan Mayanën tantiamiacpadomboen chuibanembi. Adomboembidi ëbi yacpadquidon chuibanoaic. Aden Nuquin Papan chiaid chuibanac Nuquin Papan aton Mayan meniaidon tantiaquieci.

¹⁴ Nuquin Papan abipadquid meniacmaidon aidën chiaid tantiatiapimbo iquec. Aden Nuquin Papan Mayanën chiaid tantiatiapimbo icquin Nuquin Papan matses bëdambo icmenu qeshun Esuquidistu chomiac matses icsaquid icsho cuidnushe quiash abided cuidadec cuesten dectanac unëspanëdash quequin aidon tantiatiapimbo icoaic. Ëmbi tantiacpadomboen Nuquin Papan chienquio iquec, quendac Nuquin Papan abipadquid meniacmaido. ¹⁵ Nuquin Papan Mayanën tantiamiaidombien naden utsibo tabadaid tantiec. Matses bëdamboec tabadsho isun, Nuquin Papan Mayanën tantiamiacpadec tabadquidquid nec, quequin nuqui tantiec. Adembidi utsi icsamboec tabadsho isun, Nuquin Papan Mayanën tantiamiacmaid nec, quequin nuqui tantiec. Nuquin Papan Mayanën Nuquin Papan chiaid tantiamiacmaidon nuqui naic tabadaid isash Nuquin Papan chiacpadquieci tabadquid nec quetiapimbo iquec adquid. Adecbidi Nuquin Papan chiacpadpenquio yec tabadquid nec quetiapimbo Nuquin Papan Mayanën tantiamiacmaido iquec. ¹⁶ Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquid nec.

¿Adquid Nuquin Papa icsho abi chuiquin

ismequid mitsicquid icpec? Adquid nibëdec.”

Nuquin Papan tantiacpadomboen aton Mayanën tantiamiaido icquin Esuquidistun tantiacpadomboen nuqui tantiabanece.

¿Esuquidistu tantiaquid utsi icsambo iquec, quecta iquec?

3 Adembidi chuinu. Adembi tantiata. Mibi yacno tabadquin Nuquin Papan chiaid tantiabenebicquid mibitedi icsho daëdpactsëc chuibanondambi. Codinto yacnocquido bacuë uidënabi yacnimboecquido nec qeshun Nuquin Papan chiaid

daëdpactsëc mibitedi chuibanondambi. ² ¿Nëbi tishaidënda pambid pepec? Padenquo. Mibitedi adquidbimboecsho tantienquo icnushe qeshun Nuquin Papan chiaid daëdpactsëc chuibanondambi. Ënden iccondacpadquiobi mibitedi adquiobidi icoapec. ³ Esuquidistu tantiesa yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanën tantiamiacmaidpadquid yec nëishec chushcananec mibi. ⁴ Pabadon tantiamiaid nebi, quec utsi-utsiec chushquenubien; Apodosën tantiamiaid nebi, quec chushqueoaic utsi. Adec chushquec Nuquin Papan Mayanën tantiamiaibi yac bimboecquido mibitedi nec.

⁵ ¿Mitsipadosho mimbi ëbi isponda? Adembidi, ¿Mitsipadosho mimbi Apodos isoaponda? ¿Ëmbembidambi mibi chuibamponda? ¿Ambembida Apodosënsen chuibampanëdash? Padenquo. Tantia. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequinda mibitedishun tantiap? Ai, ëmbi adobanubi Nuquin Papan Esuquidistu mibitedi tantiamiondash. ⁶ Tiedën caniquid ëshë siabi yac dëyuctiapimbo yac bimboecquid icquin Codinto yacnocquido Nuquin Papan chiaid dadpen tantiatiapimbo iquec, qeshun matses icsaquid icsho cuidnushe quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodosten mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yac bimboecquido Codinto yacnocquido icnushe qeshun Apodosën chuibanoapanëdash. ⁷ Tied nitsinshun taneshcain tiedën caniquid canimesa icbo nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. ⁸ Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. ⁹ Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tied bimboecquid mibitedi nec. Nuquin Papan shububimboecquidbidi mibitedi nec.

¹⁰ Nuquin Papa tabadte shubu uashunun buintad teshun abia tabëcac bimboen Esuquidistuba chuibanondambi ma matsesën tantianueshun. Buintad tabëcac bimboen Esuquidistu ëmbi chuibanan utsibon adomboembidi aibidi chuibeneoaic. Bëdamboen chuibenenuquin ¿Nuquin Papan tantiacpadomboendambi chuibaneque? Tantanu, qeshun Nuquin Papan chiaid isted-istedtiad ambi chuibeneta caidon. ¹¹ Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu qeshun buintad tabëcac bimboen Esuquidistu ëmbi chuibanan adquid nec, quequin utsi chuibantiapimbo utsibon iquec. ¹² Buintad tabëcaid tabadac bimboecquido icmenuequin Nuquin Papan chiaidquo abimbo chuibanoaic. Utsimbien abipenquiocnoc chuibanoaic. ¹³ Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. ¹⁴ Aden nëdëncaquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad taudacmaid nidac bimboec abi nidendac. Adsho isun abi bëdamboen chuibanquido Nuquin Papan menetequid nendac. ¹⁵ Adomboembidi utsibon abipenquo icnuc chuibanac Esuquidistu tantiatiapimboquido taudaid bescashun secac bimboen secatequid nendac. Adnubi abipenquo icnuc chuiban-

quido tauidtsenacimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaido nendac.

¹⁶ Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? ¹⁷ Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmebanaidobidi nec. Esuquidistu tantiaquido Nuquin Papa tabadtequid nec caindac.

¹⁸ Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuec Esuquidistu tantiesan tantiacpadec tabadenquiocquin Nuquin Papan tantiacpadomböen tantiaquiota. ¹⁹ Esuquidistu tantiesan tantiacpadquiec tsadquidën ëbi yacno tabadte tantiatiapimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icbo unësendac.” ²⁰ Adecbidi: “Adquidën tantiaidbidi ënëdtequid nec,” quequin Nuquin Papan tantiec. ²¹ Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. ²² Aidën bacuëbo icquin mibitedishun con utsi ëbi caic. Adembidi Apodostsen mimbi adoaic. Adembidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. ²³ Mibitedishun icbo Esuquidistu nec. Esuquidistun icbo, Edoen, aton Papa nec.

Esuquidistu chuishunquido

4 Ico Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiaata. Ënden Abia Yampidën Nuquin Papan Esuquidistu chuibeneta, quenquiocpampidëmbi nëbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiaata. ² Nuquin Papan, Esuquidistu chuibeneta, caccpadomböen niaquenquiocquin ëbipadquidon chuibenetiad. ³ Nuquin Icbon, Ëbi chuibeneta, caid ëbi icnuc ¿Pabadon bëdamboenda chuipec? quequin tantianuna, ¿mimbi cactabi dacuëdpe? Padenquio. Adembidi, Nuquin Papan chiacpadomböen chiombi, quetiapimbo iquebi. ⁴ Ambi chiacpaden niaquenquio iccombi, quetiapimbocnobi abitedi isquidquio abitedi tantiaquidquio Nuquin Ico icquin ëbi chuibanec bëdamboec tabadsho isun aidën chiendac. Adembidi ëbi chuibanec icsamboec tabadsho isun chiendac. ⁵ Icsamboen natsiash, quec tsadenda. Nuquin Ico choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbëdta chuibanashun cuidendac. Adembidi, matsesën ëquëducshun tantiaid chuibanquin cuidendac. Adembidi, utsibo bëdamboec tabadaid chuibanquin chuiöaindac, Bëdamboen mimbi naoc, quequin.

⁶ Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantianbanec, Pabadopadquid utsi nibëdec,

quesa ma icpanuna. Adecbidi, Apodospadquid utsi nibēdec, quesā ma utsibotsen icpanuna. Nuquin Icbopadquid utsi nibēdec, quequin tantiec tabad. Adecbidi, Codinto yacnocquidopadquid utsi nibēdec, quenda. ⁷ ¿Mitsicquidēn adquid mibi icmebam-pashba? ¿Abembida mibi adquid icpeba? Nuquin Icbon tantiamiac nabanash, ¿atotsi quiash, ěmbi tantiacpaden naombi, quepe mibi?

⁸ Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nēbi mibitedishun tantiauidpec. ¿Adpecta Nuquin Papan bēdambo icmiaido tabadpadic? Nuquin Papa yacno ěnden puduedacimboc yash chuiquid dapa nebi, quiacbimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibēd ěbi yacpadquido ěbi chedo ěnden chuiquid dapa yacpadquido icmiondac, Cuishon, quetsiabi. ⁹ Adecbidi, Bēdambo iquebi, quec mibi tabadnubi naden tantiec tsadebique. Tanta. Chuinu. ěmbi chuibeneta caido unēseque. Is, Nuquin Papa quiacbimboecnuc ambi abi yacnoshon uaido mayan bēdabobēdtan matsestedishun isbededacimbocquid nebi, quequin ěmbibi tantiec tsadebi aden isbededec aido tabadenquiocnobi. ¹⁰ Esuquidistu chuibenequidon chuibancho tantiauidash, Pabiate icsachitashien nec, quequin mamēnshumbededashic Codinto yacnocquidon ambibi tantiaquin chuibancho tantiaquidquio nec, quepec Esus tantiesabo. Adecbidi, utsibo dacuēdampambo iquec, quiash uēdēequin Esuquidistu chuibenequidon Nuquin Papan chiaid chuibanubi cuesambo yacimboc mibitedishun chuibampec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. ¹¹ Esuquidistu chuibenequid yequi pistsēc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsēcquid dasiuidquid nebi. Adquiecbidi Esuquidistu chuibenequid utsibo iquec. Utsin mēyanded-mēyandedaid nebi. Quenenash iquenquio icquin capucuenequin Esuquidistu chuibenec nebi. ¹² Con pete bednuequin shubumpi nacnenquidquio iquec chonoadsho isquin utsibon mamēnshunaid nebi. Aden mamēnshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bēdamboen ista, Papa, quequin aido chiembi. Utsin mēyanaqui dayacquio yec cacuidanesa nebi. Adquidbidi Esuquidistu chuibenequid utsibo nec. ¹³ Adembidi, utsin ěbi mua uaquin chiaqui cuidnanenquiocquin bēdamboen chiembi. Adembidi ěmbi Esuquidistu chuibeniaqui icsactsēcquid nec, quequin ambi secanu caidbimboecnuc ěbi ispec. ¹⁴ Adecbidi, Bēdambo iquebi, quec mibitedi tabadnubi mēyamboc tsadebi. Adec ěbi tabadaid ěmbi chiac Codinto yacnocquido unēsquio yampec, quenquiocquin ěbi tabadaid mibitedi tantiamenuen dada uaombi. Pabadon chiaid abimbo iqueque. Bēdamboec tabadnuna mibi camenuen dada uaombi, con bacuēbo. Mibi tantiac unēsquio iquec. ¹⁵ Mibi chuibanquid utsi dadpen nēbi icnubi Esuquidistu ěmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ěbia yanshun Esuquidistu chuibanac mibitedi Esuquidistu tantiaquido yampondac. ěmbi chuibanacpaden chiaid tantiaquido con bacuēbo ěmbi caidtedi nec. Adquid mibitedi icnuc papa nebique. ¹⁶ ěmbi nacpadomboen naic tabadta quequin mibitedi chiembi. ¹⁷ Mibi ěmbi nacpadquiec tabadte tantiamenuequin Timoteyo mibi yacno nidmembi. Aidi ěmbi chuibanac Esuquidistu tantiaquid icpondash. Adquid iccondacsho ěmbi con mado caid aidi nec. Aidi Esuquidistu tantiaquidquio icquin utsi-utsiec yacnoshon ěmbi chuibeniacpadomboen chuibanuquid

Timoteyon mibi padpiden tantiamendac. Esuquidistu tantiaquid utsibo iccuededac-noshon chuibanacpadomboen ismequin chuibanquid aibdidi nec.

¹⁸ Mibi utsi-utsiec Pabado choainquio iquec quequin abimbo tantiacbimboen chuibanec. ¹⁹ Aden adquidon chuinubi Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. ²⁰ Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanc tabadquid nec. ²¹ ¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

Esuquidistu tantiaquid ambi chudtemaid chudquid cacumeta caid

5 Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaid-pembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. ² Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquio icquimbi aidi cacumepatecnëdan. ³ Mibëd ictiapimbo yequi mibëd yacbimboec-quin dada uaquin icsaquid cacumetiadquidi mibi nenëdac quequin chuibanombi. ⁴ Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabaton naden natsiash quequin ⁵ icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

⁶ Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisacbimboec mibitedi adquiobidi ictsiaic. ⁷ Ënden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Ëbi cuidmenquiocnoec abided cuidadec Esuquidistu unëspanëdash, quiash aid icsaisa yacpadquiec tabadta. ⁸ Aden ambi naid tantiec icsaondacpadpenquio yec ma tabadpanuna. Aidquio tantiemi, quec abimbo tantiadonec ma tabadtenepanuna.

⁹ Ambi chudtemaid chudquidbëd iccuededenda, quequin ënden dada uaondambi. ¹⁰ Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesa dadpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaid tantiaquid Esuquidistu tantiesa dadpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquio yec mibi tabadendac. ¹¹ Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaid tantiaquin ënesabëd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidën chuisho mamënshumënquin ënesabëd iccuededenda. Adecbidi, Esuquidistu tantiaquid nebi, qeshun cuesanquin ampequin ënesabëd iccuededenda.

Adecbidi, Esuquidistu tantiaquid nebi, quiash ěmbi chuibocpadquid icsaquidběd ic-cuededenda. Adembidi aidobědtan penda.

¹² ĤEsuquidistu tantiesa abi icsaid chuiquin cacumeta, quequindambi chuipe? Padenquo. Esuquidistu tantiaquid miběd icquid icsadenequin ěnenquiocsho isun Nuquin Papan chiaid comapenen tantiaquin mibi icsaid ěnta, quequin chui. ¹³ Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

Ĕbi chushcananaid tantiashun mimbi tantiacpaden chui caid

6 Esuquidistu tantiaquid daěd něishash chushcananec, queoaic. Adquid chuinu. Tantia. Něishash chushcananash Esuquidistu tantiesa yacno nidshun, Ĕbi chushquiaid chuisho tantiashun ĥmidapaden mimbi chieque? Ĕbi chui, quequin mimbi chuipec. ĤAtotsi quiash Esuquidistu tantiaquid yacno nidtiadquidi Esuquidistu tantiesa yacno nidshun mimbi adquid chui, cape? ² Yuecshun, ĤMida-paden mimbi Esuquidistu tantiesan naid chieque? Tantanu. Chui, abi tantiaquido Nuquin Papan caquien ĥnuqui chiapaden aido Nuquin Papan cuidendac, quequin tantienquioda mimbi icpe? Yuecshun tantiesan naid chiembi, qeshun ĤAtotsieshun Esuquidistu tantiaquidběd chushcananash tantiesa yacno nidshun mimbi chuibampe? ³ Yuecshun, ĤĔmbi uaido mayaněn naid midapaden mimbi chieque? Tantanu. Chui, Nuquin Papan caquien ĥnuqui chiapaden aido cuidendac, quequin tantienquioda mimbi icpe? ⁴ Adquidon naid ěmbi chiapadomboen Nuquin Papan cuidendac, quequin tantiaquin Ĥatotsieshun Esuquidistu tantiaquid daěd něishash chushcananasho tantiashun, Esuquidistu tantiesa yacno nidshun, Ĕbi chushquiaid chiacsho mimbi tantiacpaden ěbi chui, mimbi capec? ⁵ ĤEsuquidistu tantiaquid utsibo nibědpecta ictic? ĤEsuquidistu tantiaquiděn icsamboen chuinushe qeshunda Esuquidistu tantiesa yacno nidshun, Ĕbi chushquiaid chiacsho mimbi tantiacpaden chui, mimbi capec? ĤBědamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape? ⁶ Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsiběd chushcananaid mimbi chieque. Adenda.

⁷ Ĕbi chushcananaid ěbi daědshun chiacsho tantiashun mimbi tantiacpaden chui. Tantanu, quequid miběd icnuc Nuquin Papan bědamboequid icmiabicquid mibitědi nec. Esuquidistu tantiaquid utsin mibi icsamboen nasho isash Ĥatotsi quiash něishash chushcanampe? Adembidi, Esuquidistu tantiaquid utsin muaquin mitsana bedacsho isash Ĥatotsi quiash něishash chushcanampe? ⁸ Cuidnante bunec mibi adpec. Naden natiad. Ĕběd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiamequin Nuquin Papan chiaid chuiban.

⁹ ĤIcsadenequin ěnesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ěnesa Nuquin Papa yacno yuedtemaid nendac. Adembidi, Nuquin Papan uaidbimboecnuc nacnenaid tantiaquin ěnesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton běněpen chudmequin ěnesa, adecbidi dada daěd chichudnanquin ěnesa, adecbidi chido daěd dachudnanquin ěnesa Nuquin Papa yacno yuedtemaido nendac. ¹⁰ Adembidi, ampequin

ënesa Nuquin Papa yacno yuedtemaid nendac. Ademebidi, muaquin utsin na bedquin ënesa, ademebidi, ambi tantiacpadpenquiocquidën chuisho mamëshunquin ënesa, ademebidi, cuesunianquin ampequin ënesa. Adquido Nuquin Papan ambi abucshun nacnenaidën tabadtemaido nendac. ¹¹ Ënden mibi adquio iccondaïdi nëbi utsi-utsiec padenquio icsho isash Nuquin Papa mibi cuidenquio yec mibi icsaid bëpiscudac. Ademebidi, Nuquin Papan mibitedi bédambo icmëbanuequin abipadquid aton Mayan mibitedi meniac. Aidi meneshun Esuquidistu icsapenquiocquid isacpaden Nuquin Papan mibitedi isoaic.

Ëmbi chudtemaid chudmane qeshun adquid isuidteneta quiaid

¹² Ëmbi natemaid naden nata caid nibëdec qeshun naic bédambocquid ictiapimbo iquebi, quiash padenquio yec tsadebi. Aden nabanquin ëntiapimbo icmane quiash padenquio iquec tsadebi. ¹³ Matsesën chebudaid pucu yacno budash dada bédambo icmianquid nec. Yuecash matsesën dada chodquetequid nendac. Padnuen, ëbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbëd Nuquin Papa iquec. Ad icnuc mimbi chudtemaid chudquid icta, quenquio Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anëdënquequid nësecatequid nendac. ¹⁴ Nadatiambocquin Esuquidistu Nuquin Icbo Nuquin Papan uincuemëpanëdash. Aidëmbi nuquitsen abi tantiaquid icsho uincuemendac. ¹⁵ ¿Abi tantiaquid icquin, Esuquidistubëd daëdash tabadquid nebi, quequin tantienquioda mimbi icpe? Ai, aïdbëdi daëdtequid nuqui nec. ¿Adquidbëd daëdashtabi icsaquidbëd daëdoape? Padenquio iquebi. ¹⁶ ¿Dadpen chudmequid chudash daëdacimboecquid nec, quequin mibitedishun tantienquioda icpe? Aid daëdi dada abentsëc yacimboecquid nec, quequin Nuquin Papan dada uamiampid nec. ¹⁷ Nuquin Icbobëd daëdaïdien Icbon tantiacpadquieç tabadquid nec.

¹⁸ Ëmbi inacmaid chudmane qeshun chido utsi isuidteneta. Padenquio yec icsaquidbëd daëdquid mibi iquendac. Ambi chudtemaid chudquid aton namibëd ëquëducuësh daëdaïd nec. Nami umanucueësh icsaid namibëd daëdtiapimbo iquec. ¹⁹ Nuquin Papan Mayan tabadtequid Esuquidistu tantiaquido nec. ¿Nuquin Papan ëbëd tabadmiäid abipadquid nec, quequin tantienquioda mibitedishun icpe? Èbibi nuquin icbo nec, quetiäpimbo matses iquec. Adecbidi, Con icbo nibëdec. Ëmbi tantiacpaden naimbi, quetiäpimbo mibi iquec. ²⁰ Nuquin Icbo cuesten dectanac matses icsaquid icsho cuidnushe quiash abided cuidadec unësquid Nuquin Papan icmiac abi tantiaquid yec aïdën na mibitedi nec. Adoaidi ambi chiäpaden ismec bédamboec tabadteneta.

Dada chidobëdi daëdaïd

7 Nëbi mimbi dada uaboed isombi. Aid isun ëmbi tantiacpaden chiëmbique. Tantiäta. Chido inquid dadatedida ictiäd quequin mimbi tantiapec. Padnuen, Chido bedenquio iquëmbi, qesho chido inta cainda caimbi mibi. ² Esuquidistu tantiesä yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsëc inquid dada ictiäd. Adecbidi dada abentsëcshun inäid chido ictiäd. ³ Con chido ëmbi inäid nec, quequin äiduidi chudquid icta. Adecbidi con bënë ëbi inquid nec, quequin äiduidi chudmequid chido nec. ⁴ Chidon dada daëdash aton bënëd dadabidi nec. Adecbidi dadan dada chidon dadabidi nec.

⁵Aid daëdi daëdabi yac bimboec, Padi, quenda. Adboedi, Nuquin Papa chuinuec nëidtedi ushquin padenquoio nuqui iquec, queshun ënta. Aidtedec ushquin padenquiocshon, Ëmbi yuen ëntiapimbocsho isun Satanasën icsamenushe queshun padpiden nata. ⁶Ënta quenquoio iquebi. Nëidtedi ushquin padenquoio iquembi quiaash mibi daëdi aidtedecuidi ushec ënëdta caimbi. ⁷Padnuen, chido inesa ëbi yacpadec datedi icpashun. Dada utsi-utsiec Nuquin Papan icmiacpaden chido inquit icnubi utsi-utsiec chido inesa iquec.

⁸Chido inesa ëbi tabadacpadec dada utsitedi tabadec bëdambo ictsiashe. Adecbidi dadan inaidpen bëdambo ictsiashe chido. Dada bënua adecbidi bëdambo ictsiashe. ⁹Adquid icquin isuidtiapimbo yec comapenec chudte bunquin chido inta. Adecbidi chido bënua dada isuidtiapimbo iquec dadan inaid icta.

¹⁰Daëdash niamënenda. Ëmbibi chienquiocquin Nuquin Icbon aden chuinëdacpadembi chiembique. Tantia. ¹¹Min bënë nianash utsin inaid iquenda. Dadan inaid icnu quec mimbi niamboedën inaid icoata. Adembidi chido inquit min chido bunenquiocquin abi icsaid dada uashun ismequin nidmenda.

¹²Nëbi Nuquin Icbon naden chuiban cainquiocnobi ëmbia Esuquidistu tantiaquid icquin Esuquidistu tantiaquid utsibo ëmbi chuibocpadembi mibitedi chuioaimbique. Tantia. Dada aton chidobëdi Esuquidistu tantiesa icboedi aton bënë Esuquidistu tantiaquid yanuc aton chido padenquoio yec, Con bënë nianu, quenquoio ictsiashe. Adquid icsho isash. Con chido icsambocquid nec, quenquoio yec abëdi tabadquid bënë. ¹³Adecbidi chido utsi aton bënëbëd Esuquidistu tantiesa icboedi aton chido Esuquidistu tantiaquid yantsiashe. Aden Esuquidistu tantiashe, Con bënë icsambocquid nec, quenquoio yec bënë nianec nidesa chido. ¹⁴Esuquidistu tantiabi yec daëdacpadec aton chido Esuquidistu tantiaquid yanash aidbëd abentsëc yac bimboec tabadec bënë. Adec bëdamboec tabadsho isun Nuquin Papan chido bëdamboen tabadmequin bënëtsen bëdambo icmebampec. Chido Esuquidistu tantiaquid icquin aton bënë padenquiocnobi aton bacuëbo tantiec, Icsambocquidën bacuëbo nec, ut-sibo quenushe quiaash bënëbëd abentsëc yac bimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuëbo tantiec aton chido Esuquidistu tantiesabëd tabadquid dada. Adec abentsëc yac bimboec tabadsho isun, Bëdamboquidën bacuëbo nec, quequin utsibon ispec.

¹⁵Utsimbi ambi bedboedën aton chidon Esuquidistu tantiashe isun aton chido nidta catsiashe. Adoquien, Mibëd tabadte bunebique. Ëbi nidmenda, quetsiashe chido bënë caic. Adoqui, Nidec nid, cac cacuidenquoio yec nidquid chido. Chido utsibic aton bënë Esuquidistu tantiaquid yansho isash, Mibi nianu, quetsiashe. Adoquien, Mibi unësquoio iquec, quetsiashe bënë. ¹⁶Adnubien dadan nidta caid aton chido Esuquidistu tantiaquid yec bëdamboquid icsho isash Esuquidistu tantiaquidtsen yantsiashe bënë. ¿Adquid yantsiashe, quequin tantienquioda mimbi icpe? Adecbidi, chidon nianu caid aton bënë bëdamboquid icsho isash Esuquidistu tantiaquid chidotsen yantsiashe. Adecbidi ¿Adquidtsen yantsiashe, quequin tantienquioda mimbi icpe?

¹⁷Mibi Esuquidistu tantiaquid yanash Nuquin Papan tantiacpadec tabadnu quiaash adequi tabadta. Adomboembidi Esuquidistu tantiec iccuededquid utsibo chuibanombi. ¹⁸Esuquidistu tantiesa shui dëbid dëteshunaid yec Esuquidistu tantiaquid yanash ëbi shui dëbid dëteshunacmaid bimboecnuc nacnemenu quenquoio yec tabadta. Adecbidi, Esuquidistu tantiesa shui dëbid dëteshunacmaid yec Esuquidistu

tantiaquid yanash shui dëbid dëtemenu quenda. ¹⁹Shui dëbid dëteshunaidta nec, quenquo yec Nuquin Papa tsadec. Adecbidi, Shui dëbid dëteshunacmaidta nec, quenquo yec Nuquin Papa tsadec. Adquid nec quenquo yec, Ęmbi chiacpadomboen nadenequidta nec, quec Nuquin Papa tantiec tsadec. ²⁰⁻²¹Adec Nuquin Papa tantiec tsadnuc yua Esuquidistu tantiaquid yanash yuapen icnu quenquo yec tabad. Adecbidi, utsin yuapenquo yec utsin yua icnu quenquo yec tabadoa. ²²Yua Esuquidistu tantiesa icboedi Esuquidistu tantiaquid yansho isun, Yua nec, cainquo icquin Nuquin Icbon cuënendac. Adembidi, utsin yuapenquo Esuquidistu tantiesa icboedi Esuquidistu tantiaquid yanash Nuquin Icbon namiaidquo nendac. ²³Matses icsaquid icsho cuidnushe quiash abided cuidadec unësquid Esuquidistu Nuquin Papan icmiac aid tantiaquid iquec, Con icbo nec, quiash utsin yuaid iquenda. ²⁴Adembidi chuinu. Tantiata. Nuquin Papan mibi cuënuc matses yec Esuquidistu tantiaquid yanash, Ębëd tabadquid con Icho nec, quec matses yec bëdamboec tabadta.

²⁵Chido inesabëdta dadan inacmaid chuita quequin mimbi dada uaid isun aidot-sen chiembi. Aido tantiaquin naden chuita Nuquin Icbon cainquo yaqui Nuquin Icbon ëbi chuibeneta caid icquin naden mibitedi chiembique. Tantia. ²⁶Natiatiquid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. ²⁷Chido inquid yec chido inesa icnu quenda. Adecbidi, chido inesa yec chido inu quenda. ²⁸Chido inesa icboedi chido inquid yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobëdta con bacuëbo bëdambo icmepeba? quec chido inquid tabadec. Chido inesain aden tantienquo yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiembi ma natiamianquiec quenquo yec ma mibi tabadnueshun.

²⁹Ęmbi chuiboed mibi bëdamboen tantiamembique. Tantia. Nidaidën yuec tabadnu, quetiapimbo nuqui iquec. Nuquin Papa chieshënte ushë chonoc abi tantiaquid dadpen mëyansho isash Esuquidistu chote anoentsëqui yaneque. Abi yacno ut-sibo puduedtiapimbo icnushe qeshun min chido icnubi Nuquin Papa bunacpadomboen nabanec tabadta. ³⁰Adecbidi, unësquido yec shubiquimbi Nuquin Papa bunacpadomboen nabanec tabadta. Adecbidi, bëdambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquo yec Nuquin Papa bunacpadomboen nabanec tabadta. ³¹Yuecshun ëmbi nidaidënsnun bedaid Nuquin Papan ëmendac, quequin tantiaquin ambi chiacpadomboen nabanec tabadta.

³²Natiatiquid nibëdpashun, qeshumbic natiamiantequid iquendac, quequin tantiembi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu qeshun aden nabanec tabadpec. ³³Chido inquidien, Nuquin Papan tantiacpadenuidi nanu quiash, ¿mitsipadentsimbi con chidobëdta con bacuëbo bëdambo iquebi camepeba? quec tabadec. ³⁴Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bënën bëdamboen istsiashi, quec tabadec. ³⁵Aden mibi chuibanquimbi chido inesa chido bednu qesho, Chën, caisa nebi. Nuquin Papan chiacpadomboen nabamboedëmbi utsi uain tantianushe qeshun ëmbi tantiaid chuibanec nebi. Nuquin Papan tantiacpadomboen bëdamboen tabadmenuequin aden tantiaquin chuibanec nebi.

³⁶ Adembidi, Min champi bednu queboed chudte bunec mëmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuë tishtiapimbo yantsiash, quiash, Con champi inec cho, quiash icsatiapimbo adquid icoaic. ³⁷ Adecbidi, min champi inu queboedi, Bedenquio iquembi, qesho tantiashun menenda. Aden bedmenquio yec mibi bëdambo icpec. ³⁸ Con champi bedec cho, qeshun bedmiash, Bëdambo iquebi, quenubi, Con champi dadan inacmaid iquec quec bëdamboshë utsi icpec.

³⁹ Dadan inaid icquin min bënë nianenda. Min bënë unësan utsin inaid icnu quiash adta. Esuquidistu tantiesan inaid iquenda. ⁴⁰ Bënuu utsin inacmaid icnu quiash bëdamboshë iquec aid. Ëmbi tantiacpaden ëmbi chuiboed Nuquin Papan Mayanën tantiamiacpaden chiaid nec.

Nuquin Papan uaidbimboecnuc nacnenaid tantiaquin pambid dasanaid

8 Nëbi Nuquin Papan uaidbimboecnuc nacnenaid tantiaquin pambid dasanaid chuinnun naden chiembique. Tantiata. ¿Matsesën nacnenaidta nuqui tantiaid ic-tic? Padenquio. Aden tantiaquin ëmbi tantiacpadpenquio icquid utsibo nec quequin mamëshumpec. Aden tantiaquin mamëshunquin utsi tantienquio iquec. Utsien, Naden nabanquindambi utsibo bëdamboen tabadmepeba, quequin tantiaquidquio nec. ² Ëmbibi tantiembi quequid tantiabenabictsëcquid nec. ³ Nuquin Papa tantiaquidien Nuquin Papan tantiaidquio nendac.

⁴ Aden chuishun ¿Nuquin Papan uaidbimboecnuc matsesën nacnenaid tantiaquin pambid dasanaidtambi pepe? quequin mimbi chuiquin dada uaboed isun chuinnu. Tantiata. Nuquin Papan uaidbimboecnuc matsesën nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibëdquiec. ⁵ Nidaidën samëdquid papa cain utsin cuënaid dadpen iquec. Adembidi abuc samëdquid Papa cain utsin cuënaid dadpen iquec. ⁶ Papa cain nuquin cuënaidien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adembidi Nuquin Icho cain cuënaidquio Esuquidistu nec. Aidëmbi aton Papabëdtan abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuëmbanaido yec ambi tantiaido nuqui nec.

⁷ Adembidi aid abentsëqui nuqui tantiaidquio icnubi Nuquin Papan uaidbimboecnuc matsesën nacnenaid utsibon tantiaid iquec. Aden nacnenaid tantiaquin pambid dasanaid aidon pepec. Aden peboedëmbi Esuquidistu tantiaquid yanshun nacnenaid tantiaquin pambid dasanaid ëmbi pesho isun, Icsaosh, Nuquin Papan canushe, qeshun adquid petiapimbo yanebi. ⁸ Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesën nacnenaid tantiaquin pambid dasanaid penquiocsho isash, Aid bëdambocquid nec, quenquio Nuquin Papa iquec. Adecbidi, nacnenaid tantiaquidën dasanaid pesho isash, Aid bëdambocquid nec, quenquio icoaic Nuquin Papa.

⁹ Padnuen Nuquin Papan uaidbimboecnuc matsesën nacnenaid tantiaquin pambid dasanaid ëmbi bedshun pesho isash, Esuquidistu comapenen tantiaquidën tantiaid nacnenaid nec, Esuquidistu tantiabenabictsëcquid quenushe qeshun padenquio iquembi. ¹⁰ Aid pesho isash, Nacnenaid papa cain cuënaid nepec, qeshun, Aid tantiaquin ëmbitsen pambid dasanaid penu, quetsiash Esuquidistu tantiabenabictsëcquid. ¹¹ Padnuen ëmbi piaid Nuquin Papa tantiamianesa nec quequin mimbi tantiec.

Aden tantiaquin nacnenaïd tantiaquin pambid dasanaïd mimbi pec. Aden tantiaquin mimbi penubi Esuquidistu tantiabenabictsëcquidën Nuquin Papa tantiamiantequid nacnenaïd tantiaquin pambid dasanaïd nec, quequin pec. Esuquidistu comape-nen tantiaquid mibi icquimbi nacnenaïd tantiaquidën dasanaïd ëbi icsainquio icte-quid nec quequin pequin Esuquidistu tantiabenabictsëcquido mimbi icsameyoc. Mimbi icsamiaïdo tantiec Esuquidistu unëspanëdash. ¹² Ad icnuc Esuquidistu tantiabenabictsëcquid mimbi icsamequin Nuquin Icbon chiacpadomboen niacquid mibi neyoc. ¹³ Padnuen Esuquidistu tantiaquid utsibon icsamboen tantiaquin penushe qeshun padpiden penquio iquembi ma icsainquio icpanu qeshun.

Esuquidistu tantiaquidon natequid

9 Esuquidistu chuibeneta cacmaid Pabado nec quequidotsen chuïnu. Tantia. ¿Matsesën nata caïdtabi nedi? Padenquio. Esuquidistun ëbi chuibeneta caïd nebi. ¿Adquidida nepeba quecta mibi icpe? ¿Nuquin Icbon chiacpadomboen ëmbi chuibanac mibitedi abi tantiaquido yanenquioda ictionda? ² Ai, ëmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ëmbi chuibanacmaid icnubi, Ëmbi chuibanaïdo mibitedi nec, quequin tantiembi. Ëmbi chuibanac Esuquidistu tantiaquid mibitedi yanshun, Esuquidistun ëbi chuibeneta caïdquio nebi, quequin Pabado chïaïd abimbo iquec, quequin bëdamboen tantiaquidquio mibi nepec tantesa uainquiocquin.

³ Aden ëmbi Esuquidistu chuibanac abi tantiaquid mibitedi icquimbi utsin-utsinquien ëbi icsamboen chiec. Naden ëbi chieque. Tantia. Pabado Bednabebëd-tan chuibansho pemenuquodtiad, quequin chiec. Aden chiec onquequid ëmbibi tantiaquin naden aïdo chiembique. Tantia. ⁴ ¿Esuquidistu chuibanec bundoenquiod-abi icpe? ⁵ Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bëdambo iquec, mibi quec. Adembidi utsibon aton chido buanubi Petedon aton chido buansho isash bëdambo iquec quiashic Esuquidistu chuibanec ëbëd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ëbëd capuequi aton chido buante bunenquioda Bednabe icpadic? ⁶ Adembidi, ¿Mibi pemembique. Penuequin nabanenda, capenda Esuquidistu chuibenequid utsibo mimbi ique? Bednabebëdta ëbi chiec, ¿Penun daëdshun shubumpi nacnentiad, quepecta mibi ique?

⁷ Ad yenquio utsibo iqueque. Tantia. Chuïnu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icbo abi nashunquid aton tiedën caniquid pemesada nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. ⁸ ¿Aden chuiquin ëmbibi tantiaïdtambi chuiipo? Padenquio. Nuquin Papan Moises dada uamiampid ëmbi chïaïd nec. ⁹ Nad iqueque. Tantia. Chuïnu: “Min tiedën caniquid ëshë chicneshun min baca tsuc-tsucmequin dëpuquenda ma penu,” quequin Nuquin Papan chïaïdquio nec. ¿Bacanuidi ma penu quequin Nuquin Papan chïaïdta nepadic? Padenquio. ¹⁰ Matsesbëdtambi ma penu quequin Nuquin Papan chïaïdquio nec. Adembidi ambi piïaïd tantiaquin nabanquido icbo nec. Penuequin tiedën caniquid icbon taneshcaic. Adembidi, penuequin ëshëacsho bedquid icbo nec. ¹¹ Adembidi, ¿Nuquin Papan chïaïd mibi paquiacquid yec pete bec cho quenquiotiadquidtabi nedi? ¹² Mibi chuibanquid utsibo menebanquimbi ëbia mibi chuiquidquio icsho menetiadquidi menianenquio mibi icpoc. Aden ëbi menenquio yaqui ëmbi chïaïd

tantienquo icnushe quiash, Bec cho, quetiapimbo iquebi mibi caic. Aden chuibanec bundoquiec capuecuenec nebi. ¹³Nuquin Papa tabadte shubu uashunaid yacnoshon nashunquidën ashunquio peshun aquec. Adembidi ashunquio nashunquid utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbi icpe? ¹⁴Adomboembidi Esuquidistu chuibanesho abi tantiaquidon yuedec, quequin Nuquin Papan chiaid nec.

¹⁵Ëbi yuedtiadquidi nec, quequin tantiequi ¿adabi pemenun yuedpec? quesa nebi. Adembidi, Ëmbi dada uaid buamiacsho isun ëbi yuedtsiash, quequin dada uainquo iccombi. Bunquiec unësbedec mibi caic, Bec cho, quenquo iquendabi. ¹⁶Ëbibi Esuquidistu chuibenenu quenquiocobi. Ambi ëbi chuibeneta cac Esuquidistu chuibenec nebi. Abi chiesa yanash unësquo ictsiabi. ¹⁷Ëmbibi, Esuquidistu chuibenu, quiash, Bec cho, quetsiandabi. Esuquidistun ëbi chuibeneta caid yec ambi namiaidquio nebi. ¹⁸Esuquidistu chuidenesho isash, ¿atotsi Pabadon bedpash, quepecta mibi ique? Naden Esuquidistu chuibenec nebi que. Tanta. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bëdambo iquebi.

¹⁹Bec cho, quesa yec utsin yuacmaid nebi. Adquid yequi utsibo chuinuec nidanec shubu utsin puduedcuenequin aidon namiaidbimboecquin aibdëd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna. ²⁰Adecbidi, isadaidbo Esuquidistu chuibanuec aibdëd tabadquin mimbi natemaid ëmbi natemaidpenquo nec, quenquiocquin ambi natemaid nainquo iquembi. Adquiec tabadquin ëmbi chuibanac ma isadaidbot-sen Esuquidistu tantiaquido yampanuna. ²¹Adecbidi, isadaidpembo chuibanuec aido tabadacpadec abëdi tabadquin Esuquidistun chiacpadec niaquenquo yec tabadec nebi. Ëmbi adoac isadaidpembotsen ma Esuquidistu tantiaquido yampanuna. ²²Adecbidi, Esuquidistu tantiabenabictsëcquido chuibanuec ëmbi tantiabenabi iccondacpaden bëyuc tauain chiaidquio tantiamenuen chuibanec nebi. Ëmbi adoac ma aidotsen Esuquidistu tantiabenquidquido yampanuna. Adequi tabadquin Esuquidistu chuibanec nebi. Ëmbi adoac utsibo ma Esuquidistu tantiaquidquido yampanuna. ²³Adec tabadequi ma ëmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

²⁴Titinquecuedquido icnuc bëyuc abia titinquec choquid iquendac. Adquid icsho isun, Mibi badedquio titinquio, quequin titinqueta quequidën titinquec abia choquid menendac. Adembidi, Nuquin Papan menete bëda iquec. Aid bednu, qeshun Icbon chiacpadomben nabanta, caimbi mibi. ²⁵Badedquio titinquenuequid bedte bunaid chodquetequid icnuc, Aid bednu, qeshun abi bëdiactsëc titincamete pete icsa actequid icsabëdta isuidec titinquenuequid iquec. Nuquien chodquetemaid bednuequin icsaid isuidec. ²⁶Utsien, Bednu, quenquo yec titinquec. Adembidi, Bednu, quenquo yec utsibëd mëdanten senanu quequin nibëdac-noshombi mëdanten seded-sededec. Aden tantiaquin naisa nebi. ²⁷Utsibon ma tantianu qeshun Esuquidistu chuibenish unësacsho Nuquin Papan menete bëda bedtiapimbo icmane quiash icsaid mëmunec tsadebi.

Isadaidbon chieshampicpadec tabadenda quiaid

10¹⁻²Abi yacno abi tantiesa chosho puduedmenquo icchitoshe quiash Nuquin Papan chiaid chieshënenquo yec bëdamboec tabad, quequin tantiamenuen,

Nadec nuquin tsusedpabo tabadpampic, quequin chiembique. Tantiata. Equipito yacnoshon ambi mēnchicaidobēd Moises puduanec Nuquin Papan bēyucamiaid abu ushu tēdion nidanequin tsusedpabon Acte Piu potepampic. ³ Adec nidaniash yuecash aitedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. ⁴ Adembidi acte bundoacsho isun cuēnote cuesquin acte chomiaid acash, Ēbi bēdambo icmequin Nuquin Papan ambi yuecshun chometequid Quidistubēdtan nadatiambocquin naid nec, quequin tsusedpabon utsin-utsinquin tantiabempampic. ⁵ Aden tantiabenubien abēd icquid utsibon padenquo icpampic. Aden tantiesha Nuquin Papan nidaid Canan caid menenu caid yacno niduidequi unēsbudnepampic adquidtedi.

⁶ Tsusedpabo chieshampicpadquid icnushe qeshun Nuquin Papan aido chuiquin dada uamepampic. ⁷ Ad icnuc tsusedpabon Nuquin Papan uaidbimboecnuc nacneshun papa cain tantiampicpaden tantienda. Naden Nuquin Papan aido chuiampic. Bacabimboecnuc ambibi nacnenaid tantiaquin peshun acash baidacuededpampicpaden tantiaquin nainda. ⁸ Adembidi, tsusedpa utsibon ambi chudtemaid chudampicpaden chudenda. Aden nasho abi ushēmbi tsusedpabo dadpen 23,000ted Nuquin Papan cuesunemepampic. ⁹ Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unēsbudnepampic. ¹⁰ Adecbidi, Equipito yacnoshon mēnchicaido abi mēnchicquid chieshec nadpampic. Equipito yacno iquec bēdambo iccondaidi nēmbo choash bunec capuebi. Anobidi tabadec nidebi, queded-quededsho ambi abi yacnoshon uaid mayan bēdabo Nuquin Papan budmiaidēn aitedi cuesunepampic.

¹¹ Abi tsibanquido tantiamenuequin tsusedpabo tabadnēdaid icsa Nuquin Papan chuiquin dada uamepampid ěmbi chuiboed nec. ¹² Tsusedpabo Nuquin Papa chieshēnec icsapampicpadec icsamane quequin mibi tabadte tantiata. ¹³ Ēnden tsusedpabo chieshēmete icpampid abi iquec. Adaidd natiatequid icnuc chieshēnushe qeshun Nuquin Papan mibi tantiaquin uidēn uac mibi icsainquo yec chieshtoenquo yec dayacquio iquendac.

Nuquin Icbo Esuquidistu unēsaid tantiaquin acshumbic mayan icsa tantiaquin mimbi actiapimbo iquec quiaid

¹⁴ Nuquin Papan chiaid niacmane quiash, Nuquin Papan uaidbimboecnuc masesēn nacnenaid tantianu, quenda. Dacuēdec cuenacbimboec aid nanacno nidenda. ¹⁵ Tantiabenquid icsho mibi chiec nebi. Pabadon chiaid abimbo iquec quequin tantiec aid nanacno nidenquo yec Esuquidistu chuibansho tantiec iccuededteneta. ¹⁶ ¿Iccuededquin sicaid acnun Nuquin Papa chiec onqeshun acted-actedquin mases icsaquid icsho cuidnushe quiash abided cuidadec Esuquidistun intac chididiquiaid tantien icquinda nuqui acti? ¿Adembidi, pete cuēsh-cuēshun Nuquin Papa chiec onqeshun aton dada mēyanaid tantien icquinda nuqui pedi? ¹⁷ Esuquidistubēd abentsēc yacbimboecquido nebi, quequin tantiaquin pete cuēsh-cuēshun meniac abentsēcshun piacbimboen abi tantiec iccuededquidon pebededec.

¹⁸ Aden nuqui pebededacimboen isadaidbo icsaid cuidnuen nidaidēn capuquid-ded cuesuniaid pambid tauiquin Nuquin Papan shēdtequid pambid bedshun cuesunequidbēdtan nidaidēn capuquid icbon pepanēdash. ¹⁹ Aden ěmbi chiac ¿atotsi Pabado ěbi tantiamete bumpec, quepecta mibi ique? Mibi naden tantiamembique. Tantia. ¿Nuquin Papan uaidbimboecnuc masesēn nacnenaid tiboepecta iquec?

Padenquio. ²⁰ Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesën nacnenaïd yacnoshon pambid dasanec. Aden aid pambid penu, qeshun mayan icsabëd yacbimboecquid nebi, quequin pec. Adquidbëdtan penda. ²¹ Nuquin Icbo Esuquidistu unësaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unësaid tantiaquin pete peshun mayan icsa tantiaquin pambid petiapimbo iquec. ²² ¿Aid tantiaquin acshun pequin Nuquin Papa nëishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

Ëmbi natemaid naden nata caid nibëdec, quiash nanueboedi Esuquidistu tantiaquid utsi icsamemane quiash nainquiocte chiaïd

²³ Nëïd mishtemaid nec. Nëïd petemaid nec. Nëïd actemaid nec, quequin ëmbi chuitequid nibëdec, quiash Esuquidistu tantiaquid utsi icsamemane quiash nainquio yec tsadebi. Matsesën ambi nacnenaïd tantiaquin pambid dasanaïd ëmbi tantiacmaïd nec, quiash pambid dasanaïd petiadquio iquequi Esuquidistu tantiabenabict-sëcquidën, Nëïd nacnenaïd nuquin papa caïd nec, quequin penushe quiash penquio yec tsadebi. ²⁴ Utsi tantienquiocquin nacnenaïd pambid dasanaïd piash bëdambo iquebi, quenda. Naden natiad. Matsesën nacnenaïd pambid dasanaïd ëmbi pesho isun utsibon icsamboen tantiatsiash, quequin penda.

²⁵ Aton na sambededacno nidshun pambid bednuequin, ¿Nuquin Papan uaidbimboecnuc matsesën nacnenaïd pambid dasanaïd bedaidta nec? quenquiocquin bedta. ²⁶ Abu nidaidbëdta uashun aidënquio icquidtedi Nuquin Papan uampidquio nec. Aidtedimbo aton na nec. Nacnenaïd yacnoshon pambid sambededaid aton na nec. Aidën bacuëbo iquec aid pambid pequido mibi nec. ²⁷ Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesën nacnenaïd tantiaquin pambid dasanaïd bedaidta nec, quenda. ²⁸ Adnubien mibi puduedacno isedquid utsi Esuquidistu tantiabenabictsëcquid tsadquin, Matsesën nacnenaïd papa cain cuënaïd tantiaquin dasanaïd nëïd pambid nec, cac aid pambid penda. ²⁹ Ëmbi papa cain cuënaïd nec, quequin utsin tantianushe qeshun aid pambid penda. Matsesën nacnenaïd con pa nec, quequin cuënaïd tantiesä icquin ¿atotsieshumbimbi matsesën nacnenaïd tantiaquin pambid dasanaïd penquio iqueque? Chuinu. Tantia. ³⁰ Nuquin Papa ëmbi tantiaidquio icnuc penun aidi chuisho isash ¿atotsieshun matsesën nacnenaïd papa cain tantiaquin pepec utsibo quepec? ³¹ Edoen utsibo tantiamenuen bëdamboen nabanec tabadteneta. ³² Aden naic, Esuquidistu tantiaquid isadaïdbo isadaïdpembobëdta Esuquidistu bëdamboen tantiabemequiono, quec bëdamboec tabadta. ³³ Naden naic ëbibi bëdambo iquebi, quenda. Naden ëmbi nabanuc ëbëdi utsi bëdambo ictsiash, quequin tantiata ma Nuquin Papa yacno puduedtequid utsibo yanu qeshun.

11 Ambia tantiaquidën Esuquidistun icmiacpadquiec tabadec nebi. Adecbidi ëmbi chuiquin ismiacpadquiec tabadteneta mibitedi.

Nuquin Papa tantiaquin iccuededquin naïd

² Mimbä tantianëdaïdquio mibi nec, quequin mimbi chiaïd tantiaquin nabanec nebi, quequin mimbi dada uashun bëmiaïd isash bëdambo iquebi. Adembidi, Esuquidistu tantiabenëdaïdon chuibanäïd mimbi chiacpadomboen tabadec, quequin mimbi dada uaid bëmiaïdon chuibansho tantiash bëdambo iquebi.

³Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec. ⁴Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauet tabadquin, Ēbi chuiquidpenquo Esuquidistu nec, quiacbimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec. ⁵Chidoen, Ēbi chuiquid Esus nec, quequin ismec mapucudash tsadec. Adec mapucudenquo yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquo ictiad. ⁶Ēbi chuiquid nibēdec, quiacbimboec tabadsho matasmetiad. Matasmiash ma mapucudpanu chido. ⁷Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nēbi, quiaish tsadquid dada. Ēbi chuiquid Abia Yampid nec, quequin ismenuec aid chie onquec mauete mauesa dada nec. ⁸⁻⁹Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic. ¹⁰Adquid icmiac dada Ēbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnenquo yec Icbon chiapadquiec tabadec. ¹¹Nēid chido nec. Nēid utsi dada nec, quenubi nashunanquid abi daēdi nec. ¹²Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. ¹³¿Nuquin Papa chuinec Ēbi chuiquid nibēdeque. Matasadnu quiaish chido bēdamboda icpadic? ¹⁴Chido isadacpadec isadnu quec icsambo dada ictsias. ¹⁵Chido isadacpadec dada icsho isash, Chido nec, quetsias. Dada isadacpadec chido isadenquo iquec. ¹⁶Ēmbi chuiboed tantiash, Icsamboen chiosh, quetsias. Adquid naden chuinu. Tantia. ¿Ēmbentsēquidambi aden chie? Padenquo. Ēbipadquiocquin chuibenequidon adomboembidi chuibanec. Adembidi Esuquidistu tantiec iccuededquid utsibon tantiabedec.

Nuquin Ibo unēsash uincuenaid tantiaded-tantiadedta quiaid

¹⁷Adecbidi, Mimbi naidtedi bēdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquo yec mibi iccuededec. ¹⁸Abentsēc yacbimboec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quio. ¹⁹Nēidtedi Ēmbi bēdamboen isaido nec. Utsitedi Ēmbi icsamboen isaido nec, quiaish cuēshēdacbimboec mibi tabadcuededec. ¿Adec tabadshoda Nuquin Papan mibi bēdamboen ispec? Padenquo. ²⁰Adec tabadquin Esuquidistu unēste tantienquiocquin utsin-utsinquien peshun acted-actedec. ²¹Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paēmbocquid nua acash tantienquo yec tabadec. ²²¿Min nuntan pete nibēdpecta iquec? Mitsana iquec. Adec mitsana min shubuno icnuc ¿Esuquidistu unēste tantiec utsibobēd iccuedednu, quenquiocquina mibia choshon pebededpe? ¿Natiavianquiec pete nibēdchitec pete nibēdquid camenuenda mimbia pebedede? Aden pebededquido ¿atotsimbi chuipe? ¿Bēdamboen mimbi nabanec quepectabi iquec? Padenquo. Aden naquin Esuquidistu unēsaid tantienquiocquin mimbi pec.

²³Nuquin Icbon chiapadomboen mibitedi chuibanondambique. Tantiata. Chuinu. Nēid inchēshēmbi Ēbi chieshēnquido ēbēd icquidēn Ēbi bedmendac, que-

quin Esuquidistun abi unēste tantiaquin nadopanēdash. Pete bedshun ²⁴Nuquin Papa chuishun cuēsh-cuēshun naden abēd icquido chuipanēdash: “Pete cuēshaid bedash matses icsaquid icsho cuidnushe quiaish ēbided cuidadec unēste tantiaquin pebededta,” quepanēdash Esuquidistu. ²⁵Aden chuishumbic aid pebededsho isun pete utsi pebededquin nainshun adembidi dēshote bedshun sananquin naden Esuquidistun chuipanēdash: “Esuquidistu unēsquin ēbi chian anēdēnquiacno nēsecatequid icsho mēnchictequid Esuquidistu iquec, quequin tantiaquin sicaid acbededta. Sicaid acquin ēbi mēnchictequid iquec quequin tantiaquin acban.” ²⁶Aden Esuquidistun ismenēdacadomboen pete cuēshēmpi pebededshumbic sicaid acbededta. Nuquin Icho unēsaid tantiaded-tantiadedquin aid padpidec choabicnuc adobanta. ²⁷Abi unēste tantienquiocquin pete cuēshun peshun acquin Esuquidistun chiaid niacquid nec. ²⁸¿Pete cuēshēmpi penun Esuquidistubēd tabadacpadquictabi tabadpe? quequin mibi utsibēd tabadte tantiata. ²⁹Esuquidistu unēsaid tantienquiocquin peshun acquid Nuquin Papan cuidendac. ³⁰Aden adquidon peshun acac utsi-utsiec padishec; utsi-utiec daicsambo yanec; utsi dadpen ēnden unēsac. ³¹¿Adabi Nuquin Papan chiaid niaquenquio yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unēsaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquio iquendac. ³²Adesa icsho Nuquin Papan natiaic camiaid mibi iquendac. Abi tantiesabēdta chian anēdēnquequid nēsecadenquio mibi icmenuen Nuquin Papan mibi natiaic camec ma ēmbi chiacpadomboen nabamenuequin. ³³Adembidi Esuquidistu unēsaid tantianuec iccuededquin utsibo choabi iquec quequin aido cainta. ³⁴Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec. Padi. Esuquidistu unēsaid tantianuequin naden nata quequin chiombi. Mibi yacno nidash puduedshun ēmbi chuiboed daēd uain chiendambi.

Nuquin Papan Mayanēn tantiamiaid

12 Nuquin Papan Mayanēn tantiametequid chuinu. Tantiata. ²Ēnden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesēn ismec, Nēid papa cain cuēnaid nec, qesho tantiaquido mibitedi iccondac. ³Adquid iccondaidi Esuquidistu tantiaquid mibi yanacsho naden chiembique. Tantiata. Nuquin Papan Mayanēn tantiamiaido: Esus Nuquin Icbopenquio, Nuquin Papan Chomiacmaid nec, quetiapimbo adquido iquec. Adecbidi, Nuquin Papan Mayanēn tantiamiacmaido: Esuquidistu con Icho nec, quetiapimbo icoaic.

⁴Nuquin Papan Mayanēn, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsēcquiobi tantiamianquid Nuquin Papan Mayan nec. ⁵Adecbidi, utsi nashunquido Esuquidistu tantiaquido icnubi utsi nashunquidon Icho abentsēcquiobi Esuquidistu nec. ⁶Adecbidi, nadatiambocquin nabanquid utsi-utsiec icnubi Nadatiambocquin namianequid abentsēcquiobi Nuquin Papa iquec.

⁷Esuquidistu tantiaquid utsibēd tantiananquin namenu, quequin aton Mayan Nuquin Papan nuqui menec. ⁸Nuquin Papan Mayanēn tantiamiac ambia comapenen tantiaquidquio icquin chuibanquid utsi-utsiec iquec. Nuquin Papan Mayanēn tantiamiac ambi tantiaid chuibanquid utsi-utsiec iquec. ⁹Nuquin Papan Mayanēn tantiamiacpaden ēmbi chiacpadomboen Nuquin Papan naic, quequin tantiaquid

utsi-utsiec iquec. Nuquin Papan Mayanën tantiamiac bédamequid utsi-utsiec iquec. ¹⁰ Nuquin Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanën tantiamiac matses bédamboec tabadsho isash, Nuquin Papan Mayanën tantiamiaid nec, quequin tantiaquidquio utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac nidaidën icquid onquiacmaidën onquequid utsi-utsiec iquec. Adembidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. ¹¹ Aden Nuquin Papan Mayanën tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanën aden tantiamiec.

Dada abentsëc yacpadquiec Esuquidistu tantiaquidtedi iquec

¹² Uidënaid dadpen icnubi matsesën dada abentsëc iquec. Adquiobidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. ¹³ Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

¹⁴ Matsesën dada abentsëqui icnubi uidënaid dadpen iquec. ¹⁵ ¿Médantepadquidpenquio yec matsesën dada uidënacmaidta taë icpec? Padenquio. Dada uidënaid taë iquec. ¹⁶ Adecbidi, ¿ëshëpadquidpenquio yec matsesën dada dëccuësquiacmaidta dëbiate icpec? Padenquio. Dëbiate dëccuësquequid iquec. ¹⁷ Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? ¹⁸ Nuquin Papan tantiampicpadquiequi matsesën dada uidënaid nec. ¹⁹ Dëccuësquequid abentsëc icnuc dada nec quetiapimbo iquec. ²⁰ Uidënaid dadpembëd dëccuësquequid dadpen icnuc matsesën nami abentsëqui iquec.

²¹ Matsesën dada ad icnuc, ¿Médante bédambo icnubi ëshë padenquio iquec, quepecta mihi ique? Padenquio. ²² ¿Isadesa uidënaid uquëducquid nibëdnuc matsesën dada bédamboda icpatsiash? ²³ Uidënaid uquëducquid ismenquiocquin ompoaidquio utsi nec. ²⁴ Nami isaidquio ompodesa nec. Nuquin Papan tantiampicpadquiequi ompoaid nibëdnuc matses cuëdenquio yec unësec. ²⁵ Ad icnuc, Icsambo icmianeque. Tësnu, quetiapimbo icbo iquec. Ompoaid ompodesa aidbëdi iquec bédambo yec nashunanquid aitedi nec. ²⁶ Abentsëc paëmbo iquec matsesën dada bédambo iquenquio iquec. Adquidtedi bédambo iquec matsesën dada abichobi paëpenquio iquec. Adecbidi, Esuquidistu tantiaquido abentsëc yacbimboec iquec abentsëc icsacsho isash abitedi unësquio iquec. Abentsëc, Bédambo iquebi, quenuc aidbëd abitedi bédambo iquec.

²⁷ Adquidtedi matsesën dada abentsëc yacpadquiec Esuquidistu tantiaquidtedi aidën dada abentsëc yacbimboecquid nuqui nec. Abi tabadtequid iquec. ²⁸ Abi tabadtequid nadquid iqueque. Chuinu. Tantia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icsho isun nadece tabad quequin chuibanquin ismequid utsi iquec. Nadatiambocquin nabanquid utsi iquec. Bédamequid utsi iquec. Utsi nashumbanquid utsi iquec. Esuquidistu tantiaquid iccued-

edquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yac bimboec nuqui tabadec. ²⁹¿Esuquidistu tantiaquidtedida ambi ëbi chuibeneta caid icpadic? Padenquio. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquio. ¿Esuquidistu tantiaquidtedida, Nadec tabad, quequin ismequid icpadic? Padenquio. ³⁰Adecbidi, ¿Esuquidistu tantiaquidtedida bédamequid icpadic? Padenquio. ¿Esuquidistu tantiaquidtedida abi onquiacmaidën onquequid icpadic? Padenquio. ¿Utsi onquiacmaidën onquesho tantiaquidën tantienquicsho isun aidon onqueten onquequin chuibanquidtedida icpadic? Padenquio. ³¹Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuequin ëmbi abia chuibambocpadquid icte bunquiota.

Utsi tantiaquidquio

Ëmbi chuiboedtedi Esuquidistu tantiaquido Nuquin Papan Mayanën tantiamete bédambo iquec. Padnuen ambi tantiamequin bédamboshë icmetequid iqueque. Aid tantiauidquidba chuiboshombic aid tantiaquidquio chuinu. Tantiata.

13 Matses utsi-utsiecquid onquiacpadquieac anquiadquid, adecbidi Nuquin Papan abi yacnoshon uaid, mayan bëda onquiacpadquieac onquequid icquimbi utsi tantiesa icquin chuibansho abipenquio chuisho utsibon tantiendac. ²Utsibic, Nuquin Papan Mayanën tantiamiac chuibanquid adembidi Nuquin Papan chienquio icampid Nuquin Papan Mayanën tantiamiac tantiaquid aidi niosh. Aidëmbidi Nuquin Papa nadatiambocquin naquidquio nec, quequin tantiaquin, Mananuc macuësh dapa icboedi acte nantan nënitsinoa, Papa, cacpadomboen nënitsinoac nidquid isquid icquimbi utsi tantiesa icsho, Bédambocquid mibi nec, Nuquin Papan catiapimbo iquec. ³Utsibic, aton na nibëdsho menequidquio niosh. Adembidi, Esuquidistu tantiesa nebi cata, cac padenquicsho mëyanaid niosh. Adquid icquimbi utsi tantiesa icsho, Bédamboen mimbi naoc, Nuquin Papan catiapimbo iquec. ⁴Padnuen Nuquin Papan Mayanën bédamboshë ictequid tantiamiaid nadquio iqueque. Chuinu. Tantia. Utsi tantiaquidquio utsi tantiamequionec chushcanesa nec. Utsi tantiaquidquio nashundenequid nec. Utsi tantiaquidquio utsin na isash adquidquio con na bëpashun quesa nec. Utsi tantiaquidquio dëniacanquidquio yec dëniacanquidquio nebi abibi quesa nec. Utsi tantiaquidquio ëbentsëqui tantiaquidquio nebi quiacbimboen nabanesa nec. ⁵Utsi tantiaquidquio utsi icsamboen tantiaquin nabanesa nec. Utsi tantiaquidquio, Ëmbentsëqui tantiacpadomboenuidi utsitedishun nabantiad, quesa nec. Utsi tantiaquidquio badedquio nëishesa nec. Utsi tantiaquidquio abi icsamboen nasho cuidesa nec. ⁶Utsi tantiaquidquio utsi icsambocsho isash, Unësquio iquebi, quec tsadquid nec. Adecbidi, utsi bédambocsho isash, Bédambo iquebi quec tsadquid neoaic. ⁷Utsi tantiaquidquio utsi icsaid chienquio yec tabadquid nec. Utsi tantiaquidquio ambi nanaid nibëdsho isash ampiash badedquio quenquio yec ¿mitsimboembi nampoba? quec onquequid nec. Utsi tantiaquidquidënquio utsi icsadenesho isun, Tantiamiac Nuquin Papan chiacpadomboen natsiash, quequin chuibanendac. Aden chuishun bédamboen nasho isnuen cainquid nec. Mëyanaquí chieshenquio yec dayacquio yec tabadtenequid utsi tantiaquidquio nec.

⁸Utsi bédamboen tantiaid ënëdtiapimboctequid nec. Nuquin Papan chiaid chuibantsaidien ënëdendac. Adecbidi, matses onquiaidtedi ënëdendac. Adecbidi

Nuquin Papan ambi uaidtedi ëmiac matsesën isquin tantiaid ënëdoaic. ⁹Nabanaidtedi tantiabenabictsëcquidquio nuqui nec. Adecbidi Nuquin Papan chiampidtedi tantiabenabictsëcquidquio nuqui neoaic. ¹⁰Nidaidën tabadquin aitedi tantiabenabictsëcquidquio nuqui icboedi Nuquin Papa yacno puduedash abitedi tantiaquidquio nuqui iquendac. ¹¹Bacuë yec bacuëmpi onquiacpadec onquepadenebi. Adembidi, bacuëmpin tantiabenabi yacpaden tantiapadenembi. Adquid icquin caniaidën tantiacpadpenquiocquin tantiapadenembi. Adquid icboedi caniaish bacuëmpin tantiacpadpenquiocquin tantiabenondambi. ¹²Nëbi isnanten bëisadquin Nuquin Papabimboecquid nuqui isec. Yuecshun abi yacno puduedshun aidquiobi Edoen Nuquin Papa nuqui bëistuidendac. Nëbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bëisquin nuqui tantiabenendac aid.

¹³Nidaid ënëdnuc nëidtedi ënëdtemaid iqueque. Chuinu. Tantara. Ambi chiacpaden nabanquidquio Nuquin Papa nec, quequin tantiaid ënëdtemaid nec. Adecbidi Nuquin Papa yacnoësh abipadquid bëdambocquidquio iquendabi, quequin cainquin tantiaid ënëdtemaidquio nendac. Adecbidi, utsi tantiaid ënëdtemaidquio neoaindac. Aitedi ënëdtemaid icnuc nidaidën tabadquin, Utsi tantiembi, quequin ismiac utsi dadpen Esuquidistu tantiaquid yanash mibëdi Nuquin Papa yacno tabadendac. Adquid bëdamboshëcquid nec.

Mimbi chiaid chuibanquid ëbi icme, Papa, quaid

14 Utsi tantiaquid icta. Nuquin Papan Mayanën adquid icmiosi, quequin ambi tantiamete utsi bunquiebique. Adec bunsho mimbi chiaid comapenen bëdamboen chuibanquid ëbi icme, Papa, quequin chuiban. ²Aden tantiamiac tantiamenu qeshun tantianuequidën onqueten chuiban. Aton onqueten onquenuiocsho aidon tantienquio iquec. Padnuen onquiaidtedimbo Nuquin Papan tantieque. Aden nidaidën icquid onquiacmaidënquio Nuquin Papan Mayanën tantiamiacpadec onquequin Nuquin Papa chiec onqueta. ³Ma Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bëdamboec tabadnu qeshun chuibanec. ⁴Nuquin Papan Mayanën tantiamiac nidaidën icquid onquiacmaidën onquequin onquequiduidtsëqui tantiabenquid yanec. Padnuen Nuquin Papan chiaid Nuquin Papan Mayanën tantiamiac Esuquidistu tantiaquido ma Nuquin Papan chiaid tantiabenu qeshun chuibanec. ⁵Nuquin Papan Mayanën tantiamiac nidaidën icquid onquiacmaidën Esuquidistu tantiaquidtedi onquepashun. Aden chuishumbic adec onquenuiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabendac. Padnuen nidaidën icquid onquiacmaidën chuibanac tantianuequidën tantienquio iquendac. Aden tantienquiocsho isun abi daëdi onquiaid tantiaquin chuibanquid nibëdnuc nidaidën icquid onquiacmaidën chuibanenda caimbi.

⁶Adembidi chuinu. Utsibon tantia. ¿Mibi yacno choash puduedshun nidaidën icquid onquiacpadec onquenuiocquin ëmbi chuibansho tantienquio yec, Bëdambo iquebi, quecta mibi tabadpe? Padenquio. Nuquin Papan chiaid dada uamiampid min onqueten ëmbi chuibansho mimbi tantiamampec. Min onqueten chuibanenquio yec ëbibi onquiacbimboecsho mimbi tantienquio ictsiandac. ⁷Shoncatempi abibi shoncadtiapimbo iquec. Adembidi, aid shoncaisan shoncasho tantiatipimbo utsin iquec. Adembidi aid cuëdëmesan tentencate cuëdëmesho tantiaish, Adamboen cuëdëmenquio iccosh, quec. ⁸Adembidi, utsibo yacno ma cuesnanu qeshun chomenuequin

sondadoñ tantiabocpadpenquiocnoc shoncac choenquio iquec. ⁹ Adecbidi, utsi onquiacmaidën onquequin chuisho ¿mitsipaden tantiapatsiash? Utsibon tantienquio iquec. Aden chuibanec nibëdacno onquiacbimboec onquepec. ¹⁰ Onquete utsi-utsiec dadpen iquec. Aton onqueten onquequin chuibansho matsesën tantiec. ¹¹ Utsin onqueten chiac tantiatiapimbo yec, Onquequin chuibanquid con matsespenquio nec, quequin tantiec. ¹² Ad icnuc, Nuquin Papan Mayanën ëbi tantiamepec, qeshun, Esuquidistu tantiaquido ma tantiabenquido yampanu qeshun mimbi chiaid chuibanquidquio ëbi icme, Papa, quequin Nuquin Papa chuita.

¹³ Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquidon onquetenquio ëmbi chuiboed chuioaquid icme, Papa, ma tantiapanu, quequin Nuquin Papa chuita. ¹⁴ Nuquin Papa chiec ëbi onquiacmaidën onqesho utsibon tantienquio iquendac. ¹⁵ Aden abi onquiacmaidën onquequin utsibon tantienquio icsho ¿mitsipadentsimbi tantiamepe? Naden naimbi. Iccuededquido onquiacmaidën onquequin Nuquin Papa chuishumbic tantiamenun iccuededquidon onqueten onquequin chuibanoanuna. Adecbidi, iccuededquid onquiacmaidën Nuquin Papan naid chiec cuëdëdashic tantiamenuec iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanoatiapimbo icquin abi onquiacmaidën onquequin chuibanenquio iquembi. Adecbidi abi onquiacmaidën cuëdënenquio iquebi. ¹⁶ Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantiash, Mibi bëdambo iquec, Papa, quequin chiendac. ¹⁷ Abi onquiacmaidën onquequin Nuquin Papan naboed chuibanac Esuquidistu tantiadonequidquio mibëd iccuededquido yantiapimbo iquec.

¹⁸ Èbibi utsin-utsinquec onqueten onquequidquio icnubi mibitedi adesa nec. Padnueni adec onquec bëdambo iquec, Papa, quequin chuided-chuidedembi. ¹⁹ Padnuen chuinuec Esuquidistu tantiaquido iccuededacno puduedash ma tantianu quiash aton onquete daëdpactsëc tantiash anquiadquid icquin aidtedictsëqui chierendambi aido onquiacmaidën onquenquiocquimbi.

²⁰ Adembidi chuinu. Utsibon tantia. Bacuëbo tantiabenabictsëcquid yacpadquiec icsaid tantiesa icta. Ènden caniaidën tantiabenshun ismiacpaden bëdamboec tabadquin ismeta. ²¹ Nuquin Papan chiampid nad iqueque. Tantia: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin ëmbi chiacpadomboen nate bunenquio icoaposh,” quequin Nuquin Papan dada uamiampid nec.

²² Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenquid Esuquidistu tantiaquid icmetiapimbo iquec. Padnuen adec onquequin chuibansho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. ²³ Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidën abitedi onquecuededsho tantiash, Aidon tantiate icsabudpash, quepec. ²⁴ Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibansho tantiash, Icsaobi. ²⁵ Nëbi ëbi bëdambo icmequid Esuquidistu tantiate bunebi,

qeshun abi icsaid ambi chienquiochoed Nuquin Papa chiashic, Nëmbo iccuededquidobëd mibi iquec, Papa, quequin chuibampec Esuquidistu tantiaquid yanshun.

Abentsëcshun-abentsëcshunquien chuiban, quequin chiaid

²⁶ Adembidi chuinu. Adembi tantiata. Esuquidistu tantiaquid iccuededec cuëdënu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënu onquequin chuinu, utsi quenubien; mibi onquiacmaidën chuisho tantiombique. Min onqueten chuinu, utsi quetsiash. ²⁷ Aided, Chuinu, qesho ¿mitsicquid chuita nuqui cape? qeshun naden chiac bëdambo ictsiash. Chuinu. Tania. Mibi onquiacmaidën onquequin chuinuequid daëd icnuc bëdambo ictsiash. Abentsëc chotsëc-nuc adecbidi bëdambo ictsiash. Aided icquin abentsëcshun-abentsëcshunquien onquequin chuiban, cata. Aden abentsëcshun onquequin chuisho abi onquiaid tantiaquidën iccuededquidon onqueten chuibanta, cata. ²⁸ Padnuen abi onquiaid tantiaquin chuibanuequid nibëdnuc, Tsadquin Nuquin Papauidi otacquiocquin chuita, cata.

²⁹ Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daëd icnuc bëdambo ictsiash. Abentsëc chotsëc-nuc adecbidi bëdambo ictsiash. Aided icquin abentsëcshun chuibanubi, ¿Nuquin Papan Mayanën tantiamiacpadomboenda chuibanecque? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon. ³⁰ Abentsëcshun chuibanubi Nuquin Papan Mayanën tantiamiac utsi: Èmbitsen chuibanu, qesho tantiashun ma aidën chuibanu quiash ambia chuibanquid ënëd. ³¹ Adquidën iccuededquidtedi tantiamenuquin abentsëcshun-abentsëcshunquien chuibanta. Aden chuibansho tantiash ma chieshenquio yec bëdambo icpanu. ³² Nuquin Papan Mayanën tantiamiaid utsibëd bëdamboec tabadquid nec. ³³ Nuquin Papan tantiamiacpadequi utsi onquenubi onquenuio utsibo tabadec. Onquenu, utsi quenuc, Ai, onqueta, qeshun onquenuiocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

³⁴ Esuquidistu tantiaquido iccuededacno otacquio tabadquid chido. Chuibanacnoësh onquenu, quenda chido. Nuquin Papan chiapadec ëbi chuiquid dada nec, quec chido. ³⁵ Anoshon chiaid tantienquio yec tsadquin cainec shubuno nidash, Tantienuio iccombique. Nuqui tantiaboed ëbi chui, qesho tantiashun chiec aton bënë. Tantienuiocquin cainenquio iquec chido icsambo iquec. ³⁶ ¿Mimbia Nuquin Papan chiaid chuibanquidoda ne? Padenquio. ¿Chuibanac Esuquidistu tantiaquido mibitedictsëquida yanondac? Padenquio. ³⁷ Nuquin Papan chiaid chuibanquidquid nebi, mibi quenuc, Nuquin Papan tantiamiacpaden Pabaton chuibanquin dada uaid nec, mibitedi quepec. ³⁸ Aden mimbi tantianubi, Pabaton dada uaosh, quenuio utsibo icpec. Aido Nuquin Papan tantiamiacmaido iquec. Adquid icsho isun, Pabaton dada uaid nec, quequin tantiamenu, quenda.

³⁹ Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidën onquequin chuinesho, Ai, cata. ⁴⁰ Adecbidi, Nuquin Papan Mayanën tantiamiac chuibanuequid dadpen icnuc utsibo bëdamboen tantiamenuquin abentsëcshun-abentsëcshunquien chuibanta.

Esuquidistu uincuenaid

15 Adembidi chiembique. Tantia. Matses icsaquid icsho cuidnushe quiash abided cuidadec Esuquidistu unësaid ëmbi chuibansho tantiash, Ai, abimbo iquec. Aid tantiembi, mibi quiampondac. Aden tantiadonec chieshenquoio yec mibitedi tabadec. ² Aden, Aid tantiabenu, quesho Nuquin Papan mibitedi bëdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bëdambo icmebanacmaid nec. Adecbidi, ambi yuednu cacmaidquio adquid nec.

³ Utsin ëbi tantiamiacpaden mibi chuibanondambi. Adembidi chuinu. Tantia. Nuquin Papan chiacpadomboen matses icsaquid icsho cuidnushe quiash abided cuidadec Esuquidistu unëspanëdash. ⁴ Unësascho shëcuë nacenaidën nauedshun bëtashacsho daëdec ushtanquin ambi chiampicpaden Nuquin Papan uincuen uapanëdash. ⁵ Aden uincuemiac choquin, Uincuenobi, quequin Petedo Esuquidistun ismepanëdash. Adshumbic adembidi abëd 12ted icquido ismeoapanëdash. ⁶ Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanëdash. Aid uincuenacsho isquido dadpen abi tabadnubi utsi-utsiec padenquoio iquec. ⁷ Aden aitedi ismeshumbic aton utsi Santiacot-sen Esuquidistun ismeoapanëdash. Adshumbic, ambi ëbi chuibeneta caidtedi ismeoapanëdash. ⁸ Aden aido ismequin nainshun yuecshun ëbitsen ismeoapondashi. Icsactsëcquiocquid nec, quenquiocquin ismebenondashi tsyuecquio. ⁹ Abi tantiaquid mëyanquin cuesunemequidquoio icboedi abi tantiaquid yanacsho Esuquidistun, Ëbi chuibeneta, cainquioctiadquidëmbi adquid icta caid nebi. ¹⁰ Esuquidistu tantiaquid yansho isun ëbi chieshaid cuidenquoio yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenuiocnobi. ¿Ëmbentsëquidambi chuibenedio? Aton Mayan Nuquin Papan meniac aibdëd icquin chuibeniombi. ¹¹ Adembidi, ëbi yacpadquidon Esuquidistu chuibanac utsitsen abi tantiaquido yampondash.

Matses unësash uincuenaid

¹² Adec Esuquidistu unësash uincuenondash, quequin chuinubi ¿mitsipaden tantiec uincuenta nibëdec quec utsi-utsiec onquepec? ¹³ Uincuenta nibëdnuc Esuquidistu uincuenenquoio ictsempanëdash. ¹⁴ Esuquidistu uincuentequid icmiambocnoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. ¹⁵ Nuquin Papan naid chuibanquidtedi muaquidquoio icoatsiandac. Aden tantienquiocquin ëbi yacpadquidon chuibanendac. Unësash uincuentequid nibëdnuc ëbitedishun Nuquin Papan Esuquidistu uincuen uapanëdash quequin chiaid abipenquoio ictsiandac. Unësash uincuenta nibëdnuc Nuquin Papan uincuemiaid nibëdtsiandac. ¹⁶ Unësash uincuenta nibëdnuc Esuquidistu uincuentiapimbo ictsempanëdash. ¹⁷ Aid uincuenambo icnuc matses icsaquid icsho cuidnushe quiash abided cuidadquid Esuquidistu nec, cainquoio mimbi ictsiandac. Matses icsaquid icsho cuidnushe quiash cuidadquid nibëdtsiandac. ¹⁸ Aid uincuenambocnoc abia tantiaquido tsusedpabo Nuquin Papa yacno puduedtiapimbo ictsempanë-

dash. ¹⁹Nidaidënuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquo ictsiandac.

²⁰Ëmbi chuiboedtedi adtiapimbo iquec. Esuquidistu Nuquin Papan uincuen uapanëdash, quequin chiaid abimbo iquendac caimbi. Nuquin Papan ambi abia uincuemiaid abi yacno puduedmequin ambi uincuemetequid dadpen iquendac, quequin chiaid abimbo iquec. ²¹Unëstequid bëyuc dada yanampicpadec matses-
tedi adecbidi iquec. Adecbidi, unësash uincuentequid Esuquidistu yanacpadec abi tantiaquidtedi adquiobidi iquendac. ²²Bëyuc dada Adan caidën tsyuecquidtedi adecbidi unëstequido nec. Esuquidistun bëdambo icmiaid uincuentequido neoaic. ²³Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. ²⁴Aden bedoanquin abi tantiaquidtedi bëyucanec choquin Nuquin Papa Edoen caid ismequin, Nëidtedi min shubu abentsëquën tabadquido nec, quequin chierendac abi chieshënquidtedi chën quetiapimboenoc. Aido ambi nebudac bimboecquido iquendac. ²⁵Abi chieshënquido utsitedibëd chuiquid icquin abi chieshëntiapimbo-
cquid aido Esuquidistun icmebanendac. ²⁶Adoshombic ënquimbi unëstequid nibëdquidquo Esuquidistun icmeoaindac. ²⁷Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquo aton Papa iquec. ²⁸Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsëcquiobi nendac.

²⁹Unësash uincuentequid nibëdnuc, ¿atotsieshun, Ënden unësaid uincuenendac, quequin tantiembi quequin utsibon acten ambibi mentomepec? ³⁰Adecbidi unësash uincuentequid nibëdnuc ëbi unës uate utsibo comapenec buncuededsho isun ¿atotsieshun, Uincuentequid iquec, quequin ëbi yacpadquidon chuibampec? ³¹Unësash uincuentequid iquec, quequin tantiembi. Aden tantiaquin Esuquidistu, Nuquin Ico, ëmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unësmane quenquiocquin Esuquidistu unësash uincuenta iquec, quequin chuibenec nebi. Aden badiadquidën-badiadquidënquien chuibanubi ëbi unës uate utsibo bunec. ³²Uincuentequid nibëdnuc, ¿atotsi quenequini Epeso yacnoshon, Uincuenta iquec, quequin chuibanasho mëyanaqui chieshenquo yec dayacquo tsadpe? quetsiabi. Adecbidi uincuenta nibëdnuc: “Unësash nibëdquiec iquebi, quequin nua peshun aquembi,” quetsiabi. ³³Aden tantienquo iquembi. Adembidi tantienda. “Uincuenta nibëdec quequidbëd capuenda aidën tantiacpadec icmane quish.” ³⁴Adquidpadquid icquin mimbi icsamboen tantiaid ënquin Nuquin Papan chiaidquo tantiaita. Esuquidistu tantiec mibëd iccuededquid utsi-utsiec, Nuquin Papa nadatiambocquin uincuemianquidquo nec, quequin tantiesa nec. ¿Adquid mibëdi icnuc Nuquin Papan bëdambo icmiaido mibitedida icpe? Padenquo.

Uincuemequin dada chuca meniaid

³⁵¿Mitsipadec unësaid uincuempec? utsi quepec. Adecbidi, ¿mitsipadquid uincuentequidën dada icpec? utsi queoapec. ³⁶Adquidën icsamboen tantieque. Chuinu. Tantia. Mimbi tiedën chococaid tauibëd ëshë chococatequid napi dëyuctequidpadpenquo iquec. ³⁷Mimbi tiedën chococaid utsi-utsiec iquec. Adecbidi mimbi tiedën siaid utsi-utsiec iquec. Mimbi chococaid mimbi siaidbidi dëyuctequid utsi-utsiec iquec. ³⁸Nuquin Papan tantiampicpadec aton dada yanec. ³⁹Abipadquidpenquo

ambi uaidtedi iquec. Abipadquidquio matsestedi iquec. Abipadquidquio nidaidën capuquidtedi iquec. Abipadquidquio podochoquidtedi icoaic. Abipadquidquio acten icquidtedi icoaic. ⁴⁰ Abuc tabëcaid icnubi nidaidën icquid iquec. Abuc tabëcaid abipadquid chënqesho isec nidaidën icquid tabadec. ⁴¹ Badiadën ushë comapenquieç chënquenubi inchëshën ushë dauebudquio chënquec. Aid daëdi nua isadnubi uispa pistsëc isadoaic. Uispa utsi-utsieç iquec. Abi bedquec chënquetequid utsi-utsieçbidi iquec.

⁴² Aidtedi ënëndendac. Adecbidi tishac matses unësacsho chococac nami chodquec. Adec nami chodquian Nuquin Papan tantiacpadec uincuentequidën dada chuca chodquesa nendac. ⁴³ Tishac icsaquid matses iquec. Adsho uincuemequin ambi icsaisa icmiaid nendac. Nidaidëshun tishac chonoadec uimabudquid matses nec. Yuecash unësacsho uincuemiac uimabudenquiocquin nabanendac. ⁴⁴ Nidaidëshun tishac daicsambo yanash unësacsho uincuemequin dada chuca icmetequid nendac. Nidaidëshun tishac matsesën tantiacpadquid icboedi Nuquin Papan uincuemiac aidën tantiacpadquid iquendac.

Nidaidëshun tishac matsesën tantiacpadquid icboedi abuc buanac anocquidën tantiacpadquid iquendac. ⁴⁵ Adembidi Nuquin Papan chuiquin dada uamiampid nad iquec: “Bëyuc matses Adan caid naceneshun Nuquin Papan bushcac taëc tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. ⁴⁶ Nuquin Papan matsesën tantiacpadquidba icmiac Esuquidistu tantiaquid icsho isun abipadquid meniac icbon tantiacpadquid yanec. ⁴⁷ Bëyuc matses uanu, qeshun nidaid putu bedshun nacenaid nepampic. Bëyuc matses Adan caidën tsyuecquid Nuquin Papan abi yacnoshon budmiaid nepanëdash. ⁴⁸ Nidaid putu bedshun bëyuc matses naceneshun nidaidën tabadquid icmepampic. Adquieçbidi abipadquid matsestedi yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac. ⁴⁹ Adecbidi bëyuc matses isadacimboecquid nidaidën tabadquidtedi nec. Nuquin Papan abucshun chomiaid isadacimboecquid abëd icquido iquendac.

⁵⁰ Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquequid chodquetemaïd ictiapimbo iquec.

⁵¹ Nuquin Papan chienquiocpampid chuinu. Tantia. Abi tantiaquid unësabicquidbëdta ënden abi tantiaquid tsusedpabo dada chuca Nuquin Papan menendac. ⁵² Ambi namiaidën abucshun shoncanubi ëshë badedquio bëbedquiacimboecnuc badedquio unësesambo Nuquin Papan abi tantiaquido icmendac. ⁵³ Chodquetequid icboedi chodquesa yanendac. Unëstequid icboedi unësesa yanendac. ⁵⁴ “Adquid icmiac unëstequid nibëdquidendac.

⁵⁵ Ad icnuc ¿mitsishunquio unëstequid istuidpec? Adembidi, ¿mitsishunquio unësmetequid istuidpec?”

⁵⁶ Icsaquid unëstequid nec. Nuquin Papan nadomboen nata quequin chiaid niacquid icash unëstequid matses yanac. ⁵⁷ Adquid nuqui icsho isun Nuquin Papan Nuquin Içbo Esuquidistu chomeshun nuqui cuidenquiocquin aidi icsaisa cuidquin nuqui bëdambo icmebanec. Adoac abi yacnoësh icsaisa unësesambo nuqui iquendac. Aden Nuquin Papan naindac, quequin, Bëdambocquid mibi nec, Papa, quequin nuqui chuided-chuidendac.

⁵⁸ Adembidi chuinu. Tantiata. Adenuidi tantiaquin utsi uaquin utsin chuisho tantienquo yec tabad. Adec tabadquin Nuquin Papan chiacpadomboen naban Esuquidistupadquid Nuquin Papan ëbi icmendac, quequin tantiaquin.

Utsibo menenun piucquid bedbanaid

16 Nuquin Papan bédambo icmebanaid utsibo menenun mimbi piucquid bedbanaid chuiquin dada uaimbique. Isec onquecuededta. Nidaid Cadasia caid yacnocquido Esuquidistu tantiaquido ëmbi chuibanacpadomboen mimbítsen nabanta. Naden Cadasia yacnocquido chiombi. ² Abentsécshun-abentsécshunquien mimbi bedaid musucbudcuenshun dominco ushën mimbi musucacted dayun uata. Aton na daëdpectséc icquidën daëdpectséc dayun uanubi mitsana dadpen icquidën dadpen dayun uata. Aden musucbudcuenshun mimbi dayun uaid icnuc ëbi choacsho isash, ¿Tedsimbi menepeba? quenquo mibitedi iquendac. ³ Ëbi choshombic utsibo bédamboen tantiaquin piucquid dayun uaidtedi mimbi menenun buantan caido isun, Ëmbi isaido neque. Yuedta, quequin dada uashun aido menembi ma buanueshun. Aden ëmbi meniac buanquin utsibo ismetuidpec. ⁴ Adecbidi ambo nidtiadquo iquebi, ëbi quenuc mimbi menenun buantan caido ëbëdi nidendac.

Utsi-utsien chuibanaid

⁵ Nidaid Masedonia caid yacno Esuquidistu tantiec iccuededquid utsi-utsiec yacno isedbëquimbi mibi isbëtsenembi. ⁶ Aden isedbëequi mibi isedash tabadebi. Iquenoanquid chonobi mibëd tabadtsiabi. ¿Aid ënëdan nidnu, qesho, adabi utsi yacno mimbi nidmepatsia? ⁷ Nëbi mibëdi yuec tabadtiapimbo iquebi, quiash mibi yacno nidenquo iquebi. Yuecsh mibëdi yuec tabadnuc mibi yacno nidebi. Nuquin Papa bunuc adendabi. ⁸ Nëbi padenquo iquebi. Epeso yacnocquidobëd iquebi. Nuquin Papan abipadquid aton Mayan matses meniaid ushë tantiate choan nëuëshquo nidebi. ⁹ Nëmbo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibanesho tantiauidash utsibo ëbi chieshënquido nëmbo iquec.

¹⁰ Mibi yacno ëbi nidenquo icnubi Timoteyo mibi yacno nideque. Aid bédamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta. ¹¹ Nuquin Papan namiaidquiobidi Timoteyo icsho, Ëbëd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unësquo iquebi, quequin nidme ma ëbi yacno choanu. Utsibobëd Timoteyo choaic quequin cainec tsadebi.

¹² Nëbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobëdtan istanta, quequin Apodos comapenen chiombi. Adoac, Nëbi Codinto yacno nidte bunenquo iquebi, quiosh aid. Yuecsh Codinto yacno nidec bédambo ictsiash, quiash yuecsh aidi mibi yacno nidendac.

¹³ Icsamane quequin chieshenquiocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiatquid icnuc chieshtoenquo yec dayacquo yec tabadteneta. ¹⁴ Adec tabadquin utsi bédamboen tantiaquin nabanta.

¹⁵ Adembidi chuinu. Tantia. Nidaid Acaya caid yacno Estepanasën shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, qeshun adobanec. ¹⁶ Aidon namiaido icta.

Adembidi, comapenen nashumbanquidtedishun namiaido icta. ¹⁷ Codinto yacno Esuquidistu tantiec iccuededquidtedi ëbëdi ictiapimbocnobi mibi yacnoësh nëidtedi chosh. Estepanas yec Podtunato yec Acaico yec quec choash puduedsho isash bëdambo iquebi. ¹⁸ Mibitedi chuibanquin aidon unësquiocquidi bëdambo icmioshi. Mibi yacno padpidec nidash puduedshun chuibanquin adembidi mibitedi bëdambo icmendac aidon. Aido mibi yacno choacsho isun, Pabado chuibanquin mimbi bëdambo icmiacpaden nabanec tabadta, quequin chuiban.

Esuquidistu tantiaquidon mibitedi tantiaquin chuibanaid

¹⁹ Codinto yacnocquid mibitedi tantiec tabadebi, quequin dada uaqin chuita, nidaid Asia caid yacno Esuquidistu tantiec iccuededquidon cac chiemi. Adembidi, Aquidan aton chido Pidisdabëdtan chui cac chuioaimbi. Adembidi, aidon shubun Esuquidistu tantiec iccuededquidtedishun chui cac adembidi chuioaimbi. ²⁰ Aden utsibon chiaid chuishumbic, Esuquidistu tantiaquid utsibotedibëd bëdamboec tabadta, caimbi.

²¹ Ëmbi chuibanac ëmbi chiaid utsin dada uashumboed nec. Nëshun bedanquin dënainquin dada uaimbique. Tantia.

²² Nuquin Icbo tantiesa nëbimbobi ma Nuquin Papan comapenen cuidquin ma nësiatequid icpanuna. Adecbidi abi tantiaquido bednuec badedquio Esuquidistu chopashun, quec tsadebi.

²³ Ëbi icsaquid icsho cuidenquiocquin Nuquin Icbo Esuquidistuded Nuquin Papan cuidpanëdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

²⁴ Esuquidistun shubun icquido nuquibi icsho ëmbi bëdamboen isaïdo mibitedi nec.

Padi aïted dada uaombique. Isec onquecuedta.

CODINTO YACNOCQUIDON ISTE 2

1 Pabado nebi. Nuquin Papa bunacpadomboen Esuquidistun, Ĕbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ĕmbi dada uaid mibitedishun isbanshun utsibo meneta ma isnueshun.

²Mates icsaquid icsho cuidnushe quiash abided cuidadec Esuquidistu uněspanědash, quequin tantiaquiosho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

Bědambo icmianquidquio Nuquin Papa

³Nuquin Papa nad iqueque. Tantia. Chuinu. Ĕbi uněsquio icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. ⁴Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. ⁵Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac. ⁶Adembidi ěbipadquidobědtan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquio icmec, quec tabadta. ⁷Utsin měyanaid icquimbi Esuquidistu tantesa uainquio iquec, quequin mibi tantiec tsadebi. Ĕbi měyanacpaden mibi měnyansho isun Nuquin Papan bědambo icmiaid mibi iquendac.

⁸Nidaid Asia caid yacnoshon ěbi natiameboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocnoc natiamioshi. Adoac, Uněsebi, quiobi. ⁹Uněs uatiad, utsibo qesho tantias, Ĕbibi měnchiquidtiapimbocquimbi mates uněsacsho uincuemequiděn ěbi měnchictsiash, quequin tantiec tsadobi. ¹⁰Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. ¹¹Ĕbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiasun mimbi Pabado měnchicoc. Mibi bědambocquid nec, Papa, quequin ma dadpeshun ambi naid chuipanuna.

Něbi mibi yacno nidenquio iquebi, quiaid

¹²Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matesěn tantiamiacpadpenquio yec tabadobi. ¹³Ma tantiamenueshun abimbo chuiquin mibi dada uashunec nebi. Ĕmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun. ¹⁴Ĕběd Pabado bědamboec tabadosh, quequin tantiec bědambo iquebi, quec utsi-utsiec. Adecbidi, Codinto yacnocquido utsi-utsiec bě-

damboec tabadosh, quequin utsibon chuisho tantiash bēdambo iquebi. Esuquidistu choanuc adqueiqui Codinto yacnocquido tabadpashun, quec tsadebi.

¹⁵ Aden ēbi bēdamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bēdambo iquebi, quepashun, caimbi mibi. ¹⁶ Mibi isbidanec nidaid Masedonia caid yacno nidashic padpiden mibi isbētsenec choaibi. Aden isbētsenembi, qesho tantiashun nidaid Udeya caid yacno mimbi ēbi nidmetsiac, quequin mibi chiombi. ¹⁷ ¿Uquēducshun, Nidenquoio iquebi, quequin muaquindambi chuidio? Adenquiocquin chiombi.

¹⁸ Ambi chiacpadomboen nabanquidquo Nuquin Papa nec. Aid chuinu. Tantia. Abimbo chuiquidquo yec utsi yantiapimbo iquec. Adquidquoio icquin ambi, Esuquidistu chuibeneta, caidquoio yec adomboen chuiquid nebi. Utsi uain chuinu, qesa nebi. ¹⁹ Ambi chiacpadomboen nabanquidquo Nuquin Papan Madombo, ēmbi chuibeniaid, Esuquidistu nec. Aidi Sidasēn chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquoio yec utsi yantiapimbo iquec. Abi chuibenequidquoio adquidbidi nec. ²⁰ Con Madon naden naindac, quequin Nuquin Papan chiacpadomboen Esuquidistun ēnden nabanac. Aden abi nabanec. Ambi chiacpadomboen naquidquoio Esuquidistu nec, quequin tantiaquin ambi naid ēbipadquidon chuibanec. Aden chuibanac abi tantiaquidquoio yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. ²¹ Nuquin Papan tantiamiac: Esuquidistu tantiaquid nebi, quiash, Tantiesa nebi, quetiapimbo nuqui iquec. Adquid icmiac aton Madombo chuibanquid nuqui nendac. ²² Adembidi aton bacuē icmiaid nuqui nec. Adembidi aton Mayan Nuquin Papan meniaid nuqui nec. Ēbēd tabadquid aido nendac, quequin tantiamenuen Nuquin Papan aton Mayan meniac ma aidēmbi nuqui bēdambo icmepanueshun.

²³ Nuquin Papan tantianubi mibi yacno nidnu quiobi. Adashic, chushcachitomanē quiash mibi yacno nidenquoio iccobi. ²⁴ Ēmbi Esuquidistu chuibanac abi tantiaquid dadpen iquec. Aidon icbopenquoio nebi. Aidon icbopenquibidi Esuquidistu chuibanquid utsibo nec. Esuquidistu tantiec bēdambo iquebi ma quenu, quequin chuibenequidquoio nebi. Esuquidistu tantiaquid nebi, abimbo quequin aid tantesa uainquoio mimbi iquendac.

2 Aden tantiaquin comapenen chuiquin unēsquoio icmenushe quec mibi yacno nidenquoio iquebi caombi. ² Mibi unēsquoio ēmbi icmiac ¿tsuntsin ēbi bēdambo icmepatsiash? ¿Ēmbi icsambo icmeboedēnda ēbi bēdambo icmepadac? Padenquoio. ³ Aden tantiaquin mimbi iste dada uaombi ma ēbi bēdambo icmequid unēsquoio icmetiapimbo iquebi, qeshun. Bēdambo iquebi, quequin ēbi tantiec adquibidi mibi icoatsiac, quequin tantiombi. ⁴ Unēsquoio yec shubiquimbi mibi dada uashun, Meneta, caondambi. Unēsquoio icmenu, quenquiocquin mibi comapenen tantiaquin dada uaondambi.

Abi icsaboed bēpiscudnueshun yued quiaid

⁵ Anocquidēn ēbi unēsquoio icmedenequimbi adembidi comapenquieic unēsquoio mibi icmeoaosh. Aidi mibi chiondambi. ⁶ Aidi mibi dadpenshun cacumiac abi icsaid ēnosh quec. ⁷ Adoacsho abi icsaid bēpiscudshun aidi yuedoquin bēdambo icme. Yuedenquoio yac natiamianquieic unēstiadquoio yantsiash. ⁸ Nuquibi iccuedednuna, quequin aid tantiaquin yued caimbi. ⁹ ¿Ēmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi. ¹⁰ Aden ēmbi

dada uacpaden mimbi cacumiac abi icsaid ënsho isun abi icsaid nibëdacimboec bëpiscudshun yued. Adsho tantiashun adomboembidi naimbi. Aidbëdi abentsëc yacimboecquido yanosh, qesho tantiash abi icsaid bëpiscudebi Esuquidistun tantianubi. ¹¹ Nuqui chieshënkuidën Satanasën aidi icsamenushe qeshun abi icsaid ëmboed yuedta. Yuedenda, Satanasën quequin tantiamiac onqesho tantienda.

Nuquin Papan con Mayan meniaid adquid ëbëdi tabadtequid nec, quiaid

¹² Esuquidistu chuibanuec shubu dadpen icquid Todoas caid yacno ëbi chonoc, Tantianu, quec cho-choquid dadpen icpondash. ¹³ Adquid dadpen icnubi ëmbi con utsi caid, Tito, mibi yacnoësh choabi icnuc ambo yuec tabadtiapimbo iccobi. Adash, Bëquednu, quianec nidaid Masedonia caid yacno nidoapobi.

¹⁴ Bëdamboquid mibi nec, Papa. Mimbi Esuquidistu tantiaquid ëbi yacpadquido icmeshun mimbi, Esuquidistu chuibeneta, caid ëbitedi nec. Ëmbi chuibanaid noadte bëdabimboecquid nec. Noadte bëda pushudec noadsho uano-uanoec tabadquidon shëdec. Adembidi, Esuquidistu ëbi yacpadquidon chuibenesho uano-uanoec tabadquidon tantiec. ¹⁵⁻¹⁶ Esuquidistu chuibanac noadte bëdan danoshquiaid shëdacimboen utsibon tantiec. Adembidi, Esuquidistun ëbi chuibeneta caido Icho isacimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ënëdenquio yec abëd icquido aidtedi iquendac. Aden nuqui isquin Esuquidistu tantiesha icsho Nuquin Papan nësiatequid iquendac. ¿Tutsi Esuquidistupadquidquio icpec? Adquid nibëdec. Adesa icsho ambi, Ëbi chuibeneta, caidquio nebi. Adquid icquin chuibenenubi ¹⁷ piucquid bedte bunquin utsin-utsinquien Esuquidistu chuibanec. Adesa ëbipadquido iquec. Piucquid bednuequin ëbi yacpadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

3 ¿Pabado bëdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bëdamboec tabadquin Esuquidistu Pabadon chuibanosh, quequin dada uata, ëmbi cac mimbi dada uaidtambi buampe? Padenquio. ² Mibëdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chëshëten pinchuquën tansiabimboecnuc paucudtiapimbocon Nuquin Icbon tantiamioshi. Adembidi icsamboec tabadboedi nëbi bëdamboec tabadsho isun Pabadon Esuquidistu chuibanaido Codinto yacnocquido nec, quequin adomboembidi tantiabededec utsibon. ³ ¿Abi tantiaquid icsho isun bëdamboec tabadmenuequin ambi cuënote bedshun dada uampicpadquidta mibi meniondash? Padenquio. Esuquidistu tantiasho isun unëstiapimboquid aton Mayan abipadquidquio mibitedi meniondash.

⁴ Nuquin Papan tantiacpadomboen Esuquidistun, Ëbi chuibeneta, cac chuibanac Esuquidistu tantiaquid mibitedi yanacsho tantiec ëmbi chuibanaido aidtedi nec, quequin tantiemi. ⁵ Ëmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiemi. ⁶ Ëmbibi Esuquidistu chuitiapimbo icsho Nuquin Papan Mayanën tantiamiac Esuquidistu chuibenequidquio nebi. Ambi, Nadomboen nata, quequin dada uamiampicpadomboen chuibanta caidpenquio nebi. Ambi nadomboen nata, quequin dada uamiampidtedi natiapimbo yec aidbëdi matses tabadtiapimbo iquec. Aton Mayan meniaidbëd tabadtequid nec.

Abi tantiaquido bēdambo icmetequid aton Mayan

⁷Nuquin Papan nadomboen nata quequin chiaid cuēnoten dada uacpaden nainquio yec matses abi yacno tabadtiapimbo iquec, quequin dada uampid meniac abi chēnquiapadec Moisesēn bētantiante comapenec bēchomauanqueic chēnqueboedi macuēsh budec bēdiambo chēnquesho isadaidbon bēstiapimbo icpampic. ⁸Nēbi Esuquidistu tantiaquid bēdambo icmetequid aton Mayan abipadquid meniaid ēnēdenquiocquidquo nec. ⁹Ēmbi nadomboen nata quequin chiaid niacquid ēbēdi tabadtiapimbo iquec, quequin dada uaid Nuquin Papan meniac buanshun Moisesēn aton matses ēnēdenquiocnoc tabadmetiapimbo icambien matses icsaid bedshunash icsaisa abided cuidadec unēsash uincuenquidēn abi tantiaquido ēnēdtiapimbocnoc tabadmendac. ¹⁰Nēbi Esuquidistu unēsaid tantiaquid ēnēdtiapimbocquid nec, quequin chiac ambi dada uaid meniampid ēnēdacbimboecquid nendac. ¹¹Ai, nadomboen nata quequin chiaid Moisesēn bedshun meniaid ēnēdtequid icnubi bēdambo icmiantequid Nuquin Papan chomiaid icsaisa ēnēdtiapimbo iquec.

¹²Aden tantiaquin, Esuquidistu nuqui tantiaid icsaisa yec ēnēdtiapimbocquid nec, quequin chuibenequid nebi. ¹³Moises Nuquin Papabēd onquec bēchomauanqueicboedi auēshquio nidec ushma-ushmactsēcquio yanash matses ismenquiocnuec bēpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec. ¹⁴Nuquin Papan dada uaid Moisesēn bēaid tantiate bunesa abēd icquido icpampic. Adquiobidi pamumēdacbimboec isadaidbo abi tabadec. Nuquin Papan cuēnoten dada uacpadquid isec onquec nēbi adquiobidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac. ¹⁵Nadomboen nata quequin dada uaid Moises menepampid isec onquec pamumēdacbimboecquid isadaidbo utsi-utsiec iquec. ¹⁶Esuquidistu tantiaquid icsho Nuquin Papan Mayanēn paucquin tantiamiaid nendac. ¹⁷Nuquin Icbo icsaisa icquin ēnden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. ¹⁸Paucac, Ēbi icsaid bedshunash Esuquidistuded cuidadpanēdash, quequin nuqui tantiec. Aidēnquiobi icsaisa icquin abipadquid nuqui meniac aton Mayanēn adquid nuqui icmebanec.

Nuquin Papan nadatiambocquin nadenequin Esuquidistu chuibenemiaid

4 Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec. ²Icsash ompodquid icboedi nēbi muesa icquin Nuquin Papan chiaid utsi uainquio yec nuqui bēdamboec tabadec. Nuquin Papan isec, quec adequi nuqui tabadec. Adec tabadec ēbipadquid utsi yansho isash Nuquin Papan chiaid tantiate utsibo bunquiopec. ³Esuquidistu chuibansho utsin-utsinquien bēdamboen tantiatiapimbo iquec. Adquid Nuquin Papabēd tabadtiapimbocquid nec. ⁴Nuquin Papapadquid Esuquidistu tantiaquid icnushe queshun icsamianuequidēn Satanasēn pamunacbimboen utsi-utsien tantiamenquio iquec. ⁵Ēmbibi naid chiesha nebi. Matsesēn Icbo Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. ⁶Abitedi uanuna, queshun, “Inchēshquio icboedi uēshēmbo yanquiota,” capampic Nuquin Papan. Adomboembidi Nuquin Papan chiaid pamumēdacbimboen tantienquiocboedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

⁷ Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi. ⁸ Aden chuibansho mëyanaqui abi chuibenec nebi. Padpiden-padpidemboen natiamiaqui, ¿Atotsimbi napeba? qesho Nuquin Papan dayacquio icmedenebi. ⁹ Èbi chieshënquid dadpen icnubi èbi bëdambo icmequid aidi iquec. Comapenen cuestanec, Unësec, qeshun nianaqui abi Esuquidistu chuibenembi. ¹⁰ Esuquidistu mëyanquin unës uacpaden mëyanquin unës uatsen-unës uatsenshobi dayacquio icmedenioshi. Adoacsho uincuenaidën dayacquio icmedeniaid nec, quequin utsibon isbededebi. ¹¹ Adembi Esuquidistu chuibansho unës uatsiashi, quequin chuibenec nebi. Aid chuibansho unës uatsenaqui abipadquid unësesa yanebi, quec bëdamboec tabadebi. ¹² Aden tantiaquin aid chuibanac abi tantiaquid yanash aibëdi tabadec unësesa mibitedi yanendac. ¹³ Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. ¹⁴ Aden tantiaquin Nuquin Papan Esuquidistu uincuemiacpaden aibëdi tabadmenuen mibitedibëdtabi ëbëd icquidtedi uincuemendac, quequin chiembi. ¹⁵ Aid tantiaquid ma mibi icpanuëshun chuibansho mëyanaid nebi. Mëyanaqui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bëdambo iquec, Papa, quequin ma Nuquin Papa utsibon chuipanuna.

¹⁶ Aden tantiec dayactiapibi quenquio iquebi. Tsusio budquimbi badiadquidën badiadquidënquien Esuquidistu tantiadonequidquio yanebi. ¹⁷ Natiamiantequid ënëdendac. Natiamiaid yashic Nuquin Papa yacno tabadec bëdamboshë iquendabi. Esuquidistupadquid icsaisa yec unësesa yanash ënëdtiapimbo iquendabi. ¹⁸ Aden tantiec, Èbi natiamiaid iquec, quiashic, Nuquin Papabëd tabadendabi, quequin comapenen tantiec tsadebi. Èmbi isaidtedi ënëdendac. Nuquin Papa yacnocquid ëmbi isacmaidtedibëd ënëdtemaid iquendabi.

Nuquin Papabëd tabadte iquendac quiaid

5 Con nami shëniбудаш unësash nibëdnuc Nuquin Papabëd tabadec nami chuca uaid iquendabi. Nami chuca uaid ënëdtemaid matsesën nacenacmaid nec, quequin tantiembi. ² U abucquio nidabi yec uëshquequid nebi. Adquiocsho nami chuca uaid ënden meniondac, Cuishon, quetsiabi. ³ Aden meniac ëbibimboec isadsho isendac, quec tsadebi. ⁴ Nami chodquequid icnuc uëshquec nuqui tabadec. Nami chuca uaid chodquesa menepashuni mabi unësesa icpanu quec nuqui tabadec. ⁵ Con Mado Esuquidistu tantiaquid ëbëd abuc tabadmenuen ëbipadquid unësesa icmenu, quequin Nuquin Papan aton Mayan menetequid nuqui nec.

⁶ Aton Mayan meniaid iquec nami chodquetequid abi iquequi chieshenquio yec dayacquio yec nuqui tabadec. Adec tabadash abuc Nuquin Icbobëd tabadendabi, quequin nuqui tantiec. ⁷ Aton Mayan meniac nuqui isacmaid Esuquidistu cainec nuqui tabadec. Èmbi isaid ëmbi caintemaid nec. ⁸ Aden aid cainsho nami chodquesa badedquio menepashuni. Aden meniac Nuquin Icbobëd iquendabi, quequin nuqui tantiec. ⁹ Aden tantiec nidaidën tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiembi. ¹⁰ Adembidi abi tantiaquidtedishun naid ambi chuibante ushë chonoc Nuquin Icbon chuibanendac, quequin tantiembi. Utsi-utsien, Mimbi bëdamboen nabanoc, quequin chuibanendac abitedishun naid cuidquin.

Ma utsibotsen abi tantiaquid icpanu quequin chuibanaid

¹¹ Aden ambi tantiacpaden nabansho, Bëdamboen mimbi nabanoc, Nuquin Icbon ëbi caindac, quequin tantiaquin ma utsibotsen Esuquidistu tantiapanueshun mibi chuibenec nebi. Aid tantiaquin nabanec bëdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi. ¹² Aden tantiaquin, Mibi bëdambo iquec, ëbi camenuen mibi dada uashunquio iquembu. Èbi chienquiocquin, Bëdamboec tabadquin ismiacbimboecquidën ëbi icsamboen chuisho aido chuita, quequin mibi dada uashunembi. ¹³ Aido, Pabado tantiate icsabudosh quec. Adembidi, Nuquin Papan chiacpadomboen ëmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu qeshun aid chuibenec nebi utsibon chuibenenquiocnobi. ¹⁴ Chian anëdënquequid icsamboquid nësianushe quiash matses icsaid bedshunash abided cuidadec icsaisa Esuquidistu unëspanëdash, quequin ma utsibon tantiapanueshun chuibenec nebi. ¹⁵ Ma ëmbi naid chiac ëbi tantiaquido ma ëbëdi icpanu, quiash unësash uincuempanëdash Esuquidistu.

¹⁶ Adec unësash Esuquidistu uincuempanëdash, quequin matses unësash uincuenta iquec, quequin abi tantiaquidon tantiec. Ènden, matsesquio Esus nec, quiondaidi nëbi, Nuquin Papan Chomiaid yec matses tantiec unësash uincuempanëdash, quequin tantiembi. ¹⁷ Abi tantiaquid ambi tantiamiaid nec. Ènden matsesën tantiacpadquiec icboedi Esuquidistun tantiacpadquiec bëdamboec tabadec abi tantiaquidquio. ¹⁸⁻¹⁹ Nuquin Papan ëdenquimboshë tantiampicpaden Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided cuidadec Esuquidistu unëspanëdash, quequin tantiaquin ma aidquio utsibon tantiapanu qeshun ambi naid nuqui chuibenec. ²⁰ Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Èbi icsaid bedshunash Esuquidistuded cuidadpanëdash, quequin abëd icnuequin aid tantiaquiota. ²¹ Ambi cuidtiadquid nuqui icnubi Esuquidistu icsaisaded Nuquin Papan cuidpanëdash ma Esuquidistu ambi cuidaidpadquid tantiaquidtedi icsaisa yampanueshun.

6 Matses bëdambo icmenu, quequin Nuquin Papan chiaid bëpiscudmane qeshun ambi tantiamiacpaden nabanec tabadta. ² Nuquin Papan chiampid chuinu. Tantia.

“Mibi bëdambo icmete ushë chonoc cuënsho tantiombi.

Tantiesha icboedi nëid ushënquio mibi tantiamiombi.”

Aden Nuquin Papan chiampicpadomboen bëdamboen tantia. Nëbi Nuquin Papan bëdambo mibi icmenu cac, Ai, cata. Nëid ushënquio ambi aton bacuë icmete ushë nendac.

Pabado natiamiaid

³ Icsamboec tabadquimbi Pabado Esuquidistu chuibansho, Tantiatiapibi, utsibo quetiapimboec bëdamboec tabadec nebi. ⁴ Nuquin Papan chuimiaid yec naded tabadebi: Chieshenquio yec dayacquiocquin ambi chiaid chuibenec bëdamboec tabadec nebi. Natiamiaid yec adequi tabadebi. ⁵ Utsin cuesaqui adequi bëdamboec tabadebi. Quënën nauedaqui adequi bëdamboec tabadebi. Nuquin Papan chiaid ëmbi chuibanac cuesnanubi padenquio yec bëdamboec tabadebi. Natia chonoadbudequi adequi bëdamboec tabadebi. Utsi tantiaquin nabanec natia ushcasequi

adequi bēdamboec tabadebi. Bunquieci bēdamboec tabadebi. ⁶Icsainquo yec bēdamboec tabadebi. Nuquin Papan chiaid tantesa uainquo yec bēdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenece nebi. Naden chiac tantiatsiash, qeshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquiocquin utsi abimbo tantieci adecbidi tabadebi. ⁷Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibon abi icsaid ēmanueshun. ⁸Ēbi chieci: Pabado bēdambo iqueci, quenubi adequi tabadebi. Utsin ēbi chuioaic: Pabado icsambo iqueci, quenubi adequi bēdamboec tabadebi. Ēbi icsamboen chuinubi adequi bēdamboec tabadebi. Ēbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi. ⁹Ēbi isquidēmbi, Ēmbi isacmaid Pabado nec, caqui ēmbi chuibanesho tantiaboedo nec caimbi. Ēbi unēs uate bunubi abi chuibanec capucuenembi. Mēyanaqui unēsabi yec nidebi. ¹⁰Unēsquo icmiaqui Esuquidistu tantieci bēdambo iquebi. Con na nibēdsho isun adembidi Esuquidistu chuibanec nebi ma Esuquidistu tantieci utsibo bēdambo icpanueshun. Con na nibēdsho isash Nuquin Papan bacuē yec aton natedi con na nec, quequin tantieci tsadebi.

¹¹Chuitiapibi, quenquiocquin ēbi natiaboedtedi mibi chuibanombi. Mibi comapenen tantiaquin ēmbi nabanaid mibi chuibanombi. ¹²Mibi tantiaquiocquin chuibanquid ēbi icnubi ēbi tantiaquin chienquo mimbi iqueci. ¹³Pabadon con bacuēbo caido nebi, quequin mimbi naid mimbi tantiaidbēdta ompoenquiocquin ēbi chuiban, caimbi mibi.

Esuquidistu tantiesabēdtambi icsain nainda quiaid

¹⁴Esuquidistu tantiesabēdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, qesa aton papa. ¿Nuquin Papan bēdambo icmiaidēnda ambi chiaid niacquidbēdtan nabampadic? ¿Nuquin Papan Mayanēn tantiamiaidēnda Icbo chieshēnquidbēdtambi chieshēmpadic? ¹⁵¿Esuquidistu Satanaspadquidta nedic? Padenquo. ¿Esuquidistu tantiaquid abi tantiesapadquidta nedic? Padenquo. ¹⁶¿Nuquin Papan ambi uaidbimboecnuc matsesēn nacnenaid tantiaquidta aton Mayan Nuquin Papan meniaid icpadic? Padenquo. Abi tantiaquid aton Mayan menec. Nuquin Papan dada uamiampid dada uanu. Ista.

“Ēbēd icquidbēd iquendabi;

Aidbēdi capuebi;

Aton papa nebi;

Con matses adquido nec,

¹⁷Con matses icquin ēbi tantiesan ēmbi chiaid niacacpadomboen nainda.

Adecbidi aid icsapadec tabadenda.

Adecbidi icsainquo yec tabad.

Adquid ēbēd iqueci cho caindambi.

¹⁸Adquidon papa iquendabi;

Adquid ēmbi con madobēd con champi caid iquendac, queci Nuquin Papa.” Abi tantiaquido nadatiambocquidēn aden chieci.

7 Naden nanuna, quequin Nuquin Papan chiac nuqui naid icsatedibëdtabi nuqui tantiaid icsatedi ënu, quequin Nuquin Papan chiacpadomboen nabanec tabadtenenuna.

Unësquo icboedi mimbi naid tantiaash bédamboshë iquebi quiaid

²Adembidi, ëbëdtabi ëbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. ³Pabado tantienquo yec icsaobi mibi camenuen nëid chuiquin dada uainquo iccombi. Mibitedi tantiec tsadebi, quequin padpiden chiemi. Abimbo caimbi. Unësequi mibi bëshuntiapimbo iquendabi. ⁴Mimbi chiacpadpenquiochoedëmbi naosh, quequin choquidën chioshi. Aden chuisho tantiaashun, Nuquin Papan chiacpaden nabanquidquo nec, quequin mibi chiec nebi. Unësquo icboedi mimbi naid tantiaash bédamboshë iquebi. Utsin natiamiaid icshobi bédambo iquebi, mimbi ëbi camioc.

⁵Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedëmbi tantesa uatsiash, quec quenenenquo iccobi. ⁶Unësquo icsho ëbi tantiaquin Nuquin Papan Tito padpiden chomiosh ëbi bédambo icmeoanuen. ⁷Choashun mimbi aid tantiaquin nabanaid Titon chioshi. Adembidi, ëbi iste mibi bunaid chioshi. Mimbi dada uaid isash unësquo icquin, Codinto yacnocquidon mimbi chiacpaden nabanosh, quequin Titon chioshi. Aden chiac bédamboshë yanobi ad yenquo icboedi.

⁸Mimbi dada uaid isash Codinto yacnocquido unësquo iccosh, qesho tantiaash, Icsambo icchitobi, quenquo iquebi. Aden dada uaic icsambo iccobi, quetiapimbo yequi mibi unësquo yacpadequi unësquo iccobi. Yuec mibi ad yenquo iccoc. ⁹Adecbidi nëbi bédambo iquebi. Èmbi mibi unësquo icmiac mibi icsaid ënquin Nuquin Papan chiacpaden nabanec, quec utsibo. Aden chuisho tantiaquin mibi unësquo icmequin mibi icsabudmiambo iccombi. Unësquo icmiaqui mibi bédambo yanoc. ¹⁰Unësquo icmiac, Nuquin Papan chiaid niacombi, quiaash unësquo icquin mibi icsaid mimbi ënac. Adsho isun Nuquin Papan ënëdtiapimbocnoc aidbëd mibi icmendac. Aden unësquo icmiaqui, Bédambo iquebi, mibi quendac. Adecbidi mibi icsapadec icsainquo mibi icpendac. Padnuen Nuquin Papan chiacpaden niacquin ënesa abi natiamiaiduidi tantiec Nuquin Papa yacno puduedtiapimbo iquendac. ¹¹Padnuen mibi unësquo icmiac nëbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ënoc. Adembidi, Èbi padpiden bédamboen is, quequin Nuquin Papa mimbi chioc. Icsashun chienquiochoedëmbi nëbi cuembo bédamboen chuinu, quequin mimbi chuibanoc. Aden mibi icsaid ënacsho isun mibitedi icsaquin ëntiapimbo icquidën nacpaden naisa nec, quequin tantiembi. ¹²Icsaquid ambi icsa uanaidbëdtabi chuinen mibitedi dada uainquo iccombi. Abentsëc icsash abitedi unësquo iquec. Adquiecbidi ëbi unësquo icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin ¹³ëmbi tantiacpaden naquin mimbi bédambo iquebi camiaid nebi.

Adembidi Tito yuedquin mimbi bédambo iquebi camiaidbidi niosh. Èbi yuedenquioctsiash queboedi niosh. Yuedoshi, Tito qesho tantiaash bédamboshë iquebi. ¹⁴Mibi nidmimbi, Tito, qeshun, Èbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ëmbi chuibocpadomboen mimbi nashunac. Aden tantiaash, Abimbo chiombi,

quepobi. Ĕmbi mibi muainquiocquin chuibanacpadec adquiobidi mibi nabanec tabadaid abimbo iccosh. Adomboembidi Titon mibi isbanosh. ¹⁵Ĕbitedi chushcat-siash, quequin mibitedishun Tito yuedpanēdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito. ¹⁶Adoaidi ambia tantiaquid icquin Ĕmbi chiac mibitedishun nabanendac, quequin tantiembi. Aden tantiec bēdambo yec tsadebi.

Aton na nibēdquid icsho aton na dadpen icquid menequid

8 Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nēbi bēdamboen nabanec tabadaid chuinu. Tantia. ²Natiamiaqui bēdambo iquebi quec aido tabadec. Adec tabadquin Esuquidistu tantiaquid utsibo tantiaquin menenuequin aton na daēdpectsēc musucshun dayun uaosh. ³Ĕmbi, Meneta, cainquiocnobi aton na bedtequid naimbudtsēcquien menenuequin bedbanosh. ⁴Esuquidistu tantiaquid utsibo, nidaid Udeya caid yacnocquido, aton na nibēdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. ⁵Mitsana daēdpectsēc icnuc utsibo mimbi meneti-apimbo icpec, quequin chuinu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. ⁶Adomboen menenun bedbamposh. Adosho isun Tito nadombi. Mimbi Ĕnden nidaid Udeya caid yacnocquidon natiaid chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiacteda bedbanoshe? Isnu, qeshun istanta, quequin Tito chiombi. ⁷Naden naquid Codinto yacnocquido nec, quequin mibi tantiembi. Nuquin Papan Mayanēn tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin Ĕmbi chiacpadomboen badedquio comapenen naquidquio mibi nec. Adembidi Ĕbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

⁸Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. ⁹Nuquin Icho Esuquidistu abuc tabadec abitedishun Icho icboedi nuquitsen abuc abēdi tabadmenuec matsesash nidaidēn tabadnuc aton na nibēdpadene. Aidēn matses tantiaquin nabanacpaden utsibo tantiaquin nabanta.

¹⁰Ĕmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimbi tauapondac. ¹¹¿Aden nanuna, qeshun mimbi chiacted Ĕnquinda bedshun dayun uao? Padenquiocquin adota. ¹²Mitsana daēdpectsēc icnuc daēdpectsēc musucshun menesho isash, Dadpen meneta, quenquio Nuquin Papa iquec.

¹³Aton na nibēdquid icsho, Natiacquin meneta, quenquio iquebi. Aton na nibēdquid icsho aton na dadpen icquidēn menec. ¹⁴Mitsana dadpen icquid mimbi musucshun meniac aton na nibēdquid bēdambo iquebi, quepec. Aden meniac mibēdi aton na nibēdquid bēdambo iquendac. ¹⁵Nuquin Papan dada uamiampid nad iquec. Chuinu. Tantia. Petequidēmpi Nuquin Papan mana caid meniaid chuiquin: “Shubun tabadquid dadpenshun aited-aitedquien bedbanshun peshun napi uaid nibēdosh. Adecbidi, aton shubun daēdpectsēc tabadquidon aited bedbanshun peshun napi

uaid nibëdosh.” Adec Nuquin Papan meniaidtedi bëdambo yampicpadec aton na dadpen icquidbëdi ambi meniaido bëdambo yampec.

Tito Codinto yacno nidte

¹⁶Nëbi Tito mibi chuinu. Tantia. Ëbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bëdambo iquec, Papa, quec tsadebi. ¹⁷¿Codinto yacno tsutsi nidpatsiash? quequin ëmbi chiac, Ëbibi nidebi, quiosh Tito. ¹⁸Tito mibi yacno nidnuesho tantiashun nuqui con utsi caid utsi Titobëdi nidta caombi. Aidi Esuquidistu chuibanquid nec, quequin utsibon chiec. Bëdamboquid nec. ¹⁹Nidaid Masedonia caid yacnocquidon, Esuquidistu tantiec iccuededquidon ëmbi dayun uaid Pabadobëdtan buanec nid caidbidi Titobëd nidquid nec. ²⁰Aid daëd ëbëdi nidsho isash, Nuqui na buanquin ampetsiash, quetiapimbo utsibo iquec. ²¹Nuquin Papan tantiamiacpaden aidobëdtambi bëdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobëdtambi buanshunembi.

²²Tsyuec nidebi, quequin utsibobëdta Tido mibi yacno nidmembi. Ëmbi nata cac bëdamboen nabanquid aidtedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. ²³Mibi nashunquin ëbëdtambi Esuquidistu chuibanquid Tito nec. Aidbëdi Esuquidistu tantiaquid utsi nidec. Esuquidistu tantiec iccuededquidon nëuëshquio puduanec Codinto yacno nidta caboedi Titobëd nidec. ²⁴Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Ëmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiaapanuna.

9 Ënden Esuquidistu tantiaquid utsibo tantiaquin nashunta quequin ëmbi chiac, ²Adonona, qeshun mitsana bedbanquin mimbi tauaondac. Adsho isun nidaid Masedonia yacnoësh Esuquidistu tantiec iccuededquido mimbi menenuequin chuibocpadomboen chiombi. Abentsëcshun-abentsëcshunquien menebanquin dayun uanuna, quequin seta utsin mimbi chuibocpadomboen ëmbi chiac Masedonia yacnocquidotsen, Adomboembidi nabanembi, queoaposh. ³Aden aidon chuisho tantiashun nuqui con utsi caido mibi yacno nidmembi mimbi chiondacpaden bedbanambo icnushe qeshun. ⁴Nidaid Masedonia caid yacnoësh Esuquidistu tantiec iccuededquido ëbëdien tsyuec mibi yacno nidchitec. Aidobëdi mibi yacno choshon ëmbi chiacpaden mimbi bedbanambocsho isash, Abimbo chiacimboen chuichitombi, quec natiaic bëpiutsiabi. Adquiecbidi mibi icoaic. ⁵Adquio icnushe qeshun utsiboba mibi yacno nidmembi. Aido mibi yacno choacsho mimbi chiondacted bedbanquin dayun uaid mimbi ismetsiac, Abimbo chiombi, quequin. Aido chonoc mimbi chiaacted bedbanquin dayun uamboeboedëmbi nëbi mimbi bedbampec. Aden mimbi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantiec unëshquio icquin menetsiash. Aden tantiaquin menenda.

Nuquin Papan na dadpen bedmiaidën aton na nibëdquid menequid

⁶Nuquin Papan chiaid chuinu. Adembi tantiata. Tied icbon daëdpectsëc nitsinac caniaish ëshëacsho aidtedtsëcbidi bedpec; dadpen ambi nitsinac caniaish ëshëacsho dadpen bedpec. ⁷Adquiobidi aton na icquid iqueque. Tantia. Chuinu. Nëidted

menenuequin ambi chiacted menequid. Ĕmbi meniaid tantiash bēdambo iquebi, quepec adquid. Utsimbic, Menetiapibi, queboedēmbi utsin, Nēidted bec cho, cac menepec. Aden utsin chiacted meniash, Bēdambo iquebi, quetiapimbocquin menec. ⁸Mitsana menete bunquin mimbi chiacted menesho isun Nuquin Papan uesadmen- quiocquin mimbi bedmec ma utsi-utsien menebampanueshun. ⁹Nuquin Papan dada uamiampid adomboembidi chiaid nad iquec:

“Nuquin Papan dadpen bedmioshi, quequin tantiaquin aton na nibēdquid utsi-utsien menebanec.

Aden menequid tantiaquin ěnenquiocquin ambi naboed Nuquin Papan chuibanendac.”

¹⁰Ambi meniaido menequidēn bēdambo icmec, quequin ambi chiacpadomboen Nuquin Papan matsesēn na daēd uaindac. Adecbidi ambi uaid tiedēn caniquid ěshē abentsēc siaid dadpen yanec. Matsesēn petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneoapec. ¹¹Aden mimbi meniac utsibotsen, Bēdambo iquebi, quec tabadec. Adec tabadquin mimbi meniaid tantiaquin, Nuquin Papa bēdambo iquec, quequin mimbi meniaidon chiendac.

¹²Nuquin Papa tantiaquid icquin aton na nibēdquid Esuquidistu tantiaquid dadpen icsho menebanquin mimbi bēdambo icmiaid dadpen iquendac. Adembidi, Nuquin Papa bēdamboshē iquec, quequin aidon chuibanendac. ¹³Meniacsho isash, Esuquidistu tantiaquid nebi, quequin abimbo chuiquidquid aid nec, quequin mimbi meniaidbēdtambi utsibon mibi chuibanendac. ¹⁴Adquidquid nec, quequin utsibon mibi chiec. Mimbi tantiamiacpadomboen nabanquidquid Codinto yacnocquido nec. Aido bēdambo icme, Papa, quequin mimbi meniaidon adomboembidi chiendac. ¹⁵Aden aidon chuinubi naden nuqui Nuquin Papa chiec. Mimbi chomiaid Esuquidistu ěbi bēdambo icmenuec ěbi icsaid bedshunash abided cuidadec unēsash uincuempanēdash. Aidpadquid utsi nibēdec, Papa, quequin nuqui chiec.

Ĕmbi dada uacpaden mibi yacno choshon adomboembidi nabanembi quiaid

10 Comapenec chushquenquiocquin matses bēdamboen tabadmenuequin chuibanquid Esuquidistu icpanēdash. Mibi yacno choshon Esuquidistupadquid icnuequin ěbi chieshēnquid bēdamboen tabadmenuequin chuibanendambi. Ĕbi chieshēnquido nadec onquequin ěbi naden chiec, quec. Nuquibēd tabadquin dacuēdacbimboecquin comapenen Pabadon chushcainquid iquec. Utsi yacno nidshun dada uaquin comapenen chushcaic, quiosh. Mibi chiec adosh. ²Adsho tantiash mibi yacno choash tabadquin chushcante bunenquid icquimbi, Ambibi tantiacpaden nabanquid Pabado nec, quequid bēdamboen chuibanembi. ³Esuquidistu tantiaquid yanshun icsaquidēn tantiacpaden nabanesa nebi. ⁴Mibi yacno choshon matsesēn tantiacpadpenquiocquin Nuquin Papan tantiamiacpaden ěbi chieshēnquido Satanasēn icsamboen tantiamiaido Nuquin Papan chiaid chuibanendambi. ⁵Satanasēn tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibēdec, queshun ěmbibi tantiacpaden naic bēdambo iquec, quequin tantiamiaido nec. Aden tantiaquid icsho isun ambi icsamboen tantiec pamumēdacbimboe yaid ěmenu quequin Nuquin Papan chiaid ěmbi chuibanubi abi pamumēdacbimboe yaid padpidec pausudtiapimboen paucbanshun ambi tantiac-

paden Nuquin Papan pausunendac ma ambi chiacpadomboen namenuequin. ⁶ Aden chuibanshun Nuquin Papan chiacpadomboen utsin-utsinquien abi icsaid ënabicsho isun comapenen cuidendambi.

⁷ Ambì isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquio isadtsec, quepec aido. Aden chuiquido, Esuquidistu tantiaquid nebi, ëbi quesho tantiash, Muec nec, quetiapimbo iquec. ⁸ Abi tantiaquid ëbi yansho, Esuquidistun, Ëbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ëbi chieshëquido tantiamenuen chuibanubi aidon tantiaid icsa pauschun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmiosi, quequin tantiec, Adesa nebi, quetiapimbo iquebi. Aden tantiaquin ëmbi chiacpaden naimbi mibi yacno choshon caimbi. ⁹ Adquid nebi, quequin, Dacuëdampambocquid Pabado nec camenuen dada uainquio iquembi. ¹⁰ Mibi aden dacuëdmenu, quenquio icnubi ëmbi dada uaondaid bedshun isun naden utsin ëbi chiosh quec. Chuiquidën comapenen chushquequin chiacpadomboen Pabado dada uaic. Nëmbo choshon ambi dada uaquin chiacpaden chuitiapimbo icpec. Chichompibitsecsho ëbi isun, Chuiquidida nepec, quetsëcquin istsëccombi. Tantiatiapimbo noc chuibanondash, quequin aidon ëbi chiec. ¹¹ Aden ëbi chiec onquequidën bëdamboen tantiata. Chuinu. Ëmbi dada uacpaden mibi yacno choshon adomboembidi nabanembi caimbi.

¹² ¿Esuquidistun, Ëbi chuibeneta, caid nebi, quepecta ëbi chieshëquido iquec? ¿Adenda Esuquidistun, Ëbi chuibeneta, caidënquio utsi icsamboen chuipec? ¿Esuquidistun, Ëbi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquio iquebi. Esuquidistun, Ëbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon. ¹³ Ëbien Nuquin Papan tantiamiacpaden chuibanquid nec. Ambì tantiamiacpaden mibitedi chuibanquid nebi. ¹⁴ Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi. ¹⁵ Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquio iquebi. Mibëdi tabadquin ëmbi chuibanac aid tantiaquid mibitedi yanondac. Adsho isash Esusquidistu tantiadonequidquio yampashun, quec mibi tantiec tsadebi. ¹⁶ Esuquidistu ëmbi chuiban-chuibanac aid tantiadonequiec mibitedi tabadsho isash Esuquidistu utsin chuibanacmanombo chuibanoaic nidendabi caombi. ¹⁷ Aden Esuquidistu chuibanac, Ëbibi bëdambo ictiapimbocquid mimbi bëdambo icmiaid nebi, Papa, quequin ma Nuquin Papa Esuquidistu tantiaquidtedishun chuipanuna. ¹⁸ Bëdamboen nabanombi, abibi quesho Nuquin Papan bëdamboen istiapimbo iquec. Ambì, Bëdamboen mimbi naoc, caiduidi ambi bëdamboen isaidquio nec.

Pabado muesa icnubi muaquido

11 Nëbi ëmbi dada uaid isash, tantiesa onquiacbimboen mamëmenuequin Pabado chiec, quenquiocpashun caimbi mibi. Aden tantiatsiash, quequin abi dada uaimbi. Nëid bedash ëmbi abia dada uaondaid isec mibi onquiacpade

nëbi nëid mimbi iste dada uaid isec onqueta. ²Nuquin Papan tantiamiacpadec mibitedi cudasquidquio nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amën aton champi chiacbimboen, Esuquidistun bednu caid yec icsamenuequidën, Bednu, cac, Bedadenda, caimbi. Esuquidistu ëmbi chuibanaido mibitedi bedec choeque. ³Ëmbi chuibanac Esuquidistu tanti-auidquimbi nisi bëdambo isadacbimboecquidën muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. ⁴Adec ëbi tsadnubi Codinto yacno choshon utsin Esuquidistu ëmbi chuiboed utsi uain chuisho badedquio tantiec aidon. Adembidi, Mayan utsi iquec, qesho tantiasash, Ëbi mene, quec mibi. Adembidi, Mibi bëdambo icmequid Esus utsi iqueque. Aid tantiaa, quequin ëmbi chiaid utsi uain chuisho, Abimbo iquec, quequin tantiec mimbi. Aden utsibon ëmbi chuiboed utsi uain chuisho tantiec, qesho tantiasash Esuquidistu tantesa uatsiasash, quec tsadebi. ⁵Esuquidistun ëbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bëdamboenshë utsibon chuibanacpaden Pabado chuibanenquio iquec, qesho tantiasash, Icsamboen chiombi, quetiapimbo iquebi. ⁶Utsibon bëdamboenshë chiacpadec Pabado onquenquio iquec, mibi quenuc Esuquidistun, Ëbi chuibeneta, quequin ambia tantiaquidën tantiamiacpadomboen mibitedi chuibanombi bëdamboen tantiaquin.

⁷¿Codinto yacnocquido ma Esuquidistun bëdambo icmepanueshun chuibanequi, Bec cho, quenquio yectabi icsape? ⁸Mibi Esuquidistu chuibanu quiash Esuquidistu tantiec iccuededquid utsibon na ampiacbimboec tabadobi. Aidon aton na meniaqui aido nashunenquio yec mibi yacno nidash tabadquin mibi nashunquin Esuquidistu chuibanondambi. ⁹Adec mibi yacno tabadquin Esuquidistu chuibanec bunec tsadec, Bec cho, quenquio iccondabi. Nidaid Masedonia caid yacnoësh choquidëmbini meniondash. Aden ënden, Bec cho, mibi cainquio iccondacpadec nëbi adqueiecbidi tsadebi. ¹⁰Esuquidistun chuimaidquio nebi. Adquid icquin adquid nebi quequin chiembi mibëdi nidaid Acaya caid yacnocquid utsitedi, Padi. Aden chienda, quetiapimboenoc. ¹¹¿Atotsi quiashini, Bec cho, quenquio icpe? ¿Mibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabado tantiaid nec, quequin Nuquin Papan tantiec. ¹²Aden mibi tantiaquin, Bec cho, cainquiocquin Esuquidistu chuibenec nebi mimbi bëdamboenshë chuibanquid caid: Pabado nabanec tabadacpadec tabadebi, quetiapimbo icnubi.

¹³Aido Esuquidistun ëbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. ¹⁴Aido tantiamequin ismequid Satanas nec. Nuquin Papan abi yacnoshon uaid mayan bëda aidbëdi tabadquido icsaisa yacpadquid nebi, quequin abipenquiocnoc chuiquin ismequin tantiamiac ¹⁵adqueiecbidi ambi namiaidtedi bëdamboquidbimboec capucuededec. Cuidte ushë chonoc aido icsaid Nuquin Papan comapenen cuidquin chiendac.

Pabado abi mëyanaid chuibanaid

¹⁶Adembidi chuinu. Tantia. ¿Mamëmenuequin tantiesa onquiacbimboendambi ëbi icaid chuibandio? ¿Utsin aden chuibanasho tantianu, quepecta mibi ictsia? Aden chuibanenquiocquin ëbi icaid chuibanuna, ¹⁷Chuita, Nuquin Icbon cainquiocnobi. ¹⁸Abi icaid utsin-utsinquien chuibanec, quequin tantiaquin adomboembidi ëbi icaid chuibanuna. ¹⁹Bëdamboen tantiaquidquio nebi, qeshun mamëmenuequin ambembi chiacbimboen chuisho tantiec mimbi. ²⁰Ambembi chiacbimboec,

Yuanu, qesho tantiash icsamboen tantiaquidbimboec mibi yuadte bumpec. Ambe-mbi chiacbimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquio yec tabadec mibi. Aden mitsana ambembi isash, Mibi chuiquid nebi, qesho tantiash, ¿Tsuentsin mibi adquid icmiosh? quenquiocquin aidën chiacpaden nabanec mimbi. Aton yuabim-boecnuc mibi mëyanaqui, Min yuapenquio nebi, quenquio iquec mibi. ²¹ Nuquin Papan yua icta cac, Padi, quetsiash, quequin aden mibi chuitiadquidëmbi chienquio iccondambi.

Mibi yuanuequidon ambembi abi icaid chuibanac. Adomboembidi Pabadon abi icaid chiec, Codinto yacnocquido quetsiash, quequin tantiaquin ëbi icaid chuibanu. Tantia. ²² ¿Mimbi bëdamboen chuiquid nec caid, Isadaidbo nebi, quepecta iquec? Adembidi, Ëbi isadaidbo nebi, caimbi. ¿Abadauanën tsyuecquid nebi, quepecta aido iquec? Adembidi, Ëbi Abadauanën tsyuecquid nebi, caimbi. ²³ ¿Esuquidistu chuibanquid nebi, quepecta aido iquec? Ëbibi Esuquidistun ëbi chuibeneta caidquio nebi. Esuquidistu chuibanquid ëbi yacpadquid utsi nibëdec. ¿Mibi mamënsu-menuequindambi aden chuipadi? Padenquio. ¿Ëbi yacpadquid utsida iqueque? Tantiata. Chuibanu. Utsi bëdiactsëc chonoadnuc comapenec chonoadobi. Adecbidi quënën nauedaid utsi icnubi quënën nauedteniaid nebi. Adecbidi utsi bëdiactsëc cuesaid icnuc yuen cuesto-cuestoaid nebi. Mëyanac unëstsenobi, utsi quenubi aden mëyanac unëstsen-unëstsemboedi nebi. ²⁴ Isadaidbon cueshcanten 39ted tamban-quin cacuestioniondashi. Yuecshun aidtedembidi. Yuecshun aidtedembidi. Yuecshun aidtedembidi. Yuecshun aidtedembidi yuenquio cacuestionioshi. ²⁵ Adembidi cuënoten se-sioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi. ²⁶ Adecbidi quenenenquio yec capucuenequin Esuquidistu chuibeniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquio yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquio yec capucueniobi. ²⁷ Con na bednuc chonoadec uëshquiobi. Padpiden-padpidemboen ushenquio icquin chuibanombi. Piasec acte bunquin adembidi Esuquidistu chuibanombi. Iquenquimbi chuibanombi. Dashcute icsactsëcquid dasiuidquimbi chuibanombi. Yuedenquio yaqui adembidi chuibudombi. ²⁸ Ëmbi chui-boed Esuquidistu tantiabenicquido icpec, quequin capucuenequin chuibeniombi. Utsi yacno nidshun, Ëmbi chuiboedo bëpiscudnushe qeshun mibitedi chuiquin dada uaombi. ²⁹ Esuquidistu tantiaquid chieshec dayactiapimbo icpec. Adquibidi iccobi, quequin tantiec tsadebi. Esuquidistu tantiaquid icsaosh, qesho tantiash unësquio yec, Nëbimbobi icsamianquid comapenen cuidta, Papa, quec tsadebi.

³⁰ Aidted ëbi icaid icnuc chieshenquio yec ëbi dayacquio yaid chuibanombi. Nëbi ëbi cuenondaaid chuinu. Tantia. ³¹ Abia Yampidën, Nuquin Icho Esuquidistun Papan nabanaid ënenquiocquin chuitequidquio iquec. Aidën nabanaid chuibanec muesa Pabado nec, quequin ëbi cuenondaaid Nuquin Papan tantiec. ³² Ëbi cuenondaaid nad icpondashe. Chuinu. Tantiata. Damasco yacnocquido ancanquidën Adetas

cuëmédquidën Pabado Damasco yacnoësh puduensho bedta quequin shubu dadpen daquënë uaid dapa shëcuëtedi sondado ëctabëdmepondash. ³³ Adec daquënë uaid shëcuë cuëmanquio sondado tabadnubi bednushe qeshun abuc daquënë uaid iste shëcuëshun tsitsan dapa antsadunshun daquënë uaid cachoc budmepondashi. Budmiac ancanquidën bedadtiapimbo yec cuempondabi.

Nuquin Papan Pabado ismiaid

12 Èbi icaid chuibanquin ëmbi dada uaid isbanash, Esuquidistun ëbi chuibeneta caidquio Pabado nec, quequin Codinto yacnocquidon tantiatsiash, quequin adobamboedtedi chuibanquin dada uaombi. Èbi icaid chuibanquin ëmbi dada uaid isash, Abi natiamiaid dadpen icpec, quetsiash, quenquiocquin dada uaombi. Adem-bidi Nuquin Papan ëbentsëqui ismiondaid chuinu. Tantia. Nad iccondashe. ² Èndenquimbo seta 14ted matamequin Nuquin Papan bëdamboshë yacno indopondashi. Intacchobi abuc indopondashi, quetiapimbo iquebi. Tantienuquo iquembi. Adecbidi ëmbi tantiateuidi indoac, quetiapimbo icoaibi. Tsaudi, tantienquo iquembi. Nuquin Papambien tantiec. ³ Abuc bëdamboshë yacno indopondashi, quequin abimbo chiembi. ⁴ Abucshun utsi chuitemaidquio tantiapondambi. Èmbi tantiondaid chuitiapimbo icpebi. ¿Mitsipadentsimbi ëmbi abucshun tantiaboed con onqueten chuiPAT-siaba? ⁵ Bëdambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bëdambocquid nebi, quetiapimbo iquebi. ⁶ Abuc nidshun ëmbi isondaïd chuibanquin dada uaid isash, Bëdambocquid Pabado nec, quequin tantianushe qeshun padenquo iquembi. Èbi bëdamboec tabadsho isash, Pabado bëdamboec tabadec, qesho tantiash bëdambo ictsiabi. Adecbidi chuibansho tantiash, Abimbo chuiquidquio Pabado nec, qesho tantiash adecbidi bëdambo ictsiabi.

Satanasën natiamiaid

⁷ Bëdambocquid yansho Nuquin Papan abuc indoshon ismiondashi, quequin Pabadon chuinushe qeshun Satanasën chomiaidën ëbi natiameded-natiamededsho isash, Chën, quenquo Nuquin Papa iquec. Satanasën chomiaidën natiamiac pinchuquën siadaïd namin nidaëdaïd chictiapimbo yacbimboec con dada bëdannenquo iquec. ⁸ Adec con dada bëdantiapimbo icnubi, Èbi natiamequid cueme, Icbo, quequin chiondambi. Adshumbic, padpiden. Adshumbic padpiden adomboembidi chuided-chuidedondambi. ⁹ Adoquien, Padi. Bëdambocquid icmenuequin naid nec. Mibi dayacquio icmequid con Mayan mibëdi iquec, quequin Nuquin Icbon chiondashi. Adoqui, Bëdanambo icsho Nuquin Icbon ëbi dayacquio icmec quequin tantiec bëdambo iquebi, quec tsadebi. ¹⁰ Aden tantiec con dada icsambo icnubi Esuquidistu chuibenec capuebi. Èbi icsamboen chuiquin mamëshunaqui adecbidi Esuquidistu chuibenec capuebi. Utsin natiamiaqui adquiecbidi Esuquidistu chuibenec capuebi. Utsin mëyanaqui adquiecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquio icmiac tsadtiapimbocquin chuibenec capuebi.

Esuquidistu tantiabemenuen chuibanombi quiaid

¹¹ Èbi yacpadquid utsi nibëdec, quequin chienquioctiadquidi niobi. Esuquidistu chuibanquid utsibon chiaïd tantiatequidquio iquec, qeshun mibëd icquidon ëbi

icsamboen chiosh qesho tantiashun Pabado Esuquidistu chuibenequid nec, quenquo utsibo iccosh, qesho tantiashun ëbi icaid chuibanquin dada uaombi. Bëdamboen tantiacbimboen chuibanquid dadpen iquec. Aidon icsactsëcquio isadtsec, quequin ëbi chiec onquenubi Esuquidistu chuibenequidquo nebi. ¹²Natiamaqui chieshenquiocquin Esuquidistu ëmbi chuibansho mibitedishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistun ëbi chuibeneta caidquo Pabado nec, quequin chuitiaquidëmbi padenquo mimbi icpondac. ¹³¿Esuquidistu tantiec iccuedaidquo utsi tantiaquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquo iccondabi. ¿Bec cho, qeshoda ëbi bëdamboen mimbi tantiatsemponda? ¹⁴Ënden mibëdi tabadondabi. Yuecash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquo iquendabi. Mitsana bunesa nebi. Esuquidistu tantiaquidquo ma icpanu quequin mibëdi tabadquin chuibanendambi. Aton bacuëbo tantiaquin amën anibëdtan ambia tantiaquid icquin tied uaic adembidi shubu uaic bacuëmpibon nabantiapimbo icnubi. ¹⁵Adquibidi mibitedi tantiec Esuquidistubëd icquido yamppec quec chonoadec tsusiobudquimbi chuibenendambi. ¿Ëmbi mibitedi comapenen tantiasho isunda mimbi ëbi tantienquo yampe? ¹⁶Bec, cho, quenquo yec mibëdi tabadondabi. Adsho isash, ¿Piuquid bedenquo icpecta Pabado tabadash? Muaquin chuiquin bedpash icnui, quec mibi. ¹⁷¿Mitsipadentsimbi bedpa? ¿Ëmbi mibi yacno nidmiaidonda muaquin chuiquin mitsana bedpash? Padenquo. ¹⁸Titobëdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquo icboc. Aidbëdi abentsëc yacnimboen tantiaquidquo nebi. Aduidequi tabadquid ëbi daëdi nebi. ¹⁹¿Pabado ampesa nec mibi camenuendambi dada uaqin chuibampo? Padenquo. Esuquidistu tantiaquid icquin mibi aid tantiabemenuen chuibanombi. Ëmbi chuibanaid abimbo iquec, quequin Nuquin Papan tantiec. ²⁰Mibi yacno choash ëbëdi abentsëc yacnimboen tantienquo icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibëdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquo chuisho tantiamane qeshun adembidi dada uaimbi. Bëdambo icquid ëbi icnubi utsi padenquo iquec qesho tantiamane qeshun adembidi dada uaimbi. Mimbi tantiacpadpenquiocquid icsho isash comapenec cuëdcuededsho tantiamane qeshun adembidi dada uaimbi. ²¹Ai, mibi yacno choashun adquid icsho isun, Ëmbi Esuquidistu chuibanaiado nec, quequin Nuquin Papa chuitiapimbo yec natiaic bëpiuacnimboec tsadmane qeshun dada uaimbi. Icsadenequidën abi icsaid ënabi icsho isash aido unësacnimboecquid nec, quiash unësquo icmane qeshun dada uaimbi. Aidon naid utsin istemaidquo nec. Ambibi ambi chudtemaid chudted-chudtedec icsambo yequi, Bëdamboquid nebi, quec muacuedec.

Icsaid ënesa chuiquin cuidendambi quiaid

13 Mibi yacno daëdec puduedashic padpidec puduedendabi. Choshon, Icsadenequid iquec, quequin daëdshun-daëdshunquien chuisho tantiendambi. Abentsëcshun: Icsaquid iquec, quequin chuisho tantiatiapimbo iquendabi. ²Tauamboec puduedshun Esuquidistu chuibanac abi tantiaquido mibitedi yanondac. Pad-

pidec puduedoashun icsadenequid icsho isun, Mibi icsaid ënta, cac padenquiocsho padpidec puduedoashun Nuquin Papan tantiamiacpadomboen mibi adquid ut-sibobëdta comapenen chuiquin cuidembi, quequin chiondambi utsitedishun tantianubi. ³ Esuquidistun tantiamiacpaden Pabadon dada uaid nec, quequin ¿mitsipadentsimbi tantiapē? quequid comapenec onquequin chuibanembique. Tanti-aquiota, caimbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi. ⁴ Aidi matsesash nadatiapenquio icquidbimboecsho isun cuesten dectampanëdash. Adoacsho Nuquin Papan uincuemiāc unësesa yanquiopanëdash. Aid tantiaquidquio icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

⁵ Esuquidistu tantiaquid nebi, qeshun ¿mitsipadentsimbi aid tantiapē? Adecbidi, ¿Ambi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, qeshun Esuquidistu ëbëd ictiapimbo iquec, quequin tantiata. Aid mibëd icnuc ambi chiaid niac-niaquenquio mimbi iquendac. ⁶ Adecbidi, Pabado Esuquidistun ëbi chuibeneta caidta neque. Isnu, quequidën ëbi nabanec tabadsho isun, Pabadon abimbo chiosh, capashuni mimbi. ⁷ Aden tantiaquin Codinto yacnocquido bëdamboen tabadmeta, Papa, quequin chuided-chuidedembi. ¿Mibi bëdamboec tabadsho isash, Pabadon chuibanaiādo nec, quequin mibi isquidon chuitsiash, quequindambi Nuquin Papa chuided-chuidedpadi? Padenquio. Esuquidistun ëbi chuibeneta caid Pabado nec, quequin tantiesā utsi-utsiec icnubi, Nuquin Papan chiacpadomboen nabanquidquio Codinto yacnocquido nec, quequin utsibon chuisho tantiatiadquio iquebi. ⁸ Nuquin Papan chiaid abimbo iquec, quequin ambi chiaidquio chuibanquidquibidi nebi. Ambi chiaid utsi uain chiesā nebi. ⁹ Mibi bëdamboec tabadsho isash bëdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi. ¹⁰ Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibëdsho isun comapenen chienquio icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi. ¹¹ Nëbi ënquin dada uaimbi. Icsaisā icnu quec Nuquin Papan chiacpadec bëdamboec tabadta. Eëmbi dada uain chiaid isquin adobanta. Abentsëc yacsimboen tantiaquin nabanec tabadteneta. Adec tabadsho isash tantianquidquio utsibëd bëdamboec tabadquidquio Nuquin Papa mibëdi iquendac. Aidënquio mibi adquidquibidi icmendac. ¹² Eëbi isec cho cananta. ¹³ Mibi tantiec tabadebi, quec nëmbo tabadquido Nuquin Papan bëdambo icmebanaiādo. ¹⁴ Nuquin Icho Esuquidistun bëdambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan ëbëd iquec, quequin tantiaquiota.

Padi. Aidedi dada uaimbi.

CADASIA YACNOCQUIDON ISTE

Pabadon tauamboen chiaid

1 Pabado nebi. Esus chuibenequidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uincuemenëdaid Nuquin Papantsen: —Con mado Esus chuibeneta —caidquo nebi. ²Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquo iquec. Adembidi tantiec nëmbo icquido Esus tantiaquidtedi: —Unësquo iquec —quiosh. ³Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. ⁴Matses bëdambo icmequid Esus nec. —Ëbi tantiesabo tabadacimboec icsamboec tabadboedëmbi ëbi tantiaasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquo icnuec abided cuidadec Esus unëspac caondash. ⁵Aidën Papa tantiaquin: —Nuquin Papa bëdamboshë iquec —canuna ënenquo icquin.

Esusuidi tantienquo yanaid

⁶—Esus tantienquo yanosh —quequin mimbi naid chuisho tantiaash shubitiadquo iccobi. ¿Ëbi chonobida badedquo Esus tantienquo yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. ⁷¿Aidon chiaidta bëdambo icpec? Aidon chiaid ma Nuquin Papan chiaidpenquo neyoc. Esusquo chienquo icquin muaquin chuisho tantiaashun: —Abimboen cachitec —qeshun mimbi Esus tantienquo yampac. ⁸—Aton Mado Esusuidtsëqui tantiaasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquo icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiaashun aidtsen: —Nuquin Papan cuidpashun —catsiambi. Utsibontsen muaquin chuisho tantiaash aidotsen: —Cuidpashun —quiobi. ⁹Tantia. Adembidi mibi chuinu. Ëmbi chuibanac mimbi Esus tantiabonondac. Mimbi tantiondaid Esusquo chienquo icsho: —Nuquin Papan cuidpashun —caimbi mibi muauaquin chuiquido. ¹⁰—¿Matsesën: “Mibi bëdambo iquec,” mabi canu —quequindambi aden chuibampadi? Padenquo. Nuquin Papan chiacpadomboen mambi natiadquo yoc. —Bëdambo iquec —Nuquin Papa camenuen mambi chuibampaboc. Matsesën chiacpadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

Esusën chiaidquo chiec nebi, quiaid

¹¹Tantia, con utsibo. Mibitedi chuinu. —Esus tantiaasho Nuquin Papan matses bëdamboen isbentsiash —quequin ëmbi chuiboed amben chiaidpenquo nec. ¹²Matsesën chiabi Esuquidistun tantiamiac ambi chiaidquo chuibanombi.

¹³Tantia. Aden Esusën ëbi tantiamiondaid mibi chuinu. Con matses isadaidbon chiacpadomboenuidi natiadquo icquin Nuquin Papa tantiesabo danquin Esus tan-

tiaquido comapenen chieshënquin cuesun secatiadquio icpadenebi. Ĕmbi adodened ěmbi chuisho mimbi tantiondac. ¹⁴Nuquin Papa tantiatiadquio icquin con matsesën chiaid abitedimbo natiadquio ictenebi. Ĕbĕdta tishaidon caniabon bĕdiact-sĕc natiadquio icnubi con tsusedpabon chiaiduidi natiadquio ictenebi. Adquid icquin Esus tantiaquido comapenen chieshĕndenembi. ¹⁵Adshobini Nuquin Papan aton Mado Esus tantiamiondash. Ĕbi tishabi icnubi ěbi caic: —Con Mado Esus tantiameshun bĕdamboen isquin ¹⁶Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusĕn chiaid ěbi chui —quequin matses chiamo iccondambi. ¹⁷Shubu dadpen icquid Edusaden caid yacnocquido Esusbĕd icnĕdaido ambia Esus chuibanĕdaido chuitanambo iccondambi. Utsibo chienquio yec nidaid utsi Adabia caid yacno matses nibĕdacno badedquio nidtanondabi. Adashic yuec-yuecpambo ictanec auĕshquio choec shubu dadpen icquid Damasco caid yacnobidi choaondabi.

¹⁸Adashic ambo nidash seta abentsĕc chotsecnuc matametanec Edusaden yacno Petedo isec nidtanondabi. Adec nidash 15tedec ushec aibĕd tabadondabi. ¹⁹Am-bobi Nuquin Icho Esusĕn utsi Acobo caid isondambi. Esusbĕd icnĕdaid utsi isambo iccondambi. Aid daĕdtsĕqui isondambi. Utsibo padambo. ²⁰Abimbo chuiquin nĕid dada uaic nebi. Ĕmbi aden chuibansho tantias: —Ai, abimbo caic —quec Nuquin Papa.

²¹Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auĕshquio nidshun nidaid utsi Sidisia caid yacno istanondambi. ²²Nidaid utsi Udeya caid yacno Esusbĕd icnĕdaido yacno yuec tabadambo iccondabi. Adsho anocquidon Esus tantiaquidon isabi iccondashi. ²³Ĕmbi naid chuishouidi tantiapac caondash. —Nuquipadquid Esus tantiaquido cuesun secatiadquio icnĕdaidĕmbi Esus tantiabenshun Esusquio chuibeniosh —quequin ěmbi naid chuishouidi tantiapac caondash. ²⁴Aden ěmbi naid chuisho tantias: —Nuquin Papan nac Pabado bĕdambo iquec. Adomboen Pabado tantiamec Nuquin Papa bĕdamboshĕ iquec —quepac caondash Udeya yacnocquido.

Edusaden yacno nidoaid

2Yuecash seta 14ted matamiash Edusaden yacnobidi nidoapondabi. Ĕbĕdi Bednabe caid nidpondash. Titotsen buanondambi. ²Adec Nuquin Papan tantiamiacpadece ambo nidshun Esus tantiaquido chuiquid dapabo caidoudtsĕqui chochomeshun ěmbi naboed chuibanondambi. —Ĕmbi chiabi yac aidon: “Muequi neque. Pabodon chuisho tantienda,” canushe —queshun naden chiondambi. —Nuquin matsespenquio isadaidpembo matses utsibo Esusquio chuibeniombi. “Esusuidi tantiasho Nuquin Papan nuqui bĕdamboen istsias,” quequin chuibeniombi. ¿Adembidida mimbi tantiape? —capondambi Esus tantiaquido chuiquid dapabo chuiquin. Ĕmbi adoac: —Ai, adembidi tantiembi —quepondash aido. ³Ĕbĕd icquid Tito caid isadaidpembo icshobi: —Shui dĕbid dĕteshune —cainquio iccondash chuiquid dapabon abi utsibon: —Adotiad —canubi. ⁴Adec: —Shui dĕbidien dĕteshunetiad —quequido Esus tantiaquid damianquieci Esus tantiaquidombo tabadacno puduedpondash. —Esus tantiaquidon: “Esusuidtsĕqui tantiasho Nuquin Papan nuqui bĕdamboen isec,” quequin con tsusedpan chiaid niacsho tantianu —quiash ěbi yacno puduedpondash. Adec puduedshun tantias: —Mimbi icsamboen chieci. Nuquin tsusedpa Moisesĕn chiampidtedi nasho Nuquin Papan bĕdamboen ist-

siash —quepondash. ⁵Adec aidō: —Nuquin tsusedpan chiampicpadomboenuidien nametiad —qesho: —Padi. Mimbi icsamboen chiec —quequin aidēn chiacpadomboen nainquo iccondambi. —Ma matses utsibon: “Esusēnuidtsēqui Nuquin Papa ēbi bēdamboen ismec,” quequin ma Esusquo tantianu —qeshun nainquo iccondambi.

⁶Aden Esus tantiaquido chuiquid dapa caidon Esus tantiaquidēn natequid utsi chienquo iccondashi. —Esus tantiabenacsho isun nuquin tsusedpan chiacpadomboentsen nameta —quequin chienquo iccondashi. ¿Esusbēd icnēdaidēn: —Moisesēn chiaidtsen nameta —cactambi nametsemponda? Padenquo ictsenondambi. ¿Atotsi Nuquin Papan aidō capec? —Esusbēd iccondaidquo neque. Bēdamboen isnu —¿capenda iquec? Padenquo. ⁷Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusēn naid chuibeniāc. Nuquin Papan chiacpadomboembidi Petedon nuquin matses isadaidbo Esusēn naid chuibeniōsh. Petedon nacpadomboen mimbi bēdamboen nac —capondashi. ⁸—Nuquin Papan namiaid icquin Petedon nuquin matses isadaidbo dadpen Esus tantiamioš. Adembidi Nuquin Papan namiaid icquin mimbitsen matses utsibo dadpen Esus tantiamiac ⁹—qeshun bēdamboen ispondashi. —Adembidi nanuna. Mimbi isadaidpembo Esusēn naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquo mibi nec —qeshun chuiquid dapabon Bednabebēdta mēdimbampondashi. Nēidic Petedo. Nēidic Acobo. Nēidic Uan. Aidtedishun chuiquid dapabo icquin adondashi. ¹⁰Nadentsen chuipondashi. —Aton na nibēdquido bēdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹Adash yuectaniash ēbi iccondacno shubu dadpen icquid Antioquiya caid yacno Petedo chopondash. Auēshquo icsashobimbi bēisquiquin chushcapondac. ¹²Abēdtan Esus tantiaquido matses utsibon codocaid pec bēdamboec tabadboedi aton pete isuidanec aidobēd cuēshēdec Petedo icsapondash. Ambo choash Esus tantiaquido con matsesēmpenquo codocaid pec bēdamboec tabadondash. Adnubien Acobon: —Ambo istan —cac con matses Moisesēn chiampid tantiaquido cho-chopondash. Aidō cho-chosho isash: —Moisesēn chiampid niacquin matses utsin codocaid pesho chushcanushe —quec dacuēdquin isadaidpembon pete meniaid isuidampondash Petedon. Adec abēdtan Esus tantiaquido matses utsibobēd cuēshēdec icsapondash. ¹³Adsho isash anocquido isadaidbotsen abēdtan Esus tantiaquido matses utsibobēd tabadenquo yec cuēshēdpondash. Adsho isash ēbēd icquid Bednabetsen adecbidi cuēshēdec icsapondash. ¹⁴Adec icsaquin Esusēn chiacpadomboen nainquo icsashobimbi Petedo chushcapondac Esus tantiaquidtedishun tantianuc. —¿Ada mimbi bēdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aibdēdi mibi bēdamboec tabadoc. Aidon piāid pec bēdamboec tabadboedi nēbi aibdēd mibi cuēshēdoc. Adsho isash mimbi nianaidō: “Petedon matses isadaidbo tabadac bimboec tabadshouidien Nuquin Papan nuqui bēdamboen ischitotsiash,” quepec icsamboen chiec. Aden mimbi icsamboen tantiamēque. Tantia. ¿Atotsiequin mimbi naoque? —capondambi Petedo chushcain.

Nuquin Papan bēdamboen iste chiaid

¹⁵ Naden con matses Petedo chiondambi. —“Moisesēn chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaido nec. ¹⁶ Adquid icquin: “Moisesēn chiaiduidi naquin Nuquin Papa bēdamboen ismembi,” quedenedi nēbi nuqui utsien chiec. “Abided cuidadaid Esusēnuidtsēqui Nuquin Papa ēbi bēdamboen ismec,” quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

¹⁷ Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” qeshun Esus tantiabenondacsho nuquin matsesēn icsambo capondashi. “Nuquin tsusedpan chiapadomboen nainquio yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiapadomboen naicta nuqui icsape? Padenquio. ¹⁸ “Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bēdamboen ismembi,” qeshun abi bēdamboen ismequidquio Esus tantienquio yequini icsambo icchitotsiac. ¹⁹ Con tsusedpa Moisesēn chiactedi natiadquio ictenebi. Adquid bēdamboen iste danquin abitedi natiadquio icquimbi abitedi nainquio iccondambi. Adshun: “Moisesēn chiactedi ambembi matsesēn natiapimbo iquec,” qeshun ěmbimbo naid ěnondambi. Nēbini Esus tantiec Nuquin Papan chiapadec tabadec. ²⁰ “Ambi con tsusedpa Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquio yanondabi. Nēbi ěmbi tantiaidquio nainquio yec Esuquidistubēdi cuēshēdenquio yec bēdamboec tabadebi. “Ēbi tantiec ěbi cuidmenquio icnuec abided cuidadec unēsac caondash,” quequin tantiashoeni Esusēmbi bēdamboec tabadquid icmec. ²¹ “Abided cuidadaid con Mado Esusuidi tantiasho matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen itsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Matses cuidmenquio icnuec ěbided cuidadec unēsnu,” queboedi Esus padenquio ictsempanēdash —capondambi Petedo chuiquin.

Nuquin Papan aton Mayan tabadmiad

3 Tantia. —Cadasia yacnocquido piushbimboecquin tantienquio yanosh — quequin chuisho tantiashun mibitedi chuinu. ¿Tsuntsin: —Tantienda —cac Esus tantienquio yano? —“Cuesten dectanac abided cuidadaid Esusēnuidtsēqui Nuquin Papa nuqui bēdamboen ismec,” quequin Esus tantiasho Nuquin Papan nuqui cuidenquio iquec —quequin mibi chuibanondambi. ¿Esus tantiatiapimboda ique? ² Mimbi tantiaid ěbi chui. Tantanu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbi nabanuda mibēd tabadanondash? Padenquio. Ěmbi chiondaid Esusquio mimbi tantiabensho

isashien mibéd tabadanondash. ³ ¿Pabiate shëcuë choquidida mibi nendac? Tantia. ¿Atotsieshun tantienquo ique? Mibédi tabadquin Nuquin Papan Mayanën mibi bédamboec tabadquid icmec. ¿Nëbi Esus tantienquo yanecta mibi bédamboec tabadpatsia? Mibembi bédamboec tabadiapimboen mibi iquec. ⁴ ¿Aden Nuquin Papan aton Mayan mibédi tabadmiaid icquimbida Esus tantienquo yano? ⁵ Nuquin Papan aton Mayan mibédi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibédi tabadmec? ¿Con tsusedpa Moisesën chiampid nashoda Nuquin Papan aton Mayan mibédi tabadmec? Padenquo. Èmbi chiondaidquo Esusquo tantiasho Nuquin Papan aton Mayan mibédi tabadmec.

Nuquin Papa tantiaquidquo Abadauan chiaid

⁶ ¿Tsutsi Nuquin Papa tantiaquidquo icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bédamboen isembi —queshun Nuquin Papan bédamboen isbempampic. ⁷ Adec Abadauan: —Nuquin Papan abimbo caic —quequin tantiapampicpadomboen nëbi matsesën Esus tantiasho Nuquin Papan bédamboen isendac ambi Abadauan ispampicpadomboen. ⁸ —Esus tantiaquido iquendac —quequin naden Nuquin Papan Abadauan chuipampic ëndenquimbo. “Abadauan, mibi unësan yuecquimbo ictaneshun min tsyuecquid abentsëc tantiaquidtedi bédambo icmendambi. Nidaid utsi-utsiec yacno tabadquidon min tsyuecquid abentsëc tantiasho bédambo icmendambi,” quequin Nuquin Papan chiaid con tsusedpan dada uapampic. ⁹ Abi tantiaquidquo icsho ambi Abadauan bédamboen isampicpadomboen nëbi aton Mado Esus tantiasho Nuquin Papan nuquitsen bédamboen isec.

¹⁰ Utsiboen Nuquin Papan cuidtequido nendac. —Moisesën chiampicpadomboenuidi nasho Nuquin Papan bédamboen istsiashi —quequidëmbi abitedimbo nainquo icsho Nuquin Papan cuidendac. Aden ënden Nuquin Papan chiaid dada uapampic. “Ambi chiactedi nainquo icsho Nuquin Papan cuidendac,” quepampic. ¹¹ —Ambembi Moisesën chiampicpadomboenuidi nasho matses bédamboen isendambi —¿quecta icpanëdash Nuquin Papa? Padenquo. Ambi chiaid niacquidoidquo icsho bédamboen istiapimbo icquin Nuquin Papan naden chuiquin dada uamepampic. “Nuquin Papa ambi chiacpadomboen naquidquo nec,” quequin abi tantiec tabadquidien Nuquin Papan bédamboen isec,” quequin dada uamepampic. ¹² ¿Èmbembi Moisesën chiactedimbo nanuequidta Nuquin Papambo tantiec tabadpec? Padenquo. “Moisesën chiactedi naquid Nuquin Papabéd tabadendac,” quequin chiampicpaden ambembi matsesën natiapimbo iquec. Natiapimbo icsho Nuquin Papan bédamboen istiapimbo iquec.

¹³ Aden Nuquin Papan matses abitedimbo bédamboen istiapimbo icnuc Esquidistu: —Èbided cuidshun ëbi tantiaquido ma con Pan cuidenquo icnu —quiash abided ciudadec unëspac caondash cuesten dectanac. Aidquo chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquo nec,” quequin Nuquin Papan chiaid dada uapampic. ¹⁴ Adec matses utsi-utsien abi tantiaquido cuidmenquo icnuc abided ciudadec Esus unëspac caondash. Èndenquimbo con tsusedpa Abadauan chiec: —Yuecshun bédambo icmendambi —quequin Nuquin Papan chuipampicpadomboen abi tantiaquido bédambo icmequin aidobédi aton Mayan tabadmenuec Esus unëspac caondash.

Abadauamba chuishun Moisesetsen Nuquin Papan chiaid

¹⁵Tantia, con utsibo. Mibitedi chuinu. Min matsesën nadoquid. —Naden naindambi —quequin dada uashun: —“Abimbo chiaidquio nec,” ma isquidon canu —qeshun abi cuëmëdquidtsen dada uaquid. Aid dada uaid dada uaquidbëdtambi utsintsen utsi uatiapimbo icquid: —Chuiquidën cuidnushe —qeshun. Adem-bidi ambi chiaid utsi uatiapimbo icquid icquin ¹⁶Nuquin Papan: —Nadomboen naindambi —quequin Abadauan chuipampic. —Mibi nibëdanan yuecquimbo ictaneshun min tsyuecquid abentsëcshun matses bëdambo icmendac —quepampic. —Min tsyuecquid abentsëc tantiaquidtedi bëdamboen isendambi —quequin tantiec adpampic. Esus caiqui: —Min tsyuecquid abentsëc —quec adpampic. —Min matses tsyuecquido dadpen —quenquio icpampic. ¹⁷¿Ada tantie? Èndenquimboshë Nuquin Papan Abadauan chuiquin: —Min tsyuecquidën matses bëdambo icmendac —capampic. Adshumbic yuecquio ictaneshun seta dadpenquio 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquio icquin Nuquin Papan ambi chiaid utsi Moises dada uamepampic. Muenquio icquin Abadauan chuipampic. ¹⁸¿—Èmbi chiaid èmbi Moises dada uamiacpadomboen nashouidi mibi bëdamboen isembi —qeshunda Nuquin Papan Abadauan bëdamboen isbempampic? Padenquio. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bëdamboen isbempampic. Adashic: —Yuecshun min tsyuecquidën matses bëdambo icmendac —quepampic. Aden ambi èndenquimboshë chiampicpadomboen nèbi matses bëdambo icmequin Esus tantiaquido Nuquin Papan bëdamboen isec.

¹⁹¿Atotsieshun Nuquin Papan ambi chiaid Moises dada uamepampic? —Èmbi chiaid isash: “Icsamboequien nuqui tabadchitec,” quequin ma matsesën tantianu —qeshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bëdabon Moises chuiuampampic. Adoac Moisesën aton matses Nuquin Papan chiaid chuibampampic. ²⁰Nuquin Papanquio Abadauan chuipampic. Abadauan caic: —Chuitan —cainquio icquin Nuquin Papanquio Abadauan chuipampic.

Matses abi icsaid tantiamete chiaid

²¹Aden Nuquin Papan Abadauamba chuishumbic Moisesetsen chuipampic. ¿Ambi: —Min tsyuecquid tantiaquido bëdamboen isendambi —quequin Abadauan chiampid niacquinda Nuquin Papan Moises chuipampic? Padenquio. ¿Matses bëdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquio. —Matses bëdamboen isnu —qeshun ambi chiaid Moises dada uameshun ambi chiaid niaquesa bëdamboen isun unësacsho abëdi tabadmetsiash. —Èmbi chiaid niaquesa nibëdendac —quequin tantiaquin ambi: —Naden nata —quequin chiaid Moises dada uamepampic. ²²—Èmbi chiaid isun: “Nuquin Papan chiaid matses abitedishunquien niac-niacchitec. Mëtaniac abembi mënchiquidtiapimbo yacbimboec abembi bëdambo ictiapimboen icchitec,” quequin ma matsesën tantianu —qeshun Nuquin Papan Moises dada uamepampic. Adec matses abitedi icsamboec tabadsho bëdamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsëqui Nuquin Papan bëdamboen isec.

²³ Esus choabi icnuc nadquio matses icpanëdash. Moisesën chiacpadomboenuidi natiadquidi abembi bëdamboec tabadtiapimbo icpanëdash. Mëtaniac mënchiquidtiapimbo yacbimboec aidën chiacpadec bëdamboec tabadtiapimbo icpanëdash. Nuquin Papan Esus tantiamiabi icnuc adquio matses icpanëdash. ²⁴ Aden: —Ambi chiaid niaquec icsamboec tabadsho Nuquin Papan ëbi bëdamboen istiapimbo iquec. ¿Nuquin Papa bëdamboen ismequidta nibëdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiasho Nuquin Papan nuqui bëdamboen isec icsaisabimboecnuc —nuqui quendac. ²⁵ Aden tantiec: —Isadaidbo tsusedpan chiactedi nashouidi Nuquin Papan matses bëdamboen istsiash —quenquio nuqui iquec. —Esus tantiasho Nuquin Papan nuqui bëdamboen isquin bëdamboen tabadmec —quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi nec. Con champi mibi nec —nuqui capec. ²⁷ Adec: —Esus tantiaquid nebi —quesho acten mentoaid yec Esuspadquio ictiadquio nuqui iquec. ²⁸ Aden Esus tantiasho Nuquin Papan nuqui bëdamboen isec. Isadaidbo yec isadaidpembo yec matses yuaido yec matses yuapenquio yec dada yec chido yec quequin Esus tantiasho nuqui bëdamboen isec. —Matses utsibo bëdamboen istiapimbo iquebi —quenquio icquin matses utsibombi aton Mado Esus tantiasho Nuquin Papan bëdamboen isec. ²⁹ Adembidi abi tantiasho ambi Abadauan bëdamboen isampicpadomboen Esus tantiasho Nuquin Papan nuqui bëdamboen isquin bëdambo icmec ambi Abadauan chiampicpadomboen. Adec Abadauanën tsyuecquidobimboecquido nuqui nec.

Yuabimboecquid isadaidbo yaid

4 Tantia, con matses. Mibitsen chuinu. Aton na dadpen dayun uaquidën nuquin matsesën nadoquid. —Ëbi unësan con madon con na abitedi bedendac. Bacuë icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidën amën aton mado aden chuiquid. Aton papa unësan caniabi yec utsibon yuabimboec aton mado iquec. ² Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenquio yanendac. ³ Adquio yuabimboecquido con matses isadaidbo icpanëdash. Tsusedpabon yuabimboecquido icquin Nuquin Papan bëdamboen iste bëdamboen tantienquio icpanëdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bëdamboec tabadtiapimbo icpanëdash. ⁴ Adnubien ambi ëndenquimbo tantiampicpadën Nuquin Papan Esus chomepanëdash. Isadaidbon chidon tishaid icquin Nuquin Papan: —Naden nata —quequin chiaid naquidquio Esus nepanëdash. ⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanëdash. Adsho isash matses cuidmenquio icnuec abided cuidadec Esus unëzac caondash. Nëbi Esus tantiasho: —Con mado mibi nec. Con champi mibi nec —quequin Nuquin Papan nuqui bëdamboen isec.

⁶ Adec: —Con bacuëbo nec —queshun Nuquin Papan nuquibëdi Esusën Mayan tabadmec. Adoac bacuën amë: —Ëbi, papa —cacbimboen Nuquin Papa nuqui chianec. ⁷ Esus tantiabi Moisesën dada uapampiduidi namenuequido yuabimboecquido

icboedi nëbi Esus tantiasho Nuquin Papan: —Con bacuëbo nec —nuqui capec. Aden nuqui bédambo icmec ambi Abadauan chiampicpadomboemi.

¿Utsin yuameteda bumpe? quiaid

⁸Tantia. Nëbi matses utsibo mibi chuioanu. Ènden Nuquin Papambo tantiesia icquin matses uaquidpenquiobi utsi mimi tantiapanèdac. Papa quequin mimbi tantianèdaidèn yuabo yec mètaniacbimboecquido mibi icpanèdac. ⁹Nëbi Nuquin Papa mimbi tantiabenondac. ¿Mimbembida adonda? Padenquio. Aidëmbi mibi tantiamepanèdash. Aidèn tantiamiaidombo icquin ¿atotsiequin aid tantienquio yanoai? ¿Moisesèn dada uapampiduidi namenuequido tanshoda Nuquin Papan mibi bédamboen ispec? Padenquio. Adquid mètaniacbimboecquid nec. ¿Mètaniacbimboecquid icoatiadquioda ique? ¹⁰Aden Nuquin Papa tantienquio icquin mimbi icsamboen chiec. —Aid badiadèn adenda. Aid inchëshèn ushèn adenda. Aid setambi adenuidtsëqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bédamboen iste danquin mimbi icsamboen chiec. ¹¹Mibi caic: —Adosh —quesho tantiash shubitiadquio iquebi. —¿Èmbi chiondaidonda Esus tantienquio yampash? —quequin tantiac mibi unësquio iquec.

¹²Con utsibobimboecquido mibi neque. Tantia. Mibitedi chuinu. Isadaidpembo yec mibi: —Moisesèn chiampiduidi nanu —quenquio yacbimboec yanondabi. —Èmbemi Moisesèn chiampid naquin Nuquin Papa bédamboen ismembì —quedenedi ènèdondabi. Nëbi Esusuidi tantiaquid nebi. Adembidi Esusuidi tantiata.

Èbi adsho tantiash chieshenda. Tauamboen èmbi Esus chuisho mimbi èbi chieshënenquio iccondac. ¹³Mibi yacno tauamboec choshon daicsabudtsëcshumbi mibi Esusèn naid chuibanondambi. ¹⁴Istiapicpambo yec daicsabudacshobi mimbi èbi cacumenquio iccondac. Èbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bèda choacbimboecnuc mibi cuishonquiondac. Nuquin Icbo Esuquidistu choacbimboecnubidi mibi adondac. ¹⁵—Min èshë chicshun èbi mene —èmbi cac mimbi èbi menetsenondac. Aden èbi mimbi tantiaquiondac. Adondaidi ¿atotsi quiash chieshcueno? ¹⁶¿Nëid abimbo chuiquindambi mibi chieshëmpe? Padenquio iquembi. ¿Aden chuisho mimbidabi chieshëmpe?

¹⁷Ista. Esus chienquio icquidon ambi chiacpadomboen mibi nametiadquio iqueque. ¿Mibi tantiaquioquin bédamboen namenuenda mibi chuipec? Padenquio. Èbi chieshëmenuembien ambi chiacpadomboen mibi nametiadquio icchitec. Mibi abibi tantiamenuen naic. ¹⁸Èmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi èmbi chiaidquio tantiabenondac. Èbèd icquimbi Esus bédamboen tantiaboedombi èbi nidtsëcnubi mimbi badedi utsi tantiac. ¹⁹Aden mimbi naid tantiac mibi unësquio iquec. Anin bacuë tantiacbimboen mibi tantiaquiemi. —Esusbimboec icpashun. Aid tantiec ambi chiacpadec bédamboec tabadpashun —quequin mibi tantiemi. ²⁰Mibèd icquin bëisquioquin mibi chuitsiambi. Mibèd iquenquio icquimbi mibi bëisquioquin chiacbimboen dada uaquin mibi naden chiemi. —¿Atotsieshun Esus tantienquio yanoao? —caimbi.

Abadauanën mado daëd chiaid

²¹ ¿—Moisesën chiacpadomboenuidi naquin Nuquin Papa bédamboen ismembi — quequido icquinda mimbi Moisesën chiampid bédamboen tantieque? Tántia. Mibi chuinu. ²²Naden chuiquin Moisesën dada uapampic. Abadauanën madombo daëd icpampic. Aton chidon yuaid chido bedshun tishmiaid abentsëc icnuc aton shanunquio aton chidon tishaid abentsëcbidi icpampic. ²³Abadauanën chudac badedquio bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac —quequin ambi chiacpadomboen Nuquin Papan naidopenquio icmiac aton mado tishpampic. ^{24–25}Aidi Sada nepampic. Chido yuaid Acad nepampic. Aidën tishaid yec aton mado yuabidi nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquiobidi Edusaden yacnocquido iquec. Esus tantienquio yec Moisesën chiaiduidi tantiate bunquiec. Nidaid utsi Adabia caid yacno macuësh dapa Sinai caidëshun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. ²⁶Edusaden caid utsi iquec. Nuquin Papa tabadacnombo Edusaden caoapec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquio iquendac. ²⁷Nuquin Papan ambi chiaid dada uamepampicpadec Esus tantiaquido dadpenquio iquendac. Naden dada uamepampic.

“Tántia, chido. Naido icsho mibi chuinu.

Bacuë tishtiapimbo yequi bédambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi Bacuë nibëdquidën min matses dadpenquioshë yanendac,”

quequin ambi chiaid Nuquin Papan dada uamepampic.

²⁸Tántia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bédamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiaquo Nuquin Papan: —Con mado nec. Con champi nec —nuqui caindac. ²⁹Ënden Nuquin Papan naidopenquio icmiampidën mado chieshënuquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshëndac. ³⁰Aden Abadauanën mado bëyucquidën aton utsi chieshësho isun ¿atotsi Nuquin Papan Abadauan chuipampic? “Tántia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquio caidmequin bédamboen tabadmembi. Yuaidën madoembi padenquio iquendac,” quequin Nuquin Papan Abadauan chiaid dada uapampic Moisesën. ³¹Sada caidën mado Isac caidpadquid yuapenquio nuqui nec. Esus tantiaquo Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bédamboen ismec —quequin Esusquido tantiaquid yec: —Ëmbembi Moisesën chiactedi naquin Nuquin Papa bédamboen ismembi —quenquio icnuna.

Esus tantiasho Nuquin Papan bēdamboen iste chiaid

5 Aden: —Esusēnuidtsēqui Nuquin Papa ēbi bēdamboen ismec —matses camenuc abided ciudadec Esus unēspac caondashe. Aidquio tantiata. Muaquidēn: —Moisesēn chiampicpaden nasho Nuquin Papan nuqui bēdamboen itsiashe. Aidēn chiapaden nanuna —quequin chuisho tantienda. Aden muaquin chiapaden naic isadaidbo tsusedpan yuabimboec mibi yantsiaque.

² Mimi isondaïd Pabado nebique. Tantia. Mibitēdi chuinu. Moisesēn chiatedi naqid Nuquin Papan bēdamboen iste danquin Esus tantienquio yanec muaquidēn chiapadec shui dēbid dēteshuniadacsho isun Esusēn Nuquin Papa mibi bēdamboen ismetiapimbo ictsiashē. Adenda. ³ Aden Moisesēn chiaid abentsēc natsēcshun aidēn chiaid utsitēdi nainquio icsho Nuquin Papan mibi bēdamboen istiapimbo ictsiashē. Moisesēn dada uapampiduidi namenuequido tanenda. ⁴ Aido Esus tantiesabo nec. Aden abi bēdamboec ismianquid Esus tantienquio icsho Nuquin Papan aido bēdamboen istiapimbo iquec. ⁵ Esus tantiaquidoen Nuquin Papan Mayanēn tantiamiacpaden naden tantiec. —Esus tantiashouidi ambi chiaid niacniacmaïdbimboecnuc bēdamboen isquin Nuquin Papan: “Mibi bēdambo iquec,” nuqui caindac —quequin nuqui tantiec. ⁶ Shui dēbid dēteshuniadēn Esus tantiasho Nuquin Papan bēdamboen isec. Adembidi shui dēbid dētiacmaïdonsen Esus tantiasho Nuquin Papan bēdamboen isoaic. Aden Esus tantiabenash: —Ambi chiapadomboen Nuquin Papan matses tantiaquid ēbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

⁷ —Bednu —quequin nadancacimboen aiduidtsēqui tantiaquin mimi Esusquio tantiondac. ¿Tsuntsin muaquin chiac Esus tantienquio mimi yanoape? ¿Atotsiequin abimbo chiaid niacpe? ⁸ ¿Nuquin Papan nacta Esus tantienquio yano? Padenquio. Ma aidēmbi mibi Esus tantiametiadquio yoc. ⁹ Muaquido tantienda. Nadquio aid iquec. Tosho bedquid abentsēcshun bedmebanac abitēdi toshoqueuededec. Adembidi muaquid abentsēcshun chiac matses dadpēshun abimbo tantienquio yantsiashe. Muaid tantienda. ¹⁰ —Nuquin Icbo Esusēn tantiamiac ēmbi chiapadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

¹¹ —“Con tsusedpan chiapaden shui dēbid dēteshuniaduidtsēqui Nuquin Papan bēdamboen itsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ēmbi chuisho adembidi chuiquidon chieshēnenquio ictsenoshi. Esus chienquio icsho ēbi chieshēnenquio ictsenosh. Abi tantiaquid cuidmenquio icnuec abided ciudadec unēsaid Esusuidi chuisho mabi chieshēmpaboc. ¹² Mibi muaquin chuiquido Moisesēn dada uapampiduidi namenuequido caic: —Auēshquio cuemēpashun —caimbi.

Esus tantiaquido bēdamboec tabadte chiaid

¹³ —Ēbi cuidmenquio icnuec abided ciudadec unēsaid Esusquio tantiasho Nuquin Papan ēbi bēdamboen isec —camenuc Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ēbi icsate bunaid nanu —quenda. Nēbi Esus tantiaquin mibi icsate bunaid ēnquin mēmunta. Esus tantiaquido yec tantiananquiec nashunanta. ¹⁴ Adomboen Nuquin Papan Moises naden chuimiapadomboen mimi natsiac. “Mibibi min dada datantiadacimboen utsi-

botsen bédamboen tantiaquiota,” quequin Nuquin Papan ambi chiaid Moises dada uamepampic. ¹⁵—Opa penantiadpambo yacbimboec nēishnanash chushcananosh —quiosh mibi caic. Aden naic mibi icsacuededeque. Esus tantienquio mimbi yaneque. Bédamboec tabadta.

Nuquin Papan Mayanën bédamboen tabadmete

¹⁶ Nuquin Papan Mayanën tantiamiacpadomboen naic bédamboec tabadta. Aden mibi icsate bunaid mimbi nainquio ictsiaic. ¹⁷ Nuqui icsate bunaid naiqui Nuquin Papan Mayanën tantiamiacpadec bédamboec tabadtiapimbo nuqui ictsiaic. Nuquin Papan Mayanën tantiamiacpadomboen tantiaquin nuqui icsate bunaid ênquin nuqui mēmuntsiac. ¹⁸ Nuquin Papan Mayanën tantiamiacpadomboen tantiec: — Esusēnuidtsēqui Nuquin Papa ēbi bédamboen ismec —qeshun: —Moisesën chiacetdimbo naquin êmbimbo Nuquin Papa bédamboen ismembī —quequin tantienquio nuqui iquec.

¹⁹ Nadquio icsateuīdi bunquid matses iqueque. Tantia. Chuīnu. Nēidic aton chidopenquio chudquido. Nēidic aton bēnēpenquio chudmequido. Nēidic dada daēd chichudnanquido. Nēidic opabimboec chudnante bunquin matses ismequin adoquido. Nēidic tsienbēdta shui chuibudquin icsamete bunquido. ²⁰ Nēidic Nuquin Papan chiaid niac-niacquin ambi matsesbimboecnuc nacnenaidi papa caquido. Nēidic nēnēchoquido. Nēidic dauē icsa bedash icsa uanquido. Nēidic chieshēmēnquido. Nēidic chieshēmēnec chushcananquido. Nēidic cudasquido. Nēidic nēishēmēnquido. Nēidic ambi naiduidi naquido. Nēidic abitedi cuēsh-cuēshēdmianquido. Nēidic: —Utsin chiaid tantiatiapimbo iquebi. Êmbentsēqui bédamboen chiembī —quequido. ²¹ Nēidic utsin na natiambo bunec chieshēmēnquido. Nēidic tantiadenuen paēmbo icquid acquido. Inchēshēn ushenquio icquin adoquido. Adquidtedishun icsamboen naic. Adec abi icsaid êntiapimbo yec unēsash Nuquin Papa yacno tabadtiapimbo iquec. Aden mibi chuibanondambi ênden.

²² Padnuen Nuquin Papan Mayanën namiaid yec nadquiec tabadquid. Nuquin Papabēdta matses tantiaquiec tabadquid. Esus tantiec cuishonquec tabadquid. —Nuquin Papan ēbi bédamboen isec —quec bédambo yec dacuēdenquio yec tabadquid. Utsibon chieshēnaqui chieshēmēnenquio yec tabadquid. Nēishēmēnenquio yec tabadquid. Bédamboen isquin utsibo nashunec tabadquid. Muainquio yec tabadquid Nuquin Papan namiaid. ²³ —Con nauidi naimbi. Êbiuidtsēqui bédambo iquec —quenquio icquin utsibo bédamboen tantiec tabadquid. Abi icsate bunaid ênquin mēmunec tabadquid. Adquio yec Nuquin Papan Mayanën namiaido Esus tantiaquido bédamboec tabadtsiash. ¿Adec bédamboec tabadsho isunda: —Adec tabadenda —quequin Nuquin Papan Moises dada uamepampic? Padenquio. —Icsamboec tabadenda —quequin icsamboec tabadquid chuipampic. Nuquin Papan Mayanën tantiamiacpadec tabadquin aden chuipampid nuqui niaquenquio iquec. ²⁴ Adoenquio icquin cuesten dectanac abided cuidadec unēsaid Esus tantiaquin nuqui icsate bunaid ênquin nuqui mēmuntsiac. ²⁵ Aden icsamboen nainquio yec bédambo icnuna. Nuquin Papan Mayanën Esus tantiamiaid icquin aidēn tantiamiacpadomboen nanuna.

²⁶ —Êbiuidtsēqui bédambo iquec —quenda. Adenquio yec nuqui chuiquid dēniacte bunenquio yec bédamboec tabadnuna. —Êbi bunacpaden ēbi namianenquien

icchitec. Utsien namechitec —quec chieshëmë nec tabadenda. Nëishnanenquoio yec bédamboec tabadnuna.

Esus tantiaquido bédamboec isnante chiaid

6 ¿Nuquin Papan Mayanën tantiamiacpadomboen bédamboen tantiaquidta icpec? Adquidën abëdtan Esus tantiaquidën icsamboen nasho isun: —Padi. Esus tantiaquid adesambo neque. Bédamboec tabadta —caquid yendac. —Nëishec ëbit-sen icsamane —qeshun nëishenquoio icquin aden chuiquid yendac. Abibi datantiadec: —Icsaquid nebi. Esus bédamboen tantienquoio yec adecbidi icsatsiabi —quequin tantiec: —Bédamboec tabadta —quequid yendac. ²Adec bédamboec isnanec: —Bédamboec tabadnuna —quec chuinanquiota. Adecbidi nashunanquiota. Aden naquin Nuquin Icbo Esuquidistun chiacpadomboen mimbi natsiac.

³Utsien: —Utsibëd onquetiapimbo iquebi. Èbiuidtsëqui bédambo iquebi —quec abibi muuadquid icsambo iquec. ⁴Adenquoio yec mibibi datantiadta. —¿Nuquin Papan chiacpadectabi bédamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bédambo icta. —Utsitedi icsambo icnubi ëbiuidtsëqui bédambo iquebi —quenda. ⁵¿Mimbi utsibon naid chuibanshoda Nuquin Papan: —Mibi bédambo iquec —capatsiash? Padenquoio. Mimbi bédamboen naid isun: —Mibi bédambo iquec —catsiash.

⁶Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷Piacbo sequidbimboec matses iquec. Tantienquoio icquidën icbompin uestsaidi siac canienquoio ictsias. Padnuen tantiaquidën ëshë bédaidquio siac bédamboec canitsias. Tantienquoio icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unësash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unësash Nuquin Papa yacno nidendac. Èbi adsho tantiash: —Icsaido Nuquin Papan cuidenquoio ictsias —quec muaic tabadenda. Ambi chiacpadomboen mibi cuidendac. ⁸Ambi chiaid niac-niaquec abi icsate bunaiduidi naquid cuidendac. Nuquin Papan Mayanën tantiamiacpadomboen naquidien bédamboec tabadec unësash Nuquin Papa yacno tabadendac. ⁹Èmbi aden chuisho tantiash bédamboec tabadta. Bédamboec tabadec chieshtoenquoio icsho isun ambi tantiacpadën Nuquin Papan abëdi nuqui tabadmendac. ¹⁰Adec bédamboec tabadquin utsibo bédamboen isquin nashununa. Aden utsibo bëdiactsëc tantiec Esus tantiaquido yec tantiananquieq nashunanquionona. —Shubu abentsëquën tabadquidobimboec Esus tantiaquido iquec —qeshun adonona.

Pabadon ënquimbi chiaid

¹¹Is. Nua-nua icnuc dada uaquin ëmbimbo ënquimbi dada uanu. ¹²Muaquin chuiquidon mibi con tsusedpan chiacpadomboenuidi nametiadquio iqueque. Aidon chuisho tantienda. Con matses isadaidbo: —Mibi bédambo iquec —camenuen mibi adometiadquio iqueque. —Esusuidi chuisho con matsesën chieshënquin cuidnushe. Moisesën chiacpadomboen namenu —quequin mibi shui dëbid dëteshunemetiadquio icchitec. Aido muasho tantienda. ¹³Aden mibi: —Adota —caquidombi Moisesën chiactedi nainquien icchitec. Adquid yec: —Is. Bédambo iquebique. Èmbi chiacpadomboen nëidon naosh —quenuembien mibi shui dëbid dëteshunemetiadquio icchitec. Aidon chiacpadomboen nainda. ¹⁴Èbien adtiapimbo iquec. Esus

tantiesabimboec: —Ĕbibi bēdambo iquebi —quetiapimbo iquebi. Esusuidtsēqui bēdambo iquec. Abi tantiaquid cuidmenquio icnuec abided cuidadec unēspac caondash cuesten dectanac. —Aidquio tantiec bēdambo iquebi —caimbi. Aden Esus tantiec: —Ĕmbimbo Moisesēn chiacdedi naquin Nuquin Papa bēdamboen ismembi —quec ēnēdondabi. Adecbidi Esus tantiec ēbi bunaid ēnash icsate bunenquio iquebi. ¹⁵—Moisesēn chiacdedi naquiduidi Nuquin Papan bēdamboen istsiash —quetiapimbo iquebi. Shui dēbid dēteshuniadēmbi Esus tantienquio icsho Nuquin Papan cuidtsiash. Adembidi shui dēbid dētiacmaidēn Esus tantienquio icshobidi cuidtsiash. Nuquin Papan Mayanēn chuca uaidien Esus tantiaquid Nuquin Papan bēdamboen isquin bēdamboen tabadmec. ¹⁶Ĕmbi aden chuisho tantiash: —Ai, abimbo mimbi caique. Adonona —quesho: —Aido Nuquin Papan bēdamboen isquin bēdambo icmepashun —caimbi. Adquido Nuquin Papan: —Con matsesquio nec —caindac.

¹⁷—Abimbo chienquien icchitec —ēbi cainda. Esusēn chiaidquio chiombi. Aidquio tantiaquin ambi chiacpadomboen nabanta. Ĕmbi Esusēn chiacpadomboen nasho isun chieshēnquin cuesaniondashi. Cuesonaid bish abi iquec. ¹⁸Tantia, con utsibo. Mibi Nuquin Papa chianembi naden. —Mimbi nabocpadomboen con Icho Esuquidistubēdtan Cadasia yacnocquido bēdamboen ista, Papa —quequin Nuquin Papa chianembi. Padi. Aidedi chuiquin dada uaombi.

EPESO YACNOCQUIDON ISTE

1 Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Adquidquio icquin mibitedi Nuquin Papan bēdamboquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onqueducuedta.

² Aden Nuquin Papan bēdamboquid icmenu caidombo icquin ma Nuquin Papan Nuquin Icbo Esuquidistubēdtan ēnenquiocquin ēbi bēdamboen isec, quequin mibitedishun tantiapashun. Adembidi, Nuquin Papan bēdambo icmenu caido yec abēd iquebi, quequin tantiapashun mibitedishun.

Nuquin Papan abēd abuc bēdamboec tabadacpadquiocnoc icmiaid

³ Edoen, Nuquin Papa, Nuquin Icbo Esuquidistun Papa bēdamboquid nec. Esuquidistu adquidquibidi neoaic. Aid tantiaquid icsho abēd abuc bēdamboec tabadacpadquidquio nuquitedi icmiac. Adoaid yec, Mibi bēdamboquid nec, Papa, quequin chiec nuquitedi onquedenec. ⁴ Nidaid abubēdta uabicquin aidēnquiocquidtedi uabicquin, Nēidtedquio Esuquidistu tantiaquido icsho ěmbi cuēmbanaido iquendac, quequin Nuquin Papan tantiapampic. Ambi tantiapicpaden ma nuqui icsaisa icmepanuna. Aden nuqui tantiaquin ⁵ abi bunacpadomboen Nuquin Papan, Esuquidistu tantiaquido con bacuēbo icmendambi, quiampicpadomboen nēbi adobanec. ⁶ Esuquidistu tantiaquid nuqui icsho abēd icquid nuqui icmenuen Nuquin Papan abi yacpadquidquio icmēbanec. Adoac, Bēdamboquid mibi nec, Papa, quequin Nuquin Papa nuqui chuidenec. ⁷ Matsestedi icsaid bedshunacsho Nuquin Papa cudasaidquio Esuquidistu icsambocquidbimboecnuc cuesten dectanquin unēs uapanēdash. Adosho isash, Nēbi Esuquidistu tantiaquid ěmbi bēdamboen isaidquio nec. Mibi cuidenquio yec mibi icsaid bēpiscudobi, quec Nuquin Papa. ⁸ Naden nanuna, quequin ambi tantiapicpadomboen aton bacuē icmēbanac abēd icquido nuqui nec. ⁹ Abi bunacpadomboen, Icsaquid cuidte bedshunash unēsquid con Mado Esuquidistu iquendac, quequin ambi matses tantiamenquio icpampid nēbi ambi cuēmbanaido Nuquin Papan tantiamēbanec. ¹⁰ Adoaid iquec con mado abun icquido nidaid yacnocquidobēd chuiquid abentsēqui iquendac, quequin Nuquin Papan tantiapicpadquibidi adquidquio icmenu caidquio Esuquidistu iquendac.

¹¹ Esuquidistu tantiaquid icsho isun ambi tantiapicpadomboen, Con bacuē icmiado nec, quequin Nuquin Papan cuēmbanaido ¹² abia tantiaquido nuqui bēdamboec tabadsho isash, Nuquin Papa bēdambo iquec, quequin chiec ma utsibo cuēdēmpanuna. ¹³ Mibi icsaid bedshunash abided ciudadec Esuquidistu unēsapanēdash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec. ¹⁴ Aidēmbi mibi bēdambo icmiac Nuquin Papabēd tabadendac. Mibitedi bēdamboec tabadsho isash Nuquin Papa bēdambo iquec, quequin chiec ma utsibo cuēdēmpanuna.

Nuquin Papa chiec onquianiaid

¹⁵ ¿Bēdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid

yanash abipadquid utsibo tantiec abëd icte bunanec iccuededec, quequin chuisho tantiapombi. ¹⁶ Aden tantiashun mibitedi bëpiscudenquiocquin badiadquidën-badiadquidënkien naden Nuquin Papa chian-chianembi. ¹⁷ Esuquidistun Papa, icsaisambo, tantiaquidquio mibi cadoque. Mibi bëdamboen tantiaquid yacpadquiocnoc min bacuëbo Epeso yacnocquido min mayan icmeban, Papa. Adquido min Mayanën icmiac mibi tantiadonequidombo ma icpanuna. ¹⁸ Adecbidi, Abuc ëbëdi mibi iquendac, quequin mimbi chiacpaden tantiamequin pausunac mibëd icnequin cainquidombo Epeso yacnocquido ma icpanuna, Papa. Aidën tantiamiac, Mibi yacno Esuquidistu tantiaquid utsibobëd bëdamboec tabadendabi, quequin Epeso yacnocquidon ma tantiapanuna, Papa. ¹⁹ Aden tantiamiac Nuquin Papan nadatiambocquin nabanquin Esus unësacsho uincuemënëdacpaden ëbi uincuemendac. Adembidi nadatiambocquin nabanquin Esus tantiaquid ëbi icmiac. Adembidi ëbi bëdamboquid icmebanec, quequin ma Epeso yacnocquidon tantiaquiopanuna, Papa. ²⁰ Esuquidistu unës uacsho uincuemeshun mibi yacno aidi indoshon min dayunquio mimbi tsadumpanëdac, quequin tantiec Nuquin Papan nadatiambocquin naidquio nec, quequin adomboembidi ëbi indoapec, quequin tantiacpadomboen ma Epeso yacnocquidon tantiapanuna, Papa. ²¹ Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibëdec, quequin Esuquidistu min dayunquio tsadunquin utsibo mimbi ismepanëdac, Adquid nebi, chuiquid utsi quetiapimbocnoc. Nuquin Papan nadatiambocquin nac ënenquiocquin abitedi chuiquidquio Esuquidistu iquendac, quequin Epeso yacnocquidon ma tantiaquiopanuna. ²² Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec. ²³ Ambi ëndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsëcquiobi Esuquidistu icquin abëd icquido nua pausunaido yec abi yacpadquio ictequid yec abentsëc yacbimboec abëdi nuqui tabadendac.

Nuquin Papan Esuquidistubëd icmiaido

2 Mibi icsaquid yec Nuquin Papabëd ictiapimbo iccondac. Adboedi nëbi aidëmbi ënenquiocquin abëd icquido mibitedi icmiac. ² Ënden Nuquin Papa chieshënkien mimbi tantiacpadomboen nabanondac. Adquid icsho Nuquin Papa chieshënkid dapan Satanasën yuaido mibi iccondac. Aidën Nuquin Papan chiaid niacacpadomboen mibitedishun niacbededpondac. ³ Adquiduidquio yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobëdta Nuquin Papan cuidnu caido nuquitedi icpondac. ⁴ Adec cuidnu queboedëmbi nuqui tantiec unësquiocquin Nuquin Papan comapenen nuquitedi tantiamepondash. ⁵ Ambi cuidnu caido icsaquido yec abëd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abëd icquido Nuquin Papan nuquitedi icmiac. ⁶ Esuquidistu nuqui icsaid bedshunacsho abided cuidquin unës uapanëdash. Unësacsho isun uincuemeshun abi yacno Nuquin Papan indopanëdash. Adshun abi tantiaquidtedi abuc Esuquidistubëdta ambi indoacbimboecquido icsho Nuquin Papan nuqui bëdamboen isec. Adecbidi abuc Esuquidistubëd icquid nendabi, quequin tantiec nuqui tabadec. ⁷ Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubëd icquido nuqui icmec.

Ma adquid icsho isash utsibo, Nuquin Papan naid nec, ma quepanuna. ⁸Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ĕmbibi tantiambi, quetiapimbo nuqui icnubi, Mibi tantiamiom-bique. Ĕbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abĕd icquido nuqui nec. ⁹Icsaquido icquin bĕdamboen naic nuqui icsaid cuidadiapimbo nuqui iquec. Bĕdamboen naic cuidadpebi, quiash abi icsaquid yequi, Bĕdambocquid nebi, quec tabadsho isun utsibon icsamboen tantianushe queshun Nuquin Papan icsaisa aton Madoded cuidpanĕdash. ¹⁰Nuquin Papan uaido nuqui nec. Aidĕmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

Esuquidistubĕd abentsĕc yaczimboecquido

¹¹Nuquin Papan, Cuidnu, quenquiocquin comapenen tantiamiaidquio mibitedi icquin mibi ĕnden tabadaid tantiata. Shui dĕbid dĕtemesa isadaidpembo nec, quequin isadaidbon shui dĕbid dĕtemequidon mibi cuĕnondash. Nuquin Papan matsesquio nebi, quequin shui dĕbid dĕtemequidquio isadaidbo nec. ¹²Adquidquio isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, Ĕbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abĕdi ĕnĕdenquio yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac. ¹³Adec aid tantiesa yec icsaquid yec, Nuquin Papa yacno puduednu, quetiapimbochoedi, Matses icsaid bedshunash abided cuidadec Esuquidistu unĕspanĕdash, quequin tantiaquid icsho aidĕnquio abi yacno yuedendac. Nĕbi aid tantiaquid yec abi tantiaquid utsibobĕd abĕdi tabadaczimboecsho Nuquin Papan nuqui bĕdamboen isec.

¹⁴Isadaidpembo isash isadaidbo, Ĕbĕd icquidpenquio nec, quequin tantiec datamĕncuenepondash. Adecbidi isadaidbo isash adquiecbidi isadaidpembo datamĕncuenepondash. Adquido icboedi ĕbi icsaid bedshunash Esuquidistu unĕspanĕdash, quequin isadaidbo utsin-utsinquien tantiec. Adembidi isadaidpembo utsin-utsinquien aid tantiec. Adec aid tantiaquid yanash datamĕncuenenquio yec matses abentsĕc yaczimboecquido yanac. ¹⁵Esuquidistu matsesash nidaidĕn tabadquin isadaidbo icquin isadaidbon, Naden nata, quequin chiacpadomboen utsitedishun natiapimboconobi Esuquidistun uesquin nabampanĕdash icsainquiocquin. Adec tabadquin naimbudsho icsaquidzimboecnuc unĕs uapanĕdash. Aden unĕsmesho isec Nuquin Papa, Padi. Chĕn, quenquio icpanĕdash. Ĕbi yacno isadaidbo isadaidpembobĕdtabi con madon yuedendac, quiash chĕn quenquio icpanĕdash. Datamĕncueneboedi aido Esuquidistu tantiaquid yanash datamĕnenquio yanac. ¹⁶Naden nata, quequin chiaidtedi nuqui natiapimboconoc nuqui icsaid bedshunash Esuquidistu unĕspanĕdash, quequin tantiaquido isadaidbobĕdi isadaidpembo yanac. Ambi tantiaid Esuquidistu yanash datamĕncueneboedi adec datamĕn quetiapimbo yanec Esuquidistun shubun icquido yanoaic. ¹⁷Matsesedi bĕdamboen iste Nuquin Papa bunec quequin ambi chuibeniacpadec abided matses icsaid bedshunash unĕsqin isadaidbo isadaidpembobĕdta Nuquin Papan bĕdamboen isaido icmepanĕdash. ¹⁸Adoac nĕid isadaidbo nec. Nĕidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton

Mayan meniac. Aden meniac aidën tantiamiac, Mimbi ëbi tantiec, quec Nuquin Papa chiec Esuquidistu tantiaquidombo onquedeneq.

¹⁹ Aden chiec onquec ambi yuedtiapimbo icboedi nëbi Esuquidistu tantiaquido yanash Nuquin Papan shubun ënden icnëdaidobëd tabadtequid mibitedi iquec. ²⁰ Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquio isadeque. Chuinu. Tantia. Esuquidistu abia yampid abi yacno yuedanquidquio yec abia nitsinaid cuate nidquidbimboecquid nec. Nuquin Papan chiaid chuibampampidobëd Esuquidistun ëbi chuibeneta caido shubu nitsinaidbimboecquid neoaic. ²¹ Aided abia icquid icnuc isadaidbobëd isadaidpembo Esuquidistu tantiaquid dadpen yansho Icbon tabëcshun tanebanaidbimboecquido neoaic. Abi tabadte Icbopadquid icsaisa yampec. ²² Mibi Epeso yacnocquido Esuquidistu tantiaquid utsibobëd Nuquin Papan Mayan meniaid yec Nuquin Papa tabadtebidi mibi nendac.

Isadaidpembo Esuquidistu chuibenequid Pabado

3 Isadaidpembobëdi ma Nuquin Papa tabadte icnu quequin Esuquidistu chuibenesho quënën nauedaid icquin aidën chiacpadomboen mibi chuibanquidquio nebi. ² Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. ³ Ebi yacno yuedanquid Esuquidistu iquec, quequin Nuquin Papan tantiamiacpaden ënden dada uaquin mibi chiondami. ⁴ Eëmbi dada uaondaïd bëdamboen isec onquequin Nuquin Papan ëbia Esuquidistu tantiamiacpaden mimbi tantiapec. ⁵ Eëndenquio Nuquin Papan Esuquidistu nidmimbi, quequin chienquiocpampidëmbi nëbi ambi, Esuquidistu matses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidëmbi aton Mayanën tantiamiac. ⁶ Ambi nëbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobëd Nuquin Papa yacno ënëdenquio yec tabadtequido nendac.

⁷ Nuquin Papan, Cuidnu, quenquiocquin nadatiambocquin ëbi ismiaid yec ambi Esuquidistu chuibeneta caid ambi namiaid icsho ambi nadatiambocquin nabamiaidquio nebi. ⁸ Esuquidistu tantiacbicquid utsi bëdiactsëc icsaquid icnubi comapeneq icsaquidquio icsho Nuquin Papan Esuquidistu tantiaquid icmeshun Esus bëdambo yaidbëdtabi abëd tabadte bëdaïdquio tantiamequiopondashi. Adembidi ambi, Esuquidistu chuibeneta, caidquio nebi. Adquid icquimbi Esuquidistun matses bëdamboen tabadmenu, quequin tantiaid dadpen icnuc aïdtedi uesquin chuitiapimbo iquebi. Aïdtedi matsesën bëdamboen tantiatiapimbo icoapec. ⁹ Eëbëdtambi abitedi uampidquio Esuquidistu aid tantiaquido ëbi yacno yuedquid iquendac, quequin Nuquin Papan tantiamenquiocboedi nëbi matses tantiamenuen Esuquidistu chuibeneta caidquio nebi. ¹⁰ Aden ëbipadquidon Esuquidistu chuibeniac icsaquid icboedi Esuquidistu tantiaquid dadpen yanac. Adsho isun aïdtedi Nuquin Papan Esuquidistubëd abentsëc yacbimboecquid abipadquid ambi tantiampicpadomboen icmebanec. Aden icmebansho isun abi yacno tabadquin namequidon tantienquiocboedëmbi nëbi tantienac. Nuquin Papan, Yucshun naden nanuna, quequin ambi bëdamboen tantiampicpadomboen nabanac nëbi abëd icquid dadpen iquec, quequin Nuquin Papan abi yacnoshon uaidon tantiec. ¹¹ Matses bëdambo icmetequid Esuquidistu iquendac, quequin ambi tantiampicpadomboen Nuquin Papan Es-

uquidistu Nuquin Icbo icmepanëdash. ¹²Aton mado Esuquidistu ëbi icsaid bedshunash unësash uincuenash Nuquin Papan dayunquio iquec, quequin tantiec dacuëdenquio yec Nuquin Papa chiec nuqui onquec. ¹³Adecbidi, Esuquidistu chuibenesho bedshun Pabado quënën nauedac, quequin tantiec chieshenquiocquin Esuquidistu tantiata, Epeso yacnocquido mibi caimbi. Ëmbi chuibanac Esuquidistu tantiaquid yansho Nuquin Papan abëdi tabadmenuequin Nuquin Papan ambi, Bëdamboquid icmenu, caid mibitedi neque. Chieshenda. Adembidi Pabado chiac ëbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

Epeso yacnocquido tantiec Nuquin Papa chiec Pabado onquiaid

¹⁴⁻¹⁵Nuquin Papan isadaidpembo Esuquidistu chuibeneta cac, chuibenesho quënën nauedaid icquin ëmbi chiac Esuquidistu tantiaquid isadaidbobëd isadaidpembo Nuquin Papan matses yanash aton shubun icquido nec. Nuquin Papan cuëmbanaido nec, quequin tantiec danëshën sebudash aid naden chiec onquebi. ¹⁶Mibi icsaisa icquin mimbi tantiacpaden Epeso yacnocquido nua pausun, Papa, ma natiantequid icnuc Esuquidistu tantiesa yanenquiocpanuna. ¹⁷Aden pausunac ma aido Esuquidistu tantiadonequidombo icpanuna. Aido mimbi tantiamiac ënëdenquio yec utsibëd tantiananec tabadquid ma Epeso yacnocquido icpanuna. ¹⁸Aden pausunac, Ëbi utsibobëdta comapenen tantiaquid Esuquidistu nec. Ambi bëyuc matses uaid tantiaquinc, aidën tsyuecquid ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aidtedi icsaid bedshunasho Nuquin Papan cuidpanëdash, quequin ma Epeso yacnocquidon tantiappanuna, Papa. Adembidi abuc bëdambochë yacno icboedëmbi matses icsaid bedshunasho Nuquin Papan cuidpanëdash, quequin ma Epeso yacnocquidon tantiaquiopanuna, Papa. ¹⁹Aden tantiaquidquio yec Esuquidistu unësnëdash, quequin tantiec papudedash Esuquidistun matses tantiacpadquidquio Nuquin Papan ma mibitedi icmebampanuna.

²⁰Nadquid Nuquin Papan ëbi icmetsiash, quequin nuqui tantiatiapimboçnobi natiambocquin nabanquin ambi tantiacpadomboen abi yacpadquidquio nuqui icmebanendac. ²¹Adoac ma abi tantiaquidon ënenquiocquin Nuquin Papan Esuquidistubëdtan naid chuibampanuna. Ma aidon tsyuecquidontsen adembidi chuiopanuna. Ma nuquin tsyuecquidon tsyuecquidontsen adembidi chuiopanuna. Ambi uaid utsitedi naimëdec, quenubi ma adomboembidi Nuquin Papan Esuquidistubëdtan naid matsesën chuibanoapanuna. Ai, ma ënenquiocquin adopanuna.

Abentsëc yacbimboecquido Esuquidistu tantiaquido

4 Nuquin Papan isadaidpembo Esuquidistu chuibeneta cac chuibenesho bedshun quënën nauedaid icquin naden mibi chiembique. Tantia. Esuquidistu tantiaquido aton shubun icquido yec icbo bëdamboec tabadacpadquiec tabadteneta. ²Utsi icsamboçsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. ³Nuquin Papan Mayanën abi utsibëd bëdamboec tabadaid tantiamiacpadquiec Esuquidistu tantiaquid utsibobëd bëdamboec tabadteneta. ⁴Esuquidistu tantiaquidtedi abentsëc yacbimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa

iquendabi, quequin abuc indotequid mimbi caintequid abentsēcquiobi iquec.
⁵ Abentsēcquiobi mibitedishun con Icho caid iquec. Abentsēcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsēc yac bimboecquid nec.
⁶ Abia yampid Nuquin Papa Esuquidistun Papambo abentsēcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bēdambo icmequid neoaic. Aidēmbi Esuquidistu tantiaquidobēd tabadnuequin abipadquid meniāc nuquibēd aton Mayan iquendac.

⁷ Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. ⁸ Ēndenquio chiampicpadembi nēbi pausumbanec. Naden ėnden chiampid neque. Tantia. Chuinu.

“Nuquin Papan abucquio indoac, Ēbi tantiaquidtedi ėbēdi tabadendac, quequin Esuquidistun bedbanshun buanac bimboecquido aido nec.

Nadquidquio iquendac, quequin ambi tantiacpadomboen pausumbanac,” quequin ėnden chiampid nec. ⁹ “Abucquio indoac,” quequin ėmitsipadomboen tantiampampiba? mibi quepec. Aidquio chuinu. Tantia. Esuquidistu abia yampid yec abucquio tabadboedi, Matses icsaid bedshunash ėbided cuidadnu, quianacsho nidaidēshun chidon tishpanēdash. ¹⁰ Aid nidaidēshun tishacsho unēs uacsho uincumequin Nuquin Papan aidquio abuc abi yacno indoshon abitedi chuiquidquio Esuquidistu icmepanēdash. Adquid icmiac ma ėbi tantiaquidobēd icpanueshun abipadquidquio aton Mayan aido menebanec. ¹¹ Aden aid menebanec aidēnquio Esuquidistu tantiaquido utsi-utsien nadquid icmebanec: Esuquidistu chuibenequid utsi-utsien icmebanquimbi, Nuquin Papan naden nanuna, quequin chiaid chuibanquid utsi-utsien icmebanoaic. Adquid icmebanquin utsi-utsien Esuquidistu chuibenequidon, Esuquidistu chuibanta, caidbidi aido icmebanquin utsi-utsien abēd iccuededquido isbanquin chuiquin tantiamequid icmebanoaic. ¹² Bēdamboec tabadtenequido ėbi tantiaquidtedi icmeta, cac aidēn tantiacpadomboen adquido icmebanec ¹³ ma shubu dapan icquid dadpen yanec abentsēc yac bimboec abi tantiadonequido icpanuna. Aden Nuquin Papan mado tantiadonec ambi uesquin pausunaidquio yec abipadquidquio iquec icsaisa iquendac.

¹⁴ Ambi pausunaidquio icquin abimbo chiac bimboen utsibon chuisho tantiabenabicquidēn badedquio tantiacpaden tantienquio nuqui iquendac. ¹⁵ Tantaranec abimbo chuinanquido Esuquidistu tantiadonequido icmiac chuiquid Esuquidistupadquid yanash abēdi abentsēc yac bimboecquid nuqui yanendac. ¹⁶ Ēbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abēdi abentsēc yac bimboecquid nuqui iquec. Esuquidistun pausunacpadomboen abentsēcshun-abentsēcshunquien nabanequi tantiananquiec abi tantiaquidtedi Esuquidistupadquidquio abēdi abentsēc yac bimboecquid yanendac.

Esuquidistun nua pausunacpadquiec tabadteniaid

¹⁷ Esuquidistubēd abentsēc yac bimboecquid abi tantiaquidtedi iquendac, quiash, aidpadquid icnu, quec ėnden icsamboec tabadnēdacpadquiec tabadenda caimbi mibi. Esuquidistun ėbi chuibeneta caidquio icquin dada uaquin mibitedi aden chiembi. Esuquidistu tantiesan ambibi tantiacpadomboenuidi tantiec. Adecbidi ambibi tantiacpadomboen nabanec. ¹⁸ Pashuac bimboen tantienquio iquec. Nuquin Papan bēd tabadte iquec, utsibo qesho tantiesa yec, Tantiatiapibi, quepec aido. ¹⁹ Ic-

saquid nebi, quequin badedquio chienquio aidon iquec. Adquid icsamianquidën yuaid yec, Icsanu, quiacpadec tabadec. Adec icsasho utsin istemaid nec. ²⁰ Adpenquio Esuquidistun tantiamequin pausunaid iquec. ²¹ Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiaashun Esuquidistu chuibenequidon, Abëd icquid yec abipadquid yanebi quec adquiecbidi tabadteneta, quequin mibi chuipondash. ²² Adoac mimbi tantianëdacadec tabadoaında. Mibi ënden icsamboec tabadacpadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac. ²³ Mibi icsate bunaid ënta. ²⁴ Adsho isun ma Esuquidistun tantiacpadomboen tantiapanu qeshun Nuquin Papan Mayanën mibi nua pausunendac. Adoac adomboembidi mimbi tantiapec. Adecbidi aid bunacpadquiec bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac. ²⁵ Adquid icnuec Esuquidistun shubun icquido nebi, quec muainquio yec Esuquidistu tantiaquid utsibobëd abimbo chuinanquidombo icta. ²⁶ Nëishhec icsaında. Nëishash abi ushëmbi bëdanta. ²⁷ Satanasën yuanushe quiash badedquio bëdanta. ²⁸ Ampequid icboedi Esuquidistu tantiaquid yanshun ampenda. Adquid icboedi chonoadquid mitsana bedshun utsin na nibëdsho isun menequid icta.

²⁹ Icsaquid onquiacbimboec onquenda. Utsi tantiaquin bëdambocquid icmenuequin chiec onqueta ma Nuquin Papan aidtsen bëdambo icmepanu quiash. ³⁰ Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquio yampec. Aid unësquio icmenda. ³¹ Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquio yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. ³² Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin mibi icsamboen nasho isash chieshanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacpadquiec utsi icsaid bëpiscudoata.

5 Nuquin Papan bacuëbo yec ² tantiananec tabadteneta. Nuquin Papan chiampicpadquiec Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquio icsho isun Nuquin Papan bëdamboen isaidquio Esuquidistu icpanëdash.

³ Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Èbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. ⁴ Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamënshunesambo icta. ⁵ Chudtemaid chudnu, quequinuidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequinuidi bedquid yec Nuquin Papa yacno Esuquidistun shubun icquid ictiapimbo iquec. Aden nabanquid Nuquin Papabëd Esuquidistu con icbo nec, quetiapimbo icoaic. ⁶ Ambembi chiec onquiaid tantiesa icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. ⁷ Adquidbëd icsaında.

⁸Ënden Esuquidistu tantiesa icquin inchëshquiocnoc isacimboben tantienquo icboedi nëbi Esuquidistu tantiaquid mibitedi yansho ambi tantiamebaniaido icquin badiadnuc isucunacimboben tantiaquiota. Aden tantiec Nuquin Papan bacuëbo yec Nuquin Papan tantiamiacpadquiec bëdamboec tabadteneta. ⁹Esuquidistun ambi tantiacpadomboen pausunac abi yacpadquiec nuqui bëdamboec tabadtenendac. Adembidi aid yacpadomboen abimbo chuidenequid icta. ¹⁰¿Nadec tabadshodabi Nuquin Papan bëdamboen istiashe? Tanu, quequin adomboen nabanec tabadteneta. ¹¹Utsibëd icsainda. Utsi icsadenenubi mibi bëdamboec tabadtenesho isun abi icsaid utsin ëmpec. ¹²Icsaquidën ompoquin naid chuitemaid nec. ¹³Adquidën Esuquidistu tantiaquid bëdamboec tabadtenesho isun, Icsambocquid nebi, qeshun Esuquidistu tantiabempec. ¹⁴Bëdamboec tabadquin ismedeniac icsambocboedëmbi bëdamboen tantiabentsiash. Esuquidistu tantiaquido chuiquin dada uaid nad iqueque. Tanta. Chuinu. “Unëscimboben tantienquiocboedi isucunshun tantiabnacimboc bëdamboec tabadta.

Adquid icsho Esuquidistun mibi nua pausunendac.”

¹⁵Adec bëdamboec tabadnec Esuquidistun tantiamiacmaid tabadacpadec tabadenquo yec Esuquidistun tantiamiacpadquiec tabadteneta. ¹⁶Icsaquid dadpen iqueque. Aidpadquid iquenda. Esuquidistun pausunaid mibitedi bëdamboec tabadtenesho isec ma Esuquidistu tantiesa icboedi abi tantiaquid yampanuna. ¹⁷Mimbi icsamboen tantiacpaden nabanenda. ¿Atotsi mimbi ëbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. ¹⁸Icsachitomane quequin nua paëmbocquid aquenda. Aden aquec icsaindac. Icsate bunenquiocquin Nuquin Papan Mayanën tantiamiacpadomboen nua pausunaid icquin bëdamboen nabanta.

¹⁹Adec icsate bunenquiocquin Esuquidistu tantiaquid utsibobëdtan Nuquin Papan chiaid chuiquinc, chuiquid dapa Dabidën dada uampid sadmo caid utsi-utsien chuiquinc, cuëdënte utsi chuiquinc cain chiec cuëdënteneta. Adec cuëdënquin Nuquin Icbon naid chuideneta. ²⁰Esuquidistu tantiaquid icsho Edoenën Nuquin Papan bëdambo icmiaidtedi yec aidën naid chiec onquedeneta.

Utsi tantiaquin nashunta quiaid

²¹Esuquidistu con icbo nec, quequin ambi chiaid niacmane qeshun utsi tantiaquin nashunta.

²²Adembidi Esuquidistun chiapadomboen dadan inaidën min bënën chiacpadomboen nabanta. ²³Adembidi abi tantiaquidtedi chuiquidquio Esuquidistu nec. Abi yacno indoshon ënëdenquo yec icsainquiocnoc tabadmendac. Adembidi aton chido chuiquidbidi aton bënë nec. ²⁴Esuquidistun chiapadomboen abi tantiaquidon nabanacpadomboen aton bënën chiaid naquidquio aton chido neoaic.

²⁵Esuquidistu abuc tabadboedi abi abuc bëdamboec tabadtequid tantienquo yec unës uanushe quenquo yec matses tantiec nidaidënshun tishaid yec matses icsaid bedshunash abided cuidadec unëspaneëdash. Abuc ëbëdi abentsëc yacimbocnuc tabadmenu, quec unëspaneëdash. ²⁶Adecbidi, Ëbi tantiaquido icsaisa icmenu, quiash abided cuidadec unëspaneëdash. ²⁷Adecbidi, icsaid nibëdquid bëdaidquio abi tantiaquido icmeshun Nuquin Papa yacno yuedshun, Ëmbi yuedboed min shubun ictequid nendac, quequin ismembidi, quec Esus unëspaneëdash. ²⁸Adomboembidi chido

inquidën abibi tantiadacpadomboen ma con chido tantiaquin, Bëdambocquid icmenu, quequin nashundeniash ma aidbëdi bëdambocquid icsho Nuquin Papa yacno Esuquidistun yuedpanuna. Aton chido tantiaquid abibi tantiadquidbidi nec. Aidbëdi abentsëc yacimboecquid neoaic. ²⁹ Abibi chieshëmëdesa dada nec. Bunquioquin peshun aquec. Adembidi iquenquin cuëte cuëec. Esuquidistun abi tantiaquido abëd icquido icsho aido tantiaquin nabanacimboen ³⁰ dadan abëd icquid aton chido icsho aidi tantiaquin nashunquid. Dadaba uashun aidën shictodobi chicshun chido uapampic. Adoshon dadan nami aton canitebëdta chido uashun daëd uac abentsëc yacimboec aid daëdi yanac. ³¹ Nuquin Papan ënden dada uampid nad iqueque. Tantia. Chuinu. “Aidbëd icnu, qeshun bedash aton papa aton titabëdta nianacimboec daëdash aton chidobëdi abentsëc yacimboec tabatdenec.” ³² Adec dada aton chidobëd daëdash abentsëc yacimboec nuc ambi icmiampicpadec Esuquidistu tantiaquido aton shubun icquido abentsëc yacimboec tabadendac, quequin chiec. ³³ Nëbi adomboembidi chido inquid ambi inaidbëdta chuioambique. Tantiata. Mibibi tantiadacpadomboen min chido bëdamboen tantiata dadan. Con bënë ëbi chuiquid nec, quequin aidën chiaid tantiata chidon.

Bacuëbobëdta bacuëchoquid tantiaquid tantiaquid chuibanaid

6 Bacuëbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi chieshenquiocquin nabanoata. Aidon, Nata, quequin chiaid cacuidenquiocquin nata. ² Nuquin Papan, Naden nata, quequin ambi chiaid cuënoten dada uaid Moises meniampid abentsëc nad iqueque. Tantia. Chuinu: “Ëbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: ³ “Amën anibëdtan chiacpadomboen naquid Nuquin Papan bëdambo iquebi camiaidquio iquendac. Adecbidi nidaidën yuec tabadnuequin adobanta,” quepampic.

⁴ Amën anibëdtan con bacuëbo chieshmemane qeshun bëdamboen chuiquin tantiaquid isme. Adembidi, aido pemeshun acme. Adembidi, Ëmbi chiacpadomboen ma nabampanueshun Nuquin Icbon chiaid tantiamenu, quequin adobanta.

Utsin yuaido yuaquidobidi tantiaquid tantiaquid chuibanaid

⁵ Yuan mimbi Esuquidistun chiacpadomboen nabanacpadomboembidi mibi yuaquidën chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidën chiacpadomboen nabanta. ⁶ Min icbon chuishun isnuc ambi chiacpadomboen bëdamboen mimbi nabanacpadomboembidi min icbon isenquiocnoc nabanoata. Esuquidistu con Icbon nec, quequin aidën chiacpadomboen nanuna, quequin nidaidënsun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. ⁷ Min Icbon Esuquidistun aton Papan chiacpadomboen chieshenquiocquin nacpadomboen nidaidënsun min icbon chiacpadomboen chieshenquiocquin nabanta. ⁸ Bëdamboen nabanquido yuacmaidbëdta yuabo Nuquin Papan bëdamboen cuidquin menendac, quequin tantiaquid bëdamboen nabanta.

⁹ Yuaquidon min yuabo chieshënenquiocquin bëdamboen chuibanta. Mibi cuesnu, quenquiocquin ancata. Min Icbon abucquio tabadquid min yuabon Icbobidi nec.

Aidën abitedi isec: Nëidic yua icsho daëdpectsëc pausunembi. Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

Satanas cuemetequid dasiuidaid

¹⁰Nuquin Icbo nadatiambocquin nabanquid iquec, quiash aidënquio nua pausunaid icta. ¹¹Satanas cacumetequid dasiuiu, quiash, Nuquin Papa mibi nua pausunesho, Ai, cata Satanasën mua uaquin bedchitoshe qeshun. ¹²Matses isadacpadpenquio nami intacbëd isadesa Satanasbëd icquido nec. Aidtedi Nuquin Papan abi tabadaid tédion tabadmec. Aido icsamianquido nec. Matses yuanuequid Satanases nec. Nuquin Papan uaid tantiash bëdambo mibi iquendac, quequin muaquin aidon chiec. ¹³Aden muaquin chuiquid aidtedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushë chonoc Satanases mibi icsamenuec choacsho bëcuniac bimboen cacumec abi mibi nidtoash Esuquidistu tantiaquid yec nidendac. ¹⁴Aid cacumec abi nidquid icnuec Nuquin Papan abimbo chiaidquio nacrëshëd ac bimboec tabadteneta. Adembidi, Nuquin Papan abi bëdamboec tabadtequid shictoncac bimboec tabadteneoata. Adec tabadec abi nidtoash mibi nidendac. ¹⁵Adecbidi, Esuquidistu tantiaquid ëbëd icquid iquendac, quequin Nuquin Papan tantiamequin pausunaidën tapucudac bimboen adomboembidi chuibenequin Satanases cacumec nidac bimboec abi mibi nidendac. ¹⁶Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidënquio dëcatemënquiash abi mibi nidendac. Aden Nuquin Papan tantiamequin pausunaidënquio dëcatemënquiash Satanases abi tantiamenequin pian sedo-sedoac bimboen pausuntemaid yec abi mibi nidendac. ¹⁷Adecbidi, Esuquidistu tantiaquid ëmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiac bimboec tantiec tabadteneta. Aden pausunac tabadquin Satanases, Esuquidistu mibi bedec choenquio iquendac, qesho cacumiash abi nidquin mimbi ënenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanën tantiamiaidquio icquin mimbi chuisho tantiash Satanases cuenendac. ¹⁸Adecbidi, Nuquin Papan chiaid aton Mayanën tantiamiaid icquin utsibo tantiaquin badedbadedquiec Nuquin Papa chiec onqueta. Satanases icsamenushe quiash Esuquidistu tantiaquid utsibo Nuquin Papa chiec onquedeneta.

¹⁹Ëbitsen tantiaquin Nuquin Papa chuoata. Dacuëdenquiocquin Nuquin Papan tantiamiacpadomboen Esuquidistu abi yacno yuedanquidquio nec, quequin Pabado chuime, Papa, quequin ëbitsen chuioa. ²⁰Esuquidistun chuibeneta caid icquin abi chuibenesho mëtaneshun quënën nauedaid nebi. Adoaid ëbi icnuc mimbi tantiacpaden chuibanquid Pabado icme, Papa, quequin chuioata.

Ënquin chiaid

²¹Nëbi ëbëd icquid chiembique. Tantia. Tiquico mibi yacno nidec. Aidbidi Esuquidistu tantiaquid icsho nuqui con utsi caid nec. Nuquin Icbon chuimiaidquio aidi nec. ²²Mibi yacno puduedshun ëmbi naidtedi ëbi tabadaidbëdta mibi chuibanendac. Ëbi mimbi chuisho tantiash, Bëdambo iquebi, quependac Epeso yacnocquido, quequin Tiquico mibi yacno nidmëmbi.

²³ Mibéd icquido Esuquidistu tantiaquid utsibobéd ma bédamboec tabadpanuna caimbi mibitedi. Esuquidistun Nuquin Papabédtan abi tantiamiantequidbédta utsi tantiatequid pausunaid ma icpanuna caimbi mibitedi. ²⁴ Ēnenquiocquin Nuquin Icbo tantiaquidtedi ma abipadquid icpanuna.

PIDIPOS YACNOCQUIDON ISTE

Pabadon tauamboen chiaid

1 Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapa chuiquinc utsibotedi chuiquinc caimbi. ²—Con Icbo Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

Pabadon Nuquin Papa chianiaid

³Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. ⁴Aden mibi tantiaquin Nuquin Papa chiec bëdambo yec cuishonquebi. ⁵Ënden ëmbi chuibanac Esus tantiabenquin mimbi ëbi piucquid meniondac. —Esusën naid ma Pabadon matses utsibotsen chuibanu —qeshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi. ⁶Nuquin Papan tantiamiac mimbi Esus tantiabenondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmenuen Nuquin Papan adembidi mibi bëdamboen tabadmendac. Adembidi mibi tantiec cuishonquebi. ⁷—Ëbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuideniondambi. Aden chiac puduemenquo icquin abi quënën tsadunebi. Adquid icsho chieshënenquo icquin mimbi ëbi bëdamboen tantiec. Nuquin Papan ëbi icmiacpadquid chieshtoenquo icquid icquin mimbi ëbi adoec. Adsho mibitsen tantiembi. ⁸Esusën matses tantiacpadomboen mibi tantiac unësquo iquec. Mibi istiadquo iquebi. Ëbi adsho tantias Nuquin Papatsen: —Abimbo caic —quendac. ⁹Aden mibi tantiaquin Nuquin Papa chianembi. —Aido bëdiactsëc tantianansho comapenen tantianamequo, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. ¹⁰Aden tantiamiac: “Nadec tabadec bëdambo ictsiabi. Adec tabadenquo yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenquo icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. ¹¹Adec con Icbo Esus tantiec bëdamboec tabadsho isun: “Bëdamboen tabadmec Nuquin Papa bëdambo iquec,” quetsias utsiibo, Papa —quequin Nuquin Papa chianembi mibi tantiaquin.

Utsibon Esus chuibeniaid

¹²Quënën nauedac ëmbi Esus chuibenetiapimbo icnubi utsibon chuibeniac utsinutsinqien Esus tantiabenac caosh. ¹³Nëshun shubu dadpen icquid Doma yacnoshon: —Quënën nauedaid cuenushe —quequin ëbi isquido sondadon: —Esusën naid chuibanasho Pabado quënën nauedac —quequin tantiec. Aidon chiac nëmbo icquido utsitedishun adembidi tantiec. ¹⁴Quënën nauedaqui dacuëdenquo iquebi.

Ëbi adquo icnuc: —Pabadon nacpadomboen dacuëdenquo icquin Esusën naid chuibanembi —quepac caosh Esus tantiaquido dadpen. Adshun dacuëdloedombi dacuëdenquo yanquin Nuquin Papan chiaidquo chuibeniac caosh.

¹⁵⁻¹⁶ Aidon ëbi bëdamboen tantiaquin Esusën naid chuibenec. —Pabado tantiembi. Esusën naid chuibenesho bedshun quënën nauedac aidën natiapimbo icnuc ëmbiquien nanu —quequin ëbi bëdamboen tantiaquin Esusën naid chuibeniac caosh. Utsibombien ëbi chieshënquimbi Esusën naid chuibeniac caosh. —Quënën tsadunac ma Pabado mëyadbudchitono. ¹⁷ Aidën chuibantiapimbo icnuc ëmbiquien nanu. Aden ëmbentsëqui chuibanac dadpeshun tantiashun: “Mibi bëdambo iquec,” ëbi catsiash —quequin Esusquo tantienquo icquimbi Esusën naid chuibenec. ¹⁸ —Ëbi chieshë nec —¿quiashtabi nëishpe? Padenquo. —Ëbi chieshënquidon ëbi bëdamboen tantiaquidobëdtambi Esusën naid chuibanac matses utsibo utsi-utsiec Esus tantiaquido yanec —quiash bëdambo yec cuishonquebi. Adecbidi cuishonquebi: ¹⁹ —Pidipos yacnocquidon Nuquin Papa ëbi chianiac caosh —quiash. —Mëyadsho Pabado chieshtomenda, Papa. Abi quënën nauedquidon puduemequin nidmeta, Papa —quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenquo iquendabi. Adembidi aidën nac quënën tsadenquo iquendabi. ²⁰ Ëmbi naondacpadomboen dacuëdenquo icquin Esusën naid chuibantiadquo iquebi. Chieshtotiapimbo iquebi. —Ma utsibon: “Esuquidistu bëdambo iquec,” canu —quiash aduidequi iquebi unësabi yec. Utsin: —Cuesunechitono —caqui adecbidi chieshtoenquo ictsiabi.

²¹ Unësabi Esuquidistu tantiec bëdambo iquebi. Unësash Esusbëd tabadequic bëdamboshë ictsiabi. ²² ¿Mitsipadtebi bumpeba? ¿Unëstedabi bumpeba? ¿Unësenquo yec tsadtedabi bumpe? Unësabi icquin ëmbi Esusën naid chuibanac utsibon Esus tantiabentsiash. ²³ Nuquin Papa yacno nidash Esus isec bëdamboshë ictsiabi. Esus iste bunquebi. ²⁴ Aden tantiequi: —Unësabi yec Pidipos yacnocquido Esus tantiaquido Esus bëdamboen tantiamec ano nidtsiabi —quequin tantiec unëstiapimbo icoaibi. ²⁵ Unësabi yec mibi yacno nidoatsiabi. Aden tantiec: —Nuquin Papan nëbi ëbi unës uamenquo iquec —queoaibi. Mibëd tabadquin Esusën naid bëdamboen chuibantsiambi. Adoac bëdiactsëc Esus tantiatsëcloedombi Esus tantiaquiec mibi bëdambo ictsiac. ²⁶ Ëbi choacsho isash: —Pabado padpidec chomequid Esus bëdamboshë iquec —mibi quetsiac. Adec mibi cuishonquetsiac.

Chieshtoenda, quequin Pabadon chiaid

²⁷ Ëbi ano nidtiapimbo icnuc Esusën chiacpadec chieshtoenquo yec bëdamboec tabadta. Quënën ëbi nauedloedën puduemiac mibi yacno nidshun mibi bëdamboec tabadsho isash: —Pidipos yacnocquidon ëmbi chiacpaden naic —quetsiandabi. Nëbi mibi yacno nidtiapimbo iquebi. Adnuc mibi istanquidon: —Chieshtoenquo icquin Esus tantiec cuëshëdenquo yec Pidipos yacnocquido bëdamboec tabadsho. ²⁸ Esus chieshënquidon: “Esusën naid chienda. Cueschitomane,” caqui dacuëdenquo icquin Esusën naid adembi chuibanosh —quequin mimbi naid chuisho tantiash bëdambo ictsiabi. Adec cuesambo yec nuqui: —Nuquin Papan icmiacpadec dacuëdenquo iquebi. Ëbi dacuëdenquo icmequidën ambi chiacpadomboen ëbi chieshënquido unësacsho icsambo icquido cuidacno nidmendac. Ambi chiacpadec Esus tantiaquid yec unësashini Nuquin Papa yacno tabadendac —quequin nuqui tantiatsiac. ²⁹ —Con Mado Esus tantiasho utsibon chieshëntsian-

dac —quequin Nuquin Papan tantiacpadomboen utsibon mibi chieshënendac. ³⁰ Ëbi nacpadomboen mibi chieshënoaic. Mimi isnuc ëbi chieshë nondash. Adembidi ëbi chieshënoaic nëbi. Nëid dada uaid isquin: —Pabado padpiden chieshënoac —quequin mimi tantiendac.

Utsi tantiec tabadta, quiaid

2 Tantia, con utsibo. Mibitedi chuinu. ¿Mitsipadquio Esus tantiaquido icpec? Esuquidistu tantiaquiec dayacquio yac bimboec iquec. Adecbidi Esusën tantiaido yec bëdambo icquido nec. Adecbidi Nuquin Papan aton Mayan abëd icmequin bëdamboec tabadquid icmiaidobidi nendac. Adoaido matses tantiaquidombo nec. ² —Adquidbidi nebi —quec adquiecbidi bëdamboec tantianancuededta. Ëbi cuishoncamenuc adta. Abitedi: —Esusën chiacpadomboen nanuna —quecuededec chieshënanenquio yec bëdamboec tabadta. ³ Nadec onquec tabadenda. —Ëbiuidtsëqui bëdamboshë iquec. Con nauidtsëqui nanu. Con nauidtsëqui bednu —quec mibiuidtsëqui tantiadec tabadenda. —Ëbi bëdapabi icnuc utsibo bëdamboshë iquec. Aido nashuntiadquio iquebi —quec bëdamboec tabadta. ⁴ Mimi tantiacpadomboenuidi nainquio icquin utsin tantiacpadomboentsen nata. Mitsanauidi tantienquio icquin utsibo nashuntetsen tantiata.

⁵ Esuquidistun nacpadomboen naic mibi bëdamboshë ictsiac. Aidën chieshtoenquio icquin Nuquin Papan chiacpadomboenuidi napanëdash.

⁶ Aton Papa Nuquin Papapadquidquio yec Esus abitedishun Icbombo nepanëdash. Aton Papabëd yec bëdamboshë icboedi: —Padi icnuna. Nuquibi namec bëdambo iquebi —quenquio yec Nuquin Papan chiacpadomboen naic auëshquio chopanëdash.

⁷ Adec aton Papan yuabimboecquid yanash ambi chiacpadece matsespanëdash chidon tishac.

⁸ Adashic matses yec aton Papan chiacpadequi abided cuidadec unëspac caondash. Matses icsamboshë icquido cuidacimboen cuesten dectanquin icsaisambobi Esus unë uapac caondash.

⁹ Aden ambi chiacpadomboenuidi Esusën nasho isun Nuquin Papan uincuemeshun abi yacno chomeoashun abëdi Esus tabadmeapanëdash.

Aden abitedishun Icbombo icmeoapanëdash.

¹⁰⁻¹¹ —“Nuquin Icbombo Esuquidistu bëdamboshë iquec,” ma abitedi quenu —queshun aden Nuquin Papan abitedishun Icbombo Esus icmeoapanëdash.

—Ëmbi ëbi yacnoshon uaido mayan bëdabo yec nidaidën tabadquido matses yec unë sacsho uincuemiaido yec quequido: “Nuquin Icho Esuquidistu bëdamboshë iquec. Abi abitedishun Icho icmeoquid Nuquin Papatsen bëdamboshë iquec,” ma quenu —queshun adopanëdash.

Utsibo Esus tantiamete chiaid

¹² Mibi tantiaquiembique. Tantia, con utsibo. Mibitedi chuinu. Esusën nacpadomboen mimbitsen bëdamboen nata. Ëbi mibëd icnuc mimi nadeniondacadpadomboen ëbi nibëdnuc adembidi bëdamboen nata. —Nuquin Papa dacuëdampambo icquidën chiaid niacmane —quiash ambi chiacpadomboen naic aibëdi tabadnush bëdamboec tabadta. ¹³ —Ma bëdamboec tabadnu —quequin Nuquin Papan ambi chiacpadece tabadte bumequin nuqui bëdamboen tabadmeque. Bëdamboec tabadta.

¹⁴ Adec bēdamboec tabadec chushcananenda. Adecbidi: —Bēdamboen nanuna —cac chieshec tabadenda. ¹⁵—Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bēdamboec tabad. Matses dadpenquo icsamboshē icnubi adequi bēdamboec tabad. Adec bēdamboec tabadquin icsambo icquido mimbi Esus bēdamboen tantiametsiac paposhquiacbimboecnuc. ¹⁶ Mimbi adoac utsin: —Esus tantiasho Nuquin Papan ēbi bēdamboen isec. Nēbi bēdambo yanec unēsashini aidbēd tabadenda —quequin tantiasish. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidēn padpidec chote ushēn bēdambo ictsiabi. —Ēmbi chuibanondaido Pidipos yacnoquido ambi Esus tantiamiaidobēd choeque. Is —quec bēdambo ictsiabi. ¹⁷—“Bēdambo mibi iquec,” Nuquin Papan mabi canu —queshun Esus tantiaquin mimbi bēdamboen nac. Utsibo nashunquin Esusēn naid chieshtoenquo icquin mimbi chuibanac. Mimbi adoaid chuisho tantiashun: —Mibi unēs uanu —caquini bēdambo ictsiac. —Aido bēdambo iquec —queshun mibi tantiec bēdambo yec cuishonquetsiabi. ¹⁸ Ēbi unēs uaid chuisho tantiash adecbidi bēdambo icta. —Esus tantiec chieshtotiapimbo icsho Pabado unēs uac —quiash bēdambo icta.

Pabadon Timoteyo chiaid

¹⁹ Con madobimboecquid ēbēd icquid Timoteyo mibi yacno nidmetsiambi. —¿Midapadquiec Pidipos yacnoquido tabadeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bēdambo ictsiabi. ²⁰ Timoteyopadquid utsi nibēdec. Aid abentsēcshumbi ēmbi nacpadomboen mibi tantiaquiec. ²¹ Utsibombien aton nauidsēqui tantiaquin Esuquidistun chiacpadomboen natiapimbo iquec. ²²—Timoteyon bēdamboen naondash —quequin mimbi tantiec. Mimbi tantianubi ēbēdtan Esusēn naid chuibanondash con mado icbobimboecquin. Aid bēdambo iquec. ²³ Adquid icsho mibi yacno: —Istan —catiadquio iquebi. Ēbi quēnēn nauedquido ēbi caic: —Unēs uanu —quesho tantiabono. Tantiashun: —Ēbi quēnēn nauedquidon chiaid Pidipos yacnoquido chuitan, Timoteyo —catsiandambi. ²⁴ Ēbitsen nēbi mibi yacno nidtiadquio iquebi. Ēbi caic Nuquin Icbō: —Ma nidnu —quenec anobi nidtsiabi.

Epapadodito chiaid

²⁵ Epapadodito con buchibimboecquid mimbi: —Pabado nashuntan —cac Pidipos yacnuēsh chonēdaid nēmbō iquec. Utsibon chieshēnubi dacuēdenquo icquin ēbēdtan Esusēn naid chuibanondash. Adondaidi nēbi: —Mibi iccondacno tabadec nid, buchi —caombi. ²⁶ Aid mibi tantiec unēsquo yec tsadposh. —Ēbi unēssemboed con matses chuinuec Pidipos yacno nidaccosh —quiash mibi ismete bunquiec shubiantidsēcquo tsadposh. Adsho isun: —Min shubuno nidec nid —caombi. ²⁷ Adec unēsstenquiondash. Adshobien Nuquin Papan bēdamboen isquin bēdamepondash. Ēbitsen bēdambo icmenuen Nuquin Papan adopondash. Epapadodito unēsquo icnuc ēbi shubiec tsadsho isash: —Aid unēsān unēsquo icnuc Pabado mēyadnushe —queshun Nuquin Papan Epapadodito bēdamepondash. ²⁸ Adoacsho mibi yacno aid badedquo nidmetiadquio iquebi. Aidbēd iquec mibi bēdambo ictsiac. Mibi yacno nidsho isash ēbitsen bēdambo ictsiabi. ²⁹ Epapadodito nidacsho bēdamboen ista cuishonquequin. —Nuquin Icbōn mibi bēdamiac. Aid bēdambo iquec. Mibit-

sen bēdambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bēdamboen ista. ³⁰ Esuquidistun chiacpadomboen naic ēbēdi tabadec Epapadodito chondash. Chieshēmēnquido dadpen icnubi ēbi nashunec tabadec daicsabudash unēstsenondash. Chotiapimbo icquin mimbi: —Pabado nashuntan —cac choash nibēdantsenondashe. Mibi yacno nidacsho bēdamboen ista.

Esusuidtsēqui tantiasho Nuquin Papan bēdamboen isaid

3 Nuquin Icbo Esus tantiec cuishonquenuna. Aduidequi icac bēdambo ictsiash. Tantia, con utsibo. —Tantienquio yanushe —quequin ēmbi chiondaid dada uaquin padpiden mibi chuiuanu. ² Muaquidon chuisho tantienda. Aidon: —Shui dēbid dēteshun secaidouidi Nuquin Papan bēdamboen istsiash —quequin chuisho tantienda. Aden chiec icsa uanquidombo neque. Uimanēmēnquidoen nechitec. ³ —Shui dēbid dēteshun secaid nec —¿queshunda Nuquin Papan nuqui bēdamboen ispec? Padenquio. Aidon Esus tantienquio icsho bēdamboen isenquio icquin aton Mado Esus tantiaquidoen Nuquin Papan bēdamboen isec. Aton Mayanēn tantiamiac: —Nuquin Icbo Esuquidistu bēdamboshē iquec. Abided cuidadec unēsaid tantiasho Nuquin Papan nuqui bēdamboen isec. Ēmbembi naquin Nuquin Papa bēdamboen ismetiapimbo iquebi —quequin nuqui tantiec. ⁴ Matsēsēn tsusedpan chiaiduidi tantiasho Nuquin Papan bēdamboen iste icnuc nadtsiabi. —Tsusedpan chiaid utsibon daēdpactsēc nanuc ēmbimbo naquin dadpenquio nabanombi. Aden ēmbimbo dadpenquio nasho Nuquin Papan ēbi bēdamboen isec. Adembidi isadaidbombo icsho ēbi bēdamboen isoaic —quetsiabi. Nēbi adtiapimbo iquebi. ⁵ Isadaidbo nebi. Isadaidbon chidon tishacsho sietetedec ushun Moisesēn chiampicpadomboen shui dēbid dēteshunenēdaidquio nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidēn onqueten onquequid nebi. Moisesēn chiampid namequidquio padiseyobo caid niondabi. ⁶ Adquid icquin icsambo icquido danquin Esus tantiaquido cuesun secatiadquio iccondabi. Nuquin Papan chiacpadomboen natiadquio iquequi adondabi. Moisesēn chiampiduidi nate bunquiondabi.

⁷ Adquid icquin Esus tantiabi: —Ēmbimbo naic bēdamboshē iquebi —quequin icsamboen tantiapondambi. Adondaiddi Esus tantiabenash: —Ēmbimbo naiquini icsambo iccoc. ⁸ Nēbi con Icbombo Esuquidistu tantiec bēdambo iquebi —quequin tantiabenondambi. Aiduidtsēqui tantiatiadquio icquin icsa secacimboen ēmbimbo naid ēnondambi. ⁹ Esus tantiate bunquiebi. Adquid yec: —Moisesēn chiampicpadomboen ēmbimbo naiquini bēdambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bēdamboen isquin ēbi bēdamboen tabadmec —quequin tantiabenondambi. ¹⁰ Aden tantiabenshun Esusuidtsēqui comapenen tantiatiadquio iquebi. —Comapenen tantiaquin Nuquin Papan uincuemiaid icquin Esusēn bēdamboen tabadmetsiashi —quec Esus tantiate bunquiebi. —Nuquin Papan chiacpadomboenuidi nasho mēyanac Esus unēsac caondash. Adembidi Nuquin Papan namiacpadomboen nasho mēyanac chieshtotiapimbo ictsiabi. ¹¹ Unēsambo icsho Esusēn bēdamboen tabadmetsiashi. Unēsacsho Nuquin Papan uincuemetsiashi —quec adec Esus tantiate bunquiebi.

Nuquin Papan chiacpadomboenuidi nate bunaid

¹²Tantia, con utsibo. Mibitedi chuinu. —Nuquin Papan chiaid niaquesambo nebi —¿quectabi ique? Padenquo. Adquo ictiadquidi adquo yenquieni icchitec. —Bëdamboshë icmenuen Esuquidistun yuapondashi —quequin tantiec bëdamboshë icte bunquiebi. ¹³Adec bëdambo yanabi yec: —Ëmbi naboed naic bëdamboshë iquebi —quenquo icquin Esusquo tantiaquin ambi chiacpadomboen natiadquo iquebi. ¹⁴—Bednu —quequin bedteuidtsëqui tantiec titinquiacbimboen Esusquo tantiaquieci ambi chiacpadquieci bëdambo ictiadquo iquebi. —Adec tabadec unësasho Nuquin Papan abi yacno ëbi tabadmec —quec bëdambo icte bunquiebi.

¹⁵Nuquin Papan chiacpadomboen natiadquo icquin ëmbi chuibocpadomboen mimbi tantiatsiac. Utsien: —Padi. Pabadon chiaid abitedi nainquo icquin abentse-abentsen naindambi —quesho Nuquin Papan ambi tantiaid bëdamboen tantiamet-siash. ¹⁶Nëbi nuqui icbocpadquieci tantiananquieci bëdamboec tabadnuna.

¹⁷Ëbi yacpadquieci bëdamboec tabadta. Ëmbi chiacpadomboen utsibon nasho isun adomboembidi bëdamboen nata. ¹⁸Ëmbi chuideniondaccpadomboen mibi padpiden chiembi shubiquimbi. Mibi yacno utsi-utsiec icsamboec tabadpec. —Abided cuidadec cuesten dectamëdaid Esus tantiaquid nebi —quetsëboedi icsamboec tabadec. Adquido Esus tantiaquidpenquo nec. ¹⁹Peteuidtsëqui tantiec icsambo yequi: —Bëdambo iquebi —quec tabadec. Nuquin Papa tantienquo icquin nidaidën icquiduidtsëqui tantiec. Unësash Nuquin Papa yacno nidtiapimbo yec icsambo icquido cuidacno nidendac. ²⁰Padnuen Nuquin Papan bëdamboen isaido yec aibdëd tabadtequido nuqui nec. Abi yacno buanuec abucuësh Nuquin Icho Esuquidistu chosho isnuec nuqui tabadec. ²¹Choshon aidëmbi nuquin dada chuca uaindac aton dada chuca uacpadomboen. Adoac unëstiapimbo icquiduidquo nuqui iquendac. Abitedishun Icbombo icquin ambi chiacpadomboen abitedi namequidquo icquin aden nuquin dada chuca uaindac.

Esus tantiec cuishonquiaid

4 Ëmbi aden chuisho tantiash Nuquin Icbon chiaid niaquenquo yec bëdamboec tabadta. Mibi tantiaquin mibi istiadquo iquebi. Mibi caic: —Ëmbi chuibanondaido Esus tantiabenash bëdambo ictiadquo iccondash —quec bëdambo iquebique. Adquieci chieshtoenquo icquin Esus tantiec bëdamboec tabadta.

²Tantia. Nëbi chido daëd Ebodia caid Sintique caidbëdtatsen chuinu. Amicananenda. Esus tantiaquido yec: —Ai, Nuquin Icho Esusën tantiacpadomboembien natiad —quec tabadta. ³Tantia, buchi. Èbëdtan Esus chuibanondaid icsho mibitsen chuinu. Aid chido daëd chuiquin: —Bëdamboec isnanta —cata. Utsibon chieshënubi èbëdtan aid daëdshun Esusën naid chuibeniondashe. Adembidi Quedemente caidënsen èbëdtan chuibanondash. Adembidi utsibontsen. Adquidotedi Nuquin Papan: —Esusbëdta ëbi tantiaquido mibi neque. Èbëd tabadec cho —caindac.

⁴—Nuquin Icho Esus tantiaquieci bëdambo yec cuishonquenuna —caimbi. Esus tantiaquieci cuishonquenuna. ⁵—Ma utsibo: “Esus tantiaquido chieshëmënenquo yec bëdambo iquec,” ma quenu —quiash bëdamboec tabadnuna. Nëbi Nuquin Icho Esus choeque.

⁶Adecbidi chishpiquec tabadenda. —¿Atotsimbi napeba? ¿Atotsimbi pepeba? ¿Nëbida con matses unëspeba? —quequin uesquin tantienda. Padenquio icquin nuqui dacuëdquin tantiaidtedi Nuquin Papa chuinuna. —Ëbi nashunquin utsibotsen nashunta, Papa. Aden nashunec mibi bédambo iquec, Papa —quequin Nuquin Papa chuinuna. ⁷Aden nuqui chiac aidëmbi nuqui bédambo icmec dacuëdenquo icnuc. Adoac bédambo icnuc utsibo: —¿Mitsipadec dacuëdenquo yampash? —quetsiash. Nuquitsen: —¿Mitsipadequini bédambo yampo? —quetsiac. Adec: —Nuquin Papan ëbi nashunquidquo nec —quequin Nuquin Papa chianequin Esus tantiaquec nuqui dacuëdenquo yec bédamboec tabadtsiac.

Bédamboshë iquec, caiduidi tantiata, quiaid

⁸Tantia, con utsibo. Nëidtsen chuinu. ¿Atotsi abimbo chiaid icpec? Adquid tantiata. ¿Atotsi bédambo icpec? ¿Tsutsi bédamboec tabadquid icpec? Adquidtsen tantiata. Aden: —Bédambo iquec —caidtedi tantiata. ⁹Adembidi ëmbi chuisho mimbi tantiondac. Aden ëmbi chiondaid tantiaquin ëmbi naondacpadomboen nata. Adsho isash mibi dacuëdenquo icmequid Nuquin Papa mibëd iquendac.

Pidipos yacnocquidon bëmiaid

¹⁰Nëbi mimbi bëmiaid bedash bédambo iquebi. Ënden mimbi aden menianiondashumbic yuectaneshun nëbi ëbi tantiaquin mimbi meneoaid bëacsho bedombi. —Nuquin Icbon tantiacpadomboen padpiden Pidipos yacnocquidon ëbi ma menenuequin piucquid bëmiac —quiash bédambo iquebi. ¿Ëbi tantienquioda mimbi ictionda? Ëbi tantiaquin ënden bëmetiadquidi tsundan bëtiambo icnuc mibi nepandac. ¹¹—Con na nibëdeque. Beccho —¿quectabi ique? Padenquio. Adtiapimbo iquebi. Con na icnuc bédambo ictsiabi. Con na nibëdnubi adcebidi bédambo ictsiabi. ¹²Con na dadpen icnuc bédambo ictsiabi. Con na nibëdnubi adcebidi bédambo ictsiabi. Con piucquid dadpen icnuc bédambo ictsiabi. Con piucquid nibëdnubi adcebidi bédambo ictsiabi. Peten cubudash adcebidi bédambo ictsiabi. Buna natiambo icnubi adcebidi bédambo ictsiabi. ¹³¿Ëbenquiodabi adti? Padenquio. Esusën nami-aquini adquo iquec. Aidëmbi namiac ambi chiacpadomboen naimbi. ¹⁴Adnuc: —“Mëyadec,” quiosh —qeshun mimbi ëbi ma menenuequin bëmiaid bédambo iquec.

¹⁵Min nidaid Masedonia caid yacnuësh nidsho Esus tantiaquido shubu utsinquidon uanocquidon menenquo iccondashi. Adnubi tauamboen menequin mimbiuidtsëqui ëbi meniondac. Esus tantiabentsëcshun mimbi adondac. ¹⁶Adoquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibëdec,” quiosh —qeshun mimbi piucquid bëmiaccondac. Yuectaneshun adembidi. Adshumbic padpiden. ¹⁷—Mimbi bëmiaid bédambo iqueque. Utsi beccho —¿quequindambi aden chuipe? Padenquio. —Pidipos yacnocquido Esus tantiaquido bédambo iquec —Nuquin Papa camete bunquin: —Mimbi bëmiaid bédambo iccosh —caimbi. ¹⁸Utsi-utsien bedshumbeneshun mimbi bëmiaid Epapadoditon bëacsho bedondambi. Mimbi bëmiaidbëd daëdash ëbi bunaid dëniaquec con na dadpenquo yanac. —Mibi bédambo iquec —Nuquin Papa camenuen mimbi bëmenëdac. Adsho isash Nuquin Papa: —Adquido bédambo iquec —quependac. ¹⁹Abitedishunquo Icho Nuquin Papa nec. Comapenen tantiaquin Esuquidistu tantiaquido bédamboen isquin nashunquidquo nec. ¿Ada mitsana nibëdnuc mëyadac bimboec tabadpe? Adec mëyadsho isun Nuquin Papan mitsana icmen-

dac. Unësquoio icscho aidëmbi mibi bëdambo icmendac. Adecbidi: —Chieshtotiadquio icchitebi —quesho Nuquin Papan nac mibi chieshtoenuo iquendac. —Aid nibëdnuc unësebi —mimbi caid Nuquin Papan icmendac. ²⁰Ëbi adsho tantiashun: —Bëdamboshë mibi iquec, Papa —quequin Nuquin Papa chuinuna ënenquoio icquin.

Pabadon ënquimbi chiaid

²¹Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. ²²Adembidi nëmbo Doma yacnoshon Esus tantiaquido abitedishun mibi tantiec. Chuiquid dapa Sesad caidën shubun icquido Esus tantiaquido icquin adembidi mibi tantiec. ²³Mibi tantiaquin: —Con Icbo Esuquidistubëdtan Pidipos yacnocquido bëdamboen isquin bëdambo icmeta, Papa —quequin Nuquin Papa chianembi. Padi. Aidedi chuiquin dada uaombi.

CODOSAS YACNOCQUIDON ISTE

1 Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec. ² Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdambocquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

Nuquin Papa chuidoniaid

³⁻⁴ Nuquin Papa, Nuquin Ico Esuquidistun Papa chiec nadec onquebi. Bëdambocquid icquin mibipadquiocnoc Codosas yacnocquido Esuquidistu tantiaquido bëdambocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquedenebi. ⁵ Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. ⁶ Ëbi icsaid cuidtiadtsëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid adembidi ismebanoaic. Adoac nidaid utsin-utsinquiec tabadquidon Esuquidistu tantiashun adomboembidi ismebanoaic. ⁷ Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. ⁸ Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chiohi.

⁹ Aden Epapadasën chiac mibi tantiec baded-badedquiec Nuquin Papa chiec onquian-onquianebe. Mimbi tantiacpadomboen min Mayanën pausunacsho Codosas yacnocquido bëdamboen tantiamë, Papa, quequin chian-chianembi. ¹⁰ Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiaish utsibo ismenuec bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquio utsi iquendac. Adec tabadquido mibi tantiadonequido yanendac, Papa. ¹¹ Adembidi mimbi dayacquio icmenu caid Codosas yacnocquido iquec natiatequid icnuc aido chieshenquio yec abi tantiec mibi nidendac. Aden chieshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa. ¹² Mimbi bëdambocquid icmebanac icsaquid nibëdacno mibi

tantiaquid utsibobëd mibëdi tabadendabi, Papa, quequin tantiec, Bëdambo iquebi, quec ma Codosas yacnocquido mibi chiec onquepanuna, Papa.

¹³ Ënden adquidpenquo yec Satanasën yuaido yec, Nuquin Papa tantianu, quesa nuqui iccondac. Aidën yuaido icsho Nuquin Papan nuqui mënchicpondash. Aden nuqui mënchicquin abi cudasaidquo aton Madombo Esuquidistu icsaisapadquid nuqui icmenuequin aidi Nuquin Papan nuqui tantiampepondash. ¹⁴ Abipadquid icmenuec matses icsaid bedshunash abided cuidadec unëspanëdash. Adoacsho Esuquidistu tantiaquid icsho cuidenquo yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

Abia yampidquo iquec abitedishun icbombo Esuquidistu nec quiaid

¹⁵ Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabëdtsëqui Abia Yampid icquin utsi abitedi ambi uaid nec. Ambi uaidtedi aton na nec. Aidon icbo Esuquidistu nec. ¹⁶ Nidaid abubëdtabi uashun aidënquiocquidtedi uanu quequin ambi uaido nec. Matsesën isaidtedi matsesën isacmaidtedibëd Esuquidistun uampidquo nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec. ¹⁷ Esuquidistu abia yampidquo iquec. Aidëmbi, Ëmbi uabanaido namebanu, quequin ambi chiacpadomboen namebanec. ¹⁸ Nidaid utsi-utsiec yacnocquido abi tantiec iccuededquidtedi chuiquidquo Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unëspanëdash. Adsho Nuquin Papan abia uincuemeshun abi tantiaquidtedi chuiquid abentsëcquiobi abipadquid icmepanëdash. ¹⁹ Utsi abipadquid ictiapimbo iquec. Aidën nabanacpaden natiapimbo utsi iquec. Ëbipadquidquo con mado nec, quiash, Bëdambo iquebi, quec Nuquin Papa tsadec. ²⁰ Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ëbided cuidadec unëspebi, abi quiampicpaden matsesën cuستن dectanac unëspanëdash. Adoacsho isun ambi bëdamboen istiapimbochoedi Esuquidistu tantiaquid yansho isun aidtedi Nuquin Papan bëdamboen isec.

²¹ Ënden Nuquin Papan matsespenquo mibitedi iccondac. Icsamboen tantiec ic-saquid yec Nuquin Papa chieshënnquido mibitedi iccondac. ²² Adquid icboedi, Ëbi yacno yuednu queshun Esuquidistu tantiaquidotedi cuidenquo yec abi icsaid bëpiscudquin Esuquidistu icsaisapadquiocnoc aido isembi, quec Nuquin Papa tsadec. ²³ Ënenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ënenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

Esuquidistu tantiadoneta, quequin Pabadon chuibanaid

²⁴ Ëbi tantiaquid Nuquin Papan bëdamboen isendac. Aden isac, Ëbëd icquido iquendac, quequin Esuquidistun ambia chuibansho matsesën mëyampanëdash. Adomboembidi Esuquidistu chuibansho mëyamposhi. Adoqui, Cuishon, quebi. Ënden abi tantiaquid yanacsho isun, Ëbi chuibeneta, quequin chuishumbic, Ëbi chuibansho mibi mëyante dadpen iquendac, quequin Esuquidistun chuiopondashi. Aden aidën chiondacpaden mëyanaid nebi. Ma abi tantiaquid dadpen yanu quequin

chuihenembi ambi tantiactedi mëyante yanuc. ²⁵ Ai, Nuquin Papan, Esuquidistu ambi naidbëdta chuiheneta, caidquio nebi. Abi chuiquidquio nebi. ²⁶ Nuquin Papan ambi tantiampicpaden chienquiochoed nëbi aid tantiamiac Esuquidistu tantiaquido yanec. ²⁷ Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuiheneta caid isadaidbo nec. Esuquidistu tantiaquido icsho isun, Con matses yec ëbi yacno ëbëdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuiheneta caid nebi.

²⁸ Aden ëbëdtan ëbipadquidon Esuquidistu chuiheniac Esuquidistu tantiaquid yansho isash, Esuquidistu tantiec bëdamboec tabadteneta, quequin Nuquin Papan chiacpadomboen chuihenec nebi ma abi yacno chosho adquidquio Nuquin Papan yuedpanu qeshun. ²⁹ Badiadquidën-badiadquidënquien aton Mayanën nadatiambocquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuihenec nebi.

2 Aden dayacquiocquin Nuquin Papa chuiquin mibitedi tantiembi. Adembidi chuihanquin Daudiseya yacnocquido tantiembi. Adembidi utsi-utsiec yacno iccuededquido ëbi isacmaidobi Nuquin Papa chuiquin tantiembi. ²⁻³ Esuquidistu tantiadonequido ma yampanueshun dayacquiocquin chuihenec nebi. Abentsëc yacimboec tantiananquidquio ma yampanueshun dayacquiocquin chuihenec nebi. Adquidquio yanshun utsin abimbo chuisho tantiash, Abimbo chuiquid nec, quequin ma bëdamboen tantiapanuna. Adembidi, abimbo chiacimboen chuisho tantiashun, Icsamboen chiec, quequin ma tantiaquiopanuna. Nuquin Papan tantiamenquiochoed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuihenec nebi. ⁴ Comapenen tantiaquid icquin, Utsi tantiata, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi. ⁵ Mibëd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ënëdenquio yec iccuededquin aiduidtsëqui tantiadonec, quequin mibi yacnoësh choquidon chuisho tantiash bëdambo iquebi.

Esuquidistu tantiaquid iquec utsin chiacpaden naic abuc nidendabi, quequin tantienda.

⁶ Adecbidi Esuquidistu tantiaquid yec abëd icquido iquec, Aidi con Icbo nec, quec ambi chiacpadquiec tabadteneta. ⁷ Adec tabadquin cuëte tapun uquëduciocquidën cuëte uidënash canidoacimboen Esuquidistu tantiaquid icquin tantiadonequiota. Aden Esuquidistu chuiquin ëbipadquidon mibitedi chuipondash. Aid tantiadonequid icquin, Mibi tantiaquiec bëdambo iquebi, quequin badedbadedquien Esuquidistu chuidoneta. ⁸ Adembidi aid tantiadonequid icquin aid tantiesan ëndenquio ambembi chiec onquiampicpaden nëbi icquidën adomboembidi chuisho Nuquin Papan chiacpadomboen chiesa nec, quequin tantiaquiota.

⁹ Matsesash Nuquin Papapadquidquibidi Esuquidistu icpanëdash. ¹⁰ Esuquidistubëd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibëd icquid Esuquidistu nec. ¹¹ Aidën, ëbëd icquid nec, quequin mimbi tantiaid icsa cuëte cuidi pateshuniacimboen mibi ëmebanec. Chështen tiacimboen nainquiocquin bëdamboen tantiamequin aton Mayanën mibi

icsaid ëmendac. ¹² Adembidi Esuquidistu unësacsho chococacimboecnuc abi tantiaquid paucnu quiacimboen acten mibitedi mentobanondash. Adembidi Nuquin Papan Esuquidistu uincuemenedacimboecnuc icsaisa icmenu, quequin acten mentotanquin mibitedi cadobampondash.

¹³ Ënden Nuquin Papan matsespenquo icquin mimbi tantiaid icsa icnu unësacimboec icquin Nuquin Papan ënden, Naden nata, quequin chiaid tantienquiocquin niacquido mibitedi iccondac. Adquid icboedi Esuquidistu tantiaquid icsho isash, Con madobëd icquido nec, quec Nuquin Papa nuqui icsaidtedi bëpiscudac. ¹⁴ Ënden, Matses icsaid bëpiscudnu, quenquiocquin, ëmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanëdash. Adquid icshobi icsaquidimboecnuc matsesën unës uaquin cuesten dectanac matses icsaidtedi bedshunash abibi cuidadec unësapanëdash. Aid unëso isun, Matses icsaid cuidosh, quequin abi tantiaquidquo icsaid ambi naden nata quequin dada uamiaid ucacimboen tantiec bëpiscudtenec Nuquin Papa. ¹⁵ Esuquidistuidi Nuquin Papan naden nata quequin chiaid niaquesa yec matses icsaid bedshunash abided cuidadec unësash uincuenquin Nuquin Papan chiaid niacquido mayan icsabo dëniacquec Esuquidistu abitedi chuiquid yampanëdash. Aden dëniacshun, Nëidtedi ëbi tantiaquido chuiquid ictiapimbo iquec, quequin bedshun mëtaneshun buanacimboen Nuquin Papa Esuquidistun ismepanëdash.

¹⁶ Aden chuiquid utsitedi dëniacquid Esuquidistu nec, quequin tantiash, Nadquid peshun nadquid utsi acsho Nuquin Papan ëbi bëdamboen isec, quenda. Adembidi, Nëid ushëmbi abi tantiec iccuededsho isun Nuquin Papan ëbi bëdamboen isec, quenda. Adembidi, ushë chuca choaid usudsho isec cuëdënsho Nuquin Papan ëbi bëdamboen isendac, quequin tantienda. Esuquidistuidi tantiaquidquo icsho Nuquin Papan ëbi bëdamboen isec, quequin tantiata. ¹⁷ Matses icsaquid yec ambi naidënquo abembi bëdantiapimbo iquec, quequin tantiamenuequin Nuquin Papan ambi, Naden nata, quequin chiaid Moises menepampic. Ëmbi bëdamboen isaidquo matses bëdambo icmequid choendac, quequin tantiaquin ambi naden nata quequin chiaidba Moises menepampic. ¹⁸ Esuquidistun bëdambo icmiaid nebi, qeshun utsi icsamboen chiec onquesho tantienda. Ambibi chiec onquesho tantiashun Esuquidistu tantesa uaindac. Adquidbëd Esuquidistu ictiapimbo iquendac. Adquidën, Mibi chuiquidpenquo nebi, qeshumbic ambia tantiaquidimboecquin ambi tantiaid Nuquin Papan uaid mayan bëda mibi tantiamenuequin chuibansho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tanta, quequin ambembi chiec onquesho tantienda. ¹⁹ Adquidën Esuquidistu abi tantiaquidon icbombo nec, quequin tantienquo iquec. Adebidi Nuquin Papan tantiacpadquiec Esuquidistu tantiaquid dadpen yanash aton utsibobëd tantiananec nashunanec aton icbopadquid yanec, quequin tantiesa adquid nendac.

²⁰ Tantianu. Ëbi chui. ¿Atotsi quiash Esuquidistu tantiaquid yanash ëbi icsaid cuidnuc Esuquidistued unësash uincuenacimboec bëdamboec tabadebi, qeshumbic, ²¹ Nëid bedtemaid nec. Aid bedsho mayanën mibi cuidendac, quequin utsi chuisho mimbi tantiape? Adembidi ¿atotsieshun mimbi tantiaid icsa unësacsho chococabi yacimboen, Nëid petemaid nec. Aid pesho mibi cuidendac, qesho mimbi tantiape? Aden Esuquidistu tantienquo icquidëmbimboen, Nëid mishtemaid nec. Aid

misho mibi cuidendac, quesho mimbi tantiapec. ²²Nadquid petemaid nec. Nadquid mishtemaid nec, quequin matsesën ambibi chuiquin tantiamete nec. Ambi petemaidbëdi ambi mishtemaid ënëndendac. ²³Matsesën bëdamboen tantiacbimboen chiaid aidtedi nec. Nëid ëmbi tantiaid nec, queshun aid bëdamboen ismenuen naden nanuna, quequin matsesën chiec. Aden ambibi tantiaishun, Naden nata, quequin mibi chuitiapimbo iquebi, queshumbic namenuequin comapenen adquidën chuibanec. Adecbidi, Damëyamëdsho ëmbi tantiaidën ëbi bëdamboen istsiash, quequin ambibi tantiaish damëyamëdec. Adec damëyamë-dashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

Bëdamboec tabadaid chiaid

3 Esuquidistu tantiaquid yec abia uincuenëdac abuc nidash Nuquin Papa yacno icsate bunquid nibëdacno tabadacpadquiec tabadteneta. Adec tabadec, Nuquin Papan dayunquio Esuquidistu tsadec bëdambo iquec, quequin abëd icte bunquin Esuquidistu tantiadonec tabadta. ²Abuc abëdi ëbi icnuc aton na con na iquendac, quequin tantiaquin nidaidëshun bednu, quequinuidi tantienda. ³Esuquidistu unësaid tantiaquin aidbëdtabi mibi icsaid chococashunacbimboec icsatiapimbo yec nidaidën tabadta. Adecbidi Esuquidistu uincuenash abuc Nuquin Papa yacno nidash, Èbi tantiaquidtedi bëdaidquio iquec. Aido ëbi cudasaidquio nec, quequin aidën dayun uaid nuqui nec. ⁴Aidën padpidec choshon abi yacno buanac abipadquidquio bëdaidquio nuqui iquendac.

⁵Adec abi yacnoësh abëdi bëdaidquio iquendabi, quequin mibi icsaidtedi cuesun secacbimboen ëmbanta. Èmbi inacmaid chudnu, quenquiocquin ënta dadan. Adembidi, Èbi inesa chudmenu, quenquiocquin ënta chidon. Adembidi, Chudnu, quequinuidi tantiaid ënta dadan. Adembidi, Chudmenu, quequinuidi tantiaid ënta chidon. Adembidi mibi bunaid icsatedi ënta. Adembidi aton na daëdpactsëc icquidëmba ma bednu, quenquiocquin, Èmbia bednu, quequin tantiaid ënta. Aden ënshun, aton na daëdpactsëc icquidëmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesën ambibi nacnenaïd tantiacbimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatiapimbo iquec. ⁶Abi bunaid icsabëdta ambi tantiaid icsa ënesa icsho matsesën naid chuibante ushë choan adquidtedi Nuquin Papan comapenen cuidendac. ⁷Adquid icboedi ⁸nëbi adenquiocquin ënash bëdamboec tabadteneta. Adecbidi comapenec nëishboedi adenda. Adecbidi, cuesantiaquio yec nëishboedi adenda. Adembidi, utsi icsambo icmeboedëmbi adoenda. Adecbidi, utsi icsamboen chuiboedi adoenda. Adecbidi, tsienbëdta shui chedo chiec icsamboen tantiec onqueboedi adenda. ⁹Adecbidi, mua uanamboedi ënëndta. Adquid icboedëmbi icsactsëcquid niacbimboen mibi icsaid ënta. ¹⁰Min tantiate chuca uacbimboecnuc abi tantiadonequidquio icnuequin mibi tantiamequid tantiadëd-tantiadëdta. ¹¹Adquid Nuquin Papan icmiac Esuquidistu tantiaquid utsibo naden mimbi tantienquio iquendac. Nëid isadaidbo nec. Nëidic isadaidpembo nec, quequin tantiesa mibi iquendac. Adecbidi, nëid shui dëbid dëtemequid nec. Nëid shui dëbid dëtemesa nec, quequin tantiesa mibi neoaic. Adecbidi, Nëid chotac nec. Nëidic mayu nec, quequin tantiesa mibi neoaic. Adecbidi, Nëid yua nec. Nëidic yuaquid

nec, quequin tantiesa mibi neoaic. Adquid Esuquidistu tantiaquid icnuc abëd icquid aton matses nec. Abi tantiaquidtedi chuiquid dapa abentsëcquiobi Esuquidistu nec.

¹²Aden Nuquin Papan cuënaido yec ambi bëdamboquid icmebanaidobi abi cudasaido yec ambi tantiamiaid nebi, quiash bëdamboquid isadacimboec naded tabadteneta. Utsibo natiamiaid icsho isun bëdambo icmenuequin nashumbanta. Adecbidi, Mimbiana bedan bedembi, quequid icta. Adecbidi, Mibia nashunu, quequid icta. Utsi icsaid ëmenuec comapenec chushquenquiocquin bëdamboen chuiban. Tantesa uasho isun ismeded-ismededta. ¹³Mimbi nacpadomboen utsibon natiapimbocsho isun, Padi, quenquiocquin abi tantiameban. Adecbidi utsin mibi icsamboen nasho isash cuidnanenquo yec bëpiscudta. Nuquin Papa ëbi icsaid cuidenquo yec bëpiscudosh, quec adta. ¹⁴Adec tabadtenec tantiananta. Adec tantianec Esuquidistubëd abentsëc yacimboec icsaisa mibitedi yanendac.

¹⁵Adec Esuquidistubëd abentsëc yacimboecnuc icmiaid nebi, quequin tantiec bëdamboec tabadtenenu, quec mibitedi tabadteneta. Adec tabadtenequin, Mibi bëdambo iquec, Papa, quequin chuideneta. ¹⁶Nuquin Papan Esuquidistu tantiadonemiaido icta. Adquido yec abi tantiaquid utsibobëd Esuquidistu chuihanec, Bëdamboec tabadta, quec adquiecbidi tabadec ismenanta. Aden naic chuiquid dapa Dabidën dada uampid sadmo caidbëdta cuëdënte utsi Nuquin Papan mibi bëdambo icmiaidbëdtabi ambi naid utsi chiec cuëdëncuededta. ¹⁷Adec tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bëdambo iquebi, Papa, quequin Nuquin Papa chuideneta.

Aton shubun icquidbëd tabadaid

¹⁸Bëdamboec tabadnu, qeshun nadota. Chidon min bënën chiacpadomboen nabanta. Esuquidistu tantiaquid icquin adobanta.

¹⁹Chido inquidën, Con bënëbëd tabadec bëdambo iquebi, camenuen yuacimboecquin aid chuiquin min chido namenda. Mibibi tantiadquinuidi min chido namenda.

²⁰Bacuëbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bëdambo iquebi, quependac Nuquin Papa.

²¹Anibëdtan min bacuëbo namenuc comapenen cuëdquin chieshmenda.

²²Yuan mibi yuaquidën chiacpadomboen nabanta. Aidën aden chuishun isnuc adobanta. Aden chuishun min icbon isenquiocnoc adomboembidi nabanta. Aden nabansho mibi bëdamboen isendac. Nuquin Icho, Esuquidistu tantiaquid nebi, qeshun adobanta. ²³Con Icho Esuquidistu nashunu, quiacimboen mibi yuaquidën chiacpadomboen chieshenquiocquin bëdamboen nabanta. ²⁴Con Icho Esuquidistun abi yacno ëbi nidacsho isun ëmbi bëdamboen nabanaid cuidquin ambi ismiambo yaid menendabi, quequin tantiaquin adobanta. Nidaidëshun abi nashunquid mibi neque. Adobanta. ²⁵Min icbon chiacpadomboen nata. Abi chieshëncuid icbon cuidendac. Adembidi Nuquin Papan Esuquidistu tantiaquid nebi, qesho abi chieshënesa menequin bëdamboen cuidendac. Abi chieshëncuid menenquiocquin comapenen cuidendac. Adenuidi tantiaquin cuidendac.

4 Yuanquidën, mimbi yuaido ambi nabanacpaden bëdamboen menebanta. Abuc con Icbombo iquec, quequin tantiaquin mimbi yuaido bëdamboen menebanta.

Chuibanaid utsi

² Esuquidistu tantiaquid utsibo natiatequidbëd abi icsaid iquec, quequin tantiec baded-badedquiec Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bëdambo iquebi, Papa, quequin Nuquin Papa chuideneta. ³ Adecbidi ëbipadquid utsibobëdta ëbi tantiec Nuquin Papa chiec onqueta. Mimbi chienquiocnëdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Èbi chuibeneta, cac aid chuibenesho bedshun mëtaniaid nebi. ⁴ Pabado utsin onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta. ⁵ Esuquidistu tantiesan ëbi tabadaid istenec, quequin tantiec bëdamboec tabadeneta. Adec tabadquin Esuquidistu tantiesatsen tantiamenuequin Esuquidistu chuideneta. ⁶ ¿Mitsicquid mimbi tantiaid icpec? quetsiash tantiesa. Adsho tantiashun mibi onquiaidbëd sa batambo iquec daëdacimboecnuc Esuquidistu mimbi tantiaid utsibo chuita ma aidon tantiapanu qeshun.

Abëd icquid chuibanaid

⁷ Nëbi ëbëd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquio icsho ëmbi con utsi caid nec. Aidi Nuquin Icbo nashunquid neoaic. ⁸ Èbëd icquid utsibo naic tabadaid mibitedi tantiamenuequin aidi mibi yacno nidmembali. Adoac mibi yacno nidash puduedshun ëbi naic tabadaidbëdtabi Nuquin Papan chiaid chuibanac mibitedi ëbi tantiec unësquioeboedi cuishon queta. ⁹ Onesimobëd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquiocquin ëbi nashunquid nec. Aid daëdshun ëbëd icquidon nabamboed mibitedi chuibanendac.

¹⁰ Nëbi mibi yacno nidesa chuinu. Tantiata. Adistadico ëbëd icnuec abembi quënën nauedadondaaid nec. Aidëmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosën chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta.

¹¹ Esus cashumbic Ustus caidën, Codosas yacnocquido tantiec tsadebi, quequin chi-acpadomboen dada uaimbi. Adistadico yec Madcos yec Ustus yec quec aidtedt-sëqui isadaidbo nec. Aidon ëbëdtambi Esuquidistu chuibanquin ëbi bëdambo icmequido neoaic. ¹² Epapadas mibi yacnoshon tishaid Esuquidistu chuibanquidquio nec. Aidëmbidi, Codosas yacnocquido con utsibo tantiec tsadebi, quequin chi-acpadomboen dada uaimbi. Icsamenuequid icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidën-badiadquidëquiec Nuquin Papa chiec onquec Epapadas. ¹³ Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquio yec Esuquidistu tantiadonequidombo ma icpanu quish mibitedi chiec onquedenec. ¹⁴ Adembidi Ducasën dauëchoquidën Demasbëdtan, Codosas yacnocquido tantiec tabadebi, quequin chi-acpadomboen dada uaimbi.

¹⁵ Codosas yacnocquidon nëid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuëmëdquidën shubun Esuquidistu tantiec iccuededquido chuioata. ¹⁶ Adembidi, nëid ëmbi dada uaid isec onquequin mibëd

iccuededquido tantiameshun Daudiseya yacno iccuededquido tsusiobo menequin, Nëid Pabado dada uaid isec onquequin mibëd iccuededquido tantiameoa, quequin chui. Adembidi ëmbi Daudiseya yacnocquido tantiaquin dada uaid bedshunshun isec onqeshun mibëd iccuededquido tantiameoata.

¹⁷ Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

¹⁸ Mibitedi tantiaquin ëmbibi nëid dada uaombique. Ëbi tantiec nidtiapimbo yec Pabado quënën tsadeque. Aid pudemeta, Papa, quequin Nuquin Papa chiec onquedeneta. Nuquin Papan ma mibitedi bëdamboen ispanu, quec tsadebi.

Padi. Aitedi dada uaombi.

TESADONICA YACNOCQUIDON ISTE 1

Pabadon tauamboen chiaid

1 Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icbo Esus tantiaquido mibi chuiquin dada uaic nebi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

²Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboeshē iquec, Papa. ³“Aidon Esus tantiaquin ambi chiacpadomboen matses tantiaquin nashumbanosh. ‘Abi yacno abi tantiaquido buanuec Nuquin Icbo Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. ⁴Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden. ⁵Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiacpadomboen: —Abimbo caic —qeshun mimbi Esus tantiabonodac. Adembidi Esus tantiamenuec Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ěmibi chuisho tantiondac. ⁶Aden Nuquin Papan Esus tantiamiaido yec ēbi Nuquin Icbo yacpadec chieshtoenquo icsho isash mibitsen chieshtoenquo iccondac. Ēmibi Nuquin Papan chiaid chuibanac Nuquin Papan Mayanēn namiacpadec cuishonquequin mimbi Esus tantiondac utsibon: —Padi. Chēn —quequin comapenen chieshēnquionobi. ⁷Adec mibi bēdamboec tabadaid chuisho tantias min nidaidēn icquido Masedonia yacnocquido Esus tantiaquido mibi yacpadquiec tabadtiadquido icpac caosh. Adembidi tantias nēid nidaid Acaya caid yacno tabadquidotsen adtiadquido icpac caosh. ⁸¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Esusēn naid chuibanac nidaid utsi-utsiec yacno tabadquidon tantiac caosh. Adashic aido mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantiasun: —Tantias —qeshun nēmbo icquido mimbi naid chienquo iccombi. ⁹Mimbi naid naden chuisho tantiombi. —Pabado chedon Esus chuibanasho tantias: “Nuquin Papapadquid utsi nibēdec,” qeshun Nuquin Papabēdta Esus tantiabonac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiacpadomboen natiadquido yanac caosh —quequin chioishi. ¹⁰Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquido iquec. “Ēbi cuidmenquo icnuec abided ciudadec unēsacsho Nuquin Papan uincuemaiad Esus choec,” qeshun aid istiadquido iquec —quequin mimbi naid chioishi.

Pabadon bēdamboen chuibanondaid

2 Mibi yacnoshon tauamboen ěmbi chuibanac Esus tantiaquid yanshun mimbit-sen utsibo Esus chuibanondac. ² Shubu dadpen icquid Pidipos caid yacnoshon quĕnĕn nauedac ěbi mĕyadec tsadboedi puduemesun nidmiac mibi yacno nidshun Esusĕn naid mibi chuibanondambi. Utsibo dadpeshun chieshĕnubi Nuquin Papan namiacpadomboen cuesambo icquin mibi Esus chuibanondambi. ³ Ěĕmbi naidquio namenuendambi adodionda? Padenquio. Ěĕbi tantiamenuendambi chuibandionda? Mambi padenquio iccondac. ĚAmbembi chiaidtambi mibi chuibandionda? ⁴ Mambi mibi abimbo chuibampondac. Matsesĕn naidtedi tantiaquidĕnquio Nuquin Papan: —Aidĕn abimbo chuibantsiashe. Con Mado Esusĕn naid chuibenequid icmenu —caidquio nebi. Adquid yec matses: —Mibi bēdambo iquec —cameteuidi bunenquio iquebi. Nuquin Papa: —Mibi bēdambo iquec —camenuembimbi ambi chiacpadomboen naic. ⁵ Ĕmbi tantiacpadomboen mibi namenuc: —Mibi bēdambo iquec —quenquio iccondabi. Min piucquid bednuen muaquin chiambo iccondambi. Nuquin Papan isnubi abimbo chiondambi. ⁶ Ě—Pabado bēdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusĕn naid tantiamenuembimbi bēdamboen chuibanondac.

⁷ —Ĕbi chuibeneta —Esuquidistun caidquio nebi. Adoaid icquin tsusio dapan chiacbimboen: —Nata —quequin Ěancabudquindambi mibi chuibandionda? Mambi padenquio iccondac. Anin bacuĕ nĕishmenquio icquin bēdamboen namiacbimboembimbi nĕishmenquio icquin mibi chuibanondac. ⁸ Mibi tantiaquioquin chieshtoenquio icquin Esusĕn naid chuibanec yuec mibĕd tabadondabi. Aden naic tabadec bēdambo iccondabi. ⁹ ĚAda tantie, con utsibo? Aden Esusĕn naid chuibanquin nidaidĕn capuquid yua bitsibi tuscaquin shubumpi nacnendeniondambi. Mibi caic: —Ĕbi menianiac aton piucquid naimĕdnushe —quiash con piucquid bednuec chonoadteniondabi. Mimbi isnubi adondabi.

¹⁰ Mibĕd yec Nuquin Papan chiaid niaquenquio yec bēdamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanĕdashi. ¹¹ Amĕn aton mado: —Naden na —quequin nĕishmenquio icquin chiacbimboen mibi abentse-abentsen bēdamboen chuibanquin ¹² mibi bēdambo icmepondambi. —Nuquin Papan: “Icsatiapimbo icquid icmequin ěbĕdi tabadmendambi,” quequin Esus tantiamiaido mibi nec. Adquid Nuquin Papan chiacpadec bēdamboec tabadquid neque. Ambi chiaid niaquenquio yec bēdamboec tabadnuna —mibitedi cadeniondambi.

¹³ Aden Nuquin Papan chiaidquio chuibanac: —ĚAmbembida chuidiosh? Nuquin Papan chiaidquio ma Pabadon chuiboc —mibi quianondac. Aden Nuquin Papan chiaidquio tantiashe Esus tantiaquido yanash aidquiobidi chuisho tantiashe mibi bēdambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bēdamboen tabadmequid yec mibi bēdamboshĕ iquec, Papa —quequin Nuquin Papa chianembi. ¹⁴ Nidaid Udeya caid yacnocquido yacpadquiec chieshtoenquio icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquio icquin chieshĕnac chieshtoenquio iccondash. Adomboembidi aid matses mibi yacno tabadquin chieshĕnac mibi chieshtoenquio iccondac. ¹⁵ Isadaidbombidi Nuquin Papan chiaid chuibanquido cuesun

secapampic. Adembidi Nuquin Icho Esus unës uapac caondash. Adomboembidi chieshênquin mibi yacnoshon cuemepondashi. Aden Nuquin Papa chieshênquinc matses abitedi chieshênquinc caquin ¹⁶ isadaidbon matses utsi isadaidpembo ëbi chuimetiapimbo icpondash. —Esus tantiasho Nuquin Papan bédamboen isquin mibi cuidenquo iquendac —quequin ëmbi chuisho: —Padi. Aid chienda. Cueschitomane —capondashi. Aden ambi chiaid ënenquo icquin niac-niacsho Nuquin Papan aido cuidquendac.

Pabado istante bunaid

¹⁷ ¿Mibi yacnoshon aden chieshêmênquidon cuemiac mibi tantienquiodambi icionda? Mibi unësquo icnuc mibi istantiadquo iccondabi. ¹⁸ Adec: —Padpiden istanu —quesho Satanasën nac padenquo iccondabi. Padpidec: —Nidnu —quesho adembidi. Padpidec: —Nidnu —quesho Satanasën nacbidi padenquo iccondabi. Nëbi adecbidi mibi istantiadquo iquebi. ¹⁹ Nuquin Icho Esuquidistu choan aibdéd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ëmbi chuibanac Esus tantiabenondaido neque —capatsia? Mibibimbi caic. ²⁰ —Esus tantiec bédamboec tabadosh —quesho tantiash mibi tantiec cuishonquebi. Adembidi mimbi naid isun: —Mimbi bédamboen naondac. Mimbi chuibanac ëbi tantiabenondash —ëbi caindac Nuquin Icbon.

Istan, quequin Timoteyo chiaid

3 Aden mibi tantiec: —“¿Mitsipadec tabadpec?” quequiduidtsëqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ëbéd icquid utsi Sidbano chuiquin: —Timoteyo nidan nuquiduidtsëqui icnuna —caondambi. ² Ëmbi: —Nid —caondaid Timoteyo Esus tantiaquid yec nuquin utsi nec. Ëbédtan Esus chuibenequidquo nec. Adquid icsho nadopondambi. —Tesadonica yacno nidshun Esus bédamboen chuibantan. Adembidi: “Esus tantiec chieshtoenquo yec nadquiec tabadquid nendac,” quequin bédamboec tabadquin ismetan, Timoteyo. ³ Aton matsesën comapenen chieshênac chieshtoshon Esus tantienquo yanushe. Chuitan —caondambi. Aden chieshênte mibi chiondambi. —Nuquin Papan tantiacpadomboen Esus tantiaquid chieshênendac —quequin mibi chiondambi. ⁴ Aden mibéd icquin chuide-niondambi. Adsho ëmbi chiacpadomboen nuqui chieshênondash. ⁵ —“Ëbi nidan chieshênac ¿adecbidida Tesadonica yacnocquido chieshtoenquo icpatsiashba?” quequiduidtsëqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidên Satanasën namiac chieshtoshon Esus tantienquo yanushe. Istan. ¿Ada ëmbi Esus chuibanondaido bédamboec tabadeque? —caondambi Timoteyo chuiquin.

Timoteyon chuituidaid

⁶ Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bédambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Adembidi mibi istantiadquo iquebi. ⁷ Timoteyon chuiboed tantiash bédambo yanobi. Nëmbo icquidon chieshênac shubiantiadtsëcquo iccobi. Adboedi mibi caic: —Chieshtoenquo

icquin Esus tantiosh —quesho tantiash bēdambo yanobi. ⁸Mimbi aden naid tantiash dayacquio yac bimboec iquebi. ⁹Aden tantiashun Nuquin Papa chianembi naden. —“Tesadonica yacnocquido bēdambo iccosh,” quesho tantiash cuishonquebi, Papa. Mimbiuidtsēqui namiac chieshtoenquo iquec. Aden namec mibi bēdamboshē iquec, Papa. ¹⁰Aido istiadquo iquebi. Mimbi chiaid bēdiactsēc tantiasho aidobēd tabadquin bēdamboen chuibantsiambique. Ēbi ano nidmeta, Papa —quequin Nuquin Papa chianembi.

¹¹—Nuquin Icbo Esusbēdtan Nuquin Papan nēbimbobi ambo nidmepashuni —caimbi. ¹²Adec mibēd ictiadquo icquin Nuquin Papa mibi chianembi. —Ēmbi aido tantiaquiapadomboen utsibobēd tantianameta, Papa. Bēdiactsēc tantianantsēcboedobi comapenec tantianamequiota, Papa. Adembidi utsibotsen bēdamboen ismeta. ¹³Aden bēdamboec tabadquid icmeta, Papa. Mimbi adoac chieshtoenquo yec bēdamboec tabadtsiash. Adsho mimbi mibi yacnoshon uaido mayan bēdabobēd nidaidēn padpidec choshon con Icbo Esusēn: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

Chidobēd bēdamboec tabadte chiaid

4 Tantia, con utsibo. Chiaid utsitsen mibi chuinu. —“Bēdambo mibi iquec,” Nuquin Papa camenuc bēdamboec tabadta —quequin ěmbi chiondacadquieci tabadta. Nuquin Icbo Esus tantiaquieci adta. —Bēdamboec tabadosh —quesho tantiashun: —Adquiequi tabadta —caimbi mibi. ²Nuquin Icbo Esusēn namiac aidēn chiaidquo mibi chuibanondambique. Aid tantiaquieci bēdamboec tabadta. ³Nuquin Papan tantiamiacpadquieci tabadquidēn nadoquid yendac. Utsin chido chudenquo icquin aton chidouidsēqui chudquid yendac. Adembidi chidon dada utsi chudmenquo icquin aton bēnēuidtsēqui chudmequid yendac. ⁴Adec Nuquin Papan chiaid niaquenquo yec abi bunaid mēmunc dada ambi inaidquo aton chidouidsēqui chudec aidbēd bēdamboec tabadsho: —Bēdambo iquec —catsiash Nuquin Papan. ⁵Nuquin Papa tantiesabimboec tabadenda. Esus tantiesambien comapenec tsien bunquin aton chidopenquo chudendac. Adembidi Nuquin Papa tantiesa icquin chidon utsin shui bunquin aton bēnēpenquo chudmendac. Adec tabadenda. ⁶Bēnē nidan aton chido abentsēqui uequid istuidshun chudenda. Adoquid Nuquin Papan cuidendac ěmbi chiondacadomboen. ⁷—Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquo. —Ma bēdamboec tabadnu —quequimbien Esus tantiaquido nuqui icmiaque. Bēdamboec tabadnuna. ⁸Aden chuiquin aton Mayan nuqui menequidēn Nuquin Papan chiaid chiec nebi. Aden ěmbi chuiboed niacquin Nuquin Papan chiaidquo mimbi niactsiac.

Adecbidi tantiananquiota, quequin chiaid

⁹—Bēdamboec tantiananta —quequin padpiden chienquo iquembi. Nuquin Papan tantiamiac Esus tantiaquido yec mibi tantiananec. ¹⁰Min nidaid Masedonia caidēn tabadquido Esus tantiaquido utsibotedi mimbi tantiec. Mibi yacpadquiecbidi tantiananquoquin utsibotsen tantiaquiota. ¹¹Ēmbi chiondacadquieci chieshēmēnquo yec bēdamboec tabadta. Utsi icsaiduidi chienquo yec bēdamboec tabad. Chieshenquo yec dayacquio yec chonoada. ¹²Adash bunenquo mibi ictsiac. —Con

na nacnenambo iccombique. Mitsana beccho —mibi quenquo ictsiac. Mibi adquo icsho isash Esus tantiesabo: —Esus tantiaquido bēdamboec tabadec —quetsiash.

Esusēn abi yacno abi tantiaquido buante chiaid

¹³ Tanta, con utsibo. —“Esusēn abi tantiaquido uincuemendac,” quequin chuisho mibi tantiabi icnushe —queshun mibi bēdamboen chuinu. Esus tantiesabo: —Ēmbi tantiaidquo padpidec isadenquo iquec —quec yuecquo shubiacbimboec shubienda. —Ēbipadquid Esus tantiaquid Nuquin Papa yacno istuidendambi —quec ma yuecquo shubianenquo icnueshun Esusēn uincuemete mibi chuinu. ¹⁴ —Unēs uaqui Esus uincuenacpadecebidi nuquitsen uincuenendac. Esus tantiaquido unēsascho uincuemeshun Nuquin Papan abi yacno aton Mado Esus buamendac —quequin nuqui tantiec. ¹⁵ Tanta. Nuquin Icbo Esusēn chiaidquo mibi chuinu. Nuquin Icbo Esus nidaidēn padpidec chonoc aid istuidec Esus tantiaquido unēsabi icquido abia nidenquo iquendac. ¹⁶ Padenquo icnubien Nuquin Papa yacnuēs choec Nuquin Icbo Esusba nua cuēdtuidendac. Adnubien Nuquin Papan abi yacnoshon uaido mayan bēdabo chuiquid dapatsen nua cuēdtuidoaindac. Adnubien Nuquin Papan chiacpadomboen utsin nua shoncatuidendac. Adnubien Esusēn abi tantiaquido unēsaidotedi abia aton dada chuca uaquin uincuemendac. ¹⁷ Adoquien aidobēdi Esus tantiaquido unēsabi icquido tsidadash aidotedi abuctoendac Nuquin Papabēd tabadec nidec. Abitedi abuctoquimbi abi bēquedec Esus chosho istuidendac. Adash Esusbēd Nuquin Papa yacno nidash anobi nuqui quenendac. ¹⁸ Ēbi adsho tantishun nadota. Aton matses unēsaid tantiec shubiquido bēdambo icmenuen ēmbi chuiboed chuita.

Esus chote chiaid

5 Tanta, con utsibo. Mibi chuinu. —Nēidtedec ushash Esus padpidec choec —quequin chuitiapimbo iquebi. Adembidi: —Nēidted seta matamiash choec —quequin dada uatiapimbo iquebi. Tantienuo iquembi. Naden mibi chiondambi. ² —“Nēid inchēshēmbi ampequid choec,” quequin tantiatiapimbo yacbimboec: “Aid ushēn Nuquin Icbo choec,” quequin tantiatiapimbo icnuc Esus choaindac —quequin mibi chiondambi. ³ Esus tantienquo yequi matses dadpen: —Cuesnanenquo yec nuqui bēdamboec tabadec —queshobien ambi: —Ēbi cuidendac —cacmaidēnquo padpidec choshon cuidquiendac. ¿Mitsipadquo chido bacuē usunquid icpec? —Aid ushēnquo tishembi —quequin tantiatiapimbo yequi badedquo nēncuenec. Adecbidi ambi: —Choec —cacmaid Esus badedquo chosho abi tantiesabon cuenēntiapimbo iquendac. ⁴ ¿Esus chonoda nuqui dacuēdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nēbien Esus chochitec —quec bēdamboec nuqui tabadnubi Esus chonoc nuqui dacuēdenquo iquendac. ⁵ ¿Pacuēnēdacbimboecquidoda nuqui nedi? Padenquo. Pabiate paposhquiacbimboecnuc Esus bēdamboen tantiamiaido yec bēdamboec tabadquido ma nuqui neyoc. Adecbidi bēdamboec tabadnuna. ⁶ Ushquin pabiaten tantienquo yacbimboen utsibon Nuquin Icbo Esus tantienquo iquec. Adec tabadenquo icnuna. —Esus tantienquo icmane —queshun nuqui icsate bunaid nainquo icquin mēmuna. Nuquin Icbo chosho istiadquo yec bēdamboec tabadnuna. ⁷ Esus tantiesaboen inchēshēn ushquin tantienquo yacbimboec iquec. Adquiecbidi tantiadenuen acte paēmbo icquid acquido nec. ⁸ Adquidpenquo yec Esus tantiaquido yec bēdamboec tabadnuna.

Nuqui icsate bunaid nainquo icquin mëmununa. Sondado: —Shocosh tsasimbo icquid shictonquenu. Sicsenushe —quiacbimboec icnuna. Satanasën Esus tantiamenquo icnushe. Esus tantiaquiquin matsessten tantiaquionona. Adecbidi sondado: —Masenushe. Shocosh tsasimbo icquid mauete mauenu —quiacbimboecbidi icnuna. Satanasën icsamboen tantiamequin chieshtomenushe. —Esus tantiasho cuidenquo icquin Nuquin Papan abi yacno ëbi tabadmendac —quequin bëdamboen tantianuna. ⁹ ¿Cuidnuenda Nuquin Papan nuqui Esus tantiamediac? Padenquo. Abëdi tabadmenuen Nuquin Icho Esuquidistu nuqui tantiamiac. ¹⁰ Aidi abi tantiaquid cuidmenquo icnuec abided cuidadec unëzac caondash. Aidën padpidec choshon abi tantiaquidotedi buanshun abëdi tabadmendac. Unësaid uincuemiadobëdta unë-abi icquidotedi adoendac. ¹¹ Èbi adsho tantiashun mimi nabocpadomboembidi Esus tantiec bëdambo icnuec ëmbi chuiboed chuinanquiota. Adecbidi bëdamboec tabadec: —Adequi tabadnuna —cananta.

Bëdamboec tabadte Pabadon chiaid

¹² Esus mibi chuibanquido bëdamboen ista. —Nuquin Icbon chiacpadomboen chieshtoenquo icquin nuqui chuiquidën nuqui bëdamboen chuibanec —quequin aido bëdamboen tantiata. Mibi nashunquidombo neque. Aidon: —Nuquin Papan chiaid niaquenquo yec bëdamboec tabadnuna —quequin chuisho bëdamboen tantiata. ¹³ —Nuquin Papan chiaid bëdamboen tantiaquidombo nec —quequin bëdamboen ista. Adech chieshëmënenquo yec bëdamboec tabadta. ¹⁴ Mibëd icquido naden chuiban. Chieshquid icsho: —Mibitsen chonoadta —cata. Dacuëdsho: —Dacuëndenda —cata. Esus bëdiactsëc tantiatësesho bëdamboen chuiquin Esus tantiamequiota. Dada padishquo icsho nashunta. Aden nëishenquo icquin abitedi bëdamboen ista. ¹⁵ Utsin chieshënac cuidnanenquo yec bëdamboec tabadta. Mibëdta Esus tantiaquidobëd bëdamboec isanquin utsibotsen bëdamboen ista.

¹⁶ Aden Esus tantiec ënëdenquo yec cuishonquianeta. ¹⁷ Adembidi Nuquin Papa chianequin: —Èmbi chiacpadomboen ëbi nashunquin utsibotsen nashunta, Papa, —quequin chianeta. ¹⁸ ¿Mimbi chiacpadomboen Nuquin Papan nasho isunuidida mimi: —Nuquin Papa bëdambo iquec —cape? Nadoac bëdambo ictsiash. Bëdamboec tabadquin: —Mibi bëdamboshë iquec, Papa, —cac bëdambo ictsiash. Daic-sabudshumbic adembidi nac bëdambo ictsiash. Paëmbo icnubi adembidi. Mitsana icnuc adembidi. Mitsana nibëdnubi adembidi. Utsibon chieshënaqui adembidi: —Mibi bëdamboshë iquec, Papa —cac bëdambo ictsiash. Aden Nuquin Papan: —Ma Esus tantiaquidon adono —quequin tantiacpaden mimi natsiac. ¹⁹ Nuquin Papan Mayanën Nuquin Papan chiaid tantiamiac pamumëdacbimboec tabadenda. ²⁰ Aden Nuquin Papan Mayanën tantiamiac utsibotsen chuisho: —Mue nec —badedquo cainda. Chuishoba tantiata. —Nuquin Papan chiaidquiu chuinu —quesho mamëshunenda. ²¹ Adenquo icquin: —¿Nuquin Papan chiaidquibida chuibanenque? Tantiabono —cata. Aden tantiashun Nuquin Papan chiaidquiu isbanta. Aden isbanquin abimbo chuisho tantiashun: —Ai, Nuquin Papan chiaidquiu chiec —queshun aidën chuisho bëdamboen tantiata. ²² Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquo chiec —queshun aidën chuisho tantienda. Aidën chiacpadomboen nainda.

²³ Mibi Nuquin Papa chianembi. —Matses bëdambo icmequid icquin mimi chiacpadomboen aido name, Papa. Mimi chiaidquiu bëdamboen tantiamequin bë-

damboen tabadme, Papa. Mimbi adoac bēdamboec tabadnuc choashun con Icbo Esusēn: “Aido bēdambo iquec,” catsiash, Papa —quequin Nuquin Papa chianembi mibi. ²⁴ Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquio iquendac. ²⁵ Nuquin Papa ěbi chianeta. — Abēd icquidobēdta Pabado bēdamboen nameta, Papa —quequin Nuquin Papa chianeta. ²⁶ Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban. ²⁷ Nuquin Icbon tantiacpaden chuiquin dada uaombique. Ĕmbi dada uaboed nēid isquin ambocquido Esus tantiaquidotedi chuiban. ²⁸ — Nuquin Icbo Esuquidistun bēdamboen ispashun —quequin mibi tantiembi. Padi. Aidtedi dada uaombi.

TESADONICA YACNOCQUIDON ISTE 2

Pabadon tauamboen chiaid

1¹⁻² Pabado nebi. Tesadonica yacnocquido Nuquin Papabēdta Nuquin Icbo Esus tantiaquido mibi chuioaquin dada uaimbi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

Nuquin Papan Esusbēdtan matses cuidte chiaid

³—Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactsēc tantiatsēcboedombi nēbi Esus tantiabededosh,” quiosh, Papa. “Adecbidi bēdiactsēc tantianamboedi nēbi comapenec tantiananosh,” quiosh. Aden aido bēdambo icmec mibi bēdamboshē iquec, Papa —quequin chianembi mibi. ⁴Mimbi aden bēdamboen naid Esus tantiaquido utsibo chuibeniombi. —Dadpeshun chieshēnaqui chieshtoenquo icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

⁵Adec chieshtoenquo icquid icquin nuqui naden tantiec. —Ēbi chieshtomenquo icquid abitedishun naid tantiaquidquo nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenquo icquin Esus tantiasho Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac. ⁶Nuqui chieshēnquidon naidtsen tantiaquid icquin Nuquin Papan aido cuidendac. ⁷Aden nuqui chieshēnquido cuidquin aidon nuqui natiamiaid nuqui bēpiscudmendac. Abi yacnuēsh mayan bēdabo ambi comapenen tantiaquin namiaidobēd choshon Nuquin Icbo Esusēn adoendac. ⁸—Icsaisambo yec matses cuidquid nebi —quequin tantiamenuc bēchamauanquiec choshon Nuquin Papa tantiesabo cuidendac. —“Nuquin Icbo Esus tantiasho Nuquin Papan mibi bēdamboen istsiash,” quequin chuisho tantiatiapimbo iquebi —quequin abi tantienquo icsho Esusēn cuidendac. ⁹Cacumiacimboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icbo yec bēdamboshē isadsho isec tabadtiapimbo iquendac. ¹⁰Aden ambi icsaido cuidte ushēmbi Esus chosho abi tantiaquido: —Ēbi cuidmenquo icnuc abided cuidadaid Nuquin Icbo bēdamboshē iquec —quequin aton Icbo isec tabadendac. Ēmbi Esus chuibanac aid tantibenondaico icquin mimbitsen Esus chosho isendac.

¹¹—Aidbēdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bēdamboen tabadme, Papa. Aido: “Esus tantiaquin ambi chiacpadomboen natiadquo iquebi,” quesho ambi chiacpadomboen name, Papa. Comapenen tantiaquidquo mibi neque. Adota, Papa. ¹²Aden mimbi con Icbo Esuquidistubēdtan bēdambo icmiac Esus tantiec bēdamboec tabadtsiash, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdtan Nuquin Papan aden bēdamboen tabadmec. Aton Icbo Esuquidistubēd Nuquin Papa bēdamboshē iquec,” quependac utsibo, Papa —quequin Nuquin Papa chianembi mibi tantiaquin.

Icsamboshë icquidba chote chiaid

2 Tantia, con utsibo. Mibitedi chuinu. —Abi yacno tabadmenuen buanuec Nuquin Papa yacnuësh Nuquin Icho Esus ënden choac —quesho tantia²sh dacuëdta-nenda. Mibi yacnoshon ¿tsuntsin adec muaquin chuiposh? Aidon: —Tantia. Nuquin Papan Mayanën tantiamiacpadomboen chuinu. Nuquin Icho Esus ënden choac —quec muapash. Ambembi chiaidien chuichitash. —Naden Pabaddon chiaid iquec —quequin ëmbi dada uaidbimboecquid isquimbien chuichitash. ³Adec muaid tantia³sh: —Abimboen cachitosh —quenda. ¿Nuquin Icbobada chopadic? Padenquo. Utsibain choendac. —Nuquin Papa caidën chiaid tantiatiapimbo iquebi —quec matses icsamboec tabadnubien Nuquin Papa chieshëncquidquo icsamboshë icquidba choash matses dadpenquo chuiquid dapa iquendac. Aid Nuquin Papan cuidtequidquo nendac. Aidba choabi icnuc Esus choenquo iquendac. Icsamboshë icquidbain choendac. ⁴Aid chuiquid dapa yanashic Nuquin Papa dëniacte bunquiec Nuquin Papa tabadte shubu uashunaidën puduedshun: —“Comapenen tantiaquin ëbi nashunquidquo nec,” quequin mimbi Nuquin Papa caid nibëdeque. Ëbiuidtsëqui tantiatia —caindac matses abitedi chuiquin.

⁵Aden mibi chuideniondambi. ¿Tantienquioda ique? ⁶Nuquin Papan tantiacpadënquo chomenuen uidënuac icsamboshë icquid nëbi choenquo iquec. Nuquin Papan tantiacpadënquo choendac. Ëmbi chiondacadquid abi chomenquo icquid mimbi tantiec. ⁷Nëbi isadenquo icquidën Satanasën namiac matsesën Nuquin Papan chiaid niac-niacbededec. Padnuen icsamboshë icquid choabi iquec. Aid chomenquo icquid nidabi icnubi icsamboshë icquid chuiquid dapa yantiapimbo iquendac. Abi chomenquo icquid nidmiambien ⁸icsamboshë icquid matses chuiquid dapa iquendac. Adnubien Nuquin Icho Esusën: —Ëbien matsesën Icbombo nec —quequin matses abitedi tantiamenuen choshon icsamboshë icquid: —Unësta —caquinuidtsëqui unës uashunendac.

⁹Adec Esus choabi icnuc icsamboshë icquid chuiquid dapa yanendac. Adquid yanshumbic Satanasën tantiamiacpadomboen comapenen tantiaquin dadpenquo nabanquin ismendac. —Comapenen tantiaquidquo nebique. Istac —quequin ambe⁹mbi chiaid tantiamenuen aden nadatiambo icquin nabanquin ismendac. ¹⁰Adec ic-sauidequi tabadquid yec comapenec muasho tantia¹⁰sh: —Abimbo caic —quependac Esus tantiesabo Nuquin Papan cuidtequido yec. Aidon Esus chuibenequidën Nuquin Papa yacno tabadte abimbo chuisho pamumëdacbimboen tantiatiapimbo icquin ambembi chiaiduidtsëqui tantiadac. ¹¹Aden ambi chiaid niac-niacuidequi icsho Nuquin Papan: —Abi bunaidquid ambembi chiaidquid chuisho ma tantiapana —quequin namiac: —Mue nec —quequin tantienquo iquendac. Utsi muasho tantia¹¹sh badedi: —Abimbo chiec —quetsia¹¹sh tantienquo yec. ¹²Aden ambi chiaidquid tantiatiapimbo icquin aid niac-niaquec icsateuidi bunsho Nuquin Papan cuidquendac.

Nuquin Papan tantiamiaid

¹³Nuquin Icbon mibi tantiaquiec. Ëndenquimboshë matses uabi Nuquin Papa nuqui caic: —Ëbi yacno tabadmenuen Esus tantiamequin aido bëdambo icmen¹³dambi —quepampic. Adshumbic aidën chiacpadomboen aton Mayanën namiac Nuquin Papan chiaidquid tantia¹³sh Esus tantiec mibi bëdamboec tabadcuenondac. —Adquibidi iccosh —quesho tantia¹³shun Nuquin Papa chianembi naden. —Aden aido

bëdamboen namequid yec mibi bëdamboshë iquec, Papa —quequin chianembi mibi tantiaquin. ¹⁴Nuquin Papan chiaidquio ëmbi chuibanac mimbi Esus tantiabenondac. Abi yacnoshon Nuquin Icho Esuquidistupadquio bëdamboshë icmenuen aden Nuquin Papan mibi Esus tantiamiac. ¹⁵Ëbi adsho tantiashun ëmbi chiondacadomboen chieshtoenquio icquin Esus tantiata. Ëmbi mibi bëisquin chiondaidbëdta ëmbi dada uaquin abimbo chiondaid bëpiscudenda.

¹⁶Nuquin Icho Esuquidistubëdta Nuquin Papan nuqui tantiaquin bëdamboen isec. Adembidi: —Nuquin Papa yacno Esusbëd iquendabi —quequin tantiamequin dayacquio yacimboecnuc nuqui icmec. ¹⁷Adquid icsho chianembi naden. —Tesadonica yacnocquido chieshtomenquio icquin Esus tantiamequin bëdamboec tabadquid icme, Papa. Adembidi bëdamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

Nuquin Papa ëbi chianeta, quiaid

3 Tantia, con utsibo. Mibi chuinu. Nuquin Papa ëbi chianeta. —Nidaid utsi-utsiec yacno nidmeshun Pabado chedo matses dadpenquio Esusën naid bëdamboen chuibame, Papa. Mimbi bëdamboen chuimiac ëmbi Esus tantibenondacadomboen utsibon dadpeshun Esus tantiabentsiash, Papa. ²Aden Esus chuibansho isun Esus tantiesabo chieshëmënuquidon: “Pabado cueschitono,” casho cuesmenda, Papa —quequin Nuquin Papa ëbi chianeta. ³Nuquin Icho bëdambo iquec. Muesambo icquin ambi chiacpadomboen nuqui bëdamboen dayun uaindac. —Ëbi tantienquio yanushe —qeshun nuqui chieshtomenquio icquin Satanas nuqui yuametiapimbo iquendac. ⁴—Aden Nuquin Icbon bëdambo icmiac ëmbi chiacpadomboen naboedi adembidi Tesadonica yacnocquidon naindac —quequin tantiombi. ⁵Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan ëbi tantiaquiec,” quequin Tesadonica yacnocquido tantiameta, Papa. Esusën chieshtoenquio icquin nacpadomboembidi aido chieshtoenquio icquid icmeta, Papa —quequin Nuquin Papa chianembi.

Esus tantiaquido uspuenquio icquid

⁶Tantia, con utsibo. Nuquin Icho Esuquidistun: —Ëbi chuibeneta —caidquio icquin mibi chuinu. Esus tantiaquido utsi-utsiec ëmbi mibi chiondaid niac-niaquec chieshuidequi icsho isash aidbëd chieshec tabadenda. ⁷—“Ëbëd iquec Pabado dayacquio iccondacpadquiec chieshenquio yequien tabadtia,” quiosh —quiosh mibi caic. Abimbo mimbi cac. Mibëd yec dayacquio iccondabi. Chieshenquio yec chonoadteniondabi. ⁸Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. —Ëbi meniac aton na naimëdnushe —quish con piucquid bednuec chonoadteniondabi. ⁹—Esus tantiaquidon abi chuibanquid menenquio icquid —¿quetabi ique? Padenquio. Esusën naid chuibanquid ambi chuibanaidon meniaquien bëdambo ictsiash. —Chieshenquio icquin ëmbi nacnensho isun ma adembidi Tesadonica yacnocquidontsen nanu —quishini chonoadteniondaci. ¹⁰Mibëd tabadquin naden chiondambi. —Aton na nacnenenquio yec chieshuidequi icsho pemenuquio icquid —quequin chiondambi.

¹¹Mibi caic: —Utsi-utsiec chieshuidequi tabadosh. Utsi icsaiduidquio chiec tabadosh —quetuidosh. ¹²Uspun tantia. Nuquin Icho Esuquidistun chiaid mibi chuinu. Chieshuidequi tabadenda. Mitsanabi penuec chonoadta. ¹³Nuquin Papan chiac-

padomboen naic chieshtoenda. Chieshtoenquo icquin bēdamboen-uidi nata. ¹⁴Nēid dada uaquin ěmbi chiaid niac-niacsho ista. Adec icsasho isash: —“Icsamboen naombi,” quequin ma tantiabenu —quiash abēduidi iquenda. ¹⁵Aid chieshēnenquo yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bēdamboequien tabadtiad —quequin chuita.

Pabadon ěnquin chiaid

¹⁶Mibi tantiaquin Nuquin Papa chianembi naden. —Bēdambo icmianquidquo icquin Con Icbonquo ma aido dacuēdenquo icquid icmepanuna, Papa. Aidobēd ma Esus tēshēdenquo icpanuna, Papa —quequin Nuquin Papa chianembi. ¹⁷—Ista. Ěmbimbo dada uaid nēid neque —quequin ěmbi nēidtedpactsēc dada uaid isun: —Pabadon chiaidquo nec —quequin mimbi tantiendac. ¹⁸—Nuquin Icbo Esuquidistun bēdamboen ispashun —caimbi mibi. Padi. Aidedi dada uaombi.

TIMOTEYON ISTE 1

Tauamboen chiaid

1 Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquio nebi. ²Ëmbi chiondac Esus tantiabenash con mado icbobimboecquid mibi neque. Mimi iste nëid dada uanu. Mibi tantiec: —Nuquin Papan aton Mado Nuquin Icho Esuquidistubëdtan con mado bédamboen isquin bédambo icmepashun —quiobi.

Chiaid utsi chienda, quequin chiaid

³Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibëdta nactsusuaquin Nuquin Papan chiaid chienda —cata. ⁴Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmëdpampic. Aidën tsyuecquiduidtsëqui bédambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimi Nuquin Papan chiaidquio bédamboen tantiamepe? Adenuidi chuiquin mimi Esus tantiamenquio iquec. Aden mimi ambembi chiaid chuisho tantiash: “Mimi icsamboen chiec. Ëmbimboen bédamboen chiec,” quec mibëdi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquio icquido aden chuita. ⁵Adshumbic aidobidi naden chuita. —“Matses ma bédamboec tantiananu,” quequin Nuquin Papan chiaidquio chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado. ⁶Mimi aden chiacpadomboen nainquio icquidoen Nuquin Papan chiaid bédamboen tantienquio yec abembi onquec. ⁷Adquidon: —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuc aid chuibanquid icte bunebi —queboedombi Nuquin Papan chiaid bédamboen tantienquio icquin icsamboen chiec.

⁸—“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquio. Ma aidi bédambo iqueyoc. —Nëid tantiashun ma abi icsaid ënu —queshun aid abimbo chiac bédambo ictsiash. ⁹¿Bédambo icquid chuiquinda Nuquin Papan Moises dada uamepampic? Padenquio. Icsambo icquido chuiquimbien adopampic nadquido chuiquin. Nëidic Nuquin Papan chiaid niac-niacquido. Nëidic aton chuiquidën chiaid niac-niacquido. Nëidic Nuquin Papa tantiesabo. Nëidic Nuquin Papa mamëshunquido. Nëidic anibi cunesuquido. Nëidic amëbi cunesuquido. Nëidic cunesunianquido. ¹⁰Nëidic aton chidopenquio chudquido. Nëidic aton bënëpenquio chudmequido chido. Nëidic aton chido bunenquio yec dada daëd chichudnanquido. Nëidic matses utsi bedshun yuaquido. Nëidic muaquido. Nëidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. ¹¹Adembidi Esus chuibenequidon: —Adquid icsambo iquec —quequin chiec. Bédamboshë

icquin Nuquin Papan aden Esus chuibenequido chuimec. Esus chuibenequidbidi icquin adembidi chiemi.

Nuquin Icbon Pabado bēdamboen isbenaid

¹² Tantia, mado. Mibi chuinu. Nuquin Icho Esuquidistun: —Pabaton ēbi bēdamboen chuibantsiash —quequin tantiashun: —Ēbi chuibenequid icta, Pabado —qeshun ēbi bēdamboen namec. Adoaid icquin: —Ēbi namequid yec mibi bēdambošhē iquec, Icho —quequin Nuquin Icho Esus chianemi. ¹³ Ēnden adenquio iccondabi. Nuquin Papan Madopenquio danquin Esus icsamboen chuishunondambi. Abi tantiaquido chieshēnquin cuesun secate bunondabi. —Aton Mado Esus tantiasho Nuquin Papan ēbi bēdamboen istsiash —quenquio icquin adopondambi. Adshobini: —Pabaton abimbo tantiabi iquec —qeshun Nuquin Icbon cuidenquio icpanēdash. ¹⁴ Adec icsambo icquid icsho Nuquin Icbon tantiamiac: —Abi tantiasho ēbi bēdamboen isbentsiash —quequin Esusquio tantiabenondambi. Esus tantiaquin matsesesen tantiaquiemi.

¹⁵ Tantia, mado. Naden chiaid bēdambo iqueque. —Icsambo icboedēn abi tantiasho cuidmenquio icnuec Esus matsesac caondash —quequin chiaid bēdambo iquec. Ēbibic icsamboshē icpondabi. Utsibon Nuquin Papan chiaid bēdiactšec niacniacnubi ěmbimbo comapenen niacniaccondambi. ¹⁶ Adec ēbi yuec icsambo icsho Nuquin Icho Esusēn baded cuidenquio icquin abibi tantiamequin bēdamboen isbempondashi. —Pabado bēdamboen isaic chiac utsibo: “Pabado icsambo icboedi Nuquin Papan bēdamboen isbenac. Adembidi Esus tantiasho Nuquin Papan ěbitsen bēdamboen isendac,” quequin ēbi tantiendac. Adquid unēsacsho ēbi yacno tabadmendambi —qeshun abi tantiamequin Esusēn bēdamboen isbempondashi. ¹⁷ Aden tantiaquin nadoemi. —Nuquin Papa ambiuidtsēqui abitedi namequid yec abitedishun Icbombo nec. Unēstiapimbo icquid nec. Isadenquio icquid nec. Adquid abentsēcquiobi icnuc abipadquid utsi nibēdec. Adquid icsho abitedishun: “Mibi bēdambošhē iquec, Papa,” capashun ěnenquio icquin —caimbi.

Matsesēn mibi chiondaccpadombota, quiaid

¹⁸ Mibi con mado icbobimboecquid neque. Ēmbi chiacpadomboen Nuquin Papan chiaidquio chuibanta, mado. Ēnden mibi Esus chuibanquid yanabi icnuc Nuquin Papan oncamiac nuquibēdtan Esus tantiaquidēn mimbi chuibante chuipondash. —Esus bēdamboen chuibanquin Timoteyon Esus tantiaquido bēdamboen namendac —quequin mimbi chuibante chuipondash. Aidēn chiacpadomboen chieshtoenquio icquin Nuquin Papan chiaidquio chuibanta. ¹⁹ Aden Nuquin Papan chiaid niaquenquio icquin Esus tantiaquiec bēdamboec tabadta. Utsiboen adenquio iquec. Icsamboec tabadquin Nuquin Papan chiaidquio niacniacquin Esus tantienquio yanosh. ²⁰ Adecandedo caidbēdtan Imeneyo caidēn aden Esus tantienquio yanosh. Aid daēdshun Nuquin Papa muauaquin icsamboen chuisho nadopombi. —Adquid Satanasēn natiambo icmepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

Nuquin Papa bēdamboen chianete chiaid

2 Tantia. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbēdta mibi bēdamboen tantiamequin bēdamboen ista, Papa. Matses nashunquidquo yec mibi bēdamboshē iquec, Papa —quequin Nuquin Papa chianenuna. ² Adembidi Nuquin Papa chuiquin: —Chuiquid dapambo pedesident caidtedibēdta chuiquid dapa utsibotedi bēdamboen tantiameta, Papa. Adoac aidon bēdamboen namiac cuesun secananenquio yec matses abitedi bēdamboec tabadtsiash. Adnubi abi chieshēnquido nibēdnuc Esus tantiaquido abi tantiec bēdambo ictsiash, Papa —quequin Nuquin Papa chianenuna. ³—Con matses Esus tantiameta, Papa —quequin nuqui aden chianesho tantias: —Bēdamboen chiec. Ēbi bunaidquo chiec —quendac Nuquin Papa nuqui cuidenquio icquin abēd tabadmequid. ⁴ Matses abitedimbo cuidenquio icnuen matses bēdamboen iste bunquid yec: —Ma ěmbi chiaid tantiasun abided cuidadec unēsaid ma tantiapanu —quec Nuquin Papa. ⁵ Nuquin Papan chiaidquido tantiasun nuqui naden tantiec. —Nuquin Papa matses uaquid abentsēqui icnuc abipadquid utsi nibēdquiec. Abēd icboedi matsesun: “Nuquin Papapadquid icquin aid tantiamequid nebi,” quequin aton Madon matses chuipanēdash. Adecbidi aton Papa matses bēdamboen ismequid yampanēdash Esus. Aid abentsēqui Nuquin Papa bēdamboen ismequid nec. ⁶ Abi tantiaquid cuidmenquio icnuec abided cuidadec unēspac caondash —quequin chiaidquido nuqui tantiec. Nēbien Nuquin Papan tantiacpadomboen matsesēn aden chiaidquido chuiben-chuibenec. ⁷ Adomboembidi Esus chuibenequidquo nebi. —Matses utsibo isadaidpembo ěbi chuibeneta —Esusēn caondaid nebi. Adoaid icquin: —Ma Esus tantianu —quequin Nuquin Papan chiaidquido chuibenec nebi. Abimbo caimbi. Adquid nebi.

Esus tantiec cuēdēnacnoshon nate chiaid

⁸ Tantia. Dadatedi chuinu. Cuēdēnacno puduedshun Nuquin Papa chuinuec bēdamboequien tabadtiad. Nēish bēdanash chieshēnanenquio icquimbien Nuquin Papa chuitiad. ⁹ Chidobotsen chuinu. Esus tantiec Esus tantiaquido cuēdēnacno nidnuec: —Mabi isnu —quequin tantienquio yec bēdamboec dasiuidta. Bēdamboec tabadquid dasiuidac bimboec dasiuidta. Chido chishpidabimboec dasiuidenda. —Mabi isnu —quenquio yec Esusquio tantianuec Esus tantiaquido cuēdēnacno puduedta. ¹⁰—Mabi isnu —quequin tantienquio yec: —Nuquin Papa tantiaquidquo nebi —quec utsibo nashumbanec bēdamboec tabadta.

¹¹ Esus tantiaquido cuēdēnacnoshon dadan Nuquin Papan chiaid chuibanesho tantiaquid chidon. —Aidēn chiapadomboen natiapimbo iquebi —quequin tantienquio yec bēdamboen tantiec otacquio tabadquid chido. ¹² Esus tantiaquido cuēdēnacno puduedshun dada chuibanesa chidon. Adembidi dada ancaisa chidon. —Otacquien tabadquid chido —caimbi. ¹³ Dada Adan caidba Nuquin Papan matses uapampic. Adshumbic aton chido Eba caidtsen. ¹⁴ Aden dadabēdta chido nacnenacsho isumbien Satanasēn: —Icsamequin tanu —qeshun muauac icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido chuibanquid —caimbi. ¹⁵ Adec abia icsasho isun Nuquin Papan cuidac paēmbo icnuc bacuē tishquid chido abitedi nec. Nēbi Esus tantiaquid yanash ambi tishaido bēdamboen namequid nendac. Esusēn chiapadomboen natiadquido icquin mat-

ses tantiaquid nendac. Nuquin Papan chiaid niaquenquo icquid nendac. Aton bënëuidtsëqui chudmequid yendac Esus tantiaquid chidon. Adquid Nuquin Papan bëdamboen isquin abëdi tabadmendac.

Esus chuibanquid chiaid

3 Tantia. Utsitsen mibi chuinu. —Esus chuibanquid ictiadquio iquebi —quesho: —Bëdamboen nate mibi bunec —cata. ²—Nuquin Papan chiaid chuibanquid nadquien ictiad —quequin anocquido chuita. —Bëdamboec tabadquid nec —utsibon caidquio Nuquin Papan chiaid chuibanquid nendac. Adquid chido abentsëc inquid nendac. Abi bunaid ënshun mëmunquidquio nendac. —Bëdamboen tantiaquidquio nec —utsibon caidquio nendac. Isedanquido bëdamboen isquid Nuquin Papan chiaid chuibanquidën. Nuquin Papan chiaid bëdamboen tantiamequin chuibanquid nendac. ³Tantiadenuen acte paëmbo icquid aquenquo icquid nendac. Badedquio nëishenquo icquid nendac. Uimanëmënenquo icquid nendac. Chushcananteuïdi bunenquo icquid Nuquin Papan chiaid chuibanquid. Piucquid bedteuïdi bunenquo icquid nendac. ⁴Aidën chiacpadomboen aton chidon aton bacuëbobëdtan naquid. Chieshenquo icquin aton papan chiacpadomboen naquid aton bacuëbon. ⁵¿Ambi chiacpadomboen aton chidobëdta aton bacuëbo bëdamboen namenquo icquinda Esus tantiaquido bëdamboen namepatsiashe? Padenquo ictisiashe. ⁶Ënden Esus tantiabenondaid chuiquin: —Ëbi chuibanquid icta. Ëbi bëdamboen chuiquin ëbi bëdamboen nameta —Esus tantiaquidon cac bëdambo ictisiashe. Nëbimbo Esus tantiabenquid aden chienda. Chuibanquid icmiac adquidën Nuquin Papan chiaid badedquio niactsiashe. Satanasbimboec: —Ëbiuidtsëqui bëdamboshë iquebi —quetsiashe. Adquid: —Ëbi chuibanquid icta —cainda. ⁷Ënden Esus tantiabenondaid mibi chuibanquid icmenun Esus tantiesabon: —Bëdambo icquid nec —casha tantiata. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamënshuntsiashe. Adquid Satanasën badedi yuatsiashe. —Icsambo icquid nec —caid: —Ëbi chuibanquid icta —cainda.

Esus tantiaquido nashunquid chiaid

⁸Tantia. Esus tantiaquido nashunquidtsen chuinu. —Nuqui chuibanquidën chiacpadomboen ëbitedi nashunquid icta —quequin nadquid chuita. Utsibon: —Bëdambo icquid nec —caidquio nendac. Muesambo nendac. Tantiadenuen acte paëmbo icquid aquenquo icquid Esus tantiaquido nashunquidën. Piucquid bunquin ampenquo icquid nendac. ⁹Nuquin Papan chiaid bëdamboen tantiaquinc Esus tantiaquinc caic bëdamboec tabadquid Esus tantiaquido nashunquid. Adquid bëdambo ictisiashe. ¹⁰Esus tantiaquido nashunquid icmenun: —¿Bëdambo icquidida nëid nec? —quequin chuimiac utsibo: —Ai, bëdambo icquid nec —abitedi queshe tantiashe: —Esus tantiaquido nashunquid icta —cac bëdambo ictisiashe. ¹¹Adquidën chido: —Bëdambo icquid nec —utsibon caidquio nendac. Utsi icsaiduïdi chienquo yec bëdamboec tabadquid adquidën chido. Tantiadenuen acte paëmbo icquid aquenquo icquid aton chidon. Ampenquo yec bëdamboec tabadquid. Adquidquio Esus tantiaquido nashunquidën chido bëdambo ictisiashe. ¹²Esus tantiaquido nashunquidën chido abentsëqui inquid. Ambi chiacpadomboen aton chidon naquid. Adembidi aton bacuëbon. ¹³Abi nashunquidën Esus tantiaquido bëdamboen nashunsho isun

utsibon bēdamboen isendac. Adoaidēn dayacquio icquin abi utsibo nashumbanquin dacuēdenquo icquin Esuquidistu tantiamendac. —Esus tantiaquido nashunquid adquidquo iquendac —quequin ēnquin chiombi.

¹⁴Tantia. Utsi mibi chuinu. Mibi yacno nēbi nidtiadquo iquebi. —Nidenquo icmane —qeshun nēid dada uaic nebi. ¹⁵Ēbi mibi yacno badedquo nidabi icnuc: —“Esus tantiaquidon nadoquid,” quequin Pabadon chiacpadomboen nanuna —cata. ¿Tutsi tantiaquido nuqui nepe? Unēstiapimbo icquid Nuquin Papan nec. Aid tantiaquido yec shubu abentsēquēn tabadquidobimboec nuqui iquec. Adquid icquin Nuquin Papan chiaidquo tantiaquin nuqui Esus chuibenec. ¹⁶Ēndenquo abi bēdamboen ismequid ambi tantiamiabi icnēdaidi nēbi Nuquin Papan tantiamiaid Esus bēdamboshē iquec.

Aid Nuquin Papan matsesmepanēdash.

Nuquin Papan Mayanēn: “Nuquin Papapadquidquo icsaisambo Esus nec,” quequin tantiamec.

Matsesēn unēs uaqi uincuenaid yec Nuquin Papan abi yacnoshon uaido mayan bēdabon isaidquo Esus nec.

Abi chuibenequidēn nidaid utsi-utsiec yacno nidshun chuibeniac utsin-utsinquien Esus tantiabenac caosh.

Aidquiobi Nuquin Papan abuc nidmeshun abēdi tabadmeoapanēdash.

Utsibon icsamboen chiaid

4 Tantia, mado. Nuquin Papan Mayanēn tantiamiaid mibi chuinu. —Esus chote nēbi icnuc abi tantiaquidon utsin-utsinquien Esus tantienquo yanendac. Satanāsēn yuabo podobitsi icsabon muaquin pausunac matsesēn chuisho tantiashun Esus tantienquo yanendac —quequin Nuquin Papan Mayanēn abimbo tantiamioshi. ²Aden muaquidon: —Abimbo caimbi —quequin bēdambo icquid damianquien aden muaquin chiendac. —Nuquin Papan cuidnushe —quequin tantienquo iquendac. ³Adquidon naden chiendac. —Dadan chido bedenda. Chidon dada bedmenda. Padenquo yec tabadta —quequin icsamboen chiendac. Adembidi: —Aidquo petemaid neque. Penda —quequin pete abentse-abentsen chiendac aid pete bēdambo icnubi. ¿Atotsi quequin Nuquin Papan pete uapampic? —Ēmbi chiaidquo bēdamboen tantiashun Esus tantiaquidon: “Nuquin Papan pete uaid bēdambo iquec,” quequin ma penu —quequin Nuquin Papan pete uampic. ⁴⁻⁵Aidēn pete uaidtedi bēdamboshē iquec. —Ēmbi pete uaid bēdambo iqueque. Ma penu —qeshun Nuquin Papan pete icmiaid ma petequid neyoc. —Mimbi pete uaid bēdambo iquec, Papa —qeshun pete isuidenquo icquin penuna.

Esus chuibanquid icquin bēdamboen nata, quiaid

⁶Esus tantiaquido ėmbi chuibocpadomboen chuibanquin mimbi bēdamboen natsiac, mado. Bacuētsēcsho min matsesēn Nuquin Papan chiaidquo mibi chuibanēdash. Aidēn chiaid tantiaquid icquin Esusēn chiacpadomboen nate bunquin ėmbi chiacpadomboen mimbi chuibantsiac. ⁷Con tsusedpabon ambembi chiampidbēda nēbi matsesēn adembidi ambembi chiaid tantienda. Nuquin Papan chiaidquo niactiapimbo yec bēdambo icte bunquiota. ⁸Aton dada uidēnquo icmenuec titinquetanequid nuquin matses nec. Esus tantiaquido bēdambo icnuec ¿mitsipadquo icpec? Nuquin Papa tantiaquieci ambi chiaid niaquenquo yec bēdamboec tabadquid nec.

Adquid unēsash Nuquin Papa yacno nidash bēdambošhē icquid iquendac. ⁹Ēbi adsho tantiash: —Abimboen caic —queta. ¹⁰Adec: —Abi yacno abēdi tabadendabi —quequin Nuquin Papan chiacpadomboen ēnenquo icquin nanuna. —Esus tantiaquid unēsacsho cuidenquo icquin unēstiapimbo icquidēn Nuquin Papan abēdi tabadmendac —quec chieshtoenquo yec bēdamboec tabadnuna.

¹¹Ēmbi chuiboec chuibanta, mado. —Nuquin Papan chiacpadomboen nanuna —quequin chuibanta. ¹²Mibi nēbi caniaid neque. Bēdamboec tabadta, mado. Ēnden caniaidēn: —Nēbi caniaid icquin Nuquin Papan chiaid mimbi tantienquo iquec —canushe. Bēdamboec tabadta. —Esus tantiaquido utsibotsen ma ēbi yacpadec bēdamboec tabadnu —quiash adta. Bēdamboen chuibanquinc matses tantiaquinc Esus tantiaquinc Nuquin Papan chiaid niaquenquo icquinc caic bēdamboec tabadta.

¹³Ēbi ano nidabi icnu Nuquin Papan chiaid adenuidi chuibanta. —Nuquin Papan chiacpadec bēdamboec tabadnuna —quequin Nuquin Papan chiaid isbanquin matses chuibanta. Aden bēdamboen tantiameta. ¹⁴Ēnden mibi mamishquin chiondaid ¿ada tantie? Ēnden Esus tantiaquido icquin tsusio dapabon mibi mamishbedondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bēdamboen chuibanquid Timoteyo iquendac —quequin chuipondash. Chieshtoenquo yec adquid icta, mado. ¹⁵Ēmbi dada uaquin chui-boedtedi isbanshun ēnenquo icquin ēmbi chiacpadomboen bēdamboen nabanta, mado. —Ēmbi adosho isun ma ēmbi chuibanaidon: “Nuquin Papan chiaid chuibanquidquo yanosh,” ma ēbi canu —qeshun bēdamboen chuibanta, mado. ¹⁶—Nuquin Papan chiaid niacmane —quec mibibi bēdamboec tantiadta, mado. —¿Adabi bēdamboec tabadpeba? ¿Adambi Nuquin Papan chiaidquo muainquo icquin chuibampoba? —quec mibibi tantiadta. Bēdamboec tabadquin Nuquin Papan chiaidquo ēnenquo icquin chuibanta. Aden Nuquin Papan chiacpadomboen naic aibbēd mibi tabadendac. Mimbi chuibanaidobidi adoaindac.

Esus chuibanquidēn bēdamboen chuite

5 Nuquin Papan chiaid chuibanquid icquin dada ēnden caniaid chushcainda, mado. —Esus tantiaquidēn nadoquid yendac —quequin bēdamboen chui: —Con pabimboecquid nec —quequin. Nēbi caniquid: —Con utsibimboecquid nec —quequin adembidi bēdamboen chuiban, mado. ²—Con tabimboecquid nec —qeshun macho bēdamboen chuiban. Chido machobudabi icquidtedi chibibimboec-nuc isquin: —Nēid chudtiadquid icchitebi —quenquo icquin Nuquin Papan chiaidquo chuibanta, mado.

Chido niantembo chiaid

³Tantia, mado. Esus tantiaquidon abēdtan Esus tantiaquid icsho niantē nashunte chuinu. Niantē aton matses nibēdquid: —¿Tsuntsimbini nashumpatsiashba? —quequid Esus tantiaquidon nashunquid. ⁴¿Ada niantēn tishaido icpec? Aidēmbi ani nashuntsiash. ¿Ada aton baba icpec? Aidēmbi aton chichi nashuntsiash. Aidēmbidi aton shanuachotsen nashuntsiash. —Ēbi nashundenēd neque. Nēid nashunu —qeshun nashuntsiash. Aden ambi chiacpadomboen nasho isash: —Bēdamboen naic —quetsiash Nuquin Papa. ⁵Padnuc aton matses nibēdquidēnquo niantēn Nuquin Papa chianequid: —Nuquin Papan ēbi nashuntsiash —qeshun. —Mimbi ēbi tantiaquieque. Ēbi nashunta, Papa —quequin Nuquin Papa chianequid niantē icsho

abëdta Esus tantiaquidon nashunquid. ⁶Niante utsimbien ambi tantiaiduidi naic. Petebëdta acteuidi tantiaquin abi bunaiduidi naic. Adquidën unësac bimboecquin Nuquin Papa tantienquio iquec. Adquid Esus tantiaquidon nashunenquio icquid. ⁷Ëmbi aden niante nashunte chuiboed Esus tantiaquido utsibotsen chuita, mado. —Aton matses nibëdquid niante nashunenquio icsho: “Esus tantiaquido icsambo iquec,” utsibon canushe —qeshun chuita. ⁸Aton shubun icquidotsen Esus tantiaquidon nashunquid. Abëd icquido menenquio yec pemenquio yec quec nashumënenquio icquid icsamboshë iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquio icquid icsamboshë iquec.

⁹—Nëidtedi chido Esus tantiaquido nashunquidombo iquec —quequin abi cuëmëdquid abi cuëmëdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquio 60ted matamec machobudaidquio. Aton bënëuidtsëqui chudmedenedquio. ¹⁰—Matses nashunquid nec —utsibon caid. Bacuë bëdamboen caniuadened machon. Isedanquido bëdamboen isquid. Esus tantiaquido nashundenequid. Matses daicsabudacsho nashunquid. Adec bëdamboec tabadquid: —Esus tantiaquido nashunquid icta —cata.

¹¹⁻¹²Utsi niante machobudabi icquid: —Adquid icta —cainda. —Esusuidtsëqui tantiaquin abi tantiaquido nashunembi —queboedëmbi dada bunquin ambi chuiboedi niacbidansho isun utsibon: —Icsambo icquid nec —catsiashe. ¹³Adquid shubu utsin shubu utsinquien isedben-isedbenec uspumbo yanash onquetuidtsëqui buntsiashe. Utsibo icsaiduidi chuibenequidquio ictsiashe. ¹⁴—Adquid niante machobudabi icquid dadan bedac bëdambo ictsiashe —caimbi. Adoac bacuë tishoatsiashe. Adshun codocaquinc sicaquinc daëdcaquinc catsiashe. Adec bëdamboec tabadsho: —Icsambo icquid nec —Esus tantiesabon catiapimbo ictsiashe. ¹⁵Adquid niante machobudabi icquidën utsin-utsinquien Esus tantienquio yanshun Satanasën tantiamiacpadomboen nac caosh. ¹⁶Niantebëd icquid utsi ¿ada Esus tantiaquid chido icpec? Aidëmbi niante nashunac bëdambo ictsiashe. —Ëmbi nëid nashumbanuc niante utsi aton matses nibëdquidquio Esus tantiaquido utsibon nashuntsiashe —qeshun abëd icquidën nashunac bëdambo ictsiashe.

Esus tantiaquido chuibanquid chiaid

¹⁷Tantia, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidën bëdamboen naosh? Adquidën Nuquin Papan chiaid bëdamboen tantiamequinc Esus bëdamboen chuibanquinc casho ambi chuibanaidon bëdamboen isquin nashunquid. —Ma penu —qeshun menequid. ¹⁸Adembidi chuiquin Nuquin Papan ambi chiaid dada uamepampic. “‘Penushe,’ qeshun adosbitsecquid bitsi secamenuen manemiaid baca bënë utsibon dënëshquid. ‘Adec chonoadquidën ma penu,’ qeshun isadaidbon dënëshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “‘Naic cho. Mibi bëdamboen cuidquin menenu,’ cac chonoadsho abi chonoo uaquidën menequid,” quequin Nuquin Papan chuipampic. Adembidi Esus tantiaquidon abi chuibanquid nashunquid.

¹⁹Padnuc Esus chuibanquid caic: —Nuquin Papan chiaid niac-niacsho isombi —quequin matses abentsëcshun chuisho: —Abimboen cachitec —cainda. Daëdshun chuisho: —Abimboen cachitec —cata. Adembidi abentsë chotsecquin chuisho tan-

tiata. ²⁰ Esus chuibanquidën Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpeshun tantianubi adota. —Aden chuisho tantiaquido dacuëdec: “Ëbitsen adembidi chushcapanundac,” qeshun ma utsibon Nuquin Papan chiaid niaquenquio icnu —qeshun chushcata. ²¹ Esuquidistubëdtan Nuquin Papan nuqui isec. Adembidi Nuquin Papan abi yacnoshon uaido mayan bëdabon nuqui isequë. Ëmbi chuibocpadomboen nata. Min matsesën mimbi tantiaidënquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. —Con matses ëmbi tantiaidquio neque. Chushcainquio iquembi —cainda.

²² Nuquin Papan chiaid chuibanquid icmenuen nuqui naondacpadomboen badedquio mamishenda. Ambi naid yuen isquioshon ambi chiaid yuen tantiaquioshon: —Bëdambo icquid nec —quequioshon nata. —Esus chuibanquid icta —mimbi badedquio caboedën Nuquin Papan chiaid badedquio niacsho isash: —Ambi: “Adquid icta,” caidbëd Timoteyo icsamboshë iquec —utsibo quenushe. —Ëbëdtan chuibanquid icta —badedquio cainda. ²³ —Daicsabudteniaccosh. “Pucu paëmbo yan-yanebi,” quiosh —quiosh mibi caic, mado. Acteuidei acashien mibi niaque. Actequid utsi paëmbo icquid pistsec ac ma pucu bëdanuequin. ²⁴ Tantia. Mibi padpiden chuinu. —Ëbëdtan namembi —canuen matsesën naid bëdamboen tantiaata. Utsi aton matses ismec icsasho: —Icsambo icquid nec —badedi catsiash aton matsesën. Utsibic ismenquio yec icsasho: —Icsambo icquid nec —quequin badedquio tantienquio icquin yuecshun istuidshumbi adotsiash. ²⁵ Utsien ismequin bëdamboen nasho: —Bëdambo icquid nec —badedi catsiash aton matsesën. Utsimbic ismenquio icquin bëdamboen nabansho: —Bëdambo icquid nec —quequin badedquio tantienquio icquin yuecshun istuidshun adembidi tantiaquid. Ëbi adsho tantiaquid: —Nuquin Papan chiaid chuibanquid icta —badedquio cainda.

Matses yuaido chiaid

6 Matses yuabo Esus tantiaquido icsho naden chuita. —Min icbo Esus tantiesha icsho bëdamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chui-nushe. Min icbon chiacpadomboen nata —quequin yuabo chuita. ² Utsibi chuiquin: —Min icbo Esus tantiaquidbidi icsho: “Ëbipadquidi nec. Ambi chiacpadomboen natiapimbo iquebi,” cainda. “Ëbipadquid icsho aid tantiaquin con icbon chiacpadomboen nanu,” quequin min icbo bëdamboen nashunta —quequin yuabo chuita. Ëmbi chuiboedtedi Esus tantiaquido chuiban. —Adota —quequin chuibanta, mado.

Piucquid bunquin utsibon ambembi chiaid

³ Mimbi: —Nuquin Papan chiaid niaquenquio yec bëdamboec tabadnuna —quequin Nuquin Icbon chiaidquio chuisho: —Aden chuisho tantiatipimbo iquebi —quequin ambembi chiaid chuiquid icsambo iquec. Adquidën chuisho tantienda, mado. ⁴ Aden icsamboen tantiaquidën: —Ëmbi chiaiduidtsëqui bëdambo iquec —quequin icsamboen chuibanendac. —Mimbi icsamboen chuinuc ëmbimbo bëdamboen chiec —quec chushcanantiadquio iquendac. Abembi onqueteuidei bunendac. Adquid yuec onquesho tantiaquid: —Utsi onquetiapimbo icnuc abentsëqui onquebudec —quec utsibo nëishendac. Adquidbëd chushcananec muauananec icsamboec tantiaquidunendac. ⁵ Pabiate shëcuë nibëdacbimboen Nuquin Papan chiaidquio bë-

damboen tantienquo yec chushcananendac. Nuquin Papan chiaid chuibanquidën piucquid dadpen bedte danec chuibanquidbidi ictiadquo iquendac.

⁶Nuquien Nuquin Papa tantiaquieci bédamboec tabadec nuquin na dadpen bedte bunenquo yec bédambo ictsiac. ⁷Tishac chucactsëcnu nuquin na nibëdpanëdash. Adembidi unësquin nuquin na nuqui buantiapimbo iquec. ⁸Nuquin pete dashcutebëd icnuc utsi bunenquo yec bédambo nuqui ictsiac. ⁹Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquo bednuen mëmunenquo icquin icsamboen nabantsiash. Aden Nuquin Papan chiaid niac-niacquin icsamboen naic quenesh adenuidi naic unësash icsambo icquido cuidacno nidendac. ¹⁰Adec piucquid natiambu bunquido aid bednec baded-badedquieci icsadenendac. Adquido: —Esus tantiembi —queboedobi padenquo yanash: —Esus tantienquo yanchitombi —quec natiac tabadendac.

Bédamboec tabad, quiaid

¹¹Mibi Nuquin Papa tantiaquidquo neque. Piucquid bedteuidi bunenquo yec bédamboec tabadte bunquiota, mado. Nuquin Papan chiaid niaquenquo yec chieshtoenquo icquin Esus tantiata. Matseszen tantieci nëshëmënenquo yec bédamboec tabadta. ¹²Utsibon chieshënaqui chieshtoenquo icquin Esus tantiaquieci bédambo icta. Unësash Nuquin Papabëd tabadnec adta. —Con Mado Esus tantiaquieci unësacsho ëbëdi tabadmendambi —qeshun Nuquin Papan Esus tantiamiac mimbi Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimbi tantiamiondaque. Adembidi aid tantiaquieci bédamboec tabadta. ¹³Abitedi uampidën Nuquin Papan nuqui isequc. —Adquid nebi —quequin ancanquid dapa Ponsio Pidato chieci dacuëdenquo icnëdaidën Nuquin Icbo Esuquidistuntsen nuqui isequc. ¹⁴Esus tantiaquin chieshtoenquo icquin aidën naidquo chuibanta. Nuquin Icbo Esuquidistu choabi icnuc ëmbi chui-boed niaquenquo yec bédamboec tabadta. —Esus tantiaquido icsambo iquec —utsibo quetiapimbo icnuc adta. ¹⁵Nuquin Papan tantiacpadënquo aid ushëmbi Esuquidistu nidaidën padpideci choendac. ¿Esus chomequid mitsipadquo icpec? Icsaisambo yec bédamboshë icquid nec. Aid abentsëcquiobi abitedishun Icbombo nec. Aidëmbi chuiquid utsibo abitedi namendac. Aidquo chuiquid utsin dëniactiapimbo iquendac. ¹⁶Aid abentsëqui unëstiapimbo icquid nec. Bëchamuanquiecscho istiapimbo yec utsibo tabadec. Aidi matsesën istiapimbo icquid nec. Adquid icsho: —Mibiuidtsëqui abitedishun Icbo yec mibi bédamboshë iquec, Papa —quequin Nuquin Papa chianenuna ënenquo icquin.

Aton na dadpen dayun uaquido chiaid

¹⁷Aton na dadpen dayun uaquido naden chuita, mado. —“Con na dadpenquioshë icnuc ëbiuidtsëqui bédambo iquebi,” quenda. Nibëdantiapimbo icquid danquin mimbi dayun uaiduidtsëqui tantienda. Nuquin Papambo tantiaquiota. Aidëmbi matses bédambo icmenuen aton na bedmec —cata. ¹⁸Adquidobidi chuiquin: —Bédamboec tabadquin utsibo nashumbanquiota. Adembidi cudasenquo icquin mit-sana utsibo menianeta. ¹⁹“Mimbi bédamboen naoque. Eëbëdi tabadmequin mibi bédambo icmendambi,” Nuquin Papa camenuen adota. Adash unësacsho Nuquin Papan abëdi mibi tabadmendac padpideci unëstiapimbo icnuc —quequin aton na dadpen dayun uaquido chuita.

Pabadon ënquin chiaid

²⁰ Ëmbi chuiboedquiobidi adembidi bédamboen chuibanta, mado. Nuquin Papan chiaid chienquoio yec abembi onquesho tantienda. —Bédamboen tantiaquin abimbo caimbi —quequidobi muasho tantienda. Adquidobëd chushcananenda.

²¹ Aden icsamboen chuisho tantiashun: —Abimbo caic —quequin utsin-utsinquien Esus tantienquoio yanondashe. Adquido tantienda. Chieshtoenquoio icquin Esusquoio chuibanta. —Nuquin Papan con mado bédamboen ispashun —quequin mibi tantiembi. Padi. Aidtedi chuiquin dada uaombi.

TIMOTEYON ISTE 2

Tauamboen Timoteyo chiaid

1 Pabado nebi. Nuquin Papan tantiacpadomboen Esuquidistun: —Ëbi chuibeneta —caidquo nebi. —Ambi chiampicpadomboen aton Mado Esuquidistu tantiaquid unēsacsho Nuquin Papan abēdi tabadmendac —quequin Esus chuibenequidquo nebi. ²Con mado icbobimboecquid mibi neque. Mibi chuiquin nēid dada uanu, Timoteyo. —Nuquin Papan aton Mado Nuquin Icho Esuquidistubēdtan bēdamboen isquin bēdambo icmepashun —quequin mibi tantiembi.

Chieshtoenquo icquin Esus chuiban, quiaid

³Con tsusedpabon nacpadomboen Nuquin Papauidi tantiaquin ambi chiacpadomboen natiadquo iquebi. Adquid icquin Nuquin Papa mibi chianembi. —Mibi tantiaquid Timoteyo bēdambo iquec, Papa. Adquo icmec mibi bēdamboshē iquec. Adquiuidi icmeta, Papa —quequin Nuquin Papa chianembi. ⁴—Ëbi nidnu —quesho tantiaquid mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. ⁵Naden mibi tantiembi. —Aton chichi Doida caidēn ani Eunisebēdtan aid daēdshumba Esus tantiabenuiacpadomboen Timoteyontsen nēbi Esus tantiaquiec —quequin mibi tantiembi. ⁶Adquid icsho mimbi tantiondaid padpiden mibi chuinu. —Min Mayan nēidbēd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibēd tabadmiac. Adoaid icquin dacuēdenquo icquin Esus chuibanta, mado. ⁷¿Nuquin Papan aton Mayan nuquibēd icmiacta nuqui natia dacuēdpe? Padenquo. Comapenen tantiaquid yec nuquibēd icquin nuqui cuesambo icmec. Adembidi Nuquin Papan Mayanēn tantiamiac nuqui matses bēdamboen tantiec. Adembidi nuqui icsate bunaid namenquo icquin mēmunquidquo icnuc nuqui bēdambo icmec.

⁸—Adoaid nebi —queshun dacuēdenquo icquin Nuquin Icho Esus chuibanta. Adembidi dacuēdenquo icquin: —Pabado tantiaquiembi —cata. —Quēnēn nauedtsaid Pabado tantiatipi —quenda. Utsibon cuestiadquo icquin chieshēnaqui Nuquin Papan namiacpadec chieshtoenquo icquin Esus chuibanuna. ⁹Nuquin Papan: —Bēdamboec tabadquid icmequin con Mado Esus tantiamembi —caido icquin adonona. ¿Nuqui bēdamboecuidi tabadshoda Nuquin Papan nuqui bēdamboen isbempondash? Padenquo. Ëndenquimboshē nidaidbēdta matses uabi Nuquin Papan: —Ëmbi chiaid niac-niaquec icsambo icboedēmbi con Mado Esus tantiaquid cuidentquo iquendambi —quequin ambi chuipampicpadomboen nuqui Esus tantiamiac. ¹⁰Aden ambi chuipampid tantiamiabi icshumbic nēbi Esuquidistu matsesmeshun matses tantiamiac. Adoac: —Abi tantiaquid unēsacsho icsaido cuidacno nidmenquo icquin unēstiapimbo icquid icmequin Nuquin Papa yacno abēdi Esuquidistun tabadmendac —quequin nuqui tantiec. ¹¹Aden tantiaquin Esus chuibenequidquo nebi. —Ëbi chuibeneta —Esusēn caondaic yec Nuquin Papabēdta Esus tantiamequidquo nebi. ¹²Aden chuibeneshobini chieshēnquin quēnēn nauedondash. Adoqui chieshtotiapimbo icquin Esus tantiembi. —Ëmbi tantiaidquo comapenen tantiaquin na-

banquidquo Esus nec. Adquid icquin: “Ēbi tantienquo yanushe,” qeshun abi tantiamequin ěbi chieshtomenquo iquendac. Nidaidĕn choabi icquin Esusĕn ěbi chieshtoenquo icquid icmendac —quec dacuĕdenquo iquebi.¹³ Tanta, mado. Mibi chuinu. Ĕmbi abimbo chiondaidquo chuiban: —Nuquin Papan chiaidquo nec —qeshun. Esuquidistu tantiaquinc matses tantiaquinc caquin adenuidi chuibanta, mado.¹⁴ Nuquin Papan Mayan nuquibĕd iqueque. Aidĕn namiac ěmbi chiondac-padomboen Nuquin Papan chiaidquo chuiquin Esus chuibanta, mado.

Onesipodo chiaid

¹⁵ Ĕmbi: —Cho —cac choenquo icboed mimbi tantiac, mado. Nidaid utsi Asia caid yacnoquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo.¹⁶ Onesipodo caidĕn ěbi bĕdamboen isposhi. Ĕbi quĕnĕn nauedacsho dacuĕdenquo icquin isuan-isuanquin bĕdambo icmioshi. Adsho isun: —Aton shubun icquidobĕdta aid bĕdamboen ista, Papa —quequin Nuquin Papa chianembi.¹⁷ Aidĕmbi nĕmbo shubu dadpen icquid Doma caid yacno choboshon: —ĵMitsimbo Pabado icpec? —quequin yuen nibĕmbenequin istuidpondashi.¹⁸ Mimbi isnubi Epeso yacnoshon aidĕmbidi baded-badedquien nashundeniondashi. Adsho tantiahsun: —Nidaidĕn padpidec choshon Nuquin Icbon Onesipodo bĕdamboen is-pashun —caimbi.

Chieshtoenquo icquin chuiban, quiaid

2 Chieshtoenquo icquin Esus chuibanta, mado. —Esuquidistun ěbi bĕdamboen isec. Aidĕn bĕdambo icmiac dayacquio icquin naimbi —qeshun chieshtoenquo icquin Esus chuibanta.² Matses dadpenshun tantianuc ěmbi chuibansho mimbi tantiondac. Ĕmbi aden chiondaid utsibotsen chuiban. Adshun mimbi chuiboedo abentse-abentsen chuita. —Nĕidĕn chieshtoenquo icquin Esus chuibantsiash —qeshun: —Mimbitsen chuiban —cata, mado.³ Sondado bĕdambo icquidĕn nacbimboen chieshtoenquo icquin bĕdamboen nabanuna. Matsesĕn chieshĕnubi Esuquidistun chiapadomboenuidi nanuna chieshtoenquo icquin.⁴ Sondadon: —Mibi bĕdambo iquec —camenuen aton chuiquid dapan chiapadomboenuidi naquid. Ambi tantiaid nainquo icquinc utsibon chiapadomboen nainquo icquinc caquin aton chuiquid dapan chiapadomboenuidi naquidquo sondado nec. Adomboembidi Nuquin Icbon chiapadomboenuidi nanuna, mado.⁵ Ma nuquin matses titinquequidquo. ĵMitsipadquo icpec? Aton uidĕn tanec aton matsesĕn chiaction abia titinquec chosho: —Bĕdamboec titinquiosh —qeshun mauete menequid. Ambi chiaction titinquiabi icsho mauete menenquo icquid. Adembidi: —Mimbi bĕdamboen naoc —Nuquin Icho camenuen ambi chiapadomboen chieshtoenquo icquin nabanuna, mado.⁶ Ma nuquin matses tied uaquidquo. ĵMitsipadquo icpec? Choadquidĕnquo dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ĕnenquo icquin. Adoac utsibon Esus tantiabentsiash.⁷ Aden ěmbi chuiboed tantiaata. Adsho Nuquin Icbon mibi bĕdamboen tantiametsiash.

Esuquidistu tantiata, quiaid

⁸ Utsibon chieshĕnubi Esus tantiata, mado. Aidi matsesash isadaidbo tsusedpa Dabidĕn tsyuecquid nepanĕdash. Nuquin Papan uincuemenĕdaidquo yec abi iquec.

Aidquio tantiaquiota. Aid chuibenequidquio nebi. ⁹ Aden chuisho chieshënquin bedshun icsambo icquid uidën uacbimboen shocosh nacnenaidën mëtaniac mëyadebi. ĴĔbi aden uidën uacbimboenda Nuquin Papan chiaid uidën uapadic? Padenquio. Ĕmbi chuibenetiapimbo icnuc Nuquin Papan chiaid chuibanquido utsibon adem-bidi chuibenendac. ¹⁰ Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unësacsho cuidenquio icquin abëdi tabadmendac — quec chieshtoenquio iccobi quënën nauedondaïd yequi. ¹¹ Naden abimbo chiaidquio tantiash chieshtoenquio iccobi.

—Abi bunaid Ĕnshun Nuquin Icbon chiacpadomboen naquid chieshëmënquidën unës uacsho Nuquin Icbon abi yacno abëdi tabadmendac.

¹² Utsibon chieshënaqui chieshtoenquio icquin Esus tantiec unësash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ĕmbi tantiacmaido neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac.

¹³ Aden abi tantiesabon ambi chiaid niac-niacsho isun Nuquin Icbo Esusën ambi chiacpadomboen naquidquio icquin icsaido cuidendac.

Adembidi ambi chiacpadomboen abi tantiaquido bëdambo icmendac

—quequin chiaid tantiashun ambi chiacpadomboen naquin Esusën naid chuibanuna chieshtoenquio icquin.

Nuquin Papan chiaid isbanta, quiaid

¹⁴ Ĕmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquio chienquio yec ambembi chiaid chiec mibi chushcanan-queque. Adenda. Adec chushcanansho tantiash matses icsambo yaneque. Padi —cata, mado. ¹⁵ —Mibi bëdambo iquec —Nuquin Papa camenuen bëdamboen nata. —Dacuëdtiapimbo iquebique. Ĕmbi naid ma Nuquin Papan isnu —qeshun adota. Ambi chiaid bëdamboen isbanshun chieshtoenquio icquin Nuquin Papan chiaidquio chuibanta, mado. ¹⁶ Ambembi chiaid chuiquidobëd onquec tabadenda. Adec onquequido icsambo icboedi buëdanquiec Nuquin Papan chiaid niac-niaquec icsamboshë yaneque. ¹⁷ Tosho bedacbimboec adquidën chiaid tantiaquido dadpen yaneque. Adquidën chuisho tantienda. Aden chuiquid Imeneyo caïd nec. Adquidbidi Pideto caïd nec. ¹⁸ Aidon Nuquin Papan chiaidquio chienquio icquin muaquin chiec. —Esus tantiaquido unësabi icquido nëbimbobi uincuenacbimboec icpec. Unësacsho aton dada chuca uaquin uincuenquio iquendac —quequin muaquin chuisho tantiashun utsibon Nuquin Icbon chiaid tantienquio yanac. ¹⁹ Aidon Esus tantia-bien icchitash. Nuquin Papan Esus tantiamiac ënenquio icquin Esus tantiatsempanëdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “Ĕbi tantiaquidombo nec,’ quequin Nuquin Icbon tantiec.” Adnuc Esus tantiaquidën: —Con Icbo Esus nec —qeshun ambi icsamboen naid ënendac.

²⁰ Esus tantiaquido nadquio iquec. Shubu dapan tsitsan tabëcaïd tabadacbimboec-quid nec. Tsitsan abentse-abentsec icsactsëcquio icnubi utsi-utsiec bëdambo iquec. Icsactsëcquidën icsa secanun sandoquid yendac. Bëdambo icquidën di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ënabi: —Esus tantianu —quetsëcquid iquec. ²¹ Esus tantiaquidquio ictiadquio yec:

—Muaid chuisho tantiatipimbo icquin nēbi Nuquin Icbon chiacpadomboen natiadquo iquebi —quash Nuquin Icbon yuambo yantsiash. Adsho Nuquin Icbon bēdamboen nametsiash.

²² Caniabon mēmunenquo icquin abi bunacpadomboen naqid tanenda, mado. Adenquo yec bēdamboec tabadte bunquiota. Nuquin Papan chiaid niacte bunenquo yec: —Nuquin Ico Esus nec —quequidobēdtan chieshtoenquo icquin Esus tantiata. Matsesten tantiec bēdamboec isnanec bēdamboec tabadta. ²³ Mibi yacnoshon ambemi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidēn chuisho tantias matses chushcananondashe. Aidēn chiac chienda. ²⁴ Nuquin Papan chiaid chuibanquid chushcananenquo icquid nendac. Chieshēmēnenquo icquin aton matses bēdamboen isquid nendac. Adembidi nēishēnenquo icquin Nuquin Papan chiaid tantiamequid nendac. Utsibon chieshēnaqui chieshēnanenquo icquid nendac. ²⁵ Esus tantiesabon: —Mimbi Nuquin Papan chiaid chuisho tantiatipimbo iquebi —cac adembi nēishenquo icquin Nuquin Papan chiaidquo chuibanendac. —Nuquin Papan ambi chiaidquo tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. ²⁶ —Aden Nuquin Papan ambi chiaidquo tantiamiac Esus tantienquo icboedēmbi Esus tantiabenshun abi yuaquidēn Satanasēn namiaid ēnendac. Aden Nuquin Papan chiacpadomboen naindac —qeshun chieshtoenquo icquin Nuquin Papan chiaidquo chuibanendac abi chuibanquidēn.

Icsambo icquido iquendac, quiaid

3 Tantia, mado. Mibi chuinu. Esus padpidec choabi icnuc matses dadpenquioshē icsamboshē iquendac. ² Nadquido iquendac. Nēidic utsi tantiatipimbo yec abiuidsēqui datantiadquido. Nēidic piucquid bedte comapenec bunquidombo. Nēidic: —Is. Ēmbimbo naiduidi bēdambo iqueque —quequido. Nēidic utsibo chieshēnec icsamboec onquequido. Nēidic amēn chiaid niac-niacquido. Nēidic anin chiaid niac-niacquido. Nēidic aton na nashunaqui nashumēnenquo icquido. Nēidic Nuquin Papan chiaid niac-niacquidombo. ³ Nēidic aton matses tantiesabo. Nēidic chiesh bēdanesabo. Nēidic muauanquido. Nēidic abi icsate bunaid ēnenquo icquido. Nēidic cuesanquido. Nēidic bēdambo icquid chieshēnquido. ⁴ Nēidic bēdambo icquid damianquiashic cuesunianquido. Nēidic bēdamboen tantienquo yec badedi icsa uanquido. Nēidic: —Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo. ⁵ Nēidic: —Nuquin Papa tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

⁶ Adquidon mibi yacnoshon shubu utsin shubu utsinquien isben-isbenac caosh. Adash chidoidquido icnubi shubun puduedshun ambemi chiaid chuibanac caosh. Aden chuisho tantiasahun: —Padi —catiadquidi chidon: —Mimbi chiaid tantianu —quequin badedquo tantiac caosh. Nuquin Papan chiaid niacash adecbidi icsate bunquiec tabadac caosh aid chidobo. ⁷ Aden icsambo icquidēn ambemi chuidenesho tantianeshun Nuquin Papan chiaidquo tantiatipimbo icpac caosh aid chidobo. ⁸⁻⁹ Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquo chuisho tantiasahun aidon: —Mue nec. Ēmbimbo comapenen tantiaquin ismenu —queboedombi bēdiactsēc tantiaquin nac-

nenuidpampic. Adsho isun: —Abimbo cainquo iccosh. Muachitosh —capampic matsesën. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bédamboen istiapimbo iquec. Adembidi aidon muaquin chuisho tantiashun matses dadpeshun: —Muequi nec —capendac.

Nuquin Papan chiaid isbanec bédamboec tabadte

¹⁰ Èbien muaquidpenquo nec. Èmbi naid ma mimbi tantieyoc. —Ma Esus tantianu —quequin Esusën naid chuibanec bédamboec tabadondabi. Esus tantiaquidquo icquin matses tantiaquin Esusën naid chuibeniondambi. Chieshënaqui chieshtoenquo icquin adembi chuibeniondambi. ¹¹ Èmbi aden chuibansho isun chieshënondashi. Shubu dadpen icquid Antioquiya caid yacnoshon ëbi: —Cuesnu —casha Nuquin Icbon nac padenquo icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquo bedshun cuënoten se-sequin unës uatsempondash. Adsho Nuquin Icbon nac unësenquo iccondabi. ¹² Èbipadquido Esus tantiaquidotedi bédamboec tabadtiadquo icsho adembidi utsibon comapenen chieshënendac. ¹³ Padnuen chieshëmënidobëd bédambo icquid damianquiec muaquido bëdiactsëc icsambo icboedi mauuananquiec buëdanquiec icsamboshë yanendac.

¹⁴ Mibi adquidpenquo nec, mado. —Èmbi isonaidon bédambo icquidon abimbo chuibanondashi —quec Nuquin Papan chiaid niaquenquo yec bédamboec tabadta, mado. ¹⁵ Ènden bacuëmpi icquin Nuquin Papan chiaidquo min matsesën chuibansho mimbi tantianëdac. Adshun: —Aton Mado Esus tantiaquid unësacsho abëdi Nuquin Papan tabadmendac —quequin mimbi tantiabenëdac. Aden Nuquin Papan bédamboen iste tantiametembo Nuquin Papan chiaid nendac. ¹⁶ Nuquin Papan chiaid aton Mayanën tantiamiac matsesën dada uapampic. Aidën chiaid abitedimbo bédamboshë iquec. Aid isec onquequin: —Nuquin Papan chiacpadec bédamboec tabadnuna. Esus tantiaquido yec icsainquien ictiad —quequin abi chuibanquidën chuibanec. Adembidi: —Esus tantiaquido adesa. Padi. Bédamboembien natiad —quequin chuibanec. ¹⁷ Nuquin Papan: —Èmbi chiaidquo tantiashun Esus tantiaquinc matses nashunquinc caic Esus tantiaquido ma bédamboec tabadnu —quequin ambi chiaidquo dada uamepampic.

Nuquin Papan chiaid chuisho tantienquo yaid

4 Nuquin Papabëdtan Esuquidistun mibi isequë. Bédamboen nata. Esusën nidaidën padpidec choshon abitedishun Icbombo icquin unësaïdo uincuemi-aido unësabi icquidobëdta chiendac. —Nëid ëbi tantiaquid ëbëdi tabadmëmbi. Nëid ëbi tantiesa cuidëmbi —quequin chiendac. ² Aidën chiacpadomboen naquin Nuquin Papan chiaidquo chuibanta, mado. Matsesën tantiatiadquo icnuc adota. Tantiatiapimbo icnubi adembi chuibanta. Esus tantiaquido icsasho isun: —Esus tantiaquido adesambo neque. Bédamboembien natiad —quequin nëishëmënenquo icquin chuita, mado. Utsibo bédamboec tabadsho: —Mibi bédamboec tabadoc. Auidëqui tabadta —quequin chieshtoenquo icquin chuita. Bëdiactsëc tantiatsëcquido: —Esus tantiaquidon nadoquid —quequin chuibanta, mado. ³ —Yuecshun Nuquin Papan chiaidquo matses dadpeshun tantiatiapimbo iquendac —queshun nata, mado. Aden tantiatiapimbo icquidën Nuquin Papan chiaidpenquo chuisho tantiash: —Mimbi ëbi bunaidquo chuisho tantianu. Èbi chiec cho —quequin muaquid

utsi-utsien abi yacno puduedmendac. ⁴Pamumëdacbimboecquin Nuquin Papan chiaid tantienquo icquin tsusedpabon ambembi chiampiduidi tantiendac. ⁵Aidën nacpadomboen nainda, mado. Nuquin Papan chiaidquo bëdamboen tantiaquid yec bëdamboec tabadta. Adsho utsibon chieshënaqui chieshtoenquo icquin Esusquo tantiatia, mado. Adembidi Nuquin Papan bëdamboen iste Esus tantiesabo chuibanta. —Esus chuibanquidën nadoquid —caidtedi nabanta, mado.

⁶—Ëbi unës uan ëmbi nacpadomboen: “Adota,” mibi caquid nibëdtsiash —qeshun mibi aden chiec nebi. Nëbi Nuquin Papan tantiacpadën chieshëmënuquidon ëbi unës uaic. ⁷Utsibon chieshënuubi ënenquo icquin Esusën naid chuibeniombi. —Ëbi bunaid bednu —quec comapenec titinquiabimboen dayacquo icquin Nuquin Papan chiaidtedi naombi. Chieshtoenquo icquin Esus tantiaquidquo nebi. Adshobini nëbi unës uaic. ⁸Unës uacshobini matsesën naid abitedimbo tantiaquidën Nuquin Icbon: —Ëbi tantiaquin ëmbi chiapadomboenuidi naic mibi bëdambo iccoque. Nuquin Papa yacno ëbëdi tabadmequin mibi bëdamboshë icmendambi —caindac. Abi chote ushën choshon aden Nuquin Icbon ëbi chiendac. Adembidi abi chosho iste bunquidotedi abi tantiaquido Nuquin Icbon abëdi tabadmendac.

Timoteyo: Cho, caid

⁹Nëbimbobi ëbi isec cho, mado. ¹⁰Utsibo nidanebon ëbentsëqui tsadebique. Demas caid aton na bedteuidi bunec ëbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidtedi nidanebon ¹¹Ducas abentsëqui ëbëd iquec. Madcos bedbëtsenec cho, mado. Ëbëdtan aidëmbi nëshunquo Esus chuibantsiashe. ¹²Tiquico caid Epeso yacno mibi yacno nidmiombi. ¹³Shubu dadpen icquid Todoas caid yacno Cadpo cuëmëdquidën shubun con na niamëdaccondashe. Con dashcute ëmbi dada uaidbëdta bedbëtsenec cho, mado. —Abitedi buantiapimbo iquebi —qeshun nëish yua bitsi nacnenaid dada uaiduidtsëqui bëta.

¹⁴Shocosh nacnenquidën Adecandedo caidën comapenen chieshënondashi. Aid Nuquin Papan cuidendac, mado. ¹⁵Nuquin Papan chiaid ëmbi chuisho tantiatiapimbo icquin icsamboen chuishunondashibique. Choquin aid isenda: —Ëbitsen icsamboen chuishunushe —qeshun. ¹⁶Ënden tauamboen bedshun: —Quënën nauednu —cac cuidte chuiquid dapa ëmbentsëqui chuibampondambi. —¿Mitsipadosho isun ëbi bedo? Icsamboen nambo iccombi —capondami. —Ëbëd icboedon dadpenshun: “Bëdambo icquid nec,” quequin ëmbi naid chuibanac ëbi quënën nauedquidon ëbi nidmetsiash —qeshun ëbëd icboedo: —Chiec cho —caqui choenquo iccondash. Aden ëbi cacuidondaido tantiaquin: —Nuquin Papan aido cuidenquo icpashun —caimbi. ¹⁷Nuquin Icbombini nianenquo iccondash. —Isadaidpembo matses utsibo ma ëmbi naid chuibenenu —quequin cuesambo icmepondashi. Adondaid icshobini chieshëmënuquidon: —Cuesnu —cabededpondash. Nuquin Icbon nac aid matsesën unës uainquo icpondashi. ¹⁸Padpiden chieshëmënuquidon ëbi caic: —Ma mëyanac chieshtoshon Esus tantienquo yanu —casha Nuquin Icbon nac chieshtoenquo ictsiabi. —Nuquin Icbombidi abi yacno ambi matses dadpen namiacno abëdi ëbi tabadmendac —qeshun: —“Nuquin Icbo bëdamboshë iquec,” canuna ënenquo icquin —caimbi.

¹⁹Mibi yacnocquido: —Mibi caic: “Unësquo iquec,” quiosh Pabado —quequin chuiban, mado. Nëidic Aquida caid. Nëidic aton chido Pidisida caid. Nëidic One-

sipodo caid chedo. Aidedi aden chuiban. ²⁰ Mimi isondaed Edasto caid shubu dadpen icquid Codinto yacno tēshēdondash ēbi chonoc. Utsibic Tēdopimo caid aton dada icsabudacsho shubu dadpen icquid Mideto caid yacno nianondambi. ²¹ Ue tsasi iquenuanquid taēnushe. Baded cho, mado. Doma yacnocquido nēmo icquidon: —“Timoteyo unēsquio iquec,” quequin dada ua —caposhi. Nēidic Eyobudo caid. Nēidic Pudente caid. Nēidic Dino caid. Nēidic Quēdaudia caid. Nēidic Esus tantiaquido nēmo icquido utsibotedi. Aidedi adosh. ²² —Nuquin Icbo Esusēn abēd icquin con mado bēdamboen ispashun —quequin mibi tantiemi. Padi. Aidedi chuiquin dada uaombi, mado.

TITON ISTE

1 Pabado nebi. Nuquin Papan chiacpaden chuibenequid nebi. Adembidi Esuquidistun, Ĕbi chuibeneta, caidbidi nebi. Aden chuibanac Nuquin Papan cuēnaido Esuquidistu tantiadonequidquio ma icpanuna. Adquid iquec ma bēdamboec tabadpanuna. ²Muesa Nuquin Papa nec. Adquid icquin, Ĕmbi ėnden chiampicpadomboen ėnenquiocquin Esuquidistu tantiaquido ėbēdi tabadendac, quequin ma aidon tantiapanueshun adomboen chiaid chuiquidquio Esuquidistun icmiondashi. ³Ambi tantiampicpadĕn ambi chuipampid Esuquidistu tantiamenuequin aidĕn chuibeneta caid nebi.

⁴Ĕmbi chuibanac Esuquidistu tantiaquid mibi yampondac, Tito. Adquid yanshun Esuquidistubĕd icquid nebi, quequin ėmbi tantiacpaden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash ėbi icsaid cuidenquio yec Nuquin Papa bĕpiscudac, quequin ma ėnenquiocquin mimbi tantiapanuna. Adecbidi Nuquin Papabĕd tabadendabi, quequin tantiapanuna, Tito.

Quideta yacno nidshun Titon natequid

⁵Ĕmbi nauidboed mimbi naimenu, quequin mibi Quideta yacno nianombi ma mimbi ambi tantiaid icsa chiac ma Quideta yacnoquidon ėmpanuna. Adem-bidi, shubu dadpen icquid uano-uanoecquid yacno nidshun ėmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bēdamboen tabadmenuequin chuiquid icta, quequin adquiduidquio chuita, Tito. ⁶Mimbi Esuquidistu tantiaquid utsibo isbanquin bēdamboen tabadmequin chuiquid icta caid nadquio ictiad, Tito. Bēdamboec tabadquid ictiad. Adecbidi chido abentsĕc inquid ictiad. Aton bacuĕbotedi Esuquidistu tantiaquidobidi ictiad. Adquidĕn bacuĕbo icquin bēdamboec tabadquin aton papan chiaidbĕdta aton titan chiaid chieshenquiocquin nabantiad. ⁷Aidi utsibĕd bēdamboec tabadquin, Nuquibi nanuna, qeshun utsibĕd onquenquiocquin ambibi tantiacpadomboenuidi nabanesa ictiad. Adecbidi badedquio nĕishesa ictiad. Adecbidi paĕmbocquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. ⁸Adecbidi Esuquidistu tantiaquid utsibo yuedquid ictiad. Adecbidi utsibobĕd bēdamboec tabadte bunquid ictiad. Adecbidi utsi bēdamboec tabadsho tantiash, Cuishon, quec tabadquid ictiad. Adecbidi bēdamboen tantiaquin, Naden naic icsatsiabi, qeshun naisa ictiad. Adecbidi, Naden naic bēdamboecquid yantsiabi, qeshun adomboen naquidquio ictiad. Adecbidi abimbo chuiquidquio ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bēdamboen tabadmequin chuiquidquio icta, quequin chuita, Tito. ⁹Aden utsibo isbanquin bēdamboen tabadmenuequin chuiquid icta, cashun nĕid aido chuita. Nuquin Papan chiaid chuca uainquiocquin bēdamboen chuiban. Aden mimbi chuisho tantiash ma utsibo bēdamboec tabadpanuna. Adembidi Nuquin Papan chiaid chuca uaquidĕn chuibansho Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsiash, quequin mimbi utsibo chuiquid icta caido chuiyata, Tito.

¹⁰ Quidetabo nad iqueque. Chuinu. Tantia. Abi chuiquidën chiacpaden naisa Quidetabo dadpen iquec. Abimbo chiosh, camenuquin abimbo chiacbimboec aido onquec. Dadpeshun isadaidbon nacpadomboen nanuequin, Shui dëbid dëtemeta, quequin Quidetabon chiec. ¹¹ Adquidon shubu utsin-utsinquec puduedshun ambi tantiaid icsa chuibanac utsin-utsinquien tantiash cuëshëdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bëdamboen chuibanquin ambi muaquin chiaid ëmeta, Tito. ¹² Quidetabon matts ënden icnëdaid abentsëcshun naden aton matts chuipanëdash. “Quidetabo muaic chuinanquidombo nec. Aben icquid yuatemaïdbimboec uimanëmënuïdo nec. Chonoadenquiocquin nua peshun nua actenequïdo neoaic,” quequin Quidetabo ënden icnëdaïden chuipanëdash. ¹³ Abimbo chuiquidënuïdo aden chuipanëdash. Aden chuipanëdash, quequin muaquin chuiquid ambi icsamboen tantiaid tantiamenuen comapenen chuiban ma Esuquïdistu abimbo tantiaquid adquid yampanueshun. ¹⁴ Aden mimbi chuibanac Esuquïdistu tantiaquid yanash isadaidbon Nuquin Papan chiaid utsi uain chiampicpaden chuïsho tantïesa ma icpanuna. Aden mimbi chuibanac abimbo chuiquidën chiacbimboen niacquïdon chuïsho ma tantïesa icpanuna. ¹⁵ Nuquin Papan Esuquïdistu tantiamiaïdën icbon chiaïd bëdamboen isoaic. Adomboembidi ambi uabanaïd isec. Adash abitedi bëdambo iquec, quec tsadec. Ambi tantiaïd icsambocquid icnuc Esuquïdistu tantienquiocquin, Nëïd mishtemaïd nec. Nëïd utsi petemaïd nec. Nëïd utsi actemaïd nec, quequin chuïbanquïdën chiaïd tantïec. Aden tantïec aton tantiate icsabudec, Icsaobi, quequin tantienquïo iquec. ¹⁶ Nuquin Papa tantïembi, qeshumbic Nuquin Papan chiacpadomboen niacquïd tantïesa nebi, quiacbimboec tabadsho utsibon adquid isec. Nuquin Papan chiaïd niacquïd adquid nec. Nuquin Papan icsamboen isaidquïo adquid neoaic. Naid bëda natïapimbo icquid neoaic, Tito.

Esuquïdistu tantïec iccuededquïdo tantïametequïd

2 Icsateuïdi bunquïd icnubi mimbi Esuquïdistu tantiaquïdo abi tantïadonequïdquïo icmenuequin chuïbanquin tantïame. ² Mimbi paëmbocquid nua aquenquïo icteniaccpadomboen Esuquïdistu tantiaquïd tsusiobo chuïbanquin tantïame. Adembidi, Mibi bëdamboquid nec, utsibo camenu, quec bëdamboec tabadtenequin tsusiobo ismequin tantïameoa. Adembidi, Naden naic icsatsiabi, qeshun mimbi nainquïo yacpadomboen mimbi bëdamboen tantïaid aido chuïbanquin tantïameoa. Adembidi, Naden naic bëdamboquid yantsiabi, qeshun adomboembidi naquïd nebi, quequin tsusiobo chuïbanquin tantïameoa. Adembidi mimbia Esuquïdistu tantïadoniaccpadomboen pausunaïd icquin ma adquïobidi tsusiobotsen yampanueshun tantïamequin chuïbanta. Adembidi, Esuquïdistu tantïec utsibobëd tantïananec mibi tabadteniaccpadomboen chuïbanquin tantïame. Adëcbidi, natïatequïd iquendac, quequin Esuquïdistu tantësa uainquïocquin abi choate mimbi caïmbudaccpadomboen chuïquin tantïameoata, Tito.

³ Adembidi, Esuquïdistu tantiaquïd ënden machoaïdo tantïamenuëquin chuïban. Nuquin Papan bëdamboquid icmiaïd nebi, quec bëdamboec mibi tabadteniaccpadomboen tantïamequin chuïoa. Adembidi, utsi icsamboen chuïquid iquenda, quequin chuïbanquin tantïameoa. Adembidi, mimbi paëmbocquid nua aquenquïo yacpadomboen chuïquin tantïameoa. Mimbi bëdamboen nabanaid nëbi machocuenaido ismequin tantïame, quequin ënden machoaïdo chui, Tito. ⁴ Aden chiac ën-

den machoaidon aton bënë aton bacuëbo chedobëd abi tabadaid tantiamenuquin nēbi machocuenaido bēdamboen ismepec. ⁵ Adembidi aidën bēdamboen tantiaquin, Naden naic icsatsiabi, qeshun nainquio iquec. Naden naic bēdambo ictsiabi, quequin naquid, quequin ënden machoaidon nēbi machocuenaido chuibanquin tantiameoapec. Adembidi, Mibi inesa chudmenquio yec tabadta, quequin ënden machoaidon nēbi machocuenaido chuiquin tantiameoapec. Adembidi, aton shubun tabadquin ambi nabanacpadomboen ismequin aidon nēbi machocuenaido tantiameoapec. Adembidi, utsibo bēdamboen tantiaquin ambi nashunacpadomboen ismequin ënden machoaidon nēbi machocuenaido tantiameoaic. Adembidi, aton bënë chiacpadomboen nabanquin nēbi machocuenaido ismequin tantiameoaic. Aden ënden machoaidon abi ismiacpadomboen nēbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

⁶ Adembidi, caniabo chuibanquin tantiamē, Tito. Naden naic icsatsiabi, quequin nainquio iquemi, quequin mimbi bēdamboen tantiacpadomboen caniabo tantiamequin chuiōa. Adembidi, Naden naic bēdambo mibi icpec, quequin mimbi bēdamboen tantiacpadomboen aido tantiamequin chuiōa. ⁷ Bēdamboec tabadaid tantiamequin ismenu, quec mibibi bēdamboec tabadteneta. Mibibi icsainquiocquin ismequin tantiamē. Adembidi mamēnenquiocquin bēdamboen chuiquin tantiamē. ⁸ Adec mibibi bēdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesa mibi chieshēnquid mibi icsamboen chuitiapimbo yec tabadendac.

⁹ Adembidi yuabo chuiquin, Bēdambo iquebi, min icbo camenuquin ambi chiaidtedi chieshenquiocquin nabanta, quequin tantiameta, Tito. ¹⁰ Adembidi, min icbon na ampenquiocquin bēdamboen dayun uaqin nashunquin min icbo ismeta, quequin yuabo tantiamē. Aden Esuquidistu tanquin nabansho isun min icbo: Con yua Esuquidistu tantiaquid yec bēdambošhē yanac. Con yua bēdambo icmequidën chiaid tantianu, quendac icbo.

¹¹ Nuquin Papan matses abëd icmenuequin matses icsaid bedshuntequid Esuquidistu icmenuequin chomepanëdash. ¹² Aden chomiac nidaidën tabadquin utsibo tantiaquin Nuquin Papan chiacpadomboen naquin ismiac adomboembidi naic bēdamboec tabadquid. Nuquin Papan bēdamboen tantiamiac bēdamboen tantiasho, Aidën bēdambo icmiaid icquin naden naic bēdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiacpadomboen naic nuqui tabadtenec. Adomboembidi Quidetabo Esuquidistu tantiaquido chuiquin tantiamē, Tito. ¹³ Nuquin Papapadquid con Icbo Esuquidistu choaic, quequin caimbudec bēdamboec tabadebi, quequin chuiquin tantiamēoa. ¹⁴ Nuqui cainaid: Ĕmbi con utsibo caid ëbipadquid iquendac, quiash nuqui icsaid bedshunash abided cuidadec unēsapanëdash. Adacsho aid tantiaquidquio yec bēdamboec tabadquid nec, quequin chuiquin tantiamē, Tito. ¹⁵ Ĕmbi chuiboedtedi chuibanquin tantiamē. Mimbīa tantiaquid icquin, Ĕmbi chiacpadomboen nabanec tabadteneta, quequin Quidetabo chuiōata. Mimbī chiacpadomboen nainquiosho isun cuembo chuiōata. Adecbidi, utsibon mibi icsamboen chuitiapimbocon bēdamboec tabadteneta.

Utsi tantiaquin nabantequid

3 Esuquidistu tantiaquidtedi bēpiscudmenquiocnuequin naden chuibanta, Tito. Min tsusiobon bēdamboen chiaid naquimbi adembidi mibi chuiquid utsibon bēdamboen chiaid chieshenquiocquin naban. Adembidi, utsibo tantiaquin nashunta, quequin Quideta yacnoquido chui. ²Adembidi, Utsi muaquin chienda, quequin chuiota. Adecbidi, Utsibobēd tantiananec bēdamboec tabad, quequin chuiota. Adembidi, Mimbi naiduidi tantienquiocquin nabanta, quequin chuiota.

³Ēnden Esuquidistu tantiesa nuqui iccondac. Adquid icquin Nuquin Papan chi-acpadomboen nainquio nuqui iccondac. Adquid icquin nuqui bunacpaden nabanec nuqui icsaded-icsadedondac. Utsibobēd icsamboec nuqui cuidnampondac. Adembidi, utsin bēdamboen isaid icsho isash nuqui nēishpondac. Adecbidi utsibobēd nēishash nuqui chushcanampondac. ⁴Adquid nuqui icnuc matses tantiec abēd icquid icmenuec nuqui icsaid bedshunash abided ciudadec Esuquidistu chopanēdash. ⁵⁻⁶Adec choash ciudadsho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniac. Adoac, Bēdamboen nasho abi yacno tabadmendac, quenquio yec nuqui tabadec. Aidēnquio nuqui icsate bunaid tantiamequioquin nuqui ěmec. ⁷Adec aton Mayan nuquibēd icsho isun, Bēdambocquid nec. Aidtedi ěbēdi tabadendac, quequin Nuquin Papan tantiec. ⁸Ěmbi chuita, quequin chiaidtedi abimbo iquec, Tito. Aden tantiaquin Quideta yacnoquido chuiban Esuquidistu tantiaquid icquin ma adomboen nabanec bēdamboec tabadpanuna. Ěmbi chiacpadomboen Esuquidistu tantiaquidtedishun nadenec utsibobēd bēdamboec tabadquid nec, quequin chuita.

⁹Adec tabadec min tsusedpabo chiec utsibēd nēishnanash icsamboec onquenda, quequin Quidetabo chuita, Tito. Adembidi, aton tsusedpabon naden nata quequin chuinēdaid chuiquin chushcanu qesho adembidi adenda, cata. Aden chiaid Nuquin Papa yacno mibi puduedmetemaid nec, quequin chuita. ¹⁰Adec onquequin Esuquidistu tantiaquido cuēshēdmenuequin chuibanquid icsho bēdamboen tantiamenuequin chuiban. Aden chiaqui niacbidanquin adomboembidi aidēn chuioshon tantishun aidi comapenen chuibanquin tantiamēoa. Aden chiaqui padpiden niacbidanquin adomboembidi chuioshon tantishun cacumeta, Tito. ¹¹Adquid ambi icsamboen tantiacpadecuidi tabadquid neque. Adota. Mimbi chiaqui adecuidi tabadquid Nuquin Papa yacno nidtiapimbo yec abibi ciudadtequid nendac.

Utsibo chuiquin chiaid

¹²Nēbi utsibo chuinu. Tanta. Adtemas Tiquico chedo ěbēdi iquec. Abentsēqui Quideta yacno nidmēmbi. Aid mibi yacno choambien mimbi tantiamedonequin chuibanquin naimbudnu quish Nicopodis yacno nidoata, Tito. Ue dapa sequenec Nicopodis yacno tabadnu, quianec nidendabi. ¹³Matses icsasho cuidte chuiquid, Senas mibi isbidanec Apodosbēd udi nidec. Aid daēdi mibi yacno chosho yued. Nidnu, qesho aton na nibēdsho isun menequin bēdamboen nidme. ¹⁴Peshun acnu, quequin Esuquidistu tantiaquidēn chonoadquin nabanquid. Utsi nashunquin adomboembidi nabanec tabadquid. Aden nabanec tabadsho isash utsibo Esuquidistu tantiaquidquibidi yanendac.

¹⁵ Mibi tantiec tabadebi, quequin Tito chuita, ëbëd icquidon cacpadomboen dada uaimbi. Adembidi mibëd icquido Esuquidistu tantiaquido tantiec ëbëd icquido tabadoaic.

Esuquidistun, Bëdambo iquebi, camiaido ma mibitedi icpanuna. Padi. Aideded chiombi, Tito.

PIDEMONËN ISTE

1 Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon. ²Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon mates icsambocsho cacumiabimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Ëmbi dada uaid bedash isec onquequin aido chuoata, Pidemon. ³Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icpanuna.

Nuquin Papa chiec onquiaid

⁴⁻⁵Pidemon Nuquin Icbo tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantias, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon. ⁶Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

⁷Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantias bëdambo iquebi, Pidemon.

Onesimo tantiaquin chuidoniaid

⁸Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquembi. ⁹Tantiananquid nuquibi icquin aden chienquio iquembi. Tsusio budobi. Adquid icquin Esuquidistu chuibansho padpiden quënën nauedoshi. ¹⁰Quënën nauedaid icquin ëmbi Esuquidistu chuibanac aid tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mimbi nashunondacpaden aidi bëdamboen tantiaquin nashunoatsia? Pidemon. ¹¹Ënden min yua icquin mimbi chiacpadomboen mibi nashunenquio iccondaidëmbi nëbi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

¹²Aidi mibi yacno nidmeoaimbi. Con dayunquio icquid nidmenu, quiash aid tantiec unësquio tsadebi, Pidemon. ¹³Esuquidistu chuibansho quënën nauedshun tataniac caputiapimbocsho mimbi ëbi nashuntiapimbo iquec. Adec mibi nashuntiapimbocnobi Onesimombini nashunosh, qeshun nidmetiapimbocquimbi mibi yacno nidmembi. ¹⁴Onesimo ëbëdi tabadmenuequin chuita, mibi catiapimbo

iquebi. Mimbibi aden chiac bédambo ictsiash. ¹⁵ Yuecash cuëshedenquoio yec Pidemombéd Onesimo tabadoaindac, quequin Nuquin Papan tantiondacadquieci mibi yacnoësh cuenëdaid mibi yacno nidash Onesimo tabadtsiash. ¹⁶ Onesimo min yua iccondaidd Esuquidistu tantiaquid yansho mimbibi con utsi caid aidi nendac. Èbéd icquin natiapimbocsho aidën nashunebi. Mibi yacno nidshun mimbibi chuisho Esuquidistu tantiaquid icquin chieshenquiocquin bédamboen mibi nashunendac.

¹⁷ Pabado èbéd isedanquid nec, qeshun mimbibi èbi yuedondacpaden Onesimo yuedta, Pidemon. ¹⁸ Con na utsibëdtabi con na bedtequid Onesimon bedaccondash, quequin mimbibi chiactedi mibi meneoaimbi. ¹⁹ Aidedi meneoaimbi, quequin èmbibi dada uaimbique. Isec onquequin tantiaquiota. Èmbi Esuquidistu chuibanac abi tantiaquid yanshun Onesimon bedaidtedi daëd uaquin èbi nashunquin cuidtiadquidi mibi nec, Pidemon. ²⁰ ¿Aden èbi nashunuequina mimbibi Onesimo èbibimboecsho bédamboen tantiaquin nashumpatsia? Aden mimbibi aid nashunuc bédambo ictsiabi. ²¹ Èmbi chiactedi daëd uaquin mimbibi natsiac, quequin tantiec tsadebi, Pidemon.

²² Nèidtsen chuinu. Tantia. Èmbi tantienquiocnoc Pabado chonoshe qeshun abi ushondaid nacenueshun nacnenta, Pidemon. Mibi èbi tantiec Nuquin Papa chieci onquiacpadomboen badedquio Nuquin Papan mibéd icmepashuni.

Utsibo chuinu quiaid

²³ Esuquidistu tantiaquid utsibo èbédi iquec. Aidon chiaid chuinu. Tantia. Epapadas, abembi èbéd icnuec quënën naedadondaidën: Mibéd icquidotedi tantiec tsadebi, quequin Pidemon chuita, cac adomboen dada uaimbi, Pidemon. ²⁴ Madcos yec Adistadico yec Demas yec Ducas yec quec èbéd icquido iquec. Aidombidi: Mibéd icquido tantiec tabadebi, quequin Pidemon chuita, cac dada uaoaimbi. Aidedishun èmbi Esuquidistu chuibanacpadomboen chuibanoaquido nec.

²⁵ Nuquin Icho Esuquidistun mibitedi bédambocquid icmebanacpadquieci ma tabadoapanuna, Pidemon.

Padi. Aided dada uoimbique. Isec onqueta.

EBEDEYON ISADAIDBON ISTE

Abi yacnoshon ambi uaidon Icbombo Esuquidistu nendac

1 Ĕndenquimboshē Nuquin Papan ěmbi chiacpadomboen chuibanta cac adom-boembidi abĕd icquido tsusedpabon chuibanoapampic. Abentsĕc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuec-quiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bĕda budmiac aidĕn chiacpadomboen tsused-pabon chuioapampic. Adembidi nadatiambocquin uabanquin ismequin chiac adom-boembidi chuioapampic. ²Nĕbi tsyuecquio Nuquin Papan chiacpadomboen abi-padquiocquidĕmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubĕdta uashun aidĕnquiocquidtedi aton Papabĕd-tan uabanampidquio aton Madombo nec. ³Aidi, aton Papa bĕdaidquio yampid-padquidquiobidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubĕd aidĕnquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash abided ciudadec unĕsash, Ĕmbi bĕdamboecquid icme-banaido matses nendac, quequin tantiaschic abuc nidoash Nuquin Papabĕd tabadoa-panĕdash aidquiobi. ⁴Ad icnuc ambi abi yacnoshon uaido abipadquid nibĕdec. Aidon con Icbombo caidquio nec. ⁵¿Ambi abi yacnoshon uaid mayan bĕda isec: “Con mado mibi nec.

Ĕbi min papa nendac, quepecta Nuquin Papa iquec? Padenquio.
Adecbidi:

¿Nĕidĕn Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

⁶Abĕd Abiambo Yampidi nidaidĕn tabadash choasho isun Nuquin Papan ismequin: “Nĕid con Madombo Abentsĕqui nec. Aidquio tantiec con Icbo nec, quec cuishon quec, ambi naid chiec cuĕdĕn, cac aden ambi abi yacnoshon uaido mayan bĕd-abo chuibanec cuĕdĕncuededendac.”

⁷Ambi abi yacnoshon uaido mayan bĕdabo naden Nuquin Papan chiec:

“Ĕmbi chiacpadequi cunquequid yanec.

Adecbidi, ěmbi chiacpadequi cuĕte nĕdĕnquedote iquendac.”

⁸Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ĕnenquiocquin ĕbĕdtan Chuiquid Abentsĕcquio mibi iquendac.

Adecbidi namequid bĕdaidquio mibi iquendac.

⁹Ĕbipadquid iquec bĕdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ĕbi yacpadquidquio Icbo Abentsĕcquiobi mibi nec. Mibĕd icquido adquid nibĕdec.

Mibi abentsĕqui adquidquio iquec. Adquid iquec, Bĕdambo iquebi, quec mibi cuis-hon quendac.”

¹⁰Adembidi Nuquin Papan naden aton Mado chuioaic,

“Tauamboen nidaid abubĕdta uashun aidĕnquiocquidtedi mimbi uabampampic.

Aidtedishun icbombo mibi nec.

¹¹⁻¹² Aidedi ënëndac.

Mibien nibédantiapimbo yec abi tabadendac.

Aidedi dashcute shëribudaïd niacbimboen chuca uaindac.

Mibien Abiambo Yampid yec abi ënëdesa mibi iquendac.

¹³ Nëbi cainec ëbëdquïo tabadec cho.

Mibi chieshëquïdtedi nibëdquïo icmenun nabono. Chiata,”

quequin Nuquin Papan chiampic. ¿Ambi abi yacnoshon uaido mayan bëda aden chuiampidta nepadic? Padenquïo. Esuquïdistu aden chuiampic. ¹⁴ Ambi abi yacnoshon uaido mayan bëdabo Nuquin Papan, Èbëd tabadtequïdombo nashunta, caïdo nec.

Ambi chiaïd tantiesä icchitomane, qeshun tantiadonequïota caïd

2 Adec abitedishun Icbombo aton Mado icnuc ambi chiaïd chieshëchitomane qeshun tantiadonequïec tabadnuna. ² Èndenquïmboshë ambi, Naden nata, quequin chiaïd ambi abi yacnoshon uaido mayan bëdabo chuimiäcpadomboenuïdi naisa icsho isun Nuquin Papan cuidpampic. ¿Aden ëndenquïmboshë ambi chiaïd chieshëquïd ambi cuidpampicpaden ³ nëbi icquïdtsen ambi chiaïd chieshësho isun cuidenquïoda icpadic? Ambi chiaïd niacquïd ambi cuidtiäduïdi icnubi aton Madoded cuidpanëdash. Adoac, Èbi yacno Yuedanquïd nebi, quequin aton Madonquïo Esusëmba chiambic adomboembidi abi tantiaquïdonsen chuiäpandashi. Aden Esusën chiaïd tantiaquïdon chuïbanubien, ⁴ Èmbi chiaïdquïo chuïbanoäpec, quequin ismenuequin aton Mayanën Nuquin Papabëd icquïdën tantiamëbanäcpadomboen nadatiämbocquin utsi-utsien bëdamebanquïnc, mayan icsa dapuduedmequïnc, unësaid uincuemëquïnc caquin adquïdën-adquïdënquïen nabededpanëdash.

Matses icnu quiash Esuquïdistu matsespanëdash

⁵ Adembidi chuïnu. Tantiata. Abi yacno Esuquïdistu tantiaquïdo choash tabadsho isun, Nëïdo ëbi yacnoshon ëmbi uaido mayan bëdabo mibi chuiquïd nec, quenquïo Nuquin Papa iquendac. ⁶ Èndenquïmbo aden tantiaquin dada uäquin naden Nuquin Papa chiec Dabïd pado onquepampic:

“Tantiaquïono. Èbi chui, Papa. ¿Atotsieshun matses mimbi uaid pistëcquïo icsho mimbi comäpenen tantiatequïd äido icpec? Papa.

Adembidi, ¿Atotsieshun Adanën tsyuecquïdo mimbi nashumpe? Papa.

⁷ Nëbi chuïtan mimbi cac mibi yacnoshon uaid mayan bëdan adomboembidi chuïäoc matsesën nabanec.

Yuecquïocshon mibipäduïd matses mimbi icmendac.

⁸ Adquïd icmeshun mimbi uaidtedishun icbombobidi äid mimbi icmendac,”

quequin abimbo chiampid nec. Nëbi abitedishun icbo matses mimbi icmiämbö iquëc. ⁹ Utsien Nuquin Papapäduïdquïo yequi matsesun Nuquin Papan tantiamäcpäden ambi abi yacnoshon uaido mayan bëdäbon chiac nabamboëdi nëbi aton Papabëd tsädec abitedishun Icbombo yanac. Äidi Nuquin Papan chiacpädomboen nanuec nidäidëshun tishac matsesash matses tantiec matses icsäid bedshunash äbidë cuidädec unësash abitedishun Icbombo yämpänëdash.

¹⁰ Nuquin Papa äbidëi uäquïdquïo icnuc ambi tantiacpädec iquëc. Adquïd icquin ambi, Matses icsäisa icmeshun con bacuë icmëmbi, quequin tantiacpäden ëbi

yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanēdash. Aidi matses yec natiamianquiequi icsaisa yec unēsash uincuenash bëyucanec abi yacno dectatonepanēdash ma Nuquin Papan, Matses con bacuë icmembali, quequin tantiaido ëbi tsibanec dectatonepanu quiash. ¹¹ Matses bēdambo icmequid Esuquidistun Papa ambi bēdambo icmebantequidon Papabidi nendac. Aton Papa Abentsēqui icnuc Esuquidistu Nuquin Papa yacno choash, Con utsibo nec, quependac ¹² aton Papa chiec:

“Mibi chuiquin con utsibo tantiamenu, Papa.

Aidobēd tabadquimbi mibi chuinu. Tantia, Papa, quependac.”

¹³ Adembidi chuoiaic:

“Mibi tantiaquin mimbi chiampicpadomboen nabanash choaobi, Papa.

Ëbi tsibantequid mimbi bēdaidquio icmiaidquio bëec choaobi, quequin mibi chientdambi, Papa,”

quequin matsesabi yec abuc tabadquin Esuquidistun chuipampic.

¹⁴ Matses namibēd intacchoquid yec unēstequid icsho mēnchicquid icnu quiash Esuquidistu matsesash unēstequid yampanēdash. Ma matses mayan icsan dacuēdmequin dēcatemēntiapimbo yampanu quiash matsesash unēstequid yampanēdash ¹⁵ ma mayan icsan ambi dacuēdmiaido ambi yuaido icboedi matses ëmbi mēnchictequid ma icpanuna. ¹⁶ Ëmbi uaido mayan bēdabo unēstequid icsho mēnchicnu, quenquio yec matsesash Esuquidistu unēsapanēdash. Abadauanēn tsyuecquido mēnchicnu, quiash matsespanēdash. ¹⁷ Aden ambi chiacpaden nanuec matsespadquid yampanēdash. Adec matsesash matses nēnacpadquiec nēmpañēdash. Abi bundoacpadquiec bundopanēdash. Abi natiacpadquiec natiatequid icpanēdash. Mayan icsan icsamenuequin tanaidbidi icpanēdash. Matses yanash icsaisa yec matses icsaid bedshunash abided cuidadec unēsbandēdash matses Nuquin Papan bēdamboen istequid icmenuec. Adecbidi, Matses icsaisa yanabi yec chuibanec Nuquin Papabēd onquetiapimbo iquec, quec matses chuibanec Nuquin Papabēd aidi onquec. ¹⁸ Matsesacsho mayan icsan: Nuquin Papan chiaid niacmenu, quequin tanac niaquesa Esus icpanēdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ëbi dayacquio icmec cho, cac badedquio choquin chieshesa nuqui icmendac.

Abi yacno yuedanquidquio icquin Moises dēniacquid Esuquidistu

3 Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ëbi chuibeneta, cashumbic adembidi ambi matses chuibanec ëbēd onquequid dapa icoata caid Esuquidistu nec, quequin aidquio tantiaquionona. ² Nuquin Papan chiacpadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesēn chuided-chuidedampicpaden Esuquidistun adomboembidi chuibampañēdash. ³ Aidi Abiambo Yampid yec, Ëbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. ⁴ Nēidted con shubun ëbēdi tabadendac, quequid shubu icbo nec. Aden Nuquin Papan chiacpadomboen aton shubun icquido bēdambocquid icmequid Esuquidistu nec. ⁵ Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. ⁶ Esuquidistu Nuquin Papan Madombo yampidquido aton

Papan shubun icquid icquin aton Papan Moises chuimiampicpaden aton shubun icquido icmepanëdash. Aidën shubun icquid nebi, qeshun chieshenquiocquin cainquidquio aton shubun icquidquio nuqui nendac.

Chieshenda

⁷ Aton shubun tabadnuequid naden Nuquin Papan Mayanën ambi chiaid mibi bëdamboen tantiamenuen chieque. Tantiata:

“Nëbimbobi Nuquin Papan chiaid chieshënenquio yec tabadta.

⁸ Equipito yacnoësh cuëte nibëdacno capuquin tsusedpabon,

¿Nuquibëdida Nuquin Papa iqueque? Tantiabono, qeshun ambi chiaid chieshëmpampicpaden chieshënda.

⁹ Cuëte nibëdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi

¿Ambi chiaid niacshoda Nuquin Papan ëbi cuidpeba?

Isbono, quiacpadquiec tsusedpabo icsamboec tabadpampic.

¹⁰ Adec tabadsho isash nëishpondabi.

Ëmbi chiaid chieshë nec ambibi tantiacpadequi icsadenepampic.

¹¹ Adquid icsho isun chushcain: Ëmbi abitedi uabanquin nainash

ëbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,”

quequin Nuquin Papan isadaidbo chiampid nec.

¹² Abiambo Yampid Nuquin Papa abi iquec, quequin tantiash cuëshëdchitomanë qeshun tantiadonequiota. ¹³ Nuquin Papan chiacpadquiec tabadnuna, quec badiadquidën-badiadquidënquiec chuinanec onqueta ma adoac icsamianquidën chiac Nuquin Papan chiaid chieshënenquiocpanuna. ¹⁴ Esusbëd icquid nebi, quiondacpaden tantiadenequin caimbudec aton matses yec Esus yacno nidanetequidquio mibi nendac. ¹⁵ Nuquin Papan chiampid utsitsen chuinu. Tantia:

“Nëbimbobi Nuquin Papan chiaid tantesa uampicpaden tantesa uainda.”

¹⁶ ¿Tsuntsin Nuquin Papan chiaid tantiashun chieshëmpampic? ¿Equipito yacnoshon bëyucanquin Moisesën buanaido Nuquin Papan chiaid tantiash chieshquido yanenquioda icpampic?

¹⁷ ¿Tsutsibidi seta 40ted matamec chiesho isash Nuquin Papa aidtedbidi seta matamec nëishted-nëishtedpampic? Adoac ¿Cuëte nibëdacnoësh icsaquidtedi unësbudnenquioda icpampic?

¹⁸ ¿Abitedi uabanquin nainash ëbi tabadacno puduedmenquio iquembi, quequin tsutsi Nuquin Papan chuipampic?

¿Ambi chiaid chieshënuquid Nuquin Papan chienquioda icpampic?

¹⁹ Ai, tsusedpabon Nuquin Papan chiaid tantiash, Bëdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshësho Nuquin Papan abi yacno puduedmetiapimbo icpampic.

Ëbi yacno puduedash ëbëd tabadtequid quiaid

4 Ëbi yacno puduedash ëbëd tabadtequid iquendac, quequin Nuquin Papan chiampicpadomboen nëbimbobi chuioaique. Abi yacno abëdi ictiapimbo icchitomanë quequin Esuquidistu tantiadonequionona. ² Ëbi yacno puduedash tabadtequid iquendac, quequin ëndenquimboshë Nuquin Papan nuquin tsusedpabo chiampicpadomboen nëbi nuqui chuioaic. Aden ëndenquimbo chuisho tantiash, Nuquin Pa-

pan chiaid abimbo iquec, quiash tantienquo yanash, Aid cainu, quetiapimbo tsused-pabo utsi-utsiec yampampic. ³ Ambi chiaid tantiaquidomboen nēbi aibēdi tabadec. “Ēnden yampidon tantienquiocsho isash, Abitedi uabanquin nainash ēbi tabadacno chotiapimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadomboen abitedi uabanquin nainash Nuquin Papa quenenash tabadpampic. ⁴ Abi tabadaid chuiquin Nuquin Papan naden dada uamiampique. Tanta: “Seistedec ushqin abitedi uabanash badiad utsin ēnash tabadpobi.” ⁵ Ashumbic nadentsen dada uamiampic:

“Ēbi ēnash tabadacno ěmbi chiaid chieshēnquido chotiapimbo iquendac,”
quequin chuipampic.

⁶ Aden chuimiatic ěndenquimboshē ambi chiaid tantiesa icquin niac-niacquec Nuquin Papabēd tabadtiapimbo icpampid icnubi ambi chiacpadomboen naquin caimpampidobēd nēbi nidaid utsi-utsiec icquido Nuquin Papabēd tabadtequid nendac. ⁷ Ambi tantiacpadēn Nuquin Papan chuimiacpaden Dabid padon:

“Icsachitomane qeshun Nuquin Papan chiaid tantiaquiota,”

quequin dada uapampic. ⁸ Chuiquid dapa Dabid tishambocnoc Equipito yacnoēsh nidaid Canan yacno abi chuiquid dapa Osuebēd isadaidbo cho-chopampic. Capuec ěnēdash nidaid Canan yacno cho-choash isadaidbo ěnēdenquo yec tabadte icnuc, Ēbi yacno ěnēdenquo yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquo ictsenampic.

⁹ Aden Dabid pado chuimiatic tantiahi abi tantiadonequidombo Nuquin Papabēd tabadquido nendac. ¹⁰ Aden uabanquin nainash Nuquin Papa tabadacpadec ambi bēdambo icmenuequin tantiactedi nabanquin nainash aibēdi tabadendac. ¹¹ Nuquin Papabēd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane qeshun adonona.

¹² Nuquin Papan chiaid ambia chuipampidquio abi iquec. Nadatiambocquin tantiamete ambi chiaid nec. Shocosh siante abiuc daēdi cuēnumbocquidēn siaid uquēduc sēnquin nami icsaid isendac. Adomboembidi Nuquin Papan chiaid chiac papuduedquin matsesēn tantiaidtedi uquēduc sēnaid isacbimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimbi tantiaid icsa nēid icnubi mimbi tantiaid utsi bēdambo iquec. Adecbidi, mibi bunaid icsa nēid icnubi mibi bunaid utsi bēdambo iquec, quequin tantiamebanshun mimbi tantiaid icsa mibi bunaid ic-sabēdtabi ěnta, quequin Nuquin Papan chiaidēnquio mibi tantiamendac. ¹³ Abitedi isquidquio Nuquin Papa nec. Adquid icquin matses ompodtiapimboecnoc isendac. Adembidi, Ēmbi chiacpadomboenda matsesēn nabanoshe. Tantanu, qeshun, abi yacno tabadnuequin cainquido bēisquiquin ambi nabanaidtedi chuimendac.

Matses chuibanec Nuquin Papabēd onquequid dapa Esuquidistu

¹⁴ Adec Nuquin Papa abitedi isquidquio icnubi icsambocquid icquin ambembi matsesēn aid chuitiapimboesho isun abi tantiaquido chuibanec Nuquin Papabēd onquequid dapa ěnden abi yacno dectatonēdaid Esuquidistu nec. Aidi Nuquin Papan Madombo nec, quequin tantiesa yanchitomane qeshun aidquio tantiaquionona.

¹⁵ Matses chuibanec Nuquin Papabēd onquequid dapa matses yequi natiamiacmaid-

bimboec tsadpondash, quetiapimbo nuqui iquec. Matsesacsho mayan icsan, Nuquin Papan chiaid niacmenu, cac niaquenquo Esuquidistun icpanëdash. ¹⁶ Adquid nuqui chuibanec Nuquin Papabëd onquequid dapa iquec, quequin tantiec dacuëdenquo yec abi yacno ënden Esuquidistubëd puduedquidëmbimboen Nuquin Papa ëmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanëdash, quequin tantiec mibi icsaid bëpiscudobi, quequin mibi tantimec. Adembidi mibi natiamiaid abi chuisho Nuquin Papan Mayanën mibi chieshmenquiocquin dayacquio icmendac.

5 Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnuï, qeshun nidaidën capuquid yua cuesunedenequin taudienepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cuesuneshun taudienepampic. ² Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin ³ nidaidën capuquid yua utsi-utsien cuesunedenepampic.

⁴ Aidi, Con matses chuibanec Nuquin Papabëd onquequid dapa icnu, quenquo icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic. ⁵ Adembidi Nuquin Papan, Matses chuibanec ëbëd onquequid dapa icta, caid Esuquidistu iquec. Ëbibi adquid icnu, quenquo Esuquidistu icpanëdash. Aton Papambien: “Mibi con Madombo neque.

Con shubun icquido mimbi icmiaido chuibanec ëbëd onquequid dapa icta,” capampic aton Papan Esuquidistu chuiquin. Adembidi Esuquidistu chuioaquin aton Papanquo:

“Matsesash icsaisa yec min utsibo icsaid bedshunash cuidadec unësash uincuenash matses chuibanec ëbëd onquequid dapa icta,”

capampic. ⁶ Ambi chiaid utsi nad icpampic:

“Matses chuibanec ëbëd onquequid dapa Medquisedec yampidpadquid mibi nendac. Adquid yec ënëdenquioctequidquo mibi nendac.”

⁷ Adec, Con Pan chiampicpadquid icnu, quiash matsesacsho unës uaquin mëyante nendabi, quequin tantiec shubiec nadpanëdash. Matses icsaid bedshunash cuidadquid ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiacpadomboen natiadquo iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquo icmepanëdash. ⁸ Nuquin Papan Madombo iquequi matsesacsho mëyanac Nuquin Papan chiacpadomboen tantiabempanëdash. ⁹ Aden tantiabenash matses icsaid bedshunash abided cuidadash Nuquin Papa yacno Yuedanquid yanquioapanëdash. ¹⁰ Adoacsho isun, Nëbi matses chuibanec ëbëd onquequid dapa Medquisedecpadquid icta, cain Nuquin Papan Esus chuipampic.

Nuquin Papan chiaid ënden tantiaboedi tantiesa yanenda

¹¹ Ambia matses chuibanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidedi chuitiadquiocquin mibi

eme uacsho ¿mitsipadomboentsimbi chuibanquin mibi tantiamepe? ¹²Mibia utsin tantiamiaid icquin ënden tantiabempatecnëdan mibitedishun. Adembidi mimbi abia tantiaid utsibo tantiamepatecnëdan. Bacuën shuma chishquin tantiacpaden tantiaquid icquin Nuquin Papan chiaid tantiatiapimbo mimbi icpec. ¹³Shuma chishquid bacuëmpi, Bëdamboen nata, quequin chiaid tantiesa nec. ¹⁴Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquiocquin nabanec. Adomboembidi Nuquin Papan chiaid tantiamiac tantiabentiaquidquio yanshun adomboen nabandene. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquio iquendac.

6 Aden Esus chuiquin abia tantiamiaid bëdamboen tantiaishun abipadquid icnuequin abi chuiquin tantiamiaid utsi tantiaquionona. Abia tantiamiaid nadiqueque. Tanta. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquio icta. ²Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menenuequin mëdanten mamishaid icta. Adembidi, Abi tantiaquid unësash uincuenta iquec, quequin tantiaquidquio icta. Adembidi, Abi tantiesa cuidtequid iquendac, quequin tantiec bëdamboec tabadteneta. ³Aidtedi mimbi tantioc. Aidtedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. ⁴Aden Esuquidistu tantiaisho isun aton Mayan Nuquin Papan meniaid icboedi ⁵Nuquin Papan chiacpadomboen nadatiambocquin nabamboed, ⁶Esus matsesquio yec icsamboquid nepanëdash, quiash, Esus cuesten dectan, quequidbimboecquid icsho Nuquin Papan aid isendac. Aidën oncain Esus mamëshunec. Aden Esus tantienquio yanacsho bëdamboen tantiamenuen chuiquin, Icsaobique. Eëbi icsaid ënu, cametiapiambo Nuquin Papan iquendac.

⁷Baded-badedquiec ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuibanac abi tantiaquiosho Icbon yuedaido iquendac. ⁸Echobëd cana shëta chedo ëshë idash dadpen yanushe qeshun nëdëncatequid nendac. Adecbidi icsamboen chiaid tantiaquid uquë nësiatequid nendac.

⁹Aden mibi chuiquimbi, Nuquin Papan nësiatemaïd mibi nec, quequin tantiembi. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi. ¹⁰Adoac abi tantiaquid utsibo tantiaquin mimbi nashundeniaid Nuquin Papan bëpiscudenquiocquin tantiec. ¹¹Adecbidi utsibobëd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caindac. ¹²Aden nabanec chieshenquiocquin Nuquin Papan chiaid tantiaquioquin tsusedpabomba caimbudec unësash Nuquin Papa yacno puduedampicpade Esuquidistu tantiaquioquin ënenquiocquin caimbudequi ma Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³Ëndenquimboshë Abadauan bëdamboec tabadsho isun ambia tantiaquidquio abi yampidquibidi icquin, Eëmbibi tantiacpadomboen nanuna. Abimbo caimbi, quequin Nuquin Papan naden chuipampic: ¹⁴“Mimbi tishmiaidën tsyuecquido dadpen iquendac, qeshun ëmbi chiacpadomboen nabanquin mibi, Bëdambo

iquebi, camembi,” quequin Nuquin Papan Abadauan chuipampic. ¹⁵ Aden chuisho tantiashun caimbudquin tishtiapimbocquidëmbi Abadauanën chidon aton mado tishpampic.

¹⁶ Abimbo caimbi, quequin abitedi tantiaquidënquo Nuquin Papan chiac utsi, Muenec, quetiapimbo iquendac. ¹⁷ Adembidi, Ĕbi yacno tabadte iquendac, quequin ënden yampidën Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuipanëdash. ¹⁸ Adec Nuquin Papa muatiapimbo icquin ambi chiacpadomboen naquidquo Nuquin Papa nec. Adembidi, Ĕbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno Ĕbi puduedmequid Esus iquec, quequin caimbudquid nuqui nendac. ¹⁹ Aden caimbudquin, Ĕnden Nuquin Papa yacno puduedshun Ĕbi yuedquid iquec, quequin nuqui tantiec. ²⁰ Nuqui caintequid Esuquidistu ënden Nuquin Papa yacno bëyucanec abi tantiaquido chuibanec Nuquin Papabëd onquenuc puduedash Medquisedecpadquid yampanëdash.

Medquisedec matses chuibanec Nuquin Papabëd onquequid dapa

7 Medquisedec nad icpampic, Saden yacnoquido chuiquid dapa nepampic. Ambi Saden cain cuënaidi yuecshun Edusaden cain cuënoapampic. Aidbidi Nuquin Papan, Matses chuibanec ëbëd onquequid dapa icta, caid nepampic. Adquid icquin aton mado bedboedo tsibanshun cuesuniash Abadauan chosho bëquedshun, Nuquin Papan bëdamboen isaidquo mibi nec, quequin Medquisedequën Abadauan chuipampic. ² Adsho tantiash, Nuquin Papan con mado bedmiaid nebi, quequin ambi cuesuneboedën na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanën menepampic. Bëdamboen tabadmequid icsho Medquisedec cuëmpampic. Adembidi, Saden yacnoquido chuiquid dapa icquin bëdamboen tabadmequid icsho Medquisedec cuëmpampic. ³ Aidi aton papabëd aton tita nibëdquid nec. Nëid ushën tishaid nebi, quetiapimbo aid iquec. Abi unëste ushë adquiobidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabëd onquequid dapa yanash adquidquidquo iquec. Utsi yantiapimbo iquec.

⁴ Aidi Ĕbi chuibanec Nuquin Papabëd onquequid dapa nec, quequin ismequin ambi bedaid aton na musuctanquin Abadauanën Medquisedec menepampic. ⁵ Yuecquiocshon Nuquin Papan: Min matses chuibanec ëbëd onquequid dapa icta, caid mibi icquin min utsibon aton na musucaid bedshunta, quequin Debi chuipampic. Adoac adquid Debi icash unësan aton tsyuecquid abentse-abentsec icpampic. Debi Abadauanën tsyuecquid yec aton utsibonquo aton na musucaid bedquid icpampic. ⁶ Medquisedequëmbien tsyuecquidpenquo icquimbi Debin tsusedpa Abadauanën na musucaid bedshun, Nuquin Papan bëdamboen isaidquo mibi nec, quequin Abadauan chuipampic. ⁷ Bëdambo mibi icmenu, quequin Nuquin Papan chiaid ambia chuiquid Medquisedec icpampic. ⁸ Yuecshun ambia chuibanec Nuquin Papabëd onquequid dapapadquiocquin aton matsesën na musucaid bedquid Debi unëspampic. Adecbidi aton tsyuecquido unëspampic. Padnuen Abadauanën na musucaid bedquid Medquisedec unësesa yampampic. ⁹ Adquid icsho Debin buchisio Abadauan caidën, Con tsyuecquid dadpen iquendac, quequin tantiaquin, Con na musucshun menenu, queshun Medquisedec menepampic. ¹⁰ Aton tsyuecquid tishambocnobi Debin buchisio Abadauan caidën Medquisedec bëquedtuishun menepampic.

Medquisedec yampidpadquid Esuquidistu

¹¹ Abadauanën tsyuecquido Debipadquidon Nuquin Papan nadomboen nata quequin chiaid nadenequin aton matses bédambocquid icmian Medquisedecpadquid choenquio ictsempampic. ¹² Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabéd onquequid dapa yampanédash. Debipadquidën Nuquin Papan nadomboen nata cain ëndenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec. ¹³ Aidpadquid icquin Nuquin Papa nidaidën tabadte shubu uashunaidën puduedshun nambocpanédash. ¹⁴ Aton tita Uda cuëmédquidën tsyuecquid icnuc matsesash Udan tsyuecquid Nuquin Ico Esuquidistu nec. Adquid icquin Debipadquidën nadeniampicpaden natiapimbo Esuquidistu icpanédash. Adembidi ambi tantiaiduidi chiec Moises, Udan tsyuecquid Debipadquid nec, quenquio icpampic. ¹⁵ Medquisedecpadquid matses chuibanec Nuquin Papabéd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. ¹⁶ Aton matses chuibanec Nuquin Papabéd onquequid Debi unësan Debin tsyuecquid aton matses chuibanec Nuquin Papabéd onquequid icpampic. Adquidpenquio Esuquidistu yampanédash. Matsesash icsaisa yec unëssh uincuempanédash. Adec uincuenquid yec unëstiapimbo iquec matses chuibanec Nuquin Papabéd onquequid dapa yanquiopanédash. ¹⁷ Aid chuiquin Nuquin Papan nadopampic:

“Ënenquiocquin matses chuibanec Nuquin Papabéd onquequid dapa Medquisedecpadquid mibi nendac,”
quequin chuipampic.

¹⁸ Aden chiambien matses chuibanec Nuquin Papabéd onquequid dapa Debipadquidon Nuquin Papa nidaidën tabadte shubu uashunaidën puduedshun ënden nadomboen nata cain chiacpadomboen nadenequin aton matses icsaisa icmetiapimbo icpampic. ¹⁹ Adoaid Nuquin Papa yacno puduedtemaid matses icpampic. Nëbien bëyucanec puduedash Nuquin Papa yacno abi tantiaquido chuibanec Nuquin Papabéd onquec tabadec, quequin abi yacno yuedte caimbudec nidaidën Nuquin Papabéd tabadac bimboec nuqui tabadec.

²⁰ Abimbo caimbi. ¿Matses chuibanec Nuquin Papabéd onquenu quec puduedquid ënëdenquiocnoc mibi icmendambi, Mado, quenquioda Nuquin Papa icpampic? Ai, aden chuipampic. Aden Debi chienquiocquin aton madouidtsëqui chuipampic. Debi unësan aton tsyuecquid aton matses chuibanec Nuquin Papabéd onquequid dapa icpampic. ²¹ Nëbi Nuquin Papan aton Madombo caic:

“Ico icquin matses chuibanec ëbi chiec puduedoata, mado, quequin abimbo chiemi.

Aden chuiquin chuca uainquio iquembi.

Ëndenquio yampid yec ëbi yacno utsi puduedmenush ëbi chiec puduedash ënëdenquio yec tabadquid mibi nec, quequin abimbo chiemi,”

quequin chiampicpadec aton Madombo adquid yanquiopanédash. ²² Adquid yec matses icsaid bedshunash abided cuidadash abi tantiaquido yuedec bëyucanquid Esuquidistu nec. Debibéd aton tsyuecquid adecbidi adquid ictiapimbo iquec.

²³ Debi adecbidi aton tsyuecquido unëstequidquio iquec yuen chuibanec Nuquin Papabéd onquequid dapa ictiapimbo iquec. ²⁴ Esusien abi yacno chuibanec bëyu-

canec puduedash ënëdenquo yec Nuquin Papabëd onquequid dapa nendac. Adquid utsi nibëdendac. ²⁵ Adec Nuquin Papa yacno ënëdenquo yec tabadquin abi tantiaquido chuibanec aton Papabëd onquedenenec abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

²⁶ Adec aidi abi yacno yuedanquid, icsa nibëdquid, icsa uatiapimbocquid, icsa nibëdquiec yacno tabadquid yec abi tantiaquido chuibanec Nuquin Papabëd onquequid dapa yampanëdash. ²⁷ Debipadquidpenquo yec, Matses icsaquid neque. Nuquin Papan chiampicpaden baded-badedquien nidaidën capuquid yua cuesunenu, quenquo icpanëdash Esuquidistu. Matses icsaid bedshunash abided unëspanëdash padpidec unësenquo icnush. ²⁸ Debibëdi abipadquid icsaquid icsho, Min matses chuibanec Nuquin Papabëd onquequid dapa aid icmeta, Nuquin Papan cac Moisesën Debi adquid icmepampic. Nëbi Medquisedecpadquidien Bëdamboquid icpampid ëbëd onquec ëbi yacno Puduedquid Abentsëcquiobi mibi iquendac. Abimbo caimbi, quequin Nuquin Papan chiampidquido Esuquidistu nendac.

Matses chuibanec Nuquin Papabëd onquec abi yacno puduedquid

8 ¹⁻² Adec Esuquidistu abi tantiaquido chuibanec Nuquin Papabëd onquequid dapa Nuquin Papa tabadacnombobi puduedoash aton Papa Abiambo Yampidbëdquido onquec tabadec. Debipadquidoen aton matses chuibanec nidaidëshun Nuquin Papa tabadte shubu uashunaidën puduedash auëshquo Nuquin Papabëd onquepanëdash.

³ Con matsesbëdi icsaposh icmanendac, qeshun aid shubun puduednu qeshun umanucshun nidaidën capuquid yua aidon cuesunepampic. Adembidi Nuquin Papa tantiaquin menuequin aton matsesën bë-bëaid bedshun nadenepampic. Esusien Nuquin Papa yacno puduedoanush, Èbi icsaid ëbibi cuidadnu, quenquo yec matses icsaid bedshunash abided cuidadpanëdash. ⁴ Aidi unësabi yec nidaidën tabadnuc Moisesën chiacpadece Debipadquid matses chuibanec Nuquin Papa chiec onquequid icpanëdash. Adquid icnuc nidaidënuësh matses chuibanec Nuquin Papabëd onquequid dapa ictiapimbo Esuquidistu icpanëdash. ⁵ Nidaidën tabadquin Nuquin Papa tabadte shubu uashunaidën puduedshun Debipadquidën nashumpampic. Èndenquimbo Nuquin Papan shubu naden icchitec, quequin abi tabadte shubu uanu, qesho tantiasun: “Macuësh yacnoshon chuibocpadomboen shubu uame,” Nuquin Papan cac Moisesën chuioapampic. Aden chiac Nuquin Papa tabadte shubu uashumpampic. ⁶ Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabëd onquec puduedpanëdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabëd onquec abi yacnombo yuedanquid ictiapimbo icpampic. Esuquidistuen Nuquin Papabëd abia yampid bëyucanec abi yacnombo nidoash abi tantiaquido chuibanec Nuquin Papabëd onquequid yec yuedanquidquido nec.

⁷ Èndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquo ictsempanëdash. ⁸ Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash ëmbi chiaid utsi iquendac.

Aid isadaidbo chiendambi. Aidbidi Udan tsyuecquido chiendambi.

⁹ Aidën tsusedpabo Equipito yacnoshon bëyucamequin
 ëmbi chiacpadpenquiocnoc chiaid utsi iquendac.
 Ëmbi abia naden nata cain chiaid Isadaidbon chieshënsho
 utsibon natiacquin mëyansho isun isadaidbo mënchicamboccondambi.

¹⁰ Ënden chiaid adquo icnuc:

Nëbi ëbëd tabadmetequad chiaid nendac, quequin isadaidbo chiemi.

Ëmbi nadomboen nata cain chiaid isadaidbo pausunendambi tantiate bunquionoc.

Aden tantiamiash aton Papa iquendabi.

Adecbidi adquidquo con matses iquendac.

¹¹ Adoaid Nuquin Papa tantiaquid icta, ques a iquendac.

Abitedi ëbi tantiaquidquo iquendac.

Nëidtedishun ëbi tantiendac:

Nëidic, bacuëbo; nëidic, caniabo; nëidic, tsusiobo aiteddshun.

¹² Aido icsaidtedi padpiden tantienquo yec bëpiscudendabi,”

quequin Nuquin Papan chiaid utsi nendac. ¹³ Chiaid utsi nec, quequin ënden abia nadomboen nata cain chiaid ënëndendac.

Nuquin Papa tabadte shubu uashunaidën puduedshun naid

9 Nuquin Papan ambi, Ëbi ismequin nadomboen nata cain chiaid dadpen dada uameshun isadaidbo menepampic. Nuquin Papan naden ëbi tabadte shubu uashun cacpadomboen abi nidaidën tabadte shubu uashumpampic. ² Nuquin Papa tabadte shubu uashunaid nitsinaid anquënë uaid daëd icpampic. Baded-badedquie puduedte anquënë uaidën tabote dectantebëd pan sante cueste nacnenaid icpampic. Icsaisa anquënë uaid nec caid niosh. ³ Aid nuntambidi bitsipambocquid daëdcashun dectanëdaid shëcuë anquënë uaid dayun uequid Isaisa Bëdaidquo cain chianiaidquo niosh. ⁴ Aid nuntan bëdambo noadquid sandoshon tauite shocosh icpampic. Ambobidi cueste dabitacaid shocosh icpampic. Aid cuesten sauedaid mana caid isadaidbon piampid dayun uaid icpampic. Aid sauedaid utsi Adonën cueste tiaid dëyucaid icpampic. Aid sauedaid utsi cuënote pada uashun Nuquin Papan nadomboen nata quequin dada uaid icpampic. ⁵ Aid sauedte matincash tabadquid ambi abi yacnoshon uaid mayan bëdambocquidbimboecnuc nacnenaid daëd icpampic. Aid daëd Nuquin Papa icsaisambo bëchomauanquieq nac-nacquio ismiantequid icpampic. Nidaidën capuquid cuesunaidën intac daseccaid isun Nuquin Papan matses cuidenquioctsiash, quequin aidën podon dëcatequin dectanaid diadpampic. Aid Icsaisa Bëdaidquo anquënë uaid sanaidtedi chiombi.

⁶ Aden shubu uashun aidën icquidtedi nambanash icsaisa anquënë uaidën baded-badedquieq puduedquidon Nuquin Papan Moises chiacpadomboen uesquin nabampampic. ⁷ Padnuen Isaisa Bëdaidquo anquënë uaidën setan-setanquieq matses chuibanec Nuquin Papabëd onquequid dapa puduedpampic. Baded-badedquieq puduedtemaid aid nec. Ëmbi con matsesbëdtan Nuquin Papan chiaid niacposh icmanendac, quequin nidaidën capuquid yua cuesuneshun intac bedshun buanec nuntan bitsipambocnoc daëdcashun dectanëdaid shëcuë anquënë uaid dayun uequid Icsaisa Bëdaidquo caidën puduedquid abentsëqui nepanëdash. Unësaidën intac buanenuio yec puduedtemaid aid anquënë uaid nec. ⁸ Adec aid anquënë uaidën puduedquid isadaidbo abentsëqui icnubi Nuquin Papa yacno aton matses puduedte nibëdec, quequin Nuquin Papan Mayanën tantiamete nendac. ⁹ Adembidi,

baded-badedquien nidaidën capuquid yua cunesunedenec, Ēbibi bēdamboquid nec, quetiapimbo icpampic. Adembidi aton matses icsaisa icmetiapimbo icoapampic. ¹⁰ Adecbidi, Nēidic petequid nec. Nēidic actequid nec. Nēid nanush mēpamēdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanën nuqui tantiamec.

Esuquidistu abided unēsec intac chiuidaid

¹¹ Ambi chiaid utsi tantiamenuec ambi uacmaid yec abipadquid Esuquidistu Nuquin Papabēd tabadboedi nidaidën budash matsesash icsaisa yec matses icsaid bedshunash abided cuidadec unēsash Nuquin Papa yacno matses chuibanec aton Papabēd onquequin chuiquid dapa iquec abi yacno Yuedanquid yampanēdash. ¹² Nidaidën capuquid yua cunesuneshun intac bedshun buanec Nuquin Papa yacno puduedenquo Esuquidistu icpanēdash. Aidi abia yampidi icsaisa matses icsaid bedshunash abided cuidadec unēsacsho cudan siac aton intac chiuidash Nuquin Papa yacnombo puduedoapanēdash. ¹³ Aidi matses icsaid bedshunash abided cuidadabicnuc nidaidēnshun natemaid nasho matses cuēshēdmepanēdash. Adoac utsibēd ictiapimbochsho isun nidaidën capuquid yua cunesuneshun aidën intac bēdta sisapuc daēd uashun daseccac icsaisa icmiabi yequi aton shubun puduedoapanēdash. ¹⁴ Abia abēd yampid unēsasa aton Mayambēd iquec Esuquidistu icsaisambo yec, Matses icsaid bedshunash ēbided cuidadebi, Papa, quianec unēsacsho siac aton intac chiuidacsho isun uincuemaidën nuqui pauquec ma Nuquin Papan chiacpadomboen nate bunquidquo nuqui icpanueshun. ¹⁵ Adoaidi Nuquin Papan chiaid utsi chuiquin tantiamequid Esuquidistu icpanēdash. Ēnden matses yampid icsaid bēdtabi nēbi matses icsaid bedshunash abided cuidadec unēsapanēdash ēbi tantiaquido ēbēdi tabadmenu quiash.

¹⁶ Adnubien abi unēste tantiec, Ēbi unēsan ēmbi chiacpadomboen con na abitedi menebanta, matses quepec. Aden chuiquid unēsō isun ambi chiacpadomboen menebanec. ¹⁷ Aden chuiquid unēsabi icnuc ambi chiacpadomboen utsibon menetiapimbo iquec. Icbon na abi iquec. Aid unēsan aidën na icboedi utsin na yanec. ¹⁸ Adembidi ambi nadomboen nata cain chiaid Moises menequin, Ēmbi chaidtedi nadenesho isun ēmbi chiacnombo mibi buanembi, quequin Nuquin Papan chuipampic. Aden menequin chiac Moisesën nadopampic. ¹⁹ Nuquin Papan chuibocpaden chuishun nidaidën capuquid yua cunesuneshun intac bedshun actebēdta daēd uain cacushun cuēte shubi madquēnaid podo mēsequiabicquid bedshun sedquid piu uaid potaneshun daēd uaboed nēnanshun Nuquin Papan chiaid dada uaidbēdta matses daseccabampampic: ²⁰ “Nēid Nuquin Papan chuibocpaden mimbi natequidquo nec,” quequin ismequin Moisesēmba abitedi daseccabampampic. ²¹ Adoshombic Nuquin Papa tabadte shubu uashunaidbēdta aidën tabēcaidtedi daseccabampampic. ²² Cuesunaidën intac daseccatequid nec. Shubu chedo cuesunaidën intaquēn daseccabicquid mishtemaid nec. Adecbidi cuesunaidën intac chiuidenquiocnoc matses icsaid Nuquin Papa bēpiscudenquo iquendac.

²³ Nuquin Papa yacnombo puduednush icsaisa unēsēndac, quequin ismenuen matses chuibanec Nuquin Papabēd onquec nidaidën capuquid yua cunesuneshun intac bedshun buanec Nuquin Papa nidaidën tabadte shubu uashunaidën puduedpampic. ²⁴ Esuquidistu matses icsaid bedshunash abided cuidadec unēsash nidaidēnshun Nuquin Papa tabadtebimboecnuc shubu uashunaid yacno puduedenquo ic-

panëdash. Abi tabadacnombo abi tantiaquido chuibanec aton Papabëd onquec puduedash abi tabadec. ²⁵ Ambo puduedash, Matses icsaid bedshunash ëbided padpidec cuidadnu, quenquo yec tabadec. Nidaidënshun setan-setanquien Nuquin Papa tabadte shubu uashunaidën puduedquin aton intacpenquo bedshun daseccadenec. ²⁶ Matses icsaid bedshunash abided cuidadec unësambo yec Nuquin Papa yacno puduedoash padpidec nidaid yacno choash unësash abuc Esuquidistu puduedoatsiandac. Adenquo iquec matsesash abi unëste ushënquiobi matses icsaid bedshunash abided cuidadpanëdash nëid nidaid naimëdbudte anoentsëqui icnuc. ²⁷ Nidaidën icquid unëste ushë abentsëc iquec. Unësacsho ambi naid Nuquin Papan chuitequid ushë choendac. ²⁸ Adecbidi matses icsaid bedshunash abided cuidadec Esus unëste ushë abentsëc icpanëdash. Matses icsaid bedshunash cuidadoanu, quenquo yec aidquo padpidemboec choendac. Abi cainquido abi yacno puduedmenuec choaindac.

Abided cuidadec unëste abentsëquënquiobi

10 Setan-setanquien nidaidën capuquid yua cuesuneshun intac bedshun buanec puduedsho isun matses icsaid bedshunash abided unësash abi tantiaquido chuinuec bëyucanec Nuquin Papa yacnoësh yuedanquidquo choec, quequin nuquin tsusedpabon tantiabempampic. Nidaidën capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abëd onquetiapimbo icpanëdash. ² Aidënquo daseccaquin matses icsaisa icmiac nidaidën capuquid yua padpiden cuesunenquo ictsempampic. Adecbidi, Icsambocquid nebi, quenquo matses ictsiandac. ³ Aton matses isaisa icmetiapimbocquin setan-setanquien nidaidën capuquid yuaded cuesunepanëdash. ⁴ Adshun yuan intac bedshun daseccaidën matses icsaisa icmetiapimbo iquec.

⁵ Adoquien Esuquidistu nidaidënshun tishac canias onquec:

“Nidaidën capuquid yua cuesunenubi ëmbi chiacpadomboen matsesën natiapimbo iquec qeshun yua cuesunete bunenquo mibi iquec, Papa.

Matsesën tishtequid mimbi icmiaidquo nebi, Papa.

⁶ Adecbidi nidaidën capuquid abichobi taudeniac matses abi icsambo iquec, quiash, Padi. Adoenda, mibi quec, Papa.

⁷ Adsho isun mimbi chuiquin dada uamiampicpadomboen naimbi, Papa.”

⁸ Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho isash, Padi. Aid nainquiocquin ënta, quequin mimbi matses chuinuc ⁹ mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec. ¹⁰ Aden Nuquin Papa bunacpadomboen nash unëstiapimbo yanshun abi unëste ushënquo abi tantiaquid paucpanëdash.

¹¹ Aden matses icsaid paupec, quetiapimbo noc badiadquiën-badiadquidënquien nidaidën capuquid yua cuesuneshun intac bedshun daseccaquin icbo icsaidbëdta ut-sibo icsaid pauctiapimbo iquendac. ¹² Esuquidistuen abided unësash abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec. ¹³ Ambobi tabadquimbi abi chieshënquido ambi chiacpadomboen naquidquo icmete ushë cainec. ¹⁴ Abided unëste ushënquo abi tantiaquid ambi icsaisa icmiaid abëd cuëshëdesambo yampanëdash.

¹⁵ Adembidi Nuquin Papan Mayanën Nuquin Papan chiaid utsi naden chiec:

¹⁶ “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ëmbi chiacpadomboen nate bunquidquo icmendambi, quec Icbo.”

¹⁷ Adshumbic Nuquin Papan chiaid utsi abi chiec aton Mayan:

“Abi icsaidtedi padpiden tantianu quenquo yec bëpiscudendabi, queoac Icbo,”

quequin chuipanëdash aton Mayanën. ¹⁸ Adec abi icsaid bëpiscudash nidaidën caquid yua cuesuneta quenquo Nuquin Papa iquec.

Nuquin Papa yacno puduedte cainta

¹⁹ Adoaidi Esuquidistu unësacsho isun cudan siac aton intac chiuidan, Ambi paucaid nebi, quec dacuëdenquo yec Nuquin Papan shubu icsaisa caid yacombo puduedte ushë nuqui cainendac. ²⁰ Matsesash abided cuidadec unësash Nuquin Papa yacno puduedoash tabadquid Esuquidistu nec. ²¹ Ambo nidash Nuquin Papabëd onquequin aton shubun icquido nuqui Esuquidistun chuibanubi, ²² Ambi paucaid ambi dapanacbimboecquidbidi nebi, quequin tantiaquin abi yacno choacbimboen nidaidënsun Nuquin Papa chiec onquec tabadnuna. ²³ Nuquin Papa ambi chiacpadomboen naquidquo nec, quequin abi tantiaquid yec abi yacno puduedebi, quequin caimbudnuna. ²⁴ Aden tantiaquin abi tantiaquid utsibobëd tantiananec bëdamboec tabadquin nashununa. ²⁵ Aden nabanec abi tantiaquid utsibobëd iccuededtiapimbo iquebi, utsi-utsiec quiacpadec adenquo icnuna. Adec iccuededec, Nuquin Papan chiacpadquiec bëdamboec tabadnuna, quec chuinanta. Niacquid dadpen icsho isash, Matsesën naid chuibanquin cuidte ushë badedquo choec, quiash badedbadedquiec chuinanta bëdamboec tabadte bunec.

²⁶ Ëbi icsaid bedshunash abided cuidadec Esuquidistu unësapanëdash, quequin tantiahs icsaded-icsadedquid iquec, Adquidquo Esus nec, quetiapimbo iquec. ²⁷ Aid cuidte ushë chonoc nëishun comapenen chushcaindac Nuquin Papan abi chieshënkuido nibëdamequin. ²⁸ Nadomboen nata cain Moisesën chiaid niacsho isun daëdshun chiac niacquid unësmpiampic. ²⁹ Nuquin Papan abia naden nata cain chiaid niactenequid adomboen cuidnushe quiash ëbi icsaid bedshunash abided cuidadec Esuquidistu unësapanëdash, queboedi, Ëmbi tantiaboed Nuquin Papan Madopenquo matsesquo ëbipadquid icsacsho cuesuniac, quequin chieshënscho ¿comapenen Nuquin Papan cuidenquioda icpadic? Adquid Nuquin Papan Mayanën bëdambocquid icmenu quequin chiaid chieshënkuid nec. ³⁰ Nuquin Papan: “Ëmbimbo ëmbi chiaid chieshënkuid cuidendambi,” quequin chiaid nec, quequin nuqui tantiec. Adembidi: “Abi tantiaquid icboedëmbi tantienquo yansho cuidquidquo Nuquin Icbo iquendac. ³¹ Abi cuidantequid dacuëdampambo iquec,” quequin Nuquin Papan chiaid nec.

³² Esuquidistu tantiaquid yanash mibi bëdamboec tabadondacpaden tantiamec chuinandeneta. Esuquidistu tantiabenacchuca icsho chieshëmënkuidon mëyanaqui, Esuquidistu tantiaquid nebi, quec dayacquo yec bëdamboec mibi tabadteniondac. ³³ Dadpen tabadnubi, ëmbi tantiaid Esus nec, qesho mibi utsibon mamënsunon-dash. Adembidi aidon natiambocquin mëyanac. Adomboembidi Esuquidistu tantiaquid utsi mëyansho isun, Aidbëd icquid nebi, quequin ismequin mimbi nashundenepondac. ³⁴ Esuquidistu tantiaquid utsi quënëns nauedaid icsho isash abëdi tabadacbimboec natiamianquiec unësquo yec mibi tabadpondac. Adecbidi mibi

chieshënquidën mitsana bedacsho isash Nuquin Papan ëbi menetequid ampeti-apimbo iquec, quequin tantiec, Bëdambo iquebi, quec mibi tabadpondac.

³⁵ Adoaidi Nuquin Papan bacuë yec bëdambo iquebi, quiash dacuëdenquio yec bëdamboen nabanec mibi ënden dayacquio iccondacpadquiec adquiecbidi tabadteneta. Adquid Nuquin Papa yacno puduedquid nendac. ³⁶ Utsin mëyanaqui Nuquin Papan chiaid chieshenquiocquin tantiadteneta. Adec tabadquin Nuquin Papa bunacpadomboen nabanash abi yacno tabadendac. ³⁷ Nuquin Papan chiaid nadquio iquec:

“Chiata. Nëbien mimbi cainaid mibi mënchictequid choendac.

³⁸ Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. ³⁹ Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquequid nësi-atequid nendac. Nuquien abi cainquid yec Nuquin Papa yacno puduedtequid nec.

Nad iquendac, quequin tantiaquin cainquid

11 Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abëd icte ushë nuqui cainendac. Aden cainquin, Con icbo ëmbi isacmaid nec, quequin aid isbenacbimboen ëmbi tantiaid nec, quec tabadquidquio nebi. ² Adembidi tantiec tsusedpabo tabadsho isun, Bëdamboen mimbi tantiec, capampic Nuquin Papan aido chuiquin.

³ Adembidi Nuquin Papan: “Abubëdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec ëmbi nëbi isaidtedi nibëdnuc ¿mitsipadomboentsi aidtedi icmebampampiba? quenquio nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

⁴ Adembidi, Mibi tantiaquin mibi bunacpadomboen nidaidën capuquid con yua cuesuneshun tauinu, quequin chuishun Abedën naid Nuquin Papan bëdamboen isaidquio icpampic. Aton utsin Cain caidën aden tantienquiocsho Nuquin Papan ic-samboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquio abi iquec.

⁵ Adnubien adecbidi abi tantiaquidquio Enoc icsho isun Nuquin Papan buanac unësesa icpampic. Bëdamboquid nec, quequin Nuquin Papan buanacsho nibënquin Enoc istuidambocpampic. ⁶ Abi tantiesa icsho isashien, Èmbi bëdamboen isaidquio nec, quetiapimbo Nuquin Papa iquec, quequin tantiaid aid tantiaquid icsho, Abi yacno puduedmetequid nebi, quequin tantiaquid ambi bëdamboen isaidquio nec.

⁷ Adnubien adembidi Nuquin Papa tantiaquin Noe caidën, Nuquin Papan chi-acpadomboen nanuna, qeshun, Èbëd icquid unës uanushe qeshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bëdamboen isaidquio aidquio icpampic.

⁸ Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. ⁹ Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquio yec daëdcaid shubumpi buan-buanequi aid nidaidën tabadpampic.

Adecbidi aton mado Isactsen aid shububidi buanash tabadoapampic. Adecbidi Isaquën mado Acobotsen tabadoapampic. ¹⁰ Nuquin Papa yacno ambi tantiampic-padomboen shubu uaidën tabadendabi, quequin cainec quenenenquoio yec nidaidën Abadauan tabadtenepampic.

¹¹ Adembidi Abadauanën Nuquin Papa tantiaquin aton chido Sada machobudash bacuë tishtiapimbocquid icnubi, Nuquin Papan chiacpadquiec con mado iquendac, quequin tantiacpadomboen Abadauanën chidon machobudquioshon aton mado tishpampic. ¹² Adoac Abadauan tsusiobudaidënquoio tsyuecquid dadpen uispatedi yampampic. Masitedbidi yanoapampic.

¹³ Aden Nuquin Papan aid nidaid ëbi menendac, quequin tantiec chieshenquoio yec Abadauan ambi isacmanombo choash, Con nidaid nendac, quequi Nuquin Papan meniabicnuc queneshash tabadenquoio yec nidequi unëspampic. Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic. ¹⁴ Nuquin Papa tantiaquid yec Nuquin Papabëd tabadendabi, quiash nidaidën quenenenquoio yec aidtedi tabadpampic. ¹⁵ Ëbi tishondacnombo tantiec unësqiuo iquebique. Ambo nidoaibi, quiash midtsempampic. ¹⁶ Adenquoio yec, Nuquin Papa yacno tabadendabi, qesho tantias, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

¹⁷⁻¹⁸ Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Ëmbi chiaid tantiaquidquioda Abadauan neque. Isnu, qeshun, Min mado abentsëc Isac caid cuesuneshun ëbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauinuequin aton mado setsempampic. ¹⁹ Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

²⁰ Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuiopampic.

²¹ Adnubien adembidi Nuquin Papa tantiaquin tsusio budash unësbudquimbi aton cueste bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuiopampic.

²² Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësbique. Mibitedi: Aid nidaid yacno nidnu, qeshun con canite buanta, quequin chuiopampic Osen.

²³ Adnubien adembidi Nuquin Papan bëdambo icmiaid con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cuesuneta, quequin chiaid niacquin dacuëdenquiocquin aton mado adopampic.

²⁴ Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshë nec, Aidën madopenquoio nebi, queopampic.

²⁵ Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icsho aidobëdtabi ancanquidën mëyanaid iquendabi, quianec Moises cuëshëdpampic. ²⁶ Yuecshun Nuquin Papa yacno yuedac bëdambo iquend-

abi, quequin tantiaquin Equipito yacnoquidon shubun yuedshun meniaid isuidec, Natiac icsatiapimbo iquebi, quiash tabadquin Moisesën caimpampic. ²⁷ Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquio icpec, quenquio yec Nuquin Papa isacbimboec Moises tabadtenepampic. ²⁸ Yucash Equipito yacno choashun adembidi tantiaquin, Bëyuec tishaid unësmetequad ëmbi ëbi yacnoshon uaid mayan bëda ëmbi budmiaid min shubu datamenuen ëmbi chiacpadomboen nabanta, Nuquin Papan cac ambi chiacpadomboen naquidquo Moisesha icpampic. Ambi chiacpadomboen nabanquin nidaidën capuqid yua cuesuneshun shëcuë cuëmano abiuc daëdi abucbëdta intaquën ëcnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

²⁹ Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiadën isadaidbon potepampic. Aden isadaidbon potenubi abëdtambi potenuc abi chieshënkuido Equipito yacnoquido acte chomiaidën mentoadbudnepampic.

³⁰ Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscaïn tambanec dacuenadtanec shubu dadpen daquënë uain tsasi uaid sec uebudpampic.

³¹ Adnubien adembidi Nuquin Papa tantiaquin Edico yacnoquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido cuesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquio yec chiesho Daban matses utsibo cuesunequimbi.

³² Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpenshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi. ³³ Aido utsin-utsinquien: Abi ancaidobëdtabi ancanquid Nuquin Papa tantiesa nec, qeshun cuesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquo icpampic. Adquid icsho isun, Pemenu, qeshun bëdi nibëdquid deon caid tabadacno buanshun nebudpampic. Adosho isun piantiapimbocon Nuquin Papan quiëccac deonën penquiocpampic. ³⁴ Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquiocpampicboedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. ³⁵ Adembidi utsin Nuquin Papa tantiaquin nianten bacuë unësboed uincuemetanquin ani menepampic. Adembidi tantiec tsadsho isun Nuquin Papa tantiesa nebi, camenuequin shoyombededtsëcquien cuesuniaqui, Nuquin Papan chiaid tantesa uainquio yec Nuquin Papa yacno nidebi, quiash unëspampic. ³⁶ Utsi-utsien shocosh bucun mëtaneshun quënënauedacsho isun mamëshunquimbi cueshcanten cuesaqui Nuquin Papabëd tabadte tantiec dacuëdenquio yec tsadpampic. ³⁷ Adembidi utsitsen cuënoten seshunepampic. Adembidi utsitsen sënten nacsëshunepampic. Adembidi utsitsen nidaidën capuqid bitsi nacnenaid da-

siuidpampic. Aton na nibëdnubi mëyanaqui Nuquin Papa tantiaquidquo yec aitedi tabadpampic. ³⁸ Nuquin Papa chieshënuqid ëbëd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shëcuë uaidën utsi tabadpampic.

³⁹ Aiteddishun, Ëbi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaid tantiaquin cainec aitedi unësbudnepampic. ⁴⁰ Aitedi icnubi abi icsaid bedshunash abided cuidadec unëssh uincuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

Aton bacuë Nuquin Papan dayacmenuequin namiaid

12 Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaidbëdtabi nainquiocquin ënuna. Adembidi dayacquiocquin Nuquin Papan chiacpadomboen nabanec tabadnuna. ² Esuquidistu, abitedishun icbombo abia yampidquo ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isacbimboen adonona. Aidi, Ëbi yacno matses yuednu, quiash aton Papabëd tabadteneboedi matsesash icsambocquidbimboecnuc cuesten dectanac chieshenquo yec unëssacsho uincuen uaid yanash aton Papabëdi Icbombo iquec. Aidquo tantiec isacbimboec nidaidën nuquibi tabadnuna. ³ Abi chieshënuquidën natiacquin mëyanaqui chieshenquiocquid Esuquidistu icpanëdash, quequin aid tantiec ma chieshtoenquo icpanuna.

⁴ Ëbi icsaid padpiden nainquo icnu, qeshumbi natiatequid icnuc mimbi ënambo iccoc. ⁵ ¿Con bacuë cain Nuquin Papan mibi dayacquo icmenuequin chiaid bëpiscudecta icco? Nad iqueque. Tantia:

“Abuido, min Icbon dayacquo icmenuequin chiaid cacuidenda.

Adecbidi ambi natiamianquiopec camiaid icash chieshenda.

⁶ Ambi matiamianquiopec camiaid dayacquo icmenuequin nametequid con bacuëbo nec,”

quequin Nuquin Papan chiampid nec.

⁷ Natiatequid mibi dayacquo icmetequid nendac. ¿Ëbi cudasaidquo con mado dayacquo icmenuequin namebanesa nëbi, quecta aton papa icpadic? Padenquo. Ambi: Con bacuë nec, caid natiatequid icnuc, Dayacquo icmenu, quequin ancaquin chono uaic. ⁸ Natiatequid icnuc ambi dayacquo icmenu quequin namiaidpenquo yec, ambi, Con bacuë nec, caidpenquo mibi nec. ⁹ Ënden dayacquo icmenu quequin mibi ancaquidën mibi tishmequidën chiacpadomboen natiatequid icnuc naquidquo mibi icpondac. Nëbi Nuquin Papan dayacquo icmenu quequin chiacpadomboen natiatequid icnuc naquidquo icnuna abëdi tabadnuen. ¹⁰ Abi tishmequidën ambibi tantiacpaden dayacquo icmenu quequin aton bacuë yuen nametiapimbo iquec unësendac. Padnuen Nuquin Papan abipadquid icsaisa icmenu quequin natiaquionoc nuqui namendac. ¹¹ Adoac nuqui natiaquieq tabadec. Adoaidi yuecash nuqui bëdamboec tabadendac. Adecbidi natiatequid icnuc dacuëdënesa nuqui yanec. Adecbidi Nuquin Papabëd icquid nebi, quequin tantiaquidquo yec natiatequid dacuëdënesa nuqui yanec.

¹² Aden tantiec dayacquio ictiapimboeboedi: Abipadquid iquendabi, quiash dayacquio yec tabadta. ¹³ Adenuidi naic tabadquin utsibo isme ma dayacquio ictiapimboequin niaquec cuëshēdte bumboedi bēdambo yampanuna.

¹⁴ Aden naic tabadec utsibobēd bēdamboec tabadnu, quiash adec tabadta. Adecbidi Nuquin Papa icsaisa yacpadquieic nuquibi icnuna, quiash aid tantiec tabadec isnanec chuinanec adquid yanta. Adoesa Icbobēd tabadtiaipimboequid nendac. ¹⁵ Nuquin Papan bēdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiaic utsibo icsabudtsiashe. Bēdamboec tabad, quequin chuiban. ¹⁶ ¿Ada aton chidopenquico chudquid icpec? Adecbidi, ¿Ada adembidi aton bēnēpenquico chudmequid icpec? quequin isnequin adquid istuidshun Nuquin Papan chiaid chuiquin bēdamboen tabadmeta. Adembidi, Esaupadquid icnushe qeshun ¿ada Nuquin Papan bēdamboen tantiaid chieshēnquin isuidquid icpec? qeshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unēsnnun tsusio icquin con pan bēdamboen tantiaid chuisho mimbi tantiaata, quequin aton papan bēdambo icmenu quequin chiaid chieshquin Esaun tantienquiocpampic. ¹⁷ Yuecshun, Aton utsi Acobo aton papan chuibanosh, qesho tantiaish shubiquin, Mimbi bēdamboen tantiaid ēbitsen chui, papa, cac chuitiapimboequidēmbi, Ēnden nibēdquiocnoc uesquin min utsi chiombi, quequin Esau chuipampic aton papan.

¹⁸ Adembidi, Nuquin Papan nadatiambocquin uabanaid tsusedpabon isampicpadomboen mimbi isabicoc. Macuësh Sinai caid yacno choshon aidon isbenampid nēid iquec: natia nēdēnquedote; utsibic, inchëshac bimboec isadquid; utsibic, cunquequid dapabimboec isadquid; ¹⁹ utsibic, shocosh shoncaten shoncac bimboec onquenuc pabiate paēmbošē icpampic. Adec onquesho tantiaishun, Papa, mibi onquesho tantiac dacuēdampambo iqueque. Mibi chuitequid Moises icme, capampic. ²⁰ Adec macuësh yacnombo icquin: “Ēmbi nadatiambocquin uabanaid ismenubi macuësh yacno anoentsēqui choenda. Adecbidi matses adecbidi nidaidēn capuquid. Anoentsēqui choquid cuēnoten setequid nendac,” quequin chuipampic Nuquin Papan. ²¹ Aden Nuquin Papan nadatiambocquin uabansho isash: “Dacuēdampambo iquec, quiash, Dacuēdebi,” queoapampic Moisesetsen uēdēquec.

²² Mibien dacuēdenquio yec Macuësh Sion cashumbic Edusaden Chuca Bēdambocquid caid Nuquin Papa ēnēdesambo tabadacno choac bimboec mibi tabadec caimbi. Aid nuntan Nuquin Papan abi yacnoshon ambi uaid mayan bēdabo tambantiapimbo yec dadpenquioshē tabadec. Aido, ěmbi nashunaidtedi, Esus tantiaquid chotequid iquec, quiash bēdambo iquebi, quec cuēdēdonec tabadendac. ²³ Abi tantiaquidtedi Nuquin Papan bacuē icbo yacpadquieic aton shubu abentsēquēnuēshi Icbobēd onquec ěnden mibi taēpoc. Aidi mimbi naid cuidquid ambi chiacpadomboen nadenequid mibi unēsesa icsaisabidi icmequid Nuquin Papa nec. Aidbēd ěnden tabadac bimboec abēdi onquec mibi taēpoc. ²⁴ Abēd icquin Nuquin Papan ambi ěnden chiaid ěmeshun ambi nēbi chuioaid, mibi chuibanec aton Papabēd onquec bēyucanec yuedanquid Esuquidistubēd ěnden mibi onquepoc. Mibi icsaid bedshunash abided ciudadec unēsō isun cudan siac intac chiuidnēdaid tantiec aidbēdi mibi onquepoc. Abedēn nidaidēn capuquid yua cunesuniampicpadquidēn intac chiuidec unēsaid tantiec Icbobēd mibi onquetiapimbo iquec.

²⁵ Nuquin Papan chiaid niacchitomane quequin isquiota. Macuësh Sinai yacno choquid Nuquin Papan ěnden chiaid chuiquid tantiate bunesa cuidpampic. ¿Adem-

bidi ambi nēbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? ²⁶ Ēnden Macuēsh Sinai yacno Nuquin Papan chiacnoshonquio nidaid ishcumpampic. Nēbien: “Padpidemboen nidaidbēdta abu ēnēdmenuen ishcunoaindami,” quec Nuquin Papa. ²⁷ Aden chuiquin ambi uaidtedi ēnēdmenuen padpidemboen ishcunoaindac abi yacno choaidtedi icsaisa icmiaido yec ēnēdtiapimbo iccuedednuc.

²⁸ Adoaidi Nuquin Papabēd abi tantiaquido ambi bēdambo icmiaido yec abēd tabadte ēntiapimbocon Nuquin Papan nadatiambocquin nabanaid tantiec cuēdēdonec tabadta. ²⁹ Nadatiambocquid Icsaisabidi icquin aidēmbi, Esuquidistu tantiata, quequin nēbi chiaid tantiesa chian anēdēnquequid nēsecaindac.

Nadomboen nata cain chiaid

13 Esuquidistu tantiaquid yec aid tantiaquidtedi con utsibo nec, quish tantiananec nashunanta. ² Adembidi Nuquin Papa yacnoēsh choquid abi tantiaquido nashuntequid ambi uaido mayan bēdabo chosho yuedampicpaden mimbi isacmaidquio Esus tantiaquid chosho yuedta. ³ Adembidi quēnēn nauedaid iquec utsi iste buntsiabi, qeshun quēnēn nauedaid istan-istanta. Adecbidi buntsiabi, qeshun menetan-menetanta. Adembidi utsin mēyanaid tantiec shubioata.

⁴ Adec tabadec con chidopenquio chudnu quesa iquec chido utsi isuidquid icta. Adesa icsho Nuquin Papan mibi cuidendac. ⁵ Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bēdambo iquebi, quec tabadta. Adec tabadquid Nuquin Papan ēnden dada uamiampid naden chiec:

“Mibēdi iquebi.

Nianenquiocquin mibi dayun uanuna.”

⁶ Adsho tantiash:

“Con Icbombo ēbēdi iquendac.

Aidēmbi ēbi cudasquin dēcatiac chieshēmēnquid dacuēdēnenquio iquembi,”

nuqui quendac. ⁷ Adembidi nidaidēn icquid mibi chuiquid dapabo Nuquin Papan chiaid mibi tantiamenuquin chuiquido bēshunenda. Aido Esus tantesa uainquio yec bēdamboec tabadpanēdash. Aido tanec bēdamboec tabadoata. ⁸ Con Icbombo Esuquidistu nec. Abia Yampidquio yec nēbi adquiobidi iquec. Aidi ēnēdtiapimbo yec abi tabadec.

⁹ Adquid Esus icnuc Nuquin Papa chieshēnquidēn chuisho tantiesa icta. Aidēn naden chiec, Nēid petequid icnubi nēid utsi petemaid nec, quequin chiec. Mimbi pi-aidēn mibi bēdambo icmetiapimbo iquec. Padnuen matses icsaid bedshunash abided cuidadquidēn, Nuquin Papan madonquio paucaid iquebi, quequin tantiaquidquio icsho isun Icbobēd tabadmequin ambi bēdambo icmiaidquio nendac. ¹⁰ Matses icsaid bedshunash abided cuidadash uincuenash abi tantiaquidbēd ēnēdenquio yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidēn capuquid yua cuesuneshun nibēdquiocnoc tauiaidēnquio matses Nuquin Papabēd tabadmetiapimbo iquec. Adembidi aidēnquio nuqui icsaisa icmetiapimbo iquec.

¹¹ Isadaidbo icsapash, qeshun nidaidēn capuquid yua cuesuneshun aidēn intac bedshun, Nēid intac Icsaisa Bēdaidquio anquēnē uaid nuntan buanshun daseccacsho isun abi yacno puduedacimboecsho Nuquin Papan isadaidbo isec, qeshun nun-

tan buanshun daseccapampic. Adnubien matses nibëdacno nami buanshun uesquin tauipampic. ¹²Adembidi matses tabadenquo yacno Esus buanshun dectanac unësacsho siac aton intac chididiepanëdash nuqui icsaisa icmenuec. ¹³Adoaidi abi tantiaquid yec abëd icquid nebi, quequin ënden chiampicpaden nainquiocsho isun isadaidbo Esuquidistu tantiesan cacumiaqui chieshenquo yec tabadta. ¹⁴Adquid iquec nidaidën yuec tabadesa icquimbien Edusaden Chuca caid Nuquin Papa ënëd-tiapimbocquidbëd tabadaid cainquidquo nuqui nendac.

¹⁵Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bëdambo iquec, quequin Nuquin Papa chuidenenuna. ¹⁶Adodenequin utsibobëd tantiananquin nashunquin aton na nibëdquid menequid icta. Adsho isash, Con mado yec con champi yec quec bëdamboec tabadquid nec, quiash bëdambo iquebi, quependac Nuquin Papa.

¹⁷Ambia Esus tantiashun chuiquidon chiapaden nabanta. Nuquin Papan, Ëbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiapadomboen naquin ma aido bëdambo iquebi camepanuna. ¿Chieshecta mibi bëdambo icpe? Padenquo.

¹⁸Chieshenquiocquin ëbëd icquid Nuquin Papa chui. Bëdamboen nabanec tabadteniobi. Adequi tabadebi utsibo: Icsambocquid nec, quetiapimbocnoc. ¹⁹Adembidi ëbi tantiaquin Nuquin Papa chuidoneta. Mimbi adonoc badedquo mibëd iquendabi.

²⁰Adembidi utsibëd bëdamboen tabadmequid Nuquin Papan aton Mado mat-sesacsho utsibon unës uashun siacsho isun uincuemiac bëyucanec abuc puduedoash abitedishun Icbombo nec. Abi tantiaquido chuinen yuedquid aidi Nuquin Papan icmepanëdash. ²¹Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Ëbi puduedmenuen Nuquin Papan naid nec, quequin ënenquiocquin chuiquid ma icpanuna.

²²Mibi tantiamenuen ëmbi dada uaquin chiaid daëdpactsëcquo icsho bëdamboen isec onquequin tantiadoneta.

²³Nëbi utsi chiambique. Tanta. Timoteyo quënën nauedboedi nëbi puduemiac aid badedquo nëmbo choan aidbëdi mibi yacno nidendabi.

²⁴Mibëd icquid Esus tantiaquid utsibobëdta mibi chuiquidtedi tantiec tsadebi quequin Pabadon dada uaosh, quequin chuita. Adecbidi ëbitsen tsadebi quequin chuoata, queoapec nëuësh Itadia yacno tabadquido.

²⁵Nuquin Papan bëdambo icmiaid ma mibitedi icpanuna. Padi. Aidtedi dada uaombi.

SANTIACON DADA UAID

1 Santiacono nebi. Nuquin Papan namiaidquio, Nuquin Icbo Esuquidistun namiaidquibidi nebi. Adquid yec Esus tantiaquido uano nidaniash tabadquido mibitantiecsadebi. Aden tantiaquin dada uaimbique. Isec onqueta.

Natiametequid

²Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata. ³Adaid icnuc, ¿Ēbi tantiaquidquioda neque? Isnu, quequin, Nuquin Papan ěbi dayacquio icmec, quequin tantiec adecbidi tabadoata. ⁴Aden tantiec tabadsho isun bēdamboec tabadte uesquin tantiabenquidquio mibi icmendac ma Esuquidistupadquid yampanueshun.

⁵Mimbi tantienquio yaid Nuquin Papa chuita. Aden chiaquien, Ma tantianu, queshun mibi nua pausunec Nuquin Papan. Icsambocquid mibi neque. Padi queniocquin mibi pausunec. ⁶Ēbi tantiamē, queboedi, ěbi tantiamenquiocpec quequin tantienda. Ēbi tantiamēpec queboedi padenquio yanec cuēshēdec capuidequi yampec. ⁷Adquid Nuquin Icbon pausuntiapimbo icpec. ⁸Adquid, Nuquin Papan ěbi tantiamē, queboedi capuidequi icquidbimboec icpec.

⁹Shubu abentsēquēn tabadacpadquiec tabadquid icta. Adec tabadec mitsana daēdpactsēc icquid yec, Con na daēdpactsēc iquec, quequin mitsanauidi tantienquiocquin naden tantiata. Nuquin Papan bacuē nebi. Abēdi cuēshēdenquio yec tabadebi, quequin aiduidtsēqui tantiec tabadteneta. ¹⁰Aton na dadpen icquidombien aton na bēdiactsec tantiaquin naden tantiendac: Con na nëidic chodquec; ut-sibic chiuidec. Adecbidi con nami shēnibudequi Nuquin Papan bacuē nebi. Abēdi cuēshēdenquio yec tabadebi quequin tantiec tabadta. ¹¹Tanunquiocquidēn tiedēn caniquid unēsec podo tididiquec. Bēdamboeboedi nibēdquiec. Adquiecbidi icbo aton nabi bedbanequi aton nami shēnibudequi unēsec. Icbo icboedi icbo ictiapimbo yanec. Adec icbo ictiapimbo yanēbi, quequin mitsana comapenen tantienda.

¹²Adecbidi natiaic shubitequid icnuc Nuquin Papan chiaid niaquenquio yec dayacquio yec tabadquid Nuquin Papan bēdambo icmiaid nendac. Adquiecbidi, Ēmbi chiaid niaquenquio yec mibi tabadsho isembi. Ēbēd icquid mibi neque. Pudued. Nēuēshquio mibi unēstiapimbo iquec, quendac Nuquin Papa. ¹³Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec. ¹⁴Nidaidēn tabadquidien icsate bunec abibi icsaic. Adecbidi ambibi tantiacpadec icsaoaic. ¹⁵Icsamane quequin tantienquio yec unēsacsho abi yacno puduedmenquiocquin Nuquin Papan uquē nēsēcaindac adquid.

¹⁶Utsibo, Nuquin Papan chiaid chieshēnesa nebi, quec mibibi mua uadenda. ¹⁷Nuquin Papan pausunaid bēdambouidi iquec. Utsi uaquin namiantiapimbo iquec. Adenuidi namec. Adquiouidi Nuquin Papa iquec. ¹⁸Ēmbi chiaid tantiaquidquio icsho con bacuē nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquio aton Mado Esus nidaidēn budmepadēnec. Adec budash nidaidēn capusho isash abēd icboedo abi tantiaquido nuquitedi nec. Adquid

icsho ambi bëyuc bacuë icmiaido, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquo dadpen yampanuna.

Nuquin Papan chiaid tantiaquin nabanta quiaid

¹⁹Nëid bédamboen tantiata. Chuinu. Nuquin Papan chiaid bédamboen tantiaquid icta. Ambi chiaid bédamboen tantienquiocquin aid badedquo chienda. Adecbidi badedquo nëishenda. ²⁰Badedquo nëishquidën Nuquin Papan chiapadquiec bédamboec tabadaid ismesa nec. Adquid, Bédamboen mimbi naoc, Nuquin Papan catiapimbo iquec. ²¹Bédamboec tabadesa icquin mimbi icsamboen tantiapaden naid ënquiota. Aden ënu quiash, Icsaobique. Mimbi chiaid tantiaquiono. Èbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquo yec cuëshëdenquo yec abëdi mibi iquendac.

²²Nuquin Papan chiaid tantiashun nainquo yequi Nuquin Papan chiaid bédambo iquec, quec mibibi mua uadenda. Nuquin Papan chiaid tantiabocpadomboen nabanta. ²³Nuquin Papan chiaid tantiashun naisa isnanten ²⁴bëisadash bëpiscud-acbimboec bëpiscudendac. ²⁵Padnuen Nuquin Papan nëbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuë caimbi, quequin Nuquin Icbon chiapadomboen nabanec tantesa uainquiocquid adquid nendac. Aden tantiaquin nabanquid Nuquin Papan bédambo icmendac. ²⁶Padnuen, Nuquin Papan chiaid tantiaquid nebi, queboedi ana bédamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquo chuiquid nec. Adquidbidi bédamboec tabadaid ismesa nec. ²⁷Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsëcquid chonoadsho isun nashuntiad. Natiac camiaid icsho isun adembidi nashunoatiad. Adembidi shiadimpi machoabictsëcquido tantiaquin nashunoatiad. Adembidi niente machobo utsin bedabi samëdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Èmbi chiaid tantiaquin naquidquo nec. Con Madopadquidquo icsaisa nec, quendac Nuquin Papa.

Nëid bédambo iquec. Nëidien icsambo iquec, quesa icta quiaid

2 Utsibo, Nuquin Icbu Esuquidistu Bëdaidquo nec. Aid tantiaquid mibi nec. Adquid icquin, Nëid bédambo iquec. Nëidien icsambo iquec, quenquiocquin icsamboen nainquiocta. ²Mibi iccuededacno Esus tantiaquid mimbi isacmaid choec. Abentsëc bëdaidquo dasiuidash nac-nacquiocquid mësiuidquid puduednubien utsi icsactsëcquiocquid dasiuidtsash puduedec. Aid daëd chosho isun ¿mitsipadentsi mimbi tantiapatsia? ³Bëdaidquo dasiuidquid isun naden mimbi tantiatiasac: Bédambocquid nec. Aton na dadpen icquid nec, quiacbimboen, Tsusion dayunquo tsadec cho, quequin mimbi aidi tsadumpec. Adshumbic, icsactsëcquiocquid dasiuidquid isun, Aton nain nibëdchitec, quiacbimboen uano tsad mimbi caoapec. ⁴¿Nëid icsambocquid nec. Nëidien bédambocquid nec, quiacbimboen Esus tantiaquid utsibo mimbi tsadunenquioda ictio? ¿Aton na tantiaquin adoenquioda ictio? Aden naquid bédamboen tantiaquin naisa mibi neyoc.

⁵Nuquin Papan chiaid tantiesabimboecquin mimbi naid nec. Mimbi, Icsambocquid nec, quequin tantiaquin uano tsad caid tsadbudash nadpec: Icsambocquid nec,

quequin ëbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iquendac. ⁶ Aidi bacuëbimboecnuc mimbi uano tsadumpec. ¿Utsibic tsusio dapabimboecnuc mimbi dayunquio tsadumbocpadquidën utsin-utsinquien chono uashun mibi daëdpactsëc menenquioda ictiosh? ¿Adquidon mua uain chuiquin mibi utsi-utsien quënën nauedmenquioda ictiosh? ⁷ ¿Adoanquidën baded-badedquien Esus quec onquequin mamëshunenquioda ictiosh?

⁸ Nuquin Papan chiaid nad iquec: “Utsin naden ëbi nashuntiadquio iquec quequin, mimbi tantiacpadomboen nashunta.” Nuquin Papan chiacpadomboen tantiaquin nashunquidquio iquec mibi bëdambo icpec. ⁹ Nëid bëdambo iquec. Nëidien icsambo iquec, quiacbimboen naquid icnuc Nuquin Papan chiaid niacquid mibi iquec. ¹⁰ Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec. ¹¹ “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidouidi chudquid icquimbi utsi cuesunequid mibi iquec Nuquin Papan chiaid niacquid mibi nepec.

¹² Mibi tantiaquin mibi icsaid pauquec Esuquidistuded icsambocquidbimboec yec unëspanëdash. Aid tantiaquid icsho Esusën paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bëdamboec tabadta.

¹³ Esuquidistu tantiaquid utsi icsambocquid nec quesa icta. Ëbi icsaid Esuquidistun paucac. Adomboembidi abi tantiaquid utsi icsaidbidi paucac quequin bëdamboen naban. Icsambocquid nec quiacbimboen icsamboen nabansho isun Nuquin Papan adomboembidi mibi chuiquin cuidoaindac. Ëbëdta Esuquidistun paucaid nec quequin utsi tantiaquin nashumënuquid icquin icsambocquid nec quiacbimboen icsamboen nashuntiapimboquid mibi nec.

Esus tantiaquid nebi quequin ambi tantiacpadomboen nabanquin isme quiaid

¹⁴ Utsibo, Nuquin Papan bacuë nebi, qeshun ¿Icbon chiaid nainquiocquinda utsi bëdambo mimbi icmepadi? Padenquio. ¹⁵ Esus tantiaquid abi dasiuidtebëd pete nibëdquid, Bec cho, qesho ¹⁶ menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bëdambo icpadic? Padenquio. ¹⁷ Adembidi, Nuquin Papan bacuë nebi, qeshun Icbon chiacpadomboen naisa Icbon bëdambo icmiaidpenquio nec. Nuquin Papan bacuë nebi, qeshun naisa Nuquin Papa yacno puduedtiapimbo icoaic.

¹⁸ Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquio iquec. ¿Mitsipaden aid daëdshun tantiacpadomboen mimbi tantieque? Chui. Tantienu, quequin mimbi chuitsiac.

Adoaqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiacpadomboen nainquiocquin ismetiapimboenobi, Esus tantiaquid nebi, quequin chienquiocquimbi Esusën chiacpadomboen naquin mibi ismembi, caimbi. ¹⁹ Nuquin Papa Abentsëcquiobi iquec, quequin mimbi tantiec. Aden tantiaid bëdambo iquec. Adembidi, Nuquin Papa Abentsëcquiobi iquec, quequin mayan icsatedishun tantiaoaic. Aden tantiaquin niacquido yec uëdëquec.

²⁰Icsamboen mimbi tantieque. Tantia. Chuinu. Nuquin Papa Abentsëcquiobi iquec, qeshun Icbon chiacpadomboen naisa yec, Icbo tantiaquid nebi, quetiapimbo iquec. ²¹Nuquin Papa tantiemi, qeshun ambi chiacpadomboen naquidquo icpampid chuinu. Tantia. ¿Abadauan ëbi tantiaquidquioda neque? Tantuan, qeshun, Min mado abentsëc mibi cudasaidquo ëbi tantiaquin cunesuneshun taita, cac Abadauanën Nuquin Papan chiaid niacmane qeshun tauinuequin aton mado abentsëc setsempampic. Chështempti sanandosho isun, Padi. Chën. Ëmbi chiacpaden nanuesho mibi bëdamboen iquec, quequin mibi bëdamboen isembi, ¿quequin chienquioda Nuquin Papan icpampic? ²²Abadauan Nuquin Papan chiaid cacuidenquo yec, Con Icbo Nuquin Papa nec, quec abi onquiapaden ismepampic. ²³“Mimbi tishmiaidën tishmiaid dadpenquioshë iquendac,” quequin chiondashumbic Nuquin Papan yuecshun adembi: “Min mado abentsëc cunesuneshun taita,” quequin chuioaqui, Nuquin Papa abimbo chuiquidquo nec, qeshun ambi chiaid niacchit-omane quequin, Abadauanën aton mado abentsëc setsempampic. Adosho isashien Nuquin Papa, “Ëbi tantiaquin naquidquo Abadauan nec. Adquid con matsesquio aidi nec. Aden aidi tantiaquin ëmbi yuecquiocshon nanuequin tantiaid Abadauan chiemi,” quepampic Nuquin Papa.

²⁴Nuquin Papan bacuë nebi, qeshun ambi chiaid naquidquo Nuquin Papa tanti-
aquidquo nec. Nuquin Papan bacuë nebi, qeshun ambi chiaid naisa niacquid nec. ²⁵Adashic, Nuquin Papan chiaid tantiashun naquid utsi icpampic. Aidi isadaidbon chidopenquo, Daba cuëmëdquid, dada dadpen chudmequid icpampic. Isadaidbon Icbo nadatiambocquid nec, qesho tantiashien, Adquid abu nidaidbëdta aidënquioc-
quid Icbobidi nec, quequin Daban tantiapampic. Aden tantiaquin Daban matses
cunesunenuquido isadaidbo abia puduedquin isquid chosho, Nadatiambocquidën
matses nec, qeshun abi yacnouidsëqui Daban puduedmepampic aton matses is-
menquiocquin. Aden puduedmequin nadomboen tantiapampic. Abi puduedmequid-
bëd icquido cunesunenquiocpec, quequin Nuquin Papan tantiamiacpadomboen om-
poshon podqued utsin nidmepampic. Aden nidmiac yuecash isadaidbo dadpen cho-
chonobi abia choamboedën chuibocpadquiobi Dababëd icquido cunesunianenquo
yec isadaidbobëd icquidobimboec isec tabadpampic. ²⁶Nuquin Papa tantiaquid
Daba yanshun bëdamboen nasho isun mënchicaid Nuquin Papan con matses caid-
bëd tabadpampic. Padnuen, Esus tantiaquid nebi, qeshun Icbon chiacpadomboen
naisa cuëshëdacbimboec tabadec.

Anan icsamboen chiec onquiaid icsa ënta quiaid

3 Utsibo, Nuquin Papan chiaid chuibanquid dadpen iquenquioctiad. Nuquin
Papan chiaid tantiamenu, quequin ambi chiaidpenquiocnoc chuibanquid abi
yacno chosho isun Nuquin Papan comapenen cuidendac. ²Chuibanquidtedishun
chua-chuatsëquien chuibantsec. Nuquin Papan chiaid cuembo chuibanquid yec ic-
saisa yanec adquid. Bëdamboec tabadaid uesquin tantiaquin ismequidquo adquid
nendac.

³Cabayo anëshquin dëchëdëdcash uidën uash tsadquin nidmec. Aden uidën
uaquin bidiaacmec. ⁴Adembi uncaten cano dapa tsibidiacoaic. Cunquequidën
comapenen bëcunetiadquiocnobi adembi icbon nidmec. ⁵Cabayo canobidi nua
icnuc abi bidiaacmete aniactëc iquec. Adecbidi icbo nua icnuc aton ana aniactëc
iquec. Aniactëcquidï oncamequin icbon ambi naid dadpen comapenen chuibanec.

Adembidi oncamequin onquiaid icsa chuibanec. Nēdēnquiaid dētsisidash badedquio nidacimboec onquiaid icsa badedquio nidoaic. ⁶ Ana onquiaid icsa chuibanacpaden nabanec adecbidi icsabudquieic icbo. Adquid mayan icsan yua iquec adequi icsate bunec.

⁷ Nidaidēn capuquid podochoquidbidi matsesēn yuampicpaden abi yuaid iquec. Yua quenenash cuenenquiocquid. ⁸ Ad yenquio ana iquec. Quenenenquio yec ana onqebudec. Onquiaid icsa adecbidi ēnēdtiapimbo iquec. Ana onquiaid icsa tantiabanecc adecbidi icsabudquieic tabadendac.

⁹ Nuquin Icbo bēdambo iquec, qeshumbic ana icbon, Nuquin Icbon uaid matses icsambo iquec, quequin chuibanoaic. ¹⁰ Ana shēcuēn utsi bēdamboen chuishumbic utsi icsamboen chuoiaic. Aden nuqui chienquio ictiad. ¹¹ ¿Acte batapenquiocquid choaidēnuēsh batambocquidta chopadic? Padenquio. ¹² Adecbidi ¿cuēte bacuē batambocquidēn ēshē bēchi chopecta dēyuctic? Padenquio. Adecbidi, ¿Isitodo data-niadaidēn bacuē batambo yecta dēyucpadic? Padenquio. Aidi adesa yacpadquieic Esus tantiaquidēn ana shēcuēn utsi bēdamboen chuishun utsi icsamboen chiesa ictiad.

¿Tsutsi Nuquin Papan chiaid tantiabenquidquio icpec? quiaid

¹³ ¿Tsutsi Nuquin Papan chiaid tantiabenquidquio icpec? Adquid yec comapenen Esus tantiaquid nebi, quenquiocquimbi bēdamboec tabadquin ismequid utsi-utsien ma icmebampanuna. ¹⁴ Utsin tantiamenushe qeshun ēmbia chiacpadomboen ma napanu quesa icta. Nuquin Papan chiacpadomboen nabanquin ismequid icta. ¹⁵ Adembidi, utsin dēniacnushe qeshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. ¹⁶ Aden aidēn icsamboen tantiacpadomboen abēd icquidon adomboembidi tantiec. Aden tantiec, Utsi dēniacnu, quiash utsi-utsiec dēniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquieic. Ad icnuc icsateuidi bunquid yampec. ¹⁷ Nuquin Papan tantiacpadomboen pausunaid ad yenquio iquec. Ambi tantiacpadomboen pausunaid yec utsibēd bēdamboec tabadquid iquendac. Adembidi utsi tantiaquin nashunquidquio icoaindac. Adembidi ēbēdtan nabanec cho cac nabanendac. Adembidi, Icsambocquid nec, quenquiocquin bēdamboen nabanquin ismendac. Adembidi, Esus tantiaquid nebi, abi quiacpadomboen bēdamboen naic. Adecbidi utsibo chiec muaisa nendac. ¹⁸ Ambia tantiaquid utsibēd bēdamboec tabadquin ismiac adecbidi utsibēd bēdamboec tabadquid dadpen yanendac.

Ēbi nua pausun, quequin chiash Nuquin Papan dayunquio tsadta quiaid

4 ¿Atotsi quiash Esus tantiaquido cuididianante buncuededpec? Mibi icsate bunacpadequi mibi cuididianante bunec. Aiduidquio tantiabudequi mibi chushcanancuededec. ² Nēid bunebi, queboedēmbi bedtiapimbo yanquin mimbi cuesunec. Adecbidi, Utsi dēniacnu, quiash chushcananec. Mimbi naiduidi naquin Nuquin Papan tantiacpaden naisa mibi nec. ³ Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuisho Nuquin Papan mibi menetiapimbo iquec.

⁴ Mimbi inaiduidi chudenquio yacpadquiequi Nuquin Icbouidi tantienquio yec Esus tantiesan icsate bunquin nacpadomboen mimbi nadenec. Adquid yec Nuquin

Papa chieshënquid nec. ⁵Adenquiocquin Esus tantiasho isun aton Mayan Nuquin Papan Esus tantiaquidtedi meniac bēdamboec tabadec. ¿Atotsieshun Esus tantiaquid aidi menepec quepecta mibi ique? Nad iqueque. Tanti. Chuinu. Con bacuē nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dēcatenquioda aidēn icpec? ⁶Aidēmbi abi chieshenquio yacpaden tantiamebanac icsamane quiash chieshenquio yec bēdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ēmbibi bēdamboen tantiatiapimbo iquebique. Ēbi tantieme, Papa, qesho Nuquin Papan nua pausunac aton icbo chieshēnenquiocquid iqendac adquid.”

⁷Aden Nuquin Papan chiaid icnuc, Icsaobique. Mibia Yampidēn ēbi nua pausun, Papa, quequin chiasn Nuquin Papan dayunquio tsadacimboecquin ambi chiaid tantiatia. Nuquin Papa chieshënquid mayan icsan yuadenda. Adquidēn yuatiapimbo iquebique. Nuquin Papan chiaidquio nabanu, qeshun nabanuc mayan icsa cuenendac. ⁸Aton dayunquio tsadquidbimboecquidbēd tabadquidquio Nuquin Papa nec. Icsash uano tsadquid icboedi bēchishash acten dapanudacimboen mimbi tantiaid icsa ēnta. Adash, Tantiad bēda pausumenu, quiash Nuquin Papan dayunquio tsadacimboecquin chieshenquiocquin ambi chiaiduidi tantiaadeneta. ⁹Aden tantiec tsadboedi, Ēmbibi tantiembi, quec Nuquin Papa chieshënquidēn dayunquio uano tsadashic, Con Icbo tantiec unēsquio iquebi, quiash shubiec mamēnenquio yec tsadta. Mibibi uano tsadquid yash unēsacimboec icboedi choec isadcuenacimboec Nuquin Papan dayunquio tsadacimboec yec chieshenquio yec bēdamboec tsadoata. ¹⁰Uano icboedi choash, Ēbibi icsaobi. Nēbi icsate bunenquio iquebi. Mimbi chiacpadiadquio iquebi, Papa, quequin chui. Aden mimbi chuisho tantiash, Puduedash nēmbō ēbēd tsadacimboec mibi yanoaic, quependac Nuquin Papa.

¹¹Utsibo, Esus tantiaquidtedi min utsibimboecquid nec. Mibēd icquid icsamboec chuinanenquio yacpadquiec Esus tantiaquid utsibēd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiacimboecquid nec. ¹²Nuquin Papa Chuiquid Dapa Abentsēcquiobi iquec. Ambi chiacpaden naquidquio nec. Nuquin Papa abitedi Isquidquio Abentsēcquiobi nec. Aden isquin: Nēid icsambocquid nec. Nēidien bēdamboecquid nec, quequin Chuiquidquio abentsēcquiobi aidi neoaic. Adquid icquin ambi chiaid nabanquid abēdi tabadmec. Ambi chiaid niacquidien abēdi tabadmenquiocquin uquē nēsecaindac. Nuquin Papan ambi chiacpadomboen naquidbēdtabi ambi chiacpadomboen naisa isquidquio icquin ambi isacpaden cuidendac. ¿Adquidbidida mibi ne? Padenquio. Adquidpenquio icquin ¿atotsieshun, Icsambocquid nec, quequin mimbi chuipe?

Ma badiadshun nanun chiaid tantiesa neyoc, quequin chiaid

¹³Tantiaquidquio nebi, quiash, Pucquid bednuec seta abentsēc matamec chonoadec nidebi, quequid chuinu. Tanti. ¹⁴Ma adquid badiadshun nanun chiaid tantiesa mibi neyoc. ¿Tetsi seta matamec mibi tabadpe? Badiadbudnuc cuenempambo yash badedquio nidacimboec matses nidaidēn tabadash adecbidi mibi nibēdanendac. ¹⁵Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quietiad. Adecbidi, Nuquin Papa bunaid icnuc badiadshun tied neshcaimbi, quietiad. ¹⁶Aden chienquiocquimbi mibi utsi dēni-

aquec onquiaid mimbi chiec. Aden chiec icsaic. ¹⁷Nuquin Papan chiaid tantiembi, qeshun adomboen natiadquidi naisa iquec icsaic.

Na dadpen bedbanquin dayun uaquido chiaid

5 Nēbi aton na dadpen bedbanquin dayun uaquido chiembique. Tantiata. Mibi unēsun mimbi bedbanquin daēd uaid mimbi tantiaidquio buantiapimbo mibi iquendac. Aden mimbi bedbanquin daēd uaiduidtsēqui icsho isun Nuquin Papan mibi cuidendac. Adquid nebi, quequin tantiaish shubita. ²Unēsosh, quequin chiac mimbi dadpen dayun uaid nibēnquin isac ēnden chodquiac. Adembidi mimbi bēdaidquio dectanaid capishton ēnden piac. ³Min shocosh piucquid ēnden chiuidac. Adecbidi min piucquid utsi ēnden tiadac. Adenuidi tantiaquin bedbanquid unēsasho abi yacno yuedquin, Bēdamboen mimbi naoc, quetiapimbo Nuquin Papa iquendac. Tanunēnquio shubu nēdēnquiash nibēdacpadquiec mimbi bedbanaid nibēdquidac. Adenuidi tantiaquin, Esus ēbi bedec chonoshe qeshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. ⁴Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquec. Aidi mimbi menenquio yaid Esuquidistu tantiaquido Nuquin Papan tantiaido nec. Adembidi, Con tiedēn caniquidtsen dayun uanu, quequin mimbi bedmiaido uēshquec bunec sidquesho Nuquin Papan, Nadatiambocquid Abentsēcshun tantiec. ⁵Aido bunec sidquenubi chonoadenquiocquin nua pec mibi tsadec. Adec tsadquin min nami bunaiduidi tantiaquin mimbi bedbanoaic. Nua pec cubudacbimboen mibi bunaiduidi bedbanquin dadpen dayun uaquido mibi nec. Aden nabanquin bēdamboec tabadaid ismesa mibi nec. Adec tabadec unēsash abi yacno mibentsēqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidēmbi mibi cuidendac. ⁶Mimbi chiaid mimbi chono uaidon niaquenquiocquin nabanacshobi, Icsamboen mimbi naoc, quequin daēdpactsēc mimbi menebampoc. Aden nabanec mimbi cuesuniacbimboec bunquiec chonoadequi unēsposh.

Ma Nuquin Icbo chono quiash chieshesa icta quiaid

⁷Nēbi utsibon chono uaido chuinu. Tantiata. Nuquin Icbo choec quequin tantiec chieshenquio yec tabadta. Nitsinash ma caninu quianec pec nidash cainec icbo tabadec. ⁸Adembidi, Nuquin Icbo ēbi bednuec choec, quec bēdamboec tabadquin caimbudta. ⁹Adec tabadquin Esus choate cainec Esuquidistu tantiaquid utsibobēd chieshēnanenda. Adec utsibobēd bēdamboec tabadsho isun abitedi tantiaquidēnquio Chuiquid Dapan mibi menequin bēdamboen cuidendac. Adesain menenquiocquin cuidendac. Adembidi, Nēidēn bēdamboen naosh. Nēidēmbien icsamboen naosh, quequin ēbi Chuiquidēnquio chiendac, quec chieshenquio yec bēdamboec tabadta.

¹⁰Utsibo, natiatquid icnuc Nuquin Papan chiaid ambi chuimiaido chieshenquiocpampic. Aidquio chuibanu. Tantia. ¹¹Natiaid icnuc chieshenquiocsho isun Nuquin Papan bēdambo icmendac, quequin nuqui tantiondaid nendac. Natiaic cametequid icnuc Nuquin Papa chieshēnenquiocquid Obo icpampic. Aton na dadpen icboedi ic-satequid utsi-utsiectsēcquiecquidēn uesac nibēdquiocsho isash, Con nabēd con nabo nibēdnuc Nuquin Papa bēdambo iquec, quec chieshenquiocpampic Obo. Adquid ic-

sho isun daëd uaquin Nuquin Papan meneoapampic. Matses tantiaquin naquidquo Nuquin Papa nec, quequin ¹²abimbo chuiquidquo icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquo, quiacpaden nabanoata. Mua uanec onquequid Nuquin Papan cuidendac.

Nëidic bëdampec quequin abimbo tantianuc quiaid

¹³¿Natiambo icsatequid icnuc dayactiapimbo icquidta icpec? Adquidënquo Nuquin Papa chuitiad. ¿Bëdambo iquebi, quec tsadquidta icpec? Adquid Nuquin Papan naid chiec cuëdëntiad. ¹⁴⁻¹⁵¿Aton dada icsabudquidta icpec? Adquidën ambia Esus tantiaquido chuiquin, Nuquin Papa ëbi chiec cho, catiad. Adsho tantiaash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuëte bacuë ënë chinshun dashunquinquin, Mimbi utsibo bëdamenëdacpadomboen mimbi tantiacpaden nëidtsen bëdame, Icbo, quequin chuita. Aden Nuquin Papa chuinun mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaic chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bëdamepanuna. ¹⁶Abi icsaid uesquin Nuquin Papa chiash bëdamboec tabadendac. Adquidën chiac dada icsambocquid Nuquin Papan bëdamendac.

¹⁷Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasën tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquo icpampic. ¹⁸Adembidi, aidëmbi yuecshun, Ue secame, Papa, cac ue sequenuc tiedën caniquid canipampic.

¹⁹Esus tantiaquidën Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabëd yacbimboec icoaindac. ²⁰Aden mimbi chiac chieshenquo yec tabadsho isun Nuquin Papan uquë nësiatiapimbo adquid iquendac. Adecbidi abi icsaid bëpiscudoaic Nuquin Papa.

Padi. Mibi tantiaquin aidted dada uaombi.

PETEDON DADA UAID 1

Petedon tauamboen chiaid

1 Petedo nebi. Abëd icquid icsho Esuquidistun: —Ëbi chuibeneta —caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidëshun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidtedi nidaid yacno tabadquidon iste nëid dada uaic nebi. ²Ëndenquio Nuquin Papa: —Ëmbi tantiactedi matses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquio icnuec abided cuidadaid Esus tantiaquo Nuquin Papan ëbi bëdamboen isec. Aidën chiacpadomboen natiadquio iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ënenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa —quequin Nuquin Papa mibi chianembi.

Esus tantiaquid Nuquin Papa yacno tabadte chiaid

³—Nuquin Icbo Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquio icquin utsiacbimboecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unësacsho uincuemeshun Nuquin Papan abi yacno nuqui tabadmendac padpidec unëstiapimbo icnuc. ⁴Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac —quequin nuqui tantiec. ⁵Aden Esus tantiaquid icsho isash: —Con Mado Esus tantienquio yanushe —quiash nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec.

⁶Ëmbi aden chuisho tantiaquo mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. —Nuquin Papabëd tabadec quenenendabi —quec yuec nuqui shubienquio iquendac. ⁷Nuqui cudasquid yec çatotsi quiash Nuquin Papa: —Padi. Chën. Esus tantiaquido natiamenda —queboedi adenquio icted-ictedpec? Matsu nacnenquidën: —Ma tsasinu —quequin ambi nacnenaid tauiec. Adembidi Esus tantiaquid chieshtoenuio icquid icmete Nuquin Papa comapenec bunec. Matsu nacnenquidën: —çBëdambo icquidida neque? Isnu —quetanquin matsu tauiec. Adembidi: —çEsus tantiaquidquibida neque? Isnu —quequin: —Natiamenda —cainquio iquec Nuquin Papan. Aden natiamiaqui chieshtoenuio icquid icsho Esuquidistun padpidec choshon: —Mibi bëdambo iquec. Ëbëdi tabadec cho —quequin utsibo tantiamequin chuishun abi yacno buanendac.

⁸Aden mimbi isacmaidi Esus mimbi tantiaquiec. —Nëbi isadenquo icquidi Nuquin Papan Madombo Esus ëbi bednuec choendac —quec mibi cuishonquianec. ⁹—Abi tantiasho icsano nidmenquo icquin Esusën abi yacno ëbi yuedendac —quec Esus tantiec mibi cuishonquianec.

Esus chote tsusedpabon chiampid

¹⁰Ëndenquimboshë Nuquin Papan tantiamiac isadaidbo tsusedpabon Nuquin Papan chiaid chuiquidon Esusën matses cuidmenquo icte dada uapampic. Esusën nate abitedi tantienquo icquin daëdpactsëc tantiaquin: —¿Mitsipadquid Nuquin Papan chomepeba? —queded-quededquin chuiampic nuquin tsusedpabo isadaidbon. ¹¹Aidobëd icquin Esuquidistun Mayanën tantiamiac Esus chote abentse-abentsen chuiampic. —Matsesën chieshënquin cuesten dectanac matses cuidmenquo icnuec abided cuidadec unësendac. Adec unësacsho uincuemiapadpidec abitedishun Icbo icoaindac —quequin Esus chote chuiampic. —¿Tsutsi chopec? ¿Tedectsi yash chopec? —quequin abitedi tantiatiaquido icquimbi daëdpactsëc isadaidbo tsusedpabon tantiapampic. ¹²Naden Nuquin Papan tantiamiapampic. —Mibi nibëdanan ëmbi chuiboed ëmbi matsesmiacsho utsibon isendac —quequin tantiamiac Esusën nate chuiampic. Aden chiampicpadomboen Esusën naondash. Nuquin Papan Mayanën tantiacpadomboen aid chuibenequidon aidën naid mibi chiac caondash. Aden Esusën naid Nuquin Papan abi yacnoshon uaido mayan bëdabontsen tantiatiaquido icquimbi abitedi tantienquo iquec.

Bëdamboec tabadte tantiamiaid

¹³Ëmbi chuiboed Esus tantiaquido icquin paposhquiacbimboen Esusuidi tantianuna. Nuqui icsate bunacpadec icsainquo yec bëdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ënenquo icquin. ¹⁴Ambi: —Con mado nec. Con champi nec —caido icquin Nuquin Papan chiacpadomboen nanuna. Ënden Nuquin Papan chiaid tantiabi mibi bunaid naic mibi icsanëdacpadec icsainda. ¹⁵Mibi Esus tantiamequid icsaisambo Nuquin Papa neque. Ambi chiaid niaquenquo yec bëdamboec tabadnuna. ¹⁶Nuquin Papan ambi chiaid naden dada uamepampic. “Nuquin Papa icsaisambo nec,’ quiash icsaisa ictiadquido yec bëdamboec tabad,” quequin Nuquin Papan ambi chiaid dada uamepampicpadec bëdamboec tabadnuna.

¹⁷Papa quequin nuqui chianeboed Nuquin Papa matsesën naidtedi chuiquid nendac. —Nëid ëbi tantiesa neque. Icsano nidmenu. Nëid ëbi tantiaquid neque. Èbëdi tabadmenu —quequin matses abitedi chiendac. —Abëdi tabadmenquo icnushe —quiash Nuquin Papabëd icte bunec bëdamboec tabadnuna. ¹⁸Nuquin tsusedpabon chiaiduidi naquin Nuquin Papa tantienquo nuqui icpondac. Aden Satanasën yuaido icsho Nuquin Papan nuqui bëdamboen istiapimbo icpanëdash. Adshun Satanas nuqui bedshunuen ¿piucquidida Nuquin Papan menepanëdash? Padenquo. Adquid icsabudtequid menenquo icquin ¹⁹aton Mado Esus icsaisambo icsho matsesmepanëdash. Aden matsesmiacsho chieshëmënquidën cuesten dectanac Esus aton intac chididiquec abided cuidadec unëspondash. Nëbi aton Mado Esus tantiaquido bëdamboen isquin Nuquin Papan Satanas bedshunec. Aden Nuquin Papan bedshunaid yec bëdamboec tabadnuna. ²⁰Ëndenquimboshë abitedi uabi Nuquin Papa nadpampic. —Ëmbi tantiacpadën yuecash matsesash matses cuidmenquo icnuec

mibided cuidadec unësta, Mado —quepampic. Aden ambi chiampicpadomboen badedquo namenquo icboedëmbi nëbi nameshun Esus tantiasho mibi bëdamboen isec. ²¹ Abi tantiasho Esusëmbi Nuquin Papatsen nuqui tantiamec. Adoac nuqui naden tantiec. —Esus unësacsho uincuemeshun abëdi tabadmequin abitedishun Icbombo Nuquin Papan icmeoapanëdash. Ambi chiacpadomboen naquidquo Nuquin Papa nec. Èbi unësacsho uincuemeshun abi yacno ëbi tabadmendac —quequin Nuquin Papatsen nuqui tantiec.

Esus tantiaquido tantiananquiote chiaid

²² Nuquin Papan chiacpadomboen naic bëdambo yanshun mibëdtan Esus tantiaquido utsibo mimbi tantiec. Adecbidi muenquo yec tantiananquionona. ²³ Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibëdantiapimbo icquid icnuc ambi chiaid bënudtiapimbo iquec. Aidën chiaid tantiashun mimbi Esus tantiabempanëdac. ²⁴ Ambi chiaid bënudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unësquid matses nec.

Cuëte bacuëec bëdamboshë isadboedi badedquo chodquequid nec. Adecbidi matses: ‘Con nabëdi bëdamboshë iquebi,’ queboedi badedquo unësquid nec.

²⁵ Nuquin Papain nibëdantiapimbo icquid nec. Adnuc ambi chiaid bënudtiapimbo iquec,”

quequin abimbo chuipampic. Aidën chiaidquo mibi chiac caondash.

Nuquin Papan chiaid iste bunquionona, quiaid

2 Aden Nuquin Papan chiaid tantiash chieshëmë nec tabadenda. Utsi muauainda. —Esus tantiaquid nebi —quiashi icsamboec tabadenda. Utsin na isash: —Adquid con na nibëdec —quec chieshëmë nec tabadenda. Utsibo chieshënec icsamboec onquenda. ² Adenquo yec Nuquin Papan chiaid iste bunquionona. Tishac chucactsëc bacuëmpi shuma chishte bunquiacbimboec Nuquin Papan chiaid iste bunquionona. —Bëdiactsëc tantiaboedi aid isban-isbanquin Nuquin Papan chiacpadomboen natiadquo yantsiabi —qeshun Nuquin Papan chiaid isbanuna. ³ —Esus tantiec bëdambo iquebi —qeshun Nuquin Papan chiaid isbanuna.

Buintadbimboecquid Esus nec, quiaid

⁴ Nuqui tantiaid nadquo iquec. Shubu uanun buintadquo nacnitsinuen istuidshun: —Nëid bëdambo iqueque. Nëidquo naimbi —quiacbimboen Nuquin Papan: —Èmbi tantiaidquo yec mibi bëdambo iqueque. Èmbi chiacpadomboen mibi namenu —capanëdash Esus. Adoaidi matses dadpeshunquo Esus chieshë nondash. Padnuen nuqui: —Nuquin Papa yacno puduedmianquid bëdambo iquec —quequin nuqui Esus tantiabempondac. ⁵ Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantiam, Papa —quequin Nuquin Papa chianequid nuqui yanec. —Nuquin Papa bëdamboshë iqueque. Ambi chiacpadomboenuidi natiadquo iquebi —quec bëdamboec tabadquidtsen nuqui yanec. Adsho isash: —Bëdambo iquec —quependac Nuquin Papa nuqui caic. ⁶ Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquio shubu uanun nitsinemi,’
quiacbimboen

Edusaden yacno ēbi bēdamboen ismequidquio isadaidbobēd tabadmendambi.

Aid caic: ‘Nēid tantiasho Nuquin Papan abi yacno nuqui tabadmendac,’ quequin abi
tantiaquido unēsacsho ēbi yacno tabadmendambi,”

quequin Nuquin Papan ambi chiaid dada uamepampic. ⁷ Aid tantiec: —Bēdamboshē
iquec —quependac Esus tantiaquido. Utsibombien Esus chieshēnec. Ēndenquimbo
Esus choabi icnuc aidēn nate chuiquin Nuquin Papan dada uamepampic naden.

“Buintad bēdambo icquid istuidashi: ‘Nēidquio shubu uanun nitsinemi,’ queti-
adquidi isuidacimboen Nuquin Papan namiaid chieshēnac.

Aden buintad isuidaidd utsin bedshun shubu uanun nitsinacimboen Nuquin Papan
tantiamiacpadomboen utsibon ambi namiaid tantiosh,”

quequin Nuquin Papan dada uamepampic. ⁸ Adshumbic Esus chieshētetsen dada
uamepampic naden chuiquin.

“Nuquin Papan abipadquidquio Edusaden yacno isadaidbobēd tabadmiascho am-
bocquidon chieshēnendac.

Aid chieshēnquid nadquio iquendac. ‘Cuēte mabud iquec,’ quequin tantienquio yec
nidec tocoshquetanec uebudacimboec

ēbi bēdamboen ismequid tantienquio yec unēsash icsano nidendac,”

quequin Nuquin Papan ambi chiaid dada uamepampic. Aden Nuquin Papan chi-
aid tantiatiapimbo icquin Esustsen tantiatiapimbo iquec. —Adquid icsano nidmen-
dambi —quequin Nuquin Papan tantiacpadec Esus tantiesabo yec unēsash icsano
nidendac.

Nuquin Papan matses nuqui nec, quequin chiaid

⁹ Esus tantiesabo dadpen icnubi Nuquin Papan Esus tantiamiaido nuqui nec. Ic-
sambo iccondaidi nuqui Esus tantiamepondash paposhquiacimboecnuc. Adoac:
—Nuquin Papa bēdamboshē iquec. Ambi chiacpadomboenuidi natiadquio iquebi
—quec bēdamboec tabadquid nuqui yanec. Adembidi: —Con matses Esus tanti-
ameta, Papa —quequin Nuquin Papa chianequid nuqui nendac. Adecbidi: —Nuquin
Papa bēdambo iquec —quequin utsibo chuibanquid nuqui nendac. ¹⁰ Ēnden abi
tantiesabo icsho Nuquin Papan mibi bēdamboen istiapimbo icquin: —Con matses
mibi nec —mibi catiapimbo icpanēdash. Nēbi Esus tantiasho Nuquin Papan mibi
bēdamboen isquin: —Con matses mibi nec —mibi caindac.

Bēdamboec tabadte chiaid

¹¹ Ēmbi tantiaido mibi neque. Tantia. Mibi chuinu. —Nuquin Papa yacno
tabadendabi —quiash Esus tantiesa icsate bunacpadec icsainda. —Esus tantienquio
yamane —quiash bēdamboec tabadta. ¹² Esus tantiesabobēdi bēdamboec tabad-
nuna. —Ma aidontsen Esus tantianu —quiash adnuna. Adec mibi bēdamboec tabad-
sho isun mibi chieshēnquin icsamboen chuishumboedombi Esus tantiabenshun
Nuquin Papa naden chiendac. —Mimbi namiaido bēdamboec tabadsho isun Esus
tantiabenombi. Mibi bēdambo iquec, Papa —quendac.

¹³ Bēdamboec tabadnuna. —Con Icbo Esus matsesēn chieshēnushe —queshun
matses chuiquid dapatedishun chiacpadomboen nanuna. Nuquin nidaidēn
tabadquido abitedi chuiquid dapa pedesidente caidēn chiacpadomboen nanuna.

¹⁴Aidën: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidën chiacpadomboen nanuna. ¹⁵Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquio icquin icsamboen chuiboedombi ambi icsamboen chiaid ēntsiash.

¹⁶Satanasën yuaido icsho Esusën bedshunaid yec nēbi icsambo icquidën yuapenquio yec bēdamboec tabadnuna. Icsanuec: —Utsin yuapenquio yec ēbi bunaiduidi naimbi —quenda. Nuquin Papan yuambo yec bēdamboec tabadnuna. ¹⁷Matses abitedi bēdamboen isnuna. Esus tantiaquido icquin nuquibēditan Esus tantiaquido utsitedi tantiaquionona. Dacuēdampambo Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidën chiacpadomboen nabanuna.

Yuabo chiaid

¹⁸Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquio icnubi adembidi nata. ¹⁹Adec Nuquin Papa tantiaquid yec bēdambo icsho cuesaqui chieshēmēnenquio icsho: —Aid yua bēdambo iquec —quequin Nuquin Papan mibi bēdamboen istsiashe. Min icbon chiacpadomboen nata. ²⁰¿Icsamboec tabadquid cuesac chieshēmēnenquio icquidta Nuquin Papan: —Aid yua bēdambo iquec —capatsiash? Padenquio. Nuquin Papan chiacpadquiec bēdamboec tabadquidi cuesaqui chieshtoenquio icsho: —Aid yua bēdambo iquec —Nuquin Papan catsiashe. Bēdambo icta.

Chieshtoenquio yec Esus unēsaid

²¹—Chieshēnaqui chieshtotiadquio iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquio icnu —queshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquio icnuec abided cuidadec mēyadec unēspondash. ²²Nuquin Papan dada uamepampicpadquio “muesambo yec icsaisambo icpondash.” ²³Adquid icsho abi chieshēnquidon mamēnshunaqui Esusën chushcainquio icpondash. Aidon matonbudnetanquin buanshun cuesten dectanac: —Mibitsen cuidendambi —cainquio icpondash. Adenquio yec nadpondash. —Nuquin Papan matsesën naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquio icpondash. ²⁴Adash: —Ēbi tantiaquid ma icsaid ucuadacimboec bēdamboec tabadnu —quiash nuqui icsaid bedshunec abided cuidadec unēspondash. Adec aton Madoded cuidadec unēsacsho isash nēish bēdanshun Nuquin Papan aton Mado tantiaquido bēdamboen isec. ²⁵Yuan icbo cuenēnacimboen Nuquin Icbo nuqui tantienquio icpondac. Adoboedi nēbi: —Con Icbon ēbi bēdamboen dayun uaqin ēbi bēdamboen namendac —queshun nuqui Esus tantieque. Bēdamboen nanuna.

Bēnēbēdta chido chiaid

3¹⁻²Tantia, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantiec ēbi bēdamboec tabadsho isun

Nuquin Papan chiaid tantienquo icboedëmbi con bënë Esus tantiabentsiash. “Mimbitsen Esus tantiabenta,” quequin ëmbi chiambobi Esus tantiabentsiash —qeshun min bënë chiacpadomboen nata. ³ Bëdamboec tabadquid ictiadquo icquin casëdu payuteuidi tantienda. Adembidi dashcute bëdambo icquid dasiuidteuidi tantienda. —“Bëdambo isadec. Mibi bëdambo iquec,” mabi canu —quiash nacnemëdteuidi tantienda. ⁴ —Bëdambo mibi iquec —camenuc bëdamboec tabadta. Nëishëmënenquo icquin bëdamboen nabanta. Chieshenquo icquin min bënë chiacpadomboen naquid icta. Mibi adquo icsho isash: —Mibi bëdambo iquec —quendac Nuquin Papa. ⁵ Èndenquimbo isadaidbo tsusedpan chido Nuquin Papa tantiaquid yec adquo icpampic. Aton bënë chiacpadomboen naic bëdambo icpampic. ⁶ —Con bënë con icbobimboec iquec —quequin aton bënë Abadauan caidën chiacpadomboen Sada caidën napampic. Esus tantiaquid icsho mamëshunaqui min bënë dacuëdënenquo icquin aidën chiacpadomboen naic bëdamboec tabadec Sadapadquo mibi ictsiac. Adquid bëdambo iquec. ⁷ Tantia. Bënëtsen chuinu. Abia uimabudquid icsho min chido bëdamboen ista. Mibëdtan Esus tantiaquid yec Nuquin Papa yacno mibëdi tabadtequid neque. Min chido bëdamboen ista. —Èbi bëdamboen ista, Papa —quequin mimbi chiaid Nuquin Papan tantienquo icnushe. Min chido bëdamboen ista.

Bëdamboec tabad, quequin chiaid

⁸ Nëbi Esus tantiaquido abitedi chuinu. Tantia. —Nuquin Papan chiacpadomboen nanuna —quiash bëdamboec isananuna. Cuishonquequidbëd cuishonquec shubiquidbëd shubinuna. Adec tantiananquionona. —Èmbi naiduidi naimbi —quenquo icquin utsibon chiaidtsen nanuna. ⁹ Mibi chieshënaqui cuidnanenda. Mibi chieshënquin icsamboen chuishunaqui cuidnanec icsamboec chuishunanenda. Adenquo icquin Nuquin Papa chianeta. —Èbi chieshënquid bëdamboen isquin bëdamboen tabadme, Papa —quequin Nuquin Papa chianeta. —Èmbi bëdamboen isaidon ma aton matses utsibo bëdamboen isnu —qeshun Nuquin Papan nuqui Esus tantiaquido icmiaye. Bëdamboec tabadnuna. ¹⁰ Adec bëdamboec tabadte chuiquin Nuquin Papan dada uamepampic naden.

“Bëdamboec tabadte bunquidën nadoendac.

Adonante bunenquo icquidëmbi utsibo muauainquo iquendac.

Chieshënquin utsibo icsamboen chienquo iquendac.

¹¹ Icsamboec tabadboedi bëdamboec tabadendac. Utsibo chieshënansho isash:

‘Padi. Chieshënanenda,’ quendac.

¹² Adec bëdamboec tabadsho Nuquin Papan bëdamboen isendac.

Aden bëdamboen isaidon: ‘Èmbi chuisho tantia. Èbi bëdamboen ista, Papa,’ quequin abi chuisho Nuquin Papan tantiendac.

Icsamboec tabadshoen bëdamboen istiapimbo iquendac,”

quequin Nuquin Papan dada uamepampic.

Cuesaqui dacuëdenda, quequin chiaid

¹³ Bëdamboec tabadshoda bëdambo icquidën badedquo mibi cuespatsiash? Padenquo ictsiash. ¹⁴ Bëdamboec tabadsho isun icsambo icquidën cuesacsho mibi Nuquin Papan bëdamboen istsiash. Mibi chieshënquido dacuëdënenenda. ¹⁵ Dacuëdënenquo icquin: —Con Icho Esuquidistu nec —quequin ambi chiacpadomboen na-

nuna. Aden mimbi Esus tantianuc utsibo: —¿Atotsieshun Esus tantie? —quesho: —“Abided cuidadec unësaid Esus tantiasho Nuquin Papan ëbi bëdamboen isquin unësacsho abi yacno ëbi tabadmendac,” qeshun Esus tantiambi —quequin Esus tantiesabo chuibanuna. ¹⁶ Aden nëishëmënenquo icquin Esusën naid chuibanuna. Aden bëdamboen chuinec Esus tantiaquiec bëdamboec tabadnuna. —Ëbi bëdamboec tabadsho isash ëbi chieshënquin muauaquid: “Bëdambo icquidi muauachitombi. Icsachitobi,” ma quenu —quiash bëdamboec tabadnuna. ¹⁷ —Ëbi tantiaquid utsibon chieshënendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshënendac. Bëdamboec tabadquid icsho utsibon chieshënaqui nuqui chieshtoenquo icsho isash: —Mibi bëdambo iquec —quetsiash Nuquin Papa nuqui caic. Icsambo icsho quënë nauedaidi nëishenquo icsho: —Mibi bëdambo iquec —cainquo ictsash Nuquin Papan.

Esus unësaid tantia, quiaid

¹⁸ Chieshënaqui Esusbimboec chieshtoenquo yec bëdamboec tabadnuna. Aid icsaisambo yequi nuqui icsaid bedshunec abided cuidadec unëspondash. Aden Nuquin Papa abi tantiaquido bëdamboen ismenuec abentsecquiobi unëspondash padpidec unësenquo icnuec. Aton dada unësambi aton tantiate unësabi icpanëdash. ¹⁹ Adec aton dada unësambi aton tantiate icnuc ëndenquimboshë Noe caidën mases abi tantiesabo icsho Nuquin Papan cuidquin unës uampido uidën uashun quënë sauedampicno Esus nidpanëdash. Ambo nidshun Nuquin Papan cuidpampido Esusën ambi naboed chuibampanëdash. ²⁰ Naden Nuquin Papan aido cuidquin unës uapampic. Ëndenquimboshë aton matsesbëd tabadec Noe bëdambo icnubi aton matses icsamboshë icpampic. Adnubien Nuquin Papan: —Matses icsaquido abitedi uesquin unës uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chuipampic. Adoac badedquo cano dapa nacnemëdenquo yacpadembi Nuquin Papan badedi cuidenquo icpampic: —Ma abi icsaid ënshun ëbi tantianu —qeshun. Adnubien cano dapa nacnentanec Noe chedo 8tedpactsëc cano dapa antabëdtopampic. Adnubien aido antabëdtoaid cano dapa acten bedtoac nuadtopampic. Utsiboen acte mabudadmiaidën mentoadbudnepampic. Noe abi tantiaquidquo icsho Nuquin Papan cuidenquo icpampic.

²¹ Adembidi Esus tantiasho nuqui cuidenquo iquec. —“Esus tantiaquid nebi,” quequin utsibo ismequin acten mentomembi —qeshun nuqui acten mentomec. ¿Bëchish ucquinda nuqui adodi? Padenquo. Nuquin Papa naden chuiquin: —Esus tantiaquin icsaid ucacimboen mimbi chiacpadomboen natiadquo iquebi, Papa —quequin nuqui adoec. Aden abi tantiasho Nuquin Papan uincuenëdaidën Esuquidistun nuqui cuidmenquo iquec. ²² Aidi uincuenash Nuquin Papa yacno nidash aibëdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bëdabo bëdamboen namequimbic Satanas aton yuabo mayan icsabobëdta Esusën cuidendac.

Bëdamboec tabadnuna, quiaid

4 Nuquin Papan tantiacpadomboen nasho utsibon chieshënquin mëyanaqui Esus chieshtoenquo icpondash. Adembidi chieshëmënenquidën chieshënaqui adecbidi chieshtoenda. Abided cuidadec unësaid Esus tantiaquin nuqui icsaid nuqui ënen-

dac. ²Aden nuqui tantiacpadomboen nainquio icquin Nuquin Papan chiacpadomboen natiadquio nuqui iquendac. ³Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bënë chudmequinc tantiadenuen acte paërmo icquid acquinc: —Nëid papa canu —quequin matsesbimboecnuc nacnenquinc mimbi capondac. Adec icsateuidi bunec mëmuntipimbo mibi icpondac. Adquid iccondaidi nëbi bëdamboec tabadta. ⁴Adec bëdamboec tabadsho isun mibëd icsaondaidën: —¿Atotsieshun nuqui naondacpadomboen nainquio ique? Mimbi Nuquin Papa caid nibëdec —quequin mibi icsamboen chuiquin mibi mamëshunendac. ⁵Aden mibi mamëshunquid Nuquin Papan cuidendac. Cuidnumbi matsesën naidtedi tantiaquid icquin Nuquin Papan: —¿Mitsipaden nao? ¿Ada bëdamboec tabado? —cac ënden unësaidobëdtan unësabi icquidotedishun ambi naidtedi uesquin chiendac. ⁶Aden abëdi tabadmete tantiaquin Nuquin Papan namiac Esus chuibenquidon chuibenepondash. Adoac Esus tantiaquido yanash Nuquin Papan Adan cuidquin unësquid icmiacpadec unësquid yec unësashic Nuquin Papabëd tabadendac padpidec unësenquio yec.

Utsibo nashununa, quiaid

⁷Tantia. Mibitedi chuinu. Nuquin Papan cuidte nëbi iqueque. Esus tantiec nuqui icsate bunaid ënash mëmunec bëdamboec tabadnuna. —Ma ëmbi abi chianesho Nuquin Papan bëdamboen tantianu —quiash adta. ⁸—Tantiananquido chieshënanec cuidnante bunenquio iquec —quiash ënëdenquio yec tantiananquionona. ⁹Nuquibëdtan Esus tantiaquido isedec chosho bëdamboen isnuna. Shubu utsinquido ënapenuësh chosho adembidi chieshënenquio icquin min shubun yued. ¹⁰Nuquin Papan tantiamiacpadomboen nuquibëdtan Esus tantiaquido nashuntiad. Esus tantiaquidquio icmenuen chieshenquio icquin nanuna. ¹¹¿Ada Nuquin Papan Esusën naid chuibanquid mibi icmiac? Adquid icquin Nuquin Papan chiaidquio chuibanquiota. ¿Ada Nuquin Papan mibëdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ëbi nashunquid bëdamboen namequid Nuquin Papa bëdamboshë iquec,” ma ëmbi nashunaido quenu —queshun utsibo nashununa. —Abitedishun icbombo yec Nuquin Papa bëdamboshë iquec —canuna ënenquio icquin.

Chieshënaqui chieshtoenquio icte chiaid

¹²Ëmbi tantiaido mibi neque. Tantia. —¿Atotsieshun matsesën ëbi chieshëmpeba? —¿quecta ique? ¿Mibentsëquida chieshëndic? Ma Esus tantiaquido dadpenquio chieshëmpayoc. ¹³—Chieshënquin Esuquidistu comapenen mëyanacbimboen Esus tantiesabon ëbitsen mëyanosh. Esus tantiaquid icshoeni adochitosh —quiash Esus tantiec bëdambo icnuna. —Utsibon chieshënaidi abi tantiaquid ambi namiacno buanuec Nuquin Icho Esus choec —quiash abi chote ushën cuishonquenush adnuna. ¹⁴—Esuquidistu tantiaquid nec —queshun chieshëmënkuidon natiamiaid mibi bëdambo iquendac. Nuquin Papan Mayan mibëd tabadquin Nuquin Papa yacno tabadte mibi tantiamequin mibi bëdambo icmendac. ¹⁵Utsibo icsasho abi chuiquidën natiamequin cuidquid. Cuesunianquid yec ampequid yec chieshëmënkuidon icsamboen chuishunquid yec quec icsasho chuiquidën cuidsho isun: —Bëdambo iquec —catsiambi. Adec icsainda. ¹⁶Esus tantiaquid icsho utsibon chieshënac dacuë-

denda. Adec dacuëdenquoio icquin: —Nuquin Papa bédamboshë iquec. Aton Mado Esus tantiaquid icmiac bédambo iquebi —quequin ènenquoio icquin Esus tantianuna. ¹⁷ —Nuquin Papan cuidte ushë nèbi icnuc ambi con matses caido Esus tantiaquido chieshëmënkuidon natiamendac —quiacpaden nèbi tauaquin mibi natiamec. Adsho isun: —Chieshëmënkuidën chieshënac ëmbi tantiacpadomboen abi icsaid èntsiash —qeshun Nuquin Papan: —Natiamenda —cainquoio iquec. Aden abi tantiaquido icsaid èmete bunquin nashun ¿bèdiactsëcta abi tantiesabo cuidpec? ¹⁸ Naden chuiquin Nuquin Papan dada uamepampic. “Aden chieshëndenic natiambo yananequi unësash Nuquin Papabëd abi tantiaquido tabadendac. Nuqui adnuc ¿bèdiactsëcta ambi chiaid niac-niacquido Nuquin Papan cuidpec? Padenquoio. Comape-nen cuidendac,” quequin dada uamepampic. ¹⁹ Nuquin Papan tantiacpadec mëyadec Esus tantiaquid ma nadpanuna. —Èbi uaquidën Nuquin Papan ambi chiacpadomboen èbi bédamboen namec. Aid tantiec bédambo iquebi —quiash ma bédamboec tabadpanuna.

Esus tantiaquido chuibanquid Petedon chiaid

5 Tanta. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paëmboshë icmequin Esuquidistu unës uasho isondambi. Aidën padpidec nidaidën choshon abi yacno buanuen nuqui beduaneque. Tanta. ² Icho yua cudasacimboec mibëd icquido Esus tantiaquido cudasta. —Esus tantienquoio yanushe —qeshun: —Nuquin Papan chiaid niaquenquoio yec bédamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquoio icquimbi naimbi —quenquoio icquin: —Aden Esus tantiaquido nashumbantsiambi —quec Esus tantiaquido chuibanquidquid icta. —Piucquid dadpen bednun nanu —quenquoio icquin Nuquin Papan chiacpadomboen natiadquoio yec Esus tantiaquido chuibanquid icta. ³ —Nëidtedi Esus tantiaquido bédamboen name —caidtedi bédamboen isequi chushcanenda. Adenquoio yec: —Èbi yacpadece ma tabadnu —quec bédamboec tabad. ⁴ Aden Esus tantiaquido chuibanquidën bédamboen namesho isun Nuquin Icbon nidaidën padpidec choshon utsibo ismequin: —Nëid bédambo icquid nec —qeshun chuibanquid ambi namiaidobëdta abi yacno buanendac.

Esus tantiaquidon nate utsi chiaid

⁵ Tanta, caniabo. Mibitsen chuinu. Mibi chuiquid dapabon chiaid niaquenquoio icquin aidën chiacpadomboen nata. Aidtedtsëqui caniabo chuishumbic mibi yacnocquidotedi chuinu. —Èbiuidtsëqui bédambo iquebi. Èmbimbo naiduidi naimbi —quenquoio icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic.

“Nuquin Papa tantienquoio icquin aton matses utsibo tantienquoio icquin ambi naiduidtsëqui nasho: ‘Adquid icsambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bédamboen isquin bédambo icmec,”

quequin Nuquin Papan ambi chiaid dada uamepampic. ⁶ Aden Nuquin Papan chiacpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshënaqui chieshtoenquoio icnuna. Adec chieshtoenquoio icsho ambi tantiacpadën utsibo ismequin: —Èbi tantiaquidquid mibi neque. Èbëdi tabadec

cho —nuqui caindac Nuquin Papan. ⁷ Aidën nuqui tantieque. —¿Atotsimbi pepeba? ¿Ëbida cuespeba? ¿Con matsesta unëspeba? —quequin nuqui dacuëdaidtedi Nuquin Papa chuinuna.

⁸ Nuqui icsate bunacpadec icsainquio icquin Esusuidi tantianuna. Esus tantiaquido icsho Satanasën nuqui chieshënquieq. Esus bedshunuen nuqui icsametiadquido icquin bëdin nëish nibënacnimboen ambi icsametequid Satanasën ënenquio icquin nibëm-beneque. ⁹ Ista. Icsamenda. Chieshtomenda. —Satanasën icsamechitoshe —qeshun Nuquin Papan chiaid niac-niaquenquio icquin Esus tantiaquionona. —Ëbi chieshë-nacpadomboen Esus tantiaquid utsibo nidaid utsi-utsieq yacno tabadquido utsibon chieshënac caosh —qeshun chieshtoenquio icquin Esus tantianuna. ¹⁰ Aden utsibon chieshënaido yec yuec-yuecpectsëc nuqui tabadec. Adshobien abi yacno buanquin nuqui bëdambo icmequidën Nuquin Papan Satanas nuqui icsa uamenquio iquendac. Adembidi Nuquin Papan nuqui bëdamboen isquid icquin dayacquio yacnimboecnuc chieshtoenquio icquid nuqui icmendac. ¹¹ Ëmbi aden chuisho tantiashun: —Mibi bë-damboshë iquec, Papa. Mimbi tantiacpadomboen abitedi mimbi namendac. Abitedishun Icbombo mibi nec, Papa —Nuquin Papa canuna ënenquio icquin.

Petedon ënquimbi chiaid.

¹² Esus tantiaquidquido Sidas caid nëidtedtsëqui ëmbi dada uaboed mibi yacno buamembi. —Esusquio isondambi. Aid tantiasho Nuquin Papan matses bëdamboen isbenendac —quequin abimbo mibi chiombique. Chieshtoenquio icquin Esus tantianuna. ¹³ Nuquin Papan tantiamiac nuquibëdtan Esus tantiaquido ëmbi Babidonia caid yacnocquidon: —Aido unësquio iquec —mibi caosh. Babidonia caidbidi Doma caic. Con madobimboecquid Madcosën —Aido unësquio iquec —mibi caosh. ¹⁴ —Ëbëdtan Esus tantiaquido nec —quiash: —Mibi unësquio iquec —cananuna. —Ma Nuquin Papan mibi Esus tantiaquidotedi bëdambo icmepanu —quequin Nuquin Papa chianembi. Padi. Aidtedi chuiquin dada uaombi.

PETEDON DADA UAID 2

Tauamboen chiaid

1 Petedo Simon caid nebi. Abéd icquid yec aton yuambo icsho Esuquidistun: — Ęmbi naid chuibeneta —caidquio nebi. Ębédtan Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bédamboen isaido nuqui nec. ² Ębédtan Esus tantiaquido icsho mibi tantiaquin Nuquin Papa chianembi naden. —Aidon Esus tantiatsécsho mibédta Esus tantiamequin bédambo icme, Papa. Aido bédamboen isquiota, Papa —quequin Nuquin Papa chianembi.

Nuquin Papan bédambo icmete chiaid

³ Comapenen tantiaquid icquin Nuquin Papan namiac aidén chiaid niac-niacte bunenquio yec Esus tantiaquido bédamboec tabadec unésash Nuquin Papa yacno tabadendac. Abipadquid utsi nibédnuc bédamboshė icquid icquin Nuquin Papan Esus tantiamiaido nuqui nec. ⁴ Abipadquidquio Esusėn chiondacpadomboen abi tantiaquidobédta Nuquin Papan aton Mayan tabadmequin bédambo icmec. Aden abipadquio icnuc bédambo icmiac icsate bunenquio yanec nuqui bédamboec tabadec. Utsibo icsateuidi bunec icsaquionobi nuqui bédamboec tabadendac.

⁵ Aden Nuquin Papan Esus tantiamiaido yec dayacquio yacbimboec Ęnėdenquio yec bédamboec tabadnuna. Adecbidi Nuquin Papan chiaidquio tantiec tabadnuna. ⁶ Aden Nuquin Papan chiaidquio tantiec nuqui icsate bunacpadec icsainquio icquin mėmununa. Aden mėmunquid yec nuqui chieshėnquidbėdi chieshėnanenquio yec chieshtoenquio icquin Esus tantianuna. Nuquin Papatsen tantiec bédamboec tabadnuna. ⁷ Aden Nuquin Papabėdta Esus tantiaquido yec nashunanquionona. Adec nashunanquioquin Esus tantiesabo tantianuna. ⁸ Ęmbi chui-boedtedi nabanquin chieshtoenquio icquin adenuidi nanuna. Aden naquin Esus bėdiactsėc tantiatsėcboedėmbi chieshtoenquio icquin nuqui Esus tantiaquiotsiac. ⁹ Ęmbi chuibocpadomboen naisa pamumėdacbimboec iquec. Adquidon: —Aton Mado Esus tantiasho icsaid ucuacpacbimboecnuc Nuquin Papan nuqui bédamboen isec —queboedombi bėpiscudquin tantienquio yanec.

¹⁰ Ębédtan Esus tantiaquido mibi neque. Tantia. Mibitedi chuinu. Ęmbi aden chuisho tantiash chieshtoenquio icquin Esus tantiec bédamboec tabadnuna. Adec tabadquin naden nuqui tantiendac. —Ęndenquimboshė Ębi tishabi icnuc Ębi caic: “Esus tantiamendambi,” quequin ambi chiampicpadomboen Nuquin Papan nėbi tantiamiac Esus tantiabenombi —quequin nuqui tantiendac. Aden tantiec Esus tantienquio icquid nuqui yanenquio ictsiac. ¹¹ Adec bédamboec tabadash unėsacsho: —Ębi tantiaquid mibi neque. Ębėdi tabadec cho —queshun ambi namiacno abėdi tabadmequin Nuquin Icho Esuquidistun nuqui bédambo icmendac padpidec unėsenquio icnuc. ¹² Ęmbi aden chui-boedtedi mimbi tantiondac. Aden tantiabosh Esus tantiec mibi bédamboec tabadcuendonac. Aden mimbi tantiondaidi mibi chuided-chuidedendambi. ¹³ —Nėbi unėsendabi —queboedi Ębi unėsabi yacpadembi mibi chuided-chuidedendambi. ¹⁴ —Adėnquio mibi unėsendac —quequin Nuquin Icho

Esuquidistun chiacpadën nēbi unēsebi. ¹⁵—Ĕbi unēsan ěmbi chiondaid ma bēpiscu-
denquo icnu —queshun mibi chuiquin dada uanu.

Nuquin Papan Esus chiaid

¹⁶ ¿Muaquindambi mibi Esus chuidionda? Padenquo. —Nadatiambo icquin na-
banquin Esusën ismedenepondash. Adquid yec abuc nidnush: “Padpidec nidaidën
choindabi,” quepondash Esus —¿quectabi muadionda? Padenquo. Ĕmbimbo
isondaidquo mambi mibi chiondac. —Nēid con Madombo nec —quequin Nuquin
Papan ismiac Esus isondambi. ¹⁷⁻¹⁸ Nadquo iccondash. Macuësh dapan dectatoash
Esus bēchamuanquiec iccondash. Adnubien Nuquin Papan: —Con Madombo nec.
Ĕmbi tantiaidquo yec bēdambohē iquec. Nēid isec bēdambo iquebi —quequin
abucshun dacuēdampamboecnuc chuipondash.

¹⁹ ¿Ĕmbentsēquidambi Esus chuibanquin nape? Padenquo. Ĕndenquimboshē
Esus chote tantiamequin Nuquin Papan isadaidbo tsusedpabo dada uamepampic.
Pacuēnēdacimboen utsibon tantienquo icnubi paposhquiacimboecnuc Esus chote
tantiamenuen dada uamepampic. Aden Nuquin Papan chiaid isec onquequin bē-
damboen tantianuna: —Muaquidon chuisho tantiamane —queshun. —Abitedishun
Icbotombo nebi —quequin ismenuec padpidec Esus choabi yacpadembi Nuquin Papan
chiaid bēdamboen tantianuna. ²⁰ —Nuquin Papan nadoendac —quequin ¿ambembi
chiaidta nuquin tsusedpabon dada uapampic? Padenquo. ²¹ Ambembi chiaid dada
uainquo icquin Nuquin Papan chiaidquo dada uapampic. Nuquin Papan Mayanën
tantiamiac abimbo chuiampic.

Muaquido iquendac, quequin chiaid

2 Nuquin Papan chiaidquo isadaidbo tsusedpabon chuinubien utsibo: —Nuquin
Papan nadoendac —quec muapampic. Nēbi adquidbidi iquendac. Mibi yacno
puduedash ambembi chiaid chiec muasho tantiaishun: —Mibi muequi nec —
badedquo cainquo mimbi iquendac. —Abided cuidadec unēsaid Esus tantiaquid
nebi —queboedi: —Esusën chiacpadomboen natiapimbo iquebi. Adshobi Nuquin
Papan ěbi cuidenquo ictsiash —quequin muaquin chiendac. Adquid Nuquin Papan
icsambo icquido cuidacno nidmequin cuidendac. ² Aden muaquidën chuisho tan-
tiaishun Esus tantiauidtsēcboedombi dadpenshun aidën chiaid tantiendac. Adashic
Nuquin Papan chiaid niac-niaquec muaquido tabadacimboec padpidec icsamboec
tabadoaindac. Adsho isun: —Esus tantiaquidobi icsambo iqueque. Is —caindac ut-
sibon. ³ Muaquido tantienda. Aidon piucquid comapenec bunquin ambembi chi-
aidquo mibi chiec. ¿Muasho tantienquioda Nuquin Papan icpec? ¿Ada Nuquin
Papa ushpec? Muasho tantiaishun aido cuidendac. —Adquid icsano nidmequin
cuidendambi —quequin ambi ěndenquimboshē tantiapampicpadomboen comape-
nen Nuquin Papan cuidendac.

⁴ Ambi chiaid niac-niacsho icsano nidmequin cuidquid Nuquin Papa nendac. Ĕn-
denquimboshē nidaid uabi icnuc ambi abi yacnoshon uaido mayan utsin-utsinquien:
—Ĕmbiquen abitedi namenu —quequin ambi chiaid niac-niacsho isun Nuquin
Papan icsamboshē yacno nidmequin cuidpampic. —Chian anēdēnquiacno nēse-
canumbi nabono —queshun aden tauamboen Satanas chedo cuidpampic. ⁵ Ad-
shumbic yuecquo ictanquin matses abitedishun ambi chiaid niac-niacsho isun
nidaid abichobi mabudadmequin Nuquin Papan matses uesquin unēs uapampic.

Noeuidtsëqui padambo icpampic. —Bëdamboec tabadnuna —quequin Nuquin Papan chiaid chuibanquid icsho Noe chedo 8tedpactsëc Nuquin Papan cuidenquio icpampic. ⁶ Adshumbic yuecquio ictanquin matses utsibon Nuquin Papan chiaid niac-niacsho cuidquin nêdëncapampic. Shubu dadpen icquid nêid daëd icpampic. Nêidic Sodoma caid. Nêidic Comoda caid. Ambo tabadquido aton shububêdi abucuësh taboadampamboec paëdquidën pichiquepampic matses nibêdquio yec. —Aden isambo icquido cuidquid nebi —quequin Nuquin Papan adopampic. ⁷⁻⁸ Sodoma caid yacnocquid abentsëqui Dod caid pichiquenquio icnuc Nuquin Papan cuemepampic. Bëdambo icquid yec: —Nuquin Papan chiaid niac-niaquec nêmo icquido icsamboecuidi tabadec —quec shubiec tsadsho cuemetsaidi pichiquiambo ictsampic. ⁹ Aden abi tantiaquido daëd Noebêdta Dod Nuquin Papan cuidambo icpampic. Adembidi nêbi abi tantiaquido cuidenquio icquid Nuquin Papa nendac. Utsibon chieshënaidi abi tantiaquido bëdambo icmequid nendac. Icsambo icquido cuidquid icquimbi matses cuidte ushë choabi icnuc nêbi tauaquin icsambo icquido Nuquin Papan cuidendac.

¹⁰ Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shëcuë nibêdacbimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsëqui bunebi —qeshun ambi naiduidtsëqui naic. Dacuëdtiadquidi dacuëdenquio icquin Esus tantiaquido chuiquid dapa caic: —¿Bëdamboen namequidta nedic? —quequin icsamboen chuishunec. ¹¹ Padnuen Nuquin Papan abi yacnoshon uaido mayan bëdabon adec muaquido chuishuntiapimbo iquec. Muaquido bëdiactsëc tantiaquido icnubi comapenen tantiaquido icquin mayan bëdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsëqui tantiaquid Nuquin Papa nec —qeshun adoenuio iquec. ¹² Padnuen ëmbi chui-boedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bëdi cuid-nushe quepadic? Padenquio. Adembidi abi cuidte tantienquio icsho Nuquin Papan cuidendac.

¹³ Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquiec inchëshën icsash badiadënsen icsaic: —Bëdambo iquebi —quec adquido cuishonquec. Esus tantiaquin penuec mibi chochoacno mibêd tabadec muaquidotsen chopac caosh. —Esus tantiaquidbidi nebi —quiash mibêd tabadec aid icsasho isash: —Esus tantiaquid abitedi icsaic —quependac utsibo. ¹⁴ Muaquido utsin chido mëismec tabadec. Nuquin Papan chiaid niac-niaquec icsaic ënëdenquio iquec. Adquid icquin Esus tantiatsëcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. ¹⁵ Nuquin Papan chiaid niac-niaquec icsateuidi bunquiec. Èndenquimboshë matses utsi Beyod caidën mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic. ¹⁶ Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquio muaquido iquec. Piucquid comapenec bunec Nuquin Papan chiaid niactiadquio iquec.

¹⁷ —Mibi bëdambo icmete chuinu —quequin muaquidon chuisho tantiash: —Ai, mimbi chiacpadte bunebi —queuidtsiash matses. Uispa dadpen icboedi badi-

adnuc abu chëshën bêtinacsho isash: —Tanunquien badiadec —queuidac bimboec: —Ambi chiacpadquo bédambo icnu —queuidtsiash matses. Adec muasho tantiash: —Adquid chian anédênquiacno nêsecaindambi —quendac Nuquin Papa. ¹⁸ Adec muaquido abembi onqueuidequi onquec. Utsin chiaid tantienquo icquin ambi tantiauidi chiec naden. —Mibi bunacpadec mibitsen icsata —cac Esus tantiatsêcquin Nuquin Papan chiaid nauidsêcquimbi abi icsaid ênuidboedi padpidemboec icsaquiec. ¹⁹ Muaquidon: —Nuqui bunaiduidi nanuna. Adec nuqui bédambo ictsiac —quequin chuibanec. Adboedi abi icsaid ambembi êntiapimbo yec icsamboshê iquec. Adec icsamianquidên chiacpadomboen naic matses icsaquad nendac. Adecbidi ambi naiduidi naic icsaquad matses nendac. ²⁰ Nuqui cuidmenquo icquid Esuquidistu tantiatsêcquin abi icsaid ênuidboedi padpiden Nuquin Papan chiaid niac-niaquec icsamboshê muaquido yanec. ²¹ Ênden Esus chiondac: —Ai, aid tantiembi —quetsêccondaidi aden Esus tantienquo yanec icsamboshê yansho isun: —“Esus tantiembi,” quenquo icpatecnêdan —caimbi. ²² Adquid chuipanêdash naden. —Ambi ucbudaid opan chequid. Opa nesmiaqui nidaidên nocoshquec padpidec bêchishoaquid —quepanêdash. Adecbidi Esus tantiauidtsêcquido icsaid ênuidboedi muaquid padpidemboec icsadenechitequien iquec.

—Esus chote chiaid

3 Tantia. Êmbi tantiaido mibi neque. —Pabiate cuembo icquin Nuquin Papan chiaid tantiaquiec bédamboec tabad —quequin mibi chuiquin dada uaondambi. Adomboembidi mibi chuiquin nêid dada uanu. ² Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquo icquidên Nuquin Icho Esusên chuibanondash. Aidên chiondaid abêd ictened utsin mibi chuinêdash. Aden chiaid tantiata. Aidbidi chuinu. ³ Esus nidaidên padpidec choabi icnuc Esus tantiesabon abi icsate bunaiduidi naquin Esus mamênshunendac. ⁴ —“Utsi uanuec padpidec nidaidên choaindabi,” ¿quenêdaidta chopec? Ma choenquo icpayoc. “Nêbi Esus choec,” quedenedi con mêdimbo abitedi unêsbudniac. Esus choambobi —quependac Esus tantiesabo. Nadembidi chiendac. —Taêec nidaid yanubi matses nidaidên tabadpampic. Adecbidi aton tsyuecquido tabadpampic. Nêbi adecbidi matses nidaidên tabadec. Êbi nibêdnuc adiquendac. Utsi uanuec Esus choenquo iquec —quependac Esus tantiesabo. ⁵ ¿Abimboda capec? Aden chuiquin Nuquin Papan chiaid tantienquo iquec. Êndenquimboshê ambi uaidtedi nibêdnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid nênantan yampampic. Aden Nuquin Papan abitedi uapampic. ⁶ Aden abitedi uambic yuecquico ictaniash matses icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unês uapampic. ⁷ Aden ambi chiacpadomboen Nuquin Papan naindac. Ambi icsambo icquido cuidte ushên abu nidaidbêdda nêdêncaindac. Adembidi matses Esus tantiesabo cuidendac.

⁸ Êmbi aden chiac: —¿Tedectsiash Esus chopeba? —¿quecta ique? Tantia. Mibi chuinu. Ambi tantiacpadêmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsêcbimboecquid nec. Adecbidi seta abentsêqui icquidquo iquequi dadpen seta icquidbimboecquid nec —quequin Nuquin Papan tantiec. ⁹ —Êdenquo: “Padpidec choendabi,” quenêdaidi Nuquin Icho Esus choenquien icchitec —quenubien Nuquin Papan: —Chiata. Cuidte bunen-

quio iquebique. Utsibontsen Esus tantiasun ëmbi chiaid niac-niacboedi ënushe. Isbono. Ënacsho icsamboshë yacno nidmenquio ictsiambi —queshun Nuquin Papan Esus chomiabi iquec.

¹⁰ Adnubien matses: —Nëbi choec —quenquio icnuc Esus badedquio choendac. —¿Nëid ushëmbi ampequidën con na ampec —quequinda tantiapec? Padenquio. Adembidi: —Nëbi choec —quequin tantienquio icnubi Esus choendac. Choshon acquimboen toncac abitedi nibëdanendac. Uispa yec inchëshën ushë yec badiadën ushë yec queboedi nibëdquiecnuc. Nidaid abichobimbo nëdënquenuec aidën icquidtedi nëdënquendac nibëdquio yec. ¹¹—Nuquin Icbon nac adquidtedi nëdënquendac —quiash Esus tantiec bëdamboequien tabadtiad. ¹²⁻¹³ Esus chobon Nuquin Papan cuidquin ambi uaidtedi nëdëncaindac. Abu yec uispa yec inchëshën ushë yec badiadën ushë yec queboedi nëdëncaindac nibëdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidën bëdambo icquidoudquio nuqui tabadmendac. Ëmbi aden chuisho tantiasun: —Ma Nuquin Papan Esus chomenu —quequin utsibo tantiaequin Esusën naid chuibanec bëdamboec tabadnuna.

¹⁴ Ëmbi tantiaido mibi neque. Tanta. —Choshon abi yacno Esusën nuqui tabadmendac —quec chieshtoenquio yec bëdamboec tabadnuna. Choshon Esusën: —Mibi icsambo iquec —cainquio icnuc Nuquin Papan chiaid niaquenquio yec bëdamboec tabadnuna. ¹⁵ Adec tabadquimbi ëmbi chuiboed tantiasun naden tanta. —“Utsitsen ma Esus tantiaquid yanu. Aden Esus tantiasun aid cuidenquio ictsiambi,” quesun Nuquin Papan Nuquin Icho chomiabi iquec —quequin tantiec tabadta. Adembidi mibi chuiquin nuquin buchibimboecquidën Pabadon dada uapaccondash. Nuquin Papan tantiamiac bëdamboen chiacondash. ¹⁶ Ëmbi chuiboedbidi chuiquin dada uadenapaccondash. —Pabadon dada uaid abentse-abentsec badedquio tantiadenuquio iquec —quesun utsibon aidën chiacpadomboen chienquien icchitosh. Nuquin Papan chiaid niac-niacquidquio icquidon Pabadon chiaidquio tantienquio icquin icsamboen chiosh cashnad-cashnadacbitsëcquiecnuc. Nuquin Papan chiaidquio nuquin tsusedpabon dada uapampidtsen isbansun adembidi tantienquio icquin icsamboen chiec. Adquido Nuquin Papan cuidendac.

¹⁷ Ëmbi tantiaido mibi neque. Tanta. Chuinu. —Abimbo tantienquio icquin Nuquin Papan chiaid niac-niacquidon muauaic —ëbi qesho tantiasun: —Esus tantienquio yamane. Muasho tantiatiapimbo iquebi —quequin ënenquio icquin Esus tantianuna. ¹⁸ —Abi tantiaquid cuidmenquio icnuec abided cuidadec Esus unëspondash. Aid tantiasun Nuquin Papan nuqui bëdamboen isec —quequin Esus bëdiactëc tantiatëcshun comapenen Esus tantiaquionona. Adshumbic: —Nuquin Icho Esuquidistu bëdamboshë iquec —canuna ënenquio icquin. Padi. Aidtedi chuiquin dada uamibi.

UANËN DADA UAIÐËMPI 1

Nuquin Papabëd ënëdenquoio yec tabadte chianiaidquoio

1 Abia Yampidënquoio matsesun Esuquidistun chuibansho ëbëd icquidobëdntan tantiapadenembi. Aidi ëbëd icquidobëdntan ispadenembi. Aidi ëbëd icquidobëdntan mishpadenembi. Aidi Nuquin Papabëd ënëdenquoio yec tabadte chianiaidquoio nec. Aidquoio chuiquin dada uaid nëid nendac. Aidquoio tantiaquido icquin bëdamboen ista. ² Aid, abuc Nuquin Papabëd ënëdenquoio yec tabadboedi nidaidënuësh matses icnuec chopanëdash. Choshon abipadquoio yec Nuquin Papabëd ënëdenquoio yec tabadte ismequin chianiaidquoio ëbëd icquidobëdntan isteneshun chuibanec nebi. ³ Aidi ëbëd icquidobëdntan ispadened adembidi ëbëd icquidobëdntan tantiapadened chuibanec nebi ma mibitedishun tantiaash shubu abentsëquën tabadacimboc ma tabadpanu qeshun. Nuquin Papa tantiaquid icquin aton Madombo Esuquidistu tantiec Nuquin Icbobëd shubu abentsëquën tabadacpadec nuqui bëdamboec tabadendac. ⁴ Esuquidistu tantiaquidtedi shubu abentsëquën tabadacimbocquido nec, quequin chuiquin dada uaimbi ma aid tantiaash, Cuishon. Bëdamboiquebi, quiacpadec ma mibitedi tabadpanueshun.

Nuquin Papa Bëdambocquid Abentsëcquiobi nec quiaid

⁵ Esuquidistun Nuquin Papa chuibansho nuqui tantiondacpadomboen chuioaimbique. Tantiata. Nuquin Papa Bëdambocquid Abentsëcquiobi nec. Icsapenquiocquid aidi nec. ⁶ Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuiquid nuqui nendac. ⁷ Nuquin Papan chiacpadomboen nabanquidquoio iquec abi tantiaquid utsibobëd shubu abentsëquën tabadacimbocquid nuqui nendac. Adquid nuqui icmenuc nuqui icsaid bedshunash abided cuidadec Nuquin Papan Mado Esuquidistu unëspondash. Aid unësnëdaidënquoio nuqui icsaidtedi paucbantequid nendac.

⁸ Icsaisa nebi, quequi mua uadquin abipenquoio chuiquid nendac. ⁹ Icsaobique. Èbi pauc, Papa, qesho tantiaashun, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. ¹⁰ “Matses icsaisa nibëdquiec”, quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiacbimboec adquid onquepec. Aden chuiquid Nuquin Papan pausuntemaid nendac. Adquid Esuquidistu tantiesha nec.

2 Ma icsainquoio icnu qeshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Èbi tantiaquid paucoata, quequin Nuquin Papan chiaid niaquesa icquin aton Madonquoio Esuquidistun nuqui icsasho aden chiendac. ² Aidi matsestedi icsaid bedshunash abided cuidadec unëspondash.

³ Ambi chiacpadomboen nabanquin Esuquidistu tantiaquid nebi, qeshun nuqui tantiendac. ⁴ Esuquidistu tantiaquid nebi, qeshun Icbon chiacpadomboen nainquiocquin abipenquoio chiendac adquidën. ⁵ Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbëd

icquid nebi, quequin nuqui tantiendac. ⁶Aden pausunac Nuquin Papan Madonquio bédamboec tabadquin nabanacpadomboen naimbi, quec nidaidën bédamboec tabad.

⁷Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. ⁸Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantianec tabadquin nabanec nec. Chieshënquid icboedi aidën pausunac tantianquidquio yanec.

⁹Esuquidistu tantiaquid nebi, qeshun abi tantiaquid utsi chieshë nec Nuquin Papan tantiacpadomboen pausunacmaid adquid nec. ¹⁰Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquio yec bédamboec tabadquin ismequid nendac. ¹¹Esuquidistu tantiaquid utsi chieshënquid Nuquin Icbon pausunacmaid nec. Inchëshquio icnuc capuacbimboecquid adquid nec. Mayan icsan yua icquin ambi natiadquio yaid tantiesa nec.

¹²⁻¹⁴Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ic-tiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

Icsate bunesa icta, quequin chiaid

¹⁵Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. ¹⁶Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshënquid nec. Adquid icquin Nuquin Papan chiaid mua uaquin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacnueshun adota. Adec icsamane quenquiocnoc mayan icsan Nuquin Papan chiaid matses chieshëmec. ¹⁷Mayan icsan tantiaid ënëndendac. Aidën tantiacpadomboen tantiaquid icbobëd Nuquin Papa yacno tabadtiaximbo iquec. Nuquin Papan chiacpadomboen naquidien ënëndenquio yec Icbobëd tabadendac.

Esuquidistu chieshënquid dadpen choendac, quequin chiaid

¹⁸Adembi chiembique. Ëmbi con nabo caidon tantiaita. Nëbi nëid nidaid naimbudec. Adecbidi Esuquidistu chieshënquid dadpen choendac, quequin chiondacpadquiec ënden cho-choac. Dadpen cho-choacsho isun, Nëbi nëid nidaid naimbudec, quequin nuqui tantiendac. ¹⁹Esuquidistu chieshënquid nuquibëd iccueded-

boedi ënden nidanepac. Nuquin Papan shubu abentsëquën tabadacpadpenquiocquid Esuquidistu chieshënuquid iquec nidaniac. Nidaniacsho isun, Esuquidistu tantiesha iquec nuquibëd shubu abentsëquën tabadacpadpenquio icquido niosh, quequin nuqui tantiendac.

²⁰ Esuquidistu chieshënesa mibi nendac. Nuquin Papan aton Mayan meniac abimbo chiaid tantiaquid mibi nendac. ²¹ Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesha mibi icsho chuiquin dada uainquio icshiambi. Abimbo chuiquid muatiapimbocquid nec, quequin mimbi tantiendac. ²² ¿Tsutsi muaquid nepec? ¿quepecta mibi ique? Nuquin Papan Madombo nidaidëshun chidon tishac matesash aton Papan chuimiadquio nec, quesha muaquid nendac. Adquid Esuquidistu chieshënuquid nendac. Abentsëcquidquibi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. ²³ Nuquin Papan Madombo Esuquidistu nec, quesha Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

²⁴ Tauamboen chiampid tantiadonec tantiesha uainquiocquid yanta. Mimbi tauaquin tantiadoniaid tantiesha uainquio yec Nuquin Papan Mado Esuquidistubëd shubu abentsëquën tabadacbimboecquido mibi iquendac. ²⁵ Èbëd shubu abentsëquën nidaidën tabadacbimboecquido ëbëd abuc ënëdenquio yec tabadte iquendac, quequin Esuquidistun chiaid nendac.

²⁶ Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. ²⁷ Nuquin Icho Esuquidistun tantiamiaid icquin utsi uain chuisho tantiesha icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio nebi. Esuquidistun abimbo chiaid tantiash bëdambo iquebi, mibi quendac. Aden Esuquidistun tantiamiaidquio yec abëd cuëshëdesa icnuec adequi tabadta.

Nuquin Papan chiaid tantiaquid ambi bacuë icmiaid

²⁸ Adembidi con nabo quequin mibi chuioaimbique. Adembi tantia. Esuquidistun chiaid tantiadonequieq tabadteneta. Adec tabadquin Esuquidistu choasho isash cuenenquio yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta. ²⁹ Nuquin Papa bëdambocquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquio nebi, quequin nuqui tantiendac.

3 Matses tantiaquin naquidquio Nuquin Papa nec. Ma ëmbi unësqiuocquin comapenen tantiaido ëbëdi tabadpanueshun con bacuëbo caimbi, quequin Nuquin Papan icsaisanquio tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquio Nuquin Papa tantiesha yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. ² Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquio mibi icmendambi, ¿ada Nuquin Papa capec? Padenquio. Esuquidistupadquiocquid nabanquid Nuquin Papan nuqui icmec, quequin nuqui tantiadonetequidquio nendac. Esuquidistu nuqui bedec chosho isash,

Nëbi aidpadquidquio Nuquin Papan nuqui icmendac, quequin tantiembi, nuqui quendac. ³Aid choabicnuc, Abipadquid iquendabi, quequin caindonequido nëbi Esuquidistu icsainquio yec tabadacpadquieac tabadte bunquid nuqui nendac.

⁴Nuquin Papan nadec bédamboec tabadta, quequin chiaid niacquid abibi icsaquid nendac. ⁵Adnubien, Esuquidistu abuc tabadboedi nidaidëshun chidon tishac mat-sesun nuqui icsaid bedshunash abided cuidadec unëshpanëdash, quequin nuqui tantiendac. Icsapenquiocquid Esuquidistu nec. ⁶Icbopadquidquio icnu quiash Esuquidistubéd tabadac bimboecquid icsadenesa nec. Icsadenequid, Nuquin Papan Esuquidistu tantiamioshi, quetiapimbo iquec. Esuquidistu tantiesia adquio iquec.

⁷Con nabo, tantesa uamane qeshun muaquin chuibanaid tantiesia icta. Esuquidistu bédamboec tabadacpadquieac tabadquid icsaisa nec. ⁸Abia icsadenequid mayan icsa nec. Aidën yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquio iquec Esuquidistu nidaidën choash mat-ses icsaid bedshunash abided cuidadec unëshpanëdash ma abi tantiaquid yec mayan icsan yua icboedi aidën yuadtiapimbo yampanuna. ⁹Nuquin Papan con bacuë caido icsadenesa nec. Ambi con bacuë caido Nuquin Papapadquidquio yec icsadenetiapimbocquid nendac. ¹⁰Mayan icsan yua Nuquin Papan chiacpadomboen naisa nec. Utsi tantiesia adquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiaquidquio nendac.

Esuquidistu tantiaquido tantiananaid

¹¹Esuquidistu tantiaquid utsibo tantiaquiota, quequin chiaid nuqui abia tantiondaid nendac. ¹²Aton utsimbo chieshënuquid Cain icpampidpadquid iquenda. Mayan icsan yua icquin aton utsi cuesunepampic. Aden cuesunaidën aton utsi Abedën abi tantiaquin nadenesho Nuquin Papan aid bédamboen isnubi Cainën ambibi tantiacpaden nadenesho Nuquin Papan bédamboen istiapimbo icpampic. Aden isac Cainën aton utsimbo Abed chieshënuquin cuesunepampic. ¹³Cainën aton utsimbo chieshënacpadomboen Nuquin Papa tantiesan Nuquin Papan con bacuë caidtedi chieshënoaic. Nuquin Papa tantiesan mibi chieshësho isash, ¿Adquidshenda mibi nepec? quenda. Nuquin Papan chiaid tantiesabimboec adenda. ¹⁴Esuquidistu tantiaquid tantienquiocboedi Esuquidistu tantiaquid yanash abi tantiaquid utsibo tantiaquidquio nuqui nendac. Aden abi tantiaquid utsibo tantiaquid icquin, Nuquin Papabéd tabadquid bimboecquid nebi, quequin nuqui tantiendac. Aton utsibo tantiesia cuëshëdac bimboecquid nec. ¹⁵Aton utsibo chieshënuquid, Con utsi cuesunenu, quiac bimboecquid nec. Adquid Nuquin Papabéd tabadtemaid nendac, quequin nuqui tantiendac.

¹⁶Mates tantiaquin nashunquidquio Esuquidistu icpondash. Nuqui tantiec, ma ëbéd ënëdenquio yec tabadpanu quiash unëshmane, quenquio yec nuqui icsaquido icsho cuidnushe quiash abided cuidadec unëshpondash. Abi tantiaquid icquin abi tantiaquid utsibo tantiaquin nashunec unëshmane quenquio yec nuqui tabadendac. ¹⁷¿Aton nachoquid icnuc Esuquidistu tantiaquid utsin na nibédquiocsho isec, Con utsi menenquio iquembi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. ¹⁸Ëmbi con nabo caid, Utsi tantiec bédamboec tabadquidquio nebi, quec onquequinuidi tantiec tabadenda. Utsi tantiembi, quequin mimbi chiacpadomboen nabanquin ismeta. ¹⁹Aden mimbi chiacpadomboen naban-

sho isun Nuquin Papan tantiamiac dacuëdenquo yec Nuquin Papa chuinu quiash abi yacno puduedquidbimboecquin nuqui chuided-chuidedec. ²⁰Utsien Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nebique. Dacuëdenquiocquin ëbi chuita, quependac Nuquin Papa adquid caic.

²¹Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënuquo Nuquin Papa bëisquidëmbimboen, Èbi menepec, quequin dacuëdenquiocquin chianendac. ²²Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bëdamboen isquin menendac. ²³Naden tantiata, quequin Nuquin Papan chiaid nad iquec: Abëd Abia Yampidquo, Esuquidistu, nidaidëshun chidon tishac matsesaid Nuquin Papan chomiaid aton Madombo nec quequin nuqui tantiaidquo nendac. Adembidi Esuquidistun chiacpadec abi tantiaquid utsibobëd tantiananendac. ²⁴Aden ambi chiacpadomboen naquidbëd Nuquin Papa iquec. Adquiduidquo Nuquin Papabëd ictequid nec. Abibimboecquid Nuquin Papan aton Mayan meniac ëbëd tabadquin tantiamiac, Nuquin Papabëd icquid nebi, quequin nuqui tantiendac.

¿Nuquin Papan chiaidquibida chuibanoshe? Isnu, qeshun Nuquin Papan chiaidquo isteneta quiaid

4 Utsibo, Nuquin Papa chieshënuquidën chuimiaido dadpen iqueque. Aidën chuimiaidën chuisho tantiashun, ¿Nuquin Papan chiaidquibida chuibanoshe? Isnu qeshun Nuquin Papan chuiquin dada uamiaidquo isteneta. ¿Adquibida iqueque? Isnu, qeshun isteneta. ²Nuquin Papan pausunaidën naden chiendac: Nidaidëshun chidon tishac matsesaid Nuquin Papan chomiaid aton Madombo nec, quequin chuibanendac. ³Nuquin Papa chieshënuquidën chuimiaidën naden chiendac: Nuquin Papan chomiacmaid Esus niondash. Aid aton madopenquo nec, quequin chiendac. Aden chuiquid Esuquidistu chieshënuquid nec. “Èmbi chomiaid chieshënuquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

⁴Con nabo quequin Nuquin Papan aton Mayan meniac aidënuquo tantiamiac Esuquidistu chieshënuquidon chuisho, Tantienu, quesa mibi nendac. Nuquin Papan meniaidën tantiamiac Nuquin Papan chiaid chiac dëniacacpadquiec mibi chieshënuquid cuenendac. ⁵Esuquidistu chieshënuquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. ⁶Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibanosho Nuquin Papa tantiabenquid utsibon tantiendac. Adsho isun Nuquin Papan tantiamiaid aido nec, quequin nuqui tantien-dac. Nuquin Papa tantiesain Esuquidistu chuibanosho, Tantienu, quesa iquendac. Adsho isun, Abipenquo chuiquidën yua nec, quequin nuqui tantiendac.

Nuquin Papan ismiac adecbidi tantiananquidquo ma nuquitedi icoapanuna quiaid

⁷Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquo Nuquin Papan bacuë nendac. Adquid Nuquin Papa tantiaquidquo nec. ⁸Utsi tantiaquidquo Nuquin Papa nec. Adquid icnuc utsi tantiesa yec, Nuquin Papa tantiemi, queti-apimbo iquec. ⁹Mates tantiaquin Nuquin Papan aton Mado Abentsëcquiobi Esuquidistu matsesmiac matses icsaid bedshunash abided cuidadec unëspondash. Adoac abi tantiaquido abëdi ënëdenquo yec tabadendac. ¹⁰Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nidaidën chomiac nuqui icsaquido icsho cuidmenquiocnoec abided cuidadec unëspondash. ¹¹Nuquin Papa comapenen tantiaquidquo icquin Nuquin Icbopadquiocquin Esuquidistu tantiaquid utsi tantiaquiotiad. ¹²Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquidac.

¹³Aton Mayan meniac ambi tantiamiaidquo yec Nuquin Papa ëbëd iquec, nuqui quendac. ¹⁴Nuquin Papan Madomboen nuqui isaidquo icpadenec. Aden isboshon uquë nësiatiadquido nuqui icsho mënchicquid Nuquin Papan chomiaid chosh, quequin nuqui chian-chianec.

¹⁵Esuquidistu Nuquin Papan Madombo nec, quequin tantiaquidquo Nuquin Papan pausunquin aton Mayan meniaid nec. ¹⁶Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobëd icquidquo nendac. Adecbidi Icho abëd icquidquo nendac. ¹⁷Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquo yec Nuquin Papa tantiaquid aton Madopadquiocquid Nuquin Papa yacno puduedendac. ¹⁸Nuquin Papan tantiaid dacuëdenquo iquendac. Ambi tantiamiaid dacuëdesa nec. Abi tantiesa, Èbi icsaquid icsho cuidtsiash, quec dacuëdendac. Aidi utsi tantiesa yec dacuëdec.

¹⁹Nuquin Papa Ambia Tantiaquid icquin ismiac tantiananquidombo nuqui nendac. ²⁰Èmbi isacmaidquo Nuquin Papa icsho, Aid tantiaquid nebi, quequin Esuquidistu tantiaquid utsi ambi isteniaid chieshënquid iquec muaquid nendac. Ambi isteniaid chieshënquid iquec ambi isacmaidquo Nuquin Papa chieshënquid nendac. ²¹Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

Nuquin Papan Madombo abimbo tantiaquid

5 Nuquin Papan Madombo aton Papabëd abuc icboedi nidaidën chomiac matse-said Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënquo Nuquin Papa tantiendac. Adembi Nuquin Papan con bacuë caid utsibo nuqui tantiendac. ²Ambi con bacuë caidën Nuquin Papa tantiaquin ambi chiacpadomboen naquidquo icquin ambi con bacuë caido nuqui tantiendac. ³Aden tantiaquin Nuquin Papan, Naden nata, cac nabanendac. Ambi,

Naden nata, quequin chiaid natiamentemaid nec. ⁴ Aden Nuquin Papan con bacuë caid icquin ambi chiacpadomboen nabanec tabadquin dëniacacbimboen icsamenuequid nuqui cuemendac. Adembidi Abia Yampid nidaidëshun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuequid cuenendac. ⁵ Esuquidistu Nuquin Papan Madombo Yampid nec, quequin tantiaquidëshunquo ismiac icsamenuequid cuenendac. Ai, icsamenuequidëshun yuadesa Esuquidistu tantiaquidquo nendac.

⁶ Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidëshun chidon tishac matsesash capusho acten mentoacsho: “Ëmbi bëdamboen tantiaidquio mibi nec. Mibi isash bëdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unëshec aton Papa chiec: “Ëbi yuedta, Papa,” quiash Esuquidistu unëshacsho nacsiaac aton intac chididiquepondash. Adashic, Nuquin Papa abimbo chuiquidpadquidquio icquin aton Mayanësh tantiamiac, Esuquidistu Nuquin Papan Madombo nec, quequin tantiaquin chierendac nuqui. ⁷ Nuquin Papa yec aton Mado yec aton Mayan yec quequin abucshun aidtedishun abentsëc yacbimboecquin Esuquidistu Nuquin Papan nidmiac chosho nidaidëshun tishac matsesaid nec, quequin chuided-chuidedec. ⁸ Adembidi nidaidëshun Esuquidistu matsesacsho isun, Nuquin Papan Madombo nec, quequin ismenuec aton Mayan abucuësh budash aidbëd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuiopondash. Adembidi yuecshun ambi chiacpadec unësho isun, Con madombo nec, quequin inchëshacbimboecnuc icmequin Nuquin Papan nadatiambocquin ismebampondash. ⁹ Aden ismiac isondaidëshun naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unësho isombi, quequin isondaidëshun chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquio icsho tantiadonetequidquio nuqui nendac. ¹⁰ Adembidi Nuquin Papan Mayanësh tantiamiac, Esuquidistu Nuquin Papan Madombo nec, quequin tantiaquin adomboembidi chuiopaec nuqui. Esuquidistu Nuquin Papan madopenquio nec, quequid, Nuquin Papa muaquid nec, quiacbimboen chuiquid nendac. ¹¹ Con Madombo, Esuquidistu nec, quequin Nuquin Papan chiaid tantiaquidquio abi yacno nidash abëdi ënëshunquio yec tabadendac. Matses icsaid bedshunash abided cuidadec aton Mado unëshpanëshun, quequin tantiaquid Nuquin Papa yacno tabadtequid nuqui nendac. ¹² Esuquidistu tantiaquid ënëshunquio yec Nuquin Papa yacno tabadendac. Aid tantiesa aidbëd tabadtiapimbo iquendac.

Ma tantiaquidquio mibi icpanuequin chiaid

¹³ Nuquin Papan Madombo Esuquidistu nec, quequin tantiaquid, Icbobëshun ënëshunquio yec tabadtequid nendac, quequin ma tantiaquidquio mibi icpanuequin mibi chuiquin dada uaimbi. ¹⁴ Adec abëshun ictequid icquin ambi tantiamiacpaden chuisho, Nuquin Papan tantiec, quequin nuqui tantendac. ¹⁵ Abitedi tantiaquidquio icquin ambi tantiacpadomboen tantiamiac nuqui chuisho Nuquin Papan menendac.

¹⁶ Esuquidistu tantiaquid nebi, queboedi icsasho isun, Cuëshëshunsho queshun aid bëdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuëshëshunsho queshun aid bëdamboen tabadme, Papa, cainda. Nuquin Papan chi-

aid tantiate bunesa aid nec. ¹⁷ Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquio yec Nuquin Papabëd tabadendac.

¹⁸ Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiash icsate bunesa nebi, quiacpaden nanuesho tantiamequin pausunendac. Adoac Nuquin Papa chieshënquidën adquido yuadtiapimbo iquendac. ¹⁹ Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënquidën yua nec, quequin nuqui tantiec. ²⁰ Nuquin Papan Madombo abuc abëd icboedëmbi nidaidënshun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquiocquid nuqui nendac. Aton Madombo aton Papabimboecquid nec. Aid tantiec aidbëd ënëdenquio yec nuqui tabadendac, quequin nuqui tantiendac.

²¹ Con nabo, Nuquin Papabëdtactsëqui aton Madombo Esuquidistu tantiaquid icta. Utsin nacnenaïd ismequin, Nuquin Papa neque. Nëid tantiaquiota, cac tantienda. Esuquidistu nebi, quesho adembidi tantienda.

Nëbi padi. Aïted chiombi.

UANËN DADA UAIDËMPI 2

Nuquin Papan chiaid abimbo iquec, quequid tantiaid

1 Ëmbia Esuquidistu tantiondaidquio Uan nebi. Nëid chido Esuquidistu tantiaquid nendac, quequin Nuquin Papan tantiacpadquiec icquin mibëd Nuquin Papan chiaid tantiec iccuededquidobëdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantias mibitedi tantiec tsadebi. ¿Ëbentsëquidabi mibitedi tantiec tsadpe? Padenquio. Aden chuisho tantiash utsibotsen adecbidi mibi tantiec tabadoaic. ² Nuquin Papan chiaid abimbo iquec, quequin ënenquiocquin nuqui tantiendac.

³ Uquë nësiatiadquido nuqui icsho isash abëdi ënëdenquio yec nuqui tabadmenuec nuqui icsaid bedshunash abided ciudadec Esuquidistu unëspondash. Adembidi ambi chiaid tantiaquido utsibobëdta bëdamboen tabadmiaido nuqui nendac. Nuquin Papan bëdntan aton Mado Esuquidistun adquid icmiac, Ambi chiaid abimbo iquec, quequin tantiec utsibobëd tantiananquidquio nuqui nendac.

⁴ Mimbic chiac utsi-utsiec Nuquin Papan chiacpadomboen nabanec tabadsho isash bëdambo iquebi. ⁵ Naden nata, quequin chiaid utsipenquio nëid dada uaid nendac. Esuquidistu tantiaquidtedi nuquibi tantiananuna. ⁶ Esuquidistu tantiaquid utsibëd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquiec ma tabadpanuna.

Muaquin chuiquid

⁷ Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chiendac. Adquid muaquin chuibanec Esuquidistu chieshënquid nec. ⁸ Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeshun Icbon chiacpadomboen nadeneta. ⁹ Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papan bëd tabadac bimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobëd tabadac bimboec tabadendac. ¹⁰ Esuquidistu Nuquin Papan Madombo nec, quequin chiesa chosho isun yuedenda. Adembidi, Bëdambo icta, quequin adquid chienda. ¹¹ Adquid yuedquid ambi yuedaidbëdntan muaquin chuiquin ismequid nendac.

Ënquin chiaid

¹² Dadpen dada uatiadquio icquimbi mibi yacno nidtiadquio icquin daëdpactsëc dada uaombi. Mibi yacno nidash mibëdi onquebi.

¹³ Mibitedi tantiec tsadebi, quequin chuita quiosh ëbëd Nuquin Papan chiaid tantiec iccuededquido. Adembidi dada uaimbi.

Padi. Aidtedi dada uaombi.

UANËN DADA UAIÐËMPI 3

Cayon naid chuiquin utsibon chiaid

1 Ëmbia Esuquidistu tantiondaidquio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

²Mimbi Nuquin Papan chiaid tantiapadquiec min nami bëdambo icpashun. Adembidi Nuquin Papan chiapadec tabadquin ismiac ma utsibobëd bëdamboec tabadpanuna. ³Mibëd icquidon nëmbo choshon naden chioishi. Esuquidistun chiapadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi. ⁴Mimbi chuibanac Esuquidistu tantiaquin muainquiocquin utsibon chuioaic, quequin chuisho tantiasb bëdambo iquebi, quec tsadebi. Ëmbi con mado caidën bëdamboen naid chuisho tantiasb bëdambo iquebi.

⁵Mimbi yuedaidon naden chioishi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioishi.

⁶Mimbi yuedshun nashunaid utsi-utsiec nëmbo choshon mimbi abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbi naic. Adembidi nabanquin adquid mibëdi tabadash, Nidnu, qesho meneta ma buanueshun. Aido Nuquin Papan con bacuë caido ambi chuimiai quio nec. ⁷Aido isadaidpembo chuinuec nidshun adquid yacno choshon Esuquidistu tantiesha nec quec ëbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quiash mibi yacno puduedendac. ⁸Esuquidistun chiaid tantiaquid icquin Esuquidistu tantiaquid ambi chuimiai do yuedtiad. Adoquin aidobëdtambi Esuquidistun nacpadomboen ismendac.

Diotedepesën icsamboen naid

⁹Mibëd iccuededquido aden chuiquin dada uaondambi. Aden ëmbi dada uaid beshdash: “Ëmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. ¹⁰Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiasb: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

Demetedio caid bëdamboquid nec, quequin chiaid

¹¹Aidën nacpadec icsainda, caimbi mibi. Nuquin Papan Icsaisanquio chiapadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquio yec tabadquid nendac. ¹²Utsien Demetedio caid bëdamboquid nec, quequin utsibon chiec. Abimbo chiec. Aidi Nuquin Papan chiapadomboen nabanec tabadquidquio nec, quequin ëbëd icquidobëdta chuioaimbi. Uanën chiaid abimbo iquec, quequin mibitedishun tantiendac.

Ënquin chiaid

¹³ Dadpen dada uatiadquiocquimbi daëdpactsëc dada uaombi. ¹⁴ Daëdec ushtanquin mimbi ispashuni. Mibi yacno nidash mibëdi onquendabi.

¹⁵ Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuibanoata.

Padi. Aided dada uaombi.

UDASËN DADA UAID

Tauamboen chiaid

1 Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquiquin Nuquin Papan mibi Esus tantiamiac. Adoac aid tantiasho isash: —Èbi tantienquio yanushe —quiash Esus mibi cudasec. ²—Aido bédamboen isquin bédambo icme, Papa —quequin Nuquin Papa chianembi mibi tantiaquin.

Muaquido iquendac, quequin chiaid

³Èmbi tantiaido mibi neque. Tantia. Nuqui cuidmenquio icnuec Esus abided cuidadec unèsaid tantiateuidi mibi chuitiadquio iccobi. Adnuc: —Esus tantiaquido iccuededacno muaquido puduedosh —quesho tantiaboshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquio mimbi chiec. Aid tantiatiapimbo iquebi —cata. Nuquin Papan tantiacpadomboen Esusën abèd icquido chuibanèdaid nuqui tantiaid neque. Utsi tantienda. ⁴Esus tantiaquido mimbi danubi mibi icsamenuec mibi yacno muaquido puduedac caosh. Ambi èndenquio tantiacpadomboen Nuquin Papan icsano nidmetequido aido neque. Muasho tantienda. —Nuquin Papan bédamboen isaïdo icsauidequi icsho nuqui cuidtiapimbo iquec. Chido chishpidambo yec dada cuididimbo yec quec icsashobi nuqui bédamboen isec —quec comapenec muaique. Muasho tantienda. Esuquidistu Nuquin Icho abentsëcshun chiaid niac-niaquec icsaique.

⁵Adquid Nuquin Papan comapenen cuidendac. Tantia. Nuquin Papan cuidampid mimbi tantianèdaid mibi chuinu. Equipito yacnoshon unèsmenuen ancanquidèn icsamboen chonoa uasho isun ashunquio Nuquin Papan con matses isadaidbo tsusedpabo puduamepampic. Adoac yuetanquin puduamiaidombi ambi chiaid niacniacsho isun Nuquin Papan uesquin unès uapampic. ⁶Adembidi utsibotsen cuidpampic. Abèd icpampido ambi abi yacnoshon uaido mayan chedo abèdtan namequido icboedobi Nuquin Papan chiaid niac-niacte buncuenash Nuquin Papabèd icte bunenquio yampampic. Adec Satanas chedo abèd icte bunenquio icsho isun puduentiapimbo yacno icsamboshè yacno Nuquin Papan nidmepampic. —¿Ada mibi bédambo icti? Mibi icsamboshè iqueque. Mibi cuidnu —quetequid ushèn padpiden uesquin cuidnumbi adopampic. ⁷Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquio chudnubi adembidi chidon aton bènèpenquio chudmepampic. Dada aton dada utsibèdi chichudnanquidquio icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nèdèncapampic nibèdquiecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anèdènquiacno nèsecaindac —quequin nuqui tantiec.

Muaquido icsaid

⁸Cuidte tantienquio yec adecbidi muaquido icsamboecuidi tabadec. Aton dada utsibèdi chichudnanquido nec. Abi chuiquid dapabon chiaid niac-niacquinc Nuquin

Papan chiaid niac-niacquinc caindac. Adembidi Nuquin Papan abi yacnoshon uaido mayan bédabo caic: —¿Nadatiambo icquidta nedic? —quequin muauaic. ⁹Mayan bédabo chuiquid dapa Miqued caidën adotiapimbo icpampic. Aidi Moises unësacsho isash: —Chococanu —quesho podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquio icpampic Miquedën. Adenquio icquin: —Nuquin Papambien mibi cuidec —capampic Miqued caidën mayan bédabo namequid dapa icquin. ¹⁰Muaquidombien ambi tantienquio yaid icsamboen chuishunec. ¿Ada bēdi cuidnushe quepadic? Adembidi abi cuidte tantienquio icquin ambi tantiaiduidi naic tabadsho Nuquin Papan cuidendac.

¹¹ Cain caidbimboecquid muaquido nec. Nuquin Papan chiaid niac-niacquin abi bunaid naiqui icsaic. Badan caidën piucquid bednuen Nuquin Papan chiaid niac-tiadquo yampampic. Adembidi piucquid bednuen muaquidon ambenquiobi chiec. Code caidën abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac. ¹²Muaquido icsambo iquec. Mibi icsametiadquien icchitec. Esus tantiaquidon pebededacno puduedshun mibēdtambi muaquidon piac caosh. —Esus tantiaquidquo nebi —quiash puduedash dacuēdenquio yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquio. Ambi naiduidi naquin ambembi chiaid chiac matses nadquio iquec. Uispa dadpen icboedi badiadnuc abu chëshën bētinacsho isash: —Tanunquien badiadec —queuidac bimboec matses iquec. Pete ambi nitsinaid unësacsho istuidash: —Pete nitsinuidombi —quiacbimboec muaquidon chuisho tantiaquido: —Bēdamboen chiaid tantianu —queuidendac. ¹³Acte tēccuasquequidën cuēmano nushan uaqin icsa uacbimboen icsaquin muaquidon mibitsen icsamec. Abi capuaid tantienquio yequi: —Ëbi capuaid tantiaquidquo nebique. Isec cho —queboedi bēnudtaniac bimboen: —Nuquin Papan chiaid tantiaquidquo nebi —queboedēmbi tantiamenquio iquec. Adec muasho cuidquin Nuquin Papan puudentiapimbo yacno icsamboshē yacno nidmendac.

¹⁴ Adquido con tsusedpa Enoc caidën chuipampic. Abia matses uaid Adanën madon baban tishmiaidën baba Enoc nepampic. Naden chuipampic. “Nuquin Papan abi yacnoshon uaid mayan bédabo dadpenquioshē Nuquin Icbobēd choendac. ¹⁵‘¿Ada mibi bēdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. ¹⁶Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshēmēnec tabadec. Abi bunacpadecuidi icsaquiēc. —Ëmbentsēqui bēdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquo mibi nec —quec muaic.

Esus tantiaquionona, quiaid

¹⁷ Ëmbi tantiaido mibi neque. Tantia. Esusbēd iccondaidon chiaid mibi chuinu. ¹⁸ Nadpondash. “Esus padpidec choabi icnuc Nuquin Papan chiacpadec bēdamboec tabadsho Esus tantiesabon mamēshunendac. Nuquin Papan chiaid niac-niaquec abi bunacpadec icsaquiendac,” quepondash. ¹⁹ Adquido muaquido iquec. Aton padi

yec icsaiqui chieshëmënquin mibi cuësh-cuëshëdmec. Nuquin Papan aton Mayan aidobëd tabadmenquoio iquec.

²⁰ Adquid icsacpadec icsainquoio icquin Esus tantiatsëcboedëmbi Nuquin Papan chiaid isban-isbanquin ënenquoio icquin Esusbëdta Nuquin Papa tantianuna. Nuquin Papan Mayanën tantiamicpadomboen Nuquin Papa chianenuna. ²¹ —Abi tantiasho bëdamboen isquin abi yacno Esusën nuqui tabadmendac —queshun Esus chosho isnuen cainquin aidbëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna. ²² Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantiash: —¿Abimbobida capeba? —quesho tantiashun nëishenquoio icquin Nuquin Papan chiaidquoio tantiamenuna. ²³ Bacuëmpi cuëten pichiquetsensho: —Baded bed. Taidnushe —quiacbimboen —Icsano nidmequin Nuquin Papan cuidnushe —queshun utsibo Esus tantiamenuna. Icsaquidotsen bëdamboen isnuna. Esus tantiamenuen aido bëdamboen isec: —Ëbitsen icsamane —quiash aido icsacpadec icsainda. ²⁴ Nuquin Papa bëdamboshë iquec. Aid tantiasho nuqui icsamenquoio iquendac. Adshumbic: —Icsambo mibi iquec —utsibo quetiapimbo icnuc bëdambo icmeshun bëdamboshë yacno abëdi nuqui tabadmendac. Adoac nuqui cuishonquendac. ²⁵ Aden tantiaquin nadonona. —Abipadquid utsi nibëdnuc abentsëcquiobi Nuquin Papa iquec. Nuquin Icbo Esuseded cuidshun abi tantiaquido cuidenquoio icquid nec. Abitedishun Icbombo Nuquin Papa nec. Nadatiambo icquin nabanquidquoio nec. Abitedi chuiquid dapambo yec abitedi namequidquoio nec. Bëdamboshë iquec —canuna ënenquoio icquin. Esus tantiaquido icquin adonona. Padi. Aidedi chuiquin dada uaombi.

ESUSËN UAN ISMIAID

Nëidba chuiquin Uanën dada uaid

1 Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. ²Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. ³Nëid dada uaid tantiash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. ⁵Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uincuemaidquio nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspondash. ⁶Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquio icquin. ⁷Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

⁸Adnubien Nuquin Papan chioshi. —Ëmbi tantiacmaid nibëdec. Abitedi comapen tantiaquidquio nebi. Nidaid uabi yec ictenedi nebi. Nëbi adquid yec nibëdantiapimbo icquidquio nebi. Adquid yec abitedishun Icbombo nebi —queposh Nuquin Papa. Aidquio tantianuna.

Dacuëdampamboecnuic Esusën ismiaid

⁹Esusbëd ictened Uan nebi. Mibëdtan Esus tantiaquid yec min utsibimboecquid nebi. Mibi yacpadembidi Esus tantiasho Esus tantiesabon chieshëmpondashi. Adoac Esusën namiacpadec chieshtoenquio iquebi. Chieshtoesa yec Nuquin Papabëd

tabadtequido nuqui nec. Esus tantiesabon chieshënquin quënën nauedacimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. ¹⁰ Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacimboec comapenec onquesho tantiapombi. Ushenquio icquimbi ushquin isacimboen tantiombi. ¹¹ Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidtedishun iste dada uashun buame —quequin comapenec onquequin chuiposhi.

¹² Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaiddiquio neposh. ¹³ Aid nënantanquio Esusquio icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiaccosh. Abi shictonquete bëshpiu-bëshpiuctsëcquid nuacquid dapambo icposh. ¹⁴ —Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquio nec —camenuc cuëte isquidbimboec aton ëshë isquid-isquidquio icposh. ¹⁵ —Utsin: “Ëmbiquen abitedi namenu,” catiapimbo icnuc abitedimbo namequid nec —camenuc shocosh piu nacnenaiddimboec nac-nacquio aton taë icposh. —Nuquin Papapadquidquio nec —camenuc acte chododoquiabimboec comapenec onqueposh. ¹⁶ Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquio nec —camenuc adposh. Aton bëtantete ushëbimboec bëchamauanquiecposh. —Bëdambo icquidquio nec —camenuc ad icposh.

¹⁷ Dacuëdampamboecsho istanequini Esusën dayumbi uebudpaccoc unësaniacimboec padishec. Adshobini Esusën camishquin bëdameposh. —Dacuëdenda. Nuquin Papapadquidquio nebi. Nidaid uabi yec ictenedi nëbi adquid yec nibëdantiapimbo icquidquio nebi. Adquid yec abitedishun Icbombo nebi. ¹⁸ Adquid yequi matsesën unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac —queposh Esus.

¹⁹ Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. ²⁰ Tanta. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi —quequin aden ismeposhi Esusën.

Epeso yacnocquido Esusën chiaid

2 Aden Esusën uispa 7tedi sananquin ismioshi. Tabote 7tedbidi manitsinaid tabë-cacno aid nënantanquio abibi icquin ismioshi. —Ëbi tantiaquido chuibanquidën Ibo yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. ²Mimbi naidtedi tantiaquid nebi. Dayacquo icquin ëmbi chiapadomboen mimbi dadpen nabanoc. Utsibo chieshtonobi chieshtoenquo icquin mimbi ëbi tantioc. Ëbi tantiaquido icsamenuen chiec: ‘Esusën namiaidquo yec mibi chuinec chopobi,’ quequin muaquidon chuisho: ‘Mua. Nuquin Papan chiaidpenquo mimbi chuibanoque. Utsibo chienda,’ quequin mimbi aidon chiaid tantienquo iccoc. Aden mimbi bëdamboen naoc. ³Adembidi utsibon chieshënaqui chieshtoenquo icquin Nuquin Papan chiaidbëdta ëmbi naid mimbi chuibanoc.

⁴Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadenec. Aden ëbi tantiaquidquo icquin mimbi utsibotsen tantiaquiopadenec. Adodenedëmbi pacuënëdabimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi icsacuedec. ⁵Ëmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ qeshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoenquo icshoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuëc mibi pudued-puduedenquo ictsandac. ⁶Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi. ⁷Nëbi ëbi tantiaquido utsibo chuinu. Ëmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën: ‘Icsamenu,’ caqui chieshtoenquo icquin ëbi tantiasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboshë yacno tied nënantan icquid cuëte matses unëstiapimbo icquid icmete icmepampic. Aid cuëte bacuë meniabcimboecnuc mibi padpidec unësenquo icnuc ëbëdi tabadmendambi,” quequin ëmbi chuiboed dada uata —quequin Esusën chuiposhi.

Esmidina yacnocquido Esusën chiaid

⁸Adshumbic Esusën padpiden chuioposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmëncquidon unës uacsho chocaquai uincuempaccondash. Adondayid yec unësaid uincuemquidquo nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi chuinu. ⁹Ëbi tantiaquido icsho utsibon chieshënac mimbi dayun uaid nibëdquendac. Nëbi mitsana nibëdquid yequi con Pa yacnuësh dadpen dayun uaquidbimboec mibi bëdamboshë iquendac. Chieshëmëncquidon mibi icsamboen chuishumboedtsen tantiembi. Mibi yacnoshon Satanasën namiac: ‘Isadaidbo nebi,’ quequidon mibi icsamboen chuishunosh. Nuquin Papan con mat-

ses caido yequi Nuquin Papan yuapenquio yec Satanasën yuaboen nec. ¹⁰Aido tantiash: ‘Ashibi mëyampatsiashe,’ quec dacuëndenda. Satanasën: ‘¿Ada Esus tantiaquido chieshtoenquio ictsiash? Tanu,’ quequin namiacpadomboen chieshëmënkuidon mibi utsi-utsien quënën nauedbanendac. Adoac daëdpactsëc ushec mibi mëyadendac. Pduenabi yec chieshtoenda. Chieshëmënkuidon: ‘Esus tantiaquido icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi. ¹¹Nëbi ëbi tantiaquido utsibotsen chuinu. Ëmbi Esmidina yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Chieshtoenquio icquin ëbi tantiasho isun icsaido cuidquiacno nësecainquio iquendambi,” quequin ëmbi chui-boed dada uata —quequin chuiposhi Esusën.

Pedcamo yacnocquido Esusën chiaid

¹²Adoshombic ana shëcuënuësh chështe cuënumboshë icquid cueshqueboedën Esusën naden chuioposhi. —Pedcamo yacnocquidon ëbi tantiaquidon iste ëmbi naden chui-boed dada uata. “Tantia, Pedcamo yacnocquido. Mibitedi chuinu. ¹³Mibi yacno Satanasën yuabo dadpen icnuc ëbi tantiec mibi chieshtoenquio iquec. Ënden Satanasën namiac mibi yacnoshon chieshëmënkuidon con yua Antipas caid cuesunepondash. Aidën chieshtoenquio icquin ëmbi naid chuibansho cuesuniacsho isumbic adembidi chieshtoenquio icquin mimbi ëbi tantiaquiopondac. Aden mimbi bëdamboen naid tantiemi.

¹⁴Adonaid tantiaquin mibi icsaidtsen chuinu. Mibi cuëdüncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë matses utsibo chuiquid dapa Badac caidën: ‘Isadaidbo aquec cho,’ cac comapenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquio tantiamenuec ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi. ¹⁵Adec nicadaitabo caido ëbi tantiate shubun puduedash mibëdi cuëdüncuededec icsamiantec bumpec. ¹⁶Aidon chiaid tantienda. Ëmbi chiaid mibi niac-niacmenushe. Aidobëd tabadenda. Mibi cuëdüncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesacbimboen mibi cuidtsiambique. ¹⁷Nëbi ëbi tantiaquido utsibotsen chuinu. Ëmbi Pedcamo yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquio icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: ‘Ëmbi tantiaidquido yec ëbi yacno puduedtequid nec,’ qeshun cuënote ushu menendambi. Abi cuëmëdquid icnubi utsi uain cuënquin aid cuënoten dada uatanquin menendambi. ‘Ëmbi meneboedënuidsëqui ma isnu,’ quequin adoendambi,” quequin ëmbi Pedcamo yacnocquido chuiboed dada uata —quequin chuiposhi Esusën.

Tiatida yacnocquido Esusën chiaid

¹⁸ Adoshombic aidëmbidi padpiden chuioposhi. Cuëte isquidbimboec aton ëshë isquid-isquidquio yequi aton taë shocosh piubimboec nac-nacpambo icposh. — Icsaisambo yec Nuquin Papan Madombo nec. Adquid yec abitedishun naid tanti-aquidquio icquin matses cuidquidquio nec — camenuc adquio isadquidën naden chuiposhi. —Tiatida yacnocquidon ëbi tantiaquidon iste ëmbi naden chuiboed dada uata. ¹⁹“Tantia, Tiatida yacnocquido. Mibitedi chuinu. Mimbi naid abitedi tantiemi. Ëbi tantiaquin mimbi utsibotsen bëdamboen tantiec. ‘Aton Papabëdtan Esusën bëdamboenshë natsiash,’ quequin chieshtoenquio icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: ‘Padi. Esus tantienda,’ caqui mimbi chieshtoenquio icquin ëbi tantiapec. Tauamboen ëbi tantiaquin daëdpactëc naondaidi nëbi ëbi tantiaquioshon ëmbi chiacpadom-boen mimbi dadpen naic.

²⁰ Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenquio yec mibitedi icsaic. Mimbi cacumiabi mibi iccuededacno isadaidbo tsusedpan chido Esabed caidbimboecquid chido icsamboshë icquid muanuec puduedposh. Puduedshumbic: ‘Nuquin Papan chiaid chuiquid nebique. Tantia. Chuinu,’ quequin abi bunaiduidquio chuibanosh. Adoac ëbi bëdiactëc tantiauidtsëcboedi aidën chiacpadec icsacuededposh. Nuquin Papapenquio utsibon papa caid tantiabededacno puduedposh. Adshumbic aidon papa quequin dasamboed nëish pichicaid pec tabadcuededquimbi aton chidopenquio chudbededposh. ²¹ Adsho isun aid chido: ‘Ma abi icsaid ënu,’ queshun badedquio cuidenquio iccombi. Adoboqui abi icsaid ënte bunenquio iccosh. ²² Adec abi icsaid ëntiapimbo icsho isumbimbi nëbi cuidendac. Ëmbi nac daicsabudash mëyadquiec aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naid ënshoembi cuidenquio ictsiac. ²³ Aid chido cuidquioquimbi aton bacuëbobimboecquido aidën chiacpadomboen naquin ëntiapimbo icquido adembidi cuidquindambi. Ëmbi adosho isun ëbi tantiaquidtedishun: ‘Matsesën otacquio tantiaid tantiaquidquio Esus nec. Adquid icquin abi icsaid ënenquio icquido cuidquin abi tantiaquido bëdambo icmendac,’ quequin tantiatsiash.

²⁴ Tantia. Ambocquido ëbi tantiaquidombotsen chuinu. Aden Satanasën chuimi-aidën chuisho: ‘Aden chuisho tantiatiapimbo iquebi,’ mimbi capoc. Aden bëdamboen nasho isun utsi chienquio iquembi. ²⁵ Nëiduidtsëqui chuinu. Mimbi bëdamboen nabocpadomboen chieshtoenquio icquin ëbi tantiata. Ëbi choabi yacpadembi adota. ²⁶ Choshombimbi chieshtoenquio icquin ëmbi chiacpadomboen naquidombo ëbëdtan chuiquid dapabo icmendac. Adoac ëbëdtan matses utsibo abitedi namendac. ²⁷ Aden Nuquin Papan aido ëbëdta chuiquid dapa icmiacsho utsibon: ‘Dëniacquin ëmbiquen nanu,’ catiapimbo iquendac. Ëbi chieshënquido: ‘Esus dëniacquin ëmbiquen matses namenu,’ quesho tantiashun matsu nacnenquidën ambi nacnenaid icsambo icsho isun pos-posacbimboen cuidquindambi. ²⁸ Badiadte anoentsëc uispa dapa choded-chodedbocpadquiec ënëdenquio yec ëbi tanti-aquidobëd iquendabi. ²⁹ Ëbi tantiaquido utsibotsen chuinu. Ëmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin chuiposhi Esusën.

Sadis yacnocquido Esusën chiaid

3 Adoshombic Nuquin Papan Mayan abi tantiaquidoböd tabadmequidquio icquin Esusën padpiden chuiposhi. —Abi tantiaquido chuibanquid namequid nec — camenuen uispa 7tedi sananquin ismeboedën naden chuiposhi. —Sadis yacnocquidon ëbi tantiaquidon iste ëmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiemi. Bëdamboec tabadquido danquin utsibon: ‘Bëdambo icquido nec,’ mibi canubi ëmbien adotiapimbo iquec. Mibi bëdapenquio iquec. Unësacimboen mimbi ëbi bëdamboen tantienquio iquec. ² Isucunacimboen ëbi padpiden tantiaquiota. Nuquin Papan chiacpadomboen mimbi naidtsëccoque. Mimbi ëbi tantienquio iqueque. ‘Nuquin Papan chiacpadquiec bëdamboec tabadnuna. Esus tantiaquionona,’ cananta. ³ Mimbi ëbi tantiabonondacpadomboen ëbi tantiaquiota. Bëpiscudenda. Nëbi mibi icsaid ënshun ëmbi chiacpadomboen naoata. Isucunenquio yacimboen ëbi tantienquio icshoembi mibi cuidendac. ‘Ampequid choec,’ quequin tantienquio yacimboen ëmbi cuidte tantienquio icsho mibi cuidtsiambique. Ëbi tantiaquiota.

⁴ Mibi yacno icsaquido dadpen tabadnubi utsi-utsiec daëdpactsëc ambi naid icsa ucudacimboec icsainquio yec bëdamboec tabadec. Adec bëchish ucudacimboec abi icsaid ënash bëdamboec tabadsho isun ëbëdi tabadmequin icsaisa icmendambi. ⁵ Ëbi tantiaquido utsibotsen chuinu. Ëmbi chuibocpadquidën chieshtoenquio icquin ëbi tantiasho adembidi bëdamboen isun Nuquin Papa yacno ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. ‘Aido ëbi tantiaquidotedi neque. Nuquibëd tabadmenuna,’ quequin adoendambi Nuquin Papan abi yacnoshon uaido mayan bëdabontsen tantianuc. Aden dada uaid ucudenquio yacimboen bëshunenquio icquin ëbëdi tabadtequido abitedi tantiemi. ⁶ Ëmbi Sadis yacnocquido chuiboed Nuquin Papan Mayanën mibitsen tantiametsiashe. Pabiate cuembo icquin bëdamboen tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin Esusën chuiposhi.

Pidadepia yacnocquido Esusën chiaid

⁷ Adoshombic icsaisambo icquin ambi chiacpadomboen naquidënquio Esusën padpiden chuiposhi. Con tsusedpa Dabid yampicpadquid matses namequidquio yec ambentsëqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnocquidon ëbi tantiaquidon iste ëmbi naden chuiboed dada uata. ⁸ “Tantia, Pidadepia yacnocquido. Mibitedi chuinu. Mimbi naid tantiemi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquio icpatsiaba?’ queded-quededsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquio mibi iccoc. Adec chieshtoenquio icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. ⁹ Aden isadaidbon mibi ëmetiadquio iquec. Aido: ‘Con matses isadaidboudtsëqui Nuquin Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiaidombo mibi nec,’ aidon mibi caindac. ¹⁰ Ëmbi chiacpadec chieshtoenquio icquin ëbi tantiasho isash mibi cudasend-

abi. ‘¿Ada Esus tantienquoio yantsiashe? Tanu,’ queshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquoio icquid icmendambi.

¹¹Tantia. Nëbi choendabi. Utsibon chieshënaqui mibi icbocpadquiec chieshtoenquoio yec bëdamboec tabadta. ‘Ëbi adenquoio icsho isun Esusën abi yacno puduedmenquoio ictsiashi,’ quiash bëdamboec tabadta. ¹²Aden chieshtoenquoio icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yacnimboecnuc con shubun icquido mibi icmendambi auëshquoio cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaqin ismepec? Ademibidi abitedi ismequin: ‘Con Pabëdtan con matses nec,’ mibi caindambi. ‘Nuquin Papa yacno ëbi tabadaid Edusaden chuca caid abucuësh budtequid yacno tabadtequidombo nec,’ mibi caindambi. Nuquin Papan abitedishun Icbombo icmiac ëbëdtambi chuiquid mibi icmendambi. ¹³Ëmbi Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantia. Chieshtoenquoio icquin ëbi tantiashe ademibidi bëdambo icmendambi,” quequin ëmbi chuiboed dada uata —quequin Esusën chuiposhi.

Daudiseya yacnocquido Esusën chiaid

¹⁴Adoshombic abitedishun naid tantiaquin abimbo chuiquidënquoio Esusën padpiden chuioaposhi. Nidaibëdta abitedi uaquidënquoio abitedishun Icbon chuiposhi naden. —Daudiseya yacnocquidon ëbi tantiaquidon iste naden ëmbi chuiboed dada uata. “Tantia, Daudiseya yacnocquido. Mibitedi chuinu. ¹⁵Mimbi naid tantiambi. Chieshtoenquoio icquin ëbi tantiaquid ictiadquidi adquidpenquoio mibi nec. ¿Ëbi bëdamboen tantiaquidon adopendactic? Padenquoio. ‘Esus tantiaquid nebi,’ quiondaidëmbi mimbi naiduidi naquin mimbi ëbi bëdiactsëc tantiatsëccoc. Adsho tantiashe: ‘Dayacquio yacnimboen ëbi tantiaquiopashun,’ caimbi mibi. ¹⁶Mibi adec chieshtonoc ëbitsen chieshtotiadquido iquebi. ‘Cacumiabimboen Nuquin Papa yacno ëbëdi mibi tabadmenquoio iquendambi,’ mibi catiadquido icchitebi. ¹⁷‘Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen bedshun dayun uaic utsi bunenquoio yec bëdambo iquebi,’ mibi quepoc. ‘Esus tantienquoio yec Nuquin Papabëd tabadtiapimbo icchitebi,’ quetiadquidi mibi adenquoio iccoc. Nuquin Papa yacno tabadte tantienquoio icsho isun mibi shubiuatiadquido iquebi. Bëchish ucabi yacnimboen mibi icsaid ënabi icsho mibi bëdamboen istiapimbo iquebi. Pacuënëdacnimboen ëbi tantienquoio mimbi iquec. ¹⁸Adboedëmbi Nuquin Papabëd tabadte bunquin ëbi tantiaquiota. Ëbi tantiaquin bëchish ucacnimboen mibi icsaid ënta. Adsho icsaisabimboecnuc mibi bëdamboen isquin ëbëdi tabadtequid icmetsiambique. Pacuënëdaid paposhquiabimboecnuc ëmbi naid mibi bëdamboen tantiametsiambique. Ëbi tantia.

¹⁹Ëmbi tantiaido bëdamboen tantiamembi. Aton papan: ‘Padi, mibi icsambo iquec,’ quequin bacuë ëmiabimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi icsamboen naid ënash bëdamboec tabadta. ²⁰Mibi tantiaquiambique. ‘Ëbi tantia,’ ëmbi cac mibi: ‘Ai,’ quesho tantiashe mibëd iquendabi. Pec tabadec bëisanquiabimboec mibëd iquendabi. ²¹Tantia. Ëbi tantiaquido utsibotsen chuinu. Chieshtoenquoio icquin Nuquin Papan chiaidtedi naquin nainash aibëdi tabadquid nebi. Adquid yec aibëdi

abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ëbëdi tabadmequin ëbëdtan chuiquid icmendambi. ²²Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuiboed dada uata —quequin chuiposhi Esusën.

Nuquin Papa Uanën isaid

4 Asia yacnocquido Esusën ëmbudquin chuibon abuc ispombi. Adshun isquien shëcuë shëcniacimboec isadpec. Adnubien chuibocpadquiec shoncacimboec comapenec onqueoaposh. —Nëmbo cho. “Nadquid iquendac. Nadotsiandac,” quequin mibi dadpen ismenu —caposhi.

²Adoac Nuquin Papan Mayanën tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papambo chuiquid dapan tsadte dapanquo tsadpec. ³—Chuiquid dapa abentsëcquiobi nec. Bëdamboshë iquec —camenuc matses bunaidquo casëdubimboec nac-nacquio yec piumbo yec bëdamboshë isadposh. Abi tsadaid nënantanquo uenquebudpamboec uen podquedbipamboec umu-umupambo icposh. —Bëdamboshë icquidquo nec —camenuc adquo icposh. ⁴Nuquin Papa nënantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquo dasiuidcuededposh. Chuiquid dapan mauetembo shocosh nacnenaidquo mauecuededposh. ⁵Adnubien Nuquin Papa yacnuësh abubimboec bed-bedquetanenubien abu tesquianiacimboec cuëdtoposh. —Abitedishun Icbombo nec —camenuc adec cuëdposh. Nuquin Papan bëntsiacquo tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bëisquioquimbi abi tantiaquido chianequid yequi Esus tantiacidobëdtsen icoaic —camenuc aden ismeposhi. ⁶Bëntsiacbidi acte-penquo chian dapa acte-actetsëcquo isadposh.

Nuquin Papa tsadaid anoen daëdtsëcquo abi dacuenadec aben icquidbimboecquid 4tedi icposh. Dadano chedobi ëshë ictsëcquiec icposh. Utsi tanenquo. Abimboudquo istequidquo icposh. Cachoc icnubi tacbiduc adquiobidi icposh. ⁷Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh. ⁸Icbo-icboec aton podo uicchunën podobimboec 6tedi icposh. Podonotsen adquiobidi ëshëuidquo isadposh. Podo ananquo adquiobidi icposh. Aidonquiobi ënenquo icquin Nuquin Papa chuiposh nadec cuëdënquin.

—Icsaisambo yec bëdamboshë icquidquo mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiacidquo mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquo nec

—quec badiadquidën badiadquidënquiec cuëdënashic inchëshëntsen cuëdëdeneposh.

⁹Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun adembidi: “Bëdambo iquec,” mibi cac bëdambo ictsi-

ash, Papa —Nuquin Papa cadonenubi ¹⁰ tsusiobo 24ted icquido ambo tabadquido danëshën tinqebudcuededposh. Adtanquimbi mauete chicbededtanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbic aidontsen Nuquin Papa chuiposh nadec cuëdënquin.

¹¹ —Mibi bédamboshë iquec, Papa. Adembidi abitedishun mibi: “Bédambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquio mibi nec.

Comapenen tantiaquidquio icquin mimbi abitedimbo uapampic.

Mimbi tantiapadomboen mibiuidtsëcquiobi abitedi uapampic.

Adoac mimbi tantiapadequi mimbi uaido nibëdanabi yec abi iquec.

—quec tsusiobo cuëdëncuededposh.

Nuquin Papan chiacpadomboen namequid Esus isadaid

5 Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën isnushe —qeshun 7ted icnuc bitaccatempin bitaccabanaid neposh. ² Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitaccaid chicbanquin chuibampatsiash? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh. ³ Adoaquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaidën tabadquidotedi. Nëidic unësaidotedi. Aidtedi dada uaid bedshun bitaccaid chicbanquin istequid nibëdposh. ⁴ Adsho isashini unësquio icnuc shubipoc: —Aid dada uaid bedshun chicbanquin chuibanquid nibëdec —quiash. ⁵ Adshobini anocquid tsusion: —Otac. Shubienda. Ènëd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadtiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac —caposhi.

⁶ Adoac isquien isadaidbon Nuquin Papa cuidmenquio icnuc abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunec abided ciudadec unësaid Esusquio nec —camenuc adec isadposh. Utsibo dacuenadec tabadnuc nënantanquio Nuquin Papabëdquio icposh. Anoentsëqui dadanobi ëshëcquido dacuenadec tabadnuc abi uquëtsëc tsusiobuidquio dacuenadec tabadposh. Padnuc obecabimboecquid yec aton pais 7tedi icnuc aton ëshëmbo aidedequiobidi icposh. —Abitedishun Icbombo yec utsin dëniacadtiapimbo icquid Esusquio nec —camenuc aden pais ismeposhi. Adembidi: —Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdtiapimbo icquid Esus nec —camenuc ëshë 7tedi ismeposhi ushquin isacbimboecnuc. ⁷ Adshumbic obecabimboec isadboedën Esusën Nuquin Papan abiucshunquio sananaid dada uaid bedposh. ⁸ Bedsho istanequien dadanobi ëshëcquidobëd tsusiobo 24ted icquido Esus ismec danëshën tinqebudcuededposh. —Bédamboshë icquidquio mibi nec —quiash adcuededposh. Tsusiobon

icbo-icboen ten-tencate sananquimbi utsiucshun shocoshëmpi bëdambo nuadnuc tauitempi sanamposh. —Ëmbi ten-tencamequin Nuquin Papa cuishoncamiacimboec Esus tantiaquido cuëdënaid iquec —quequin aden ten-tencate sananquin ismeposhi. Adembidi: —Nëshun tauiac nëid pushudquid Nuquin Papa yacno nidacimboec Esus tantiaquidon chianiaid iquec —quequin bëdambo nuadnuc tauitempi sananquin ismeposhi. ⁹Adashic cuëdënte chucan Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses cuidmenquio icnuec mibided cuidadec unësondaidquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bëdamboen isendac.

¹⁰Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadën nidaidënuësh mibëdtan chuiquid iquendac

—quec cuëdëncuededposh tsusiobo.

¹¹Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquio icnuc anoentsëqui dadanobi ëshëcquidoudiquio dacuenadec tabadposh. Abi uquëtsëc dacuenadec tsusiobuidquio tabadposh. Aid uquëtsëc dacuenadequic mayan bëdabuidquio tabadposh. ¹²Adec tabadec mayan bëdabo abitedimbo cuëdëncuededposh naden chiec.

—Isadaidbon obeca bacuëded cuidacimboec matses icsaid bedshunuec abided cuidadec Esus unëspondash.

Esusquio bëdamboshë icquidquio nec.

Adquid icsho: “Abitedishun Icbo icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bëdamboshë iquec. Mibi tantiaquiembi,” abitedishun capashun

—quec cuëdëncuededposh mayan bëdabo Esus tantiec.

¹³Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemiaidotedi yec acten icquidotedi yec quec cuëdëncuededposh naden chiec.

—“Abitedishun Icbombo yec tsadte dapan tsadquidquio Nuquin Papa bëdamboshë iquec.

Obeca bacuëbimboecquid abided cuidadec unësaid Esustsen bédamboshë iquec,”
canuna, ënenquoio icquin.

“Abiuidtsëqui Nuquin Icbo nec. Utsi adquid ictiapimbo iquec.

Aidën nac nuqui bédamboshë iquec.

Abipadquid utsi nibëdec,” canuna ënenquoio icquin

—quec cuëdëncuededposh abitedimbo.

¹⁴ Adsho tantiash dadanobi ëshëcquido: —Ai, abimbo caic —quenubi tsusiobo
24ted icquido: —Nuquin Icbo bédamboshë iqueque. Ismenu —quetanec Nuquin Pa-
pabëdta Esus ismec danëshën tinquebudcuededposh.

Bitaccaid chicaid chiaid

6 Adnubien Esusën Nuquin Papan: —Nadoendambi —quequin chiaid dada uaid
7tedi bitaccaid tauamboen abentsëc chicposh chicabi icquid 6tedi icnuc. Aid
chicnubien Nuquin Papabëd icquid dadanobi ëshëcquidën abentsëcshun abu cuë-
dacbimboec comapenec cuëdquin: —Cho —caposh. ² Adoac cabayo ushumbo ic-
quid catsadec dada canti sanampamboec chosho ispombi. Adec chosho isun: —Mibi
chieshënquido uesquin cuesun secaquidquoio mibi nec —quetanquin chuiquid da-
pan mauetempo mauemeposh. Adoac adecbidi abi chieshënquido cuesun secanuec
nidposh.

³ Adnubien Esusën dada uaid bitaccaid utsi udictsëcquid chicposh chicabi icquid
5tedi icnuc. Aid chicnubien dadanobi ëshëcquid utsin: —Cho —cac ⁴ cabayo piumbo
icquid catsadec dada choposh. —Matses cuesun secananenquoio icsho Nuquin Papan
tantiacpadomboen aidën nac matses abitedimbo matses utsibobëd cuesun secana-
nendac —qeshun chështe dapa matses siante dapa meneposh. Adomboen Nuquin
Papan matses cuidte tantiameposhi.

⁵ Adnubien Esusën dada uaid bitaccaid udictsëcquid chicposh chicabi icquid
4tedi icnuc. Aid chicnubien dadanobi ëshëcquid utsintsen: —Cho —cac cabayo
chëshëmbo icquid catsadec dada choposh. —Pete daëdpactsëc icmete chiec —
camenuen pete yuë tante sanamposh. ⁶ Adnubien dadanobi ëshëcquido dacue-
nadec tabadnuc nënantanshunquoio Nuquin Papan cabayo chëshëmbo icquid cat-
sadquid chuiposh. —Piucquid dadpenquoio meniac aton yuë daëdpactsëcnuc tam-
banshun pete utsi-utsien daëdpactsëc menianquid iquendac —quequin pete utsi-
utsiec nibëdte chuiposh. Adshumbic: —Pete utsi-utsien nibëdmetanquin tiedën ic-
quid pete utsi-utsien nibëdmenquoio icquin nata —quequin chuiposh. —Nuquin Pa-
pan cuidac adec pete nibëdnuc matses pete bunquiendac —quequin cuidte utsi aden
ismeposhi.

⁷ Adnubien Esusën dada uaid bitaccaid udictsëcquid chicposh chicabi icquid 3tedi
icnuc. Aid chicnubien dadanobi ëshëcquid utsintsen ënquimbi chuiquin: —Cho —
cac ⁸ cabayo bëdiactsëc ushu-ushupactsëcquid catsadec dada choposh. —Aid matses
unës uaquid nec —quequin cuësho tantiombi. Abipadquid utsin chinumposh. —
Aidombi Nuquin Papan tantiacpadomboen matses cuidquin matses dadpenquioshë
unës uabudnendac. Aidon namiac cuesun secananec dadpen naimëdbudnendac.
Bunambi aidtedbidi unësbudnendac. Daicsaidëmbic aidtedbidi. Aben icquid uinsad-
pambo icquidën aidtedbidi acshun secaindac —quequin Nuquin Papan cuidte utsi
ismeposhi.

⁹ Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish picchate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquo icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh. ¹⁰ Adoaido icquin comapenec cuëdquin Nuquin Papa chuidoneposh. —Abitedishun Icbombo icquin mimbi tantiacpadomboen namequidquo mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ¿tedect-sichshun mimbi cuidpe? —caquin chuidoneposh. ¹¹ Adoquien: —Chiata. Yuec-yuecpectsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmëmbi —queshun abitiombi dasiuidbudte ushumbo icquid dasiuibamposh.

¹² Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacimboec inchëshquio icposh. Inchëshën ushëbic intacimboec piumboshë isadposh. ¹³ Uispabic natiambo cunquenuc cuëte bacuë tididiquiacimboec nidaidën tididieposh. ¹⁴ Abubic dashcute bidiquiacimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. ¹⁵ Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquo. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidtedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. ¹⁶ Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided cuidadec unësaid Esusënsen cuidnushe. ¹⁷ Aidon ambi tantiacpadënquibini nëbimbobi cuidchitec. Padtembo. ¿Tsutsi cuidenquo icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

Isadaidbo Nuquin Papa tantiaquidombo bësiaid

7 Aden Nuquin Papan cuidte ismëboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icboicboen uidën uaquin cuncamenquo icposh. —Nuquin Papa: “Ma cunquequidën icsa uabanu,” quiabi icnuc abëmbi cunquequidën nidaid yec acte yec cuëte yec quenuc icsa uanushe —queshun adoposh. ² Adnubien mayan bëda utsi ushë choacmiuësh choposh. Nuquin Papa abi tantiaquido cudasëmënuen dada uaquin bësete sanamposh. Aidën cunquequid uidën uaquido comapenec onquequin chuituidposh. ³ —Chiata. “Nidaid yec acte yec cuëte yec quenuc icsa uanushe,” queshun adëmbi cunquequid uidën uata. Nuquin Papa tantiaquido bësebambono. Nuquin Papan mat-

ses neque. “Icsambo icquidobëdta cuidnushe,” queshun bësebambono —quetanquin Nuquin Papa tantiaquido bësebamposh ushë choacmiüesh choquidën.

⁴Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidedi tambanac 144,000tedi icposh dadpenquioshë. ⁵Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. ⁶Nëidic Acobon madobidi Ased caidën matses tsyuecquido aidedquiobidi. Nëidic Acobon madobidi Netadi caidën matses tsyuecquido aidedquiobidi. Nëidic Acobon madobidi Manases caidën matses tsyuecquido aidedquiobidi. ⁷Nëidic Acobon madobidi Simeyon caidën matses tsyuecquido aidedquiobidi. Nëidic Acobon madobidi Debi caidën matses tsyuecquido aidedquiobidi. Nëidic Acobon madobidi Isacad caidën matses tsyuecquido aidedquiobidi. ⁸Nëidic Acobon madobidi Sabadon caidën matses tsyuecquido aidedquiobidi. Nëidic Acobon madobidi Ose caidën matses tsyuecquido aidedquiobidi. Nëidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. —Adquido iquen-dac —quequin adoposhi.

Esus tantiaquido Nuquin Papa yacno tabadaid

⁹Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iquec. Nëidic nidaid utsi-utsiec yacno tabadquido. Nëidic matses utsibo. Nëidic matsesquio. Aidedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesën chuiquid dapa ismiacimboen: —Nuquin Papa bëdamboshë iqueque. Ismenu —quequin niste podobiecquid sananquin uic-uiccaposh. ¹⁰Aido comapenec cuëdëncuededposh.

—Abitedishun Icbo icquin Nuquin Papan ambi tantiacpadomboen isadaidbon obeca bacuëded cuidacimboen aton Mado Esused cuidpanëdash.

Adoac nuqui icsaid bedshunuec abided cuidadec ünëspondash Esus.

Aid tantisho icsaido cuidacno nidmenquo icquin nuqui abëdi tabadmec.

Aton Papabëd bëdamboshë iquec

—quec cuëdëncuededposh.

¹¹Adsho tantish ambo tabadquido mayan bëdabotedi danëshën tinquebudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënantanquo Nuquin Papabëd Esus tabadnuc abi uquëtsëc dacuenadec dadanobi ëshëcquido 4tedi icquiduidquo tabadposh. Abi uquëtsëc dacuenadec tsusiobo 24tedi icquiduidquo tabadnuc abi uquëtsëc dacuenadequic mayan bëdabouidquo tabadposh. ¹²Aid mayan bëdabotedi danëshën tinquebudcuededequi comapenec cuëdëncuededposh.

—Aden abi tantiaquido abëdi tabadmequid bëdamboshë iquec.

Esusbëdi Nuquin Papa bëdamboshë iquec.

Adembidi abitedishun: “Mibi bëdambo iquec, Papa,” quequin chuipashun.

Esusbëdi Nuquin Papa bëdamboshë iquec.
 Abipadquid utsi nibëdec.
 Comapenen tantiaquidquio icnuc ambi tantiacmaid utsi nibëdec.
 Aiduidtsëqui bëdamboen tantiaquidquio nec.
 Aidën nashunac bëdamboshë iquebi.
 Nadatiambo icquid nec. Abitedishun Icbombo nec.
 “Esusbëd Nuquin Papa bëdamboshë iquec,” canuna
 —quecuededposh mayan bëdabotedi.

¹³ Adshumbic ëmbi 24ted icquid isboed abentsëcshun tsusion chuiposhi. — Ma ushumbo icquid abitiombi dasiuidquido ¿tsutsi nepec? ¿Mitsiüëshquio aido chosh? —cac: ¹⁴—Tsaudi, tsusio. Mimbibien tantiec —capombi. Adsho tantiash: — Tanta. Mibi chuinu. Satanasën: “¿Ada chieshtoenquio ictsiashë? Tanu,” qeshun natiamboshë icmiac Esus tantiec chieshtoenquio ictenedo nec. Adec chieshtoenquio icsho isun Satanasën tantiacpadomboen chieshëmënuquidon unës uapondash. Abided cuidadec unësaid Esus tantiaquido icsho icsaisa icmiaido yec dashcute ushumbo icquid dasiuidcuededposh. ¹⁵ Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquio icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” qeshun abëdi tabadmequin bëdamboen dayun uaic. ¹⁶⁻¹⁷ Isadaidbo matsesën nëish yua obeca dadpen dayun uacpaden abided cuidadec unësaidën Esusën abi tantiaquido bëdamboen-shë dayun uaindac padpidec unëstiapimbo icnuc. Adoac pete bunenquio iquendac. Actetsen bundoenquio iquendac. Abi yacnuësh ushën pichiquenquio iquendac. Chun mëyadenquio iquendac. Nidaidënuësh shubidenedi Nuquin Papa yacnuësh shubitiapimbo iquendac. Natiamiante nibëdquiec iquendac. Unësquio icmiantë nibëdquiec iquendac. Bacuë shubisho anin bëucquin bëdambo icmiacimboen abi yacnoshon Nuquin Papan Esus tantiaquido bëdambouidquio icmendac —quequin chuibamposhi tsusion.

Dada uaid bitaccaid nainquin chicaid

8 Nuquin Papa yacnoshon tsusion chuibombien obecabimboec isadquin Esusën nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. —Dacuëdampambo iquec —quec media oda yec yuec-yuecpectsëc otacquio tantiec tabadposh. ² Adnubien Nuquin Papan abi yacnoshon uaido mayan bëdabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. ³ Adnubien mayan bëda utsi ambobidi choposh. Choash bëdambo nuadquid tauinuequin shocosh nacnenaïd tauite dapa dayun nidtuidposh. Shocoshëmpin bëdamboshë nuadnuc tauitempi utsi sanamposh. Adsho isun bëdambo nuadquid nua meneposh. Adoac: —Nëïd tauiac pushudquid Nuquin Papa yacno nidacimboec Esus tantiaquidon chianiaïd iquec —quequin bëdambo nuadquid sanshun tauite nacnenaïd dapan tauiposh bëdambo nuadnuc. ⁴ Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaïd abi yacnoshon tantiashun Nuquin Papan abi tantiaquido chieshënquido cuidendac —quequin aden ismeposhi. ⁵ Adshumbic aid mayan bëdan tauite dapan samëdquid cuëte dëtsisadaïd isquidquio icquid bedshun shocoshëmpin sandoposh. Aden sandotanquimbic shocoshëmpichobi matses tabadacno masiabud-

posh. Nuquin Papa tabadacnoshon adoposh. Adnubien bed-bedquetanepamboec abu tesquianiacbimboec cuëdtoposh. Adnubien nidaid abichobi saca-sacaquemboec uëdëqueposh. —“Nuquin Papan ëbi chieshënuquido cuidpashun,” quequin Esus tanti-aquidon chianesho tantiashun aden Nuquin Papan comapenen cuidendac —quequin aden ismeposhi.

Shoncate shoncaquin ismiaid

⁶ Matses tabadacno cuëte dëtsisadaid isquidquio icquid masiabudnubien shoncate bedboedon mayan bëdabon shoncanuen sanamposh. ⁷ Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuëte dëtsisadaid isquidquio icquid yec intac yec quenuc chomeposh ue dapa choacbimboencuc. Aden chomiaidën nidaid nuamboshë taidpash. Cuëte dadpenquioshë taidpash. Uasin dadpenquioshë pichiqueposh.

⁸ Adnubien mayan bëda utsin shoncaposh 5tedishun shoncabi icnuc. Shoncanubien macuësh dpatembi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. ⁹ Adec intac yanaidën acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

¹⁰ Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nëdën-nëdënquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh. ¹¹ Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

¹² Adnubien mayan bëda utsin shoncaposh 3tedishun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoquien bëdambo chënqueboedi bëdiactsëcquio chënquiantsëccosh.

¹³ —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. —Esus tantiesabo Nuquin Papan cuidtequido tantiac unësquioshë iquec. Shoncabi icboedon mayan bëda utsin 3tedishun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

Mayan bëda utsin shoncanuc isaid

9 Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictempo meneposh. Podobitsi icsabo uidën uacno nidaid shëcuë uquëducquio icquid bëtashte chichte neposh. ² Aid chictempin chicaquien uquëducuësh tied nëdënquedoacbipamboec pushudtoposh. Abuc inchëshquio pushudquid icnuc ushë isadenquio icposh. ³ Adsho isaquien pushudacnuëshquio tsectsecbiecquid dadpenquioshë cho-choposh. Chichumbimboec sianquidquio niosh. ⁴ Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësi-

adabi icquiduidquo sebudneta —quequin chuiposh. ⁵ Adshumbic: —Unësnuç se-shun secainda. Inchëshën ushë 5tedi nidmequin chichunën siac bimboecnuc sebudneta —cac tsectsecbiecquidën sebudnequin ismeposhi. ⁶ Aid tsectsecbiecquidën siac natiamboshë yec matses unëste bunquiendac. Unëste bunquidi badedi unësenquo iquendac.

⁷ Aden tsectsecbiecquid ismeposhi. ¿Mitsipadquo nidaid cudasquid sondado catsadaid cabayo icpec? Adquo cabayobimboec tsectsecbiecquid isadposh. Shocosh mauetebimboecquid mauecuededposh. Matsesën bêtantetembobi bëisadposh. ⁸ Chidon tëbucshumbimboec isadposh. Bëdin shëtabimboec aton shëta icposh. ⁹ Bëntsi-auc shicdiadquid cudaste shocosh nacnenaidbimboec sictsasimbo icposh. Aid abi maisi cuensho tantiac tied nëdënquiacbimboec comapenec cuëdposh. ¹⁰ Aid tsectsecbiecquid chishpichoquid yec chichumbimboec sianquidquo neposh. Inchëshën ushë 5tedi nidmequin adquidën dadpeshun natiamboshë icnuc matses sebudneposh. ¹¹ Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquo nec —quequin isadaidbon onqueten abadon caposh. Quidieco matsesën onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

Chiqui dapan chuiboed utsi

¹³ Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsi-auc tsadunaid yacnuëshquo onquedosho tantiombi. ¹⁴ Adec onquequidën nëbi shoncaboed chuiposh. —Acte dapa Eupëdates caid yacnoshon matses cuidquido mayan bëdabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. ¹⁵ Aden chuitanac aid mayan bëdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquioibi adoendac —quequin tantiacpadomboen adoposh. ¹⁶ Adoquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

¹⁷ Èmbi isboedquo nadquo icposh. Abi catsadaid cabayobëdi sondado chedo shicdiadquid cudaste shiconquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh. Cabayon mapi bëdi dapan mapibimboec isadposh. Ana shëcuënuësh nëdënquepamboec pushud-pushudpambo yec choposh. Cachinan bacuë pisenaid nuadac bimboec asupede caid icsamboshë nuadposh. ¹⁸ Adshumbien ana shëcuënuësh choaidën matses dadpenquioshë cuesun secabudneposh. ¹⁹ Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquo niosh. Aidëntsen matses dadpenquioshë unës uabudnequin ismeposhi.

²⁰ Adnubien aden Nuquin Papan cuidaidën unës uamiabi yaidon matsesën abi ic-said ëntiapimbo icposh. Ambi naiduidi nabamposh. Èntiadquidi abi icsaquioposh. Nuquin Papa tantienquo icquin podobitsi icsabo tantiaquin ëntiapimbo icposh. Adembidi ambibi nacnenaid ambi papa caid ënenquo icquin tantiaposh. Utsibon shocosh nacnenaid tantiaposh. Utsibombic cuënote. Utsibombic cuëte. Adquid ambibi nacneshun tantiabedeposh. Ambi nacnenaid anan onquetiapimbo icposh.

Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquo icquin Esusquo tantiatiadquidi ambi nacenaiduidi tantiaposh. ²¹ Cuesanquidon abi cuesun secaposh. Nënëchoquidombic abi unës uabudneposh. Cuëte podo dauë icsa chodcaquidombic adembidi matses dadpen unës uabudneposh. Aton chidopenquo chudquidombic adembi utsi chudshumbededposh. Adembidi aton bënëpenquo chudmequidën abi icsaid ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushe. Èbi icsaid ënu —quetiadquidobi adenquo icposh.

Mayan bëdan dada uaidëmpi pemiaid

10 Cabayo uinsadpambo icquid ismeboshombic utsitsen ismeposhi. Adoac mayan bëda chuiquid dapa utsi dacuëdampambo icquidquo Nuquin Papa yacnuëshquo budsho ispombi. Abu ushubimboec isadec abitiombi dasiuidbudpaccosh. Uen podqued uenquebudacpamboec mapino icposh. Ushëbimboec bëtantete bëchamauanquiecposh. Buintad nitsinaid nëdënquiacpamboec isquid-isquidpambo nidte icposh. ² Dada uaidëmpi bëcadotsaid sanamposh. Budash nidtuidposh. Tsiembudcuenshun taë abiucshun chian dapa mad caid nëtıncaquimbi taë opiocshon mananuc tincaposh. Ènapenquioshë icquid niosh. ³ Adashien bëdi noshquiacbimboec nuamboshë cuëdtoposh. Adec cuëdquin chiac abu 7tedec cuëd-tonequin ëcbedtoneposh Nuquin Papan chiaid chuiquin. ⁴ Aden abu cuëdquin ëcbed-tonesho tantiashun: —Abu cuëdquin chiaid dada uanu —qeshobi: —Padi —caposhi Nuquin Papa yacnoshon chuiquin. —Abu cuëdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquo iccombi.

⁵ Adnubien mayan bëda tsiembudcuenshun chian dapa nëtıncaquin utsiucshun mananuc tincaboedën ambibi podo abiucquo cadoposh. —Nuquin Papan isnubi abimbo chuiquidquo nebi —quequin tantiamenuen aden ambibi podo abiucquo cadoposh. ⁶ Adotanquin chuiposhi. —Tantia. Mibi chuinu. ¿Tutsi nidaid uabi yec ëndenquimboshë icpampic? Aidi Nuquin Papa nëbi adquid yec nibëdantiapimbo iquendac. Adquid icquin abitedi uapampic. Abu uashun aidën icquidtedi uapampic. Nidaid uashun aidën icquidtedi uapampic. Acte uashun aidën icquidtedi uapampic. Aden abitedi uaquidën chiaidquo chuinu. Nëbi Nuquin Papan ambi tantiacpadomboen icsambo icquido cuidquimbi abi tantiaquido abëdi tabadmendac. ⁷ Èbi padquid mayan bëda utsin shoncate sanamboedën: “Nëbi nainquin shoncanu,” cacpadënquo Nuquin Papan ambi chiampicpadomboen adoendac —queposh mayan bëda chuiquid dapa dacuëdampambo icquid Nuquin Papan matses cuidquin naimpanuda.

⁸ Adnubini abucuësh cuëdquidën chuiposh. —Aid mayan bëdan sanamboed dada uaid bed —cac: ⁹—Dada uaid beccho —capombi. Adoquien: —Në bed. Bedshun che. Batambo icboedi min ana mucambo yanendac —caposhi. —Nëid bedshun chiacbimboen Nuquin Papan chiaid cuishonquequin isban-isbanash mucambo yanacpambo Nuquin Papan cuidte tantiash shubitiadquo mibi yanendac —quequin tantiamenuen aden chuiposhi.

¹⁰ Adoac aid bedshun chiash adquo yanobi. ¹¹ Adquo yansho isun mayan bëdabo chuiquid dapan chuioaposhi. —Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabante-bëdta chuiquid dapabon nabante mimbi chuibanendac. Aden Nuquin Papan tanti-

acpadomboen mimbi chuibanendac —quequin chuiposhi mayan bédabo chuiquid dapan.

Nuquin Papan namiaidon daëdshun naid

11 —Nuquin Papan tantiacpadomboen mimbi chuibanendac —quequin chuishumbic mayan bëda chuiquid dapan piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bédam nuadnc tainuequin nacnenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. ²Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” qeshun aid shubu daquënë uaid tambanenda. Aden Edusaden icsa uaqin seta 3tedi matamendac —quequin chuiposhi. —“Muainquio icquin Esusbëdta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi. ³Adnubini Nuquin Papan chuiposh. —Aden Edusaden icsa uanubi matses daëdquiobi ëmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiacpadomboen chuibanendac. Adquid yec: “Matses abitedi icsamboshë icsho isash shubitiadquio iquebi,” quequin icsambo icquid abi icsaid ëmenuc dashcute icsactsëcquidquio dasiuidendac —quequin Nuquin Papan chuiposhi.

⁴Adshobini mayan bëdan chuioposh. —Aido Nuquin Papan oncamiaid daëd isadaidbo matses tsusedpan chuipampid nendac. “Nuquin Papan bëntsiauc cuëte odibos caid nitsinaid daëd bëdambo icquid iquendac. Ambobidi tabote daëd bëdambo icquid iquendac,” quequin chuipampid nendac. “Nuquin Papan Mayanën tantiamiaidquio icquin ambi chiaidquio chuibanendac,” camenuen aden chuipampic. ⁵Aden abi chuibansho abi chieshënkuidën: “Mibi cuesunenu,” caqui cuesuniadenquio iquendac. Nuquin Papan dayun uaid icquin ana shëcuënuësh choboedën nibëdquiecnuc pichicacimboen abi cuesunenucquidotedi unës uaindac. Nuquin Papan cuidte tantiamenuen adoendac. ⁶Adembidi Nuquin Papan cuidte tantiamenuen Nuquin Papan Mayanën namiaidquio icquin comapenen tantiaquin ismebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

⁷Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secaindac. Satanasën namiacpadomboen adoendac. ⁸Edusaden yacnoshon cuesun secashun chococainquio iquendac. “Ma cuesun secaid ischitono,” qeshun chococainquio icquin podqued ansanendac. Nuquin Icho Esus cuestas dectanacnoshonquio matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cuesun secaindac. ⁹⁻¹⁰Aden cuesun secabosh: “Nuqui mëyanquid nëid

daëd neque. Chococatiapimbo iquebi,” qeshun chococainquo iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuishonquec abëd icquidobëd menenancuededendac. Matses abitedimbo caimbi. Nëidic matsesquo. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

¹¹ Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiasho isash cuishonqueboedobi natia dacuëdec tabadendac. ¹² Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënkuidon isnubi adendac. ¹³ Aid daëd abuctonoc nidaid sacasacauemboec natiambo uëdëquianendac. Nidaid uëdëquenubi shubu dadpenquo chimeshadbudnendac. Chimeshadbudnequimbi matses catashquin dadpenquo 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatiad,” quecuededendac —quequin chuiposhi mayan bëdan. ¹⁴ Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

¹⁵ Nuquin Papan uincuemetequido daëd chuibombien mayan bëdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdëncuededposh naden chiec.

—Nuquin Papabëdi aton Mado Esuquidistu abided cuidadec unësaid bëdamboshë iquec.

Abi chieshënkuidon naid ëmeshun aid abentsëcshumbi matses abitedimbo namendac ënenquo icquin.

Abitedishun Icbo nec

—quec cuëdëncuededposh. ¹⁶ Adashic Nuquin Papa yacnombo icbo-icboec tsadten tabadboedobi tsusiobo 24tedi icquido: —Mibi bëdamboshë iquec —quequin ismec danëshën tinquebudcuededposh. ¹⁷ Adtanequi nadec cuëdëncuededposh.

—Nidaid uabi yec ëndenquimboshë mibi icpampic, Papa.

Nëbi adquid yec nibëdantiapimbo icquid mibi nec.

Abitedishun Icbombo mibi icnuc:

“Ëmbiquen dëniacquin namenu,” Satanasën catiapimbo mibi iquec.

Nadatiambo icquid icquin mimbentsëqui matses abitedimbo mimbi namendac.

¹⁸ Nidaid utsi-utsiec yacno tabadquidon abi chuiquidobëdtan mibi chieshëndenedec.

Mimbi uaidtedi icsa uadenec.

Adsho mimbi tantiacpadënquo nëbi mimbi cuidendac.

Matses abitedi uincuemetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobëdta mibi tantiaquido abitedimbo mibi yacno mibëdi mimbi tabadmendac.

Chuiquid dapambobëdta chuiquidpenquo mibi tantiaquidotedi bëdambo icmequin mimbi adoendac

—quequin tsusiobon Nuquin Papa chuisho tantiapombi ushquin isacbimboen.

¹⁹ Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shëcniacchobi icposh. Aid shubu nuntan isaquien Moisesën ambi nacnenaid Nuquin Papan chiaid sandoampid icposh. —Ëndenquimboshë ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden ëbi ismenubien bed-bedquetanec abu teshquiani-acbimboec nua cuëdtoneposh. Nidaid saca-sacaquemboec uëdëqueposh. Ue dapa nuamboshë choacbimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

Chidobëdta nisibimboecquid dapa ismiaid

12 Adoshombic Nuquin Papa yacnoshombidi utsitsen dacuëdampamboecquid-bidi ismeoposhi. Adoac chido ushë dasiuidacimboec bëchamauanquiecscho ispombi. Inchëshën ushë tincash tsadposh. Uispa 12tedi nacnenaid mauete maueposh. ² Bacuë nua usunec tishtiadsëcquio yec shubibud-shubibudposh. —Isadaidbon chido Esus tishquid nec —camenuen aden ismeposhi. ³ Adnubien nisibimboecquid nuamboshë icquid choposh. Taëchopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete mauecuededposh. Satanas niosh. ⁴ Adshumbic nisibimboecquidën aton incuente ënapen icquid uic-uiccaquin uispa dadpen bedshun nidaidën siabudposh. —Aden Nuquin Papabëd icquin Satanasën abipadquido utsibo mayan bëdabo icboedo utsiutsien yuapampic. Aden yuash aton yuabobëdi nidaidën choshon matsestsien ic-samete bunquiec —camenuen aden ismeposhi. Adshumbic chidon tishacsho bacuë penuen aiduidi bëisquin cainuidposh. ⁵ Adnubien chidon dada bacuë tishposh. Bëdambo icquid matses abitedishun Icho ictequidëmpi niosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquec —quequin ismeposhi. ⁶ Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquio seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

⁷ Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquiobi. Nëidic mayan bëdabo icboedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nëidic Nuquin Papabëd icquidombo mayan bëdabo dadpen. Nëidic aido chuiquid dapambo Miqed caid. Aidedi ispombi. Adnubien Satanas nadposh. —Aton yuabo mayan bëdabo cuemias Nuquin Papa dëniaquec ëbimbo abitedishun icbo yantsiabi —quiash nicantiadquio icposh. Satanas chedo nidaidën nidmiabi icnuc neposh. ⁸ Adshumbic: —Niunchitono —quequin bedbidan-bedbidanaquien Nuquin Papan yuabo Miqed chedo uidënquio icquido yec niadenquio icposh. Adshumbic Miqed chedon nisibimboecquid Satanas chedo nicaposh. Aton yuabobëdta Nuquin Papa yacnoshon nicaposh. ⁹ Nicaquien matses tabadacno nidaidën choec Satanas chedo budbudposh. Eba caid icsamepampid Satanas niosh. Nëbi matses dadpenquioshë ic-samequin yuate bunquiec.

¹⁰ Adnubien Nuquin Papa tabadacnoshon anocquidën comapenec onquequin chuibamposh naden chuiquin.

—Aden Nuquin Papan aton Mado Esusbëdtan abi dëniacnuequido dëniacmenquio icposh.

Nuquin Papa chieshënquidquio icquin abi tantiaquido chieshënquin icsamboen chuishunquid nec.

“¿Esus tantiaquido bëdambo icquidoda nedic? Ëmbi natiamiac aido chieshtotsiash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided ciudadec unësaidbëdi dëniacdtiapimbo yec abitedishun Icbombo nec

—queposh Nuquin Papa yacnuësh cuëdec. ¹¹ Adashic padpidec auëshbidi:

—Nëbi ëmbi isac Satanasën Esus tantiaquido chieshtometiapimbo icposh.

Satanasën: “Chieshtomenu,” caqui:

“Padi. Esusën yuambo nebi,” quec chieshtoenquio icposh.

Cuidmenquio icnuec abided ciudadec unësaid Esus tantiec chieshtoenquio icposh.

Adsho abi chieshënquidon matsesën: “Padi. Esus tantienda. Cueschitomane,” caqui chieshtoenquio icquin adenuidi Esus tantiasho cuesun secameposh Satanasën aton yua icmiambobi.

¹² Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Ëbitedi cuishonquenuc nidaidën tabadquido matses yec mibi cuishonquetiapimbo iquec.

Nëshun cuemiac mibi yacno budash Nuquin Papa chieshënquieci Satanas chieshëmënquieci tabadec.

Mibi icsamete bunquieci. “Nëbi Nuquin Papan ëbi cuidquieque.

Abi tantiaquido yuashunchitono,” quec mibi icsamete bunquin mibi natiambo icmendac.

Adoac natiaic mibi tabadendac

—queposh Nuquin Papa yacnuësh cuëdec. Aden tantiameposhi.

¹³ Adshumbic ëmbi isadaidbon chido isboed padpiden ismeposhi. Adoac Esus tishquid isadaidbon chido unës uanuen nadancasho ispombi. —Nuquin Papa yacnoshon nicachitoshi —qeshun chieshënquin nisibimboecquid Satanasën aid chido nadancaposh. ¹⁴ Adnubien Nuquin Papan chiqui dapan podobiecquid meniac bedanec aid podombi cuenec matses nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh.

¹⁵ Adnubien nisibimboecquidën: —Aid chido unës uachitono —quequin ambibi ana shëcuëshun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo matses nibëdametiadquio iquec. Adem-bidi Esus tantiaquido nibëdametiadquio iquec. ¹⁶ Acte dapa chomiacsho isun Nuquin Papan nidaid shëcuë uashun aid shëcuën acte nidmiosh chido yacno chiuidenquio icnuc. ^{17–18} Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquio icposh. Nuquin Papan chiacpadomboen chieshtoenquio icquin bëdamboen naquido Esus tantiaquido caimbi.

Bëdibimboecquid dapa ismiaid

13 Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëdquiec. Èbiuidtsëqui abitedishun icbombo icnu —quequin aton mapitedi bëdada uadaid neposh. Pais 10tedi icposh. Aid paistedi chuiquid dapan mauete paisën dectambampaccosh. ² Aton dada bëdin dadabimboec isadposh. Aton taë uinsadpambo icquid utsi oso caidën taëbimboec isadposh. Ana shëcuë bëdi utsi tëbuchoquidën ana shëcuëbimboec icposh. Adsho isun Satanasën ambi caimboed chuiquid dapambo icmeposh. Ambi tantiaidquio tantiaequin abi icsaid namebamposh. Adoac matses abitedimbo chuiquid dapambo yamposh. Aden Satanasën matses icsamboshë icquid chuiquid dapa icmequin ismeposhi. ³ Adshumbic padpiden ismeposhi. Adoac aid bëdi dapabimboecquid acte uquëducuësh choboedën mapi abentsëc mëmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —qeshun matses abitedishun acte uquëducuësh choboedën chuiquid icsamboshë icquidën chiacpadomboenuidi nabededposh. ⁴ Adshumbic: —Èbi chuiquid dapa namequid mibi nec —quequin Satanas papa caquin matsesën tantiabededposh. —Aden Satanasën namiac ëbi chuiquid dapapadquid utsi nibëdec. Comapenen tantiaquidquio icnuc utsibon nuqui cuesun secatiapimbo iquec —qeshun abi chuiquid dapa acte uquëducuësh choboedtsen tantiaquioposh. ⁵ Aden matsesën tantiaid icquin Satanasën tantiamiacpadomboen Nuquin Papa chieshënquiec: —Nuquin Papa caid nibëdquiec. Èmbiuidtsëqui namembi —quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin. ⁶ Aidën Nuquin Papa chieshënquin naden muauaposh. —Nuquin Papa caid nibëdquiec. Abi tabadaidtsen nibëdquiec. Abi yacno tabadquido abitedi nibëdquiec. Ambembi chiaid niosh —quec muaposh. ⁷ Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isacbimboecnuc ismeposhi. ⁸ Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Èndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Èbëdi tabadmendambi,” quequin chiacmaidombo nec —quequin aden ismeposhi.

⁹ Pabiate cuembo icquin bëdamboen tantia. Esus tantiaquido icsho mibi chuinu. ¹⁰ Nuquin Papan: —Èbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Èbi adsho tantiash mimbi nacpadequi chieshtoenquio icta. Chieshtoenquio icquin Esus tantiaquin ambi chiacpadomboenuidi nabanta.

Nidaid shëcuënuësh choboedtsen ismiaid

¹¹ Adshumbic padpiden ismeposhi. Adoac aben icquidbimboecquid utsitsen nidaid shëcuënuësh pduensho ispombi. Obecan paisbimboec aton pais daëd icposh. Sa-

tanasën ancanquidquio icmiacpadec dacuëdampamboec onqueposh. Bëdambo icquid damianquien muaquin chuibanquidquio niosh. ¹² Adsho isun Satanasën abia chuiquid dapa icmeboedën nidaid shëcuënuësh puduemoed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. —Seshuniaid uincuemiondaidën nuqui chuiquid dapan chiaiduidtsëqui natiad —caposh. ¹³ Aden acte uquëducuësh choboedën abi chuiquid dapan chiaid namenuen compapen tantiaquid icquin nidaid shëcuënuësh choboedën dadpen ismeposh. Matses dadpeshun isnubi abucshun abemi taboadaid budmequin ismeposh. ¹⁴ Aden Satanasën namiacpadomboen compapen tantiaquin ismiac matses dadpeshun: —Abimbo caic —quequin abi chuiquid dapa icsamboshë icquidën chiaid nabededposh Nuquin Papambo tantienquio icquin. Abi chuiquid tantiaquid nidaid shëcuënuësh choboedën: —Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacnenta —cac matsesën nacnemposh. ¹⁵ Nacnenacsho isun Satanasën namiacpadomboen nidaid shëcuënuësh choboedën abi chuiquid dapabimboecnuc nacnemboedi tibocameshun oncameposh. Adoquien nacnemboedquibi chuiquid dapa icsabimboec onquequin: —Ëbi tantiesabo neque. Cuesun secatan —cac yuabon abi chuiquid dapa tantiesabo cuesun secatamposh. ¹⁶ Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquin matses dadpenquio dada uaqin bësiadmeposh nëidtedi. Nëidic chuiquid dapabo. Nëidic chuiquidpenquio. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquio. Aidtedi matses dadpenquioshë dada uaqin bësiadmeposh. Utsiutsien bëtanteteno bësiadmeposh. Utsi-utsien mëdante abiucquio mësiadmeposh. —Acte uquëducuësh choboedën ëbi chuiquid dapan yuabo nec —qeshun nameposh. ¹⁷ Adshumbic nidaid shëcuënuësh choboedën chuiquid. —Adec ëmbi chiacpadec siadambo icquido piucquidbëdta mitsana utsi menenda. Ëmbi siadmiaduidtsëqui mene —queposh. Utsi-utsiec abi chuiquid icsamboshë icquid cuëmëdquid dada uaqin bësiadmiad neposh. Utsi-utsiec aid cuëmëdaidbimboecquid naden 666 dada uaqin bësiadmiad neposh. ¹⁸ ¿Ada ëmbi chuiquid tantio? Bëdamboen tantiaquidën: —Abi cuëmëdquidquio chienquio icquin naden 666 chuiquin dada uapac —catsiash. —Adec matses icsamboshë icquidquio chuiquid dapa yansho isun bëdambo icquid danenda —quequin ushquin isacbimboecnuc aden ismeposhi.

Nuquin Papan cudasënaido ismiaid

14 Adoshombic padpiden ismiac abided ciudadec unësaid Esusquio macuësh dapa Sion caid mananënuquio tabadsho ispombi. Abëdi abi tantiaquido dadpenquio 144,000tedi tabadposh. —Con na neque. Chën —quequin cudashin Nuquin Papan abi cuëmëdquidbëdta Esus cuëmëdquid dada uaqin bësemi-aido niosh. —Adec Esus tantiaquido abëdi tabadendac —quequin aden ismeposhi. ² Adnubien Nuquin Papa yacnuësh ¿midapadpamboec cuëdtoposh? Acte nua chododoquiacbipamboequien niacbiposh. Abu tesquianiabipamboequien nechitosh. Ten-tencate dapa dadpen icbo-icboen sananquin ten-tencabipamboec compapenec cuëdëncuededposh. ³ Adec Esusbëdi macuësh mananënuquio tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo

24tedi icquidobëdtan dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunuec abided cuidadec unësaid Esus tantiaquidon matsesënuidtsëqui aid cuëdënte chuca tantiec cuëdënosh. ⁴Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatiapimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh. ⁵Chieshtoenquo icquin Esus tantiec muesabo icpanëdash. —Adquido iquendac —quequin ushquin isacbimboecnuc aden ismeposhi.

Mayan bëda utsi 3tedshun chiaid

⁶Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenacimboec abuc cuensho ispombi. Bënudtiapimbo icquid Nuquin Papan chiaidquio matses chuinuec niosh nëidtedi. Nëidic matsesquio. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuec niosh. ⁷Abuc cuenquimbi chuibemposh. —Nuquin Papauidtsëqui tantiata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquio iquec,” quequin tantiata. Nëbi ambi chiaid niac-niacquido cuidquieque. Aidquio tantiata —quequin chuibemposh abuc cuenquimbi.

⁸Adnubien mayan bëda utsi abuc cuenoaposh. Cuenquimbi naden chuibenoaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcacimboen matses utsibo abitedi Nuquin Papa tantiamenquo icquin icsamequioposh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.

⁹Adnubien mayan bëda utsitsen abuc cuenoaposh. Aidëntsen chuibenoaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh choboed tantiaquin aidbimboecnuc nacenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiacpadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. ¹⁰Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiagno chian anëdënquiagno nësecain adoendac. Abided cuidadec unësaid Esusënquo mayan bëdabobëdtan isnubi adoendac. ¹¹Ënenquo icquin adoendac. Aden Nuquin Papa chieshënquidquio tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquo icquin adembi cuidquiendac ënenquo icquin —quequin chuibemposh mayan bëdan. Aden ismeposhi.

¹²Ëmbi chuiboed tantiashun mimbi nabocpadomboembi chieshtoenquo icquin Esus tantiaquin ambi chiacpadomboenuidi nabanta. Utsibon chieshënquin: —Padi. Esus tantienda. Cueschitomane —caqui adenuidi ënenquo icquin Nuquin Papabëdta Esus tantiaquiota.

¹³ Adnubi Nuquin Papa yacnuësh comapenec onquequin chuioaposhi. —Naden chuiquin dada uata. Chieshëmëñquidon: “Esus tantiec,” qeshun cuesun secaido Esus tantiaquido cuishonquendac —quequin chuiposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiaic tabadtenedobi unësash bédamboshë iquendac shubitiapimbo yacno tabadec. Ambi chiacpadquiec bédamboec tabadec unësacsho Nuquin Papan aden bédamboshë icmendac —quequin chuiposhi.

Intac nua icnuc Nuquin Papan cuidtequid chiaid

¹⁴ Adoshombic padpiden ismiac abu ushunquio Esus tsadsho ispombi. —Abitedishun Icbombo nebi —quec chuiquid dapan mauetembo shocosh nacnenaid maueshun chështebimboecquid sanamposh. ¹⁵ Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata ¹⁶ —caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

¹⁷ Adnubien mayan bëda utsi Nuquin Papa yacnuëshquiobidi choposh chështebimboecquid sanampamboec. ¹⁸ Adec chështebimboecquid sanampamboec choshobien mayan bëda utsin matses tabadacno cuëte dëtsisadaid isquidquido icquid nidaid masiabudboedën tauite dapa dayunuëshquio choshon comapenec cuëdquin chuiposh. —Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando ¹⁹⁻²⁰ —caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquio Nuquin Papan cuidac matsesën intac nuamboshë chididiquec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ënapenquio quidometedos 300ted cactiombi cuësquec nuamboshë matsesën intac chëuëdsho isombi ushquin isacimboen. —Aden Nuquin Papan abi chieshënquido cuidendac —quequin ismeposhi.

Nuquin Papan cuidtequid 7tedbidi nabanaid

15 Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bédabo niosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bédanendac —quequin tantiaquin ispombi.

² Nuquin Papa yacnobidi chian dapa icposh. Actepenquio yec acte-actectsëcquido isadposh. —Nuquin Papa icsaquido cuidquidquido nec —camenuc tied nëdën-quiacimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uquëducuësh choboedën chuiquid dapa icsamboshë icquidën; —Yuanu —cauidaido niosh. Chuiquid dapa icsamboshë icquidbimboecnuc nacnenaid tantiatiapimbo icquido aido niosh. Adecbidi icsamboshë icquidën an-

cabudacpaden nainquo yec aton yuabo ictiapimbo yec aid cuëmëdaidbimboecquid 666 dada uaquin siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuëdëmec cuëdëncuededposh. ³Nuquin Papan namiaid Moises: —Nuquin Papan nac ëbi chieshënquidon ëbi cuesun secainquo icposh — quec cuëdëmpampicpadec cuëdëncuededposh. Nuquin Papa bëdamboen ismenuec abided cuidadec unësaidquo Esus aton Papabëdta tantiec cuëdëncuededposh naden chiec.

—Nadatiambo icquin nabanquidquo mibi nec, Papa.

Abitedimbo uaquidquo yec abitedishun Icbombo mibi nec, Papa.

Matsesën naid abitedi tantiaquidquo abimbo chuiquidquo mibi nec, Papa.

Mimbi naid bëdambo icnuc dacuëdampambo mibi iquec, Papa.

Nidaid utsi-utsiec yacno tabadquidon Icbo icpampidi adecbidi matses abitedishun Icbombo mibi nec.

⁴Matses abitedishun: “Nuquin Icbo dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bëdambo icquido mimbi bëdamboen isendac.

Adsho isun nidaid utsi-utsiec yacno tabadquidon matses abitedishun: “Mibi bëdambo iquec. Con Icbombo mibi nec,” caindac

—quec cuëdëncuededposh Esus tantiaquido.

⁵Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadacnombo tantiamenuen aden ismeposhi. ⁶Auëshquo Nuquin Papan chiacpadec ëmbi isboedo mayan bëdabo 7tedi cho-choposh. Matses icsaquido cuidquido niosh aido. —Nuquin Papan yuabombo nec —camenuec dashcute nac-nacquio icquid dasiuidcuededash dashcute bëshpiu-bëshpiumbo icquid shictonquecuededposh. ⁷Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacnenaid icbo-icboen menebamposh. Unëtiapimbo icquidën Nuquin Papan nëishënquioshon cuidte cushtoaïd maspanëmpi niosh. ⁸Adnubien Nuquin Papa tabadaïd nuntanuësh pushud-pushudpambo icposh. Adec dacuëdampamboecsho isash Nuquin Papa chuiuec puduedtiapimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapiambo icquin —camenuen aden ismeposhi.

Maspanëmpin cushtoaïd

16 Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaïd chiinquin matses uesquin cuidta —quequin chuiposh Nuquin Papan.

²Adoaquien abentsëcshun ambi bedboed maspanëmpin cushtoaïd nidaidënsshun chuiimpsh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaïdquo icsamboshë icquid tantiaquin abibimboecnuc nacnenaid tantiaquido yec aton icbo cuëmëdquid dada uaquin siadmiaindo icsho aden cuidposh.

³ Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ĕnden unësaidën intacbi-pamboecnuc intacuac. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. ⁵ Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

⁶ “Ĕmbi chiaid chuibanquidobëdta ëbi tantiaquido nua intac icnuc chieshëmënkuidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

⁷ Aden acte dayun uaquidën chuisho tantiaash Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

⁸ Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadec matses baded-badedquiec ushën pichiebudneposh. ⁹ Adec pichiebudneshumbien Nuquin Papa chushcabed-edposh. —Icsaidequi icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

¹⁰ Adnubien utsintsen ambi bedboed maspanëmpin cushtoaid chiuimbenequin acte uquëducuësh choboed chuiquid dapa icsamboshë icquid ambi namiaidobëd tabadacno chiuimbeneposh. Adoaquien inchëshposh inchëshquio yec. Badiadenquo icposh. Adsho isash matses abitedi natiambo dacuëdcuededposh. ¹¹ Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadec tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

¹² Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoaquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmeposh.

¹³ Adec aid matses cho-choabi icnuc ushë choacmishun cho-chometequidëmpi naden ismeposhi. Coqeshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauame-

quin oncameboedën ana shëcuënuësh choquid. Aidedi chosho isombi. ¹⁴Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuec niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tanti-acpadënquiobi adendac —camenuen mayan bëdan aden ismeposhi.

¹⁵Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yacbibmoen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacbimboec icta ëbi cainec —queposh Esus.

¹⁶Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

¹⁷Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh.

¹⁸Adnubien abu bed-bedquetanepamboec abu tesquianenuec natiamboshë shëcshëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh. ¹⁹Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquiosh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. ²⁰Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. ²¹Abucuëshquio ue dapa choacbimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan mëyansho isun padenquio ictiadquidëmbi matsesën Nuquin Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isacbimboecnuc aden ismeposhi.

Chido chishpidabimboecquid ismiaid

17 Adshumbic maspanëmpin icquid chiimboedën abentsëcshun chuiamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu. ²Aido icsamboshë iquec. Matses utsi-utsien abi chuiquid dapabobëdta uisma uanten danoshcacbimboen Nuquin Papambo tantiamenquio icquin ambi chiaid niacniacmequioposh. Aido cuidsho isec cho —queposh.

³Adshumbic ushquin isacbimboecnuc ismeposhi. Nuquin Papan Mayanën tantiamiac masiuidquio yacno shubu nibëdacnombo chido aben icquid dapa catsad-

sho ispombi. Aben icquid piumboshë icposh. Aidën dadan: —Nuquin Papa caid nibëdquio iquec —quequin uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquio nec —quequin aden aben icquid ismeposhi. ⁴Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquio icquid chedo payuec aidbidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquidquio icposh. —Chido chishpidabimboec Babidonia caid yacnocquido icsamboshë iquec. Uisma uanten danoshcabcimboec: “Nuquin Papa caid nibëdquiec,” quequin tantiaquequin matses utsibo dadpenquo icsamequien-dac —camenuen aden ismeposhi. ⁵Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi icsamboen tabadmequido nec —quequin dada uaid icposh. ⁶Aid chido paëmbo icquid acacimboc Esus tantiaquidon intac acash tantiadenuo yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiopequini ique? —quebudquiobi.

⁷Adbudquioshobini aid mayan bëdan: —“Tantiadenquo iquec,” ¿quecta ique? Tantia. Chido chishpidabëdta abi catsadaid aben icquid chuinu. ⁸Mimbi isboed aben icquid icsamboshë icquid ictenedi nëbi nibëdec. Yuecshun Satanasën abi tabadacnoshon padpiden chomendac. Adoacsho yuecshun Nuquin Papan chian anëdënuquiaco nësecaindac. Aden cuidabi Satanasën chomebocsho isun Nuquin Papa tantiesabon: “Comapenen tantiaquidien nechitec. Matses nibëdanëdaidi uincuenashien choachitosh. Aidi tantianu,” caindac. Matses uabi icquin Nuquin Papan: “Ëbi tantiaquido iquendac,” cacmaidonquio adoendac —queposh mayan bëda.

⁹Adshumbic padpiden chuiposhi. —Tantia. Ëmbi chuiboed bëdamboen tantiamenuen chuinu. Naden tantiamenuen aben icquidën mapi 7tedi icquid mibi ismiombi. “Babidonia caid yacno matses icsa uaquido tabadacno macuësh dapa 7tedi iquec,” quequin tantiaquequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. ¹⁰Aid chuiquid dapabo 5tedi nibëdnubi utsi abi iquec. Nëbi aidën aton matses namec. Utsitsen choendac. Choshon aton matses nametantsequi badedquio nibëdanendac. ¹¹Nibëdanëdaidi choashic ëmbi ismeboed acte uquëducuësh choboed chuiquid dapa icsamboshë icquidquio iquendac. Aidën ëmbi chuiboedo chuiquid dapabo 7tedishun namiacimboc aton matses icsamboenshë namendac. Adoacsho isun Nuquin Papan icsaido cuidquiacno nësecaindac —queposh mayan bëda.

¹²Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboedbëdta chuiquid dapabo icmiac matses icsamboenshë namiash yuec tabadabi badedquio nibëdanendac. ¹³Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” queshun aden icsamboshë icquid abi chuiquid dapa icmendac. ¹⁴Aden Esus chieshënuquidon: “Chieshtomenu,” cac Esusën yuaido abi tantiaquidotedi chieshtoenquo iquendac. Aton Icho Esusën abided cuidadec unësaidën namiac chieshtoenquo iquendac. Aden abi tantiaquidobëdta chieshënuquin cuesun

secanuec cho-chosho isun Esusëmbi cuesun secaindac. “Ëbien matsesën Icbombo nec,” quetanquin adoendac —queposh mayan bëda.

¹⁵ Adashic padpidec: —“Nidaid utsi-utsiec yacno tabadquido dadpenquo Babidonia caid yacnocquidon icsamendac,” quequin tantiamenuen chido chishpidabimboecquid acte dapa bëntse tsadsho mibi ismiombi. ¹⁶ Aden Babidonia caid yacnocquidon nasho isun mimbi isboed chuiquid dapa icsamboshë icquidën abëdtan chuiquid 10tedi icquidbëdtan Babidonia caid yacnocquido chieshëndac. Aden chieshënquin cuesun secatanquin shububëdtabi nëdëncaindac nibëdquiecnuc. ¹⁷ “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac. ¹⁸ “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuiposhi.

Nuquin Papan Babidonia caid yacnocquido cuidaid

18 Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh. ² Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadtenecnombo podobitsiuidpambo tabadendac. Ambobidi edesteuidquo tabadendac. ³ Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamenquo icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquo icposh. Adsho Nuquin Papan cuidquiendac —quequin mayan bëdabon chuiposhi. ⁴ Adnubien Nuquin Papa abucuësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquo niqueta —qesho tantiombi. ⁵ Nuquin Papa yacnoshombidi utsin chuiposh. —Ënëdenquo yec icsauidequi icsho isun ambi tantiacpadomboen Nuquin Papan cuidquiendac. ⁶ Babidonia caid yacnocquidon matses utsibo dadpenquo icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda. ⁷ Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquo bedash: “Aidtedi dayun uaic bëdambo iquebi,” quepec Nuquin Papan cuidte tantienquo yequi. Adsho tantiaashun: “Natiambo icnuc comapenen cuidquiopashun,” caimbi. Otacquo tantiec: “Nuquin matses yuabo dadpen icnuc nuqui bëdamboec tabadec. Chido niente bënë nësaid mëyadac bimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatipimbo yec. ⁸ Adsho ambi: “Nëbi ëbi cuidec,” cacmaidënquo cuidendac. Nuquin Papanquo abitedishun Icbombo icquin comapenen tantiaquin nacnenquidquo icquin badedquo cuidquiendac. Aden dadpenquo ünës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububëdi dadpenquo nëdënquendac —queposh mayan bëda.

⁹ Adashic abi onquec: —Adec Babidonia yacnuësh nëdënquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac.

¹⁰“Tantia. Nuqui tantiaido sidquebudneque,” quec uinte paëdtampamboec dacuëd-tanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquio icpadenec. Ambi dayun uaid dadpenquio icpadenec. Matses utsibo dadpen namepadenec. Aido tantiac unësquimboshë iquec. Badedquio uesquin cuidquiopac,” quec sedenquecuededendac Babidonia caid yacnocquido tantiec —queposh mayan bëda.

¹¹Adashic abi onquec: —Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquiec. ¿Tsuntsimbini ëmbi meniaid cuidquin piucquid menepatsiashba?” quec sedenquecuededendac. ¹²Aidobidi: “Nadquid Babidonia caid yacnocquido menequin piucquid dadpen bedtenembi. Nëidic shocosh piu. Nëidic shocoshquio. Nëidic casëdubimboecquid cuënote bëdambo icquid. Nëidic dashcute bëdambo icquid. Nëidic dashcute piumbo icquid. Nëidic dashcute umumbo icquid. Nëidic sën-tebimboecquid nacnenaid. Nëidic aben icquid edepanten shëta nacnenaid. Nëidic cuëte utsi bëdaidquio nacnenaid. Nëidic shocosh utsi nacnenaid. Nëidic cuënote nac-nacquio icquid nacnenaid. Piucquid dadpen menequin adquidtedi Babidonia caid yacnocquidon bedpadenec. ¹³Utsitsen dadpen bedpadenec. Nëidic batambo icquid sabimboecquid. Nëidic bëdambo nuadte. Nëidic bëdambo nuadec danosh-quete. Nëidic acte paëmbo icquid. Nëidic bëchi. Nëidic pan nacnentequid. Nëidic nëish yua baca caid. Nëidic nëish yua utsi obeca caid. Nëidic nëish yua cabayo caid. Nëidic matses antsadsho cabayon nimbanquin buante. Nëidic ambi chonoa uatequido matses ambi ampequin bedaido dadpen. Babidonia caid yacnocquidon aidtedi dadpenquio bedtenesho aton piucquid dadpen bedpadenembi,” quependac nidaid utsi-utsiec yacno tabadquido —queposh mayan bëda.

¹⁴Adashic abi onquec: —Abi piucquid menedenedën dayun uaid nibëdanesho isash: “Aid matses bunaidquio ambi dayun uaid pete nibëdquiec. Ambi dayun uaid dashcute bëdambo icquidbëd aton na utsi dadpen abitedi nibëdquiec,” ¹⁵quiasht natiambo dacuëdec uanoshon isec tabadec sedenquecuededendac abi piucquid menedenedo tantiec. ¹⁶“Aid matses tantiac unësquimboshë iquec. Matses dadpen yuaquin matses dadpen namepadenec. Aton matses dashcute bëdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casëdubimboecquid shocosh piu nacnenaid payudenec. Utsibic casëdubimboecquid utsi payuec mësiuidtenec. Adec: ‘Con na dadpenquio icnuc bëdamboec tabadebi,’ quepadenec Babidonia caid yacnocquido. ¹⁷Adsho isun Nuquin Papan abi ushëmbi cuidquiac ambi dayun uaidbëd aid matses badedquio nibëdanac,” quec sedenquecuededendac abi piucquid menedenedo tantiec. Adecbidi nidaid utsin icquidotsen sedenquecuededendac. Nëidic cano dapa dancha icbo. Nëidic dancha icbobëd nidquido aton yuabo. Nëidic icbo piucquid meniash dancha antabëdtoquido. Nëidic nuëcquid bedshun piucquid bednuen menequido. Aidtedi uanoshon isec sedenquecuededendac. ¹⁸Nëdënquec pushudtonesho uanoshon isash: “Adquido utsi nibëdec,” ¹⁹quiasht natiaquiec sedenquecuededendac. Adec shubiec: “Ëbipadquid dancha icbon bëaidtedi bedshun piucquid dadpen menedenedo tantiac unësquimboshë iquec. Is. Cuidquiac badedquio nibëdanaque,” quec sedenquecuededendac —queposh mayan bëda.

²⁰Adashic mayan bëdabidi: —Ëbien cuishonquendac. “Nuquin Papa yacno tabadquidotsen ëbëdi cuishonque,” quequin chiendambi. Esus tantiaquido

chuiquinc Esusbëd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshënquin natiamicpadomboen mibi chieshënquido Nuquin Papan uesquin cuidquioshe,” quequin chiendambi —queposh mayan bëda.

²¹ Adnubien mayan bëda utsin uidënquio icquidënquio nidaid moco nuacquid dapa yuëmboshë icquid cadotanquin acquimboen acte nënebidanquimbi chuiposh. —Ëmbi acquimboen nënebocpadomboen Nuquin Papan Babidonia caid yacnocquido uesquin cuidquiendac nibëdquiecnuc. ²² Adoac aido ictenecnombo nadimbo iquendac. Ten-tencate ten-tencainquio iquendac. Utsibobic cuëdënenquio iquendac. Utsibombic shoncate shoncainquio iquendac. Cuëte chëshun nacnenenquio iquendac. Piacbo macuesenquio iquendac. Nadimboshë iquendac. ²³ Tabote taboadaid nibëdendac. Dada aton chido ambi nëbi bedaidbëdi mamënenquio iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiaquinc icsamepadenec,” quendac. ²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bëda.

Chieshënquido cuidacsho isash cuishonquiaid

19 Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquinc Nuquin Papa yacnuëshquio Esus tantiaquido dadpenquioshë comapenec cuëdëncuededposh.

—Nuquin Papa bëdamboshë iquéc.

Aiduidtsëqui matses abitedishun Icbombo nec.

Aton Mado abided ciudadec unësaid tantiasho matses bëdamboen isec.

² Muesambo icquin ambi chiacpadomboen naquidquio nec.

Abi tantiesabo ënëdenquio yec icsauidequi icsho cuidquidquio nec.

Adquid icquin: “Icsamboshë iquéc,” quequin matses utsibo icsamequido Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh

—quéc cuëdëncuededposh.

³ Adashic padpidemboec:

—Nuquin Papa bëdamboshë iquéc.

Is. Pushud-pushudpambo icnuc nëdëncaquinc Babidonia caid yacnocquido uesquin cuidquioshe

—quéc cuëdëncuededposh Esus tantiaquido dadpenquioshë.

⁴ Adsho tantiash Nuquin Papa chuiquid dapan tsadten tsadnuc abi dacuenadec tabadquido: —Nuquin Papa Nuquin Icbo nec —quequin ismenuéc danëshën tinquebudcuededposh. Adéc tinquebudcuededequi: —Abimbo caic. Nuquin Papa bëdambo iquéc —quecuededposh dadanobi ëshëcquido 4tedi icquido tsusiobo 24tedi icquidobëdi. ⁵ Adashic auëshquiobidi abentsëc cuëdposh.

—Nuquin Papa matses uaquidquio yec bëdamboshë iquéc, canuna.

Nuquibi abi tantiaquidtedishun: “Nuquin Papa bëdamboshë iquéc,” canuna.

Aton yuabo icquin nuquitedishun adonona.

Chuiquid dapabo aton yuaboböd icquimbi nuquitedishun: “Nuquin Papa bédambo iquec,” canuna —queposh.

Esusën abi tantiaquido beduante chiaid

⁶ Adsho tantiash abu tesquianiacbimboec acte nua chododoquiacbimboec Nuquin Papa yacnocquido dadpenquo cuëdëncuededposh.

—Abi chieshëncuquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bédamboshë iquec.

⁷ Nuquin Papa tantiec cuishtonquenuna. Nuquin Papa bédamboshë iquec.

Dadan aton chido buntacquo beduanacimboen abided cuidadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacnemëdquiacbimboec:

“Nëbien con Icbo chochitec,”

quiash Esus tantiaquido bédamboec tabadec.

⁸ Abi tantiasho Nuquin Papan bédamboen isaïdo yec abi icsaïd ënash:

“Nëen con Icbo chochitec,” quiash bédamboec tabadec.

Aden abi tantiasho Esusën dashcute chuca ushumbo icquid dasiuinacimboen abitedi icsaïsa icmendac

—quec comapenec cuëdëncuededposh.

⁹ Adnubi mayan bédan chuioposhi. —Ëmbi chuibocpadomboen dada uata.

“Isadaïdbo aton chido bedquin aton matses cho-chomiash pemec bédamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuis-honquequiec tabadendac,” quequin dada uata. Abimbo caimbi. Nuquin Papan chiaïdquo chiec nebi —queposh mayan bëda.

¹⁰ Adsho tantiashini Nuquin Icbo danec ismenuec danëshën tinquebuduidpoc.

Adshobini: —Ëbi aden ismenda. Nuquin Papauïdtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaïd dada uamepampic. Aidëmbidi namiac mibipadquidoböd Esusën yua nebique. Ëbi aden ismenda —queposh mayan bëda.

Cabayo ushu catsadquid bédamboshë icquid

¹¹ Adshumbic abuc isquin Nuquin Papa yacno shëcnepamboacscho ispombi. Adshun isquien auëshquo cabayo ushumbo icquid catsadec chuiquid dapambo choposh. Adsho isun: —Abi tantiaquidoböd cuëshëdtiapimbo icquid yec ambi chiacpadomboen naquidquo Esusquo nec —quequin tantiombi. Ambi chiacpadomboen icsaïdo cuidquidquo icquin icsaïdo cuesun secanuec niosh. ¹²—Matsesën ompodëmëdtiapimbo icquidquo nec —camenuc cuëte isquidquo icquidbimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bédada uadaïd tantiadenquo icposh. Utsibon tantiatiapimbo icnuc ambentsëqui tantiante niosh. —Nuquin Papabëdtan Esusën naïdtedimbo matsesën tantiatiapimbo iquec —camenuc adec bédada uadaïd ismeposhi.

¹³ Abi cuëmëdquid utsiembi tantiatsëccoc. —Nuquin Papapadquidquo yec abi tan-

tiamianquid nec —quequin cuënaid niosh. Aton dashcute bëntse icquid cuidaidën intaquën punacbimboec piumboshë isadposh. —Abi tantiesabo cuidquidquio nec —camenuen aden ismeposhi. ¹⁴ Esus bëyuc nidnuc abi tsibanec abi tantiaquidobëd mayan bëdabo cabayo ushucquidquidquio catsadcuededec cho-choposh. Icsaisa icmi-aido yec dashcute ushumbo icquid bëchish nibëdquidquio dasiuidcuededposh. ¹⁵ Abi bëyucquid ana shëcuënuëshquio chështe cuënumbo icquid cueshqueposh. —Ambi chiacpadomboen matses icsaïdo abitedi cuidquidquio Esus nec —camenuen aden ismeposhi. Adquid icquin nidaïd utsi-utsiec yacno tabadquido icsauidequi icsho uesquin cuesun secaindac. Nuquin Papan chiacpadomboen inquin shancuimbimboecquid uba caïd nua ënë icnuc tish-tishacbimboen nua intac icnuc cuesun secaindac. ¹⁶ Aton dashcute bëntse icquidën abi cuëmëdquid utsi dada uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bësudquid yacnombo adembidi dada uaccosh.

¹⁷ Adnubien ushë mëducquio tabadquin mayan bëda utsin edeste chedo abuc cuen-cuensho comapenec cuëdquin chuïposh. —Nuquin Papan cuidquin cuesun secaidon nami chec cho-cho. ¹⁸ Èmbi chiacpadec cho-choshon matsesën nami mimbi nua tËpuisquin chendac nëïdtedi. Nëïdic matses utsi-utsien chuiquid dapabo. Nëïdic sondado chuiquid dapabo. Nëïdic dada cuesabo. Nëïdic cabayo chedo abi catsadquidobëdtabi. Nëïdic matses utsibo abitedimbo. Nëïdic matses yuabo. Nëïdic matses yuapenquio. Nëïdic bacuëbo. Nëïdic caniaïdo abitedi. Adquidtedi uesquin chec cho —quequin edeste chedo chuïposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

¹⁹ Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh chochoed chuiquid dapa icsamboshë icquid chedo nidaïd utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobëdta cuesun secanu —caqui ²⁰ cuesun secadenquio icposh. Adshobien Esusën acte uquëducuësh chochoed chuiquid dapa icsamboshë icquid bedposh. Adotanquimbic aid tantiamequid nidaïd shëcuënuësh chochoed Satanasën oncamiaïdtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiacpadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Èbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabëdta bedshun unës uabi chian dapa ënëdenquio yec anëdënquequid icsamboshë nuadquidquio nësecaposh. ²¹ Adshumbic Esusën ana shëcuënuësh chështe cuënumbo icquid cueshquequidën: —Èbi chieshënquidotedi unësta —caquien cho-chochoed utsibo abitedi unësbudneposh. Adsho isun caimboedon edeste chedon nua-nuaic tËpuisquin matsesën nami chebededposh. —Aden Esusën abi chieshënquido nibëdamendac —camenuen aden ismeposhi.

Satanas uidën uaid

20 Adshumbic padpiden ismeaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaïd dapa sanamposh. ² Adshumbic Eba icsamenuec nisipampid Satanasquio bedposh. Bedtan-

quimbic shocosh bucubimboecnuc nacnenaidën ambi sanamboedën uidën uaposh. ³Uidën uatanquimbic aton yuabo uidën uacno shëcuë aneposh. Adotanquimbic shëcuë bêtashquioposh puduentiapimbo icnuc. Seta dadpenquio 1000tedi matameshun bêtashte chicshun Satanases cuemenuen adoposh. —Aden seta 1000tedi matamiabi icquin abi uidën uactedembi matses muauaquin icsametiapimbo iquec —qeshun chicten bidiacquin uidën uaquipoposh. Aden ismeposhi.

⁴Adshumbic utsitsen ismeoposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanases uidën uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choboed chuiquid dapabëdta abibimboecnuc nacnenaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadiapiambo icquido niosh. Utsibic mësiadiapiambo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiactabaposh. ⁵Unësaidotedi uincuemiambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. ⁶Adnubien tauaquin uincuemiaido bëdambo yec cuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “Esusbëd Nuquin Papa bëdamboshë iquec, canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

Satanasquio chian anëdënquequid nëniaid

⁷Adshumbic aidtedquio seta 1000tedi matameshun uidën uaid chicquin Satanases cuemendac. ⁸Adoquien matses icsamenuec muaquin chiech nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëte podotedi dadpenquioshë.

⁹Aidtedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. ¹⁰Adshumbic aido icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anëdënquequid Satanastsen nënëndac. Adoac aido ënëdenquio yec natiamboshë iquendac. Aden ismeposhi.

Icsambo icquido cuidte chiaid

¹¹Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuac adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec. ¹²Nuquin Papa yacno unësaido uincuemiaido abitedimbo tabaposh. Adnubien bëshunenquio icquin dada uaten dada uabanacnimboen Nuquin Pa-

pan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuibamposh. ¹³ Unësaïdo abitedi icposh. Utsi-utsiec unësaçsho chian dapa mad caid nëniãido uincuemiaïdo niosh. Utsi-utsiec nidaidën chococaid uincuemiaïdo niosh. Adsho aidon naidtedi Nuquin Papan chuibamposh. ¹⁴⁻¹⁵ Adshumbic Esus tantiesabo icsho documento nibëdquidbimboecsho abi yacno tabadmenquo icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquo icposh. Adnubien Esus tantiaquido Nuquin Papa yacno tabadec unëstiapimbo icquidoidquido icposh. —Adquid iquendac —quequin aden ismeposhi.

Nuquin Papabëd tabadaidquido

21 —Esus tantiesabo chian anëdënquequid nësecaindac —quequin ismeboshombic padpiden ismeaposhi. Adoac abu chucambo icsho ispombi. Nidaidtsen chucambo icposh. Abubëdi nidaid shëni nibëdnuc utsi chucambo icquiduidquido icposh. Ënden iccondaid chian dapa mad caidtsen nibëdposh. ² Adnubien Esusbëdi Nuquin Papa tabadaidquido abichobi Edusaden chuca caid abucuësh budposh. Chido nëbi bedboedën aton bënë cuishoncamiacimboc cuishoncamianguid yec bëdamboshë icposh. ³ Adnubien Nuquin Papa tsadacnuëshquido comapenec cuëdposh naden chiec. —“Con matses nec,” quiaçsh nëbi Nuquin Papa matsesbëdi tabadendac cuëshëdenquo yec. Adsho isun aton yuabo icquin matses abitedishun: “Nuquin Icbombo nuqui tantiaidquido nec,” caindac. ⁴ Ambo Nuquin Papan abitedi chuca uacnombo aidbëdi tabadec matses shubitiapimbo iquendac bëun ucacimboc. Nidaid shënin tabadec abitedi unëstequiduidquido icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindambi bëdamboshë icnuc —queposh Nuquin Papa Esusbëdi. Adshumbic ëbi chuiposh. —Ëmbi aden chuiboed dada uata. Ëmbi muesambo icquin abimbo chiaid nec —queposh Nuquin Papa Esusbëdi.

⁶ Adashic Nuquin Papa padpidec onquec: —Ëmbi chuiboctedimbo nainquin naindambi utsibon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacimboc ëbëd tabadte bunquidon con Mado Esus tantiasho ëbëdi tabadmendambi. ⁷ Satanasën: “Chieshtomenu,” cauidaïdo Esusbëdta ëbi chieshtoenquo icquin tantiaquido ëbëdi tabadmendambi bëdamboshë yacnombo. Ëbi papa casho: “Ai, con mado mibi nec. Con champi mibi nec,” caindambi. ⁸ Adshumbic utsibo chian dapa anëdënquequid icsamboshë nuadquid nësecaindambi. Nëidtedi icsamboshë icquido adoendambi. Nëidic ëbi bëdiactsäc tantiauidtsëcboedobi chieshëmënuquidon: “Cuesnu,” cac chieshtoash tantiesã yanoaïdo. Nëidic Esus tantiesabo abitedi. Nëidic icsamianquido. Nëidic chieshëmëneg cuesunianquido. Nëidic dada aton dada utsibëdi chichudnanquido. Nëidic aton chidopenquo chudquido. Nëidic aton bënëpenquo chudmequido. Nëidic nënëchoquidobëdtabi cuëte podon unës uante bunquido.

Nëidic ambi nacnenaidi papa caquin tantiaquido. Nëidic muauanquido. Aidedi chian dapa anëdënquequid nësecaindambi —queposh Nuquin Papa.

Abi tantiaquido Esusbëd icte chiaid

⁹Adnubien mayan bëdan Nuquin Papan matses cuidte cushtoaid chiuimboed abentsëc choshon chuioposhi. —Isec cho. Chido nëbi bedboedën aton bënë cuis-honcamiacimboen abided cuidadec unësaid Esus cuishoncamequido tabadaid mibi ismenu. Cho —cposhi Esus tantiaquido ismenuen. ¹⁰Adshumbic Nuquin Papan Mayanën tantiamiac ushquin isacimboen isombi. Mayan bëdan ëbi buanquin is-pombi. Aden buanshun macuësh dapa mananënquio tsadumposhi. Adoac anoshon isquien abucuësh Nuquin Papa abi tantiaquidobëd abi tabadaid abichobi shubu dad-pen icquid budposh. Aid tabadaid Edusaden chuca cposh. ¹¹Aid tabadaidquio aid shubutedi Nuquin Papa tabadaid yec abi yacpadquio abichobi bëchamuanquiecposh. Casëdu bëdambo icquidimboec isquid-isquidquio isadposh. ¹²Shubu abitedi nënantan icnuc abichobi daquënë uaid icposh. Abucquio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bëdabo 12tedbidi icposh. Aid shëcuë bëtashte 12tedbidi icposh. Aid bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada uatanquimbic adenuidi bëtashten bëtashtenquien Acobon mado cuëmëdquid cuëmëdquidquien dada uabampaccosh. ¹³Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aidedbidi shëcuë icoaposh. Ushë nibëdaucbidi sud yauc aidedbidi shëcuë icposh. Ushë bu-dauc aidedbidi shëcuë icposh. ¹⁴Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbëd icquido ëbitedi cuëmëdquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmëdquid Uan dada uatanquin cuënote utsin Petedo cuëmëdquid dada uapaccosh. Adenuidi cuënoten cuënotenquien Esusbëd icquido cuëmëdquid cuëmëdquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmëdquidotedi dada uaidbëdta Esusbëd icquido cuëmëdquid dada uaid aden ismeposhi.

¹⁵Adshumbic ëbi chuiobedën mayan bëdan shocosh bëdaidquio nacnenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh. ¹⁶Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionquibidi icposh. ¹⁷Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacnenaid tambanten tanac metedos 65ted cactiombi icposh nuamboshë bitsipambo.

¹⁸Daquënë uaid abichobi isquid-isquidquio isadposh. Bëdamboshë icposh. Pad-nuen shubu abitedi shocosh bëshpiu-bëshpiuctsëcquid nacnenaiduidquio yec nacnacquio icposh. ¹⁹Aid daquënë uaqin tauaquin sandoaid nidaid cuënote dapa casëdubimboecquid bëdambo icquid matses comapenec bunaidquio utsi-utsien

dabitaccabanaid niosh. Abentsëc aspe caid umu-umumboctsäcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. ²⁰ Utsibic onise caid piumbo icquid. Utsibic conadina caid piu-piupactsëcquid. Utsibic quidisdito caid bëshpiu-bëshpiupactsëcquid. Utsibic bedido caid umu-umupactsëcquid utsi. Utsibic topasio caid piu-piupactsëcquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidedi dabitaccabanaccosh. —Nuquin Papa yacnombo bëdam-boshë iquendac —camenuen aden ismeposhi. ²¹ Daquënë uaid puduedte shëcuë 12tedi icposh. Aid bëtashtetedi acte chiumbimboecquidën casëdu ushu uaid nuacquid dapambo abichobi-abichobien nacnenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiuctsäcquid acte-actectsäcquio icnuc mabiunaid icposh. —Esusbëd Nuquin Papa tabadacnombo bëdambo icquiduidquio iquendac —camenuen aden ismeposhi.

²² Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icho Esus abided cuidadec unësaidbëd Nuquin Papa icsho bëisquioquin tantiec anocquido tabadendac. ²³ Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaid bedshunuec abided cuidadec unësaid Esusbëd Nuquin Papa bëchamauanquiecquid icquin ambo ushëmbouidi icmendac. Inchëshaid tantiadenquio iquendac. —Nuquin Papa icsaisambo icnuc abi yacno icsaido nibëdquio iquendac —camenuen aden ismeposhi. ²⁴ Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenec tabadcuenash: —Esusbëd Nuquin Papa abitedishun Icbombo nec. Abipadquid utsi nibëdec —quendac. ²⁵ Nuquin Papa matsesbëdi tabadacnombo inchëshenquio icnuc: —Icsambo icquido puduednushe. Bëtashnu —quetiapimbo icsho isun daquënë uaid shëcuë bëtashenquio iquendac. Shëcniacchobi iquendac. ²⁶ Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen tantiaquidquio yec abitedishun Icbombo nec. Abipadquid utsi nibëdec —quendac abitedi. ²⁷ Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uacbimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquio bëdamboshëuidquio iquendac —quequin aden ismeposhi mayan bëdan.

Nuquin Papa yacno acte ismiaid

22 Adshumbic aid mayan bëdan padpiden ismeoposhi. Adoac Nuquin Papa abided cuidadec unësaid aton Madobëdquio tsadte dapan tabadacnuësh matses unëtiapimbo icmetequid acte bëdambo icquid nushan nibëdquidquio chëuëdsho ispombi. ² Nuquin Papa yacnuëshquio choec chëuëdec ambo tabadquido Esus tantiaquido tabadaid shubu nënantanquio chëuëdposh. Aid cuëmambi matses unëtiapimbo icmetequid cuëtetsen icposh. Baded-badedquiec bacuëquidquio niosh.

Inchëshën ushë choan-choanquieq badedquio bacuëquid niosh. Aid cuëte podò nidaid utsi-utsiec yacno tabadquido bëdambo icmetequid niosh. —Aton Mado abided cuidadec unësaid tantiaquido abëdi tabadmequin Nuquin Papan unësti-apimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi. ³Aden abitedi bëdambo icmiac cuidtequido nibëdquio iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquieq Esus tantiaquido tabadendac. ⁴Adec: —Con bacuëbo nec —quequin Nuquin Papan abi cuëmëdquid dada uaqin bësiaidon Nuquin Papambo bëisquieq tabadendac. —Nidaidën tabadec bëdamboec tabadquido Nuquin Papabëd tabadec abipadquio bëdambohë yanendac —camenuen aden ismeposhi. ⁵Ambo bëdamboidquio yec inchëshenquio iquendac. Nuquin Papa bëchamauanquieqquidëmbi ushëmboidquio iquendac inchëshaid tantiadenuo yec. —Aden abi tantiaquido bëdamboen isquin ënenquio icquin bëdambohë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

⁶Adshumbic mayan bëdan chuiaposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

Esus chote chiaid

⁷Adnubini Esusënquio naden chuiposh. —Chieshtoenquio icquin ëbi tantiaata. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

⁸Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuec. ⁹Adshobini: —Padi. Aden ëbi ismenda. Mibipadquid Nuquin Papan yuabidi nebique. Èdenquimboshë Nuquin Papan tantiamiac min tsusedpabo isadaidbon ambi chaidquio dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidt-sëqui tantiaquin aden ismeta —caposhi mayan bëdan.

¹⁰Adashic padpidec: —Èmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquio icquin Esus tantiec ma tabadnu,” queshun dada uata. ¹¹Nëbimbobi Esus chonoc Esus tantiesabo badedquio bëdamboec tabadcuentiapimbo iquendac. Abi icsaid badedquio ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun —queposh mayan bëda.

¹²Adnubini Esusën chuiaposh. —Chieshtoenquio icquin ëbi tantiaata. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi. ¹³Nuquin Papapadquidquio nebi. Èmbi tantiacmaid nibëdnuc abitedi comapenen tantiaquidquio nebi. Nidaid uabi yec ictenedi

nëbi adquidquo yec nibëdantiapimbo icquid nebi. Adquid yec abitedishun Icbombo nebi.

¹⁴Icsambo icboedon ëbi tantiasho icsaisabimboecnuc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiacbimboen. ¹⁵Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podò chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquo chudquido. Nëidic aton bënëpenquo chudmequido. Nëidic cuesanquido. Nëidic papa quequin ambi nacnenaiddi tantiaquido. Nëidic abi bunaiduidquo naic muauanquido. Aidedi Nuquin Papa yacno puduedtiapimbo iquendac.

¹⁶Ëmbi chiapadomboen mayan bëdan mibi ismebamposh. “Ma ëbi tantiaquidon iste dada uanu,” quequin ëmbi chiapadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquo nebi. Utsin: “Dëniacnu,” cadiapimbo icquid nebi. Adquid icquin matses abitedimbo namendambi —quequin chuiposhi Esusën.

¹⁷Adsho tantiashun Nuquin Papan Mayanën tantiamiacpadomboen chuiquin: —Nëbimbobi Esus chonoshe. Aidquo tantiabenta —caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: —Nëbimbobi chonoshe. Aidquo tantianuna —cac bëdambo ictsiashe. Adsho tantiash Esus tantiesabo acte bunacimboec Esus tantiate bunsho Nuquin Papan bëdamboen isendac. Nuquin Papa bëdamboen ismenuen menete nibëdnuc Esusuidi tantiasho Nuquin Papan bëdamboen isquin abëdi tabadmendac.

¹⁸Tantia. Ëmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ëbi ismeboedtedi dada uaombi. Ëmbi dada uaboed tsitënquin ambembi chiaid dada uainda. Ëmbi chuibocpadomboen Nuquin Papan mibi cuidtsiashe. ¹⁹Adembidi ëmbi dada uaboed utsi uainquo icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquo ictsiashe. Adembidi bëdamboshë yacno abëdi mibi tabadmenquo ictsiashe.

²⁰—Ma aidedi tantianu —quequin Esusën chiapadomboen mayan bëdan aidedi ismeposhi. Ëmbi chuibocpadomboen Esusën: —Nëbimbobini choendac —caposhi. Adsho tantiashun: —Ai, nëbimbobi chota —capombi.

²¹Mibitedi Esus tantiaquidotedi tantiaquin: —Ambi nabocpadomboen Nuquin Icbo Esusën bëdamboen isquin bëdambo icmepashun —caimbi. Padi. Aidedi chuiquin dada uaombi.